


# Godeeyo To Tekepo



Portions of the New Testament in the Odoodee language of  
Papua New Guinea

**Godeeyo To Tekepo**  
**Portions of the New Testament in the Odoodee language of Papua New Guinea**  
**Sampela hap Nupela Testamen long tokples Odoodee**

copyright © 2006, 2015, 2017 Wycliffe Bible Translators, Inc.

Language: Odoodee

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2023-04-30

---

PDF generated using Haiola and XeLaTeX on 18 Apr 2025 from source files dated 31 Aug 2023  
ffb0eddd-0f6e-5201-89ab-6fcbfcaebaba

## Contents

FRT . . . . .	1
INT . . . . .	2
Matiyu . . . . .	3
Maka . . . . .	67
Luka . . . . .	106
Yonee . . . . .	171
Diye Di Odoo . . . . .	219
Loum . . . . .	280
1 Tesalonika . . . . .	308
2 Tesalonika . . . . .	314
1 Timoti . . . . .	317
2 Timoti . . . . .	325
Taites . . . . .	331
Palimon . . . . .	335
Yemes . . . . .	337
1 Yonee . . . . .	344
2 Yonee . . . . .	351
3 Yonee . . . . .	352
Yuda . . . . .	353
XXB . . . . .	356
Pidi to abo . . . . .	359

## **Godeeyo To Tekepo**

Published with support of Friends of the  
Odoodee people

A Partial New Testament in the Odoodee  
language

which is spoken by approximately 700  
people

who live in Western Province, Papua  
New Guinea

Illustrations on pages 17, 50, 56, 63, 70,  
73, 75, 89, 91, 92, 93, 97, 100, 109, 136,  
182, 199, 241, 322 and 352 (2x) are by  
Louise Bass © The British & Foreign  
Bible Society, 1994.

Illustrations on pages 3, 7, 41, 67, 80,  
102, 104, 107, 112, 115, 118, 170, 178,  
180, 191, 202, 206, 218, 222, 226, 229,  
238, 245, 261, 263, 284 and 286 are ©  
1996 David C. Cook. Used by permis-  
sion.

Illustrations on pages 6, 65 and 187 are  
by Darwin Dunham © United Bible  
Societies, 1989.

Illustrations on pages 94, 148, 334 and  
353 are by Horace Knowles © The  
British & Foreign Bible Society, 1954,  
1967, 1972, 1995.

Illustrations on pages 122, 171, 304 and  
308 are by Gordon Thompson © 2012  
Wycliffe Bible Translators Inc. and  
are licensed under the Creative Com-  
mons Attribution-NonCommercial-  
NoDerivs 3.0 Australia License.

Illustrations on pages 5, 27, 44, 55, 66,  
120, 150, 158, 196 and 243 are by Gra-  
ham Wade © United Bible Societies,  
1989.

© 2017 Wycliffe Bible Translators, Inc.

First Edition 2017 - 150

ISBN: 0 86893 492 5

## **Preface**

This book contains the following New Testament books, translated into the Odoodee language: Matthew, Mark, Luke, John, Acts, Romans, 1 & 2 Thessalonians, 1 & 2 Timothy, Titus, Philemon, James, 1,2,3 John and Jude.

All Scripture is inspired by God and is useful for teaching the truth, rebuking error, correcting faults, and giving instruction for right living, so that the person who serves God may be fully qualified and equipped to do every kind of good deed. (2 Tim 3:16-17)

We pray that God, through the Word of His grace, will build up the faith of the Odoodee people.

## **To daga malalo**

Booka toowa hagee ma kulodu booka pepuso hagee moloso: Matiyu, Maka, Luka, Yonee, Diye di odo, Loum, 1 & 2 Tesalonika, 1 & 2 Timoti, Taites, Palimon, Yemes, 1,2,3 Yonee, osoloso Yuda.

Godeeyo to booka mapoo hogugu susuga ee Godee maga simi. Esiga Godeeyo to booka mapoo hogugu goo oso odo mapoo tei goo eligilone, edebeeyo dooboo dagaduga, tei goo eligi mapoo ka ido sibo domoloso. Osoloso Godeeyo to booka mapoo hogugu goo oso edebeeyo tekepo badeli goo ee eligiliso, Godeeyo odo oso mopoodoo doloso goo tekepo susuga tomo silesibilei ee tebilame. (2 Timoti 3:16-17)

Iyo Godee mapoo takooso, Godeeye yayo sooloo dolone pidili to tekepo maga nibada tei too goo ee kibilame.

## Matiyu To tekepo Matiyuye hogugu

### *Matiyu booka goo eyo bei*

Matiyu yo Yesu o hamamee dili odo 12 ee ma kulodu hee yoso. Yo o hu hee Libai deliso. Yu odooso Yesu mapoo tei talame to hogugu hagee yayo dimapoo teneeso. Esiga yayo to hogugu hagee ma kulodu Godeeye To Magoo Booka Nape mapoo taka goo ee Yesuye medee tobuloso tomo sileeso. Osoloso Yesu Yu odooso bamelee Kelisoso.

### *Yesuwo amawe dio (Luka 3:23-38)*

- <sup>1</sup> Yesu Keliso yo Deibidiyo amawe, osoloso Deibidi yo Eibalahameeyo amawe. Esiga Yesuwo amawe dio dia hu hagos.
- <sup>2</sup> Eibalahameeyo owolo Aisek, osoloso Aisekeeyo owolo ee Yekob, Yekobeeyo owolo ee Yuda, osoloso Yekobeeyo owolo dio abo.
- <sup>3</sup> Osoloso Yudayo owolo ee Peles dio Sala dio (osoloso egee bia dia owee ee Tamala), osoloso Peleseeyo owolo ee Heslon, osoloso Hesloneeyo owolo ee Lam.
- <sup>4</sup> Osoloso Lameeyo owolo ee Aminadab, osoloso Aminadabeeyo owolo ee Nason, osoloso Nasoneeyo owolo ee Salmon.
- <sup>5</sup> Osoloso Salmonowo owolo ee Bowas (Bowaseeyo owee ee Leihab), osoloso Bowaseeyo owolo ee Obed (Obedeeyo owee ee Lut), osoloso Obedeeyo owolo ee Yesi.
- <sup>6</sup> Osoloso Yesiyo owolo ee wiligi odo toboloso badebei Deibidiso. Deibidiyo owolo ee Solomonow. (Solomonowo owee ee daga Yulayayo osobo.)
- <sup>7</sup> Osoloso Solomonowo owolo ee Lehobowam, osoloso Lehobowameeyo owolo ee Abiya, osoloso Abiyayo owolo ee Asa.

- <sup>8</sup> Osoloso Asayo owolo ee Yehosapat, osoloso Yehosapateeyo owolo ee Yeholam, osoloso Yeholameeyo owolo ee Yusaya.
- <sup>9</sup> Osoloso Yusayayo owolo ee Yotam, osoloso Yotameeyo owolo ee Ahas, osoloso Ahaseeyo owolo ee Hesekeya.
- <sup>10</sup> Osoloso Hesekeyayo owolo ee Manase, osoloso Manaseyo owolo ee Amon, osoloso Amoneeyo owolo ee Yosaya.
- <sup>11</sup> Yosayayo owolo ee Yekonaya, osoloso Yosayayo owolo dio abo.

Biame domo omapoo Isalael odooso odo abo sabolo ha temeleso, diba Babilon mi mapoo dabalame iyado diso.

<sup>12</sup> Esiga Isalael odooso Babilon mi mapoo dala ma kulodu debei biame omapoo Yekonayaye giso holo soomagooso, o hu ee Selatiyel. Osoloso Selatiyeleeyo owolo ee Selubabel.

- <sup>13</sup> Osoloso Selubabeleeyo owolo ee Abiyud, osoloso Abiyudowo owolo ee Eliyakim, osoloso Eliyakimeeyo owolo ee Asol.
- <sup>14</sup> Osoloso Asolowo owolo ee Sadok, osoloso Sadokowo owolo ee Akim, osoloso Akimeeyo owolo ee Eliyud.
- <sup>15</sup> Osoloso Eliyudowo owolo ee Eliyasal, osoloso Eliyasaleeyo owolo ee Matan, osoloso Mataneeyo owolo ee Yekob.
- <sup>16</sup> Osoloso Yekobowo owolo ee Yosep. Esiga Yosepeeye Meli huso. Osoloso Meliye Yesu edebeeyo takolone Keliso deli ee soomagooso.

<sup>17</sup> Esiga Eibalahameeye badebei biame omaga bei mooloogooloso di wiligi odo Deibidiye badebei biame omapoo, Kelisowo amawe dio 14 odo hagee biaso debeiso. Osoloso wiligi odo Deibidiye badebei biame omaga bei mooloogooloso di Babilon odo oso Isalael odo dala ma kulodu gilimado di biame omapoo, Kelisowo amawe dio 14 odo hagee biaso debeiso. Osoloso abaga bei mooloogooloso di Yesu soomagoo biame mapoo, Kelisowo amawe dio 14 odo hagee biaso debeiso.

*Yesu Keliso soomagoo  
(Luka 2:1-7)*

<sup>18</sup> Yesu Keliso soomagoo goo ee egeesee moloso. Owee Meli Yosepeeye hulame dadagoloso debeiso. Esino diba huilega dobolone, Meli yo Dio Tei oso kitulugu maga koowasi moodoo goo ee eyo nediliyo ogoloso gooleedooso.

<sup>19</sup> Esino Yosepeeye goo hagee duloso, gowoolone Meli pagalame gooleeso. Esino Yosep yo Godeeyo howo woola tekepo badeli. Esiga odoo susuga eyo howo woola Meli pagalai yo goomegele. Egeeseelone Meli hulame dadaga ee mada pagalame yo goomogaso.

<sup>20</sup> Yosep yo goo hamaga goolone bado-boome, Godeeyo momaiye oso sapootia mapoo yimapoo sibilesi egeesee takaso, “Yosep, Deibidiyo amawe, no Meli hulei na ebi. Bei, yo Dio Tei oso kitulugu maga koowasi moodooloso ka badoso.

<sup>21</sup> Esiga yo giso holo soomagalaiso. Egeeseega nayo o hu Yesu hedi. Bei, o odoo oso dibada goo tokenee eyo nei telega pagalame, yayo diba pidileiso,” diso.

<sup>22</sup> Esiga Godeeye o odoo yimaga to toloso kokodo takomo sili odoo yimaga to taka goo oso tei dalame, goo susuga hagoso tei peledabaso. Bei, yayo egeesee takaso,

<sup>23</sup> “Sobo obuo giso dia goo gooleedele pogooso oso koowasi moodooloso giso holo soomagalaiso.

Osoloso odoo susuga oso o hu ee Imanuwel dolone dabalaiso,” diso. Hu eyo bei ee Godee ibolo hodobo badoso.

<sup>24</sup> Esemme Yosep yo tia hogabuloso Godeeyo momaiyeso yimapoo taka to ee dodolone Meli huso.

<sup>25</sup> Esino Yosep dio Meli dio hedebe del-ega badolone, Meliye giso holo soomagooso. Esemme Yosepeeye holope o hu Yesu hediso.

## 2

*Giwo hesigeli odoo oso Yesu agalame di*

<sup>1</sup> Helodeeye Yu odoowo wiligi odoo toboloso badebei biame omapoo, Yudiya mi toowa ma kulodu Betilhem mi pepooko mapoo Meliye Yesu soomagooso.

Yesu soomagoloso hamamee giwo hesigeli odoo oso osokoso sibili maga Yelusalem mi mapoo sibadeeso.

<sup>2</sup> Diba Yelusalem mapoo peledoboloso egeesee takomo silesibiso, “Ibada midee mapoo dobolone egeino, giwo toowa osokoso sibili omapoo molome egeiso. Iyo giwo egee ogoloso, wiligi odoo hee olo soomagoo doloso gooleedoloso hamapoo ka sibadee. Esiga holope Yu odoowo wiligi odoo toboloso badalame soomagoo ee kasomo? Bei, iyo o hu dokodoo poudalame ka sibadee,” dee takomo silesibiso.

<sup>3</sup> Esino wiligi odoo Helodee sabolo osoloso Yelusalem mapoo debeli odoo susuga sabolo oso goo hagee duloso diya gooleeso.

<sup>4</sup> Egeeseelone Helodeeye tei moso wiligi odoo tebisa sabolo osoloso tei eligili odoo gilimadoloso dimapoo egeesee takaso, “Godee maga to toloso kokodo takomo silesibili odoo oso takolone Keliso kamapoo soomagalaigona?” diso.

<sup>5</sup> Esemme diayo nei egeesee takaso, “Yudiya mi toowa ma kulodu Betilhem mi pepooko mapoo soomagalaigona diso. Bei, Godee maga to toloso kokodo takomo sili odoo oso egeesee hoguguso,

<sup>6</sup> ‘Betilhem Yuda mi ee ma kulodu, Nayo Yuda mi toowa ee ma kulodu goo toowa ka moloso.

Bei, nee mi omaga wiligi odoo tabalai ee sibileiso.

Yayo mo odoo Isalael mi mapoo debeli odoo ee bamalaiso,’ dee takeliso.”

<sup>7</sup> Esemme Helodeeye goo hagee duloso, giwo hesigeli odoo mapoo giwoso peledaba biame ee gooleedalame diba mada gilimadooso.

<sup>8</sup> Osoloso diayo nei taka duloso diba Betilhem mapoo diye dolone to egeesee takaso, “Niba dileso holope egee medee esiameliso ogoloso see wedi sibilesi amapoo takee. Egeeseega anosee yimapoo dileso o hu dokodoo poudileiya,” dee takaso.

<sup>9-10</sup> Esemme giwo hesigeli odoo oso Helodeeye to duloso dulone, giwo diayo dia mi mapoo egei hedebe onosee see

egeiso. Diba giwo egee ogoloso diya goomoga sabolo giwoso malalo dime hamamee deede diso. Diba giwo egee hamamee dodomo dime, giwoso dileso holopeso badebei moso eyo tobudu pouni meleeso.

<sup>11</sup> Esem giwo hesigeli odoososo holopeso badebei moso eyo kulodu gadilesosogeino, holope owee Meli dio badoboome egeiso. Esem diayo gauwulosodobolone holope eyo hu dokodoo poudooso. Osolososogeimegei di bi gold molee, osolososigamedeesisigageli bi medeetekepo, osolosomopoodoo sokolo mapoo hedili hageeseyimapoo teneeso. <sup>12</sup> Esino diba see wedi dilame tiano, sapootia mapoo Godeeye dimapoo egeesee takaso, “Niba see wedi duga, Helodeeye badebei maga na di. Esino niba eli hee maga nibada mi mapoo ka diyadee,” diso. Esem diba to ee dodolone eli hee maga dibada mi mapoo diyadeeso.

### *Isipi mi mapoo kukulo di*

<sup>13</sup> Osolosohamameegiwohesigeli odoosolo dime, gesi omapoo Yosep tiamolome, sapootia mapoo Godeeyo momaiye ososibilesoyimapoo egeesee takaso, “No hogabulosoholope sabolosolososowe sabologilimadoloso Isipi mi mapoo kukulo di. Bei, Helodeeyo odoosoholope egee wooloomalame esiamosibileiso. Esiga niba kukulo dileso Isipi mi mapoo dabalame di. Niba omapoo dileso doganiyo see wedi sibilei biame ee ayo nimapoo takalaise,” diso.

<sup>14</sup> Egeesee taka duloso gesi omapoo Yosep hogabulosoholope sabolosowe sabologilimadoloso Isipi mi mapoo kukulo diso.

<sup>15</sup> Diba omapoo dileso Helodee towa belesobameleeso. Esiga goohageeteipeledabaso, Godeeye o odooyimaga to tolosokokodotakomosilisiodooyimaga taka to sabolotebilame. To ee hagoso, “Ayo mo holo Isipi mi ee poogolososibilame iso.”

### *Giso holaiso piligu*

<sup>16</sup> Esino giwo hesigeli odoososo Helodee mapoo takalame see wedi sibilega, eli hee maga dibada mi mapoo wedi digoo ee duloso yodiya kamasano. Osolosoyayo eyone diliyoegeesee gooleeso, “Giwo hesigeli odoosogiwo dia midee mapoo egei biame omaga simi dugo bakadio olo poogooso. Esiga ayo mo odoosomapoo takolone, gisoholaisodugobakadio poogoo sabolosolosodima hamamee soolooga magoo sabolo piligiye daga, holope egee sabolo wooloomalaise,” diso. Esiga yayo o odoosomapoo to kituluguteneeso, diayo Betilhem mi mapoo osolosomi pepusosobokoola mapoo bumodi, omapoo dileso gisoholaisopepusosusuga piligilame. Esem diayo dileso gisoholaisodugobakadio osolosodima hamamee soolooga magoo sabolo piliguso.

<sup>17</sup> Esiga goohagosopeledoboome Godee maga to tolosokokodotakomosilisiodoo Yelemayaye taka to saboloteibaso. Bei, yayo egeesee hoguguso,

<sup>18</sup> “Diya gooheleme Lama mi ee ma kulduga pisa ee duso.

Bei, sobo Laiseleeye owolo dio halo kapusumosiloso.

Esiga yo pisa koo koodobuoso.

Bei, owolo dio susuga olo piliguga.”

### *Yosepeeye Nasalet mi mapoo see wedi simi*

<sup>19</sup> Yosep Isipi mi mapoo osee badoboome, wiligi odootaba Helodee taso. Esem Yosep tiamolome sapootia mapoo Godeeyo momaiye ososibilesoyimapoo egeesee takaso,

<sup>20</sup> “No hogabulosoholope sabolosowe sabologilimadoloso Isalael mi mapoo see wedi di. Bei, giso holo egee wooloomalame esieli odooegee bia olo wediaso,” diso.

<sup>21</sup> Esem Yosep to hagee duloso, holope sabolosowe sabologilimadoloso see Isalael mi mapoo wedi diso.

<sup>22-23</sup> Esino Helodee teme, see owolo Akaleyoseeye Yudiya mi mapoo wiligi odootobolosobadebeiso. Esem Yosep goohagee duloso mi omapoo dilei ebiaso. Esem



sapootia mapoo Godeeyo momaiye oso see tobu sibilesu yimapoo egeesee takaso, “No Yudiya mi mapoo na di,” diso. Yosep yo momaiyeso egeesee taka duloso see Gelili mi toowa ma kulodu Nasalet mi pe-pooko mapoo badalame diso. Esiga Godee maga to toloso kokodo takomo silesibili odoo oso taka to sabolo teibaso. Bei, diayo egeesee takaso,  
 “Edebeeyo yo Keliso dolone Nasalet odoo dalaiso,” diso.

### 3

*Yonee odoo howo oluguli odoo oso to taka*

*(Maka 1:1-8; Luka 3:1-18; Yon 1:19-28)*

<sup>1</sup> Osoloso Yesu Nasalet mi mapoo bado-boome, Yonee odoo howo oluguli odoo oso sibilesu Yudiya miwe poogoo mi mapoo Godeeyo to egeesee takomo siliso,

<sup>2</sup> “Niba goo goolee su wudoloso nibada tokenee maga miligi pie. Bei, Godeeye wiligi doloso badeli goo oso sibilei olo koola tooboo,” dee takomo siliso.

<sup>3</sup> Esiga Yonee odoo howo oluguli odoo eyo goo maga Godee maga to toloso kokodo takomo sili odoo Aisayaye egeesee takaso,

“Odo heeso miwe poogoo mi omaga egeesee idagoo,  
 ‘Lodeeye sibilei eli moodee.

Osoloso o eli medee hoodo magee,’ dee takomoloso.”

<sup>4</sup> Yonee yo kemol be too oso dugo dusa kaloso silone, gala koloso bagi mapoo gudu masi kaloso siliso. Osoloso nei yayo nali ee tapala sabolo koo sabolo nali.

<sup>5</sup> Odo susuga oso Yelusalem abaga osoloso Yudiya abaga osoloso Yoden howo palaga debeli mi maga Yoneeye taka to ee dulame sibadeeso.

<sup>6</sup> Diba Yoneeye taka to ee duloso dibada goo tokenee yilige bugume, Yoneeye diba Yoden howo mapoo howo oluguso.

<sup>7</sup> Esino Yoneeye odoo howo olugulome, Pelisi odoo susuga sabolo osoloso Sedisi odoo susuga sibilesu omapoo peledabaso. Esem Yoneeye diba ogoloso

dimapoo egeesee takaso, “Niba hebise, nimapoo odoo agayo takolone, niba Godeeye kamana goo egee sibo maga mada pia dabalai teiba, dee ka takana?

<sup>8</sup> Esiga niyo debei goo maga nibada goo tokenee mapoo tei miligi pia goo ee eligi.

<sup>9</sup> Osoloso niba niso nediliyo niba Eibalahameeyo amawe dioga, Godeeye kamana goo maga mada pia dabalaiso, dee na goolee. Bei, ayo nimapoo taka. Godee yimapoo kitulugu moloso, yo hagoso see Eibalahameeyo amawe dio palai.

<sup>10</sup> Esiga kabee homo bei mapoo olo magoo moloso. Esiga homo kaso ko tekepo pelega mologa, homo egee holoso dou mapoo toodalaiso.

<sup>11</sup> Nibada goo tokenee goo mapoo miligi pia maga ayo niba wulo howodee mapoo oluguso. Esino odoo ama hamamee egee sibo oso Dio Tei nima kulodu tenelaiso. Osoloso yayo yimapoo tei tele poogoo odoo ee dou mapoo toodalaiso. Esiga yayo kitulugu oso a dagadi. Esiga ayo o homo mapoo kali bi ee todilei a tebile.

<sup>12</sup> Yayo witi wo ko sabolo osoloso so ee pilame o tou teli bi mopoodoo doloso badoso. Osoloso witi wo ko ee mosopoo kukuleiso. Osoloso witi wo so ee dou koo semili mapoo toodalaiso,” diso.

*Yesu howo olugu*

*(Maka 1:9-11; Luka 3:21-22)*

<sup>13</sup> Biame domo omapoo Yesu Gelili mi maga Yoden howo mapoo Yoneeye yo howo olugulame simiso.

<sup>14</sup> Esino Yoneeye Yesu yo howo olugulei gowoolone yimapoo egeesee takaso, “Bei kasi maga no ayo howo olugulame amapoo ka simiyo? Nayo a howo olugulei tekepo,” diso.

<sup>15</sup> Esem nei Yesuye yimapoo egeesee takaso, “Epedee hamapoo nayo a howo olugulei tekepo. Bei, goo hagee Godeeye goomoga goo oso,” diso. Esem Yonee to hagee duloso Yesu howo oluguso.

<sup>16</sup> Osoloso Yesu howo oluguloso gasibilesu tobudulone egeino, Kei mi osulu yamagoloso Dio Tei oso molo masi pusibilesu yimapoo pubalegeme egeiso.

17 Esemé Kei mi ma dokodooga toso egeesee taka, “Hagee ayo diya gooma mo Holo oso. Ayo yimapoo diya goomogo,” dee takaso.

## 4

*Saitenso Yesu kukulo egei  
(Maka 1:12-13; Luka 4:1-13)*

1 Osoloso hamamee bo holo dia wiligi odo Saitenso Yesu kukulo agalame, Dio Tei oso Yesu miwe poogoo mi mapoo ido palaso.

2 Yo biame 40 osoloso gesi 40 ee ma kulodu nei nelega sileeme yo diya hodiaso.

3 Esemé kukuli odo Saitenso sibilesó Yesu mapoo egeesee takaso, “No tei Godeeyo owolo daga, nayo yo hagoso see wo pe dee takee,” diso.

4 Esino Yesuye nei egeesee takaso, “Godeeyo to booka mapoo hogugu oso egeesee takooso, ‘Edebeeyo hedebe nei nolone badoga, gie badeli talaime. Esino Godeeyo to wo masi nolone badoga, yo gie badeli talaiso,’” diso.

5 Esemé Saitenso see Yesu idoloso Godeeyo hu dokodoo poudili mi Yelusalem mapoo ido diso. Osoloso tei moso tegei omu ma dokodoo ido peleso tobudume yimapoo egeesee takaso,

6 “No tei Godeeyo owolo daga, no moso omu ma dokodooga miyomoo bologobigi. Bei, Godeeyo to booka mapoo hogugu oso egeesee takooso,

‘Godeeye o momaiye mapoo,  
no medee bamelee, dalaiso.  
Egeesega diayo no dia deeso douguleiso,  
no yo mapoo homodobiyaga.’”

7 Esemé Yesuye nei egeesee takaso, “Godeeyo to booka mapoo hogugu oso see tobu egeesee takooso,

‘Nee\* wiligi odo Godeeye taka to ee dada beleso agalame yimapoo na kukulo ege,’ diso.”

8 Osoloso Saitenso Yesu see mubi toowa ma dokodoo ido palaso. Osoloso yayo mi

edebeeyo bia susuga oso toowa di sabolo osoloso oso tekepe ee yimapoo eligiso.

9 Esemé Saitenso yimapoo see egeesee takaso, “Nayo amapoo gasuwoloso a dokodoo poudoga, mi susuga hagee ayo namapoo tenelaiso,” diso.

10 Esemé Yesuye yimapoo egeesee takaso, “Saiten, no amaga peegoo di. Bei, Godeeyo to booka mapoo hogugu oso egeesee takooso, ‘No\* hedebe nee wiligi odo Godee mapoo gauwuloso o hu dokodoo poudoolone o to mapoo ka mesimo sile,’ diso.”

11 Esemé Saitenso Yesu poogoloso diso. Esemé Godeeyo momaiyeso sibilesó Yesu pidiso.

*Yesuye Gelili mi mapoo o tou bei mooloogoo*

*(Maka 1:14-15; Luka 4:14-15)*

12 Yonee odo howo oluguli odo ee neliga moso ma kulodu magoo goo ee duloso, Yesu see Gelili mi toowa ee ma kulodu o midee Nasalet mapoo wedi diso.

13 Osoloso yo Nasalet poogoloso see Kapeniyum mi mapoo badalame diso. Kapeniyum mi hagee Gelili abei palaga mapoo doso. Mi egee bala bakadio Sebulun dio osoloso Naptali egee bia dia mi.

14 Godee maga to toloso kokodo takomo sili odo Aisayaye taka to sabolo tebilame goo hagoso tei peledabaso. Bei, yayo to egeesee takaso,

15 “Gelili odo, niba Yu odoonee sabolo doso.

Nibada mi Yoden howo hodiokoo  
Gelili abei palaga mapoo moloso.

Osoloso odo aboso nibada mi ee Sebulun sabolo osoloso Naptali sabolo dia mi deliso.

Esiga niba mo to dui.

16 Neliga ma kulodu debeli odo, niba gadeebugu toowa agalaiso.

Osoloso odo susuga oso teli mi mapoo debeli odo, nimapoo gadeebugu toowa oso pounileiso.”

3:17: Psa 2:7; Isa 42:1; Mat 12:18; 17:5; Luka 9:35    4:1: Hib 2:18; 4:15    4:2: Exo 34:28    4:4: Deut 8:3    4:6: Psa 91:11-12    4:7: Deut 6:16    \* 4:7: To Isael odoo dimapoo taka hagee Godeeye To Magoo Booka Nape mapoo hogugu moloso.    4:10: Deut 6:13    \* 4:10: To Isael odoo dimapoo taka hagee Godeeye To Magoo Booka Nape mapoo hogugu moloso.    4:12: Mat 14:3; Maka 6:17; Luka 3:19-20    4:15: Isa 9:1-2    4:17: Mat 3:2; 19:27

<sup>17</sup> Osoloso biame domo omapoo Yesuye Godeeyo to takalame bei mooloogoolone egeese takomo sileeso, “Nibada goo goolee su wuduloso nibada goo tokenee maga miligi pie. Bei, Godeeye wiligi doloso badeli goo oso sibilei olo koola toobooso,” dee takomo sileeso.

*Yesuye o hamamee dili odo abo daga malalo gilimadoo*

*(Maka 1:16-20; Luka 5:1-11)*

<sup>18</sup> Biame heeso Yesu Gelili abei palaga maga dimeleeno, di kebili odo bakadio Saimon dio osoloso omolo Endulu dio egeiso. Saimonowo hu hee Pita. Esem diba dia pei howo kulomoo ogusamo sile-sibume, Yesuye sibulone diba egeiso.

<sup>19</sup> Esem dimapoo egeese takaso, “Niba ama hamamee deede sibe. Niba daga di kebigeli odo doloso debeiso. Esino see epedee biame domo hamaga niba see odo susuga Godee mapoo gilimadoloso sibili odo doloso dabalaiso,” diso.

<sup>20</sup> Esem diba to egee duloso dia pei omapoo saga poogoloso Yesubolo hodobo diyadeeso.

<sup>21</sup> Osoloso diba omaga dulone egeino, di kebili odo Sebediyo owolo bakadio Yemes dio osoloso omolo Yonee dio egeiso. Dibada amabolo du ma kulodu pei mopoodoolone debeiso. Esem Yesuye dimapoo egeese takaso, “Niba ama hamamee deede sibe,” diso.

<sup>22</sup> Esem diba to ee duloso dibada pei sabolo osoloso dibada ama sabolo du ma kulodu saga poogoloso Yesubolo hodobo diyadeeso.

*Yesuye odo paigiga susuga tekepo moodooga*

<sup>23</sup> Esiga Yesuye Gelili mi toowa ma kulodu mosobia susuga mapoo silone, dibada howo gisili moso susuga ma kulodu to tekepo Godeeye wiligi doloso badeli eyo goo ee eligimo sileeso. Egeeseemo silone odo paigiga susuga sabolo tekepo moodoogamo sileeso.

<sup>24</sup> Esem Gelili mi hodiokoo mi toowa Siliya deli omapoo debeli odo oso yayo

goo moodoomo silee goo ee duso. Goo egeesi maga odo susuga oso paigiga opusomo opusomo di odo ee Yesuye tekepo palame yayo badebei mapoo iyado sibadeeso. Esiga paiye opusomo opusomo di oso too odo hagee diayo Yesu mapoo iyado sibadeeso. Odo aboso odo dala toowa too ee iyado simiso, osoloso odo aboso odo bo holo paladee iyado simiso, osoloso odo aboso odo todili iyado simiso, osoloso odo aboso odo su kakawa poogoo iyado simiso. Esem Yesuye diba susuga tekepo paso.

<sup>25</sup> Osoloso odo mooloogoodoo bei oso Gelili abaga osoloso Dekapolisi\* abaga osoloso Yelusalem abaga osoloso Yudiya abaga osoloso mi abo Yoden howo hodiokoo debeli mi maga Yesuye badebei mapoo sibileso yima hamamee deede diyadeeso.

## **Yesuye mubi ma dokodoo odo mapoo eligi**

### **5**

*5:1–7:29*

<sup>1</sup> Yesuye odo mooloogoodoo bei oso yimapoo sibadee ogoloso, mubi ma dokodoo peleso biaso. Esem o hamamee dili odo oso yimapoo sibadeeso.

<sup>2</sup> Esem omapoo yayo Godeeyo to dimapoo eligilame bei mooloogoolone egeese takaso,

*Goomoga sabolo dabalai (Luka 6:20-23)*

<sup>3</sup> “Edebeeyo Godeeye diba pidilame yimapoo kibiloso dogo, diba goomoga sabolo dabalaiso.

Bei, diba Godeeye wiligi doloso ka badoso.

<sup>4</sup> Osoloso edebeeyo goohele sabolo pusigilone dogo, diba goomoga sabolo dabalaiso.

Bei, Godeeye diba pidileiso.

<sup>5</sup> Osoloso edebeeyo mesie sabolo dogo, diba goomoga sabolo dabalaiso.

Bei, hamamee mipoo susuga hagee dibada mi dalaiso.

**4:23:** Mat 9:35; Maka 1:39; Diye 10:38    **4:24:** Maka 6:55    **4:25:** Maka 3:7-8    \* **4:25: Dekapolisi** - mosobia dee bakadio tiadoo mooloogoodoloso hedi eyo hu toowa oso.    **5:3:** Isa 57:15    **5:4:** Isa 61:2-3; Yili 7:17    **5:5:** Psa 37:11    **5:6:** Isa 55:1-2

<sup>6</sup> Osoloso edebeeyo goo tekepo Godeeye goomoga goo ee talai ono diya goolee sabolo dogo, diba goomoga sabolo dabalaiso.

Bei, diayo Godeeye goomoga goo ee talame, yayo diba pidileiso.

<sup>7</sup> Osoloso edebeeyo emegei sooloo dolone dogo, diba goomoga sabolo dabalaiso.

Bei, nei Godeeye dimapoo sooloo dolone badalaiso.

<sup>8</sup> Osoloso edebeeyo hedebe Godee mapoo goo hoodolone dogo, diba goomoga sabolo dabalaiso.

Bei, diayo Godee agalaiso.

<sup>9</sup> Osoloso mesie dabalame segeli odoo doloso dogo, diba goomoga sabolo dabalaiso.

Bei, Godeeye diba owolo dio dalaiso.

<sup>10</sup> Osoloso edebeeyo Godeeyo howo woola goo tekepo too maga dala tolone dogo, diba goomoga sabolo dabalaiso.

Bei, diba Godeeye wiligi doloso ka badoso.

<sup>11</sup> Osoloso niyo amapoo tei too goo maga edebeeyo nimapoo to tokenee takoloso dala tenelone nimaga gamenee goo takooga, niba goomoga sabolo dabalaiso.

<sup>12</sup> Esiga niba sigabolone goomege. Bei, Kei mi mapoo nei toowa niyo talame nibada hu sabolo olo mopoodoo doloso moloso. Esiga nimapoo dala tenelone egee do egee dia amawe diayo Godee maga to toloso kokodo takomo silesibili odoo daga hoogoo debei mapoo dala hedebe egeese tenemeleeso.”

*Solu sabolo gadeebugu sabolo  
(Maka 9:50; Luka 14:34-35)*

<sup>13</sup> “Mi toowa mapoo debeli odoo mapoo niyo solu masi ka doso. Esino soluso hadali me poogooga, nayo solu ee see hadalame kasee moodoolaiyo? Esiga solu hadali me poogooga, yo goo mauwe malaiso. Osoloso mi mapoo togobuguga, edebeeyo dokodooga homoso ebidileiso.

<sup>14</sup> Esiga mipoo toowa hamapoo debeli odoo susuga mapoo niyo gadeebugu masi

ka doso. Bei, mubi ma dokodoo mi edebeeyo bia mologa, mi egee mada malaime. Haye. Yo medee woola molo egeliso.

<sup>15</sup> Esiga odoo heeso keme pouloso tolo oso koo gagali. Haye. Yo keme pouloso odoo susuga oso o moso kulodu dobolone gadeebugu ee agalame woola pou mage-liso.

<sup>16</sup> Egeesi maga niyo mipoo toowa hamapoo debeli odoo mapoo gadeebuguloso dabalai tekepo. Egeeseega odoo susuga oso niyo goo tekepo tolone egee do ogoloso diayo nibada Ama Godee Kei mi ma dokodoo egee bado o hu dokodoo poudileiso.”

*Godeeye tei magoo hogugu*

<sup>17</sup> “Esiga Moseseeye tei magoo hogugu sabolo osoloso Godee maga to toloso kokodo takomo silesibili odoo oso Godeeyo to hogugu ee ayo peegoo magalame ka simidoo, niyo dee na goolee. Haye, ayo egeese selame ka sibile. Esino ayo wulo diayo taka goo susuga ee tobuloso talame ka simi.

<sup>18</sup> Esiga ayo nimapoo taka. Mipoo toowa sabolo kei sabolo mauwe pegelega osee mologa, Godeeye tei magoo ma kulodu hu bei pepuso heeso peegoo osugobalaime. Esino tei oso taka goo susuga oso tobuloso peledabalaiso.

<sup>19</sup> Esiga edebeeyo Godeeye tei magoo ma kulodu tei pepooko hedebe mapoo mesilega badolone, emegei dimapoo goo egeesi masi moodoolame eligimo siloga, yo Godeeye wiligi doloso badeli mapoo diya pepooko doloso badalaiso. Esino edebeeyo Godeeye tei magoo susuga mapoo mesiloso badolone, emegei dimapoo goo egeesi masi moodoolame eligimo siloga, yo Godeeye wiligi doloso badeli mapoo toowa doloso badalaiso.

<sup>20</sup> Esiga ayo nimapoo taka. Niyo Godeeye tei magoo mapoo mesie goo oso tei eligili odoo sabolo, osoloso Pelisi odoo sabolo oso Godeeye tei magoo mapoo mesili goo ee dagadilega poogooga, niba Godeeye wiligi doloso badalaime.”



*Kamanali goo*

<sup>21</sup> “Esiga Godeeye olo daga hoogoo ibada amawe dimapoo to egeesee taka goo ee niba olo duso, ‘Emegei bei mauwe wooloomalai tei. Esiga edebeeyo emegei bei mauwe wooloomaga, o goo midileiso.’

<sup>22</sup> Esino goo hamaga ayo see egeesee takooso. Edebeeyo emegei dimapoo kamana sabolo badoga, yo goo midili mapoo ido palaiso. Osoloso edebeeyo emegei dimapoo no tokenee odoos daga, niyo yo wiligi odoos tebisa dimapoo ido peleso o goo midilei tekepo. Osoloso edebeeyo emegei dimapoo no boobada odoos daga, yo nei Dou mi mapoo toodalai tekepo.

<sup>23-24</sup> Esiga nayo Godee mapoo emegei di bi tenelame badolone epedee omapoo nee odoos oso namapoo egee gowoomolo gooleebuguga, nee emegei di bi ee omapoo magoloso see saga dileso nee odoos omapoo emegei di to takee. Osoloso see wedi sibilesos emegei di bi egee Godee mapoo tenee.

<sup>25</sup> Esiga namapoo goweli odoos oso no goo midilei mapoo ido duga, no eli domopoo yibolo dulone yayo namapoo gowe egee molo pagalame yibolo saga emegei dee. Esino nayo goo egeesi moodelega poogooga, yayo no goo midili odoos mapoo ido peleso nee goo midileiso. Egeeseega goo midili odoos oso no neliga moso gibadeli odoos mapoo tenelaiso. Egeeseega see yayo no neliga moso ma kulodu toosoolaiso.

<sup>26</sup> Esiga ayo namapoo taka, no neliga moso ee ma kulodu badolone nayo peegoo dilei eli agalaime. Esino molee yayo hesia sabolo tobulosos nayo yimapoo teneega, no peegoo dileiso.”

*Adaba kooka sobo goo heli teli goo sabolo, osoloso sobo pegeli goo*

*(Mat 19:19; Maka 10:11-12; Luka 16:18)*

<sup>27</sup> “Esiga niba to egeesee taka olo duso, ‘Adaba kooka sobo sabolo kooka giso sabolo goo heli talai ee tei,’ diso.

<sup>28</sup> Esino ayo nimapoo egeesee takooso, edebeeyo emegei dia kooka sobo mapoo

howo todolone goo goolee ma kuloduga yibolo goo heli talame gooleega, o goo goolee oso yo sobo egee olo goo heli tooso.

<sup>29</sup> Esiga nee howo deedeede oso no goo tokenee talame gido duga, nee howo deedeede egee tabigilei tekepo. Bei, nee howo bakadio sabolo badolone Dou mi mapoo dilei tekeponee. Esino nayo howo hedebe sabolo Kei mi ma dokodoo gadilei tekepo.

<sup>30</sup> Osoloso nee dee deedeede oso no goo tokenee talame gido duga, nee dee deedeede ee kobigilei tekepo. Bei, nee dee bakadio sabolo badolone Dou mi mapoo dilei tekeponee. Esino nayo dee hedebe sabolo Kei mi ma dokodoo gadilei tekepo.

<sup>31</sup> Osoloso niba to egeesee taka olo duso, ‘Edebeeyo osobo pagalame gooleega, yo sobo pegeli peipa mapoo to hogugulosos osobo mapoo tenee,’ diso.

<sup>32</sup> Esino ayo nimapoo goo hamaga egeesee takooso, nosobo na peegee. Esino kooka sobo agayo giso hee sabolo goo heli too daga, yayo osobo egee pagalai tei mauwe. Esino yayo wulo goo hee maga osobo poogooga, yayo osobo ee goo tokenee mapoo gido duso. Bei, sobo ogoso giso hee mapoo obuoga, yo odoos heeyo giso ee peedeede huso. Osoloso edebeeyo sobo omoye poogoo ee huga, yo odoos heeyo osobo ee peedeede huso.”

*Goo talame tei mageli*

<sup>33</sup> “Osoloso daga hoogoo ibada amawe dimapoo to egeesee taka ee niba olo gooleedoos, ‘No goo tei moodoolame Godee mapoo tei magooga, tei egee na gababie,’ diso.

<sup>34</sup> Esino ayo goo hamaga see egeesee takooso, no goo hee moodoolame tei na ye. Esiga no Kei mi eyo hu hesialosos tei na ye. Bei, mi egee Godeeye wiligi dolosos badeli oso.

<sup>35</sup> Osoloso mipoo toowa eyo hu hesialosos tei na ye. Bei, mi egee Godeeye o homo kokusolosos badeli mi oso. Osoloso Yelusalem mi eyo hu hesialosos tei na ye. Bei, mi egee wiligi odoos Godeeyo mi oso.

<sup>36</sup> Osoloso nee wiligi mapoo sigolone tei na ye. Bei, nayo egee takoo goo oso nee wiligi ma kulodu wudu heeso opusomo dalai tebile.

<sup>37</sup> Esiga odoo heeso nimapoo sibilesu takolone tou hagee teye dee takooga, niyo goo egee talai goomogoga, yimapoo hedebe niyo goomoga goo ee takee. Osoloso niba goo ee talai gowooga, niyo hedebe gowe goo ee takee. Bei, niyo egeesee selega poogooga, niba gamenee takooso. Esiga gamenee takeli goo ee Saiten maga siboso.”

*Nei su teli goo  
(Luka 6:29-30)*

<sup>38</sup> “Osoloso niba to egeesee taka olo duso, ‘Odoos heeso no woolone nee howo tabuguga, nei odoo o howo tabigilei tekepo. Osoloso see odoo heeso nee maga mapoo woolone mei hedebe dobuguga, nei o mei dobigilei tekepo.’

<sup>39</sup> Esino ayo goo hamaga see egeesee takooso, no odoo heeso namapoo tokenee goo kasee moodooga, nayo yimapoo nei goo egeesi masi na moodee. Esiga odoo heeso nee haleegi mapoo kobuguga, see nee haleegi hodio mapoo kobugulame heligi magalai tekepo.

<sup>40</sup> Osoloso edebeeyo nee sedi talame goomogolone no goo midili mapoo ido duga, nayo nee sedi egee sabolo osoloso nee kekeisu dugo sabolo yimapoo tenee.

<sup>41</sup> Osoloso odoo heeso o bi kadaloso yibolo mi hee koola mapoo dilame sibilesu no giga, see nayo yibolo hodobo o bi eli sage kadadilei tekepo.

<sup>42</sup> Esiga edebeeyo namapoo bi howaga, yimapoo wulo tenee. Osoloso edebeeyo namapoo bi hoowadalai goomogoga, yimapoo tenee.”

*Nimapoo ha teli odoo sooloo dele  
(Luka 6:27-28, 32-36)*

<sup>43</sup> “Esiga niba to egeesee taka olo duso, ‘Nee odoo sooloo dolone namapoo ha teli odoo hegie,’ diso.

<sup>44</sup> Esino ayo goo hamaga nimapoo egeesee takooso, nimapoo ha teli odoo ee sooloo dele. Egeeselone nimapoo dala

teneli odoo halo Godee mapoo takolone ka debee.

<sup>45</sup> Esiga niyo goo hageesee tolone dogaa, goo oso niba tei ibada Ama Kei mi ma dokodoo badeli Godeeyo owolo dio doloso egee do goo ee ka eligiso. Egeesi ma kulodu Godeeyo howo woola tekepo debeli odoo sabolo osoloso tokenee teli odoo mapoo osoko pa sabolo howo sabolo tobuloso tenemoloso.

<sup>46</sup> Esiga niba hedebe nimapoo sooloo deli odoo ee sooloo dolone dogaa, niba nei tekepo talaisomo? Haye, talaime. Bei, tokenee teli odoo sabolo egeesee seliso.

<sup>47</sup> Osoloso niyo hedebe nee odoo mapoo mo odoo dolone badoga, egee goo tekepowo? Haye, peegoo debeli odoo sabolo goo hageesee teliso.

<sup>48</sup> Esiga nibada Ama Godeeye odoo susuga sooloo dolone egee bado egeesi masi niba nosee odoo susuga sooloo dolone ka debee.”

## 6

*Bi mauwe odoo pidilei goo*

<sup>1</sup> “Esiga niba wulo edebeeyo agalame goo tekepo na tomo silesibe. Bei, goo hageesee tomo silesiboga, nibada Ama Godee Kei mi ma dokodoo badeli maga nei talaime.

<sup>2</sup> Egeesi ma kulodu niba bi mauwe odoo mapoo bi teneega, odoo howo woola na tenee. Bei, goo goolee bakadio gweli odoo oso odoo susuga oso hedebe diba tekepo doloso takalame, diayo goo hageesee howo gisili moso mapoo osoloso mosobia domopoo tomo silesibiliso. Esiga ayo nimapoo taka. Diayo goo egeesi tomo silesibume, odoo susuga oso diba ogoloso goomogolone egee do maga dibada nei tolone ka doso. Esiga diba Godee maga nei hee talaime.

<sup>3-4</sup> Esiga nayo bi mauwe odoo mapoo bi tenelame gooleega, nayo dimapoo mada tenee. Egeesega Nama Godeeye nayo mada tekepo goo egee tomolo ogoloso namapoo nei tenelaiso.”

*Godee mapoo takeli goo  
(Luka 11:2-4)*

<sup>5</sup> “Esiga niyo Godee mapoo takolone goo goolee bakadio gweli odoo masi na debee. Bei, diba odoo susuga oso agalame, mosobia domopoo osoloso howo gisili moso ma kulodu malalo peleso tebisamolone Godee mapoo takalai, diba goomegeliso. Esiga ayo nimapoo taka. Diayo goo egeesi tolone egee do maga diba nei tolone doso. Esiga diba Godee maga nei hee talaima.

<sup>6</sup> Esino nayo Godee mapoo takalame gooleega, nee moso ma kulodu gadilesu osulu kisiloso edebeeyo koo egeli Nama Godee mapoo ka takee. Egeeseega nayo mada yimapoo egee takomolo ogoloso yayo namapoo nei tenelaiso.

<sup>7</sup> Osoloso niyo yimapoo takolone Godeeyo goo gooleedele poogoo odoo oso dibada godee mapoo takeli egeesi masi takolone na debee. Bei, diayo Godee mapoo taka ee ma kulodu goo mauwe to diya sage takeliso. Bei, diayo goolee diayo sage takooga, dia godeeso duleiso, dee gweliso.

<sup>8</sup> Esiga niyo diba egeesi masi goo mauwe Godee mapoo takolone na debee. Bei, niyo goomoga goo ee nibada Ama Godee yayo malalo olo gooleedoloso ka badoso.

<sup>9</sup> Esino niyo Godee mapoo takooga, hageese takee,

‘Ibada Ama Kei mi ma dokodoo badeli, biame susuga ma kulodu hedebe nee hu oso toowa doloso mele dee, odoo susuga oso dokodoo poudalame.

<sup>10</sup> Esiga nayo wiligi doloso badeli goo oso sibilei iba goomogo.

Osoloso Kei mi mapoo nayo goomoga goo egee tomolo goo ee

see mipoo hamapoo debeli odoo oso tolone ka dabalame.

<sup>11</sup> Osoloso biame susuga ma kulodu nei iyo nalai imapoo tenee.

<sup>12</sup> Osoloso ibada goo tokenee hapoloso boobado bigi.

Bei, iba nose odoo susuga oso goo tokenee susuga imapoo moodeli ee boobado bigiliso.

<sup>13</sup> Osoloso iba goo tokenee mapoo na gido di dee.

Esino iba Saitenso kitulugu omaga peegoo gilimado di.

[Bei, nayo wiligi doloso badeli goo sabolo, osoloso nayo kitulugu egee molo sabolo,

osoloso nee hu oso toowa doloso kookaiyo moloso osee malaiso.

Hagee tei goo.]’

<sup>14</sup> Esiga odoo aboso nimapoo toke-nee goo moodooga, niyo dia tokenee ee boobado bigi. Niyo egeeseega, nei nibada Ama Kei mi ma dokodoo egee bado oso nibada goo tokenee hapoloso boobado bigileiso.

<sup>15</sup> Esino odoo aboso nimapoo goo tokenee moodooga, niyo dia tokenee ee boobado bigilega poogooga, nei nibada Ama oso nibada goo tokenee ee hapoloso boobado bigileime.”

*Nei tei doloso Godee mapoo takolone dabalai goo*

<sup>16</sup> “Osoloso niba nei tei doloso Godee mapoo takolone dobolone, goo goolee bakadio gweli odoo oso moodeli egeese na moodee. Bei, diba nei tei doloso dobolone, mudu poudoloso debeliso, odoo susuga oso diba nei tei doloso debei ee ogoloso gooleedalame. Esiga ayo nimapoo taka. Diayo goo egeesi moodoolone egee do maga, edebeeyo dia hu dokodoo olo poudooso. Goo egeesi maga Godeeye dimapoo nei hee tenelaima.

<sup>17</sup> Esino no nei tei doloso badolone Godee mapoo takalame gooleega, nee mudu howo hapoloso wudu guloso ka badebee.

<sup>18</sup> No egeese badoga, odoo susuga oso nayo nei tei doloso egee bado goo ee diba gooleedalaime. Esino odoo susuga oso koo egeli Nama Godeeye nayo mada nei tei doloso egee bado goo ee ogoloso namapoo nei tenelaiso.”

*Bi bei doloso badalai goo*

*(Luka 11:34-36; 12:33-34; 16:13)*

<sup>19</sup> “Esiga niba mi toowa hamapoo haga bi bei mooloogoo magoloso na debee. Bei, mi toowa hamapoo nibada bi abo siso naliso. Osoloso abo emisia ki nadoloso

tokenee peliso. Osoloso abo heli teli odoosoo gasibilesosoo heli teliso.

<sup>20</sup> Esino niba Godeeye goomoga goosoo ee tolone ka debee. Niyo egeesee seega, Godeeye Kei mi mapoo nei nimapoo tenelaiso. Mi omapoo siso nee bi koo nali, osoloso mi omapoo bi emisiasoo ki nadolosoo koo tokenee peli, osoloso heli teli odoosoo gasibilesosoo nee bi heli koo teli.

<sup>21</sup> Nimapoo bi bei toowa ma mologa, nibada goosoo goolee oso omapoo meliso.

<sup>22</sup> Esiga nee su mapoo nee howo oso keme masi ka moloso. Osoloso nee howo oso tekepo mologa, nee su susuga gadeebugoo malaiso.

<sup>23</sup> Esino nee howo oso tokenee poga, nee su susuga neliga malaiso. Egeesi ma kulodoo namapoo gadeebugoo egee molo semidilosoo badoga, no tei diya neliga ma kulodoo badoso.

<sup>24</sup> Esiga edebeeyoo wiligi odoosoo bakadio eyoo to mapoo mesilosoo silone tou talai tebile. Bei, yo o wiligi odoosoo hee goomogolone hee gowoolaiso. Egeesee lone yayo wiligi odoosoo heeyoo to mapoo mesilosoo silone, see heeyoo to mapoo mesileime. Esiga niyo Godee mapoo mesimosoo silone molee toowa tolosoo badalai goosoo mapoo mesilei tebile.”

*Tei tolosoo dobolone haga na goolee  
(Luka 12:22-31)*

<sup>25</sup> “Esiga ayo nimapoo taka, niyo dobolone nei nalai sabolosoo osolosoo howo nalai sabolosoo osolosoo dugo kalai sabolosoo omapoo haga na goolee. Bei, nei nalai bi oso goosoo toowa koo moloso. Haye. Esino nibada gie badeli goosoo oso goosoo toowa ka moloso. Osoloso kali bi oso goosoo toowa koo moloso. Haye. Esino nibada su oso goosoo toowa ka moloso.

<sup>26</sup> Esiga niba só ogolosoo goolee. Diba nali bi diesoo sogolosoo koo gooloogali. Osoloso diba nei nali bi magalai mosoo mauwe. Esino nibada Ama Godeeye Kei mi ma dokodoo egee bado oso dimapoo nei nali bi ka tenemosoo. Esino Godeeyoo howo woola só oso goosoo toowa koo moloso. Esino niyo goosoo toowa ka moloso.

<sup>27</sup> Esiga edebeeyoo kali bi sabolosoo osolosoo nei nali bi sabolosoo omapoo diya gooleega, o gie badeli see hoogoo sagelisosoo? Haye.

<sup>28</sup> Esiga niba kasi maga kali bi mapoo haga goolee sabolosoo ka dabala? Esino niba dobusoo meli palapalawa tekepo ogolosoo goolee. Bei, diba diesoo nediliyoo pidilame tou koo teli. Osoloso dugo diesoo kalai koo duseli.

<sup>29</sup> Esiga ayo nimapoo ka taka, daga Solomonoyee wiligi odoosoo tobolosoo badebei mapoo yayo kali bi medee tekepo kalaga meleeso. Esino dobusoo meli palapalawa oso tekepo oso dugo tekepo Solomonoyee kali ee dagadi.

<sup>30</sup> Esiga dobusoo meli palapalawa tekepo oso epei bou gasibilesosoo moloso, see biame hee mapoo wooseliso. Esino Godeeye palapalawa omapoo dugo masi tekepo ka kadili daga, a tei toso, Godeeye nimapoo dugo tekepo tenelaiso. Bei, niyo Godeeyoo howo woola goosoo toowa ka moloso. Odoosoo niba tei too kibile.

<sup>31</sup> Esiga niba goosoo koudulone dobolone egeesee na goolee, ‘Iyo nei sabolosoo howo sabolosoo kamapoo talaisoba? Osoloso iyo dugo kalai bi kamapoo talaisoba?’ dee na goolee.

<sup>32</sup> Bei, peegoo debeli odoosoo oso bi hageesi maga diya goolone debeliso. Esino Nama Godeeye bi niyo talame goomegeli ee yayo malalo olo gooleedoosoo.

<sup>33</sup> Esiga niba Godeeye wiligi dolosoo badeli goosoo ee goolone, daga malalo nibada Ama yayo goomoga goosoo ee tolone ka debee. Niyo egeeseega bi susuga niyo egee esigamoloo ee nei yayo nimapoo tenelaiso.

<sup>34</sup> Esiga niba godigi goosoo peledabalai mapoo goosoo haga koudulone na debee. Bei, godigi eyoo goosoo ee godigi eyoo goosoo oso. Esino niba epei eyoo goosoo ee goolone ka debee.”

## 7

*Emegei dia goosoo wulo goosoo mauwe na midi  
(Luka 6:37-38, 41-42)*

<sup>1</sup> “Niyo nee odoosoo heeyoo goosoo wulo goosoo mauwe na midi. Esino niyo egeesee



midiga, nei Godeeye nibada goo onosee hedebe egeesee midileiso.

<sup>2</sup> Bei, niyo emegei dia goo kasee midiga, nei nibada goo onosee Godeeye hedebe egeesi midileiso. Niyo goo teiba hedebe egeesi midiga, nei yayo niba nose teiba hedebe egeesi midileiso.

<sup>3</sup> No kasi maga nee odoowo howo mapoo gelesi pepooko egee molo medee ogolone, hee nee howo mapoo homo toowa egee molo egelega ka pagala?

<sup>4</sup> Osoloso nee howo mapoo homo toowa egee molo egelega no see kaseega nee odoo mapoo takolone, 'Nee howo mapoo gelesi pepooko egee molo ayo tabiga,' dee ka takeliyo?

<sup>5</sup> No tei goo goolee bakadio gweli odoo. Bei, daga nee howo mapoo homo toowa egee molo ee tabigi. Egeeseega nee odoowo howo mapoo gelesi pepooko egee molo medee ogoloso nayo tabigilei tebileiso.

<sup>6</sup> Godee mapoo tenelai bi ee so mapoo na tenee. Bei, soso namapoo see wedi sibileso no palaiso. Osoloso namapoo bi tekepo egee molo be mapoo na togobise. Bei, beso bi mapoo homosoo tooboomo siloga tokenee palaiso."

### *Esiaga agalaiso*

*(Luka 11:9-13)*

<sup>7</sup> "Esiga ayo nimapoo taka, niba woose. Egeeseega, nimapoo tenelaiso. Osoloso niba esie. Egeeseega, niyo agalaiso. Osoloso niba osulu mapoo kalamadi. Egeeseega osulu nimapoo yamagalaiso.

<sup>8</sup> Bei, woosali odoo oso goo talaiso. Osoloso esieli odoo oso goo agalaiso. Osoloso osulu mapoo kalamadili odoo mapoo osulu yamagalaiso.

<sup>9</sup> Esiga edebeeyo owoloye wo nalame woosaga, yimapoo yo tenelaisomo?

<sup>10</sup> Osoloso yayo see di nalame woosaga, nayo yimapoo sa tenelaisomo? Haye.

<sup>11</sup> Niba tokenee odoo, esino niyo nibada owolo dimapoo bi tekepo tenelai goo ee niba gooleedooso. Esiga ibada Ama Godee Kei mi ma dokodoo egee bado yayo

yimapoo bi woosali odoo mapoo bi tekepo teneli goo ee niba gooleedooso.

<sup>12</sup> Niba edebeeyo goo hee nimapoo moodoolame goomogoga, daga niyo dimapoo goo egee moodee. Bei, Mosese-eye eligi goo sabolo osoloso Godee maga to toloso kokodo takomo silesibili odoo oso to hogugu oso eligi goo eyo bei hagoso."

### *Osulu pepooko*

*(Luka 13:24)*

<sup>13</sup> "Esiga osulu pepooko maga gadi. Bei, Dou mi mapoo dili osulu ee diya toowa osoloso eli onosee diya toowa. Egeesi maga odoo bei oso osulu omaga galagadilesi eli omaga ka diyadaga moloso.

<sup>14</sup> Esino gie badeli mapoo gadili osulu ee diya pepooko. Osoloso eli omapoo dili onosee diya pepooko. Esiga odoo aboso eli egee ogoloso omaga ka diyadaga moloso."

### *Gamenee goo eligili odoo medee hoodo ege*

*(Luka 6:43-44)*

<sup>15</sup> "Niba obeeyamo! Gamenee goo eligili odoo medee ege. Bei, diba kolo ma dokodooga odoo tekepo masi nimapoo sibiliso. Esino dibada kulodu dobu so kamanali egeesi masi nimapoo sibiliso.

<sup>16</sup> Esiga niba diayo suso goo moodoo maga diayo egee do goo ee ogoloso gooleedeliso. Bei, pigi ko sabolo osoloso geleipi ko sabolo we ti maga ko koo peeya.

<sup>17</sup> Esiga homo su tekepo oso homokoko tekepo peliso. Osoloso homo su tokenee oso homokoko tokenee peliso.

<sup>18</sup> Esiga homo su tekepo oso homokoko tokenee koo peeya. Osoloso homo su tokenee oso homokoko tekepo koo peeya. Haye.

<sup>19</sup> Egeesi ma kulodu homo su kaso homokoko tekepo pelega mologa, homo egee heemagoloso dou mapoo toodalaiso.

<sup>20</sup> Esiga gamenee goo eligili odoo ee diayo goo moodoo maga dia goo ee ogoloso niba gooleedalaiso.

<sup>21</sup> Esiga haga odoo susuga oso amapoo Lodee, Lodee dolone egee do oso Godeeye wiligi doloso badeli mapoo gasibileime.

Esino odoo agayo mo Ma Godee Kei mi ma dokodoo egee bado yayo goomoga goo ee tomo siloga, hedebe odoo egee bia oso gasibileiso.

<sup>22</sup> Esiga goo midili biame mapoo odoo aboso sibilesa amapoo egeese takalaiso, 'Lodee, Lodee, iyo nee hu maga Godeeyo to takomo silesibiliso, osoloso nee hu maga odoo bo holo paladee peegoo hasiso bugu dolone silesibilone goo toowa opusomo di moodoomo silesibiliso,' dee takalaiso.

<sup>23</sup> Esino nei ayo dimapoo egeese takalaiso, 'Niba a gooleede. Esiga niba amaga peegoo diyadee, niba tokenee teli odoo,' dee takalaiso."

*Moso tegeli odoo bakadio  
(Luka 6:47-49)*

<sup>24</sup> "Edebeeyo to ayo eligi duloso mesiloso siloga, yo odoo goo medee gweli oso moso tegelame mi nelegedi dooloso omou sooloso moso tegei odoo egeesi masi badoso.

<sup>25</sup> Bei, i sabolo howo sabolo simiso, osoloso howo duwa oso o moso mapoo weino, moso egee kibiya meleeso. Bei, moso omou mi nelegedi doloso omou ka sooga.

<sup>26</sup> Esino edebeeyo to ayo eligi duloso mesilega siloga, yo odoo goo medee koo gweli oso moso tegelame mi nelegedi doolega omou sooloso, moso tegei odoo egeesi masi badoso.

<sup>27</sup> Bei, i sabolo howo sabolo simiso, osoloso howo duwa oso o moso mapoo woome, moso egee kibilega saga goboloso guobuguso."

<sup>28</sup> Yesuye goo hagee eligimeleso koodobume, odoo susuga yayo eligi du oso diya howogadooso.

<sup>29</sup> Bei, yayo eligi ma kulodu tei eligili odoo oso eligi egeesi masi koo eligime. Esino yayo odoo diya kitulugu oso eligi masi eligiso.

**7:23:** Psa 6:8; 2Tim 2:19 **7:29:** Maka 1:22; Luka 4:32  
odoo agagisa bia hageese ee Godeeyo howo woola kee kauwe deliso. Osoloso Yu odooso diba sigilei tei deliso. Goo egeesi maga yo tekepo palame Yesu mapoo ka hoowa. **7:29:** Lev 14:1-32; Mat 9:30; Luka 17:14

## 8

*Yesuye odoo agagisa bia tekepo pa  
(Maka 1:40-45; Luka 5:12-16)*

<sup>1</sup> Yesu mubi ma dokodooga kumoo moumolome, odoo mooloogoodoo bei oso yima hamamee diyadeeso.

<sup>2</sup> Egeese semelee biame domo mapoo odoo agagisa bia\* sibilesa Yesuwo homo beiyopoo ebiso miyomoo tugusaloso egeese takaso, "Lodee, nayo a tekepo moodolai goomogoga, a tekepo moodee," diso.

<sup>3</sup> Esemee Yesuye o deeso odoo egee sigolone egeese takaso, "Ayo no tekepo palai a goomogo. Esiga no tekepo pe," diso. Esemee epedee omapoo o kolo mapoo agagisa bia mauwe poogooso.

<sup>4</sup> Esemee Yesuye yimapoo egeese takaso, "Nayo dilesa no ayo tekepo moodoo goo ee odoo abo mapoo na takee. Esino nayo dilesa Godee ogo odoo ogo doloso domo badeli odoo mapoo nee su tekepo pa goo ee ka eligi. Osoloso odoo susuga oso ogoloso no tekepo moodoo goo ee gooleedalame, nayo Moseseeye tei magoo ee dodolone, nee su tekepo moodoo omaga emegei di bi tenee," diso.

*Loum ha teli gibadeli odoo oso tei too  
goo*

*(Luka 7:1-10)*

<sup>5</sup> Yesu Kapeniyum mi mapoo dilesa peledoboome, Loum ha teli odoo 100 gibadeli odoo\* oso yo pidilame Yesu mapoo sibilesa egeese takaso,

<sup>6</sup> "Lodee, mo tou teli odoo hee diya paiyega su kakawoo buguloso tiamoloso," diso.

<sup>7</sup> Esemee Yesuye yimapoo egeese takaso, "Ayo sibilesa yo tekepo palaiso," diso.

<sup>8</sup> Esino Loum ha teli odoo gibadeli odoo oso nei egeese takaso, "Lodee, nayo mo mosopoo sibilei, a tebile. Esino mo tou teli odoo ee tekepo palame, no wulo omaga tobudulone toso idagee.

<sup>9</sup> Bei, anosee odoo abo dia tou teli odoo. Osoloso odoo aboso mo tou teli odoo

\* **8:2: odoo agagisa bia** - Yu odoo dia tei oso takolone, \* **8:5: Loum ha**

doloso dobolone mo to mapoo mesiloso silesibiliso. Esiga ayo mo tou teli odoos hee mapoo, ‘no koo diye’ daga, yo omapoo diliso. Osoloso see odoos hee mapoo takolone, ‘no hamapoo sibeye’ daga, yo sibiliso. Osoloso see mo tou teli odoos hee mapoo takolone, ‘no goo hagee teye’ daga, yo goos ee teliso. Esino mo tou teli odoos ee tekepo palame nayo wulo toso idagee.”

<sup>10</sup> Yesu to hagee duloso howodolone yima hamamee sibadee odoos susuga mapoo egeesee takaso, “Ayo nimapoo taka, ayo Isalael mi mapoo silee ee ma kulodu kibiya tei too odoos hee yo egeesi egele.

<sup>11</sup> Esiga ayo nimapoo taka, mi opusomo opusomo di maga sibileso, Godeeye wiligi doloso badeli Kei mi mapoo Eibalaham, Aisek, osoloso Yekob sabolo hodobo mooloogoodoloso nei nalame dabalaiso.

<sup>12</sup> Esino Yu odoos tei tele poogoo ee Dou mi mapoo toodalaiso. Egeeseega omapoo dobolone mei gisile sabolo pupusigilone dabalaiso.”

<sup>13</sup> Esemee Yesuye Loum ha teli gibadeli odoos mapoo egeesee takaso, “No nee mosopoo di. Nayo goo peledabalaiso doloso tei too oso goo peledabalaiso,” diso. Egeesee semelee mapoo Loum ha teli gibadeli odoos o tou teli odoowo mosopoo paiyega tiamelee odoos ee olo weidooso.

*Yesuye odoos susuga tekepo pa  
(Maka 1:29-34; Luka 4:38-41)*

<sup>14</sup> Osoloso Yesu Pitayo mosopoo diso. Yo omapoo dileso egeino, Pitayonalobo paiyeso kolo dei moodoome tiamolome egeiso.

<sup>15</sup> Esemee Yesuye sobo egeeyo dee mapoo sigime, paiye weidooso. Osoloso yo toboloso wo siloso Yesu mapoo teneeso.

<sup>16</sup> Osoloso habe omapoo odoos susuga oso bo holo paladee susuga Yesuye badebei mapoo iyado sibadeeso. Esemee yayo to kitulugu sabolo takeme, bo holo susuga odoos ma kuloduga peegoo hasiso buguloso, odoos paigiga susuga ee tekepo paso.

<sup>17</sup> Esiga Godee maga to toloso kokodo takomo sili odoos Aisayaye daga hoogoo

to taka sabolo tebilame siso. Bei, yayo egeesee takaso,  
“Yayo ibada paiye susuga egee molo yayo tolone  
iba tekepo paso.”

*Yesuye di hamamee dadalai goo  
(Luka 9:57-62)*

<sup>18</sup> Yesuye odoos susuga oso yimapoo sibileso mooloogoodoo ogoloso, o hamamee dili odoos mapoo egeesee takaso, “Iba abei hodiokoo dalo soowoomo,” diso.

<sup>19</sup> Osoloso biame omapoo tei eligili odoos heeso sibileso yimapoo egeesee takaso, “Eligili odoos, nayo kamapoo dusomo, nayo di ayo hamamee deede sileiso,” dee takaso.

<sup>20</sup> Yesuye nei yimapoo egeesee takaso, “Dobu soso debeli mi moloso, osoloso sóso tieseli dibada ou moloso. Esino Odoos Holo ayo tieli moso mauwe,” diso.

<sup>21</sup> Osoloso odoos abo Yesu ma hamamee dadagamo silesibili ee ma kulodu odoos heeso Yesu mapoo egeesee takaso, “Lodee, a no dadalai goomogo. Esino nayo epedee amapoo biame tenee, a mo ma toga bouleiya,” dee takaso.

<sup>22</sup> Esemee Yesuye nei yimapoo egeesee takaso, “No a deede sibe. Tei tele poogoo odoos ee odoos wedia masi doso. Esiga diayo dia odoos wedia eyo kou ee boulei tekepo,” diso.

*Yesuye i sabolo howo ki sabolo hamaga taka  
(Maka 4:35-41; Luka 8:22-25)*

<sup>23</sup> Esemee Yesu o hamamee dili odoos sabolo abei mapoo meilesos du mapoo dalaga poogoloso diyadeeso.

<sup>24</sup> Diba diyadaga molome, haga booloogelega i toowa sibume, howo ki toowa simiso. Osoloso howo ki toowa oso sibilulone dibada du ma kulodu howo sasoo. Esino Yesu du ma kulodu tiameleeso.

<sup>25</sup> Esemee Yesu o hamamee dili odoos dileso Yesu tidibugulone yimapoo egeesee takaso, “Lodee, nayo iba pidi. Iba howoso nalasoo!” dee takaso.

<sup>26</sup> Esemee Yesu yo tia hogabuloso dimapoo egeesee takaso, “Niba kaseega

haga ka ebiala? Niyo tei too diya pepooko,” diso. Osoloso yayo toboloso i sabolo howo ki sabolo koodobilame to kitulugu sabolo takaso. Esemé i sabolo howo ki sabolo omapoo koodobume, abei see howo gie paso.

<sup>27</sup> Esemé Yesu o hamamee dili odoó oso goo hagee ogoloso howoogadolone egeesee takaso, “Odoó hagee ogoó odoó bele? Poo sabolo osoloso howo ki sabolo oso o to mapoo duloso koodobiaso,” dee takaso.

*Yesuye odoó bo holo pala bakadio tekepo pa*

*(Maka 5:1-20; Luka 8:26-39)*

<sup>28</sup> Osoloso Yesu abei hodiokoo daboogoloso Gadala odoó eyo mi mapoo dileso peledabaso. Yo omapoo dileso peledoboome, odoó bo holo pala bakadio oso odoó bi maga yimapoo sibadeeso. Odoó bakadio hagoso halabagamo silesibulone diya kitulugu sabolo silesibume, mosobia odoó oso wedia eyo bi eli omaga koo silesibili.

<sup>29</sup> Esemé odoó bo holo pala oso Yesu mapoo sibilesito toso neligidi egeesee takaso, “Godeeyo owolo, nayo imapoo ogoó goo moodoolame ka simiyo? No Godeeye biame magoo mapoo sibilega wulo domo mapoo iba ee tokenee palame ka simiyo?” diso.

<sup>30</sup> Diayo tebisamelee koola mapoo be hu mooloogoodoo toowa oso mi namo silesibiso.

<sup>31</sup> Osoloso bo holo oso Yesu mapoo howolone egeesee takaso, “Nayo iba peegoo hasiso buguga, iba be ma kulodu galaga di dee takee,” diso.

<sup>32</sup> Esemé Yesuye diba be ma kulodu galagadi diso. Egeesee semelee domo omapoo odoó bakadio hagee bia dia kuloduga bo holo peegoo galagadilesito be ma kulodu galagadiso. Esemé be mooloogoodoo susuga oso godobia maga kukulo meilesito, howomoo wediaso.

<sup>33</sup> Be bali odoó oso goo hagee ogoloso, saga o mosobia mapoo hoguo dilesito be mapoo goo peledaba sabolo osoloso odoó

bakadio tekepo pa goo ee oposusumo sileeso.

<sup>34</sup> Esemé mosobia omapoo debeli odoó susuga oso Yesu agalame diyadeeso. Diba dilesito yo ogoloso yimapoo howolone egeesee takaso, “No ibada mi hamaga peegoo di,” dee takaga meleeso.

## 9

*Yesuye odoó su kakawa poogoo tekepo pa*

*(Maka 2:1-12; Luka 5:17-26)*

<sup>1</sup> Osoloso see Yesu o hamamee dili odoó sabolo du ma kulodu meilesito bulumaloso o midée Kapeniyum mapoo dalo soowaso.

<sup>2</sup> Diba omapoo dalo soowelesito peledoboome, odoó aboso odoó su kakawa poogoo ee kida mapoo tiedilosito Yesu mapoo imado sibadeeso. Esemé Yesuye diayo tei too goo ee ogoloso odoó su kakawa poogoo yimapoo egeesee takaso, “Emegei, no howaleege. Nee goo tokenee ee olo hapoloso boobado buguso,” diso.

<sup>3</sup> Esino tei eligili odoó abo oso Yesuye egeesee taka duloso gowoolone diesono egeesee takaso, “Odoó hagoso Godee bolo takoo,” diso.\*

<sup>4</sup> Esino Yesu diayo goo goolee olo ogoloso egeesee takaso, “Niba kasi maga ayo taka goo mapoo dooboo goolone diya gowoolone ka dabala?”

<sup>5</sup> Niba odoó su kakawa poogoo hagee ege. Yimapoo goo kasee takalai oso sebe ka mololo? Ayo odoó su kakawa poogoo mapoo ‘Nee tokenee ayo olo boobado buguso,’ dee takooga, o tokenee boobado bugu ee niyo gooleedalame. Esino ayo yimapoo takoo, ‘No toboloso nee kida toloso di,’ daga, yo toboloso duga, odoó tekepo peli kitulugu amapoo molo doloso niyo gooleedalaiso.

<sup>6</sup> Esino Odoó Holo amapoo kitulugu olo teneeso, mipoo hamapoo goo tokenee hapoloso boobado bigilei goo ee niyo ogoloso gooleedalame, ayo nimapoo eligileiso.” Osoloso yayo odoó su kakawa poogoo mapoo egeesee takaso, “No hogabuloso nee kida toloso mosopoo di,” diso.

**8:29:** Maka 1:24; Luka 4:41    **9:1:** Mat 4:13    \* **9:3:** Tei eligili odoó diba Yesu yo Godeeyo owolo, osoloso goo tokenee hapalai kitulugu Godeeye tenee yimapoo moloso doloso tei tele.    **9:4:** Luka 9:47; Yon 2:25    **9:6:** Yon 17:2



<sup>7</sup> Esemе odoo su kakawa poogoo to-boloso o mosopoo diso.

<sup>8</sup> Esemе odoo susuga oso goo hagee ogoloso howoogadolone Godeeyo hu dokodoo poudoolone debeiso. Bei, Godeeye kitulugu hagee odoo mapoo tenee ogoloso.

*Yesuye Matiyo idoo  
(Maka 2:13-17; Luka 5:27-32)*

<sup>9</sup> Goo hagee koodobume Yesuye dulone egeino, tekisi molee teli odoo Matiyuye tekisi molee mageli moso ee ma kulodu badoboome egeiso. Osoloso Yesuye yimapoo egeese takaso, "Ama hamamee sibe," diso. Esemе yo toboloso Yesuye di hamamee diso.

<sup>10</sup> Yesu o hamamee dili odoo sabolo Matiyuwo mosopoo peleso nei nolone do-boome, tekisi molee teli odoo sabolo osoloso tokenee teli odoo oso sibilesi dibolo mooloogodoloso nei nolone debeiso.

<sup>11</sup> Esino Pelisi odoo oso goo hagee ogoloso gowoolone Yesuwo hamamee dili odoo mapoo egeese takaso, "Bei kasi maga nibada eligili odoo oso tekisi molee teli odoo sabolo osoloso tokenee teli odoo sabolo nei nolone ka badabala?" diso.

<sup>12</sup> Esemе Yesuye to hagee duloso nei egeese takaso, "Odo paile poogoo ee melesenee neli odoo mapoo koo diya. Esino hedebe odoo paigiga oso melesenee neli odoo mapoo ka diya.

<sup>13</sup> Esiga Godeeyo to booka ma hogugu oso egeese takooso, 'Emegei sooloo dolone nei pidi nei pidi dolone dabalai goo ee ayo diya gooleeso. Esino nei niyo amapoo gala hu wooloso tenelai goo ee ayo haga koo gweli,' dee takooso. Esiga niyo dilesi to hagee takoo goo eyo bei medee gooleede. Bei, ayo simi hagee, Godeeyo howo woola tekepo teli odoo ee gilimalame ka sibile. Esino tokenee teli odoo ee gilimadoloso Godee mapoo sibilame ka simi," diso.

*Yesuye nei tei doloso debeli goo ee eligi  
(Maka 2:18-22; Luka 5:33-39)*

<sup>14</sup> Biame heeso Yoneeyo hamamee dili odoo oso sibilesi Yesu mapoo egeese takaso, "Ibolo osoloso Pelisi odoo sabolo

Godee mapoo takolone dobolone nei tei doloso debeliso. Esino bei kasi maga nee hamamee dili odoo ee nei tei delega ka dabala?" diso.

<sup>15</sup> Esemе Yesuye dimapoo wudu takolone nei egeese takaso, "Sobo hulei odoo oso sobo hulame nei mopoodoo doloso o odoo gilimileiso. Egeeseega o odoo susuga sibilesi gooholone nei tei doloso dabalaisomo? Haya. Diba goomoga sabolo sobo huli odoo sabolo hodobo dobolone nei nolone hodobo dabalaiso. Esino biame heeso sobo huli odoo ee dimaga peegoo ido duga, diba nei tei doloso dabalaiso."

<sup>16</sup> Yesuye wudu takolone see egeese takaso, "Edebeeyo dugo nape mapoo dugo dia koodoloso omapoo opodoloso koo dusiya. Bei, dugo egee hapoloso magooga, dugo dia oso gawoolone sesegawe oso, dugo nape ee tologodoloso ou toowa moodoolaiso.

<sup>17</sup> Osoloso see edebeeyo wain i dia katolo gout be koloso moodoo nape mapoo koo salama seeya. Bei, wain i dia oso kitulugu oso katolo be gout koloso moodoo nape ee gabuguga, wain i ee hodalaiso. Osoloso katolo gout be koloso moodoo ee tokenee palaiso. Esiga wain i dia ee medee katolo gout be koloso moodoo dia mapoo salama salai tekepo. Egeeseega wain i sabolo osoloso katolo gout be koloso moodoo sabolo tokenee palaime."

*Yesuye sobo holo sabolo osoloso sobo hee tekepo pa  
(Maka 5:21-43; Luka 8:40-56)*

<sup>18</sup> Yesuye Yoneeyo hamamee dili odoo mapoo to osee takomolome, howo gisili moso gibadeli odoo oso sibilesi Yesuwo homo beiyopoo gauwuloso badolone egeese takaso, "Mo sobo holo epedee taso. Esiga nayo sibilesi yo o gie badeli see talame nee deeso sige," diso.

<sup>19</sup> Esemе odoo ogoso toboloso dime, Yesu o hamamee dili odoo sabolo tebisaloso yibolo hodobo diso.

<sup>20-21</sup> Diba osee diyadaga molome, sobo hee aso woolooma koodobilega dugo 12 ma kulodu badebei oso Yesuwo dugo

mapoo sigilame yima hamamee sibilesa egeese gooleeso, “Ayo dugo Yesuye ka eyo su mapoo wulo sigoga, a tekepo palaiso,” dee gooleeso. Osoloso hegi sibilesa sigeso.

<sup>22</sup> Esem epedee omapoo Yesu bidi toboloso sobo ogoloso yimapoo egeese takaso, “Mo holo, no howaleege. Nayo amapoo tei too maga no olo tekepo paso,” diso. Esem epedee omapoo sobo egee olo tekepo paso.

<sup>23</sup> Osoloso Yesu see abaga howo gisili moso gibadeli odo eyo mosopoo palaso. Diba omapoo peleso egeino, odo aboso goohela sabolo dobolone bogobou masi gawulone doboome egeiso. Esem odo aboso pupusiga meleeso.

<sup>24</sup> Yesuye goo hagee ogoloso dimapoo egeese takaso, “Niba peegoo diyadee. Sobo holo hagee koo tamoloso. Esino yo wulo tiamolo,” diso. Esem diayo Yesuwo to duloso tei telega poogoloso wulo yiliga meleeso.

<sup>25</sup> Esino Yesuye odo susuga peegoo diyadee doloso sobo holo oso tamelee moso ee ma kulodu peleso o dee mapoo tooso. Esem sobo holo tamelee oso ta maga see hogabiaso.

<sup>26</sup> Esem mi su koola omapoo debeli odo mapoo goo hagee dudobuguso.

*Yesuye odo howo neliga sabolo osoloso odo to koo keli ee tekepo pa*

<sup>27</sup> Yesu moso omaga miyomoo meilesa dimeleeno, odo howo neliga bakadio oso yima hamamee toboloso dulone toso neligidi takolone egeese takaso, “Deibidiyo amawe,\* nayo iba sooloo dologa, iba pidi,” dee takomo diyadeeso.

<sup>28</sup> Osoloso Yesu yo see moso kulodu polome, odo howo neliga bakadio oso yayo badebei mapoo sibadeeso. Esem Yesuye dimapoo egeese takaso, “Niba tei tosomo, ayo niba tekepo moodolai a teiba?” dee takaso. Esem diayo to nei egeese takaso, “O, Lodee. Iba tei toso,” dee takaso.

<sup>29</sup> Esem Yesuye dibada howo mapoo sigolone egeese takaso, “Niyo amapoo tei too goo maga niyo goomoga goo ee peledabalaiso,” diso.

<sup>30</sup> Esem dibada howo ee tekepo paso. Esino Yesuye to kitulugu sabolo dimapoo egeese takaso, “Niyo dileso goo hagee odo abo mapoo na takee,” diso.

<sup>31</sup> Esino odo bakadio oso mi su koola omapoo debeli odo susuga mapoo Yesuwo goo ee oposusumo diyadeeso.

<sup>32</sup> Odo howo neliga tekepo pa bakadio oso epedee omaga peegoo diyadaga molome, odo aboso odo bo holo pala Yesu mapoo ido simiso. Odo hagee bo holoso yima kulodu badolone, to kelega badeliso.

<sup>33</sup> Esino Yesuye bo holo ee yimaga peegoo hasiso bugume, yo see to keiso. Esem odo susuga oso goo hagee ogoloso howoogadolone egeese takaso, “Iba Isalael mi ma kulodu daga goo hageese egele,” dee takaso.

<sup>34</sup> Esino Pelisi odo oso egeese takaso, “Bo holo dia wiligi odo oso Yesu mapoo kitulugu teneega, yayo kitulugu omaga bo holo peegoo hasiso bugulone ka silo,” dee takaso.

*Yesuye odo susuga diya sooloo deli*

<sup>35</sup> Osoloso Yesuye mi susuga ma kulodu silone, Yu odoowo howo gisili moso susuga ma kulodu to tekepo Godeeye wiligi doloso badeli goo ee eligimo sileeso. Osoloso yayo odo paigiga susuga tekepo poomo sileeso.

<sup>36</sup> Egeeseelone Yesuye odo susuga ogoloso diya sooloo dalaso. Bei, diba pidili odo mauwe goo tiadoloso dobolone, sipi beso odo diba bali mauwe debeli egeesi masi debeiso.

<sup>37</sup> Esem Yesuye o hamamee dili odo mapoo egeese takaso, “Homolee ma kulodu nei susuga olo bi moodoloso goolai ee moloso. Esino nei ee gooloogalai tou teli odo haga beinee.

<sup>38</sup> Esiga homolee gibadeli odo mapoo woose, yayo o homolee ma kulodu nei

<sup>9:27:</sup> Mat 20:29-34 \* <sup>9:27:</sup> Deibidiyo amawe deli hu eyo bei ee Godeeye hudi magoo dolone takooso. <sup>9:30:</sup> Mat 8:4 <sup>9:33:</sup> Maka 2:12 <sup>9:34:</sup> Mat 12:24; Maka 3:22; Luka 11:15 <sup>9:35:</sup> Mat 4:23; Maka 1:39 <sup>9:36:</sup> Zec 10:2; Num 27:17; 1Ki 22:17; Mat 14:14; Maka 6:34 <sup>9:37:</sup> Luka 10:2

gooloogalame tou teli odoo abo diye dalame,” diso.

## 10

*Yesuye odoo 12 hesiga  
(Maka 3:13-19; Luka 6:12-16)*

<sup>1</sup> Yesuye o hamamee dili odoo 12 gili-madoloso, yayo dimapoo kitulugu teneeso, diayo silesibulone odoo susuga dima kulodu bo holo paladee ee peegoo habuguloso, odoo paigiga susuga tekepo palame.

<sup>2</sup> Esiga Yesuye diye di odoo 12 hagee bia dia hu ee hagoso. Saimon, o hu hee Pita, osoloso omolo Endulu, osoloso Sebediyo owolo bakadio Yemes dio Yonee dio,

<sup>3</sup> osoloso Pilipi, osoloso Batolome, osoloso Tomas, osoloso tekisi molee teli odoo Matiyo, osoloso Alpiyeseeyo owolo Yemes, osoloso Tadiyes,

<sup>4</sup> osoloso Loum gamalee mapoo ha teli odoo Saimon, osoloso Yudas-Iskaliyot (yayo hamamee Yesu ha teli odoo dimapoo tiasooso).

*Yesuye odoo 12 diye di  
(Maka 6:7-13; Luka 9:1-6)*

<sup>5</sup> Yesuye odoo 12 hagee bia diye dolone dimapoo egeesee takaso, “Niyo duga, Yu odoonee mapoo osoloso Samaliya odoo mapoo na di.

<sup>6</sup> Esino niba Isalael odoo mapoo di. Bei, diba sipi be hu oso diba bali odoo mauwe debeli egeesi masi doso.

<sup>7</sup> Esiga niyo dilesi Godeeyo to egeesee takee, ‘Godeeye wiligi doloso badeli goo ee olo koola toobooso,’ dee takomo diyadee.

<sup>8</sup> Egeeseelone odoo paigiga susuga tekepo pe, osoloso odoo wedia mapoo see gie badeli tenee, osoloso odoo agagisa bia see tekepo pe, osoloso odoo ma kulodu bo holo paladee peegoo hasiso bigi. Ayo nimapoo kitulugu hagee nei mauwe teneeso. Esiga niyo odoo susuga pidimo silone, tou eyo nei talame na howamo silesibe.

<sup>9-10</sup> Niyo dulone molee sabolo, osoloso o sabolo, osoloso sedi bakadio sabolo,

osoloso homo mapoo kali bi hee sabolo, osoloso susu sabolo toloso na diyadee. Bei, tou teli odoo ee dia tou eyo nei talai tebiliso.

<sup>11</sup> Niyo mi hee mapoo dilesi, mi omapoo odoo hee niba medee egeli esie. Niba odoo egeesee ogoloso yibolo hodobo o mosopoo debee. Osoloso mi egee poogoo dilega osee dobolone, yibolo o moso omapoo debee.

<sup>12</sup> Osoloso niba moso hee mapoo ido pologa, niyo moso omapoo debeli odoo mapoo emegei di to egeesee takee, ‘Godeeyo mesie goo oso nibolo mele dee.’

<sup>13</sup> Egeeseega moso ee ma kulodu debeli odoo oso emegei dolone mesie sabolo niba moso kulodu iyado pologa, Godeeyo mesie goo oso dibolo malaiso. Esino diayo niba dibada moso kulodu iyado pelega poogooga, Godeeyo mesie goo oso dibolo malaime.

<sup>14</sup> Esiga niba mi hee mapoo duga, edebeeyo niba idilega poogoloso nibada to mapoo mesilega poogooga, mi egee poogoloso dulone, megegu nibada homo mapoo mologa omapoo te, Godeeye komonolone dimapoo dia goo tokenee eyo nei tenelai goo ee gooleedalame.

<sup>15</sup> Esiga ayo nimapoo taka, mosodei kaso niba sibadeega, ogoloso goomoga sabolo niba iyadelega poogooga, nei Godeeye midilei biame omapoo, dala toowa diayo talai oso Sodom bia sabolo osoloso Gomola bia oso dala talai ee dagadileiso.”

*Dala egee sibo eyo goo  
(Maka 13:9-13; Luka 21:12-17)*

<sup>16</sup> “Esiga ayo niba sipi be hu masi dobu so kamanali ma kulodu diye deeso. Esiga niba hebise masi dobolone medee goolee sabolo bolone ka debee. Osoloso niba molo masi dobolone niyo debei ma kulodu goo tokenee mauwe debee.

<sup>17</sup> Esiga niba obeeyamo. Edebeeyo niba toloso goo midili moso mapoo ido polo dolone dabalaiso. Osoloso niba dibada howo gisili moso mapoo ido peleso wooloogolone dabalaiso.

18 Osoloso niba mo goo maga gamalee wiligi odoo tebisa sabolo osoloso wiligi odoo toowa tebisa abo dia mudugiyopoo ido peleso omapoo holoogalaiso. Esino niyo omapoo peleso mo goo ee dimapoo osoloso Yu odoonee mapoo takolone dabalaiso.

19 Egeesi ma kulodu edebeeyo niba goo midili moso mapoo ido pologa, niyo takalai goo ee haga na goolee. Bei, biame omapoo Dio Tei oso niyo takalai goo goolee tekepo ee nimapoo tenelaiso.

20 Esiga niba niso goolee takalaime, esino Nama Godeeye Dio Tei nimapoo tenee oso nibolo toboloso goo goolee tekepo teneega niyo egeese takalaiso.

21 Biame omapoo edebeeyo emei dio omolo dio wooloomalame diba goweli odoo mapoo tiasalaiso. Osoloso amaye owolo mapoo egeese selaiso. Osoloso owoloye dibada ama dio owee dio mapoo mesilega poogoloso diba wooloomalame tiasalaiso.

22 Bei, niyo amapoo tei too goo omaga odoo susuga oso nimapoo heiga toowa malaiso. Esino edebeeyo eyo tei too kibiloso badolone hoo poogoo mapoo dileso peledobooga, yo badoboso kookaiyo gie badeli talaiso.

23 Esiga odoo susuga oso nimapoo dala teneega, mi omaga mi hee mapoo kukulo diyadee. Esino ayo nimapoo taka. Niyo egeeseelone Isalael mi toowa ma kulodu mi pepooko susuga mapoo Godeeyo to osee takomo silesiboga, Odoo Holo ayo omapoo sibileiso.

24 Esiga hamamee dili odoo oso dia eligili odoo ee dagadileso koo badoso. Osoloso tou teli odoo oso dibada wiligi odoo taba ee dagadileso koo doso.

25 Egeesi ma kulodu dibada eligili odoo mapoo goo heeso peledaba hedebe egeesi oso o hamamee dili odoo dimapoo peledobooga, diba goomoga sabolo dabalai tekepo. Osoloso wiligi odoo taba mapoo goo heeso peledaba hedebe egeesi oso o tou teli odoo dimapoo peledobooga, diba

goomoga sabolo dabalai tekepo. A nibada wiligi odoo doloso ka badoso. Esiga odoo aboso a hu tokenee Belsebul\* hediga, niba nosee hu diya tokenee hedigileiso.”

*Mi odoobolo na ebi*  
(Luka 12:2-7)

26 “Esiga niba goweli odoo ee bolo haga na ebi. Bei, goo susuga mada egee molo see woola peledabalaiso. Osoloso edebeeyo koo duli goo ee see woola takooga duleiso.

27 Esiga ayo nibolo silone goo abo hedebe nimapoo takeli susuga ee see niyo woola yilige bigi. Osoloso ayo nimapoo goo hee mada dulu mapoo takooga, goo egee niyo moso omu ma dokodoo peleso see woola takee.

28 Esiga niba odoo nimapoo goweli ee bolo haga na ebi. Bei, diba hedebe su wooloomali ee gooleedoo, esino dio wooloomalai diba tebile. Esino niba hedebe Godeebolo obulone ka debee. Bei, yayo nibada su sabolo osoloso dio sabolo tokenee palame, Dou mi mapoo toodalai yo teiba.

29 Esiga niba goolee, só pepuso bakadio ee wulo molee ko ta hedebeso teli. Esino ee ma kulodu só pe heeso talai ee ibada Ama Godeeye koo goomogoga, só pe egee talaimo.

30 Esiga nibada wiligi mapoo wudu susuga egee molo, Godee yo olo gooleedoo. Bei, yayo susuga olo hesigaso.

31 Esiga niba haga obugulone na debee. Bei, Godeeyo howo woola sóso goo toowa koo moloso. Haye. Niyo goo toowa ka moloso.

32 Esiga odoo agayo odoo howo woola tobudulone yayo amapoo tei too goo ee yilige buguga, nei ayo mo Ma Godee Kei mi ma dokodoo egee bado eyo howo woola yo mo odoo dalaiso.

33 Esino odoo agayo odoo howo woola tobudulone yayo amapoo tei tele poogoo goo ee woola yilige buguga, nei ayo mo Ma Godee Kei mi ma dokodoo egee bado eyo howo woola yo mo odoonee dalaiso.”

10:20: Yon 14:26    10:21: Mica 7:6; Mat 10:35; Maka 13:12; Luka 21:16    10:24: Luka 6:40; Yon 13:16; 15:20  
10:25: Mat 9:34; 12:24; Maka 3:22; Luka 11:15    \* 10:25: **Belsebul** ee Saiteneeyo hu hee.    10:26: Maka 4:22; Luka 8:17    10:28: Yem 4:12; Loum 8:31    10:31: Mat 6:26    10:33: Maka 8:38; Luka 9:26; 2Tim 2:12



*Domo pilei goo*  
(Luka 12:51-53; 14:26-27)

<sup>34</sup> “Esiga niba ayo mi toowa hamapoo mesie goo tosimi dee na goolee. Haye, ayo mesie goo tosimibile, esino domo pilame ka simi.

<sup>35</sup> Esiga ayo simi goo eyo bei egeesee moloso.

Giso holo oso amabolo domo pileiso.

Osoloso sobo holo oso oweebolo domo pileiso.

Osoloso gisowo osobo oso odoowa dio domo pileiso.

<sup>36</sup> Esiga egeesi ma kulodu nee soosoosoo namapoo ha teli odoos doloso dabalaiso.

<sup>37</sup> Edebeeyo ama sabolo, owee sabolo, owolo giso holo sabolo, osoloso sobo holo mapoo diya goolee sabolo badolone, hee a goolee pepooko mologa, yo ayo di hamamee deede sibilei tebile.

<sup>38</sup> Osoloso odoos agayo talai sabolo dala toowa talai sabolo goo medee moodelega poogoloso, ayo di hamamee dedelega poogooga, yo ayo di hamamee deede sibilei tebile.

<sup>39</sup> Esiga edebeeyo o gie badeli eyo nediliyo balai daga, o gie badeli ee osugobalaiso. Esino edebeeyo mo goo maga o gie badeli osugobooga, yo badoboso kookaiyo gie badeli talaiso.”

*Nei tekepo talai*  
(Maka 9:41)

<sup>40</sup> “Edebeeyo niba o mosopoo gilimado pologa, yayo a ido poloso. Esiga edebeeyo o mosopoo a ido pologa, yayo mo Ma Godee a diye di ee ido poloso.

<sup>41</sup> Osoloso edebeeyo Godee maga to toloso kokodo takomo sili odoos ee ogoloso, o mosopoo ido pologa, yo Godee maga to toloso kokodo takomo sili odoos oso nei teli yinosee hedebe egeesi masi talaiso. Osoloso edebeeyo Godeeyo howo woola odoos tekepo ogoloso, o mosopoo ido pologa, yo Godeeyo howo woola odoos tekepo oso nei teli yinosee hedebe egeesi masi talaiso.

**10:35:** Mica 7:6  
10:16; Yon 13:20

**10:38:** Mat 16:24-25; Maka 8:34-35; Luka 9:23-24; 17:33; Yon 12:25  
**11:5:** Isa 35:5-6; 61:1

**10:40:** Maka 9:37; Luka

<sup>42</sup> Osoloso edebeeyo mo hamamee dili odoos hee wuluge ogoloso yimapoo bi pepooko wulo howo egeesi keneega, yo nei toowa talaiso. Esiga hagee tei goo.”

## 11

<sup>1</sup> Yesu o hamamee dili odoos 12 mapoo goo hagee taka koodobuloso see Gelili mi toowa ee ma kulodu Godeeyo to takomo silame diso.

*Yesu dio osoloso Yonee odoos howo oluguli dio*  
(Luka 7:18-35)

<sup>2</sup> Yonee odoos howo oluguli oso neliga moso ma kulodu badolone, Kelisoye goo tomo silee duloso o hamamee dili odoos abo Yesu mapoo diye diso.

<sup>3</sup> Esem dibaa dileso Yesuye badebei mapoo peledoboloso yimapoo egeesee takaso, “Yoneeye iba namapoo diye dolone to egeesee takeeyena, ‘No tei Keliso iyo hagee bamolo odoos osomo? O, iba odoos hee bamalaiyo?’” diso.

<sup>4</sup> Esem Yesuye nei dimapoo egeesee takaso, “Niba see wedi dileso niyo egei goo sabolo osoloso niyo du goo ee Yonee mapoo takee.

<sup>5</sup> Bei, odoos howo neliga oso see medee ogowa. Osoloso odoos bagi daga poogoo sabolo see tekepo poloso ka silesiba. Osoloso odoos agagisa bia sabolo tekepo poloso ka silesiba. Osoloso odoos dulu tabaga onosee tekepo poloso to taka see duliso. Osoloso odoos wedia sabolo hogogabuloso see silesiboso. Osoloso to tekepo hagee bi mauwe odoos oso duluga moloso.

<sup>6</sup> Esiga odoos agayo ayo goo moodoo ee ogoloso diayo amapoo tei too goo ee pegel-ega poogooga, Godeeye dimapoo goomoga goo tenelaiso.”

<sup>7</sup> Yonee o hamamee dili odoos oso see wedi diyadeeme, Yesuye odoos mooloogoodoo mapoo Yoneeyo goo takalame bei mooloogoosoo. Osoloso yayo egeesee takaso, “Niba miwe poogoo mi mapoo ogoo goo agalame ka diyo? Pooso sibulone obu dabisa ee agalame ka diyo?”

<sup>8</sup> Niba edebeeyo dugo tekepo kaloso badoboome ee agalame ka diyo? Haye. Bei, dugo tekepo kalagali odoo ee wiligi odoo tebisa oso debeli moso tekepo mapoo debeli.

<sup>9</sup> Esino niba wulo Godee maga to toloso kokodo takomo sili odoo ee agalame ka diyo? O. Niyo dilesos egei odoo Yonee hagoso Godee maga to toloso kokodo takomo sili odoo daga hoogoo debei ee yayo dagadilesos ka badoso.

<sup>10</sup> Bei, Godeeyo to booka mapoo hogugu oso egeesee egee takoo ee Yoneeyo goo ee takooso,

‘Ayo mo to tosili odoo yo daga malalo diye dalaiso,  
odoo susuga oso nayo sibilei mapoo mopoodoo doloso debeeye dalame,’  
diso.

<sup>11</sup> Esiga ayo nimapoo taka. Odoo daga hoogoo debei susuga ee Yoneeye dagadilesos ka badoso. Esino edebeeyo Godeeye wiligi doloso badeli goo mapoo odoo wuluge oso Yonee dagadilesos ka badoso.

<sup>12</sup> Esiga odoo howo oluguli Yoneeye Godeeyo to takomo silee biame omaga bei mooloogoloso abaga simino epedee hamapoo tokenee teli odoo oso ha teli odoo masi Godeeye wiligi doloso badeli goo ee tokenee palame diya kituluguso.

<sup>13</sup> Yonee sibilega badoboome, Moseseeye eligi goo sabolo osolosos Godee maga to toloso kokodo takomo sili odoo susuga oso hogugu oso Godeeye wiligi doloso badeli goo ee takemeleeso.

<sup>14</sup> Esiga niyo to diayo taka hamapoo tei toga, niyo Yonee see Ilaya dalaiso. Bei, Godeeyo to booka mapoo hogugu oso Ilayaye sibilei goo ee takemeleeso.

<sup>15</sup> Niba dulubolo, esiga ayo hagee takoo medee hoodo dui.”

<sup>16</sup> Osolosos Yesuye see egeesee takaso, “Odoo epedee biame hamapoo egee do odoo ee kasee masisos dosomo? Diba holaiso masi go domopoo dobolone emegei dimapoo nei takoo nei takoo dolone dobolone egeesee takaga meliso,

<sup>17</sup> ‘Iyo goomoga kosaiya poume, niba hepele. Osolosos iyo goohele kosaiya poume, niba pisile,’ diso.

<sup>18</sup> Niba odoo egeesi masi dosos. Bei, Yonee odoo howo oluguli yayo sibilesos nei haga toowa namos sile, osolosos wain i keesoo nele. Esino niyo yo bo holo paladoo, dee takeliso.

<sup>19</sup> Osolosos hamamee Odoo Holo a olo simisos. Ayo sibilesos wo sabolos wain i sabolos namos sileeme, niyo a nei sabolos yugune sabolos dooboo nali odoo, dee takeliso. Osolosos niyo a tekisimos molee teli odoo sabolos, osolosos tokenee teli odoo sabolos hedebe dolosos ka badeli delisos. Esino odoo agayos Godeeyo goo goolee tekepo gooleedolosos tomos siloga, yayo Godeeyo goo goolee ee tekepo dolone ka eligisos.”

*Yesuye odoo tei tele poogoo eyo goo taka (Luka 10:13-15)*

<sup>20</sup> Yesuye mi abo mapoo goo toowa opusomos di moodoomos sileeme, odoo mi omapoo debeli oso dia goo tokenee su wudelega poogoome, yayo odoo egee bia dia goo ogolosos dimapoo diya takolone egeesee takaso,

<sup>21</sup> “Kolasin bia sabolos Betesaida bia, dala toowaso niba bamolosos. Bei, ayo nibada mi mapoo goo toowa mudu opusomos opusomos di ee moodoogamos silee egeesimos masi Taya bia mapoo osolosos Saidon bia mapoo moodoogamos silee diepi, diba haga booloogelega, dibada goo tokenee maga miligi pialosos debeliyo. Osolosos diayo dibada goo tokenee maga miligi pia goo ee eligilone dugo tokenee kelekalosos dosos holugalosos silesibiliyo.

<sup>22</sup> Esino ayo nimapoo taka, Godeeye goo midilei biame mapoo dala toowa Kolasin bia sabolos osolosos Betesaida bia oso talai oso Taya bia sabolos osolosos Saidon bia oso talai ee dagadileiso.

<sup>23</sup> Osolosos Kapeniyum mosobias niba Kei mi ma dokodoo ido palaisos, dee goolone ka dosomos? Haye. Niba tolosos Dou mi mapoo toodalaisos. Ayo nibada mi mapoo goo toowa mudu opusomos di moodoogamos silee egeesimos masi Sodom mi mapoo

moodoogamo silee diepi, Sodom mi toke-nee pelega epedee hamapoo osee meliyo.

<sup>24</sup> Esino ayo nimapoo taka, Godeeye goo midilei biame omapoo dala toowa Kapeniyum bia niyo talai oso Sodom bia oso talai ee dagadileiso.”

*Amapoo sibilesa hese  
(Luka 10:21-22)*

<sup>25</sup> Esemé Yesuye egeesee takaso, “Ma, Kei mi sabolo osoloso mipoo sabolo nayo wiligi doloso ka badoso. Esiga a namapoo goomogo. Bei, nayo wiligi doloso badeli goo mada egee molo ee, odoo goo goolee toowa mapoo yilige bigile. Esino nayo goo goolee dele poogoo odoo mapoo yilige buguso.

<sup>26</sup> O. Tei takoo, Ma. Goo hagee nayo goomoga goo oso.”

<sup>27</sup> Yesuye see tobu egeesee takaso, “Mo Maye goo susuga amapoo olo teneeso. Esiga odoo heeso Owolo a gooleede. Esino hedebe mo Maye Owolo, a ka gooleedoo. Osoloso odoo heeso mo Ma gooleede. Esino hedebe Owolo ayo mo Ma ka gooleedoo. Odoo ogu bia mapoo Owolo ayo mo Mayo goo ee yilige bigilame goomogoga, odoo egee bia oso mo Mayo goo ee diba nose gooleedalaiso.

<sup>28</sup> Esiga edebeeyo hegi bi masi kadaloso silone kwasu sabolo siloga, niba amapoo sibe. Egeeseega ayo nimapoo hasali tenelaiso.

<sup>29</sup> Osoloso ayo eligi goo ee ogoloso mo goo peedee. Bei, a mesie odoo. Esiga niba hasalame amapoo sibe.

<sup>30</sup> Bei, goo ayo eligi ee dadalai haga kodianee. Osoloso bi masi ayo nimapoo eimedilame egee molo ee diya poopeeya.”

## 12

*Pelisi odoo dia hasali biame maga Yesubolo toso agadiga  
(Maka 2:23-28; Luka 6:1-5)*

<sup>1</sup> Yu odoowo hasali biame heeso, Yesu o hamamee dili odoo sabolo witi wo ko segei ee ma kuloduga diyadaga meleeso. Osoloso Yesu o hamamee dili odoo oso

diya houdume, witi wo ko gooloogaloso nalagamo diyadeeso.

<sup>2</sup> Esemé Pelisi odoo oso goo hagee ogoloso Yesu mapoo egeesee takaso, “Bei kasi maga nee hamamee dili odoo oso iyo hasali biame mapoo witi wo ko ka gooloogayo? Diayo ibada tei gababuoso,” diso.

<sup>3</sup> Yesuye nei egeesee takaso, “Deibidiye o odoo sabolo houdume diayo moodoo goo ee Godeeyo toso booka mapoo hogugu niyo hesigeleyo?

<sup>4</sup> Bei, Deibidiye Godeeyo tei moso ma kulodu gadilesa tei wo toloso o odoo sabolo neso. Esino tei wo hagee ibada tei ee dodolone Godee ogo odoo ogo doloso domo debeli odoo hedebe oso nali. Esino Deibidiye o odoo sabolo wo ne oso tei magoo ee gababiaso.

<sup>5</sup> Osoloso Moseseeye tei hogugu ma kulodu to hee hageesee egee takoo niyo hesigeleyo? Goo egee Godee ogo osoloso odoo ogo doloso debeli odoo oso hasali biame mapoo tei moso ma kulodu dia tou teliso. Diayo goo egeesi moodeli oso tei magoo gababiliso. Esino Godeeye goo egee ogoloso tokenee dee koo takeli.

<sup>6</sup> Esiga ayo nimapoo taka, goo hee dia epedee hamapoo sibilesa egee molo oso tei moso oso kitulugu ee dagadilesa ka moloso.

<sup>7</sup> Esiga Godeeyo to booka mapoo hogugu oso egeesee takooso,

‘Niyo emegei pidilei ono ayo diya goolone niyo nei amapoo gala wooloso teneli goo ee ayo haga koo gooleeso,’ diso.

Niyo to eyo bei medee kibiya gooleedoloso ka debei diepi, niyo mo hamamee dili odoo ee tokenee odoo dee takele pegeliyo.

<sup>8</sup> Bei, niyo hasali biame egee Odoo Holo ayo wiligi doloso ka badoso.”

*Yesuye odoo dee hodio seeseegedoo poogoo tekepo pa  
(Maka 3:1-6; Luka 6:6-11)*

<sup>9</sup> Yesuye to taka hagee koodobuloso see omaga diayo howo gisili moso mapoo palaso.

10 Osoloso moso eyo kulodu odoo dee hodio seeseegedoo poogoo badoboome egeiso. Egeesi ma kulodu Pelisi odoo aboso Yesu tokenee odoo dalame eli esilone yimapoo egeese takaso, “Ibada tei magoo oso takolone iyo hasali biame mapoo odoo tekepo palai tekepowa?” diso.\*

11 Esino Yesuye nei dimapoo egeese takaso, “Nima kulodu odoo heeso o sipi be hedebe oso niyo hasali biame mapoo wulu ma kulodu toodobuoga, yayo yo hudilega pagalaisomo? Haye. Yayo yo wulu ma kulodu badoga see hudileiso.

12 Esiga Godeeyo howo woola sipi beso goo haga toowa koo moloso. Haye. Edebeeyo goo toowa ka moloso. Esiga edebeeyo ibada hasali biame mapoo goo tekepo talai ee tei mauwe.”

13 Esemé Yesuye odoo dee hodio seeseegedoo poogoo yimapoo egeese takaso, “Nee dee seeseegedoo poogoo egee see hoodode,” diso. Esemé odoo egee o dee see hoododeme, dee egee tekepo poloso o dee tekepo hodio egeesi masi meleeso.

14 Esemé Pelisi odoo oso goo hagee ogoloso komonolone dia howo gisili moso maga peegoo diyadeeso. Osoloso diayo dileso Yesu tolosa woolame diesono to mouso.

### *Yesu yo Godeeye hesia*

15 Esiga diayo to mou goo ee yo olo gooleedoloso, Yesu yo see mi hee mapoo diso. Esemé odoo susuga oso yo deede diso. Esemé odoo paigiga susuga dima kulodu melee ee yayo tekepo paso.

16 Osoloso yayo dimapoo to kitulugu sabolo egeese takaso, “Niyo mo goo hagee odoo susuga mapoo na oposisiye,” diso.

17 Godee maga to tolosa kokodo takomo sili odoo Aisayaye taka to sabolo teibaso. Bei, yayo egeese takaso,

18 “Ege, hagee mo tou teli odoo.

Yo ayo hesia.

Ayo yo diya goolone

yimapoo diya goomogoso.

Ayo mo Dio yimapoo tenelaiso.

Osoloso tei goo ee yayo Yu odoonee susuga mapoo takalaiso.

19 Osoloso yayo odoo hee sabolo toso agadigilone to boowoolaimé.

Osoloso yayo eli domopoo eligiga to neligidi takalaimé.

20 Osoloso yayo tiosi seegee magoo ee gobigileime.

Osoloso keme pepooko paimologa yayo semidileime.

Esiga odoo tei too kibile poogoo yayo egee pidimolo goo ee epedee pagalai mauwe.

Esino odoo susuga oso Godeeye goomoga goo ee dodomolo ogoloso omapoo koodobileiso.

21 Esiga o hu maga Yu odoonee susuga oso diayo dulone egee bamolo gie badeli ee talaiso.”

### *Yesu dio Belsebul dio*

*(Maka 3:20-30; Luka 11:14-23)*

22 Biame omapoo odoo aboso odoo hee howo neliga mapoo bo pala oso to kelega badebei odoo ee Yesu mapoo ido simiso. Esemé Yesuye yo tekepo paso. Esemé domo omapoo odoo egee olo howo puo ogoloso see to keiso.

23 Odoo susuga oso goo hagee ogoloso howoogadolone egeese takaso, “Odoo hagee Deibidiyo amawe bele,” diso.

24 Esino Pelisi odoo oso goo hagee duloso egeese takaso, “Yesuye Belsebul oso kitulugu maga bo holo peegoo hasiso bigiliso. Bei, Belsebul yo bo holo dia wiligi odoo,” diso.

25 Esino Yesuye diayo goolee goo ee gooleedoloso dimapoo egeese takaso, “Mi toowa mapoo debeli odoo oso abo puloso dieso nediliyo ha toga, mi toowa egee malaime, tokenee palaiso. Osoloso soosoo heeso o, mosobia heeso abo puloso dieso nediliyo ha toga, diba dabalaimé, tokenee palaiso.

26 Esiga Saiten oso bo holo peegoo hasiso buguga, dia mooloogoodoo ma kulodu abo puloso dieso nediliyo ha talaiso. Yayo

\* **12:10:** - Pelisi odoo aboso Yesu mapoo hageese takaso, bei, diayo tei goo ee dodolone dia hasali biame mapoo odoo paiye ee moodolai tei. **12:11:** Luka 14:5 **12:14:** Yon 5:16 **12:16:** Mat 8:4; Maka 3:12 **12:18:** Isa 42:1-4; Mat 3:17 **12:24:** Mat 9:34; 10:25



egeesee seega, yayo wiligi doloso badeli goo oso kookaiyo osee malaisomo? Toke-nee palaiso.

<sup>27</sup> Esino ayo bo holo peegoo hasiso bigili kitulugu hagee tei Belsebul oso kitulugu maga ka hasisimo silo daga, nibada hamamee dili odoo oso bo holo peegoo egee hasisimo silesibo kitulugu egee kamapoo teliyo? Esiga diayo takooga niyo amapoo egee takoo goo ee tei goonee, dee takalaiso.

<sup>28</sup> Esino ayo Godeeyo Dio Tei oso kitulugu maga bo holo peegoo ka hasisimo siloso. Goo oso Godeeye wiligi doloso badeli goo oso olo nimapoo simi goo ee ka eligiso.

<sup>29</sup> Esiga odoo heeso kitulugu odoo eyo moso mapoo peleso bi heli talame gooleega, yo daga kitulugu odoo egee tiso tialogoloso magalaiso. Osoloso hamamee o moso kulodu peleso o bi heli talaiso.

<sup>30</sup> Esiga edebeeyo abolo tebelega poogooga, yayo amapoo ha tomoloso. Osoloso edebeeyo abolo odoo Godee mapoo gili-mado sibilega poogooga, yayo odoo Godee maga peegoo hasiso bugu domoloso.

<sup>31</sup> Esiga ayo nimapoo taka. Goo tokenee susuga edebeeyo teli sabolo osoloso emegei dimapoo to tokenee takeli goo ee Godeeye hapoloso boobado bigileiso. Esino edebeeyo Dio Tei eyo goo maga to tokenee takooga, o goo tokenee egee Godeeye hapoloso boobado bigileime.

<sup>32</sup> Osoloso edebeeyo Odoo Holo amaga to tokenee takooga, Godeeye o goo tokenee egee hapoloso boobado bigileiso. Esino edebeeyo Dio Tei eyo goo maga to tokenee takooga, yo goo tokenee moloso kookaiyo osee malai ee toso. Esiga o goo tokenee egee Godeeye hapoloso boobado bigileime.”

*Homokoko maga homo o su ka gooleedeeya  
(Luka 6:43-45)*

<sup>33</sup> “Esiga homo tekepo oso homokoko tekepo peliso. Esino homo tokenee oso

homokoko tokenee peliso. Esiga homo su susuga oso ko pa maga ka gooleedeeya.

<sup>34</sup> Esiga niba tokenee odoo hebise masi dobolone niyo see goo tekepo takalai tebile. Bei, edebeeyo goo goolee dia sooloo ma kulodu egee molo ee dia magaso takooga woola yilige bigiliso.

<sup>35</sup> Esiga goo tekepo teli odoo oso goo tekepo o goo goolee mapoo meli ee o magaso woola yilige bigiliso. Osoloso goo tokenee teli odoo oso goo tokenee o goo goolee mapoo meli ee o magaso woola yilige bigiliso.

<sup>36</sup> Egeesi ma kulodu ayo nimapoo taka. Goo midilei biame mapoo odoo susuga oso goo tokenee diayo taka goo eyo bei ee Godee mapoo woola yilige bigileiso.

<sup>37</sup> Esiga Godeeye goo midilei biame mapoo, to no takeli goo sabolo teiba nee goo midileiso. Egeesi ma kulodu no to tekepo takomo sili daga, yayo no odoo tekepo dalaiso. Esino no to tokenee takomo sili daga, yayo no odoo tokenee dalaiso.”

*Edebeeyo goo toowa opusomo di moodoo ee agalame goomoga  
(Maka 8:11-12; Luka 11:29-32)*

<sup>38</sup> Biame heeso Pelisi odoo abo sabolo osoloso tei eligili odoo sabolo oso Yesuye badebei mapoo sibilesa egeesee takaso, “Eligili odoo, nayo kitulugu too egee tei Godee maga simidoo doloso gooleedalaiya, nayo goo toowa opusomo di hee moodee,” diso.

<sup>39</sup> Esemme Yesuye nei dimapoo egeesee takaso, “Odoo epedee hamapoo egee do niba diya tokenee. Osoloso niyo amapoo tei talai goweliso. Esiga niyo ayo wulo goo toowa opusomo di moodoo ee agalame amapoo takeliso. Esino ayo nimapoo goo toowa opusomo di hee eligilei mauwe. Esino hedebe Godee maga to toloso kokodo takomo sili odoo Yonayo goo ono nimapoo eligileiso.

<sup>40</sup> Yona biame bakadio hedebe di osoloso gesi bakadio hedebe di ee ma kulodu di toowa eyo gemedei ma kulodu badebeiso. Esiga Odoo Holo anosee biame

bakadio hedebe di osoloso gesi bakadio hedebe di mapoo midoo ma kulodu ta malaiso.

<sup>41</sup> Esiga Niniba odoosoo oso goo midilei biame mapoo nibolo hodobo toboloso nibada goo midiloso, niba tokenee odoosoo dalaiso. Bei, Yonaye Godeeyo to dimapoo takeme, diayo dia goo tokenee maga goo su wuduloso miligi piaso. Esino ayo Yona dagadileso ka badoso. Esino ayo Godeeyo to nimapoo takeme, niyo duloso nibada goo tokenee maga goo su wuduloso miligi pile.

<sup>42</sup> Osoloso goo midilei biame mapoo Siba mi eyo wiligi odoosoo taba sobo onosee nibolo hodobo nibada goo midiloso niba tokenee odoosoo dalaiso. Bei, wiligi odoosoo taba Solomonoye eligi goo ee dulame yo eli sage abaga simiso. Esino ayo Solomonoo dagadileso ka badoso. Esino niyo mo to dulei ka gowooso.”

*Bo holoso see wedi sibili goo  
(Luka 11:24-26)*

<sup>43</sup> “Esiga bo holoso odoosoo maga peegoo gaduga, yo dileso doobudu yayo badalai mi ee esiamo sileiso. Yo mi esiamo siloso koo ogoga, eyo nediliyo egeesee takalaiso,

<sup>44</sup> ‘A mawo daga badebei moso mapoo see wedi dileiso,’ dee takalaiso. Osoloso yo see sibilesosoo ogoga, gelesi kadee dolosoo bi medee mopoodoo ma molo agalaiso.

<sup>45</sup> Eseega yo see doobudu wedi dileso bo holo diya kitulugu abo 7 gili-madolosoo sibilesosoo moso omapoo dabalaiso. Egeeseega odoosoo hagee eyo daga badebei poogolosoo see diya tokenee badalaiso. Esiga goo tokenee teli odoosoo epedee hamapoo egee do niyo daga debei poogolosoo see diya tokenee dabalaiso. Bei, niyo ayo eligi goo mapoo tei tele poogooga.”

*Yesuwo owee sabolo osoloso omolo dio  
(Maka 3:31-35; Luka 8:19-21)*

<sup>46</sup> Yesuye odoosoo mooloogoodoo mapoo to osee takomolome, owee dio osoloso omolo dio sibilesosoo peegoo tebisamolone, yimapoo to takalame goomogaso.

<sup>47</sup> Esemee odoosoo heeso Yesu mapoo egeesee takaso, “No ege, noowee dio osoloso nomolo dio namapoo to takalame sibilesosoo peegoo tebisamoloo,” dee takaso.

<sup>48</sup> Esino Yesuye nei yimapoo egeesee takaso, “Mo wee ogumo? Osoloso molo dio ogumo?” diso.

<sup>49</sup> Esemee yayo o hamamee dili odoosoo dimapoo dee kou takolone egeesee takaso, “Niba ege, odoosoo egee bia ee mo wee osoloso molo dio oso.

<sup>50</sup> Esiga edebeeyo mo Ma Kei mi ma dokodoo badeli oso goomoga goo ee tomo siloga, odoosoo egee bia ee molo dio, osoloso mo booba dio, osoloso mo wee dio oso,” dee takaso.

## 13

*Witi ko segei maga wudu taka  
(Maka 4:1-9; Luka 8:4-8)*

<sup>1</sup> Biame hedebe ogosoo Yesu moso kulduga peegoo dileso Gelili abei pee mapoo meilesosoo biaso.

<sup>2</sup> Yo omapoo badoboome, odoosoo susuga oso yayo eligi goo ee dulame yimapoo sibilesosoo diya mooloogoodosoo. Esemee Yesu yo du mapoo daboogolosoo eligilone badoboome, odoosoo susuga mubiyodoga tebisamolone duluga meleeso.

<sup>3</sup> Osoloso yayo goo susuga maga wudu takolone odoosoo susuga mapoo eligilone egeesee takaso, “Niba dui. Biame heeso odoosoo hee witi wo ko segelame diso.

<sup>4</sup> Yo witi wo ko sogomo sileeme, ko abo eli domopoo misigedibaso. Esemee so abosoo sibilesosoo neso.

<sup>5-6</sup> Osoloso witi wo ko abo yugo kauwe mi mapoo misigediba ee bou saga pisi-gaso. Esino osoko pa oso dei moodoolone witi wo ko saga wediaso. Bei, too delega.

<sup>7</sup> Osoloso witi wo ko abo daga we ti kauwe kadee mapoo misigedibaso. Osolosoo bou pisigaso. Esino we ti sabolo palaga tiso tiademe susuga wediaso.

<sup>8</sup> Osoloso witi wo ko abo mi tekepo mapoo misigedibaso. Osolosoo oso bou pisigalosoo kakauwulosoo ko diya palagaso. Egeesi ma kulodu witi wo ko abosoo homokoko 100 egeesi palagaso. Osolosoo

aboso 60 egeesi palagaso. Osoloso aboso 30 egeesi palagaso.

<sup>9</sup> Odoo niba dulubolo, esiga to ayo hagee takoo medee dui!”

*Bei kasalame Yesuye wulo ka wudu takomo siliyo?*

*(Maka 4:10-12; Luka 8:9-10)*

<sup>10</sup> Osoloso Yesu o hamamee dili odoo oso sibilesu Yesu mapoo egeesee takaso, “Nayo kasalame odoo mapoo wulo ka wudu takomo siliyo?” diso.

<sup>11</sup> Esemu Yesuye nei dimapoo egeesee takaso, “Niyo Godeeye wiligi doloso badeli goo ee diya gooleedalaiso. Godeeye wiligi doloso badeli goo ee daga mada meleeso. Esino Godeeye epedee hamapoo nimapoo olo yilige buguso. Esino yayo odoo abo mapoo yilige bigile.

<sup>12</sup> Esiga to taka duli odoo mapoo Godeeye goo goolee tekepo bei tenelaiso. Esino edebeeyo mo to dulega poogooga, Godeeye yimapoo goo goolee tekepo pepooko egee molo see eyo peedee dalaiso.

<sup>13</sup> Ayo odoo mapoo wulo wudu takomo siliso. Bei,

‘diayo ogoloso medee kibiya egelega palagame.

Osoloso diayo duloso goo eyo bei medee kibiya gooleedelega palagame.’

<sup>14</sup> Osoloso Godee maga to tolosu kokodo takomo sili odoo Aisayaye taka to oso goo diayo moodeli sabolo teibaso. Bei, yayo egeesee takaso,

‘Diayo medee hodu dileso to taka duleiso, esino goo eyo bei diayo medee kibiya gooleedalaimu.

Osoloso diayo medee hodu dileso agalaiso, esino goo eyo bei diayo ogoloso gooleedalaimu.

<sup>15</sup> Bei, diba tei goo ee gooleedalai gowoolone, dieso dibada deeso dia dulu tobodo osoloso dia howo gisigaso.

Esiga diba goo eyo bei ee gooleedalai tebile.

Esino diayo ogoloso, osoloso duloso goo goolee tekepo tolosu, amapoo wedi simi diepi,

ayo dibada goo tokenee hapoloso boobado bigiliyo.’

<sup>16</sup> Esino Godeeye mo hamamee dili odoo nimapoo goomogoso. Bei, niyo ayo moodoo goo ee ogoloso duloso gooleedoo maga.

<sup>17</sup> Esiga ayo nimapoo taka. Godee maga to tolosu kokodo takomo sili odoo daga debei sabolo osoloso Godeeyo howo woola tekepo debeli odoo oso niyo epedee egee ogomolo goo ee agalai doloso bameleeso. Esino diayo egele. Osoloso niyo epedee egee dumolo goo ee dulei doloso bameleeso. Esino diayo dule.”

*Wudu taka goo eyo bei*

*(Maka 4:13-20; Luka 8:11-15)*

<sup>18</sup> Yesuye see tobu egeesee takaso, “Esiga witi wo ko segei maga wudu taka goo eyo bei medee dui.

<sup>19</sup> Esiga odoo abo witi wo ko oso eli domopoo misigediba egeesi masi doso. Diba to tekepo Godeeye wiligi doloso badeli goo ee duloso medee kibiya gooleedelega poogooga, Saitenso sibilesu Godeeyo to dibada sooloo ma kulodu melee yayo peedee deliso.

<sup>20</sup> Osoloso odoo abo witi wo ko oso yugo kauwe mi mapoo misigediba egeesi masi doso. Esiga diayo Godeeyo to taka duloso goomoga sabolo saga teliso.

<sup>21</sup> Esino Godeeyo to oso dia sooloo ma kulodu too medee koo meili. Esiga diayo Godeeyo to duloso biame deiyepo mapoo tei teliso. Esino diayo Godeeyo to mapoo tei too goo maga hegi goo sabolo osoloso dala goo oso dimapoo siboga, diayo Godeeyo to mapoo tei too goo ee saga pegeliso.

<sup>22</sup> Osoloso odoo abo witi wo ko oso dagi we ti kauwe kadee mapoo misigediba egeesi masi doso. Diba Godeeyo to duloso tei teliso. Esino mi hamapoo dabalai maga goo kodia sabolo osoloso bi bei doloso dabalame goolee oso dibada tei too tokenee

peliso. Egeesi maga diayo tei too goo oso homokoko masi koo peli.

<sup>23</sup> Osoloso odoo abo witi wo ko oso mi tekepo mapoo misigediba egeesi masi doso. Diayo Godeeyo to duloso gooleedeliso. Esiga odoo aboso homokoko masi 100 egeesi peliso, osoloso aboso 60 egeesi peliso, osoloso aboso 30 egeesi peliso.”

*Witi wo ko sabolo osoloso obu ko sabolo*

<sup>24</sup> Osoloso Yesuye see hee wudu takolone odoo mooloogoodoo mapoo egeesee takaso, “Godeeye wiligi doloso badeli goo ee egeesi masi moloso. Odoo heeso witi wo ko o homolee mapoo segeiso.

<sup>25</sup> Esino gesi odoo susuga tiesamolome, yimapoo ha teli odoo oso sibilesa yayo witi wo ko segei homolee omapoo obu ko sogoloso diso.

<sup>26</sup> Esiga witi wo ko segei olo kauwudoloso ko poome, obu ko segei sabolo hodobo palaso.

<sup>27</sup> Esemé o tou teli odoo aboso sibilesa egeesee takaso, ‘Nee homolee ma kulodu hedebe witi wo ko segeino, see kasi maga obu sabolo ka paladeeyo?’ dee takaso.

<sup>28</sup> Esemé yayo nei egeesee takaso, ‘Imapoo ha teli odoo oso sibilesa ka segei molodoo,’ diso.

Esemé o tou teli odoo oso yimapoo egeesee takaso, ‘Iyo dileso obu egee tigeloso peegoo togobisilei no goomogodo?’ dee takaso.

<sup>29</sup> Esino yayo dimapoo egeesee takaso, ‘Haye, niyo na tige. Bei, niyo tigaga, witi wo ko segei sabolo tigebigiyaga.

<sup>30</sup> Esiga o diesono hodobo esee paladee dee. Osoloso ko goolai biame mapoo mo tou teli odoo oso daga obu ee tigeloso dou mapoo toodee dalaiso. Esino witi wo ko segei oso paladee ee gooloogaloso mo nei mageli moso mapoo mooloogoo magee dalaiso.’”

*Yesuye ko pepooko masted deli sabolo osoloso yist maga wudu taka*

*(Maka 4:30-32; Luka 13:18-21)*

<sup>31</sup> Osoloso Yesuye see hee wudu takolone o hamamee dili odoo mapoo

egeesee takaso, “Godeeye wiligi doloso badeli goo ee egeesi masi moloso. Odoo heeso ko pepooko masted deli todilesa o homolee mapoo segeiso.

<sup>32</sup> Esino ko abo ma kulodu ko masted deli hagee diya pepooko. Esino ko pepooko oso bou pisoloso kauwuga, homolee ee ma kulodu homo su oso toowa malaiso. Osoloso sóso omapoo sibilesa o dee mapoo ou tegelaiso.”

<sup>33</sup> Osoloso Yesuye see hee wudu takolone dimapoo egeesee takaso, “Godeeye wiligi doloso badeli goo ee egeesi masi moloso. Soboso wo palawa silame daga homolone, wo toowa ee ma kulodu yist pepooko kukoseliso. Osoloso yist pepooko oso wo palawa ee diya koudiliso.”

<sup>34</sup> Esiga Yesuye odoo mooloogoodoo mapoo goo susuga hagee eligilame dimapoo wulo wudu takeliso.

<sup>35</sup> Yayo goo hageesee tomo sili egee Godee maga to tolosa kokodo takomo sili odoo oso taka sabolo tebilame ka eligimo sili. Bei, yayo egeesee takaso,

“Ayo odoo mapoo Godeeyo to eligilone wulo wudu takomo sileiso. Osoloso mi toowa bei mooloogolone goo mada melee ee see ayo woola yilige bigileiso.”

*Witi wo ko sabolo osoloso obu maga wudu taka goo eyo bei*

<sup>36</sup> Yesuye odoo mooloogoodoo diye doloso, yo see moso kulodu palaso. Esemé o hamamee dili odoo oso yimapoo sibilesa egeesee takaso, “Witi wo ko segei sabolo osoloso obu ko segei omaga wudu taka goo eyo bei nayo imapoo medee kibiya takee,” diso.

<sup>37</sup> Esemé Yesuye dimapoo egeesee takaso, “Witi wo ko segeli odoo ee Odoo Holo aso.

<sup>38</sup> Osoloso witi wo ko segei mi ee mipoo toowa hagoso. Osoloso witi wo ko ee Godeeyo owolo dioso. Esino obu ko ee Saiteneeyo owolo dioso.

<sup>39</sup> Egeesi ma kulodu obu ko segeli odoo ee Saitenso. Osoloso goolai biame ee biame hoo poogoo oso. Osoloso witi wo ko goolai odoo ee Godeeyo momaiye oso.



<sup>40</sup> Esiga obu tignaloso dou mapoo toodeli egeesi masi ee biame hoo poogoo mapoo Odo Holo ayo Saiteneeyo owolo dio ee dou mapoo egeese toodalaiso.

<sup>41-42</sup> Egeesi ma kulodu Odo Holo ayo mo momaiye diye dalaiso, diayo dilesa odo goo tokenee mapoo gido dili odo sabolo osoloso goo tokenee teli odo ee gilimadoloso dou mi mapoo toodalaiso. Eseega diayo ee ma kulodu dobolone pisa sabolo mei gisile sabolo dabalaiso.

<sup>43</sup> Esino Godeeye tekepo deli odo oso Ma Godeeye wiligi doloso badeli mi mapoo osokoso pa masi palaiso. Odo niba dulubolo, esiga to ayo hagee takoo medee dui!”

#### *Molee mada magoo maga wudu taka*

<sup>44</sup> “Esiga Godeeye wiligi doloso badeli goo ee egeesi masi moloso. Odo heeso daga hoogoo bi medee tekepo molee toowaso too mi ma kulodu mada magoo ee odo heeso mi doomeleso egeiso. Yo bi egee ogoloso see tobu miso gagaso. Osoloso goomoga sabolo o mosopoo wedi dilesa o bi susuga odo abo mapoo teneloso nei molee tooso. Osoloso yayo molee oso mi egee tooso. Osoloso bi medee tekepo mada mi ma kulodu magoo sabolo yayo tooso.”

#### *Beegee maga wudu taka*

<sup>45</sup> “Esiga Godeeye wiligi doloso badeli goo ee egeesi masi moloso. Odo heeso beegge esiamo siliso.

<sup>46</sup> Yayo esiamo siloso beegge medee tekepo ogoga, yo see dilesa o bi susuga odo abo mapoo teneloso nei molee teliso. Osoloso yo molee oso beegge tekepo teliso.”

#### *Pei maga wudu taka*

<sup>47</sup> “Esiga Godeeye wiligi doloso badeli goo ee egeesi masi moloso. Pei howomoo oluguloso di bei mologa egee misiga egeesi masi moloso.

<sup>48</sup> Egeesi ma kulodu pei mapoo di bei mologa, di kebili odo oso dia pei booboose mapoo gimagoloso dobolone di piliso. Osoloso di tekepo ono o ma kulodu

soliso, esino di edebeeyo koo nali ee peegoo togobiseliso.

<sup>49</sup> Esiga biame hoo poogoo mapoo goo hageesi masi oso peledabalaiso. Esiga Godeeye momaiye aboso mipoo hamapoo sibilesa Godeeye howo woola tekepo debeli odo sabolo osoloso goo tokenee teli odo ee domo pileiso.

<sup>50</sup> Osoloso goo tokenee teli odo ee Dou mi mapoo toodalaiso. Eseega diayo ee ma kulodu pisa sabolo dobolone mei gisile sabolo dabalaiso.”

<sup>51</sup> Yesuye o hamamee dili odo mapoo egeese takaso, “Niba ayo hagee takoo goo susuga eyo bei medee gooleedosomo?” diso. Esem diayo nei egeese takaso, “O. Iba gooleedoso,” dee takaso.

<sup>52</sup> Esem Yesuye dimapoo egeese takaso, “Tei too odo agayo Godeeye to eligilone, Godeeye wiligi doloso badeli goo ee gooleedoloso badoga, yo moso eyo ama masi badoso. Yayo moso ee ma kuloduga bi dia sabolo osoloso nape sabolo toloso ka tosibo dalaiso.”

#### *Yesu o mosobia oso gowe (Maka 6:1-6; Luka 4:16-30)*

<sup>53</sup> Yesuye odo susuga mapoo wudu takemelee koodobuloso mi hagee poogoo diso.

<sup>54</sup> Yo see wedi dilesa o midee Nasalet mapoo badolone diayo howo gisili moso mapoo peleso Godeeye to odo mapoo eligilame bei mooloogooso. Esem odo susuga oso yayo eligi duloso diya howoogadolone egeese takaso, “Odo hagoso goo egee eligimo silo kapoo tobele? Osoloso yayo goo toowa opusomo di egee moodoomo silo, kitulugu kapoo tobele?”

<sup>55</sup> Yo wulo Meliyo owolo. Osoloso yo wulo moso tegeli odo hamapoo badeli eyo owolo. Osoloso yo Yemes, Yosep, Saimon, osoloso Yudas egee bia dia emei.

<sup>56</sup> Osoloso obooba dio onosee ibolo hodobo hamapoo doso. Esiga goo susuga egee Yesuye kasee moodoomo silosomo?” dee takaso.

<sup>57</sup> Esiga diayo egeese goolone Yesuye eligi goo ee talai goweso.

Eseme Yesuye dimapoo egeesee takaso, “Edebeeyo Godee maga to toloso kokodo takomo sili odoos eyo to duloso mesiliso. Esino o mosobia sabolo osoloso o soosoo oso o to mapoo duloso koo mesili,” diso.

<sup>58</sup> Esiga Yesuye diayo tei telega poogoloso debei goo ee ogoloso o mi omapoo goo toowa opusomo di abo moodele poogooso.

## 14

### *Odoo howo oluguli Yonee woolooma (Maka 6:14-29; Luka 9:7-9)*

<sup>1-2</sup> Biame omapoo Gelili mi gibadeli odoos Helodeeye Yesuye goo moodoomo silee duloso o tou teli odoos mapoo egeesee takaso, “Odoo hagee Yonee odoos howo oluguli oso molodoo. Yo ta maga olo hogabiadoo. Esiga yayo see goo toowa opusomo di hageesee ka moodoomo silo,” dee takaso.

(Yayo hageesee takaso. Bei, Yonee telega badoboome, goo hagoso peledabaso.)

<sup>3-4</sup> Biame heeso Helodeeye omolo Pilipiyo osobo Helodiyees peedee huso. Eseme Yoneeye goo hagee ogoloso Helodee mapoo diya takolone egeesee takaso, “Nayo nomolowo osobo peedee hulei tekeponee. Bei, egee tei,” diso.

Eseme Helodee diya komonolone, o ha teli odoos mapoo takolone, Yonee dee tialogoloso neliga moso ma kulodu huse diso.

<sup>5</sup> Eseme yo Yonee wooloomalame goomogaso. Esino odoobolo obulone wooloomele poogooso. Bei, odoos susuga oso takolone Yonee Godee maga to toloso kokodo takomo sili odoos deliso.

<sup>6</sup> Osoloso hamamee Helodee yo soomago biame tugodeme, yayo o odoos gilimadoloso sibilesos wo nolone debeiso. Eseme Helodiyeseeyo sobo holo oso sibilesos dia mudugiyopoo hopoome, Helodee diya goomogaso.

<sup>7</sup> Eseme nei Helodeeye goo tei moodoolame takolone yimapoo egeesee takaso, “Nayo goomoga bi ee amapoo takooga, ayo bi egee namapoo tenelaiso,” diso.

<sup>8</sup> Yo to egeesee taka duloso hopoomelee koodobulosos owee mapoo dilesos yayo

goomoga goo ee duso. Osoloso see wedi sibilesos Helodee mapoo egeesee takaso, “A Yonee odoos howo oluguli eyo wiligi ono goomogo. Esiga nayo epedee o wiligi koodolosos tolo mapoo magolosos amapoo tenee,” dee takaso.

<sup>9</sup> Esino Helodee goo hagee duloso Yoneeyo wiligi koodolosos tenelai yo goomegele. Esino yayo sobo holo mapoo goo tei moodoolame taka ee dibolo hodobo nei nolone debei odoos oso olo duso. Esiga goo hagee pagalai yo goomegele.

<sup>10-11</sup> Eseme yayo o odoos mapoo to kitulugu teneesos, diayo dilesos Yoneeyo wiligi koodolosos tosibilame. Osoloso o odoos oso neliga moso ma kulodu gadilesos, Yoneeyo wiligi koodolosos tolo mapoo magolosos tosibilesos, sobo holo mapoo teneesos. Eseme see yayo tosibilesos owee mapoo teneesos.

<sup>12</sup> Eseme Yonee o hamamee dili odoos oso sibilesos Yoneeyo kou todilesos bousos. Osoloso dilesos Yesu mapoo takaso.

### *Yesuye odoos 5,000 mapoo nei pi*

*(Maka 6:30-44; Luka 9:10-17; Yon 6:1-14)*

<sup>13</sup> Helodeeye Yonee woolooma goo ee Yesu duloso, o hamamee dili odoos sabolo du mapoo dalaga poogoloso, mi odoos mauwe mapoo hasalame diyadeesos. Esino mi opusomo opusomo di mapoo debeli odoos oso goo hagee duloso Yesuye badebei mapoo mubili sibadeesos.

<sup>14</sup> Yesu du maga mubiyodoo daboogolosos tobudulone, odoos susuga oso mooloogoodoo ogoloso yayo diba diya sooloo dolone odoos paigiga tekepo paso.

<sup>15</sup> Yesuye egeeseemo sileeme, o hamamee dili odoos oso habe sibilesos yimapoo egeesee takaso, “Osoko olo todobuo. Esiga nayo odoos susuga egee do diyadee dee, diayo mosobia koola kee do mapoo dilesos nei diesos nalai ee moleesos talame. Bei, mi iyo hagee do mapoo odoos mauwe. Esiga mi hamapoo nei mauwe,” dee takaso.

<sup>16</sup> Eseme Yesuye dimapoo egeesee takaso, “Niyo diba nei talame diye dee

na takee. Esino niyo nei dimapoo tenee,” diso.

<sup>17</sup> Esemе nei diayo yimapoo egeesee takaso, “Imapoo wo si hedebe dee tiadoo sabolo osoloso di bakadio moloso,” diso.

<sup>18</sup> Esemе Yesuye nei dimapoo egeesee takaso, “Wo si sabolo osoloso di sabolo amapoo tosibe,” diso.

<sup>19</sup> Esemе yayo odoо susuga pukusi mapoo bulume dee takoloso, wo si dee tiadoo sabolo di bakadio toloso Kei mi ma dokodoo bolone Godee mapoo goomoga to takoloso wo popeiso. Osoloso o hamamee dili odoо mapoo nei egee teneme, see diayo odoо mooloogoodoo mapoo piso.

<sup>20</sup> Esemе odoо susuga oso nei teiba nega diya edigime nei hosudelega abo poogooso. Osoloso diayo nei naloso abo poogoo ee, Yesu o hamamee dili odoо oso misigamo dilesos bou ma kulodu soo bou 12 egeesi metamagisaso.

<sup>21</sup> Osoloso giso sabolo sobo sabolo osoloso holaiso sabolo oso nei hagee neso. Esino hedebe gisowe hesiga ee 5,000.

*Yesuye howo ma dokodooga di  
(Maka 6:45-52; Yon 6:15-21)*

<sup>22</sup> Yesuye 5,000 odoо mapoo nei pi koodobuloso, o hamamee dili odoо mapoo egeesee takaso, “Daga niyo du toloso abei hodiokoo dalo soowee. Ayo odoо hagee bia diye doloso a hamamee ka sibileigo,” diso.

<sup>23</sup> Osoloso yayo odoо mooloogoodoo olo diye doloso, see obusomo badalame mubi dokodoo howo gisilame palaso. Yo mubi dokodoo peleso badoboome neligaso.

<sup>24</sup> Esino biame omapoo o hamamee dili odoо oso du mapoo toboloso abei domopooga diyadaga meleeso. Esemе poo sabolo howo ki sabolo simi oso dia du diya bidigaso.

<sup>25</sup> Osoloso gesi domo kudi takeme, Yesuye abei ma dokodooga dimapoo diso.

<sup>26</sup> Esemе diayo Yesuye simi ogoloso dio dulone diya ebigaso. Bei, diayo goolee bosos siba bele dolone diya googaso.

<sup>27</sup> Esemе Yesuye saga dimapoo egeesee takaso, “Niba howaleegeе. Haga na ebi. Ayo siba,” dee takaso.

<sup>28</sup> Esemе Pitaye egeesee takaso, “Lodee, tei nayo siboga, nayo anosee howomoo meledoboloso howo ma dokodooga namapoo sibeye dee,” diso.

<sup>29</sup> Esemе Yesuye nei egeesee takaso, “Sibe.” Esemе Pita howomoo meledoboloso howo ma dokodooga Yesu mapoo diso.

<sup>30</sup> Esino yo dulone egeino, poo toowa simi oso howo ki toowa sibume, yo diya ebiaso. Egeeseelone yo howo kulomoo oumo moume to neligidi egeesee takaso, “Lodee, a pidi,” dee takaso.

<sup>31</sup> Esemе Yesuye o deeso Pita saga toloso yimapoo egeesee takaso, “Nayo tei too ee diya pepookodoo. Bei kasalame nayo tei too goo ee ka poogoowo?” diso.

<sup>32</sup> Osoloso o bakadio du ma kulodu daboogoome, poo simi omapoo koodobiaso.

<sup>33</sup> Esemе o hamamee dili odoо oso Yesuwo homo bei mapoo gasuwoloso dobolone egeesee takaso, “No tei Godeeyo Owlodoo,” diso.

*Odoо paigiga Genesalet mi mapoo debeli oso Yesu mapoo simi  
(Maka 6:53-56)*

<sup>34</sup> Yesu o hamamee dili odoо sabolo abei daboogoloso Genesalet mi mapoo dia du oluguso.

<sup>35</sup> Mi omapoo debeli odoо oso Yesu hoodo ogoloso mi opusomo opusomo di mapoo Yesu olo sibago doloso to takomo diso. Esemе odoо aboso odoо paigiga susuga Yesu mapoo ido sibadeeso.

<sup>36</sup> Osoloso odoо paigiga oso Yesu mapoo howolone egeesee takaso, “Iyo wulo nee dugo su mapoo sigilei soowayo?” diso. Esemе odoо paigiga oso Yesuwo dugo su mapoo sigime, odoо egee bia wegigadooso.

## 15

*Tei Godeeye eligi sabolo osoloso ede-beeyo eligi goo sabolo  
(Maka 7:1-13)*

<sup>1</sup> Biame hedebeeso Pelisi odoos abo sabolo osoloso tei eligili odoos abo oso Yelusalem maga sibilesos Yesuye badebei mapoo mooloogoodolosos yimapoo egeesee takaso,

<sup>2</sup> “Bei kasalame nee hamamee dili odoos oso ibada adaga dia goos ee dedelega poogolosos dia dee hapelega nei ka nasomo?” dee takaso.

<sup>3</sup> Esemes Yesuye nei dimapoo egeesee takaso, “Bei kasalame niyo tei Godeeye eligi goos ee poogolosos see nibada adaga dia goos ee ka dodomos silosomos?”

<sup>4</sup> Bei, Godeeye egeesee takaso, ‘Namamo to mapoo osolosos nooweeyos to mapoo mesilosos ka silesibes. Esino edebeeyos ama mapoo osolosos owee mapoo to tokenees takoogas, yo wooloomes,’ diso.

<sup>5</sup> Esino niyo egeesee eligilisos, odoos heesos ama dios owee dios bisos pidilames tei magoos ee dadalais gowoogas, yayos wulos takolones bis egees Godee mapoo tenelames olos to magolosos ka molosos, dee takalais tekepos delisos.

<sup>6</sup> Goos egeesios maga edebeeyos ama dios owee dios pidilames niyo hamagas takelisos. Niyo goos egeesios moodoolones, Godeeye tei magoos goos ee dedelega see nibada adaga dia goos ee dodolones ka dosos.

<sup>7</sup> Niba goos bakadios gwelios odoos. Godee maga to tolosos kokodos takomos sili odoos Aisayayes nibada goos maga tei goos takaso. Bei, yayos goos Godeeye taka egeesee hogugusos,

<sup>8</sup> ‘Odoos hagees bia osos dia magasos wulos gamenees amapoo goomogas poudilisos.

Esino dibadas sooloo ma kuloduos tei amapoo mesilios goos ee mauwes.

<sup>9</sup> Esiga diayos amapoo goomogolones mo hu dokodoo poudilios goos eyos bei mauwes.

Bei, diayos tei edebeeyos eligi goos ee ayo eligi masi sees diayos odoos mapoo eligimos silesibilisos.’”

*Ogoos goosos odoos tokenees ka peliyo?  
(Maka 7:14-23)*

<sup>10</sup> Yesuye odoos susugas gilimadolosos dimapoo egeesee takaso, “Odoos susugas niba mos to hagees dulosos medees gooleedes.

<sup>11</sup> Esiga edebeeyos nei ne osos Godeeyos howo woolas yo tokenees koo peli. Esino edebeeyos o sooloo ma kulodugas goolees to tokenees ees takoogas osos Godeeyos howo woolas yo tokenees pelisos,” dee takaso.

<sup>12</sup> Osolosos o hamamee dili odoos oso yimapoo sibilesos egeesee takaso, “Pelisi odoos nayos taka goos mapoo egees kamanagas nos ogolosos gooleedosomos?” diso.

<sup>13</sup> Esemes Yesuye nei dimapoo egeesee takaso, “Nei howos mos Ma Kei mi ma dokodoo badelios yayos segeles susugas ees o toos sabolo tigidolosos togobileisos.

<sup>14</sup> Esiga Pelisi odoos ees nei howos segees egeesios masi molosos. Niyo dibas hagas nas goolees. Diba odoos howos neligas masi dosos. Esiga odoos howos neligas heesos odoos howos neligas hees idos duga, o bakadios ou mapoo tigidibileisos.”

<sup>15</sup> Esemes Pitayes egeesee takaso, “Nayos wuduos taka goos eyos bei imapoo medees kibiya eligi,” diso.

<sup>16</sup> Esemes Yesuye nei egeesee takaso, “Niba to hageeyos bei gooleedelegas osee dosomos?”

<sup>17</sup> Esiga nei niyo tolosos nali osos nibadas sooloo ma kuloduos tokenees koo peli. Bei, nei egees nayos nalos sooloo golosos see nee gemedeios magas peegoo gadilisos.

<sup>18</sup> Esino odoos o magasos to tokenees takelios goos susugas osos o sooloo ma kulodugas woolas takoogas goos osos yo Godeeyos howo woolas tokenees pelisos.

<sup>19</sup> Bei, o sooloo ma kulodugas goos tokenees susugas hagosos woolas peledebelisos: tokenees gwelios goos, osolosos odoos hees wooloomalios goos, osolosos adabas kookas sobos sabolos kookas gisos sabolos goos helios telios goos, osolosos sobos obuos sabolos gisos kadigas sabolos goos helios telios goos, osolosos adabas bis helios telios goos, osolosos emegeios dimagas gamenees takelios goos, osolosos emegeios dios goos magas to tokenees takelios goos.

<sup>20</sup> Esiga goos tokenees susugas hagosos Godeeyos howo woolas odoos tokenees pelisos. Esino dee hapelega nei nali osos yo tokenees palaimes.”

*Yu sobonees osos tei toos  
(Maka 7:24-30)*



<sup>21</sup> Yesu o hamamee dili odoosabolo mi egeepoogoloso see Taya mi toowa sabolo osoloso Saidon mi toowa koola mapoo mi pepuso mapoo diyadeeso.

<sup>22</sup> Diba omapoo dileso peledoboome, sobo heeso Yesuye badebei mapoo simiso. Sobo egee Keinen sobo. Esiga yayo Yesu ogoloso to neligidi egeeseetakaso, “Lodee, Deibidiyo amawe, nayo a sooloo dele. Bei, mo sobo holo yima kulodu bo holo peleso badolone yimapoo dala toowa tenee domoloso,” diso.

<sup>23</sup> Esino Yesuye to hagee duloso to nei takele. Esemee o hamamee dili odoososo Yesu mapoo sibilesogeeseetakaso, “Sobohagoso iba deedeesilone to neligidi takomo silo. Esiga nayo yo diye dee takee,” diso.

<sup>24</sup> Esemee Yesuye nei dimapoo egeeseetakaso, “Godeeye a hedebe Isalael odoosipi be hu masi osugobuloso egeedo mapoo diye diso,” dee takaso.

<sup>25</sup> Esemee sobo hagoso see sibilesoso Yesu o homo bei mapoo gasuwoloso badolone egeeseetakaso, “Lodee, a pidi,” diso.

<sup>26</sup> Esemee Yesuye nei sobo yimapoo wudu takolone egeeseetakaso, “Holaisodia nei tolosossee so mapoo tenelai tekeponee,” diso.

<sup>27</sup> Esino sobo hagoso Yesu mapoo egeeseetakaso, “O. Lodee nayo tei takoo. Esino so ee amaye nei nolone kokou miyomoo mou ee nalagamo silesibiliso,” diso.

<sup>28</sup> Esemee Yesuye nei yimapoo egeeseetakaso, “Sobo, nayo tei too diya toowadoo. Esiga nayo goomoga goo taka ee ayo moodoolaiso,” diso. Esemee biame omapoo sobo egeeyo owolo sobo holo olo tekepo paso.

### *Yesuye odoopaigiga susuga tekepo pa*

<sup>29</sup> Yesu mi egeepoogoloso see Gelili abei palaga dimeleeso. Yo see abaga peleso mubi dokodoo biaso.

<sup>30</sup> Osoloso odoomooloogoodoo oso odoopaigiga gilimado sibilesoso Yesuwo homo beiyopoo ibedigaso. Odoosobobagi daga poogoo, osoloso odoohowoneliga, osoloso odoosukakawa poogoo, osoloso odoosobobokeli, osoloso odoopaigiga opusomo opusomo di abosabolo Yesu mapoo gilimado sibadeeso. Esemee Yesuye odoopaigiga susuga egeebiatekepo paso.

<sup>31</sup> Esemee odoosusuga oso goohagee ogoloso diya howoogadolone Isalael odoodia Godee mapoo goomoga toowa poudooso. Bei, to koo keli odoosetokeiso, osoloso odoosu kakawa poogoo see toboloso silesibiso, osoloso bagidaga poogoo odoosetekepo poloso silesibiso, osoloso odoohowoneliga see egeiso.

### *Yesuye odoo 4,000 mapoo nei pi (Maka 8:1-10)*

<sup>32</sup> Osoloso Yesuye o hamamee dili odoogilimadoloso egeeseetakaso, “Odoomooloogoodoo hageebia biame bakadio hedebe di ee ma kulodu abolo hodobebeiso. Esino see diayo nei mauwe debei ogoloso diba diya sooloo dalaso. Ayo diba nei tenelega diye daga, diba eli domopoo dumologa houdulone diya wosalai malaiso,” dee takaso.

<sup>33</sup> Esemee o hamamee dili odoosoyimapoo egeeseetakaso, “Nei mauwe mi hamapoo iyo nei kapoo tolososudo mapoo teiba ka tenelaiyo?” diso.

<sup>34</sup> Esemee Yesuye nei egeeseetakaso, “Nimapoo wo si kasolo molosomo?” dee takaso.

Esemee diayo nei egeeseetakaso, “Imapoo wo si 7 sabolo osoloso di pepooko abomoloso,” diso.

<sup>35-36</sup> Esemee Yesuye odoosusuga mi mapoo bulume dee takoloso wo si 7 sabolo osoloso di pepooko abotoloso Godee mapoo goomoga to takaso. Osoloso wo si popei, di hwei agisaloso o hamamee dili odoomapoo teneme, see diayo odoomooloogoodoo mapoo piso.

<sup>37</sup> Odoosusuga nei ne oso diya edigaso. Esemee nei naloso abopoogoo ee o hamamee dili odoosomisigaloso bou tegei ma kulodu soo bou 7 egeesi metamagisaso.

<sup>38</sup> Osoloso giso sabolo sobo sabolo osoloso holaisosabolo oso nei hagee neso. Esino hedebe gisowe hesiga ee 4,000.

<sup>39</sup> Yesuye odoo susuga diye dee takoloso o hamamee dili odoo sabolo meilesa du ma kulodu tebisaloso, Magadan mi koola mapoo dalo soowaso.

## 16

*Edebeeyo goo toowa opusomo di moodoo ee agalame goomoga*

*(Maka 8:11-13; Luka 12:54-56)*

<sup>1</sup> Osoloso Pelisi odoo sabolo osoloso Sedisi odoo oso Yesu mapoo sibilesa yimapoo kukulo agalame egeesee takaso, “Nayo kitulugu too egee tei Godee maga simidoo doloso gooleedalaiya, nayo goo toowa opusomo di hee moodee,” dee takaso.

<sup>2-3</sup> Esino Yesuye dimapoo egeesee takaso, “Habe osoko tekepo mougga ogoloso niyo egeesee takeliso, ‘Godigi osoko tekepo polodoo,’ dee takeliso. Osoloso gesikolo mi hemiye ogoloso, ‘Epei howo sibulodoo,’ deliso. Esiga goo egeesi oso peledabalai niba olo gooleedooso. Esino goo susuga ayo epedee hagee eligi sabolo osoloso goo susuga ayo epedee hagee moodoomolo eyo bei, niba gooleedele.

<sup>4</sup> Odoo epedee hamapoo egee do niba diya tokenee. Osoloso niyo amapoo tei talai goweliso. Osoloso niyo wulo goo toowa opusomo di moodoo ee agalame amapoo takeliso. Esino ayo nimapoo goo toowa opusomo di hee eligilei mauwe. Esino hedebe Godee maga to toloso kokodo takomo sili odoo Yona eyo goo ono nimapoo eligileiso.” Yesuye goo hagee takemelee koodobuloso diba poogoo diso.

*Pelisi odoo sabolo osoloso Sedisi odoo oso eligi goo ee na deede*

*(Maka 8:14-21)*

<sup>5</sup> Osoloso Yesu o hamamee dili odoo sabolo abei dalo soowaso. Diba omapoo dileso dobolone egeino o hamamee dili odoo oso wo telega boobada neme goo diya koudiaso.

<sup>6</sup> Diba goo koudulone doboome Yesuye dimapoo egeesee takaso, “Obeeyamo! Pelisi odoo sabolo osoloso Sedisi odoo dia

wo ee habiaga, niba medee koolone ka debee.”

<sup>7</sup> Esino Yesu o hamamee dili odoo oso goo hagee duloso, diesono to moulone egeesee takaso, “Iyo wo telega boobada poogoo simiga Yesuye iba ogoloso egeesee ka takoo,” diso.

<sup>8</sup> Esemme diayo goo koudulone debei ee Yesuye ogoloso dimapoo egeesee takaso, “Bei kasi maga niyo wo telega boobada poogoo simi maga goo diya koudulone ka dabala? Niyo tei too goo ee diya pe-pookodoo.

<sup>9</sup> Esiga niba ayo kitulugu goo ee gooleedelega osee doso. Esiga niba ayo odoo 5,000 mapoo wo si dee tiadoo populoso pi goo ee boobado buguloso ka doso. Osoloso diayo wo naloso abo poogoo, niyo misigaloso bou ma kulodu soo bou bei metamagisa goo sabolo boobado buguso.

<sup>10</sup> Esiga niba ayo odoo 4,000 mapoo wo si 7 populoso pi goo ee boobado buguloso doso. Osoloso diayo wo naloso abo poogoo, niyo misigaloso bou ma kulodu soo bou bei metamagisa goo sabolo olo boobado buguso.

<sup>11</sup> Esiga ayo nimapoo wodee eyo goo maga takele. Esino bei kasi maga niyo goo hagee gooleedelega ka dosomo? Esiga ayo taka goo ee niyo Pelisi odoo sabolo osoloso Sedisi odoo oso eligi goo mapoo hamamee dedeyaga niso nediliyo medee balame to hagee nimapoo ka taka.”

<sup>12</sup> Esemme Yesuye wodee eyo goo maga takelega, wulo Pelisi odoo sabolo osoloso Sedisi odoo oso eligi goo\* maga ka takeme, Yesu o hamamee dili odoo oso omapoo ogoloso olo gooleedooso.

*Pitaye Yesuwo goo yilige bugu*

*(Maka 8:27-30; Luka 9:18-21)*

<sup>13</sup> Yesu dileso Kasaliya-Pilipai mi mapoo silone o hamamee dili odoo mapoo egeesee takaso, “Edebeeyo Odoo Holo a odoo ogu deliyo?” diso.

**16:1:** Mat 12:38; Luka 11:16    **16:4:** Mat 12:39; Luka 11:29    **16:6:** Luka 12:1    **16:9:** Mat 14:17-21    **16:10:** Mat 15:34-38    \* **16:12:** Pelisi odoo sabolo osoloso Sedisi odoo diayo eligi goo ee wo habia masi moloso. Bei, wo giedege sabolo wo habia sabolo hamaga, wo giedege tekepo ee tokenee palaiso.    **16:14:** Mat 14:1-2; Maka 6:14-15; Luka 9:7-8

<sup>14</sup> Esemе diayo yimapoo egeesee takaso, “Odoо aboso no Yonee odoо howo oluguli odoо osodoo, dee takeliso. Osoloso odoо aboso no Ilaya, dee takeliso. Osoloso odoо aboso no Yelemaya deliso. Osoloso odoо aboso no Godee maga to tolosо kokodo takomo sili odoо hee daga badebei oso molodoo, dee takeliso.”

<sup>15</sup> Esemе Yesuye nei dimapoo egeesee takaso, “Esino hee niyo a odoо ogu deliyo?” diso.

<sup>16</sup> Esemе Saimon-Pitaye nei egeesee takaso, “No Keliso, Godeeye hudi magoo, kookaiyo badoboso gie badeli Godeeyo owolo osodoo,” dee takaso.

<sup>17</sup> Esemе Yesuye nei yimapoo egeesee takaso, “Saimon-Pita, Yonayo owolo, no goomege. Bei, odoо heeso goo hagee namapoo ka eligile. Esino mo Ma Kei mi ma dokodoo egee bado oso namapoo ka eligi.

<sup>18</sup> Esiga Pita, ayo namapoo taka, no yo masi badoso. Esiga ayo yo hagee ma dokodooga mo sosee\* bei mooloogoolaiso. Egeesi ma kulodu teliso kitulugu oso sosee hagee dagadileime.

<sup>19</sup> Osoloso ayo Godeeye wiligi doloso badeli osulu ee gibadalame kitulugu namapoo tenelaiso. Esiga nayo takolone, edebeeyo mipoo hamapoo goo moodolai ee tei daga, goo egee Kei mi mapoo olo tei doloso moloso. Osoloso nayo takolone, edebeeyo mipoo hamapoo goo moodolai ee tei me daga, goo egee Kei mi mapoo olo tei me moloso.”

<sup>20</sup> Osoloso yayo tobudulone to kitulugu sabolo o hamamee dili odoо mapoo egeesee takaso, “Niyo odoо abo mapoo takolone a Kelisoso, dee na takee,” diso.

*Yesu eyo talai goo ee taka  
(Maka 8:31-33; Luka 9:22)*

<sup>21</sup> Osoloso biame domo omaga Yesuye o hamamee dili odoо mapoo eyo talai eyo goo ee takomo silame bei mooloogooso. Egeeseelone yayo dimapoo egeesee takaso, “A Yelusalem mapoo pologa, Yu

odoowo wiligi odoо sabolo, osoloso tei moso eyo wiligi odoо sabolo, osoloso tei eligili odoо oso amapoo dala tenelaiso. Osoloso edebeeyo a wooloomaloso, bi mapoo ta moloso biame bakadio hedebe di mapoo see bi maga hogadileiso,” dee takaso.

<sup>22</sup> Esemе Pitaye Yesu peegoo ido dileso tobudulone yimapoo diya kitulugu sabolo takolone egeesee takaso, “Haye Lodee, goo hagoso namapoo peledobeyaga, Godeeye no gooleegeeye dee,” dee takaso.

<sup>23</sup> Esino Yesuye Pita mapoo bidi toboloso tobudulone egeesee takaso, “Saiten, no amaga peegoo di. To nayo egee takoo oso ayo Godeeye goomoga goo talai ee eli poo. Bei, nayo to egee takoo Godeeye taka ee koo takoo. Esino edebeeyo taka goo ee takoo,” diso.

*Yesu goolone badalai  
(Maka 8:34-38; Luka 9:23-26)*

<sup>24</sup> Yesuye o hamamee dili odoо mapoo see tobu egeesee takaso, “Edebeeyo ayo di hamamee sibilei goomogoga, yo daga eyo goomoga goo tomo sili ee poogoloso, eyo talai sabolo dala toowa talai goo sabolo medee mopoodoo doloso ama hamamee ka sibe.

<sup>25</sup> Esiga edebeeyo o gie badeli eyo goodogoga, o gie badeli ee osugobalaiso. Esino edebeeyo mo goo maga o gie badeli eyo goodegelega poogooga, yo badoboso kookaiyo gie badeli talaiso.

<sup>26</sup> Esino edebeeyo mipoo hamapoo badolone, eyo goomoga goo susuga ee tomo siloso, hedebe gie badeli goo ee telega dagaduga, yo see ogoо goo talaisomo? Mauwe. Bei, yayo gie badeli eyo nei talai mipoo hamapoo bi hee mauwe.

<sup>27</sup> Esiga Odoо Holo ayo mo Maye toowa doloso badeli goo omaga o gadeebugu sabolo, osoloso o momaiye sabolo sibilesо, odoо susuga oso goo tomo silee eyo nei ayo dimapoo teiba tenelaiso.

<sup>28</sup> Egeesi ma kulodu ayo nimapoo taka. Nima kulodu odoо abo wedilega egee do

**16:16:** Yon 6:69    **16:17:** Gal 1:15-16    **16:18:** Yon 1:42; Epe 2:20    \* **16:18:** sosee hu eyo bei ee tei telaga odoо susuga mipoo hamapoo egee do ee takooso.    **16:19:** Mat 18:18; Yon 20:23    **16:24:** Mat 10:38; Luka 14:27  
**16:25:** Mat 10:39; Luka 17:33; Yon 12:25    **16:26:** Mat 4:8-9    **16:27:** Mat 25:31; Psa 62:12; Prov 24:12; Loum 2:6; Yili 22:12

ee osee doga, Odo Holo ayo wiligi doloso badalame sibileiso.”

## 17

*Yesuye Moses dio osoloso Ilaya dio to kei (Maka 9:2-10; Luka 9:28-36)*

<sup>1</sup> Osoloso biame 6 poogoloso Yesuye Pita, Yemes, osoloso Yemeseeyo omolo Yonee esee gilimadoloso mubi hoodee mapoo dabalame paladeeso.

<sup>2</sup> Diba omapoo peleso dobolone egeino, Yesu o su opusomo doloso osokoso poni masi o mudu maga poni molome egeiso. Osoloso o dugo oso heliye diya gadeebugu masi molome egeiso.

<sup>3</sup> Diba omapoo dobolone egeino, Moses dio Ilaya dio peledoboloso Yesubolo to kesamolome egeiso.

<sup>4</sup> Esem Pitaye Yesu mapoo egeese takaso, “Lodee, iba hamapoo dabalai tekepo. Esiga nayo goomogoga, iyo waseme bakadio hedebe di tegelaiso. Hee nee, osoloso hee Moseseeyo, osoloso hee Ilayayo dalaiso,” dee takaso.

<sup>5</sup> Pita yo to osee komolome, kolobo diya heliye oso sibileso diba gidisooso. Esem kolobo ma kuloduga toso egeese takaso, “Hagee ayo gooma mo holo oso. A namapoo diya goomogo. Esiga o to mapoo medee dui,” diso.

<sup>6</sup> Esem Pita diayo goo hagee duloso diya obulone miyomoo balaboo tiesaso.

<sup>7</sup> Esino Yesuye sibileso dimapoo sigolone egeese takaso, “Niba tebise. Haga na ebi,” diso.

<sup>8</sup> Esem diba tebisaloso egeino Yesu obusomo tobudume egeiso.

*Yesu o hamamee dili odoo oso Ilayayo goo maga woosa (Maka 9:11-13)*

<sup>9</sup> Osoloso diba mubi dokodooga see kumoo moulone, Yesuye dimapoo egeese takaso, “Goo niyo egei ee odoo abo mapoo na takee. Esino Odo Holo a ta maga see hogado pala ogoloso, niyo hamamee ka takomo silesibe,” dee takaso.

<sup>10</sup> Esem Pita diayo Yesu mapoo egeese woosaso, “Bei kasalame tei eligili odoo oso eligilone ‘Daga malalo Ilayaye sibileso Keliso hamamee sibileigo’ dee ka takeliyo?” diso.

<sup>11</sup> Esem Yesuye dimapoo egeese takaso, “Ilaya tei sibileso goo susuga see medee mopoodoo dalaiso.

<sup>12</sup> Esino ayo nimapoo taka, Ilaya yo olo simiso. Esino edebeeyo yo medee kibiya hoodo egelega yimapoo dala tenemeleeso. Egeeseelone diayo Odo Holo amapoo dala egeesi masi tenemalaiso.”

<sup>13</sup> Osoloso diayo Yesuye egeese taka duloso nei diayo goolee, Yonee odoo howo oluguli eyo goo ee takoo doloso olo gooleedooso.

*Yesuye holope bo holo pala ee tekepo pa (Maka 9:14-29; Luka 9:37-43)*

<sup>14</sup> Yesu o hamamee dili odoo bakadio hedebe di sabolo mubi dokodooga meilesa, odoo susuga diba balagamelee omapoo peledoboome, odoo heeso sibileso Yesuwo homo beiyopoo gasuwoloso badolone egeese takaso,

<sup>15</sup> “Lodee, nayo mo giso holo sooloo dologa yo pidi. Bei, yo todo dolone halaboomo silone, eyo nediliyo howomoo homodobuo osoloso dou mapoo homodobuo dolone dala toowa teliso.

<sup>16</sup> Esem ayo holope egee nee hamamee dili odoo mapoo ido simino, diayo yo tekepo moodolai tebilena,” diso.

<sup>17</sup> Esem Yesuye nei egeese takaso, “Niba tokenee odoo, tei too mauwe. Niyo amapoo tei talame a biame kasolo nibolo hodobo ka badalaiyo? Ayo biame sage nibolo hodobo badebeino, niyo amapoo tei telega osee doga, a nimapoo diya gowooso. Esino holope egee amapoo ido sibe,” diso.

<sup>18</sup> Esem bo holo holopeyo kulodu pala mapoo Yesuye to kitulugu sabolo takeme peegoo diso. Esem epedee omapoo holope egee see tekepo paso.

<sup>19</sup> Goo hagoso dileso koodobume, Yesu o hamamee dili odoo oso dibusomo dobolone Yesu mapoo egeese takaso, “Iyo kaseme bo holo holopeyo kulodu pala



ee peegoo habigilei kitulugu mauwe ka poogoowo?” diso.

<sup>20</sup> Esemé Yesúye nei dimapoo egeesee takaso, “Niyo tei too ee diya pepooko. Goo egeesi maga niyo bo holo peegoo habigilei kitulugu mauwe ka poogoo. Esiga ayo nimapoo taka. Niyo tei too goo ee homokoko pepooko masi mologa, niyo mubi mapoo takolone ‘no see koo dileso mele’ dee takooga, tei egeesee selaiso. Esiga egeesi ma kulodu goo susuga niyo moodoolai tebileiso. [

<sup>21</sup> Esino bo holo hageesi masi peegoo habigili ee hedebe nei tei doloso dobolone Godee mapoo taka maga bo holo peegoo ka habigiya.”]

*Yesu eyo talai goo ee see tobu taka  
(Maka 9:30-32; Luka 9:43-45)*

<sup>22</sup> Yesu o hamamee dili odoosoo sibilesó Gelili mi mapoo mooloogoodoloso do-boome, Yesúye dimapoo egeesee takaso, “Odoosoo Holo a odoosoo mapoo tiasalaiso.

<sup>23</sup> Osolosoo diayo a wooloomalaiso. Esino a bi mapoo ta moloso biame bakadio hedebe di mapoo gie badeli tolosó hogadileiso.” Esemé Yesu o hamamee dili odoosoo to hagee duloso diya goohesoo.

*Tei moso ee pidilame tekisi molee teneli*

<sup>24</sup> Osolosoo see tobu Yesu o hamamee dili odoosoo sabolo dileso Kapeniyum mi mapoo peledoboome, tei moso ee pidilame tekisi molee teli odoosoo abosoo sibilesó Pita mapoo egeesee takaso, “Nibada eligili odoosoo yo tei moso ee pidilame tekisi molee teneliso?” diso.

<sup>25</sup> Esemé Pitaye nei egeesee takaso, “O. Teneliso,” diso. Esino Pita epedee omapoo moso kulodu Yesúye badebei mapoo gasibume, Yesúye Pita mapoo egeesee takaso, “Saimon, nayo goo hagee amapoo takee. Mipoo hageeyo wiligi odoosoo tebisa oso odoosoo ogu bia dimaga tekisi molee ka teliyo? Odoosoo diayo bali maga teliyo o, odoosoo abo maga ka teliyo?” dee takaso.

<sup>26</sup> Esemé Pitaye nei egeesee takaso, “Odoosoo abo maga ka teli,” diso.\*

Esemé Yesúye nei egeesee takaso, “Esiga wiligi odoosoo diayo bali odoosoo diba tekisi molee dia wiligi odoosoo mapoo koo teneli.\*

<sup>27</sup> Esino tei moso ee pidilame tekisi molee teli odoosoo hagee bia ee kemeneyaga, iyo tekisi molee tenelega pagalai tekeponee. Esiga no dileso abei mapoo kimaso di gi. Osolosoo di malalo gi eyo maga gwalosoo ogoga molee ko molo agalaiso. Eseega nayo molee egee tolosoo dimapoo ibada tekisi molee magee,” dee takaso.

## 18

*Godeeye wiligi doloso badeli goo mapoo odoosoo agayo toowa doloso ka badosomo?  
(Maka 9:33-37; Luka 9:46-48)*

<sup>1</sup> Biame domo omapoo Yesu o hamamee dili odoosoo sibilesó Yesu mapoo egeesee takaso, “Godeeye wiligi doloso badeli goo mapoo odoosoo agayo toowa doloso ka badosomo?” diso.

<sup>2</sup> Esemé Yesúye holope hee idolosoo dima domo tobudume, o hamamee dili odoosoo mapoo egeesee takaso,

<sup>3</sup> “Ayo nimapoo taka. Nibada goo goolee su wudolosoo holope hageesi masi badeliga poogooga, niba Godeeye wiligi doloso badeli goo mapoo gadileime.

<sup>4</sup> Esiga odoosoo agayo holope pepooko hageesi masi o su eyo nediliyo pepooko daga, yo Godeeye wiligi doloso badeli goo mapoo toowa doloso ka badosoo.

<sup>5</sup> Osolosoo odoosoo agayo holope hageesi masi mo hu maga o mosopoo ido pologa, yo a ido pala masi ido poloso.

<sup>6</sup> Esino odoosoo heeso tei too odoosoo hee goo tokenee mapoo gido duga, nei odoosoo heeso o mu mapoo yo toowa bagagoloso howo bou mapoo toosoolai ee dala haga toowanee. Bei, hamamee Godeeye odoosoo egeesi moodeli mapoo dala toowa tenelaiso.

**17:22:** Mat 16:21    **17:24:** Exo 30:13; 38:26    \* **17:26:** Yesúye badebei biame omapoo, wiligi odoosoo toowa taba oso o ha teli odoosoo sabolo ha temelesoo, odoosoo diayo dagadi egee bia dimaga yayo tekisi molee teliso. Esino o mosobia maga koo teli.    \* **17:26:** Yesúye to hageesee taka goo eyo bei ee, Godeeyo owolo dio oso tei moso ee pidilame tekisi molee tenelega pagalai ee tei mauwe doloso ka taka.    **18:1:** Luka 22:24    **18:3:** Mat 19:14; Maka 10:15; Luka 18:17    **18:5:** Mat 10:40; Luka 10:16; Yon 13:20

<sup>7</sup> Ye-ee, mipoo hamapoo debeli odo, niba emegei! Bei, mipoo hamapoo niba goo tokenee mapoo gido dili goo diya bei moloso. Esiga goo egeeseeso sibileiso. Esino goo tokenee mapoo gido dili odo, niba obeeyamo! Godeeye odo egeese seli mapoo dala diya toowa tenelaiso.

<sup>8</sup> Osoloso nee dee hodio oso no goo tokenee talame gido duga, dee hodio egee kobigi, dee hediliwe badoboso kookaiyo gie badeli talai tekepo. Esino nee dee bakadio dou koo semili mapoo dilei tekeponee. Osoloso nee homo hodio oso no goo tokenee talame gido duga, homo hodio egee kobigi, homo hediliwe badoboso kookaiyo gie badeli talai tekepo. Esino nee homo bakadio dou koo semili mapoo dilei tekeponee.

<sup>9</sup> Osoloso nee howo hodio oso no goo tokenee talame gido duga, nee howo hodio egee tabigi, howo hediliwe badoboso kookaiyo gie badeli talai tekepo. Esino nee howo bakadio dou koo semili mapoo dilei tekeponee.

<sup>10</sup> Esiga niba obeeyamo. Holaiso hagee bia goo mauwe dee na goolee. Bei, Godeeyo momaiye oso Kei mi ma dokodoo Ma Godeeyo howo woola dimapoo ka bamoloso. [

<sup>11</sup> Bei, Odo Holo ayo simi hagee odo Godee maga peegoo osugoba dimapoo gie badeli tenelame ka simi.”]

*Sipi be hu osugoba*  
(Luka 15:3-7)

<sup>12</sup> “Odo heeso sipi be hu 100 gibadalaiso. Egeesi ma kulodu sipi be hedebe osugoboooga, yayo see ogo goo moodoolaisomo? Sipi be hu abo 99 ee omapoo doga, yo see hedebe osugoba ee esiamo dileiso.

<sup>13</sup> Esiga ayo nimapoo taka. Sipi be hu 99 osugobe mapoo yo goomoga moloso. Esino sipi be hedebe osugoba ee esiamleso ogoga, yo diya goomogalaiso.

<sup>14</sup> Esiga holaiso hageese heeso yimaga peegoo osugobalai nibada Ama Kei mi ma dokodoo egee bado yo koo goomogoso.”

*Tei too odo oso goo tokenee toga, yo pidi*

<sup>15</sup> “Esiga tei too odo oso namapoo goo tokenee moodooga, nayo mada dileso yimapoo o goo tokenee ee takalai tekepo. Egeesi ma kulodu yayo nee to duloso mesioga, yo see goo tekepo mapoo ido siboso.

<sup>16</sup> Esino yayo nee to duloso mesile poogooga, nayo see tei telaga odo hedebe, o, bakadio egeesi gilimadoloso yo agalame di, diayo to nayo taka ee tei takadoo dalame.

<sup>17</sup> Egeesi ma kulodu yayo dibada to duloso mesile poogooga, goo hagee tei telaga odo susuga sosee ma kulodu egee do mapoo takee. Esino yayo see dibada to duloso mesile poogooga, yo see peegoo badeli odo o, goo tokenee teli odo dalai tekepo.

<sup>18</sup> Esiga ayo nimapoo taka. Osoloso niyo ogo goo ee mi hamapoo tiadoo mologa, Kei mi ma dokodoo osee tiadoo molo agalaiso. Osoloso niyo mi hamapoo ogo goo ee puobuguga, Kei mi ma dokodoo puobugu molo agalaiso.

<sup>19</sup> Esiga ayo see nimapoo taka. Mipoo hamapoo odo bakadio oso goo goolee hedebe doloso ogo goo talame Godee mapoo takooga, mo Ma Kei mi ma dokodoo egee bado oso diayo goomoga goo ee tei moodoolaiso.

<sup>20</sup> Esiga odo bakadio egeesi o, bakadio hedebe di egeesi oso sibileso mo hu maga mooloogoodoloso doga, a dibolo hodobo badoso.”

*Odo koo sooloo deli odo*

<sup>21</sup> Osoloso domo omapoo Pitaye sibileso Yesu mapoo egeese woosaso, “Lodee, mo tei too odo oso amapoo goo tokenee toga, ayo nei o goo tokenee ee kasolo boobado bigileiyo? 7 mapoo toobooga ka koodobileiyo?” dee takaso.

<sup>22</sup> Esem Yesuye nei egeese takaso, “Haye, hedebe 7 mapoo toobooga o goo tokenee na boobado bigi. Esino o goo tokenee hapoloso boobado bigili ee na koodobie.

<sup>23</sup> Osoloso Godeeye wiligi doloso badeli goo ee egeesee moloso. Wiligi odoos o tou teli odoos oso molee howadoos, see hamamee teiba hedebe egeesi yimapoo ka tenelame. Esem hamamee wiligi odoos oso molee egee see talai goomogolone, o odoos mapoo takolone, odoos molee howadoo egee bia yimapoo gilimado sib-eye diso.

<sup>24</sup> Esem o tou teli odoos hee daga molee toowa 10,000 talent\* deli ee howadoo ee yimapoo ido simiso.

<sup>25</sup> Esem odoos ogos molee teiba egeesi nei tenelai tebile. Esem wiligi odoos oso o odoos mapoo egeesee takaso, 'Odoos hagee sabolo, osoloso osobo, osoloso owolo dio, osoloso o bi susuga tolos odoos abo mapoo tenee, nei molee talame. Osoloso see molee egee amapoo tosibe,' dee takaso.

<sup>26</sup> Osoloso o tou teli odoos yayo o wiligi odoos homo beiyopoo gasuwolos ebiso miyomoo tugusalos badolone howolone egeesee takaso, 'Nayo a sooloo dologa biame deiyepo amapoo tenee. Ayo hamamee nee molee teiba hedebe egeesi namapoo tenelaiso,' diso.

<sup>27</sup> Esem wiligi odoos oso yo diya sooloo dolone yimapoo egeesee takaso, 'Nayo mo molee howadoo eyo nei hamamee amapoo tenelaigo, dee takemeni ee bige peegee. Bei, ayo goo egee olo boobado buguso. Esiga no goomoga sabolo di,' dee takaso.

<sup>28</sup> Osoloso tou teli odoos ee see wedi dulone o odoos tugodoos. O odoos hagoso yimaga molee howadoo ee haga toowanee (goo egee, molee ko 100 denaliyus\* deli ee howadoo). Esino tou teli odoos oso yo ogoloso o gabada mapoo tolos de-bidolone egeesee takaso, 'Nayo mo molee howadoo eyo nei teiba hedebe egeesi amapoo tenee,' diso.

<sup>29</sup> Esem odoos hagoso tou teli odoos homo beiyopoo gasuwolos ebiso miyomoo tugusalos badolone yimapoo howolone egeesee takaso, 'Nayo a sooloo dologa biame deiyepo amapoo tenee. Bei,

ayo hamamee nee molee teiba hedebe egeesi namapoo tenelaiso,' diso.

<sup>30</sup> Esino tou teli odoos yo o odoos oso egeesee takeme gowoolone yo todileso neliga moso mapoo toosoos, yayo nei teiba egeesi yimapoo teneega peegoo ka tamagalame.

<sup>31</sup> Esino wiligi odoos o tou teli odoos aboso goo hagee ogoloso diya gowoolone wiligi odoos mapoo takalame diyadeeso.

<sup>32</sup> Esem wiligi odoos yo goo hagee duloso o tou teli odoos ee idolos yimapoo egeesee takaso, 'No tei diya tokenee odoos-doo. Nayo mo molee hoowadoloso see hamamee tenelai tebile neme, ayo no sooloo dolone bige peegee dee takaso.

<sup>33</sup> Goo egeesi maga, nayo mo tou teli odoos hee sooloo dala diepi, tekepo meliyo,' diso.

<sup>34</sup> Egeesee takolos wiligi odoos oso komonolone o tou teli odoos ee neliga moso gidebeli odoos mapoo teneeso, diayo yo neliga moso mapoo toosoolos dala tenelame. Osoloso yayo nei teiba hedebe egeesi yimapoo teneega peegoo ka tamagalame."

<sup>35</sup> Yesuye to hagee taka koodobulos see odoos mapoo egeesee takaso, "Esiga niyo nee sooloo ma kuloduga tei too odoos eyo goo tokenee boobado bigilega poogooga, wiligi odoos oso o tou teli odoos mapoo moodoo egeesi masi nei mo Ma Kei mi ma dokodoo egee bado oso nimapoo egeesee moodoolaiso."

## 19

### *Sobo huloso pegeli goo ee eligi (Maka 10:1-12)*

<sup>1</sup> Yesuye goo hagee takolos koodobulos Gelili mi poogolos see Yudiya mi mapoo dulone Yoden howo dalos diso.

<sup>2</sup> Yo omapoo dime, odoos mooloogoodoo oso yo dodomo diso. Esem Yesuye paiye dima kulodu melee susuga ee tekepo paso.

<sup>3</sup> Esem biame omapoo Pelisi odoos aboso sibilesos Yesu mapoo gamenee kukulo agalame yimapoo egeesee takaso,

\* **18:24: talent** goo eyo bei hagoso. Odoos heeso dugo 15 ma kulodu tou temelee eyo nei molee toowa talent deli hedebe teliso. \* **18:28: denaliyus** goo eyo bei hagoso. Odoos heeso biame hedebe mapoo tou too eyo nei molee ko denaliyus deli hedebe teliso. **18:34:** Mat 5:25-26 **18:35:** Mat 6:15; Maka 11:25; Epe 4:32; Kol 3:13

“Edebeeyo sobo huloso wulo goo hee maga osobo pagalai tei molosomo?” diso.

<sup>4</sup> Esemé Yesuye nei dimapoo egeesee takaso, “Niba Godeeyo to hesigeleyo? Godeeye mipoo hagee moodoo biame mapoo giso sabolo sobo sabolo moodooso.

<sup>5</sup> Osoloso Godeeye egeesee takaso, ‘Esiga gisoso ama dio owee dio poogoloso see osobo sabolo hedebe doloso badalaiso. Osoloso obakadio su hedebe doloso dabalaiso,’ dee takaso.

<sup>6</sup> Esiga diayo debei ee ma kulodu diba bakadio nee, esino diba see olo hedebe doloso ka doso. Esiga Godeeye diba hedebe di goo ee see odoo heeso domo na pi.”

<sup>7</sup> Esino Pelisi odooso nei Yesu mapoo egeesee takaso, “Bei kasi maga Moseseeye takolone, sobo pagalame gooleega, sobo pegeli peipa mapoo hoguguloso sobo egee pagalai soowa, dee ka takayo?” diso.

<sup>8</sup> Esemé Yesuye nei dimapoo egeesee takaso, “Moseseeye egeino yayo eligi goo mapoo niyo mesilega poogolo neme, bige, sobo pagalai soowa dee ka taka. Esino bei mooloogoo biame mapoo sobo huloso pagalai goo ee Godeeye takele.

<sup>9</sup> Esiga ayo nimapoo taka, gisoso osobo na peegee. Esino soboso giso hee sabolo olo goo heli too daga, omoye osobo egee pagalai tei mauwe. Esiga gisoso wulo goo hee maga osobo poogoloso see sobo hee huga, yo odoo heeyo osobo ee peedee huso.”

<sup>10</sup> Esemé Yesu o hamamee dili odoo oso yimapoo egeesee takaso, “Esiga gisoso wulo goo hee maga osobo pagalai ee tei daga, gisoso sobo hulei tekeponee,” diso.

<sup>11</sup> Esemé Yesuye nei dimapoo egeesee takaso, “Goo hagee odoo susuga oso dadalai tebile. Esino hedebe Godeeye kitulugu tenee odoo oso goo hagee dadalai teiba.

<sup>12</sup> Bei, odoo aboso sobo huloso holo soolooga magalai tebile. Bei, diba dibada oweeye ho mauwe soomagooga. Goo egeesi maga diba sobo koo huli. Osoloso odoo abo ho tigaga diba sobo koo huli. Esino odoo aboso Godeeye wiligi doloso

badeli eyo goo maga sobo koo huli. Esiga edebeeyo sobo huli eyo goo maga ayo eligi goo ee talai teiba daga, yo goo ayo eligi hagee medee dadalai tekepo.”

### *Yesuye holaiso pidi*

*(Maka 10:13-16; Luka 18:15-17)*

<sup>13</sup> Odoo aboso owolo dio Yesu mapoo iyado simiso, Yesuye o deeso diba sigolone diba Godee mapoo takalame. Esemé o hamamee dili odoo diayo goo hagee ogoloso hamaga takaso.

<sup>14</sup> Esemé Yesuye o hamamee dili odoo mapoo egeesee takaso, “Holaiso amapoo sibadee dee, diba na hamaga takee. Bei, edebeeyo holaiso hageesi masi oso Godeeye wiligi doloso badeli mapoo gadileiso,” diso.

<sup>15</sup> Osoloso yayo o deeso diba sigolone Godee mapoo takoloso see mi hee mapoo diso.

### *Bi bei odoo*

*(Maka 10:17-31; Luka 18:18-30)*

<sup>16</sup> Odoo heeso Yesu mapoo sibilesos egeesee takaso, “Eligili odoo, ayo ogo goo tekepo ee toga, badoboso kookaiyo gie badeli ka talaiyo?” dee takaso.

<sup>17</sup> Esemé Yesuye nei yimapoo egeesee takaso, “Bei kasalame nayo sibilesos goo tekepo talai goo maga amapoo ka woosowala? Hedebe Godeeye tekepo ka badoso. Esiga no badoboso kookaiyo gie badeli talai goomogoga, no tei magoo goo ee medee deede.”

<sup>18</sup> Esemé odoo ogooso egeesee takaso, “Tei magoo kagee takala?” diso.

Esemé Yesuye nei yimapoo egeesee takaso, “Odoo na wooloome, osoloso adaba kooka sobo sabolo goo heli na te, osoloso adaba bi heli na te, osoloso odoo hee mapoo gamenee na gigidi,

<sup>19</sup> osoloso nama dio noowee dio oso taka to mapoo mesie, osoloso nee su no nediliyo egee sooloo dolo egeesi masi nee odoo hee nose egeesee sooloo dele.”

<sup>20</sup> Esemé odoo gie kauwa ogooso Yesu mapoo egeesee takaso, “Tei magoo goo susuga ayo tobuloso medee deedeeso.



Esino ayo see ogo go hee ka moodoolai-somo?" dee takaso.

<sup>21</sup> Esemé Yesuye nei yimapoo egeesee takaso, "No medee teedee badalai goomogoga, nee bi susuga odo abo mapoo teneloso nei molee toloso odo bi mauwe mapoo tenee. Nayo egeesee seega, Kei mi mapoo bi bei nee hu sabolo malaiso. Osoloso a dodomo sibe," diso.

<sup>22</sup> Esemé odo gie kauwa ogoso Yesuwo to duloso diya goohele sabolo diso. Bei, yo bi bei doloso badebeiga.

<sup>23</sup> Esemé Yesuye o hamamee dili odo mapoo egeesee takaso, "Ayo nimapoo taka. Bi bei odo oso Godeeye wiligi doloso badeli goo mapoo gadilei diya kalawa.

<sup>24</sup> Esiga ayo nimapoo see tobu taka, dugo duseli midole ou maga kemol be toowa oso gadilei kalawa. Esino bi bei odo oso Godeeye wiligi doloso badeli mapoo gasibilei diya kalawa toowa," diso.

<sup>25</sup> Esemé o hamamee dili odo oso yayo eligi goo hagee duloso diya dio dulone egeesee takaso, "Goo egee diya kalawadoo. Esiga odo agayo gadilei-somo?" diso.

<sup>26</sup> Esemé Yesuye dimapoo bolone egeesee takaso, "Edebeeyo o gie badeli eyo nediliyo pidilei tebile. Esino Godee yo teiba. Bei, goo susuga yayo moodoolai haga kalawanee," diso.

<sup>27</sup> Esemé Pitaye nei Yesu mapoo egeesee takaso, "Ibada bi susuga hoogoo poogoloso nayo di hamamee deede simiso. Esiga iba nei ogo bi talaiyo?" diso.

<sup>28</sup> Esemé Yesuye nei egeesee takaso, "Ayo nimapoo taka. Godeeye goo susuga see dia moodoolai biame mapoo, Odo Holo ayo wiligi doloso badeli mi mapoo badalaiso. Osoloso biame omapoo mo hamamee dili odo 12 niba nose wiligi odo oso bili 12 mapoo dobolone, Isalael odo bala 12 ee niyo gidabalaiso.

<sup>29</sup> Osoloso odo agayo emei dio, omolo dio, omoo dio, ama dio, owee dio, owolo dio, osoloso dia mi sabolo, dia moso poogoloso mo goo tomo siloga, diba nei

toowa talaiso. Osoloso diba kookaiyo badoboso gie badeli talaiso.

<sup>30</sup> Esiga odo abo epedee hamapoo malalo hagee do ee see diba hamamee dabalaiso. Esino odo abo epedee hamapoo hamamee hagee do oso see malalo dabalaiso."

## 20

### *Tou teli odo eyo goo maga wudu taka*

<sup>1</sup> "Godeeye wiligi doloso badeli goo ee egeesi masi moloso. Homolee eyo amaye gesikolodee tou teli odo gilimalame diso, diayo o homolee geleipi ko segei mapoo tou talame.

<sup>2</sup> Osoloso yayo odo abo ogoloso yibolo hodobo to mouloso goomoga magooso, biame hedebe mapoo diayo tou too eyo nei odo hedebe hedebe dimapoo molee ko\* hedebe tenelame. Osoloso diba tou talame diye diso.

<sup>3</sup> Osoloso homolee eyo amaye osoko howo 9 domo mapoo yo see wedi dileso egeino, odo abo tou telega wulo tebisamolome egeiso.

<sup>4</sup> Esemé yayo dimapoo egeesee takaso, 'Niba see mo homolee mapoo tou talame di. Eseega ayo habe nimapoo niyo tou too eyo nei molee teiba tenelaiso,' diso.

<sup>5</sup> Esemé diba tou talame diso.

Osoloso biame hedebe omapoo osoko oo domo tooboome, odo abo gilimado dileso o homolee mapoo tou teye diso. Osoloso biame hedebe ososee osoko howo bakadio hedebe di mapoo, yayo see tobu odo abo gilimado dileso o homolee hedebe omapoo tou teye diso.

<sup>6</sup> Osoloso biame hedebe omapoo osoko howo dee tiadoo mapoo tooboome, yo see wedi dileso egeino, odo abo tou telega wulo tebisamolome egeiso. Esemé yayo dimapoo egeesee takaso, 'Niba kasalame tou telega biame toowa wulo hamapoo mosoowe ka tebisamalala?' diso.

<sup>7</sup> Esemé diayo nei egeesee takaso, 'Odo heeso imapoo o tou teye dee takele,' diso. Esemé yayo dimapoo egeesee takaso,

'Niba nosee mo homolee mapoo tou talame sibe,' dee takaso.

<sup>8</sup> Esememe habe homolee eyo amaye o tou teli eyo wiligi odoo mapoo egeesee takaso, 'Homolee ma kulodu tou telagali odoo gilimadoloso dia tou too eyo nei molee tenee. Esiga nayo nei molee teneega, tou talame hamameedee sibili odoo mapoo daga malalo ka tenee,' dee takaso.

<sup>9</sup> Esememe tou teli odoo oso dia nei talame sibilesi mooloogoodome, odoo tou talame hamameedee sibili dimapoo tou too eyo nei molee ko hedebe hedebe di teneeso.

<sup>10</sup> Osoloso gesikolodee odoo daga malalo tou talame diyadee oso goo egee ogoloso diayo goolee, diba dia tou eyo nei toowa talaiso, dee goolone debeiso. Esino diba onosee molee ko hedebe egeesi tooso.

<sup>11</sup> Diba molee egee toloso gowoolone homolee eyo ama mapoo egeesee takaso,

<sup>12</sup> 'Iba biame toowa osoko pa mapoo tou toowa telagameleeso. Esino odoo hagee bia wulo osoko howo deiyepo mapoo tou ka too. Esino nayo kasi maga molee dimapoo tenee hedebe egeesi masi imapoo ka tonowala?' diso.

<sup>13</sup> Esememe homolee eyo amaye dima kulodu odoo hee mapoo egeesee takaso, 'Emegei, ayo goo tokenee hee namapoo moodele. Bei, no biame hedebe mapoo tou too eyo nei molee ko hedebe egeesi masi talai doloso tou talame goomoga magooso.

<sup>14</sup> Esiga nee molee egee toloso di. Ayo molee namapoo tenee hedebe egeesi masi odoo abo mapoo tenelai a goomogo.

<sup>15</sup> Bei, mo molee oso mawo goomoga goo ee talai tekepo. Esino kasi maga goo tekepo ayo moodoo ee ogoloso, nayo amapoo ka komonowala?' dee takaso."

<sup>16</sup> Esememe Yesuye see egeesee takaso, "Esiga odoo abo epedee hamapoo malalo hagee do ee see diba hamamee dabalaiso. Esino odoo abo epedee hamapoo hamamee hagee do oso see malalo dabalaiso."

*Yesu eyo talai goo ee see tobu taka  
(Maka 10:32-34; Luka 18:31-34)*

<sup>17</sup> Yesu Yelusalem mapoo polone o hamamee dili odoo 12 peegoo gilimado dilesi dobolone dimapoo egeesee takaso,

<sup>18</sup> "Goolee! Iba Yelusalem mapoo olo duso. Omapoo Odoo Holo a Yu odoo dia tei moso wiligi odoo tebisa sabolo osoloso tei eligili odoo mapoo tiasalaiso. Osoloso diayo mo goo midiloso ayo talai goo ee takalaiso.

<sup>19</sup> Osoloso Yu odoonee oso a toloso manolone woolaiso. Osoloso a woomo dilesi homo bulubo magoo ma dokodoo yoguso enigileiso. Esino a bi ma kulodu ta moloso biame bakadio hedebe di mapoo see gie badeli toloso hogadileiso."

*Yemes dio Yonee dio egee bia dia oweeye  
goomoga goo ee ogo taka  
(Maka 10:35-45)*

<sup>20</sup> Osoloso Sebediyo owolo Yemes dio Yonee dio oweeye gilimadoloso Yesu mapoo simiso. Osoloso oweeye goomoga goo ee Yesu mapoo ogo takalame, o homo beiyopoo gasuwoloso badebeiso.

<sup>21</sup> Esememe Yesuye yimapoo egeesee takaso, "Nayo amapoo ogo goo takalame ka simiyo?" diso. Esememe yayo Yesu mapoo nei egeesee takaso, "Nayo wiligi doloso badalai mi mapoo mo holo bakadio hagee heeso nee dee deede dokolo bado, osoloso hee nee dee dobusu dokolo bado dalai tekepowa?" dee takaso.

<sup>22</sup> Esememe Yesuye dimapoo egeesee takaso, "Niyo egee takoo goo ee niba koo gooleedo," dee takaso. Osoloso yayo Yemes dio Yonee dio mapoo egeesee takaso, "Dala toowa ayo talame egee molo niba nosee egeesee talai teibayo?" diso.

Esememe diayo nei egeesee takaso, "O. Iba teiba," dee takaso.

<sup>23</sup> Esememe Yesuye nei dimapoo egeesee takaso, "Tei takoo, niba nosee dala hageesee talaiso. Esino mo dee deede dokolo dabalai odoo sabolo, osoloso mo dee dobusu dokolo dabalai odoo hesigilei amapoo kitulugu mauwe. Esino hedebe mo Maye hesiga odoo oso mi omapoo dabalaiso."

<sup>24</sup> Egeesi ma kulodu Yesu o hamamee dili odoo abo 10 oso to hagee duloso Yemes dio Yonee dio mapoo diya kamaso.

<sup>25</sup> Esemé Yesuye o hamamee dili odoo susuga gilimadoloso dimapoo egeesee takaso, “Yu odoonee dia wiligi odoo oso dima hemidu debeli odoo ee kitulugu sabolo gidebeliso.

<sup>26</sup> Esino nima kulodu egeesee selai tekeponee. Esiga nima kulodu edebeeyo toowa doloso badalai goomogoga, yo tou teli odoo masi mesie sabolo odoo abo halo tou tolone ka badebee.

<sup>27</sup> Osoloso edebeeyo malalo badalai goomogoga, yo tou wulayo teli odoo masi odoo abo halo tou tolone ka badebee.

<sup>28</sup> Bei, Odoo Holo ayo mipoo hamapoo simi hagee edebeeyo a pidilame ka sibile. Esino ayo odoo pidilame ka simi. Osoloso odoo susuga Godee mapoo iyado sibilame a talame ka simi.”

*Yesuye odoo howo neliga bakadio tekepo pa*

*(Maka 10:46-52; Luka 18:35-43)*

<sup>29</sup> Yesu o hamamee dili odoo sabolo Yeliko mi poogoloso diyadaga molome, odoo mooloogoodoo toowa oso diba dodomo sibadeeso.

<sup>30</sup> Egeesee semelee domo omapoo odoo howo neliga bakadio eli pee mapoo debeiso. Diayo Yesuye simi goo ee duloso to neligidi egeesee takaso, “Lodee, Deibidiyo amawe, nayo iba sooloo dolone pidi,” dee takaso.

<sup>31</sup> Esino odoo susuga oso dimapoo diya takolone egeesee takaso, “Niba to mauwe debée,” diso. Esino odoo susuga oso dimapoo egeesee takeme, diba dia to dulega see diya neligidi egeesee takaso, “Lodee, Deibidi amawe, nayo iba sooloo dolone pidi,” dee takaso.

<sup>32</sup> Esemé Yesuye omapoo kookoodoboloso diba iyadoloso dimapoo egeesee takaso, “Ayo nimapoo ogoo goo moodolai goomogolo?” diso.

<sup>33</sup> Esemé diayo nei yimapoo egeesee takaso, “Ibada howo tekepo moodee. Iba agalai goomogo,” dee takaso.

**20:25:** Luka 22:25-26 **20:26:** Mat 23:11; Maka 9:35 118:25-26; 148:1

<sup>34</sup> Yesuye diba sooloo dolone dibada howo deeso sigeso. Esemé saga omapoo dibada howo tekepo poome, Yesuye di hamamee diso.

## 21

*Yesuye Yelusalem mi mapoo di*

*(Maka 11:1-11; Luka 19:28-40; Yon 12:12-19)*

<sup>1</sup> Yesu o hamamee dili odoo sabolo Yelusalem mi koola mapoo dulone, Olipi mubi kumoo mi pepooko Betapage mapoo peledabaso. Diba omapoo peledoboloso dobolone, Yesuye o hamamee dili odoo bakadio malalo diye dolone egeesee takaso,

<sup>2</sup> “Niba mi hee malalo koogee mapoo di. Niba omapoo dileso ogoga, donki be o pe sabolo dia mu mapoo ebigiso bagagoloso, omou mapoo bagagoo mologa saga agalaiso. Eseega niyo ebige pidiga poogoloso amapoo hado sibe.

<sup>3</sup> Egeesi ma kulodu odoo heeso nimapoo takooga, niyo nei yimapoo egeesee takee, ‘Lodeeye donki be bakadio egee goomogogona,’ dee takee. Egeeseega odoo ogoso saga nimapoo takolone donki be egee hado diye dalaiso,” diso.

<sup>4</sup> Esiga goo hagoso peledaba ee Godee maga to tolosokokodo takomo sili odoo oso to taka sabolo tebilame ka see. Bei, yayo egeesee takaso,

<sup>5</sup> “Niyo Yelusalem mapoo debeli odoo mapoo takee, ‘Ege, nibada wiligi odoo nimapoo olo sibo.

Yo mesie taba. Yo donki be pepooko mapoo buloso ka siboso.’”

<sup>6</sup> Esemé Yesu o hamamee dili odoo bakadio oso Yesuye taka goo ee tobuloso moodooso.

<sup>7</sup> Diba dileso donki be owee sabolo osoloso o pe sabolo hado simiso. Osoloso dibada kekeisu dugo tigadoloso donki be dia wagi ma dokodoo palagaloso, Yesuye omapoo peleso biaso.

<sup>8</sup> Esemé odoo mooloogoodoo toowa oso dia kekeisu dugo tigadoloso eli domopoo palagamo dime, odoo aboso weiyo

**20:28:** Luka 22:27; Pil 2:7 **21:5:** Zec 9:9 **21:9:** Psa

kookooloso Yesuye sibilei eli mapoo palagamo diso.

<sup>9</sup> Esemé Yesuye donki be ma dokodoo buloso dimolome, malalo diyadee odoo sabolo osoloso Yesu ma hamamee sibadee odoo oso to neligidi egeesee takaso, “Iba Deibidiyo amawe mapoo goomogo.

Odoo Godeeyo hu maga kitulugu sabolo egee sibo yo Godeeye pidiye dee.

Kei mi ma doko hodoo badeli Godee mapoo goomogo,” dee takagamo diyadeeso.

<sup>10</sup> Yesu Yelusalem mi ma kulodu gadime, odoo susuga omapoo debei oso diya dio dulone egeesee takaga meleeso, “Hagee odoo ogubele?” dee takaso.

<sup>11</sup> Esemé odoo mooloogoodoo oso nei egeesee takaso, “Hagee Godee maga to toloso kokodo takomo sili odoo Yesu oso. Yo Gelili mi toowa ma kulodu Nasalet mi pepooko maga ka siboso,” diso.

*Yesuye Yu odoo dia tei moso ma kulduga odoo peegoo hasiso bugu*  
(Maka 11:15-19; Luka 19:45-48; Yon 2:13-22)

<sup>12</sup> Yesuye Yelusalem mapoo sibilesi tei moso mapoo peleso egeino, odoo susuga oso tei moso tegei ma kulodu gala sabolo bi abo sabolo neiso telaga molome egeiso. Yo goo egee agalai gowoolone, yayo moso ee ma kulodu melee bi eyo ama sabolo osoloso bi ee telaga odoo sabolo peegoo hasiso buguso. Osoloso molee piligeli odoo dia debi pooba sabolo bidige buguso. Osoloso molo huyado sibilesi nei moleeso teli odoo susuga oso bili pooba sabolo bidige buguso.

<sup>13</sup> Osoloso Yesuye dimapoo egeesee takaso, “Godeeyo to booka mapoo hogugu oso egeesee takooso, ‘Mo tei moso ee edebeeyo sibilesi Godee mapoo takeli moso,’ diso.

Esino niyo Godeeyo moso hagee heli teli odoo oso mada wuli moso ka poso,” diso.

<sup>14</sup> Egeesee semelee biame omapoo Yesu tei moso ma kulodu badoboome, howo neliga odoo abo sabolo, osoloso odoo bagi daga poogoo yimapoo sibadeeso. Esemé yayo diba tekepo paso.

<sup>15</sup> Esino tei moso wiligi odoo tebisa sabolo osoloso tei eligili odoo oso Yesuye goo toowa opusomo di moodoomo silee ogoloso diya kamanaso. Egeeseelone holaisoso tei moso ma kulodu dobolone toso neligidi takolone egeesee takaso, “Deibidiyo amawe Yesu mapoo goomogo,” dee takaga melee duloso diayo dimapoo diya goweso.

<sup>16</sup> Osoloso diayo see Yesu mapoo egeesee takaso, “No holaisoso to egee takoo medee dusomo?” diso.

Esemé Yesuye nei dimapoo egeesee takaso, “O. A duso. Esino niba Godeeyo to booka mapoo hogugu ee hesigelega dosomo? Bei, Godeeyo to booka mapoo hogugu oso egeesee takooso,

‘Godeeye holaiso sabolo osoloso holope oso o hu dokodoo poudilei goo ee dimapoo olo eligiso,’ dee takaso.”

<sup>17</sup> Osoloso Yesuye diba poogoo dileso Yelusalem mi maga see Betani mi mapoo tilame diso.

*Pigi homoso sia*  
(Maka 11:12-14, 20-24)

<sup>18</sup> Gesikolo Yesu Yelusalem mapoo see wedi dulone hodiaso.

<sup>19</sup> Esemé dulone pigi homo eli palaga mapoo dime ko pa beleso agalame diso. Esino ko pelega wulo duwe molome egeiso. Esemé Yesuye pigi homo hamapoo egeesee takaso, “No see tobu ko palaime,” diso. Esemé epedee omapoo homo saga siaso.

<sup>20</sup> Yesu o hamamee dili odoo oso goo hagee ogoloso dio dulone egeesee takaso, “Pigi homo hagee saga kasee siabele?” diso.

<sup>21</sup> Esemé Yesuye nei dimapoo egeesee takaso, “Ayo nimapoo taka. Niyo tei toloso dobolone goo goolee bakadio delega doga, ayo homo hamapoo moodoo goo ee niba nosee egeesee moodolai tebileiso. Osoloso goo hedebe hagonosee talai tebile. Esino niyo goo toowa abo moodolaiso. Egeeseelone niyo mubi hamapoo takolone ‘no nediliyo tadoloso howomoo mei’ dee takooga, goo oso tei peledabalaiso.



<sup>22</sup> Esiga niyo tei tolone Godee mapoo takooga, yayo goo niyo hoowa eyo nei nimapoo tenelaiso.”

*Yesuye kitulugu maga woosa  
(Maka 11:27-33; Luka 20:1-8)*

<sup>23</sup> Yesu see Yu odoowo tei moso mapoo peleso Godeeyo to odoosusuga mapoo eligimolome, tei moso wiligi odoosabolo tebisa osoloso Yu odoodia wiligi odoosabolo osoloso Yesu mapoo egeesee takaso, “No agamo kitulugu maga goohagee ka moodoomo silala? Odoosabolo agayo namapoo kitulugu hagee ka teneeyo?” diso.

<sup>24-25</sup> Esemesabolo Yesuye nei dimapoo egeesee takaso, “Anoseewoosalito hedebe nimapoo woosalaiso. Odoosabolo agayo Yonee mapoo kitulugu ka teneeyo, yayo odoosabolo howo olugulame? Kitulugu Godeeyeteneeyo o, edebeeyo teneeyo? Esiganiiyo to eyonei amapoo takooga, anoseeyo ayo kitulugu tolosohagee silo eyogoo ee nimapoo ka takalai,” diso.

Esemesabolo diayo to hagee duloso dieso nediliyo to moulone egeesee takagameleeso, “Iyo kasee takalaisomo? Iyotakolone Yoneeyekitulugu ee Godeeyeteneedo, dee takooga, see nei Yesuyemapoo egeesee takalaiso, ‘Niba beikaseme Yoneeyo to mapoo teitelega ka poogoowo?’ dalaiso.

<sup>26</sup> Osoloso iyo takolone kitulugu odoomaga simigo daga, odoosusuga oso imapoo diya kamanalaiso. Bei, odoosusuga oso takolone Yoneeyo Godeemaga to tolosokokodo takomo sili odoodeliso.”

<sup>27</sup> Egeeseelone diayo nei Yesu mapoo egeesee takaso, “Yoneeyekitulugu too gooyeyo bei, iba gooleedele,” dee takaso.

Esemesabolo Yesuye nei dimapoo egeesee takaso, “Esiga ayo goohagee moodoomosilame kitulugu too hagee nimapoo takalaime,” diso.

*Yesuye holaiso bakadio eyo goo magawudu taka*

**21:22:** Mat 7:7-11; 18:19    **21:26:** Mat 14:5    **21:32:** Luka 3:12; 7:29-30    **21:33:** Isa 5:1-2    \* **21:33: homolee bali odoosabolo** - odoosabolo hagee bia oso homolee mapoo tou too eyonei homokokogooloosabolo hodio diayo teliso. Osoloso hodio homolee eyo amaye teliso.

<sup>28</sup> “Esiga niba goohamapoo kaseegooleesomo? Odoosabolo heeso o giso holo bakadio gilimadoloso debeiso. Esiga yayo daga holo mapoo egeesee takaso, ‘Mo holo, no epei geleipi ko segei homolee mapoo toutalame di,’ dee takaso.

<sup>29</sup> Esino giso holo oso nei egeesee takaso, ‘A goowo,’ diso. Esino yo see hamamee o googoolee su wuduloso toutalame diso.

<sup>30</sup> Osoloso amaye see tobo owolo heemapoo dileso egeesee takaso, ‘No geleipi ko segei homolee mapoo toutalame di,’ dee takaso. Esemesabolo owoloye nei egeesee takaso, ‘O. A toutalame dileiso,’ diso. Esino yo dilega poogooso.

<sup>31</sup> Esiga holaiso bakadio hagee bia heekaso amaye goomoga gooka toowo?”

Esemesabolo tei moso wiligi odoosabolo osoloso Yu odoodia wiligi odoosabolo osoloso yimapoo egeesee takaso, “Daga holo oso amaye goomoga gooe tooso,” dee takaso.

Esemesabolo Yesuye dimapoo egeesee takaso, “Ayo nimapoo taka. Tekisi molee teli odoosabolo osoloso domo silesibili sobo oso daga diayo Godeeyewiligi doloso badelikitoolone mapoo gadulone hee niba peegoo pagalaiso.

<sup>32</sup> Bei, Yoneeyekitoolone mapoo gootekepo eligime, niyo o to duloso teitele. Esinogoo tokeneeteli odoosabolo hagee bia oso Yoneeyo to duloso tei tooso. Osoloso niyo diayo teitoo googooloso googoolee su wuduloso Yoneeyo to mapoo teitele poogooso.”

*Odoosabolo tokeneebalioyo goomaga wudu taka  
(Maka 12:1-12; Luka 20:9-19)*

<sup>33</sup> “Osoloso see heehagee wudu takoodui. Biame heeso homolee eyo amayehomolee mapoo geleipi ko segeiso, osoloso pee maga beeleeso. Osoloso ko i debilame yo ou poogooloso homolee egeegibadalame doko mosotegeiso. Osoloso yayo homolee bali odoosabolo\* abo mapoo beyedolosoo, yo see mi eli sage mapoo badalame diso.

<sup>34</sup> Yo omapoo dileso badoboome, homokokopalagaloso olo bi moodoogaso.

Eseme yayo o tou teli odoo abo mapoo takolone o homolee mapoo dileso homokoko egee gooloogaloso o hodio ee yimapoo tosibeye diso.

<sup>35</sup> Esino homolee bali odoo oso diayo sibadee ogoloso diba toloso, hee wulo woomele poogooso. Osoloso heeno wulo wooloomaso, osoloso hee yoso wooloomaso.

<sup>36</sup> Eseme homolee eyo amaye goo hagee duloso see tou teli odoo bei diyadeeye diso. Esino homolee bali odoo oso diba nosee toloso woomele poogoloso abo yoso piliguso.

<sup>37</sup> Eseme see hamameedee owolo diye dolone egeesee gooleeso, 'Homolee bali odoo oso mo holo mapoo mesilone yo wooloomalaime,' dee gooleeso.

<sup>38</sup> Esino homolee bali odoo oso homolee eyo amayo owoloye simi ee ogoloso dieso nediliyo egeesee takaga meleeso, 'Holo hagoso hamamee ama toga, yayo geleipi ko segei hagee talaiso. Esiga geleipi ko segei hagee see iyo talame yo wooloomamo,' dee takaso.

<sup>39</sup> Eseme diayo holaiso hagee homolee maga peegoo ido dileso wooloomaso.

<sup>40</sup> Esiga homolee eyo amaye sibilesos o homolee bali odoo mapoo kasee moodoolaisomo?"

<sup>41</sup> Eseme tei moso wiligi odoo tebisa sabolo osoloso Yu odoo dia wiligi odoo tebisa oso nei egeesee takaso, "Homolee eyo amaye sibilesos homolee bali odoo wooloomaloso see bali odoo abo mapoo beye dalaiso. Osoloso odoo egee bia oso homokoko gooloogalai biame mapoo homokoko gooloogaloso homolee eyo ama mapoo hodio tenee demelaiso."

<sup>42</sup> Eseme Yesuye dimapoo egeesee takaso, "Niba Godeeyo to booka mapoo hogugu ee hesigeleyo? Bei, omapoo egeesee takooso,

'Moso tegeli odoo oso omou gowoolone togobugu

oso see epedee hamapoo moso omu domo pupodoo ka moloso.

Esiga goo hagee Lodeeye ka moodoo.

Esiga iba goo hagee ogoloso howoodolone tekepo deeso.'

<sup>43</sup> Esiga ayo nimapoo taka. Godeeye wiligi doloso badeli goo ee nimaga peedee doloso, see Godeeye goomoga goo tomo silesibili odoo omapoo tenelaiso.

<sup>44</sup> Esiga odoo agayo omou omapoo takodee buguloso homodobuoga, yo ki gebisa pagalaiso. Osoloso omou oso odoo hee bulugu magooga, odoo egee balado dileiso," dee takaso.

<sup>45</sup> Eseme tei moso wiligi odoo tebisa sabolo osoloso Pelisi odoo oso Yesuye wudu taka goo ee duloso "ibada goo takolone bado," doloso egeesee gooleeso.

<sup>46</sup> Egeeseelone diayo Yesu talai eli esiaso. Esino odoo susuga oso Yesu yo tei Godee maga to toloso kokodo takomo sili odoo doloso takolone debee ee duloso, diayo yo talai ebiaso.

## 22

### *Sobo hu wo ne maga wudu taka (Luka 14:15-24)*

<sup>1</sup> Eseme Yesuye see tobu wudu takolone, tei moso wiligi odoo tebisa sabolo, osoloso Yu odoo dia wiligi odoo tebisa mapoo egeesee takaso,

<sup>2</sup> "Godeeye wiligi doloso badeli goo ee egeesee moloso. Wiligi odoo taba eyo owoloye sobo hulei maga nei toowa mopoodoo dooso.

<sup>3</sup> Yo nei mopoodoo koodobuloso o tou teli odoo diye dolone egeesee takaso, 'Odoos daga ayo nei mopoodoo hamapoo sibilame taka ee niyo hamapoo gilimado sibe,' diso. Eseme o tou teli odoo oso to hagee todilesos odoo egee bia dimapoo takano, diba sibilei goweso.

<sup>4</sup> Eseme yo to egee duloso, wiligi odoo taba oso o tou teli odoo abo see tobu diye dolone egeesee takaso, 'Niba dileso odoo daga ayo sibeye dee taka mapoo to egeesee takeeye diso, "Be hu olo piliguloso moloso, osoloso nei olo mopoodoo doloso moloso. Esiga niba sobo hu wo ne mapoo sibadeeye," dee takee,' diso.

<sup>5</sup> Eseme diayo to hagee todilesos takano, odoo aboso to hagee duloso

gowoolone see dia tou talame diyadeeso. Egeeseelone, odo aboso dia homolee mapoo diyadeeso. Osoloso odo aboso dia bi neiso teli moso mapoo diyadeeso.

<sup>6</sup> Esemee see odo aboso to hagee duloso wiligi odo taba o tou teli odo ee toloso piliguso.

<sup>7</sup> Esemee wiligi odo taba oso goo hagee duloso diya komonolone o ha teli odo mapoo egeesee takaso, 'Emegei piligili odo hagee bia piliguloso dia mi onosee dou gigaleege, dee takeme, diayo egeesee moodooso.

<sup>8</sup> Esemee wiligi odo taba oso o tou teli odo mapoo see egeesee takaso, 'Nei toowa olo mopoodoo doloso moloso. Esino odo ayo gi hagee bia ee dia goo tokenee maga hamapoo sibilei tebile.

<sup>9</sup> Esiga niyo dileso mi domo omapoo sile-sibilone odo susuga wo nalame gilimado sibe,' diso.

<sup>10</sup> Esemee o tou teli odo oso dileso odo susuga gilimadoloso wo nalame sibadeeso. Egeeseelone goo tekepo teli odo sabolo, osoloso goo tokenee teli odo sabolo sibadeeso. Esemee odo moso ee ma kulodu diya muguleso.

<sup>11</sup> Esino wiligi odo taba oso moso ee ma kulodu odo agalame gapeleso egeino, odo hee sobo hu wo ne mapoo kali bi ee kelega sibilesi badoboome egeiso.

<sup>12</sup> Esemee wiligi odo taba oso yimapoo egeesee takaso, 'Emegei, no sobo hu wo ne mapoo kali bi ee kelega hagee bado, no moso hagee ma kulodu kasee gasimiyo?' diso. Esino odo egee to nei takele.

<sup>13</sup> Esemee wiligi odo taba oso o tou teli odo abo mapoo egeesee takaso, 'Odo hagee dee sabolo homo sabolo tiso tialogoloso moso peegoo neliga mapoo togobigi. Yo omapoo badolone pisa sabolo mei gisile sabolo badalaiso,' diso.

<sup>14</sup> Esiga Godeeye odo susuga yimapoo sibilame gilimolone ka badoso. Esino yo wulo odo abo ono ka hesiga moloso."

*Sisa mapoo tekisi molee tenelai  
(Maka 12:13-17; Luka 20:20-26)*

<sup>15</sup> Osoloso Pelisi odo oso peegoo dileso Yesu kukulo agalame to mouso, yayo to tokenee takooga yo ka talame.

<sup>16</sup> Egeeseelone diayo dia hamamee dili odo sabolo, osoloso Helodeeyo hamamee dili odo sabolo Yesuye badebei mapoo diye diso. Esemee odo egee bia oso dileso Yesu mapoo egeesee takaso, "Eligili odo, iba gooleedoo, no tei goo moodeli odo. Osoloso nayo Godeeyo goo eligilone hedebe tei goodee ee eligili. Osoloso no odo bolo koo ebili. Osoloso no odo su mapoo koo egeli.

<sup>17</sup> Esiga nayo kasee gooleedo? Imapoo takee, iyo Loum gamalee wiligi odo Sisa mapoo tekisi molee tenelai tekepowa?" dee takaso.

<sup>18</sup> Yesuye diayo goo tokenee moodoolame to mou goo ee yo olo gooleedoloso dimapoo egeesee takaso, "Niba goo bakadio gweli odo. Bei kasi maga niyo a kukulo agalame ka sala?

<sup>19</sup> Esiga niyo tekisi molee magalame mooloogoo molee ko hedebe amapoo eligi." Esemee diayo molee ko hedebe yimapoo tosimiso.

<sup>20</sup> Esemee Yesuye dimapoo egeesee takaso, "Molee hamapoo agamo mudu sabolo osoloso agamo hu oso ka mololo?" diso.

<sup>21</sup> Esemee diayo nei egeesee takaso, "Sisayo mudu sabolo osoloso o hu oso ka molo," diso. Esemee Yesuye nei dimapoo egeesee takaso, "Niyo Sisayo bi ee Sisa mapoo tenee, osoloso Godeeyo bi ee Godee mapoo tenee," dee takaso.

<sup>22</sup> Diba to hagee duloso diya howoogadoloso Yesu poogoo diso.

*Ta maga hogabili eyo goo maga Yesu mapoo woosa  
(Maka 12:18-27; Luka 20:27-40)*

<sup>23</sup> Osoloso biame omapoo Sedisi odo abo oso Yesuye badebei mapoo sibadeeso. Odo hagee bia oso takolone, "Odo wedia see hogabileime," dee takeliso. Esemee diayo Yesu mapoo sibilesi egeesee takaso,

<sup>24</sup> "Eligili odo, tei magoo Mosese-eye hogugu oso imapoo egeesee takooso.

'Gisoso sobo huloso holo soomagelega toga, see omoloye emei tayo osobo bau ee huloso emeiyo hu maga holo soolooga magee,' diso.

<sup>25</sup> Esiga odoo heeso giso holo 7 sooma-gooso. Osoloso daga emeiye sobo huso. Osoloso yo holo soomagelega taso. Esememe omolo yima hamamee soomagoo oso emeiyo osobo bau ee huso.

<sup>26</sup> Esino yinosee holo soomagelega taso. Esememe see omolo yima hamamee soomagoo oso emeiyo osobo bau ee huso. Esino yinosee holo soomagelega taso. Egeeseelone giso holo 7 susuga hagee bia oso holo soolooga magelega wediaso.

<sup>27</sup> Osoloso hamameedee sobo bau yinosee taso.

<sup>28</sup> Esiga odoo wedia maga see hogogadilei biame mapoo sobo egee tei odoo agamo osobo dalaisomo? Bei, giso 7 oso sobo hedebe hagee huso," diso.

<sup>29</sup> Esememe Yesuye nei dimapoo egeesee takaso, "Niba goo dooboo gweli odoo. Bei, niba Godeeye kitulugu sabolo osoloso o to sabolo gooledelega ka doso.

<sup>30</sup> Bei, odoo wedia ee bi maga see hogogabuoga, diba see sobo huleime, osoloso giso obileime. Esino diba see Godeeyo momaiye oso Kei mi mapoo egee do egeesi masi dabalaiso.

<sup>31</sup> Esiga niba Godeeye odoo wedia see hogogadilei eyo goo maga taka to hogugu hagee hesigeleyo? Bei, yayo egeesee takaso,

<sup>32</sup> 'A Eibalahameeyo Godee, Aisekeeyo Godee, osoloso Yekobowo Godee doloso ka badoso,' dee takaso. Esiga Godee hagee odoo wedia eyo Godeenee. Haye, odoo gie egee do eyo Godee."

<sup>33</sup> Esememe odoo susuga oso Yesuye eligi goo hagee duloso diya howoogadooso.

*Tei magoo kaso toowa ka molosomo?  
(Maka 12:28-34; Luka 10:25-28)*

<sup>34</sup> Sedisi odoo oso Yesuye taka eyo nei takalai tebile poogoo ogoloso Pelisi odoo susuga diesono hodobo mooloogoodoloso to mouso.

<sup>35</sup> Osoloso mooloogoodoo omaga tei eligili odoo heeso Yesu kukulo agalame yimapoo sibilesa egeesee takaso,

<sup>36</sup> "Eligili odoo, Moseseeye tei magoo ma kulodu tei magoo kaso diya toowa ka molosomo?" diso.

<sup>37</sup> Esememe Yesuye nei yimapoo egeesee takaso,

"Nayo nee wiligi odoo Godee diya goolee, nee sooloo ma kuloduga goolee sabolo, osoloso nee dioso goolee sabolo, osoloso nayo goo goolee oso diya goolee.'

<sup>38</sup> Esiga tei magoo susuga ee ma kulodu tei hedebe hagoso daga malalo diya toowa ka moloso.

<sup>39</sup> Osoloso ee ma hamamee tei magoo toowa egeesi masi hee hagoso,

'Nayo no nediliyo diya egee goolee, egeesee goolone nee odoo nose diya egeesee goolee.'

<sup>40</sup> Esiga Moseseeye tei magoo susuga sabolo osoloso Godee maga to toloso kokodo takomo sili odoo oso to hogugu susuga eyo bei ee tei magoo bakadio hamapoo moloso."

*Keliso agamo owolowo?*

*(Maka 12:35-37; Luka 20:41-44)*

<sup>41</sup> Pelisi odoo hodobo mooloogoodoloso osee doboome, Yesuye dimapoo egeesee takaso,

<sup>42</sup> "Niba Kelisowo goo maga kasee gooleesomo, yo agamo owolowo?" dee takaso. Esememe diayo egeesee takaso, "Deibidiyo amawe," diso.

<sup>43</sup> Esememe Yesuye nei dimapoo egeesee takaso, "Bei kaseme Deibidiye Dio Tei maga takolone Keliso yo Lodee dee ka takayo? Bei, Deibidiye egeesee takaso,

<sup>44</sup> 'Godeeye mo Lodee mapoo egeesee takaso:

No abolo wiligi doloso badalame mo dee deede dokolo bie.

Esiga nayo badolone namapoo ha teli odoo ee ayo dagadileiso,' diso.

<sup>45</sup> Esiga Deibidiye Keliso o Lodee diso. Esiga kasi maga Keliso yo Deibidiyo amawe dee ka seeyo?" diso.



<sup>46</sup> Esemé odoo heeso o to su mapoo to nei hee takele. Esiga biame domopooga dulone, odoo susuga oso Yesu mapoo woosalai obulone yimapoo hee woosele poo-gooso.

## 23

*Yesuye tei eligili odoo sabolo osoloso Pelisi odoo dia goo ee eligi*

*(Maka 12:38-39; Luka 11:43-46; 20:45-46)*

<sup>1</sup> Esemé Yesuye odoo mooloogoodoo mapoo, osoloso o hamamee dili odoo mapoo egeese takaso,

<sup>2</sup> “Tei eligili odoo sabolo osoloso Pelisi odoo oso Moseseeye tei magoo nimapoo ee eligilei dimapoo kitulugu moloso.

<sup>3</sup> Esiga dibada to mapoo mesimo silesibilone, diayo taka goo ee tolone debee. Esino diayo suso goo moodeli ee ogoloso niyo na peedee. Bei, diayo tei ma goo ee nimapoo eligilino, see dieso suso koo edidili.

<sup>4</sup> Esiga diayo tei eligi goo oso odoo mapoo hegi toowa teneliso. Osoloso diayo emegei pidilone hegi su ee see dieso koo teli.

<sup>5</sup> Esiga goo susuga diayo moodoo ee wulo edebeeyo agalame ka moodeli. Osoloso diba Godeeyo to abo hogugu ee debege masi diya toowa kaloso ee ma kulodu sooloso edebeeyo agalame silesibiliso. Osoloso edebeeyo agalame, diayo howo gisilone, kali dugo su mapoo ti sage bagagoloso\* kalagaloso silesibiliso.

<sup>6</sup> Osoloso ibada howo gisili moso ma kulodu, osoloso wo toowa ne mapoo diba medee malalo peleso bilei ono diya goomegeliso.

<sup>7</sup> Osoloso mi domo mapoo edebeeyo dimapoo gauwuloso emegei di to takooga ee dulei onosee diya goomegeliso. Osoloso odoo susuga oso diba eligili odoo dalame diya goomegeliso.

<sup>8</sup> Esino odoo susuga oso nimapoo takolone eligili odoo dalai tekepnee. Bei, nibada eligili odoo hedebe ayo ka

badoso. Osoloso nima kulodu odoo heeso dagadileso koo badoso.

<sup>9</sup> Osoloso mipoo hamapoo odoo heeyo hu dokodoo poudoolone, yimapoo takolone ma dee na see. Bei, nibada Ama hedebe yayo Kei mi ma dokodoo ka badoso.

<sup>10</sup> Osoloso odoo heeso nimapoo takolone wiligi odoo dalai tekepnee. Bei, nibada wiligi odoo hedebe Keliso aso.

<sup>11</sup> Esiga nima kulodu odoo hu toowa too oso nibada tou teli odoo doloso badalai tekepo.

<sup>12</sup> Osoloso odoo agayo dieso nediliyo diba si howolone doga, nei Godeeye diba pepooko dalaiso. Esino odoo agayo dieso pepooko doloso doga, diba nei Godeeye toowa dalaiso.”

*Ye-ee, tei eligili odoo sabolo osoloso Pelisi odoo!*

*(Luka 11:39-52; 20:47)*

<sup>13</sup> “Tei eligili odoo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo edebeeyo Godeeye wiligi doloso badeli goo mapoo gadilei eli poolone ka doga. Osoloso niba nose omapoo koo gadili.

[  
<sup>14</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo sobo bauwe diba ebilame gamene takoloso, dia moso sabolo bi sabolo niyo toloso omapoo dobolone, nibada goo gagaloso Godee mapoo taka diya sageliso, odoo aboso niba tekepo odoo dee goolame. Esiga goo egeesi maga niba nei dala toowa talaiso.]

<sup>15</sup> Tei eligili odoo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, Yu odoonee oso see Yu odoo dalame niyo mipoo hamapoo odoo esiamo silesibiliga. Osoloso niyo odoo hee toloso goo tokenee niyo eligi oso yo diya tokenee peliso. Goo egeese moodoo oso niyo yo Dou mi mapoo ido duso. Bei, goo tokenee yayo

23:3: Mal 2:7-8    23:5: Mat 6:1; Exo 13:9; Deut 6:8; Num 15:38-39    \* 23:5: *kali dugo su mapoo ti sage bagagoolo* - Edebeeyo ti sage hagee ogoloso, Pelisi odoo diba Godeeyo howo woola medee tekepo, dee gweliso.    23:11: Mat 20:26; Maka 9:35; Luka 22:26    23:12: Job 22:29; Prov 29:23; Luka 14:11; 18:14

too oso goo tokenee niyo too ee dagadileso moloso.

<sup>16</sup> Niba odoo howo neliga oso odoo abo gilimado di masi gilimado duso. Esiga Godeeye nimapoo dala toowa tenelaiso. Bei, niyo egeesee eligiliso, 'Odoos heeso to magolone tei moso eyo hu sabolo tei yeli ee goo haga toowanee,' deliso. 'Esino edebeeyo tei moso ma kulodu molee egee molo eyo hu sabolo tei yeli goo ono diya toowa,' deliso. 'Esiga see hamamee to magoo ee na gababie,' deliso.

<sup>17</sup> Niba howo neliga boobada odoo. Molee ee goo haga toowanee. Esino tei moso tegei oso goo diya toowa ka moloso. Bei, molee oso tei moso ma kulodu mologa, molee egee Godeeyo doloso ka moloso.

<sup>18</sup> Osoloso niyo see egeesee eligiliso, 'Odoos heeso to magolone Godee mapoo emegei di bi tenelame nei sili dosulu tei moso ma kulodu egee molo eyo hu sabolo tei yeli ee goo haga toowanee,' deliso. 'Esino yayo to magolone dosulu mapoo emegei di bi magoo eyo hu sabolo tei yaga, goo ono diya toowa,' deliso. 'Esiga see hamamee to magoo ee na gababie,' deliso.

<sup>19</sup> Niba odoo howo neliga masi. Tei moso ma kulodu bi dosulu mapoo egee molo oso goo toowa koo moloso. Esino dosulu oso goo toowa ka moloso. Bei, emegei di bi teneli ee dosulu mapoo mologa, Godeeyo doloso ka moloso.

<sup>20</sup> Esiga odoo agayo to magolone dosulu eyo hu sabolo tei yaga, yo hedebe dosulu eyo hu sabolo koo yeli. Esino yo dosulu eyo hu sabolo osoloso dosulu mapoo emegei di bi magoo eyo hu sabolo tei ka yeli.

<sup>21</sup> Esiga odoo agayo to magolone tei moso eyo hu sabolo tei yaga, yo hedebe tei moso eyo hu sabolo koo yeli. Esino yo tei moso eyo hu sabolo osoloso ee ma kulodu badeli Godeeyo hu sabolo tei ka yeli.

<sup>22</sup> Osoloso odoo agayo to magolone Kei mi eyo hu sabolo tei yaga, yo hedebe Kei mi eyo hu sabolo koo yeli. Esino Godeeyo hu sabolo osoloso yayo bili eyo hu sabolo tei ka yaso.

<sup>23</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo Godee mapoo emegei di bi tenelame kobu sabolo, osoloso nai sabolo, osoloso bi abo pepuso mooloogoo 10 egeesi mage-liso. Osoloso 10 ee ma kulodu hedebe Godee mapoo tenelone debeliso. Esino nei tei magoo ee ma kulodu goo toowa egee molo ee talai boobado bigiliso. Goo ee, tekepo goo talai, osoloso emegei sooloo deli goo, osoloso tei talai goo. Esiga goo toowa hagee tolone medee ka debee. Egeeseelone goo pepuso talai na boobado bigi.

<sup>24</sup> Niba odoo howo neliga oso odoo abo gilimado di masi ka gilimado duso. Niba kababoo nibada wo mapoo badoga ogoloso peegoo habigiliso. Esino kemol be toowa oso nibada mudugiyopoo tiamologa egelega poogoloso wulo sooloogeliso.

<sup>25</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, nibada kapu sabolo osoloso peleta ee hedebe kolo ee hapoolone kulodu hapel-ega pegeli, niba egeesi masi doso. Bei, niyo hedebe kolo ono hapeli. Esino nibada sooloo ma kulodu bi goomegeli goo oso diya bei moloso. Osoloso niyo hedebe niso goomegeli goo ee tomo silesibiliso.

<sup>26</sup> Pelisi odoo niba howo neliga odoo. Niba daga nibada kapu sabolo osoloso peleta kulodu hapege. Egeeseega, kolo onosee dasegelega heliye malaiso.

<sup>27</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niba odoo bi medee mopoodoo doloso meli egeesi masi doso. Bei, odoo bi ee dokodoo medee tekepo mopoodoo deliso. Esino odoo bi ee ma kulodu odoo wediayo ki sabolo ku sabolo bei meliso.

<sup>28</sup> Egeeseelone odoo aboso niba ogoloso niba odoo tekepo gweliso. Esino niba goo bakadio gweli odoo. Bei, nibada kulodu goo tokenee bei moloso.

<sup>29</sup> Tei eligili odoo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo Godee maga to toloso kokodo takomo sili odoo wedia dia bi ma dokodoo moso pepuso tegegaloso mopoodoo doloso doso. Egeeseelone Godeeyo howo woola tekepo debeli odoo oso wedia eyo bi sabolo niyo medee mopoodoo doloso doso.

<sup>30</sup> Osoloso niyo see egeesee takolone doso, 'Ibada amawe diayo debei biame omapoo iba debei diepi, ibada amawe diayo Godee maga to toloso kokodo takomo sili odoo ee piligu sabolo hodobo hedebe delega pegeliyo,' deeso.

<sup>31</sup> Esino niyo egeesee taka goo oso niso nediliyo takolone, Godee maga to toloso kokodo takomo sili odoo ee wooloomali odoo ee nibada amawe dio dee ka takooso.

<sup>32</sup> Esiga goo tokenee namawe diayo bei mooloogoloso poogoo ee see niyo hosude.

<sup>33</sup> Niba hebiseyo owolo dio masi. Niba Dou mi mapoo egee du peegoo pia dabalai goolesomo?

<sup>34</sup> Esiga ayo nimapoo Godee maga to toloso kokodo takomo sili odoo, osoloso goo goolee tekepo gweli odoo, osoloso Godeeyo to eligili odoo sibeye dalaiso. Esino niyo odoo abo piligileiso. Osoloso abo homo bulubo magoo ma dokodoo yoguso enigileiso. Osoloso odoo abo Yu odoo dia howo gisili moso ma kulodu woolaiso. Osoloso odoo abo niyo dala tenelone dobolone, mi hee maga mi hee mapoo hasiso bugu dolone dabalaiso.

<sup>35</sup> Esiga mipoo hamapoo nibada amawe diayo Godeeyo howo woola tekepo debeli odoo ee piligimo simiso. Egeeseelone diayo odoo tekepo Eibol woolooma maga bei mooloogooloso abaga simino Belekaya eyo owolo Sekalaya wooloomaso. Esiga diayo Sekalaya tei moso ogo osoloso Godee mapoo gala hu wooloso sili dosulu ogo doloso domopoo tobudume wooloomaso. Esiga nibada amawe dio oso daga hoogoo Godeeyo howo woola tekepo debeli odoo piligu eyo nei dala niyo talaiso.

<sup>36</sup> Esiga ayo nimapoo taka. Yu odoo epedee hagee do niyo, nibada amawe dio

eyo tokenee eyo nei niyo talaiso.”

*Yesuye Yelusalem maga goohele  
(Luka 13:34-35)*

<sup>37</sup> “Yelusalem odoo, niba kasi maga Godee maga to toloso kokodo takomo sili odoo ee piliguloso, Godeeye nimapoo diye di odoo ee yoso ka enigeliyo? Kolokoloso o pe gilimadoloso medee egee wuo egeesee selame, ayo biame susuga nowolo dio gilimadalai goomegeliso. Esino niba koo goomegelina.

<sup>38</sup> Esiga Yelusalem odoo, niba dui. Nibada tei moso tegei ee Godeeye poogoo duga, moso egee mosoowe malaiso.

<sup>39</sup> Esiga ayo nimapoo taka. Niyo a see agalaime. Esino biame oso siboga niyo egeesee takalaiso, 'Odo Godeeyo hu maga kitulugu sabolo egee sibo Godeeye yimapoo goomogoso,' dalaiso. Biame omapoo niyo a see agalaiso.”

## 24

*Yesuye tei moso tegei guobigilei eyo goo ee taka*

*(Maka 13:1-2; Luka 21:5-6)*

<sup>1</sup> Yesu tei moso poogoo dileso dimolome, o hamamee dili odoo oso yimapoo sibilesos egeesee takaso, “Tei moso tekepo tegei hagee ege,” diso.

<sup>2</sup> Esemee Yesuye egeesee takaso, “Niba goo susuga hagee medee ege. Ayo nimapoo taka. Moso hamapoo yo hedebeso yo hee ma tobudoo molo agalaime. Esino yo susuga mi mapoo misigeduboloso molo agalaiso,” diso.

*Dala goo oso bei mooloogalai biame  
(Maka 13:3-23; Luka 21:7-24)*

<sup>3</sup> Osoloso Yesu Olipi mubi ma dokodoo peleso badoboome, o hamamee dili odoo dibusomo sibilesos yimapoo egeesee woosaso, “Tei moso guobigilei ogo biameso ka guobigileiyo? Osoloso nayo sibilei mologa, malalo ogo gooso ka peledabalaiyo? Osoloso mi hoo pagalai mologa, daga ogo gooso imapoo ka eligileiyo? Nayo imapoo takee.”

<sup>4</sup> Esemе Yesuye see dimapoo egeesee takaso, “Niba obeeyamo! Odoо heeso tei goodee maga niba peegoo gilimado diyaga.

<sup>5</sup> Bei, odoо aboso mo hu maga sibilesо takolone dieso nediliyo diba Kelisoso, dee takalaiso. Egeeseelone diayo odoо bei tei goo maga peegoo gilimado dileiso.

<sup>6</sup> Esiga ha too goo sabolo osoloso biliga goo oso peledoboomo duga goo ee dulosо, niba haga na ebi. Bei, goo hageesi oso daga malalo peledabalaiso. Esino biame egee hoo poogoo osonee, hamamee sibileiso.

<sup>7</sup> Mi toowa heeso mi toowa hee sabolo ha talaiso. Biame omapoo mi susuga mapoo nei mauwe pagalaiso. Osoloso mi susuga mapoo mibia toowa sibileiso.

<sup>8</sup> Goo hagoso peledobooga, dala biame oso bei mooloogolone ka seeso.

<sup>9</sup> Egeesi ma kulodu odoо aboso nimapoo dala teneloso niba piligilame odoо abo mapoo tenelaiso. Osoloso niyo amapoo tei too goo omaga odoо susuga oso nimapoo heiga toowa malaiso.

<sup>10</sup> Biame omapoo odoо aboso tei too goo ee pagalaiso. Egeeseelone diayo emegei tei too odoо ee hegilone, diba ha teli odoо mapoo tiasalaiso.

<sup>11</sup> Osoloso gamenee godee maga to tolosо kokodo takomo sili odoо aboso sibilesо odoо abo peegoo gilimado dileiso.

<sup>12</sup> Egeesi ma kulodu goo tokenee goo oso diya toowa dolone, edebeeyo emegei sooloo deli goo ee me pagalaiso.

<sup>13</sup> Esino odoо agayo o tei too medee kibiloso badolone hoo poogoo mapoo dileso peledobooga, yo badoboso kookaiyo gie badeli talaiso.

<sup>14</sup> Esiga mipoo hamapoo to tekepo Godeeye wiligi doloso badeli goo ee odoо susuga oso dulame takomo dileiso. Osoloso to tekepo hagee odoо susuga oso olo dulugaloso doga, mi hoo pagalai biame omapoo peledabalaiso.

<sup>15</sup> Esiga hesigeli odoо, no to hageeyo bei medee gooleede. Bei, Godee maga to

toloso kokodo takomo sili odoо Daniyeleeye egeesee takaso, ‘Niba bi diya tokenee mudu opusomo di oso tei moso ma kulodu molo agalaiso. Esiga bi ogoso Godeeyo howo woola tei moso tokenee palaiso,’ diso.

<sup>16</sup> Egeeseega Yudiya mi toowa mapoo debeli odoо oso bi mudu opusomo di ee ogoga mubi ma dokodoo kukulo pele.

<sup>17</sup> Osoloso biame omapoo odoо moso hau mapoo badoga, see moso kulodu gadilesо o bi na te.

<sup>18</sup> Osoloso odoо homolee ma kulodu siloga, o gidei talame mosopoo see na wedi di.

<sup>19</sup> Osoloso biame omapoo sobo koowasi sabolo, osoloso holope too nedili sobo ee kukulo dilei diya kalawa toowa molo agalaiso.

<sup>20</sup> Esiga Godee mapoo takee, niyo kukulo dilei biame ee wau biame o, iyo hasali biame omapoo peledebelega pagalame.

<sup>21</sup> Bei, biame omapoo dala toowa oso sibileiso. Esiga mi bei mooloogoo biame abaga simino epedee hamapoo, odoо susuga oso dala goo hageesi egele. Esino dala goo toowa hagoso sibilesо koodobuoga, hamamee dala goo hageesi see agalaime.

<sup>22</sup> Esino dala biame hagee see Godeeye deiyepo moodoolaiso. Bei, yayo biame sage magoo diepi, odoо heeso dala ee ma kulodu badalai tebile pegeliyo. Esino dala ee ma kulodu Godee eyo hesiga odoо ee halo, yayo biame see deiyepo moodoolaiso.

<sup>23</sup> Biame omapoo odoо heeso sibilesо nimapoo takolone, ‘Hamapoo ege, Keliso hagoso’ o, ‘Koo ege, Keliso ogoso,’ dee takooga, o to mapoo tei na te.

<sup>24</sup> Bei, gamenee keliso deli sabolo, osoloso gamenee godee maga to tolosо kokodo takomo sili odoо oso sibilesо goo toowa opusomo di edebeeyo howeli moodoolaiso, odoо susuga sabolo osoloso odoо Godeeye hesiga oso peegoo dia belesо kukulo agalame.

<sup>25</sup> Esiga niba medee dui. Goo hagee



peledebelega mologa, ayo daga nimapoo ka taka.

<sup>26</sup> Esiga odoo heeso nimapoo takolone, ‘Niba ege. Keliso dobudu badoso,’ dee takooga, yo agalame na di. Osoloso see yayo takolone, ‘Niba ege. Keliso moso kulodu badoso,’ dee takooga, omapoo tei na te.

<sup>27</sup> Bei, kei ebiedigaga mi toowa egee gadeebugu egeesi masi ogoga, niyo Odoo Holo a sibo agalaiso.

<sup>28</sup> Osoloso mi hee mapoo hune mologa, kukodeeso hune egee nalame omapoo busiliso.”

*Odoo Holo oso sibilei*

(Maka 13:24-37; Luka 21:25-36; 17:26-36)

<sup>29</sup> “Osoloso hamamee haga booloogel-ega dala biame hagoso dileso koodobuoga, ‘osoko semelaiso.

Egeeseega anosee gadeebigileime.

Osoloso giwo kei ma dokodoo egee molo mi hamapoo tigidibileiso.

Osoloso kei ma dokodoo kitulugu bi egee molo Godeeye halabuga ki me pagalaiso.’

<sup>30</sup> Osoloso biame omapoo Odoo Holo ayo sibilei eyo goo ee kei ma dokodooga eligiga, odoo susuga oso agalaiso. Eseege odoo susuga oso goohele sabolo pupusig-ileiso. Egeesi ma kulodu odoo susuga oso Odoo Holo ayo kolobo maga gadeebugu sabolo osoloso kitulugu toowa sabolo siboga agalaiso.

<sup>31</sup> Osoloso kibu neligidi iga, ayo mo momaiye diye dalaiso, diayo dileso odoo susuga Godeeye hesiga mi susuga mapoo egee do ee gilimalame.

<sup>32</sup> Osoloso niba sogai maga goo hagee medee gooleede. Sogai du pisigaga ogoloso wau biame koola tooboo doloso gooleedeliso.

<sup>33</sup> Esiga goo hagee egeesi masi moloso. Goo ayo taka hagoso peledaba ogoga, Odoo Holo ayo sibilei olo koola tooboo doloso niba olo gooleedalaiso.

<sup>34</sup> Ayo nimapoo taka. Odoo epedee hamapoo egee do diba osee doga goo susuga hagoso peledaba ee diba agalaiso.

<sup>35</sup> Esiga kei sabolo mipoo sabolo mauwe pagalaiso. Esino mo to me pagalaime.

<sup>36</sup> Esiga Odoo Holo ayo sibilei biame ee odoo hee gooleede. Osoloso Godeeyo momaiye Kei mi ma dokodoo egee do sabolo osoloso Godeeyo owolo anosee gooleede. Esino hedebe mo Ma Godeeye biame egee gooleedoloso ka badoso.

<sup>37</sup> Esiga Nowaye badebei biame omapoo goo peledaba goo hedebe egeesi masi oso Odoo Holo ayo sibilei biame mapoo peledabalaiso.

<sup>38</sup> Bei, Nowaye badebei biame omapoo, howo duwelega molome odoo susuga oso nei sabolo howo sabolo nolone dobolone sobo hulone debeiso. Diba egeeseelone doboome, biame heeso Nowa du toowa ma kulodu gadiso.

<sup>39</sup> Nowa du toowa ma kulodu gadime, odoo susuga oso goo peledabalai ee kibiya gooleedelega doboome, howo toowa duwa oso diba howoso neso. Esiga Odoo Holo ayo sibilei biame omapoo goo hedebe hageesi oso peledabalaiso.

<sup>40</sup> Esino biame omapoo odoo bakadio homolee ma kulodu tou tomo silesiboga, odoo heeno ido polone hee omapoo pagalaiso.

<sup>41</sup> Osoloso sobo bakadio wo galaga mologa, sobo heeno ido polone hee omapoo pagalaiso.

<sup>42</sup> Esiga niba mopoodoo doloso koolone ka debee. Bei, nibada Lodee ayo sibilei biame ee niba gooleede.

<sup>43</sup> Esino niba goo hagee medee gooleede. Edebeeyo mesiyaso o moso mapoo sibilei biame ee duga, yo mopoodoo doloso badolone medee bamalaiso. Osoloso mesiya olo siboga ogoloso yo habigileiso.

<sup>44</sup> Esiga niba nose medee mopoodoo doloso ka debee. Bei, Odoo Holo ayo sibilei biame ee niba gooleede.”

**24:26:** Luka 17:23-24    **24:27:** Mat 24:37-39    **24:28:** Luka 17:37    **24:29:** Isa 13:10; 34:4; Ezek 32:7; Joel 2:10, 31; 2Pita 3:10; Yili 6:12-13    **24:30:** Zec 12:10; Yili 1:7; Dan 7:13    **24:31:** 1Kol 15:52; 1Tes 4:16    **24:34:** Mat 16:28  
**24:35:** Mat 5:18    **24:36:** Diye 1:7; 1Tes 5:1-2    **24:37:** Gen 6:5-8    **24:39:** Gen 7:21-23    **24:42:** Mat 25:13  
**24:43:** Luka 12:39-40; Yili 16:15

*Tou tekepo teli odoo sabolo osoloso tou tokenee teli odoo (Luka 12:41-48)*

<sup>45</sup> “Goo mapoo mesiloso silone tou tekepo teli odoo ee ogumo? Wiligi odoo oso odoo egeesi mapoo kitulugu tenelaiso, yayo o tou teli odoo susuga medee bolone yayo dimapoo nei nali pilame.

<sup>46</sup> Bei, wiligi odoo yo peegoo dilesos bado-boso see sibilesos ogoga, o tou teli odoo oso o tou medee tekepo too daga, yimapoo diya goomogalaiso.

<sup>47</sup> Esiga ayo nimapoo taka. Wiligi odoo oso o tou teli odoo oso tou medee tekepo too ogoloso, see yimapoo bi susuga ee yayo bamelee dalaiso.

<sup>48-49</sup> Esino tou tokenee teli odoo oso o wiligi odoo saga koo siboga eyo nediliyo egeesee takalai malaiso, ‘Mo wiligi odoo saga koo sibo,’ doloso tou teli odoo abo wooloogolone, yugune nali odoo gilimadoloso nei sabolo howo sabolo nolone dabalaiso.

<sup>50</sup> Yo egeeseemo silone mopoodoo delega badoga, o wiligi odoo omapoo sibileiso.

<sup>51</sup> Osoloso o wiligi odoo oso sibilesos yo diya wooloso peegoo habigileiso, goo bakadio gweli odoo sabolo dabalame. Osoloso diayo omapoo dobolone pisa sabolo osoloso mei gisile sabolo dabalaiso.”

## 25

*Sobo obuo 10 eyo goo maga wudu taka*

<sup>1</sup> “Biame omapoo Godeeye wiligi doloso badeli goo oso sibilei ee egeesi masi malaiso. Sobo obuo 10 oso dia keme tolosos gisobu hulame siboga, yo tugodalame diso.

<sup>2</sup> Osoloso dima kulodu sobo abo 5 ee goo medee koo gweli. Esino sobo abo 5 ee goo medee gweli.

<sup>3</sup> Egeesi ma kulodu sobo abo goo medee koo gweli oso dia keme howo keesolosos dulone, howo abo telega diyadeeso.

<sup>4</sup> Esino sobo goo medee gweli oso dia keme sabolo osoloso howo abo keesos sabolo tolosos diyadeeso.

<sup>5</sup> Diba dilesos balaga meleeno, odoo sobo hulei ee saga sibile. Esemee diba diya tila poogoome tiesasos.

<sup>6</sup> Osoloso gesi domo mapoo odoo heeso to neligidi egeesee takasos, ‘Sobo hulei odoo ee olo koola sibo. Esiga niba dilesos yo tugode,’ dee takasos.

<sup>7</sup> Esemee sobo obuo susuga tiesamelee maga hogogabulosos dia keme wiki medee pailame hoo kookoosos.

<sup>8</sup> Esino sobo obuo goo medee koo gweli oso sobo goo medee gweli mapoo egeesee takasos, ‘Ibada keme howo olo hosudalaso. Esiga niyo iba howo tenee,’ diso.

<sup>9</sup> Esemee goo medee gweli sobo obuo oso nei dimapoo egeesee takasos, ‘Haye. Iyo ibada howo nibada keme mapoo keesoga, iba howo tebileime. Esiga niba howo abo neisos talame bi teli mosos mapoo diyadee,’ diso.

<sup>10</sup> Esemee diba howo talame dime, odoo sobo hulei ee sibilesos peledabaso. Esemee goo medee gweli sobo obuo yo bamelee diba yibolos hodobos nei nalame mosos kulodu galagadisos. Diba mosos kulodu do-boome, osulos kisisos.

<sup>11</sup> Esino sobo obuo goo medee koo gweli diba hamamee sibilesos osulos mapoo kalamadulone egeesee takasos, ‘Wiligi odoo, osulos yade, iba mosos kulodu gasibileiya,’ dee takaga meleesos.

<sup>12</sup> Esino odoo sobo hulame simi oso nei dimapoo egeesee takasos, ‘Haye. Niba gasibileime. Bei, ayo nimapoo tei taka. A niba gooleedele,’ dee takasos.

<sup>13</sup> Esiga niba medee koolone ka debee. Bei, Odoo Holo ayo sibilei biame ee niba gooleedele.”

*Tou teli odoo bakadio hedebe di eyo goo maga wudu taka (Luka 19:11-27)*

<sup>14</sup> “Osoloso Godeeye wiligi doloso badeli goo ee egeesi masi malaisos. Wiligi odoo oso mi eli sage mapoo dilame, o tou teli odoo gilimadoosos. Osoloso dimapoo o bi medee bameleeye diso.

<sup>15</sup> Egeeseelone yayo o tou teli odoo mapoo molee tenelone dia goo goolee

sabolo teiba teneeso. Egeesee solone yayo odoo hee mapoo molee ko 5,000 teneeso. Osoloso odoo hee yima hamamee taba mapoo molee ko 2,000 teneeso. Osoloso odoo hee ee ma hamamee taba mapoo molee ko 1,000 teneeso. Osoloso yo see mi eli sage mapoo diso.

<sup>16</sup> Esem e o tou teli odoo molee ko 5,000 too odoo oso molee egee toloso dilesa bi neiso teli moso togoloso badolone molee ko hodio 5,000 tooso.

<sup>17</sup> Osoloso molee ko 2,000 too odoo yinosee molee egee toloso dilesa bi neiso teli moso togoloso badolone molee ko hodio 2,000 tooso.

<sup>18</sup> Esino odoo hee molee ko 1,000 too yo o wiligi odoowo molee egee toloso dilesa mada mi doluguso.

<sup>19</sup> Wiligi odoo yo mi eli sage dilesa biame sage omapoo badoboso see wedi simiso. Yo sibilesa yayo molee pi odoo ee gilimadooso, molee oso goo hee moodoo beleso agalame.

<sup>20</sup> Esem e molee ko 5,000 too odoo oso molee tosibilesa egeesee takaso, 'Wiligi odoo, nayo amapoo molee ko 5,000 tenee ee see ayo abaga odoomo dino 10,000 tugodoo hagoso,' diso.

<sup>21</sup> Esem e wiligi odoo oso nei yimapoo egeesee takaso, 'No tou medee goosa teli odoo. Nayo tou tekepo too ee ogoloso a goomogoso. Esiga nayo bi pepooko medee bamelee maga nei ayo namapoo bi toowa bameleeye dalaiso. Esiga no mo moso kulodu abolo hodobo goomoga sabolo badalame gasibe,' diso.

<sup>22</sup> Esem e molee ko 2,000 too odoo yinosee molee tosibilesa egeesee takaso, 'Wiligi odoo, nayo amapoo molee ko 2,000 tenee ee see ayo abaga odoomo dino 4,000 tugodoo hagoso,' diso.

<sup>23</sup> Esem e wiligi odoo oso nei yimapoo egeesee takaso, 'No tou medee goosa teli odoo. Nayo tou tekepo too ee ogoloso a goomogo. Esiga nayo bi pepooko medee bamelee maga nei ayo namapoo bi toowa bameleeye dalaiso. Esiga no mo moso

kulodu abolo hodobo goomoga sabolo badalame gasibe,' dee takaso.

<sup>24</sup> Esem e molee ko 1,000 too odoo oso sibilesa egeesee takaso, 'Wiligi odoo, a gooleedoo, no kitulugu sabolo odoo mapoo diya seseli. Osoloso no odoo heeyo nei segei wulo goobada teli.

<sup>25</sup> Esiga a nobolo obulone nee molee oso goo hee moodelega, wulo dilesa mada mi ka dolugu. Esiga nee molee amapoo tenee ee teiba osee hagee moloso,' diso.

<sup>26</sup> Esem e o wiligi odoo oso nei yimapoo egeesee takaso, 'No tou diya tokenee teli wabada odoodo. Nayo goolee, a emegei dia nei segei wulo gooloogali gweliso.

<sup>27</sup> Esino nayo kasalame mo molee kauwulame molee bali odoo dia moso mapoo magelega ka poogoowo? Nayo mo molee omapoo magoo diepi, ayo see wedi simi biame mapoo mo molee ogoso toowa poloso mologa teliyo,' dee takaso.

<sup>28</sup> Osoloso wiligi odoo oso o odoo abo mapoo egeesee takaso, 'Niyo yimapoo molee ko 1,000 egee molo toloso see odoo molee ko 10,000 too mapoo tenee.

<sup>29</sup> Bei, odoo agayo dimapoo tenee bi ee medee bamologa, nei dimapoo bi bei tenelaiso. Esino odoo agayo dimapoo tenee bi ee medee belega poogooga, bi susuga dimapoo egee molo see padaga dalaiso.

<sup>30</sup> Esiga tou too tokenee bali odoo ee peego neliga ma kulodu togobigi. Osoloso yo omapoo pisa sabolo badolone mei gisile sabolo badalaiso.'"

### *Goo midilei biame*

<sup>31</sup> "Odo Holo ayo kitulugu sabolo osoloso Godeeyo momaiye susuga sabolo siboga, biame omapoo ayo toowa doloso badeli goo omaga gadeebugu sabolo sibilesa ayo wiligi doloso bili mapoo badalaiso.

<sup>32</sup> Osoloso mi opusomo opusomo di mapoo debeli odoo susuga ee Godeeyo momaiye oso gilimado sibilesa mo mudugiyopoo mooloogoodalaiso. Osoloso be bali odoo oso o be domo puloso sipi be dibusomo pi, osoloso gout be dibusomo

pi deli, egeesi masi solone ayo mi odoosusuga domo puloso mooloogoodoo bakadio moodolaiso.

<sup>33</sup> Egeeseelone ayo odoosusuga domo puloso mooloogoodoo hee sipi be masi ee mo dee deede dokolo mapoo sibilesomooloogoode, osolosoo doosusuga domo puloso mooloogoodoo hee gout be masi ee mo dee doobusu dokolo mapoo sibilesomooloogoode, dee takalaiso.

<sup>34</sup> Osoloso wiligi odoosusuga domo puloso mooloogoodoo hee sipi be masi ee mo dee deede dokolo mapoo egeesetakalaiso, 'Mo Maye goomegeli odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

<sup>35</sup> Bei, a hodume niyo amapoo nei teneliso. Osoloso a howo na poogoome niyo amapoo howo keneliso. Osoloso a odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

<sup>36</sup> Osoloso a boodo diwe badoboome, niyo amapoo dugo kalame teneliso. Osolosoa paiye badoboome, niyo a medee baliso. Osolosoa neliga mosoma kulodu badoboome, niyo a agalame sibiliso,' dee takalaiso.

<sup>37</sup> Osoloso Godeeyo howo woola odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

<sup>38</sup> Osoloso kopolone no odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

<sup>39</sup> Osoloso kopolone no paiye badoboome, iyo no ogoloso medee ka bameleeyo? Osolosoa neliga mosoma kulodu badoboome, iyo no agalame ka simiyo?' dee takalaiso.

<sup>40</sup> Osoloso wiligi odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

pidimenee ee, niyo a pidi masi pidi,' dee takalaiso.

<sup>41</sup> Osoloso wiligi odoosusuga domo puloso mooloogoodoo hee sipi be masi ee mo dee doobusu dokolo mapoo egeesetakalaiso, 'Niba amaga peegoo diyadee. Bei, niba Godeeyo kamana ma hemidu doso. Esiga Godeeye Saiten sabolo osolosoo momaiye sabolo dou koo semili mopoodoo dolosomagoo mapoo dabalame diyadee.

<sup>42</sup> Bei, a hodume niyo amapoo nei tenele. Osolosoa howo na paga badoboome, niyo a howo kenele.

<sup>43</sup> Osoloso a odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

<sup>44</sup> Egeeseega diayo nei egeesetakalaiso, 'Lodee, kopolone no hodia sabolo osolosoa howo na paga badoboome iyo no ka egeiyo? Osolosoa kopolone no odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

<sup>45</sup> Osoloso wiligi odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

<sup>46</sup> Esiga odoosusuga domo puloso mooloogoodoo hee sipi be masi ee mo dee doobusu dokolo mapoo sibilesomooloogoode, dee takalaiso.

## 26

*Yesu wooloomalame to mou  
(Maka 14:1-2; Luka 22:1-2; Yon 11:45-53)*



<sup>1</sup> Yesuye goo susuga hagee taka koodobuloso see o hamamee dili odo mapoo egeese takaso,

<sup>2</sup> “Niba olo gooleedooso, Godeeye Gababia wo nalai ee bei mooloogalai biame hoogoo bakadio moloso. Osoloso biame omapoo Odo Holo a homo bulubo magoo ma dokodoo yoguso enigilame ha teli odo mapoo tiasalaise,” dee takaso.

<sup>3</sup> Osoloso biame omapoo Yu odoowo wiligi odo tebisa sabolo, osoloso tei moso eyo wiligi odo tebisa, diayo dia wiligi odo Kayapaseeyo moso mapoo mooloogoodoloso to mouso.

<sup>4</sup> Diayo gamenee goo maga Yesu toloso wooloomalame mada to mouso.

<sup>5</sup> Osoloso diayo egeese takaso, “Iyo Gababia wo ne biame mapoo yo wooloomalame. Bei, odo susuga oso dimapoo komonolone biligiyaga,” diso.

*Betani mi mapoo soboso mopoodoo soo medee tekepo oso Yesuwo wiligi mapoo soo (Maka 14:3-9; Yon 12:1-8)*

<sup>6</sup> Yesu Betani mi mapoo badolone, odo daga agagisa bia Yesuye tekepo pa Saimonowo moso mapoo palaso.

<sup>7</sup> Yo omapoo nei nolone badoboome, sobo heeso kapu yoso moodoo mapoo mopoodoo soo medee tekepo keesoloso tosimiso. Yayo tosibilesu Yesuwo wiligi mapoo sooso. Mopoodoo soo hagee molee toowaso teli.

<sup>8</sup> Esem Yesu o hamamee dili odo oso goo hagee ogoloso diya komonolone egeese takaso, “Bei kasalame sobo hagoso mopoodoo soo medee tekepo ee wulo goo mauwe yimapoo soomeleso ka hosudoowo?”

<sup>9</sup> Yayo mopoodoo soo medee tekepo hagee odo mapoo neiso talame tenee diepi, molee toowa toloso bi mauwe odo mapoo tenelai tebiliyo,” diso.

<sup>10</sup> Esino Yesuye diayo gowe goo ee ogoloso dimapoo egeese takaso, “Sobo hagoso goo moodoo hagee ogoloso yimapoo to tokenee na takee. Bei, yayo amapoo goo tekepo moodoo.

<sup>11</sup> Esiga bi mauwe odo ee biame susuga nibolo hodobo dabalaise. Esino a biame susuga nibolo hodobo badalaimo.

<sup>12</sup> Yayo mopoodoo soo egee mo wiligi mapoo soo oso mo suso bi ma kulodu malai ee mopoodoo doo.

<sup>13</sup> Ayo nimapoo ka taka. Edebeeyo mi kamapoo Godeeyo to tekepo takooga, diayo sobo hagoso goo moodoo onosee takalaise. Osoloso edebeeyo o goo onosee osee goolee malaise.”

*Yudaseeye Yesu tiasalame goomoga magoo (Maka 14:10-11; Luka 22:3-6)*

<sup>14</sup> Osoloso Yesu o hamamee dili odo 12 ee ma kulodu badeli odo hee Yudas-Iskaliyoteeye tei moso wiligi odo tebisa mapoo dilesu egeese takaso,

<sup>15</sup> “Ayo Yesu nimapoo tiasoga, niyo amapoo nei ogo bi tenelaisomo?” diso. Esem diayo nei molee ko 30 yimapoo teneeso.

<sup>16</sup> Esem domo omaga bei mooloogoloso Yudaseeye Yesu dimapoo tiasalame eli esiamo sileeso.

*Yesuye o hamamee dili odo sabolo Godeeye Gababia wo ne (Maka 14:12-21; Luka 22:7-13, 21-23; Yon 13:21-30)*

<sup>17</sup> Isipi mi maga peegoo di ee gooleebugu wo ne bei mooloogoo biame mapoo, Yesu o hamamee dili odo oso dilesu Yesu mapoo egeese takaso, “Iba mi kamapoo dilesu Gababia wo nalai ka mopoodoo dalaiyo?” dee takaso.

<sup>18</sup> Esem Yesuye nei egeese takaso, “Niba Yelusalem mi mapoo dilesu odo hee ogoloso yimapoo egeese takee, ‘Eligili odo oso egeese taka: Mo biame Godeeye hesia ee olo koola tooboogona. Esiga ayo mo hamamee dili odo gilimadoloso nee moso mapoo Gababia wo ka nalaigona,’ dee takee.”

<sup>19</sup> Yesuye egeese taka duloso o to ee dodolone o hamamee dili odo oso dilesu Gababia wo nalame mopoodoo dooso.

<sup>20</sup> Osoloso habe Yesuye o hamamee dili odo gilimadoloso wo nalame bulumaso.

<sup>21</sup> Diba omapoo nei nolone dobolone Yesuye egeesee takaso, “Ayo nimapoo taka. Nimaga odoo heeso a ha teli odoo mapoo tiasalaiso,” diso.

<sup>22</sup> Yesu o hamamee dili odoo oso to hagee duloso goohele sabolo dobolone Yesu mapoo egeesee takaso, “Lodee, ayowo?” dee takaga meleeso.

<sup>23</sup> Yesuye nei dimapoo egeesee takaso, “Odo agayo mo peleta mapoo abolo hodobo wo olugudoloso naga, a ha teli mapoo tiasalai odoo ogoso.

<sup>24</sup> Esino Godeeyo to booka mapoo hogugu oso taka ee dodolone, Odo Holo a talaiso. Esino Odo Holo a ha teli odoo mapoo tiaseli odoo yo dala toowa talaiso. Oweeye yo soomagelega poogoo diepi, yo dala tele pegeliyo.”

<sup>25</sup> Esem Yesu ha teli odoo mapoo tiaseli Yudaseeye egeesee takaso, “Eligili odoo, ayowo?” diso. Esem Yesuye nei yimapoo egeesee takaso, “O. No olo egee takooso,” dee takaso.

*Lodee gooleebugu wo ne*

*(Maka 14:22-26; Luka 22:19-20; 1Kol 11:23-25)*

<sup>26</sup> Diba wo nolone doboome, Yesuye wo toloso Godee mapoo goomoga to takoloso wo popeiso. Osoloso o hamamee dili odoo mapoo wo pulone egeesee takaso, “Wo hagee toloso ne. Hagee mo suso,” diso.

<sup>27</sup> Osoloso see Yesuye kapu wain i keesoo toloso Godee mapoo goomoga to takoloso o hamamee dili odoo mapoo tenelone egeesee takaso, “Niba susuga wain i hagee ne.

<sup>28</sup> Hagee mo sawo, odoo susuga dia to-kenee hapalame ka sologo bugu. Mo sawo oso Godeeye o odoo mapoo to kitulugu magoo goo oso tei peledabalame.

<sup>29</sup> Esiga ayo nimapoo taka. Ayo epedee hamaga dulone wain i hagee see nalaimo. Esino hamamee mo Maye wiligi doloso badeli mi mapoo ayo nibolo hodobo wain i dia see nalaiso.”

<sup>30</sup> Osoloso diba goomoga kosaiya hedebe pouloso Olipi mubi mapoo diso.

*Pitaye Yesu yo boobado bigilei goo ee taka*

*(Maka 14:27-31; Luka 22:31-34; Yon 13:36-38)*

<sup>31</sup> Yesuye see tobu o hamamee dili odoo mapoo egeesee takaso, “Epei gesi odoo susuga niyo a poogoo dileiso. Bei, Godeeyo to booka mapoo hogugu oso egeesee takooso,

‘Godeeye sipi be bali odoo ee wooloomaga, sipi be susuga oso yimaga peegoo kukulo dileiso.’”

<sup>32</sup> Osoloso Yesuye see egeesee takaso, “Esino a ta maga hogado dileso, ayo daga malalo Gelili mi mapoo dileso niba balaiso.”

<sup>33</sup> Esem Pitaye nei Yesu mapoo egeesee takaso, “Odo susuga oso namaga peegoo kukulo duga, hedebe ayo no poogoo dileime,” diso.

<sup>34</sup> Esem Yesuye yimapoo egeesee takaso, “Ayo namapoo tei taka. Epei gesi kolokolo takelega mologa, nayo mo goo gagadilei bakadio hedebe dalaiso,” dee takaso.

<sup>35</sup> Esem Pitaye yimapoo egeesee takaso, “Ayo egeesee selaimo. Edebeeyo no wooloomaga, a nobolo hodobo talaiso,” diso. Esem o hamamee dili odoo susuga oso to hedebe egeesee takaso.

*Yesuye Getesemeni homolee mapoo Godee mapoo taka*

*(Maka 14:32-42; Luka 22:39-46)*

<sup>36</sup> Yesuye o hamamee dili odoo sabolo Getesemeni homolee mapoo dileso dobolone dimapoo egeesee takaso, “Niba hamapoo debee. A koo dileso Godee mapoo takalaiya,” diso.

<sup>37</sup> Yayo egeesee takoloso hedebe Pita osoloso Sebediyo owolo bakadio esee ido palaso. Yo peleso badoboome, goohele goo sabolo osoloso su hegi goo oso yimapoo simiso.

<sup>38</sup> Osoloso yayo dimapoo egeesee takaso, “Mo su ma kulodu hegi goo toowa oso molone ayo talai olo koola tooboo. Esiga niba hamapoo dobolone, abolo hodobo koolone ka bamo,” diso.

<sup>39</sup> Yesu egeesee takoloso dimaga pe-pooko hoogoo dilesa ebiso miyomoo tugusaloso balaboo tiamolone Godee mapoo takolone egeesee takaso, “Ma, no goomogoga, amapoo dala egee sibo ee nayo peegoo magee. Esino nayo goomoga goo ee moodee, ayo goomoga goonee,” dee takaso.

<sup>40</sup> Osoloso yo Godee mapoo taka koodob-ulosi dilesa egeino, o hamamee dili odoo bakadio hedebe di tiesamolome egeiso. Esememe Pita mapoo egeesee takaso, “Niba kaseega ka tiesamalala? Niba biame deiyepo mapoo abolo hodobo koolone dalalai tebledoo.

<sup>41</sup> Niba bolone Godee mapoo takolone ka debee, kukuga homodobiya. Bei, niba goo tekepo talame goomogoso. Esino nibada su oso ki me ka poogooso,” diso.

<sup>42</sup> Yo see tobu dilesa Godee mapoo takaso, “Ma, dala goo ayo talai oso a dagadilei tebile daga, a dala egee talaiso. Bei, ayo nayo goomoga goo ee talaiso.”

<sup>43</sup> Yesu see tobu dilesa Godee mapoo takoloso sibilesa egeino, o hamamee dili odoo bakadio hedebe di diba tila poogome tiesa molo egeiso.

<sup>44</sup> Osoloso Yesu see tobu bakadio hedebe di mapoo dilesa goo hedebe eyo daga taka hedebe egeesee takaso.

<sup>45</sup> Osoloso yo see wedi sibilesa o hamamee dili odoo mapoo egeesee takaso, “Niba osee tiesa molosomo? Bei, Odoo Holo a tokenee odoo mapoo tiasalai biame olo siboso.

<sup>46</sup> Esiga koo ege, a tokenee odoo mapoo tiasalai odoo ee olo sibo. Esiga niba tebise, dimapoo dimo.”

*Edebeeyo Yesu wooloomalame ido di*

*(Maka 14:43-50; Luka 22:47-53; Yon 18:3-12)*

<sup>47</sup> Yesu to osee komolome, o hamamee dili odoo hee Yudaseeye Yesu talame odoo mooloogoodoo toowa gilimado simiso. Egeesi ma kulodu tei moso wiligi odoo tebisa sabolo, osoloso Yu odoowo wiligi odoo tebisa oso Yesu talame odoo hagee bia diye diso. Esememe diayo sibulone kaiya sabolo kodolo sabolo tolosa sibadeeso.

<sup>48</sup> Egeesi ma kulodu Yudas yo epedee sibilega badolone, odoo Yesu talai mapoo yayo egeesee takaso, “Ayo dilesa adaga, odoo ogoso. Eseega niyo yo tolosa ka ido di,” diso.

<sup>49</sup> Osoloso Yudaseeye odoo gilimado sibilesa Yesu mapoo dilesa egeesee takaso, “Emegei, eligili odoo,” dee takoloso yo adaso.

<sup>50</sup> Esememe Yesuye yimapoo egeesee takaso, “Emegei, nayo goo moodoolame simi egee moodee,” diso. Esememe odoo susuga oso sibilesa Yesu tooso.

<sup>51</sup> Esino o hamamee dili odoo heeso kaiya tolosa tei moso wiligi odoo taba eyo tou teli odoo eyo dulu koososo.

<sup>52</sup> Esememe Yesuye yimapoo egeesee takaso, “Nee kaiya peegoo magee. Bei, emegei piligilame kaiya tolosa silesibili odoo ee kaiyaso piligileiso.

<sup>53</sup> Esiga niba gooledeleyo, ayo a pidilame mo Ma mapoo takooga, yayo o momaiye mooloogoodoo 12\* egeesi sabolo osoloso abo epedee saga meiyee dalaiso.

<sup>54</sup> Esino ayo egeesee seega, ayo dala tolosa talai goo ee Godeeyo toso booka maga taka sabolo kasee tebileisomo?” dee takaso.

<sup>55</sup> Esememe Yesuye yo talame sibadee odoo omapoo egeesee takaso, “Niyo ogoga a mesiya daga, a talame kaiya sabolo osoloso kodolo sabolo misigaloso ka sibiladala? Esino ayo biame susuga tei moso ma kulodu eligimo sileeme, niyo a egeliso. Esiga bei kaseme ayo omapoo eligimo sileeme niyo a telega ka poogoowo?”

<sup>56</sup> Esino niyo epei a talame simi hagoso Godee maga to tolosa kokodo takomo silesibili odoo oso taka to sabolo olo tobuoso.” Esememe biame omapoo Yesu o hamamee dili odoo susuga oso yo poogoloso kukulo diyadeeso.

*Yesu wiligi odoo tebisa mapoo ido di*

*(Maka 14:53-65; Luka 22:54-55, 63-71; Yon 18:13-14, 19-24)*

<sup>57</sup> Edebeeyo Yesu tolosa tei moso wiligi odoo taba Kayapaseeyo moso mapoo ido

**26:46:** Yon 14:31    **26:51:** Yon 18:26    **26:52:** Gen 9:6; Yili 13:10    \* **26:53:** Momaiye mooloogoodoo hedebe ee ma kulodu momaiye 6,000 egeesi meliso.    **26:55:** Luka 19:47; 21:37

palaso. Esiga moso ee ma kulodu tei eligili odoo sabolo osoloso Yu odoowo wiligi odoo tebisa oso daga olo mooloogoodoloso debeiso.

<sup>58</sup> Esememe Pitaye hamameedee Yesu deedee dileso tei moso eyo wiligi odoo taba eyo moso beele ma kulodu gadiso. Yo tei moso gidebeli odoo sabolo omapoo badolone, Yesu mapoo ogoogo mooda beleso bameleeso.

<sup>59</sup> Esememe tei moso wiligi odoo tebisa sabolo osoloso Yu odoo dia goo midili wiligi odoo tebisa oso Yesuwo goo maga gamenee takeli odoo ee esiaso, yimapoo goo tokenee hee mologa, Yesu ka wooloomalame.

<sup>60</sup> Egeeseelone edebeeyo wulo gamenee takolone Yesuwo goo maga goo opusomo opusomo di takaso. Esino diayo taka ee ma kulodu tei goo hee molo egele.

<sup>61</sup> Esememe odoo bakadio oso see hamamee sibilesa egeese takaso, “Iba Yesuye egeese takeme duso, Godeeyo tei moso hagee guobuguloso biame bakadio hedebe di ee ma kulodu see dia tegelai yimapoo kitulugu moloso, dee takeme duso.”

<sup>62</sup> Esememe tei moso wiligi odoo taba oso toboloso Yesu mapoo egeese takaso, “Odo hagee biaso nee goo maga goo opusomo opusomo di egee takoo mapoo nayo to eyo nei takalaimayo?” diso.

<sup>63</sup> Esino Yesu to hee takele. Esememe tei moso wiligi odoo taba oso see tobu yimapoo egeese takaso, “Ayo gie badeli Godeeyo hu maga namapoo ka taka. No tei Godeeyo owolo Kelisosomo? Imapoo takee,” diso.

<sup>64</sup> Yesuye to nei yimapoo egeese takaso, “O. Nayo olo egee takooso. Esino ayo nimapoo takooso. Hamamee niyo Odo Holo a Kitulugu Godeeyo dee deedee dokolo mapoo badoga agalaiso. Osoloso ayo kei ma dokodooga kolobo maga siboga agalaiso,” dee takaso.

<sup>65</sup> Esememe tei moso wiligi odoo taba oso to hagee duloso diya gowoolone, o dugo tologo bugulone egeese takaso, “Odo hagos Godeeyo goo maga to tokenee

takoo. Esiga iyo o goo see midilame to abo taka ee dulei koo goomogo. Bei, yayo Godeeyo goo maga to tokenee taka niba olo duso.

<sup>66</sup> Esiga niyo yimapoo ogoogo moodolai gooleedo?” diso.

Esememe tei eligili odoo sabolo osoloso Yu odoo dia wiligi odoo tebisa oso nei egeese takaso, “Yo tokenee olo tooso, esiga yo talai tekepo,” dee takaso.

<sup>67</sup> Osoloso diayo yo manolone o mudu mapoo magawo paganiso. Osoloso diayo o howo dugoso gagaloso, yo woolone yimapoo egeese takaso,

<sup>68</sup> “Keliso, no tei Godee maga to toloso kokodo takomo sili odoo daga, no odoo agayo woolo?” dee takaga meleeso.

### *Pitaye Yesuwo goo gagadi*

*(Maka 14:66-72; Luka 22:56-62; Yon 18:15-18, 25-27)*

<sup>69</sup> Pita epedee moso pee mapoo osee badoboome, tei moso wiligi odoo taba o tou teli sobo heeso sibilesa yimapoo egeese takaso, “Nonosee Gelili odoo Yesu bolo silee odoo hee noso,” dee takaso.

<sup>70</sup> Esememe Pitaye odoo susuga eyo howo woola egeese takaso, “Nayo egee takoo goo ee a gooleedele,” diso.

<sup>71</sup> Osoloso yo dileso moso beele osulu miyopoo tobudume, tou teli sobo heeso yo ogoloso odoo abo omapoo tebisamelee mapoo egeese takaso, “Odo hagee Nasalet odoo Yesu bolo sileeso,” dee takaso.

<sup>72</sup> Esememe Pitaye see to kitulugu sabolo egeese takaso, “A tei goo taka. Odo egeeyo goo a gooleedele,” diso.

<sup>73</sup> Biame deiyepo poogoloso hamamee odoo susuga omapoo tebisamelee oso sibilesa Pita mapoo egeese takaso, “No tei Yesubolo silee odoo hee noso. Bei, nayo to egee ko ee Gelili odoo oso to keli egeese masi ko. Esiga nayo to kei oso nee goo ee yilige buguso,” diso.

<sup>74</sup> Esememe Pitaye to kitulugu sabolo dimapoo egeese takaso, “Ayo Godeeyo hu hesilone tei taka. Odo egee a gooleedele,”



diso. Pitaye egeesee takoloso badoboome kolokolo takaso.

<sup>75</sup> Esemé Pita kolokolo taka duloso Yesuye taka to ee gooleebuguso. Bei, Yesuye yimapoo egeesee taka, “Kolokolo takelega mologa, nayo mo goo gagadi bakadio hedebe dalaiso,” diso. Esemé yo to egee gooleebuguloso peegoo gadilesi diya gooholone pisaso.

## 27

### *Yudas eyo nediliyo woolooma*

<sup>1</sup> Gesikolodee mapoo tei moso wiligi odoó tebisa susuga sabolo, osoloso Yu odoó dia wiligi odoó tebisa susuga oso to mouloso, Yesu wooloomalame goomoga magooso.

<sup>2</sup> Osoloso diayo Yesuwo dee tiso tiegisaloso gamalee wiligi odoó taba Pailteeye badebei mapoo ido dileso yimapoo teneeso.

<sup>3</sup> Yesu tiaseli odoó Yudaseeye Yesu tei olo wooloomalame badebei goo ee duloso, diya gooheselo. Esemé molee ko 30 yayo too ee see tei moso wiligi odoó tebisa sabolo, osoloso Yu odoó dia wiligi odoó tebisa mapoo tenelame diso.

<sup>4</sup> Yayo dileso dimapoo egeesee takaso, “Ayo odoó goo tokenee mauwe nimapoo tiasoo maga, a goo tokenee olo tooso,” diso. Esino wiligi odoó tebisa oso nei egeesee takaso, “Egee ibada goonee. Nee goo. Esiga no nobusomo tekepo moodee,” dee takaso.

<sup>5</sup> Egeesee taka duloso Yudaseeye molee ko egee tei moso ma kulodu kugobuguloso, see wedi dileso eyo nediliyo tiso mu mapoo bagagoloso, homo dee ma dokodooga bagagoo sooloso taso.

<sup>6</sup> Esemé tei moso wiligi odoó tebisa oso molee ko misigelone egeesee takaso, “Ibada tei magoo oso egeesee takooso, ‘Molee hagee see tosibilesi molee odoó aboso tenee sabolo hodobo magalai tei,’ deliso. Bei, molee hagee odoó wooloomalai eyo nei tenee,” dee takaso.

<sup>7</sup> Osoloso diba molee oso goo talai to magoloso bogoso sesepeni moodoogali odoó eyo mi molee ogoso tooso, Yu odoonee wedioga omapoo boulame.

<sup>8</sup> Bei egeesega odoó susuga oso mi egee takolone sawo mi deliso.

<sup>9-10</sup> Esemé biame omapoo goo hagoso Godee maga to toloso kokodo takomo sili odoó Yelemayaye taka to sabolo teibaso. Bei, yayo egeesee takaso,

“Isalael odoó diayo o su eyo nei magoo molee ko 30 ee toloso see odoó bogoso sesepeni moodoogali eyo mi ee tooso, Lodeeye amapoo taka to ee dodolone.”

### *Pailteeye Yesuwo goo midi*

(Maka 15:2-15; Luka 23:3-5, 13-25; Yon 18:33-19:16)

<sup>11</sup> Yesu Loum gamalee odoó Pailteeye badebei mapoo ido sibume, nei gamalee odoó oso yimapoo egeesee takaso, “No tei Yu odoó dia wiligi odoosomo?” diso. Esemé Yesuye yimapoo nei egeesee takaso, “O. No olo egee takooso,” dee takaso.

<sup>12</sup> Esemé tei moso wiligi odoó tebisa sabolo, osoloso Yu odoó dia wiligi odoó tebisa oso Yesuwo goo maga goo opusomo opusomo di takeme, yayo nei dimapoo to hee takele.

<sup>13</sup> Esemé Pailteeye yimapoo egeesee takaso, “Odoó susuga oso nee goo maga goo opusomo opusomo di egee takaga, no dusomo?” diso.

<sup>14</sup> Esino Yesuye to hee takelega poogoome, gamalee odoó yo goo egee ogoloso diya dio diso.

<sup>15</sup> Dugo susuga ma kulodu Pailteeye Yu odoó goomogalame, Godeeye Gababia wo ne biame mapoo odoó susuga oso goomoga odoó hee neliga moso ma kuloduga peegoo tamageeye deliso.

<sup>16</sup> Biame omapoo mesiya hedebe odoó susuga oso gooleedoo ee neliga moso ma kulodu badebeiso, o hu ee Balabas.

<sup>17</sup> Esiga odoó susuga olo mooloogoodeme, Pailteeye dimapoo egeesee woosaso, “Ayo odoó ugu ee neliga moso ma kuloduga peegoo ka tamagalaiyo?”

Balabas o, Yesu, edebeeyo Keliso deli ee tamagalaiyo?”

<sup>18</sup> Egeesi ma kulodu Yu odoo dia wiligi tebisa oso Yesu mapoo koolone, diayo Yesu yimapoo ido simi goo ee, yo ogoloso olo gooleedooso.

<sup>19</sup> Paillet goo midili odoo oso bili mapoo osee badoboome, osoboye yimapoo to tenelone egeesee takaso, “Odoo goo tokenee mauwe omapoo nayo goo hee na moodeeye. Bei, eiyo gesi ayo o goo maga sapootia diya ku tiaga,” dee takaso.

<sup>20</sup> Esino tei moso wiligi odoo tebisa sabolo, osoloso Yu odoo dia wiligi odoo tebisa oso odoo susuga mapoo toso pupulone egeesee takaso, “Paillet mapoo egeesee takee, ‘Yesu ono wooloomolone Balabas ono peegoo tamageeye,’ dee,” diso.

<sup>21</sup> Esem e Pailleteeye odoo susuga mapoo egeesee takaso, “Niba ayo odoo ogu ee neliga moso ma kuloduga peegoo tamagalai ee ka goomogolo?” Esem e odoo susuga oso nei egeesee takaso, “Balabas ono peegoo ka tamagee,” dee takaga meleeso.

<sup>22</sup> Esem e Pailleteeye egeesee takaso, “Ayo Balabas yo neliga moso ma kuloduga peegoo tamagooga, hee Yesu edebeeyo Keliso deli ee kasee moodoolaisomo?” diso.

Esem e nei odoo susuga oso to neligidi takolone egeesee takaga meleeso, “Yo homo bulubo magoo ma dokodoo yoguso enige,” dee takaso.

<sup>23</sup> Esino Pailleteeye dimapoo egeesee takaso, “Yayo ogoo goo tokenee tooga, niyo yo wooloomalame ka sala?” diso. Esino odoo susuga oso to diya neligidi egeesee takaso, “Yo homo bulubo magoo ma dokodoo yoguso enige,” demeleeso.

<sup>24</sup> Esem e odoo susuga oso Paillet yayo goomoga goo ee telega poogoome, diba komonolone biligalame see ogoloso, yo howo keedoloso odoo susuga eyo howo woola o dee hapoolone\* egeesee takaso, “Niyo odoo hagee wooloomaga, mo goonee, esino nibada goo,” dee takaso.

<sup>25</sup> Esem e odoo susuga oso egeesee takaso, “Yo wooloomaga eyo nei iyo ibada holaiso sabolo talaiso,” diso.

<sup>26</sup> Esiga Pailleteeye Balabas neliga moso maga peegoo tamagooso. Esem e yayo o ha teli odoo mapoo takolone, Yesu we tiso wooloso homo bulubo magoo ma dokodoo yoguso enige, dee takaso.

*Ha teli odooso Yesu mane  
(Maka 15:16-20; Yon 19:2-3)*

<sup>27</sup> Esem e Paillet o ha teli odoo oso Yesu we tiso wooloso Loum gamaleeyo moso mapoo ido palaso. Esem e ha teli odoo susuga sibilesu Yesu domo tobudume toboloso silodabaso.

<sup>28</sup> Diba omapoo mooloogoodoloso, Yesu manolone o dugo tigamagoloso see wiligi odoo tebisa oso kali dugo bige sage ee yimapoo kadiso.

<sup>29</sup> Osoloso we ti sidoloso o wiligi mapoo kadiloso, o dee deede mapoo homo magooso. Osoloso Yesu mapoo manolone yimapoo gauwuloso egeesee takaso, “Yu odoo dia wiligi odoo taba, iyo nee hu dokodoo poudoso,” dee takaga meleeso.

<sup>30</sup> Osoloso yimapoo magawo pogolone, homo o dee mapoo magoo ee see peedee doloso o wiligi mapoo osee woomeleeso.

<sup>31</sup> Egeesee soloso koodobuloso ha teli odoo oso dugo Yesuye ka ee tamagoloso see Yesu o dugo kadiso. Osoloso yo homo bulubo magoo ma dokodoo yoguso enigilame ido diso.

*Yesu homo bulubo magoo ma dokodoo  
yoguso eniga*

*(Maka 15:21-32; Luka 23:26-43; Yon 19:17-27)*

<sup>32</sup> Ha teli odoo oso Yesu idoloso Yelusalem mi maga peegoo gadulone, Kulene odoo Saimon tugodooso. Yo tugodoloso homo bulubo magoo Yesuye imado di ee see yayo ime diso.

<sup>33</sup> Diba abaga dino Gologota mi mapoo peledabaso. Mi hu eyo bei ee wiligi ki mi.

<sup>34</sup> Diba omapoo sibilesu Yesu mapoo wain i sabolo habili bi gal deli sabolo wuluguloso teneeso. Esino Yesuye howo egee wulo pepooko pia naloso poogooso.

<sup>27:24:</sup> Deut 21:6-9 \* <sup>27:24:</sup> **Pailleteeye o dee hapoo** eyo bei ee, Yesu woolooma ee o goo tokenee nee dolone ka hapoo. <sup>27:25:</sup> Diye 5:28 <sup>27:28:</sup> Luka 23:11 <sup>27:30:</sup> Isa 50:6 <sup>27:34:</sup> Psa 69:21 <sup>27:35:</sup> Psa 22:18

<sup>35</sup> Osoloso ha teli odoo oso Yesu homo bulubo magoo mapoo yoguso enigaloso tuluguloso, Yesu o dugo pilame diayo yoso dasigeli hee dasigaso.

<sup>36</sup> Diba Yesuwo dugo puloso omapoo dobolone yo gibadebeiso.

<sup>37</sup> Osoloso edebeeyo Yesu wooloomalai goo eyo bei ee odoo susuga oso gooleedalame, odoo heeso Yesuwo wiligi oo poogoo dokodooga to egeesee hoguguloso kalamaso,

“Hagee Yesu, Yu odoo dia wiligi odoo taba.”

<sup>38</sup> Osoloso mesiya bakadio sabolo homo bulubo magoo ma dokodoo yoguso enigaso. Odoo hee Yesu o dee deedeede dokolo tulugu, osoloso hee o dee dobusu dokolo tulugu diso.

<sup>39</sup> Osoloso odoo aboso eli omaga dulone, Yesu ogoloso manolone dia wiligi wabisaso. Osoloso diayo yimaga to tokenee yimapoo takaga meleeso.

<sup>40</sup> Egeeseelone diayo yimapoo egeesee takaso, “Nayo takolone, tei moso ee guobuguloso biame bakadio hedebe di ee ma kulodu see dia ka tegelaigona, dee taka. Esiga no tei Godeeyo Owolo daga, no homo bulubo magoo ma dokodooga miyomoo meilesa no nediliyo pidi,” dee takaga meleeso.

<sup>41</sup> Osoloso tei moso wiligi odoo tebisa sabolo, osoloso tei eligili odoo sabolo, osoloso Yu odoo dia wiligi odoo tebisa dibolosee Yesu manolone egeesee takaso,

<sup>42</sup> “Yayo odoo abono pidimo siliso. Esino yo epedee eyo nediliyo pidilei tebiledoo. Yo tei Keliso, Isalael odoo ibada wiligi odoo daga, yo homo bulubo magoo ma dokodooga miyomoo meilei tekepo. Egeeseega yayo mou ogoloso iyo yimapoo tei talaiso.

<sup>43</sup> Yo Godee mapoo tei teliso. Osoloso eyo takolone, yo Godeeyo Owolo, dee takomo siliso. Esiga iyo epedee yimapoo bamo, Godeeye goomogolone yo pida beleso agalame.”

<sup>44</sup> Goo hedebe egeesi masi moodoolone, mesiya bakadio onosee homo bulubo

magoo ma dokodoo yoguso enigaloso molone, Yesu mapoo to tokenee takaso.

*Yesuye ta*

(Maka 15:33-41; Luka 23:44-49; Yon 19:28-30)

<sup>45</sup> Osoko oo domo tooboome, mi toowa egee nolugo doloso melee osoko howo bakadio hedebe di poogoso.

<sup>46</sup> Osoloso neliga melee ee mauwe poogoome, Yesuye to neligidi egeesee iso, “Ilay, Ilay, lama sabakatani.” To hageeyo bei ee egeesi moloso, “Mo Godee, mo Godee, bei kasi maga nayo a ka pagala?”

<sup>47</sup> Esem e odoo koola omapoo tebisa melee oso to hagee duloso egeesee takaso, “Niba dui. Yo Ilaya i,” diso.

<sup>48</sup> Osoloso odoo heeso hoguo sibilesa dugo tolosa wain i mei nali mapoo olugu doloso homosage su mapoo tialogoloso Yesuye nalame o maga mapoo heligiso.

<sup>49</sup> Esem e odoo aboso egeesee takaso, “Ougo! Ilayaye sibilesa yo tolosa miyomoo mouwa beleso bamo,” diso.

<sup>50</sup> Esem e biame omapoo Yesu to neligidi idagoloso taso.

<sup>51</sup> Esem e Yesuye ta biame omapoo, tei moso tegei ma kulodu dugo kodia oso kisi melee ee, dokodooga eyo tologomo abaga mouno miyomoo sabuguso. Osoloso mi halabulone yo toowa gagabuguso.

<sup>52-53</sup> Osoloso odoo bi goodogamo diso. Esem e Godee o odoo susuga wedia ee hogaduloso see gie badeli tooso. Osoloso odoo bi poogoloso diso. Osoloso Yesu ta maga hogaduloso hamamee, Yelusalem mapoo dileso dieso nediliyo diba odoo abo mapoo eligiso.

<sup>54</sup> Esem e ha teli odoo gibadeli odoo sabolo, osoloso odoo yibolo Yesu gibadebei oso mibia simi sabolo, osoloso goo abo omapoo peledaba ogoloso diya obulone egeesee takaso, “Tei takoo, odoo hagee Godeeyo owolo doo,” diso.

<sup>55</sup> Esem e sobo abo Gelili abaga Yesubolo sibadee oso eli sage abaga Yesu homo bulubo magoo ma dokodoo molome balaga meleeso. Sobo hagee biaso Gelili abaga Yesubolo sibulone yo pidiso.

<sup>56</sup> Sobo hagee bia dima kulodu Meli-Magadalin, osoloso Yemes dio Yosep dio dibada owee Meli, osoloso Sebediyo osobo sabolo omapoo dobolone balaga meleeso.

*Yesu bi ma kulodu magoo*

(Maka 15:42-47; Luka 23:50-56; Yon 19:38-42)

<sup>57</sup> Habedee bi bei odoo hee Alimatiya mi maga simiso. O hu ee Yosep. Yinosee Yesuwo hamamee dili odoo hee yoso.

<sup>58</sup> Esiga yayo dilesa Pailet mapoo Yesuwo kou talame woosaso. Esem Paileteeye o odoo mapoo takolone, Yesuwo kou ee Yosep mapoo tenee, dee takaso.

<sup>59-60</sup> Esem Yosepeeye Yesuwo kou toloso dugo dia heliyeso tiadoloso o bi dia yo ou poogoo ee ma kulodu magooso. Osoloso wulu ou mapoo yo toowa bidigamo dilesa kisiloso diso.

<sup>61</sup> Biame omapoo Meli-Magadalin dio osoloso Meli hee dio wulu koola omapoo dobolone balaga meleeso.

*Yesuwo bi gidebei*

<sup>62-63</sup> Osoloso biame hee mapoo Yu odoowo hasali biame omapoo, tei moso wiligi odoo tebisa sabolo, osoloso Pelisi odoo oso Paileteeye badebei mapoo dilesa egeesee takaso, “Wiligi odoo, iba goo hagee gooleebuguso. Goo ee, gamenee takeli odoo Yesu hagoso gie badolone egeesee takeliso, ‘Yo bi ma kulodu biame bakadio poogoloso see biame hee mapoo hogabileiso,’ dee takeliso.

<sup>64</sup> Esiga iba goomogo, nee odoo oso biame bakadio hedebe di ee ma kulodu bi egee medee gidabalame. Bei, o hamamee dili odoo oso sibilesa o kou heli toloso see wulo gamenee takolone, Yesu olo hogaduloso dina, dee takeeyaga. Egeeseega hamamee gamenee taka goo hagoso daga yayo gamenee taka goo ee dagadileiso.”

<sup>65</sup> Esem Paileteeye egeesee takaso, “Niba mo ha teli odoo abo gilimado dilesa bi egee medee gidebee,” diso.

<sup>66</sup> Esem diba susuga dilesa bi omapoo dobolone yo ou yoso kisi mapoo eli peeso, odoo heeso mada sibilesa yo peegoo

bidibugu beleso agalame. Osoloso gidebeli odoo mapoo takolone, medee gidebeeye, dee takaso.

## 28

*Yesu ta maga hogadi*

(Maka 16:1-10; Luka 24:1-12; Yon 20:1-10)

<sup>1</sup> Yu odoowo hasali biame oso dilesa koodobuloso biame hee mapoo gesikolodee Meli-Magadalin dio osoloso Meli hee dio Yesuwo bi agalame diso.

<sup>2</sup> Diba bi mapoo diyadaga molome, haga booloogelega mibia toowa simiso. Esem Lodee o momaiye oso Kei mi ma dokodooga sibilesa yo peegoo bidi buguloso ee ma dokodoo biaso.

<sup>3</sup> Yo dugo diya heliye kaloso, o su maga diya gadee magoloso badoboome egeiso.

<sup>4</sup> Esem bi gidebeli odoo oso diya obugulone kikiliga oso homodobuloso wulo wedia masi meleeso.

<sup>5</sup> Esino momaiye oso sobo bakadio mapoo egeesee takaso, “Niba haga na ebi. A gooleedooso, niba Yesu homo bulubo magoo ma dokodoo yoguso eniga ee esiamo silesibo.

<sup>6</sup> Yo hamapoo koo moloso. Yo to eyo taka ee dodolone yo see hogado diso. Esiga niba sibilesa o kouso melee mi mapoo ege.

<sup>7</sup> Osoloso niba see saga dilesa o hamamee dili odoo mapoo egeesee takee, ‘Yesu ta maga see hogado dina. Osoloso yo malalo dilesa Gelili mapoo diba bamoloso. Diba omapoo dilesa yo agalaiso,’ dee takee. Mo to ayo nimapoo taka ee na boobado bigi.”

<sup>8</sup> Egeesee taka duloso sobo diba obulone see saga wedi dilesa o hamamee dili odoo mapoo takalame diya goomoga sabolo diyadeeso.

<sup>9</sup> Diba diya goomoga sabolo diyadaga molome, haga booloogelega Yesuye eli domopoo diba tugodoloso egeesee takaso, “Emegei,” diso. Esem sobo bakadio hagoso yimapoo sibilesa gauwuloso dobolone, o homo mapoo toloso o hu dokodoo poudooso.



<sup>10</sup> Esemé Yesúye dimapoo egeesee takaso, “Niba haga na ebi. Niba dilesó mo hamamee dili odoo mapoo takee, diba Gelili mapoo dilesó omapoo a agalaiso,” dee takaso.

*Odoo bi gidebeli odoo ee moleeso howo gaga*

<sup>11</sup> Sobo bakadio hagosó Yesu o hamamee dili odoo mapoo takalame osee diyadaga molome, odoo bi gidebeli odoo abosó dilesó tei mosó wiligi odoo tebisa mapoo goo susuga odoo bi omapoo peledaba ee takaso.

<sup>12</sup> Egeesee taka duloso tei mosó wiligi odoo tebisa oso Yu odoo dia wiligi odoo tebisa sabolo to mousó. Esiga diba diesó to magoo ee dodolone, molee toowa odoo bi gidebeli odoo mapoo tenelone egeesee takaso,

<sup>13</sup> “Niyo odoo susuga mapoo egeesee takee, ‘Niba gesi tiesamolome, Yesu o hamamee dili odoo oso mada sibilesó Yesuwo kou todina,’ dee takee.

<sup>14</sup> Osoloso gamalee odoo Pailteeye goo hagee duloso kamanaga, iyo yo hemisilame, nibada goo medee moodoolaiso,” dee takaso.

<sup>15</sup> Esemé odoo bi gidebeli odoo oso molee tolosó, goo diayo moodeeye dee taka goo ee moodooso. Goo egeesi maga gamenee taka goo hagee Yu odooso dima kulodu osee takomo silesiboso.

*Yesúye o hamamee dili odoo diye di*

*(Maka 16:14-18; Luka 24:36-49; Yon 20:19-23; Diye 1:6-8)*

<sup>16</sup> Yesu o hamamee dili odoo 11 oso Gelili mapoo dilesó Yesúye taka to ee dodolone mubi hee mapoo palaso.

<sup>17</sup> Diba omapoo pelesó Yesu ogoloso yimapoo goomoga poudooso. Esino dima kulodu odoo abosó yo tei Yesudoo doloso tei tele.

<sup>18</sup> Esemé Yesúye dima hegi sibilesó egeesee takaso, “Kei mi sabolo osoloso mipoo hamapoo goo susuga ee balai kitulugu amapoo olo teneeso.

<sup>19</sup> Esiga niba mipoo susuga omapoo debeli odoo susuga mapoo dilesó, diayo amapoo tei tolosó mo hamamee dili odoo

dalame, Godeeyo to tekepo takomo di. Egeeseelone diba Mayo hu maga, osoloso Owolo mo hu maga, osoloso Dio Tei eyo hu maga diba howo olugi.

<sup>20</sup> Osoloso ayo kokodo taka to susuga niyo dodomo silesibilame nimapoo tenee ee see dimapoo eligi, diayo to egee dodolone ka dabalame. Esiga niba goo hagee medee gooleede, epedee hamaga bei mooloogoloso mi hoo poogoo mapoo duga, ayo biame susuga nibolo hodobo badalaiso.”

## Maka To tekepo Makaye hogugu

### *Maka booka goo eyo bei*

Maka yo Yesuwo hamamee dili odoonee. Esino iba gooleedele, Yesuye goo moodoomo sileeme ee agalame, yinosee Yesubolo hodobo sileeso. Yayo Polo dio Banabas dio pidimo siloso, see hamamee Pita pidilone badebeiso. Makaye to hagee Yu odoonee mapoo hoguguloso teneeso, diayo Yesu mapoo tei talame. Yayo to hagee ma kulodu goo toowa hagosu. Goo ee, Yesuye kitulugu oso Saitenso kitulugu ee dagadiso. Bei, Yesuye mipoo hamapoo silone, odo paigiga tekepo moodoomo silone, goo toowa opusomo di moodoomo sileeso. Osoloso bo holo onosee odo ma kuloduga peegoo hasiso bugu domo sileeso.

### *Odo howo oluguli, Yoneeye to tekepo taka goo*

#### *(Mat 3:1-12; Luka 3:1-18; Yon 1:19-28)*

<sup>1</sup> To tekepo bei mooloogoo hagosu, Godeeyo owolo Yesu Kelisowo goo.

<sup>2</sup> Daga hoogoo Godee maga to toloso kokodo takomo sili odo Aisayaye o booka mapoo Godeeye Yesu mapoo to taka egeesee hoguguso:

“Ayo mo to tosili odo malalo diye dalaiso. Osoloso yayo dileso nee eli moodoolame.

<sup>3</sup> Miwe poogoo mi omaga edebeeyo egeesee idagoo,

‘Lodee yayo sibilei eli moodee.

Osoloso medee hoodo magee.’ ”

<sup>4</sup> Yonee odo howo oluguli miwe poogoo mi mapoo peledoboloso, yayo odo howo ogusulone to tekepo takolone egeesee takaso, “Nibada goo tokenee mapoo miligi pialoso howo ogusige. Eseega Godeeye nibada goo tokenee hapoloso boobado bigileiso,” dee takemeleeso. <sup>5</sup> Yudiya mi mapoo debeli mosobia sabolo, osoloso Yelusalem mi toowa mapoo debeli odo susuga oso Yoneeye to taka ee dulame

sibadeeso. Diba Yoneeye taka to ee dulo dibada goo tokenee yilige bugume, Yoneeye diba Yoden howo mapoo howo oluguso.

<sup>6</sup> Yonee yo kemol be too oso dugo dusa kaloso silone, gala koloso bagi mapoo gudu masi kaloso siliso. Osoloso nei yayo nali ee tapala toowa sabolo koo sabolo nali.

<sup>7</sup> Yayo odo susuga mapoo egeesee take-liso, “Odo hee ama hamamee sibileiso. Yayo kitulugu oso ayo kitulugu ee dagadi. A tekeponee, o homo bei mapoo gauwuloso o homo bi ee pidigilei.

<sup>8</sup> Ayo niba howodeeso oluguso. Esino hamamee yayo Dio Tei nima kulodu tenelaiso.”

### *Yesu howo olugu sabolo kuku sabolo*

#### *(Mat 3:13—4:11; Luka 3:21-22; 4:1-13)*

<sup>9</sup> Haga booloogelega Yesu Gelili mi toowa ma kulodu mi pepooko Nasalet omaga sibume, Yoneeye yo Yoden howomoo howo oluguso.

<sup>10</sup> Yesu howomooga gasibileso egeino, Kei mi osulu yamagoloso Dio Tei oso molo masi pusibileso yimapoo pubalegeme egeiso.

<sup>11</sup> Osoloso Kei mi ma dokodooga to egeesee taka, “No ayo gooma mo holo noso, a namapoo diya goomogo,” dee takaso.

<sup>12</sup> Osoloso biame omapoo Dio Teiso Yesu miwe poogoo mi omapoo diye diso.

<sup>13</sup> Yesu biame 40 omapoo gala see-bee sabolo badoboome, Saitenso kuku demeleeso. Esino Godeeyo momaiye sibileso yo pidiso.

### *Yesuye di kebigeli odo bakadio bakadio di gilimadoo goo*

#### *(Mat 4:12-22; Luka 4:14-15; 5:1-11)*

<sup>14</sup> Yu odo dia wiligi odo taba Helode-eye, Yonee neliga moso ma kulodu husuloso hamamee, Yesu yo Gelili mi toowa mapoo dileso, to tekepo Godee maga simi takomo siliso.

<sup>15</sup> Yayo egeesee takaso, “Biame tekepo olo simiso, osoloso Godeeye wiligi doloso

badeli goo oso sibilei koola toobooso. Es-  
iga niba goo tokenee maga miligi pialoso,  
to tekepo mapoo tei te.”

16 Biame heeso, Yesu Gelili abei palaga  
maga dimeleeno, di kebigeli odo bakadio  
Saimon dio omolo Endulu dio peiso di  
giligamolome yayo egeiso.

17 Esem Yesuye dimapoo egeese  
takaso, “Niba ama hamamee sibadee, ayo  
niba odo gilimeli eligileiya.”

18 Esem diba Yesuwo to duloso, dia  
pei omapoo saga poogoloso, see Yesubolo  
hodobo diyadeeso.

19 Osoloso yo pepooko hoogoo dileso, di  
kebigeli odo abo Sebediyo owolo baka-  
dio, Yemes dio omolo Yonee dio du ma ku-  
lodu dobolone pei moodoomolome egeiso.

20 Osoloso Yesu diba ogoloso, yayo diba  
gilimadooso. Esem diayo dulone o tou  
telagali odo sabolo ama Sebedi sabolo du  
ma kulodu gilimane poogoloso, Yesubolo  
hodobo diyadeeso.

*Odo bo holo pala  
(Luka 4:31-37)*

21 Yesu o hamamee dili odo sabolo  
Kapeniyum mi mapoo simiso. Osoloso  
Yu odoowo hasali biame hee mapoo, Yesu  
howo gisili moso omapoo peleso, Godeeyo  
to eligilame bei mooloogooso.

22 Odo susuga yayo eligi du oso diya  
howoogadooso. Bei, yayo eligi ma kulodu  
tei eligili odo oso eligi egeesi masi koo  
eligime. Esino yayo odo diya kitulugu oso  
eligi masi eligiso.

23 Epedee omapoo, howo gisili moso ma  
kulodu odo bo holo pala hee omapoo  
badebeiso. Yayo to neligidi Yesu mapoo  
egeese takaso,

24 “Yesu Nasalet odo, nayo imapoo  
ogoo goo moodoolame ka simiyo? Nayo  
hamapoo iba tokenee palame ka simiyo?  
A gooleedooso, no Godeeyo tei odo.”

25 Yesuye bo holo mapoo to kitulugu  
sabolo egeese takaso, “No to koodobu-  
lolo, odo ma kuloduga peegoo di,” diso.

26 Esem bo holo oso odo ma ku-  
lodu badolone neligidi kikiligameleso gwa  
sabolo peegoo gadiso.

27 Esem odo susuga oso goo hagee  
ogoloso howoogadooso, osoloso diesono  
nei woosa nei woosa diso, “Goo hagee  
ogoo goowo? Eligili goo hagee dia, osoloso  
yayo kitulugu sabolo eligi. Bei, edebeeyo  
bo holo mapoo to takooga, peegoo koo  
gadili. Esino Yesuye bo holo mapoo to  
takooga, diba o to mapoo mesiloso peegoo  
gadiliso.”

28 Esem Gelili mi toowa mapoo odo  
susuga goo ee saga takomo diyadeeso.

*Yesuye odo paigiga tekepo moodoo  
(Mat 8:14-17; Luka 4:38-41)*

29 Howo gisili moso poogoo dileso, Yesu  
Yonee sabolo Yemes sabolo, Saimon dio  
Endulu dio dibada moso mapoo diso.

30 Saimonowo nalobo paiye kolo dei  
moodome debi mapoo tiameleeso. Diayo  
Yesu mapoo sobo paiye eyo goo takaso.

31 Osoloso Yesuye sobo paiye mapoo  
dileso, o dee mapoo toloso, “Tebee,” diso.  
Esem paiye kolo dei saga yimaga koodo  
diso. Esem yayo dimapoo nei teneeso.

32 Habe osoko todobume odo abo oso  
odo paigiga sabolo bo holo paladee odo  
sabolo Yesu mapoo iyado sibadeeso.

33 Osoloso Kapeniyum mi toowa mapoo  
debeli odo susuga oso Yesuye odo  
paigiga moodoo ee agalame, osulu miy-  
opoo mooloogoodooso.

34 Esem Yesuye odo paigiga opusomo  
opusomo di yayo takeme tekepo poloso  
weido diso. Osoloso bo holo odo ma  
kulodu debei peegoo hasisilone dimapoo  
egeese takaso, “Mo goo na takee,” diso.  
Bei, bo holo susuga oso Yesu yo Godeeyo  
owolo doloso diba gooleedooso.

*Yesuye Gelili mi toowa mapoo to  
takomo di goo  
(Luka 4:42-44)*

35 Gesikolodee mi hadobilega, Yesu tia  
maga hogabuloso moso poogoo dileso,  
obusomo odo koola mauwe mi mapoo  
Godee mapoo takalame diso.

36 Hamamee Saimonbolo debei odo  
abo sabolo Yesu esiamo silesibiso.

37 Diayo yo ogoloso yimapoo takaso,  
“Odo susuga oso no esia moloso,” diso.

<sup>38</sup> Yesuye nei egeese takaso, “Iba mi abo mapoo dimo, omapoo dileso Godeeyo to takalame. Bei, a goo egee talame ka simi.”

<sup>39</sup> Osoloso yo Gelili mi toowa ma kulodu mi pepooko susuga mapoo dileso, Yu odoowo howo gisili moso susuga ma kulodu Godeeyo to takomo sileeso. Osoloso bo holo odoos ma kulodu paladee peegoo hasiso bugu demeleso.

*Yesuye odoos agagisa bia tekepo moodoo (Mat 8:1-4; Luka 5:12-16)*

<sup>40</sup> Odoos agagisa bia Yesu mapoo sibilesos ebiso miyomoo tugusalosos egeesees howasos, “Nayo a tekepo moodoolai goomogoga, a tekepo moodee.”

<sup>41</sup> Yesuye yo diya sooloo dolone o kolo mapoo sigolone yimapoo egeesees takasos, “Ayo no tekepo palai, a goomogo. Esiga no tekepo pe.”

<sup>42</sup> Esemes epedees omapoo o kolo mapoo agagisa bia mauwe poogoosos.

<sup>43</sup> Yesuye yo diye dolone to kitulugus sabolos egeesees takasos,

<sup>44</sup> “Nayo dilesos no ayo tekepo pa goos ees odoos abo mapoo na takees. Esinos, nees su tekepo pa goos ees, Godees ogo odoos ogo dolosos domo badelis odoos mapoo dilesos eligi. Osolosos nees su tekepo pa omagas emegei di bi tenees, Moseseeyes tei magoos goos ees dodolones, odoos susugas osos ogolosos tekepo pa ees gooleedalames.”

<sup>45</sup> Esinos yo Yesuwos to mapoo tei telegas poogolosos, odoos susugas mapoo o agagisias bia tekepo moodoo goos ees oposusuos. Beis egeesis magas Yesuyes mi kamapoo disomos, odoos susugas osos Yesus agalames diya mooloogoodos disos. Esemes Yesus mi abo mapoo odoos howos woolas siles. Esinos yo mi odoos mauwe mapoo bados nemes, edebeeyos mi opusomos opusomos di magas yayos badebelis mi mapoo yo agalames sibadees demelesos.

## 2

*Odoos su kakawa poogoo moodoo (Mat 9:1-8; Luka 5:17-26)*

<sup>1</sup> Biames abo poogolosos hamamees, Yesus sees Kapeniyum mi mapoo wedi sibumes,

edebeyos Yesuyes simi ogolosos, mi omapoo sagas takomos disos.

<sup>2</sup> Osolosos odoos susugas sibilesos, o mosos kulodus sabolos peegos sabolos omapoo diya mooloogoodomes, Yesuyes dimapoo Godeeyos to eligi meleesos.

<sup>3</sup> Esemes mi omapoo odoos su kakawas poogoo badebelis ees, odoos bakadios bakadios di osos kidas mapoo tiedilosos imados sibadeesos.

<sup>4</sup> Osolosos diayos yo Yesuyes badebelis omapoo todilames goomogagos. Esinos odoos beigas Yesus mapoo diles elis egeles. Esemes diayos odoos su kakawas poogoo kidas sabolos mosos omu mas dokodoo imados palasos. Osolosos Yesuyes to kemelees domos omagas semes osu tologos poogolosos tisos kidas mapoo bagagolosos kidas sabolos mosos kulodus toososos. <sup>5</sup> Diayos odoos su kakawas poogoo mosos omu magas toosolosos goolees, odoos egees yayos moodoolais teibas dolosos, Yesuyes dias tei toos ogolosos, odoos su kakawas poogoo mapoo takasos, “Mos odoos, nees goos tokenees ees olos hapolosos boobados bugusos.”

<sup>6</sup> Esemes tei eligilis odoos omapoo dobolones diesos nediliyos egeesees gooleemeleesos,

<sup>7</sup> “Odoos hagosos kasemes egeesees kas takayos? Yayos Godees dagadilames sees, esinos goos tokenees hapelis hedebees Godeesos.”

<sup>8</sup> Yesus o dios osos diayos dibadas sooloo mas kulodus goolees meles goos ees gooleedolosos dimapoo egeesees takasos, “Niyo kasis magas nibadas sooloo mas kulodus egeesees kas goolees malalas?

<sup>9</sup> Nibas odoos su kakawas poogoo hagees eges. Yimapoo goos kasees takalais osos sebes kas mololos? Ayo odoos su kakawas poogoo mapoo ‘Nees tokenees ayo olos boobados bugusos,’ dees takoogas, o tokenees boobados bugusos ees niyo gooleedalaimes. Esinos ayo yimapoo takos ‘Nos tobolosos nees kidas tolosos di,’ dagas, yo tobolosos dugas, odoos tekepo pelis kitulugus amapoo molos dolosos niyo gooleedalaisos.

<sup>10</sup> Esinos Odoos Holos amapoo kitulugus olos teneesos, mipoo hamapoo goos tokenees hapolosos boobados bigileis goos ees niyo ogolosos gooleedalames, ayo nimapoo elig-



ileiso.” Osoloso yayo odoos su kakawa poogoo mapoo egeesee takaso,

<sup>11</sup> “No hogabuloso nee kida toloso mosopoo di,” diso.

<sup>12</sup> Diayo balaga molome, odoos su kakawa poogoo hogabuloso, o kida toloso saga diso. Diayo odoos su kakawa poogoo oso toboloso di ogoloso diya howoogadooso. Osoloso Godee mapoo goomoga poudooso. Osoloso diayo egeesee takaso, “Iba daga goo hageesee koo egeli.”

*Yesuye Libai idoo goo*  
(*Mat 9:9-13; Luka 5:27-32*)

<sup>13</sup> Yesu Gelili abei palaga maga see wedi dimeleeno, odoos susuga sibilesi yimapoo mooloogoodoome, yayo Godeeyo to dimapoo eligi meleeso.

<sup>14</sup> Yesu abei palaga dulone egeino, odoos Alpiyes eyo owolo Libai tekisi molee misigeli moso kulodu badoboome egeiso. Osoloso Yesuye yimapoo takaso, “Ama hamamee sibe.” Esem Libaiye toboloso Yesuye di hamamee diso.

<sup>15</sup> Habe Yesu Libaiyo mosopoo badebeino, tekisi molee misigeli odoos bei sabolo, goo tokenee teli odoos abo sabolo, osoloso Yesuwo hamamee dili odoos sabolo, Yesubolo nei nameleeso. Odoos bei hageesee oso yimapoo hamamee dili odoos.

<sup>16</sup> Esino Yesu tekisi molee misigeli odoos sabolo, osoloso goo tokenee teli odoos sabolo nei namolome, tei eligili Pelisi odoos oso ogoloso, o hamamee dili odoos mapoo egeesee woosaso, “Bei kasi maga Yesuye tekisi molee misigeli odoos sabolo goo tokenee teli odoos sabolo nei nolone ka badabala?”

<sup>17</sup> Esem Yesuye to hagee duloso nei dimapoo egeesee takaso, “Odoos paile poogoo ee melesenee neli odoos mapoo koo diya. Esino odoos paiye melesenee neli odoos mapoo ka diya. Ayo simi hagee, Godeeyo howo tekepo teli odoos doloso gweli odoos ee gilimalame ka sibile. Esino tokenee teli odoos doloso gooleedoo odoos ee gilimadoloso Godee mapoo sibilame ka simi.”

*Nei tei doloso dabalai goo*  
(*Mat 9:14-17; Luka 5:33-39*)

<sup>18</sup> Biame aboso Yonee odoos howo oluguli o hamamee dili odoos sabolo, osoloso Pelisi odoos oso Godee mapoo takolone dobolone, nei tei doloso debeliso. Biame hedebeso odoos aboso sibilesi Yesu mapoo egeesee woosaso, “Yoneeyo hamamee dili odoos sabolo, osoloso Pelisi odoos hamamee dili odoos oso, nei tei doloso debeliso. Bei kasi maga nee hamamee dili odoos ee nei tei delega ka dabala?” diso.

<sup>19</sup> Esem Yesuye dimapoo wudu takolone nei egeesee takaso, “Sobo hulei odoos oso sobo hulame nei mopoodoo doloso o odoos gilimileiso. Egeeseega o odoos susuga sibilesi gooholone nei tei doloso dabalaisomo? Haye. Diba goomoga sabolo sobo huli odoos sabolo hodobo dobolone nei nolone hodobo dabalaiso.

<sup>20</sup> Esino biame heeso sobo huli odoos ee dimaga peegoo ido duga, diba nei tei doloso dabalaiso,” diso.

<sup>21</sup> Yesuye wudu takolone see egeesee takaso, “Edebeeyo dugo nape mapoo dugo dia koodoloso omapoo opodoloso koo dusiya. Bei, dugo egee hapoloso magooga, dugo dia oso gawoolone sesegawe oso, dugo nape ee tologodoloso ou toowa moodoolaiso.

<sup>22</sup> Osoloso see edebeeyo wain i dia katolo gout be koloso moodoo nape mapoo koo salama seeya. Bei, wain i dia oso kitulugu oso katolo be gout koloso moodoo nape ee gabuguga, wain i ee hodalaiso. Osoloso katolo gout be koloso moodoo ee tokenee palaiso. Esiga wain i dia ee medee katolo gout be koloso moodoo dia mapoo salama salai tekepo,” dee takaso.

*Yu odoowo hasali biame goo*  
(*Mat 12:1-8; Luka 6:1-5*)

<sup>23</sup> Yu odoowo hasali biame heeso, Yesu o hamamee dili odoos sabolo witi wo ko segei ee ma kuloduga diyadaga meleeso. Osoloso Yesu o hamamee dili odoos oso witi wo ko gooloogaloso nalagamo diyadeeso.

<sup>24</sup> Esem Pelisi odoos oso ogoloso Yesu mapoo egeesee woosaso, “No ege, bei kasi maga nee hamamee dili odoos oso

iyo hasali biame mapoo witi wo ko ka gooloogayo? Diayo ibada tei gababuoso,” diso.

<sup>25</sup> Yesuye nei egeesee takaso, “Wiligi odoo taba Deibidiye o odoo sabolo houdume, Deibidiye goo moodoo ee Godeeyo toso booka mapoo hogugu, niyo hesigeleyo?”

<sup>26</sup> Abayata yayo Godeeyo tei moso wiligi odoo toboloso badebei omapoo, Deibidiye Godeeyo tei moso ma kulodu gadilesi tei wo toloso o odoo sabolo neso. Esino tei wo hagee ibada tei ee dodolone, Godee ogo odoo ogo doloso domo debeli odoo hedebe oso nali. Esino Deibidiye o odoo sabolo wo ne oso tei magoo ee gababiaso.

<sup>27</sup> Godeeye edebeeyo hasali biame ee pidilame ka moodele. Godeeye odoo pidilame hasali biame ka moodoo.

<sup>28</sup> Esiga niyo hasali biame egee Odo Holo ayo wiligi doloso ka badoso,” diso.

### 3

*Yesuye odoo dee hodio seeseegedoo poogoo tekepo moodoo*

*(Mat 12:9-14; Luka 6:6-11)*

<sup>1</sup> Yesu see Yu odoowo howo gisili moso ma kulodu gapeleso egeino, odoo dee hodio seeseegedoo poogoo badoboome egeiso.

<sup>2</sup> Pelisi odoo aboso Yesu tokenee odoo dalame, Yesuwo goo ee medee balagamo silesibiso. Egeeselone Yesuye dia hasali biame mapoo odoo dee hodio seeseegedoo poogoo tekepo moodabeleso bologolone debeiso.

<sup>3</sup> Esem Yesuye odoo dee hodio seeseegedoo poogoo mapoo egeesee takaso, “No bia omaga tebee, odoo susuga oso agalame.”

<sup>4</sup> Osoloso Yesuye Pelisi odoo mapoo egeesee woosaso, “Ibada tei goo oso ibada hasali biame mapoo ogo goo takoosomo? Biame omapoo goo tekepo talai ee tekepowa? O, goo tokenee talai ee tekepowa? Osoloso tei goo oso imapoo ibada hasali biame omapoo odoo gie badeli pidilei goo ee takoosomo? O, odoo gie badeli wooloomalai goo ee takoosomo?” diso.

Esino Pelisi odoo oso Yesu mapoo to nei takele.

<sup>5</sup> Dibada sooloo ma kulodu mesili goo mauwe poogoloso debeli ogoloso, Yesuye sooloo deleme kamana sabolo dimapoo egeino, odoo dee hodio seeseegedoo poogoo ogoloso yimapoo egeesee takaso, “Nee dee seeseegedoo poogoo egee see hoodode.” Esem odoo egee o dee hoododeme, dee egee tekepo paso.

<sup>6</sup> Esem Pelisi odoo oso Yu odoowo howo gisili moso maga peegoo dilesi, Helodeeyo mooloogoodoo odoo tugodoloso, diayo Yesu toloso wooloomalame diesono to mousu.

*Odo susuga oso Yesuye di hamamee di*

<sup>7-8</sup> Yesuye o hamamee dili odoo sabolo Gelili abei mapoo dime, odoo mooloogoodoo toowa oso Yesuye di hamamee diyadeeso. Odo susuga oso goo Yesuye moodoo duloso yimapoo sibadeeso. Odo susuga hagee mi opusomo opusomo di mi hamaga sibadee: Gelili mi toowa, Yudiya mi toowa, Yelusalem mosobia, Idumiya mi toowa, Yoden howo hodio hoogoo debeli Taya mi toowa sabolo Saidon mi toowa omaga sibadeeso.

<sup>9-10</sup> Esem Yesuye odoo paigiga abo tekepo moodome weido diso, osoloso odoo paigiga abo oso yimapoo sigilame hegi pupugamo sibume, yayo o hamamee dili odoo mapoo takaso, “Niba du hee tosibe, bei abei palaga omapoo odoo diya mooloogoo deeyaga,” diso.

<sup>11</sup> Odo bo holo paladee oso Yesu ogoga, diayo o homo beiyopoo gauwuloso goolone egeesee takeliso, “No Godeeyo owoloso,” diso.

<sup>12</sup> Esem Yesuye odoo bo holo paladee omapoo to kitulugu sabolo egeesee takeliso, “Nayo odoo abo mapoo a Godeeyo owolo dee na takee,” dee takeliso.

*Yesuye odoo 12 gilimadoo*

*(Mat 10:1-4; Luka 6:12-16)*

<sup>13</sup> Yesu mubi ma dokodoo peleso yayo goomoga odoo hesigaloso yayo gilimademe, diba yimapoo sibadeeso.

14 Yesuye odoo 12 hesigaloso dimapoo egeesee takaso, “Niba abolo sile sibileiso, osoloso ayo niba diye dalaiso, Godeeyo to takomo sile sibilame.

15 Osoloso, ayo nimapoo kitulugu tenelaiso, odoo bo holo pala peegoo hasisilame.”

16 Yesuye gilimadoo odoo 12 dia hu hagoso: Saimon (odoo hagee Yesuye o hu hee Pita hediso);

17 osoloso Sebediyo owolo bakadio Yemes dio omolo Yonee dio (Yesuye hu hee hedi Bowaneges. Hu eyo bei ee to kei wei masi weli);

18 osoloso Endulu, Pilipi, Batolome, Matiyu, Tomas, Alpiyeseeyo owolo Yemes, Tadiyes, Loum gamalee mapoo ha teli odoo Saimon-Selot,

19 osoloso Yudas-Iskaliyot (yayo hamamee Yesu ha teli odoo dimapoo tiasooso).

*Yesu dio Belsebul dio  
(Mat 12:22-32; Luka 11:14-23; 12:10)*

20 Esemme Yesu o odoowo moso mapoo wedi dilesos badoboome, odoo susuga oso see diya mooloogoodooso. Esemme Yesu sabolo o hamamee dili odoo sabolo diayo nei nalai biame egele.

21 Esemme o soosooso goo egee duloso, yo halaboomo sila pele dolone, yo dibada mosopoo ido dilame sibadeeso.

22 Esino tei eligili odoo Yelusalem maga sibadee oso egeesee takaso, “Yesu yo bo dia wiligi odoo taba Belsebul (Saiten o hu hee) o kulodu badoso. Esiga yayo bo wiligi taba oso kitulugu maga bo holo peegoo hasiso bugulone ka silo.”

23 Esemme Yesuye tei eligili odoo gilimadoloso wudu takolone egeesee takaso, “Saiten odoo ma kulodu badebei dieso nediliyo peegoo kasee hasiso bigileiyo? Eli mauwe.

24 Mi toowa mapoo debeli odoo oso abo puloso dieso nediliyo ha toga mi toowa egee malaime, tokenee palaiso.

25 Osoloso soosoo heeso abo puloso dieso nediliyo ha toga soosoo egee dabalaimme, tokenee palaiso.

26 Osoloso Saiten eyo nediliyo o odoo sabolo ha toga, yayo kitulugu sagelaimme, omapoo mauwe pagalaiso.

27 Esiga odoo heeso kitulugu odoo eyo mosopoo bi heli talame gooleega, yo daga kitulugu odoo tiso tiamagalaiso. Osoloso hamamee o moso kulodu peleso, o bi heli talaiso.

28 Esiga ayo nimapoo taka, goo tokenee susuga edebeeyo teli sabolo, osoloso to tokenee Godee mapoo takeli ee Godeeye hapoloso boobado bigileiso.

29 Esino odoo agayo Dio Tei eyo goo maga to tokenee takooga, o goo tokenee egee hapalaimme, o goo tokenee moloso kookaiyo osee malaiso.”

30 Yayo goo hagee dimapoo takaso, bei diayo yo bo holo paladee dee takeme.

*Yesuwo owee sabolo omolo dio sabolo  
(Mat 12:46-50; Luka 8:19-21)*

31 Yesuwo owee sabolo omolo dio Yesuye eligimelee moso mapoo peledabaso. Diba Yesubolo to kalame peegoo tebisa molome, odoo heeso Yesu takalame moso kulodu gadiso.

32 Esemme odoo susuga Yesubolo debei odoo diayo ogoloso Yesu mapoo egeesee takaso, “Noowee sabolo no molo dio oso peegoo no esia molo.”

33 Yesuye dimapoo eligilame to nei woosaso, “Mo wee sabolo molo dio odoo ogumo?”

34 Osoloso see Yesuye odoo buluma omapoo ogogolone egeesee takaso, “Hamapoo ege, hagee mo wee sabolo molo dio oso.

35 Odoo agayo Godeeye goomoga goo tomo siloga, diba tei molo dio osoloso mo wee dio oso.”

## 4

*Witi ko segeli odoo eyo goo maga wudu taka  
(Mat 13:1-9; Luka 8:4-8)*

1 Yesuye Gelili abei palaga odoo susuga mapoo see tobu eligimeleeso. Esino odoo susuga yimapoo mooloogoodeme, yo du ma kulodu meledoboloso buloso pepooko hoogoo dilesos omaga to takaso.

<sup>2</sup> Yesuye wudu taka susuga dimapoo eligiliso. Yayo eligilone dimapoo takaso,

<sup>3</sup> “Niba dui. Odo hee ko segelame diso.

<sup>4</sup> Yo omapoo ko kukobugumo sileeno, ko abo eli domopoo misigedibaso. Esemé só aboso sibilesó neso.

<sup>5</sup> Osoloso ko abo yugogisi mi mapoo misigedibaso. Esemé mi sebega saga palaso.

<sup>6</sup> Esino osoko pa oso dei moodoome sili-galoso wediaso. Bei, too mi ma kulomoo gameilega.

<sup>7</sup> Osoloso ko abo we ti bei kookoone poogoo omapoo misigedibaso. Esemé we ti ko sabolo palaso. Esino we tiso ko eyo bou tiademe dadailoso ko pele poogooso.

<sup>8</sup> Osoloso ko abo mi medee tekepo mapoo misigediba oso medee tekepo kauwa palaso. Osoloso ko paso, su aboso ko 30 egeesi paso, osoloso abo ko 60 egeesi paso, osoloso abo ko 100 egeesi paso.”

<sup>9</sup> Yesuye egeesee takaso, “Niba dulubolo, esiga ayo hagee takoo medee hoodo dui.”

*Yesuye wudu taka goo eyo bei  
(Mat 13:10-17; Luka 8:9-10)*

<sup>10</sup> Hamamee Yesu obusomo badebeino, o hamamee dili 12 odo sabolo, osoloso odo abo yimapoo mooloogoo doloso de-bei odo oso yimapoo, yayo wudu taka goo eyo bei woosaso.

<sup>11</sup> Esemé Yesuye nei dimapoo egeesee takaso, “Godeeye wiligi doloso badeli goo ee daga mada meleeso. Esino nimapoo woola yilige bigileiso. Esino peegoo debeli odo mapoo ayo wudu takeliso.

<sup>12</sup> Esiga Aisayaye taka hagee peegoo debeli odo maga taka, ‘Diayo medee hodu dileso agalaiso.

Esino goo eyo bei diayo ogoloso gooleedalaimé.

Osoloso diba medee hodu dileso to taka duleiso.

Esino goo eyo bei diayo medee gooleedalaimé.

Diayo gooleedoo diepi, dibada goo tokenee maga miligi pialoso,

Godeeye goo tokenee hapoloso boobado bigiliyo,’ diso.”

*Yesuye ko segei eyo bei taka  
(Mat 13:18-23; Luka 8:11-15)*

<sup>13</sup> Yesuye o hamamee dili sabolo odo abo dimapoo egeesee takaso, “Bei kasi maga niba wudu taka hagee medee kibiya gooleedelega ka pagala? Wudu taka hageeyo bei niyo medee kibiya gooleedelega poogooga, wudu taka abo nimapoo ayo takooga, niyo kasee gooleedalaisomo?”

<sup>14</sup> Ko edebeeyo kukobigili ee Godeeyo to oso, osoloso yayo to egee odo mapoo takeliso.

<sup>15</sup> Esiga odo abo ko oso eli domopoo misigediba egeesi masi doso. Diba Godeeyo to duliso. Esino Saitenso saga sibilesó Godeeyo to dibada sooloo ma kulodu melee yayo peedee deliso.

<sup>16</sup> Osoloso odo abo ko yugogisi mi mapoo misigediba egeesi masi doso. Diba Godeeyo to taka duloso goomoga sabolo saga teliso.

<sup>17</sup> Esino Godeeyo to oso dia sooloo ma kulodu too medee koo meili. Esiga diayo Godeeyo to duloso biame deiyepo mapoo tei teliso. Esino diayo Godeeyo to mapoo tei too goo maga hegi goo sabolo osoloso dala goo oso dimapoo siboga, diayo Godeeyo to mapoo tei too goo ee saga pegeliso.

<sup>18</sup> Osoloso odo abo ko oso dagi we ti kauwe kadee mapoo misigediba egeesi masi doso. Diba Godeeyo to duloso tei teliso.

<sup>19</sup> Esino mipoo hageeyo gie badeli goolee sabolo, osoloso bi bei doloso badalai goolee sabolo, osoloso tokenee goo goolee sabolo oso dibada tei too tokenee peliso. Egeesi maga diayo tei too goo oso homokoko masi koo peli.

<sup>20</sup> Osoloso odo abo ko mi tekepo mapoo misigediba egeesi masi doso. Diayo Godeeyo to duloso tei teliso. Osoloso diba Godeeyo to duloso dibada sooloo ma kulodu Godeeyo to oso homokoko masi peliso. Esiga odo aboso homokoko masi 30 egeesi peliso, osoloso aboso homokoko 60 egeesi peliso, osoloso aboso homokoko 100 egeesi peliso.”



*Keme maga wudu taka goo  
(Luka 8:16-18)*

<sup>21</sup> Osoloso Yesuye dimapoo wudu takolone woosaso, “Odo heeso keme pouloso gadeebugu ee gooloogoolame, tolo ma hemidu o, debi ma hemidu mada magelisomo? Haye, yo keme pouloso dokodoo woola mageliso.

<sup>22</sup> Goo susuga epedee hamapoo mada egee molo, see hamamee gooleedalame gadeebugu mapoo woola peledabalaiso.

<sup>23</sup> Niba dulubolo, esiga ayo hagee takoo medee hoodo dui.”

<sup>24</sup> Osoloso Yesuye dimapoo egeesee takaso, “To niyo du medee goolee. Niba to hagee medee kibiya gooleedoga, goo abo niyo medee gooleedalaiso.

<sup>25</sup> Esiga to taka duli odoo mapoo Godeeye goo goolee tekepo bei tenelaiso. Esino edebeeyo mo to dulega poogooga, Godeeye yimapoo goo goolee tekepo pepooko egee molo see eyo peedee dalaiso.”

*Yesuye witi ko oso pala omaga wudu taka  
(Mat 13:31-34; Luka 13:18-19)*

<sup>26</sup> Yesuye see wudu takolone egeesee takaso, “Godeeye wiligi doloso badeli goo ee egeesi masi moloso. Odo heeso witi ko o homolee mapoo segeiso.

<sup>27</sup> Osoloso yo biame susuga, gesi susuga tialo hogabuo tialo hogabuo dolone witi ko oso pala, yo gooleedele.

<sup>28</sup> Witi ko segei eyo mi naga obusomo peliso. Osoloso kauwulone daga bou gasibiliso, osoloso du teliso, osoloso hamameedee ko peliso.

<sup>29</sup> Witi ko segei poloso telegeega, segeli odoo oso dileso gwaliso.”

*Ko pepooko masted deli maga wudu taka*

<sup>30</sup> Yesuye egeesee takaso, “Godeeye wiligi doloso badeli goo ee kaseeyo? Ayo ogoogo maga Godeeye wiligi doloso badeli goo ee nimapoo ka eligileiyo?

<sup>31</sup> Esiga Godeeye wiligi doloso badeli goo ee egeesi masi moloso. Odo heeso ko pepooko masted deli todilesa o homolee mapoo segeiso.

<sup>32</sup> Esino ko abo ma kulodu ko masted deli hagee diya pepooko. Esino ko pepooko oso bou pisaloso kauwuga, homolee ee ma kulodu homo su oso toowa malaiso. Osoloso sóso omapoo sibilesa o dee mapoo ou tegelaiso.”

<sup>33</sup> Yesuye odoo mapoo wudu takolone, Godeeye to takomo siliso. Esem wudu taka oso dibada goo goolee sabolo teibaso.

<sup>34</sup> Yayo odoo susuga mapoo hedebe wudu takemeliso. Esino Yesu o hamamee dili odoo sabolo diesono dobolone, yayo wudu taka eyo bei ee dimapoo takeliso.

*Yesuye i sabolo howo ki sabolo hamaga taka  
(Mat 8:23-27; Luka 8:22-25)*

<sup>35</sup> Biame hedebe omapoo osoko olo moume, Yesuye o hamamee dili odoo dimapoo egeesee takaso, “Iba abei hodiokoo dalo soowoomo,” diso.

<sup>36</sup> Esem Yesuye odoo abo poogoloso, hedebe o hamamee dili odoo sabolo du maga abei daso. Esino odoo abo du hee mapoo toboloso hamamee daso.

<sup>37</sup> Diba olo abei domopoo damolome, i toowa sibume, howo ki toowa simiso. Osoloso howo ki toowa oso sibulone, dibada du ma kulodu howo sasoso. Esiga diba abei osee damolome, howo sasoo oso dibada du howomoo owulame siso.

<sup>38</sup> Esino Yesu yo du osio mapoo wolomai wolomaloso tiameleeso. Esem o hamamee dili odoo diayo yo tidibuguloso yimapoo egeesee takaso, “Eligili odoo, iba howomoo meilame hagee see, nayo iba sooloo dolosomo?”

<sup>39</sup> Esem Yesu yo tia hogabuloso tobudulone, i sabolo howo ki sabolo omapoo egeesee takaso, “Epedee hamapoo koodobie!” Esem i sabolo howo ki sabolo o to duloso, saga koodobiaso.

<sup>40</sup> Esem see Yesuye o hamamee dili odoo dimapoo egeesee takaso, “Niba kaseega ka ebiala? Niba amapoo tei too meyo?”

<sup>41</sup> Esem Yesu o hamamee dili odoo diba diya obume, diesono nei woosa nei woosa dolone egeesee takaso, “Hagee odoo ogumo? Yayo i sabolo howo ki sabolo omapoo takeme o to duloso koodobiaso.”

## 5

*Yesuye odo bo holo pala tekepo moodoo*

*(Mat 8:28-34; Luka 8:26-39)*

<sup>1</sup> Osoloso Yesu o hamamee dili odo sabolo Gelili abei daso. Osoloso dibada du Gelasa mosobia dibada mi su mapoo oluguso.

<sup>2</sup> Osoloso diba du olo oluguloso, Yesu yo mubi dokodoo polomeleeno, odo bo holo pala oso odo bi maga Yesu mapoo simiso.

<sup>3</sup> Odo hagee biame susuga odo bi mapoo badeli, yo kitulugu toowaga edebeeyo yo ki tiso koo tialegeeli.

<sup>4</sup> Biame susuga o homo sabolo dee sabolo ki tiso tialogoloso magooga eyo kitulugu oso ki ti kokisa bigiliso. Esiga edebeeyo yo balai eli opupa meli.

<sup>5</sup> Biame susuga osoloso gesi susuga odo bi mapoo osoloso esia mapoo eyo nediliyo yoso kolo kookoome gwa sabolo siliso.

<sup>6</sup> Yesu eli sage hoogooga sibumolome, odo yo Yesu ogoloso yo tugodalame hoguo diso. Osoloso o homo beiyopoo gawuaso.

<sup>7-8</sup> Esem Yesuye yimapoo egeese takaso, “Bo holo, no odo yimaga peegoo gadi.” Esino odo bo holo pala oso toso neligidi egeese takaso, “Yesu, dokodoo badeli Godeeyo owolo, nayo amapoo ogoo goo moodoolame ka simiyo? Godeeyo goo maga nayo amapoo dala toowa na tenee!”

<sup>9</sup> Esem Yesuye yimapoo egeese takaso, “Nee hu ogumo?”

Esem odo oso to nei yimapoo egeese takaso, “Mo hu Bei. Bei, iba bei odo hageeyo kulodu.”

<sup>10</sup> Osoloso bo holo oso Yesu mapoo see howa see howa diso, bo holo mi hee mapoo seese peegeeyaga.

<sup>11</sup> Esem koola omapoo esia ma dokodoo be hu mooloogoodoo toowa oso mi namo silesibiso.

<sup>12</sup> Esem bo holo odo ma kulodu debei oso Yesu mapoo see howolone egeese takaso, “Nayo iba be mapoo palame seese pagalai soowayo?” diso.

<sup>13</sup> Esem Yesuye diba be ma kulodu gasoowadee neme, bo holo odo ma kuloduga galaga sibilesi see be ma kulodu

soowadeeso. Esem be bei 2,000 egeesi oso esia dokodoo abei mapoo kukulo meilesi, howomoo wediaso.

<sup>14</sup> Esem be bali odo oso goo hagee ogoloso kukulo dileso, dia mi mapoo osoloso mi pepooko abo mapoo goo egee takomo diso. Esem odo susuga oso to hagee duloso, diba agalame sibadeeso.

<sup>15</sup> Odo susuga oso Yesu mapoo sibilesi mooloogoodoo. Esino odo bo holo pala see tekepo poloso, goo tekepo gooleme dugo tekepo kaloso, Yesubolo badoboome ogoloso diya ebiaso.

<sup>16</sup> Esem be bali odo diayo goo odo mapoo peledaba sabolo be mapoo peledaba sabolo ogoloso odo susuga mapoo takaso.

<sup>17</sup> Esem odo mooloogoodoo susuga oso to hagee duloso, Yesu mapoo see howa see howa diso, “No ibada mi hamaga peegoo di,” diso.

<sup>18</sup> Yesu dilame du mapoo tooboome, odo bo holo pala Yesuye tekepo moodoo oso Yesu mapoo egeese howaso, “A nobolo dilei goomogo.”

<sup>19</sup> Esino Yesuye yimapoo egeese takaso, “Haye, no mosopoo wedi dileso, Godeeye no sooloo dolone namapoo goo toowa moodoo goo ee nemisi dimapoo oposisi,” diso.

<sup>20</sup> Esem odo yo see abaga wedi dino Dekapolisi mi mapoo mosobia 10 mapoo takomo diso. Odo susuga oso to yayo taka ee duloso diya howoogadooso.

*Yesu mapoo tei teme nei yayo odo paiye moodoo*

*(Mat 9:18-26; Luka 8:40-56)*

<sup>21</sup> Yesu o hamamee dili odo sabolo abei hodiokoo dalo sibume, abei palaga mapoo odo susuga oso yimapoo mooloogoodoo.

<sup>22</sup> Mi omapoo Yu odoowo howo gisili moso gibadeli odo, o hu Yailas, yayo Yesu ogoloso o homo beiyopoo gawuaso.

<sup>23</sup> Osoloso yayo see Yesu mapoo howolone egeese takaso, “Mo sobo holo paiye moodoolame, yo talai koola taba. Esiga nee deeso yo sigilame sibe, yo paiye wediloso, see gie badalame.”

<sup>24</sup> Esemé Yesu yibolo dime, odoó mooloogoodoo susuga oso hamamee yo pupugamo diso.

<sup>25</sup> Osoloso mooloogoodoo ee ma kulodu sobo aso woolooma oso sawo dimeli osee dugo 12 poogooso.

<sup>26</sup> Sobo yo melesenee neli odoó bei mapoo diayo pidilame dugo susuga dimeliso. Esino diayo yimapoo dala toowa tenemeleeso. Osoloso yayo dimapoo melesenee talame, melesenee eyo nei magolone o molee susuga hosudooso. Esino yo sawo dimeli koodobilega see toowa poloso, sawo osee dimeliso.

<sup>27</sup> Esino sobo yo daga Yesuye odoó tekepo moodoomo sili goo ee duloso, yayo odoó mooloogoodoo ee ma kuloduga Yesu yima hamamee sibilesó o dugo sage yayo ka mapoo sigeso.

<sup>28</sup> Sobo yayo goolee Yesuwo dugo sigoga yo tekepo palai gooleeso.

<sup>29</sup> Yayo Yesuwo dugo sigime sawo dimeli saga koodobiaso. Esemé yo eyo egeesee gooleeso, "Sawo dimeli tekepo pa," dee gooleeso.

<sup>30</sup> Esemé Yesu eyo gooleeno, odoó weidilame moodeli kitulugu yimaga peegoo di neme, yo odoó mooloogoodoo mapoo hodio bidi toboloso egeesee takaso, "Odoó agayo mo dugo sigoba?" diso.

<sup>31</sup> Esemé o hamamee dili odoó oso yimapoo egeesee takaso, "Odoó susuga oso nobolo hodobo dulone, no ka sigo domo du. Esiga nayo kasalame, 'Odoó agayo mo dugo sigoba' doloso ka takala? Bei, odoó susuga oso nama sigoso," diso.

<sup>32</sup> Esino Yesuye odoó mooloogoodoo kulodu osee esia meleeso, yo odoó agayo sigebeleeso.

<sup>33</sup> Esemé sobo Yesuwo dugo sige oso eyono moodoo gooleebuguloso obulone, kikiliga sabolo sibilesó o homo beiyopoo gasuwoloso badebeiso, osoloso eyo goo moodoo Yesu mapoo takaso.

<sup>34</sup> Esemé Yesuye nei yimapoo egeesee takaso, "Mo holo, nayo amapoo tei too maga no olo tekepo paso. Esiga no mesie sabolo di. No olo tekepo paso," diso.

<sup>35</sup> Osoloso Yesu to osee takomolome, odoó aboso Yailaseeyo moso abaga sibilesó Yailas mapoo egeesee takaso, "Nee sobo holo olo ta moloso. Esiga nayo eligili odoó hamapoo wulo goo mauwe na ido sibe," diso.

<sup>36</sup> Esino Yesuye goo hagee duloso Yailas mapoo egeesee takaso, "No haga na ebi, wulo amapoo tei te."

<sup>37</sup> Osoloso Yesuye egeesee takaso, "Odoó susuga, niba debee," doloso hedebe Pita, Yemes, Yonee, osoloso Yailas esee Yesubolo diso.

<sup>38</sup> Diba abaga dino Yailas eyo moso mapoo peledoboloso egeino, odoó susuga oso to boowa sabolo pupusiga molome egeiso.

<sup>39</sup> Yesuye moso kulodu gadilesó odoó susuga mapoo egeesee takaso, "Niba kaseega to boowa sabolo ka pupusiga malala? Sobo holo hagee koo tamoloso. Esino yo wulo tia moloso," diso.

<sup>40</sup> Esemé odoó susuga oso to Yesuye taka ee duloso yiligaso.

Esemé Yesuye odoó susuga mapoo egeesee takaso, "Niba moso kuloduga peegoo galagadi," diso. Osoloso Yesu yo sobo holo oso tia melee debi mapoo dulone, hedebe oma dio owee dio, osoloso o hamamee dili odoó sabolo kulodu gadiso.

<sup>41</sup> Yesuye sobo holo ta o dee mapoo toloso yimapoo egeesee takaso, "Talita koum!" (To eyo bei sobo holo, no tebee.)

<sup>42</sup> Esemé sobo holo yo epedee omapoo saga toboloso siliso (yo dugo 12). Esemé oma dio owee dio, osoloso Yesu o hamamee dili odoó sabolo diya howoogadooso.

<sup>43</sup> Yesuye dimapoo to kitulugu sabolo egeesee takaso, "Ayo sobo holo hagee wedilame moodoo goo ee, niyo odoó hee mapoo na takee," diso. Osoloso oma dio owee dio mapoo Yesuye egeesee takaso, "Sobo holo mapoo nei tenee," diso.

## 6

*Nasalet odoó oso Yesu gowe  
(Mat 13:53-58; Luka 4:16-30)*

<sup>1</sup> Yesu o hamamee dili odoo sabolo mi toowa omaga see o midee Nasalet mapoo diso.

<sup>2</sup> Osoloso Yu odoowo hasali biame hee mapoo howo gisili moso mapoo peleso, Godeeyo to odoo mapoo eligilame bei mooloogooso.

Eseme odoo susuga oso yayo eligi duloso diya howoogadolone, egeesee takaso, “Odoo hagoso goo susuga hagee kasee gooleedoowo? Yo goo goolee medee tekepo. Yayo goo toowa opusomo di mood-eli kitulugu kapoo toowo?”

<sup>3</sup> Yo wulo moso tegeli odoo, osoloso Meliyo owolo. Osoloso yo Yemes, Yosep, Yudas, osoloso Saimon egee bia dia emei. Osoloso obooba dio onosee ibolo hodobo hamapoo doso,” diso. Esiga diayo egeesee goolone, Yesuye eligi goo ee talai goweso.

<sup>4</sup> Eseme Yesuye dimapoo egeesee takaso, “Odoo susuga oso Godee maga to toloso kokodo takomo sili odoo eyo to duloso mesiliso. Esino o mosobia sabolo, osoloso o soosoo sabolo, osoloso o moso kulodu debeli odoo oso o to mapoo duloso koo mesili,” diso.

<sup>5</sup> Esiga bei diayo Yesu mapoo gowoolone tei too mauwe poogoloso debei ogoloso, yayo o mi omapoo goo toowa opusomo di moodele poogooso. Esino odoo paigiga abo o deeso sigime weido diso.

<sup>6</sup> Yesu diayo yimapoo tei too mauwe poogoo ogoloso diya hoowaso. Eseme Yesu Nasalet mi omaga see poogoloso dileso mi pepooko abo mapoo Godeeyo to eligimo siliso.

*Yesuye o hamamee dili odoo 12 diye di  
(Mat 10:5-15; Luka 9:1-6)*

<sup>7</sup> Yesuye o hamamee dili odoo 12 gili-madoloso dieso nediliyo puloso bakadio tooboo, bakadio tooboo doloso mi opusomo opusomo di mapoo diye diso. Yayo diba diye dolone dimapoo kitulugu teneeso, diayo bo holo paladee ee peegoo hasisilame.

<sup>8</sup> Osoloso Yesuye dimapoo egeesee takaso, “Niyo dulone bi abo na todi. Esino niba wulo susu toloso diyadee. Osoloso

nei sabolo, o sabolo, osoloso molee sabolo toloso na diyadee.

<sup>9</sup> Esino homo mapoo kali bi sabolo osoloso dugo niso ka hedebe egee mouloso dulone, dugo kali bi abo na te.”

<sup>10</sup> Osoloso Yesuye see dimapoo egeesee takaso, “Niyo mi omapoo dileso pele-dobooga, biame omapoo mosobia oso goomogolone moso teneega, moso hedebe omapoo dooso mi hee mapoo dulone ka poogoo di.

<sup>11</sup> Osoloso niba mi hee mapoo duga, edebeeyo niba idilega poogoloso nibada to mapoo mesilega poogooga, mi egee poogoloso dulone, megegu nibada homo mapoo mologa omapoo te, Godeeye komonolone dimapoo dia goo tokenee eyo nei tenelai goo ee gooleedalame,” diso.

<sup>12</sup> Eseme Yesu o hamamee dili odoo diayo dileso, odoo susuga mapoo Godeeyo to takomo sile sibilone egeesee takaso, “Nibada goo goolee su wuduloso goo tokenee maga miligi pie,” diso.

<sup>13</sup> Osoloso bo holo odoo ma kulodu paladee diayo peegoo hasiso bugu dolone debeiso. Osoloso odoo paigiga sabolo diayo olipi iso dibada wiligi mapoo soome paigiga weido diso.

*Yonee Odoo Howo Oluguli oso ta*

<sup>14</sup> Mi susuga mapoo odoo susuga oso Yesuwo goo takomo dime, wiligi odoo taba Helodeeye duloso gooleedooso. Odoo aboso egeesee takaso, “Yo Yonee Odoo Howo Oluguli ta maga see hogabia, esiga kitulugu goo toowa hagee yima kuloduga tou ka to,” diso.

<sup>15</sup> Esino odoo aboso egeesee takaso, “Yo Ilaya.”

Osoloso odoo aboso egeesee takaso, “Yo Godee maga to toloso kokodo takomo sili odoo hee daga badebei egeesi masi bado,” diso.

<sup>16</sup> Esino Helodeeye goo hagee duloso yayo egeesee takaso, “Yonee Odoo Howo Oluguli, o wiligi kobugume ta odoo, yo see ta maga hogabia doo,” diso.

(Yonee telega badolone, daga goo peled-aba hagoso.)



17-20 Biame heeso Helodeeye omolo Pilipiyo osobo Helodiyes peedee huso. Esememe Yoneeye goo hagee ogoloso Helodee mapoo diya takolone egeesee takaso, “Nayo nomolowo osobo peedee hulei tekeponee,” diso. Esememe Helodiyeseeye komonolone, Helodee mapoo dileso egeesee takaso, “Nayo Yonee neliga moso ma kulodu magee,” diso. Esememe yayo Yonee neliga moso ma kulodu magalame, o ha teli odoo diye dee takeme, diayo dileso yo neliga moso mapoo magooso. Esino Helodiyes Yonee mapoo hegilone, yayo yo wooloomalame gooleeso. Esino yayo yo woolomele, bei Helodeeye Yonee wooloomalai ebiaso. Yo gooleedooso, Godeeyo howo woola Yonee goo tokenee mauwe, osoloso yo odoo medee tekepo. Esiga yayo Yonee medee bameleeso. Yayo Yoneeyo to duloso goo diya tiadiliso, esino o to mapoo dulei goomogolone, o sooloo ma kulodu goomegeliso.

21 Esino hamamee Yonee wooloomalame biame tekeposo Helodiyes mapoo simiso. Helodee soomagoo biame mapoo wo toowa nalame, gamalee wiligi odoo tebisa sabolo, osoloso o ha teli wiligi odoo tebisa sabolo, osoloso Gelili mi toowa ma kulodu wiligi odoo tebisaloso debei odoo sabolo Helodeeye gilimadoloso mooloo-goodooso.

22 Diba wo nolone doboome, Helodiyeseeyo sobo holo oso diayo wo nolone debei moso ma kulodu gasibilesa, dimapoo goomoga tenelone habaso. Esememe Helodeeye sobo yimapoo egeesee takaso, “Nayo goomoga goo amapoo takee, ayo bi egee namapoo tenelaiya,” diso.

23 Osoloso see Helodeeye tei yilone egeesee takaso, “Nayo goomoga goo amapoo takooga, ayo namapoo tenelaiso. Osoloso mi ayo hagee bamolo su sabolo nayo talai goomogoga, ayo namapoo tenelaiso.”

24 Esememe sobo yayo owee Helodiyes mapoo dileso, yayo goomoga goo ee dulame diso.

Esememe sobo owee Helodiyeseeye nei egeesee takaso, “Nayo goomoga Yonee

Odoo Howo Oluguli eyo wiligi goomogo dee takee.”

25 Esememe yayo oweeyo to duloso, saga wedi dileso Helodee mapoo egeesee takaso, “Epedee hamapoo Yonee Odoo Howo Oluguli eyo wiligi koodoloso tolo mapoo magoloso tosiboga ee talai, a goomogo,” diso.

26 Helodeeye to hagee duloso yo diya gooheleso. Esino yo odoo susuga eyo howo woola mapoo eyo tei magoo ee gababilei ebiaso. Esiga yayo sobo o to mapoo gowelee.

27-28 Osoloso Helodeeye o ha teli odoo hee neliga moso gibali oso Yoneeyo wiligi koodolame diye diso. Esememe yayo neliga moso mapoo dileso Yoneeyo wiligi koodoloso, odoo susuga oso agalame tolo mapoo magoloso, odoo howo woola tosibilesa sobo holo mapoo teneeso. Esememe sobo yayo toloso owee mapoo teneeso.

29 Yonee o hamamee dili odoo oso goo hagee duloso, diayo sibilesa o kou todilesa wulu odoo toga tooseli omapoo kulodu magooso.

*Yesuye sobo sabolo, holaiso sabolo, osoloso gisowe 5,000 mapoo nei pi*

*(Mat 14:13-21; Luka 9:10-17; Yon 6:1-14)*

30 Yesuye diye di odoo 12 diba see wedige sibilesa, goo diayo moodoo sabolo osoloso goo diayo eligi susuga ee Yesu mapoo oposususo.

31 Odoo susuga Yesuye badebei omapoo dile see sibo di oso, Yesu o hamamee dili odoo sabolo nei nalai biame tekepo egele. Esememe Yesuye o hamamee dili odoo mapoo egeesee takaso, “Iba ibusomo odoo mauwe poogoo mi mapoo dileso hasalame dimo,” diso.

32-33 Esememe Yesu o hamamee dili odoo sabolo du ma kulodu bulumaloso, abei hodiokoo odoo koola mauwe mi mapoo dalo soowoolame moumeleeno, odoo abei palaga debei oso ogoloso gooleedooso. Esememe odoo susuga oso mi opusomo opusomo di maga Yesuye di mi mapoo malalo mili hoguga diyadeeso. Diba malalo dileso balaga meleeno, Yesu o hamamee dili odoo sabolo du maga sibilesa gimagooso.

<sup>34</sup> Osoloso Yesu du maga mi mapoo pubalogoloso, odoo susuga oso mooloo-goodoloso debei ogoloso, yayo diba diya sooloo dalaso, bei sipi be hu masi bali odoo mauwe poogoloso doboome. Esem e yayo goo susuga dimapoo eligiso.

<sup>35</sup> Osoko olo todobume, Yesu o hamamee dili odoo oso yimapoo sibiles egeesee takaso, "Osoko olo todobuo. Osoloso mi iyo hagee do mapoo odoo mauwe. Esiga mi hamapoo nei mauwe.

<sup>36</sup> Esiga nayo odoo susuga egee do diyadee dee, diayo mosobia koola kee do mapoo dileso nei dieso nalai ee moleeso talame," diso.

<sup>37</sup> Esino Yesuye o hamamee dili odoo mapoo nei egeesee takaso, "Diayo nei nalai niso toloso dimapoo tenee," diso.

Esem e diayo Yesu mapoo egeesee takaso, "Iyo nei toloso dimapoo teneega, molee ko\* 200 oso teli, esino iba molee mauwe."

<sup>38</sup> Esem e Yesuye dimapoo egeesee woosaso, "Diba wo kasolo molosomo? Niyo agalame di."

Esem e diayo dileso ogoloso, diayo yimapoo egeesee takaso, "Wo si dee tiadoo sabolo osoloso di bakadio moloso," diso.

<sup>39</sup> Esem e Yesuye o hamamee dili odoo mapoo egeesee takaso, "Odoos susuga mapoo egeesee takee, 'Niba mi mapoo pepooko mooloo-goodoloso buluma mooloo-goodoloso buluma,' dee takee," diso.

<sup>40</sup> Esem e diayo dimapoo takeme, diba mooloo-goodoo opusomo opusomo doloso mooloo-goodoo hee mapoo odoo 100, osoloso mooloo-goodoo hee mapoo odoo 50 doloso bulumaso.

<sup>41</sup> Esem e Yesuye wo si dee tiadoo sabolo di bakadio sabolo toloso, Kei mi ma dokodoo bolone, Godee mapoo goomoga to takaso. Osoloso yayo wo popeiloso di sabolo agisaloso o hamamee dili odoo mapoo piso, diayo odoo susuga mapoo pilame. Esem e diayo wo si popei sabolo di hwei sabolo odoo susuga mapoo piso.

<sup>42</sup> Esem e odoo susuga oso nei teiba nega diya edigaso.

<sup>43</sup> Osoloso diayo nei naloso abo poogoo ee, Yesu o hamamee dili odoo oso misig-amo dileso bou tegei 12 egeesi metamag-isaso.

<sup>44</sup> Osoloso sobo sabolo holaiso sabolo nei neso. Esino mooloo-goodoo ee ma kulodu gisowe hesiga 5,000 oso nei ka ne.

*Yesuye howo dokodooga di  
(Mat 14:22-33; Yon 6:15-21)*

<sup>45</sup> Diba nei nalaga koodobuloso, Yesuye o hamamee dili odoo malalo du maga Betesaida mi mapoo diye doloso, diba abei damolome, Yesuye odoo susuga dibada mi mapoo diye diso.

<sup>46</sup> Osoloso Yesuye odoo susuga diye doloso, yo obusomo Godee mapoo takalame mubi dokodoo palaso.

<sup>47</sup> Gesi domo o hamamee dili odoo dibada du maga abei domo damolome, Yesu yo obusomo mubi dokodoo badebeiso.

<sup>48</sup> Yesu mubi dokodoo badolone egeino, poo sabolo howo ki sabolo simi oso, o hamamee dili odoo dia du mapoo woome, diba kwasu sabolo du sulugamo diyadaga molome egeiso. Osoloso gesikolo kudi olo tadageme, yo howo dokodooga diba daga dilame dimeleeso.

<sup>49</sup> Esino o hamamee dili odoo diayo Yesu howo dokodooga dimelee ogoloso, diayo goolee boso siba bele dolone diya googaso. <sup>50</sup> Yesu o hamamee dili odoo oso yo ogoloso obugume, yayo dimapoo egeesee takaso, "Niba howaleege. Haga na ebi. Ayo siba."

<sup>51</sup> Osoloso Yesu yo du ma kulodu daboo-goome, howo ki sabolo poo sabolo saga koodobiaso. Esem e Yesu o hamamee dili odoo oso goo hagee ogoloso diya howoogadooso.

<sup>52</sup> Diba Yesuwo kitulugu gooleedoo diepi, diba howoogele pegeliyo. Esino diba howoogadooso, bei dia goo goolee oso gooleedalai tebilega.

<sup>53</sup> Osoloso diba abei daloso abei hodi-okoo Genesalet mi mapoo dibada du oluguso.

<sup>6:35:</sup> Maka 8:1-9 \* <sup>6:37:</sup> *molee ko* hagee denaliyus deli ee, biame hedebe mapoo tou too eyo nei hedebe hageesee teliso. <sup>6:46:</sup> Luka 5:16 <sup>6:49:</sup> Luka 24:37 <sup>6:51:</sup> Maka 4:39

<sup>54</sup> Diba du oluguloso mubiyodoo dalaga poogoome, odo omapoo tebisa melee oso yo kibiya hoodo egeiso.

<sup>55</sup> Odo susuga mi opusomo opusomo di mapoo hoguga dileso, odo paigiga dibada kida mapoo tiedigaloso Yesu mapoo emigado sibadeeso.

<sup>56</sup> Yesu mi opusomo opusomo di mapoo silime, edebeeyo odo paigiga kida mapoo tieduloso, bi teli go mapoo emigado sibilesi magooso. Esem odo paigiga oso Yesu mapoo howolone egeese takaso, “Iyo wulo nee dugo su mapoo sigilei soowayo?” diso. Osoloso odo paigiga oso Yesuwo dugo su mapoo sigime, odo egee bia wegigadooso.

## 7

*Godeeye tei eligi goo sabolo edebeeyo tei eligi goo sabolo*  
(Mat 15:1-9)

<sup>1</sup> Biame hedebeeso Pelisi odo sabolo osoloso tei eligili odo abo oso Yelusalem mi maga sibilesi Yesu mapoo mooloo-goodooso.

<sup>2</sup> Osoloso diayo egeino, Yesu o hamamee dili odo abo oso Yu odoowo tei dedelega poogoloso nei nalame, dibada dee howo koo hapagali.

<sup>3</sup> (Esino Yu odo sabolo Pelisi odo sabolo dibada adaga dia tei eligi goo ee dodolone, daga nei nalame dee howo hapagaliso.)

<sup>4</sup> Diba bi teli go mapoo bi toloso nala poogolone, daga dibada dee medee howo hapagaloso ka nali. Osoloso dibada adaga dia tei eligi goo ee dodolone, dibada kapu sabolo sesepeni sabolo osoloso disi sabolo howo hapagaliso.)

<sup>5</sup> Esem Pelisi odo sabolo osoloso tei eligili odo oso Yesu mapoo egeese woosaso, “Bei kasalame nee hamamee dili odo oso ibada adaga dia tei eligi goo ee dedelega ka pagala? Diba dee howo hapegelega nei naliso,” diso.

<sup>6</sup> Esem Yesuye nei dimapoo egeese takaso, “Niba goo bakadio gweli odo. Godee maga to toloso kokodo takomo sili odo hee Aisayaye nibada goo maga tei

goo takaso. Bei, yayo goo Godeeye taka egeese hoguguso,

‘Odo hagee bia oso dia magaso wulo gamenee amapoo goomogolone mo hu dokodoo poudiliso. Esino dibada sooloo ma kulodu tei amapoo mesili goo ee mauwe.

<sup>7</sup> Diayo amapoo goomogolone mo hu dokodoo poudili goo eyo bei mauwe. Bei, diayo tei edebeeyo eligi goo ee ayo eligi masi see diayo odo mapoo eligimo silesibiliso,’ diso.

<sup>8</sup> Niba Godeeyo tei eligi goo ee poogoloso, see nibada adaga dia tei eligi goo ee deedeeso.”

<sup>9</sup> Yesuye dimapoo see tobu egeese takaso, “Niyo tei Godeeye eligi goo ee peegoo magoona, nibada adaga dia tei eligi goo ee talame.

<sup>10</sup> Esiga daga hoogoo Moseseeye tei goo Godee maga simi nimapoo tenee hagasoo, ‘Nama dio noowee dio oso to taka duloso dimapoo mesie. Esino odo agayo ama dio owee dio mapoo to tokenee takooga, yo wooloomalaiso.’

<sup>11</sup> Esino niyo egeese takeliso, ‘Soowa, edebeeyo ama dio owee dio mapoo takoo, “Emegei, niba ayo pidileime, bei molee amapoo egee molo Godee mapoo tenelame siga. Molee egee ibada toso hedi koloban.”’

<sup>12</sup> Niyo odo owee dio ama dio ee pidilei tei magooso.

<sup>13</sup> Niyo tei magoo ee dodolone Godeeyo tei magoo peegoo magolone ka doso. Osoloso niba goo abo susuga egeesi masi tomo silesiboso.”

*Odo sooloo ma kulodu Godeeyo howo woola tokenee peli goo*  
(Mat 15:10-20)

<sup>14</sup> Esem Yesuye odo mooloogoodoo see gilimadoloso, dimapoo egeese takaso, “Odo susuga niba, mo to hagee duloso medee gooleede.

<sup>15</sup> Esiga edebeeyo nei nali oso o sooloo ma kulodu Godeeyo howo woola tokenee koo peli. Esino odo o sooloo ma kulodu goo gooleemeleso, to tokenee taka sabolo,

osoloso yayo goo tokenee tomo sili oso, o sooloo ma kulodu Godeeyo howo woola tokenee peliso. [

16 Niba dulubolo, ayo hagee takoo niyo medee hoodo dui,” diso.]\*

17 Esemee Yesuye odoos mooloogoodoo poogoo dilesos, moso kulodu gadimes, o hamamee dili odoos oso dilesos yimapoo egeesee takasos, “Nayo wudu taka goos eyo bei imapoo medee takee,” diso.

18-19 Esemee Yesuye dimapoo egeesee takasos, “Niba goos eyo bei medee koo gooleedolos? Esiga nei niyo tolosos nali oso nibadas sooloo ma kulodu Godeeyo howo woola tokenee koo peli. Bei, nei egees sooloo ma kulodu koo gameli. Esino nayo nalo sooloogolosos see nee gemedei magas peegoo gadilisos.” (Yesuyes goos hagees takolones, yayos to kitulugus sabolos takasos, nei nali bis susugas nalais tekepos, diso.)

20 Esino Yesuyes sees egeesee takasos, “Odoos o sooloo ma kulodu goos gooleemelesos, tos taka sabolos, osolosos yayos goos tokenees tomos silis osos, o sooloo ma kulodu Godeeyo howo woola tokenees pelisos.

21 Esinos o sooloo ma kulodugas goos tokenees susugas hagosos woolas peledebelisos: tokenees gwelis goos, osolosos sobos obuos sabolos gisos kadigas sabolos goos helis telis goos, osolosos adabas bis helis telis goos, osolosos odoos wooloomalis goos, osolosos adabas kookas sobos sabolos kookas gisos sabolos goos helis telis goos,

22 bis bei dolosos badalais gwelis goos, osolosos tokenees telis goos, osolosos emegei dimapoo gamenees takelis goos, osolosos odoos susugas eyos howo woolas ebilis goos talais, osolosos emegei dimapoo kwelis goos, osolosos emegei dias goos magas tos tokenees takelis goos, osolosos suwas pelis goos, osolosos goos tekepos gooles me silis goos.

23 Esigas goos tokenees susugas egees talames odoos o sooloo ma kulodu gooleemelesos togas, o sooloo ma kulodu Godeeyo howo woola tokenees pelisos.”

*Yu sobonee oso tei too  
(Mat 15:21-28)*

\* **7:16:** Tos hagees odoos abos osos takas Makayes hogugus dees takelisos, esinos odoos beis osos takas Makayes hogugules dees takelisos.

24 Yesu o hamamee dili odoos sabolos mi egees poogolosos, sees Tayas mi towas koolas mapoos diyadeesos. Osolosos yos dilesos, odoos susugas osos yayos silis ogolosos gooleedeeyagas, mosos hees mapoos kulodu gapelesos madas badebeisos. Esinos odoos susugas osos yayos silis goos ees dulosos, odoos abos mapoos sagas takomos dimes, dibas gooleedoosos.

25-26 Esemee Yus sobonees hedebe Ponesiyas Siliyas mi mapoos badelis osos Yesuwos goos ees dulosos, yayos badebeis mi omapoos simisos. Yayos sibilesos Yesuwos homos beiyopoo gauwulosos badolones egeesee hoowasos, “Mos sobos holos yimas kulodu bos holos pelesos badosos. Esigas nayos sibilesos o kulodu bos holos egees bados peegoo habigilames sibes,” diso.

27 (Yus odoos osos Yus odoonees mapoos sos, dees takelisos. Osolosos Yus odoos ees takolones odoos holaisos, delisos. Esemee sobos yayos goos egees moodolais kitulugus teibas dolosos yimapoo teis toos malas belesos agalames) Yesuyes sobos mapoos egeesee takasos, “Holaisos dias nei tolosos sos mapoos tenelais tekeponees. Esinos dagas holaisos dimapoo nei tenelais tekepos,” diso.

28 Esemee sobos hagosos Yesu mapoos nei egeesee takasos, “O. Lodees, nayos teis takos. Esinos sos mosos hemidus silesibulones, holaisosos nei nolones kokous miyomoo mous ees nalagamos silesibilisos,” diso.

29 Esemee Yesuyes sobos mapoos egeesee takasos, “Nayos amapoo tos nei tekepos takasos. Esigas nos mosopoo dilesos nowolos sobos holos mapoos eges, yos tekepos badosos. Bos holos epedes o beliyes mas kulodu mauwes,” diso.

30 Esemee yos o mosopoo dilesos, o sobos holos egeinos bos holos o kulodu palas mauwes poogolosos, tekepos polosos debis mapoos wulos tias molomes egeisos.

*Yesuyes odoos dulu tabas ibayas tekepos moodoo*

31 Yesu o hamamee dili odoos sabolos Tayas mi poogolosos Saidons mi mapoos peledabasos. Osolosos dibas sees abagas dinos Dekapolisimosobias mapoos peledobolosos, Gelilis abeis mapoos mousos.



<sup>32</sup> Osoloso odoo aboso odoo dulu taba ibaya Yesu mapoo ido sibilesa howaso, yayo o deeso sigiloso tekepo palame.

<sup>33</sup> Yesuye odoo dulu taba ibaya odoo mooloogoodoo omaga peegoo ido dileso, Yesuwo dee woluguso dulu taba ibaya eyo dulu ou mapoo tuluguloso, makawo o dee mapoo paga magoloso, odoo dulu taba ibaya eyo i mapoo sigeso.

<sup>34</sup> Osoloso Yesuye Kei mi ma dokodoo bolone sooloo toowa polomeleso homod- obuloso yimapoo o toso egeesee takaso, “Epata!” (to eyo bei ee yiliga magee).

<sup>35</sup> Esem epedee omapoo dulu taba ibaya eyo dulu tekepo poloso to taka o duluso medee duso, osoloso o iso to medee kalame bei mooloogooso.

<sup>36</sup> Osoloso Yesuye odoo susuga mapoo takolone, goo yayo moodoo ee na oposisi doloso, dimapoo to kitulugu sabolo take- liso. Esino yayo takolone diayo odoo abo mapoo na oposisi dee taka poogoloso, see odoo abo mapoo oposiliso.

<sup>37</sup> Esem odoo susuga oso Yesuye goo moodoo duloso diya howoogadoo. Os- oloso diayo see egeesee takaso, “Yesu goo susuga tomo sili medee tekepo. Iyo goolee edebeeyo odoo dulu tabaga ibaya tekepo koo moodoogamo silabelee dee. Esino yayo odoo dulu tabaga osoloso to koo kalagali yayo tekepo moodoogamo siliso.”

## 8

### *Yesuye odoo 4,000 mapoo nei pi (Mat 15:32-39)*

<sup>1-2</sup> Biame heeso Yesuye goo eligi ee du- lame see yimapoo odoo susuga mooloo- goodoloso debeiso. Esino nei mauwe poo- goome, Yesuye o hamamee dili odoo gili- madoloso dimapoo egeesee takaso, “Ayo odoo susuga hagee diya sooloo dolo, bei diba abolo dobolone biame bakadio hedebe di poogooga. Esiga diayo nei nalai mauwe.

<sup>3</sup> Osoloso ayo diba nei tenelega, dibada mosopoo diyadee dee takooga, diba eli domopoo houdaso kitulugu me poogoloso howamadagalaiso, bei odoo abo dibada mi koola hapoonee,” diso.

<sup>4</sup> Esem Yesu mapoo o hamamee dili odoo oso egeesee woosaso, “Nei mauwe, osoloso moso mauwe miwe poogoo mi hamapoo, iyo nei kamapoo toloso odoo susuga hamapoo ka tenelaiyo?” diso.

<sup>5</sup> Esem Yesuye o hamamee dili odoo mapoo egeesee woosaso, “Nimapoo wo si kasolo molosomo?” dee takaso.

Esem diayo nei egeesee takaso, “Imapoo wo si 7 moloso,” diso.

<sup>6</sup> Esem Yesuye odoo susuga mi mapoo bulume diso. Osoloso yayo wo si 7 toloso Godee mapoo goomoga to takaso. Osoloso wo si popeiloso odoo susuga mapoo pil- ame, o hamamee dili odoo mapoo piso. Esem diayo odoo mooloogoodoo susuga mapoo piso.

<sup>7</sup> Osoloso odoo mooloogoodoo ma ku- lodu di pepooko abo molo egeiso. Esem Yesuye di toloso Godee mapoo goomoga to takoloso, o hamamee dili odoo mapoo teneme, diayo toloso odoo mooloogoodoo mapoo piso.

<sup>8</sup> Esem odoo susuga nei ne oso diya edigime, diayo nei naloso abo poogoo ee, Yesu o hamamee dili odoo oso misigaloso, bou tegei ma kulodu soo bou 7 egeesi metamagisaso.

<sup>9</sup> Esiga biame omapoo odoo 4,000 oso nei egee neso. Osoloso diba nei naloso, hamamee Yesuye dibada mi mapoo diyadee, diso.

<sup>10</sup> Osoloso diba diye doloso, Yesu o hamamee dili odoo sabolo abei mapoo meilesa du ma kulodu bulumaloso, Dal- manuta mi mapoo dalo soowaso.

### *Pelisi odoo oso goo toowa opusomo di ee agalame goomoga (Mat 16:1-4)*

<sup>11</sup> Diba Dalmanuta mi mapoo soowooleso peledoboome, Pelisi odoo oso Yesu mapoo toso agadilame sibadeeso. Bei, diba goomogaso, Yesuye kitulugu egee tomolo tei Godee maga simibeleso kukuloso agalame. Egeesee meleso, diayo Yesu mapoo goo toowa opusomo di moodee doloso takaso.

<sup>12</sup> Esem Yesuye goo hagee duloso, yo diba gooheleme sooloo toowa polomeleso

homodobuloso dimapoo egeesee takaso, “Bei kasi maga epedee biame hamapoo odoo susuga hagee do oso goo toowa opusomo di moodoo ee agalame ka woosaliyo? Esiga ayo nimapoo tei goo taka, ayo goo toowa opusomo di odoo epedee biame hamapoo hagee do omapoo niyo agalame see moodoolaima,” diso.

<sup>13</sup> Osoloso Yesuye goo hagee takemelee koodobuloso, see o hamamee dili odoo gilimadoloso du mapoo meilesa, abei hodiokoo dalo soowaso.

*Yesuye wo habili maga wudu taka  
(Mat 16:5-12)*

<sup>14</sup> Diba abei hodiokoo dalo soowoolone wo talai boobado bugunabu. Esino du ma kulodu wo si hedebe molome egeiso.

<sup>15</sup> Esemé Yesuye dimapoo kokodo takalame, wudu takolone egeesee takaso, “Niba obeeyamo! Bei, Pelisi odoo sabolo osoloso Helodee dibada goo ee wo habili masi moloso. Osoloso wo giedege sabolo wo habia sabolo hamaga, wo giedege habia oso tokenee palaiso,” diso.

<sup>16</sup> Esemé diayo Yesuye taka duloso diesono to moulone egeesee takaso, “Iyo wo telega boobada poogoo simiga Yesuye iba ogoloso egeesee ka takoo,” diso.

<sup>17</sup> Esino diayo to moulone debei ee Yesuye ogoloso dimapoo egeesee takaso, “Bei kasi maga niyo wo telega boobada poogoo simi maga goo diya koudulone ka dabala? Esiga niba ayo kitulugu goo ee gooleedelega osee doso. Nibada sooloo ma kulodu goo ayo eligi ee gooleedoloso, nibada sooloo ma kulodu magalai diya kalawado?

<sup>18-19</sup> Niba howo mauwega, egele ka pagala? Niba dulu mauwega, dule ka pagala? Niba ayo wo si dee tiadoo giso 5,000 mapoo pi goo ee boobadoolo? Diayo nei naloso, wo abo poogoome, niyo misigamo di bou tegei kasolo metamagisayo?” diso.

Esemé diayo nei egeesee takaso, “Bou tegei 12.”

<sup>20</sup> Esemé Yesuye see egeesee takaso, “Ayo odoo 4,000 mapoo wo si 7 populoso pi, wo abo poogoome, niyo misigamo di bou tegei kasolo metamagisayo?” diso.

Esemé diayo nei egeesee takaso, “Bou tegei 7.”

<sup>21</sup> Esemé Yesuye egeesee takaso, “Ayo odoo susuga mapoo wo pi goo ee niyo egeiso. Esino bei kasi maga Pelisi odoo sabolo Helodee dibada goo wo habili masi maga ayo hagee takoo niyo gooleedelega osee ka dabala?”

*Yesuye Betesaida mi omapoo odoo howo bakadio si tekepo moodoo*

<sup>22</sup> Osoloso diba Betesaida mi omapoo peledoboloso, odoo abo oso odoo howo bakadio si Yesu mapoo ido sibadeeso. Osoloso diayo Yesu mapoo howoolone egeesee takaso, “Odoo hagee nee deeso sigoloso yo tekepo pe,” diso.

<sup>23</sup> Esemé Yesuye o hamamee dili odoo sabolo dulone, yayo odoo howo bakadio si eyo dee mapoo toloso mosobia omaga yo peegoo ido diso. Osoloso Yesuye o howo mapoo makawo paganuloso, yayo odoo egeeyo howo mapoo sigoloso, Yesuye yimapoo egeesee woosaso, “No epedee bi susuga ogolo?”

<sup>24</sup> Esemé odoo yayo peegoo ogogolone egeesee takaso, “O, olo ogoso. Esino odoo silesibono medee koo ogo. Diba homo masi silesibo,” diso.

<sup>25</sup> Esemé Yesuye o deeso see odoo howo bakadio si eyo howo mapoo sigeme, olo epedee omapoo o howo tekepo poloso bi ogogolone egeesee takaso, “Bi susuga medee ogo,” diso.

<sup>26</sup> Yesu odoo howo bakadio si tekepo moodooloso, Yesuye yo tekepo moodoo odoo abo mapoo takelega pagalame, yo mosopoo diye dolone yimapoo takaso, “No duga mosobia kuloduga na di,” diso.

*Pitaye Yesuwo goo yilige bugu  
(Mat 16:13-20; Luka 9:18-21)*

<sup>27</sup> Yesu o hamamee dili odoo sabolo abaga mosobia koola Kasaliya-Pilipai mi mapoo polone, eli domo dulone, Yesuye o hamamee dili odoo dimapoo egeesee woosaso, “Edebeeyo a odoo ogu deliyo?”

<sup>28</sup> Esemé diayo Yesu mapoo nei egeesee takaso, “Odoo aboso taka, no Yonee odoo howo oluguli odoo toloso hogado simi

deliso. Aboso taka, no Ilaya deliso, osoloso odoo aboso taka, no Godee maga to toloso kokodo takomo sili odoo hee daga badebei deliso.”

<sup>29</sup> Yesuye dimapoo egeesee woosaso, “Niyo a odoo ogu deliyo?”

Eseme Pitaye nei egeesee takaso, “No Keliso, Godeeye hudi magoo oso.”

<sup>30</sup> Eseme Yesuye dimapoo to kitulugu sabolo egeesee takaso, “Odoo mapoo a Keliso Godeeye hudi magoo dee na takeeye!” diso.

*Yesu eyo talai goo ee taka  
(Mat 16:21-23; Luka 9:22)*

<sup>31</sup> Yesuye o hamamee dili odoo eligi bei mooloogolone egeesee takaso, “Odoo Holo, a dala toowa bei talaiso, osoloso Yu odoowo wiligi odoo tebisa sabolo, tei moso wiligi odoo tebisa sabolo, tei eligili wiligi odoo tebisa sabolo oso a gowoolone pagalaiso. Osoloso edebeeyo a wooloomaloso, bi mapoo ta moloso biame bakadio hedebe di mapoo see bi maga hogadileiso.”

<sup>32</sup> Yesuye goo hagee o hamamee dili odoo dimapoo woola yilige bugume, Pitaye yo peegoo ido dileso yimapoo egeesee takaso, “No egeesee na takee.”

<sup>33</sup> Eseme Yesuye o hamamee dili odoo dimapoo bidi toboloso bolone, Pita mapoo egeesee takaso, “Saiten, no amaga peegoo di! Nayo to egee takoo Godeeye taka ee koo takoo. Esino edebeeyo taka goo ee takoo.”

<sup>34</sup> Yesuye o hamamee dili odoo sabolo osoloso odoo mooloogoodoo gilimadoloso, dimapoo egeesee takaso, “Edebeeyo ayo di hamamee sibilei goomogoga, yo daga eyo goomoga goo tomo sili ee poogoloso, eyo talai sabolo dala toowa talai sabolo medee mopoodoo doloso ama hamamee ka sibe.

<sup>35</sup> Esiga edebeeyo o gie badeli eyo goodogoga, o gie badeli ee osugobalaiso. Esino edebeeyo mo goo maga sabolo osoloso to tekepo eyo goo maga o gie badeli eyo goodegelega poogooga, yo badoboso kookaiyo gie badeli talaiso.

<sup>36</sup> Esino edebeeyo mipoo hamapoo badolone, eyo goomoga goo susuga

ee tomo siloso, hedebe gie badeli goo ee telega dagaduga, yo see ogoo goo talaisomo? Mauwe.

<sup>37</sup> Bei, yayo gie badeli eyo nei talai mipoo hamapoo bi hee mauwe.

<sup>38</sup> Esiga edebeeyo Godeebolo ebilega poogoloso, goo tokenee osee tomo sile-sibo epedee biame hamapoo, edebeeyo abolo osoloso mo to mapoo gowooga, hamamee ayo mo Maye toowa doloso badeli goo omaga o gadeebugu sabolo, osoloso o momaiye sabolo sibilesi, nei ayo yo gowoolaiso.”

## 9

<sup>1</sup> Yesuye dimapoo egeesee takaso, “Ayo nimapoo ka taka, odoo abo hamapoo hagee do, niba epedee talaime. Esino daga malalo Godeeye wiligi doloso badalai biame goo kitulugu sabolo siboga agalaiso.”

*Yesu o su opusomo di  
(Mat 17:1-8; Luka 9:28-36)*

<sup>2</sup> Osoloso biame 6 olo poogoloso, hamamee Yesuye Pita, Yemes, osoloso Yonee esee mubi hoo dokodoo odoo mauwe mapoo ido paladeeso. Mubi hoo dokodoo o hamamee dili odoo oso balaga molome Yesu o su opusomo paso.

<sup>3</sup> Eseme egeino Yesu o dugo diya hohodi ka heliye omaga poni oso howo dooso. Esiga mi hamapoo odoo heeso dugo hapooga dugo heliye egeesi molo agalaime.

<sup>4</sup> Diba omapoo dobolone egeino, Moses dio Ilaya dio peledoboloso Yesubolo to kesamolome egeiso.

<sup>5</sup> Pitaye Yesu mapoo egeesee takaso, “Eligili odoo, iba hamapoo dabalai tekepo. Esiga iyo waseme bakadio hedebe di tegegalaiso, hee nee, hee Moseseeyo, osoloso hee Ilayayo,” dee takaso.

<sup>6</sup> Pitaye takalai kibiya gooleedele, diba obume.

<sup>7</sup> Eseme koloboso sibilesi, diba gidis-oo. Osoloso kolobo ma kuloduga toso egeesee takaso, “Hagee ayo gooma mo holo oso. Esiga o to mapoo medee dui,” diso.

<sup>8</sup> Eseme Pita, Yonee, osoloso Yemes to taka duloso egeino, Moses dio Ilaya

dio mena, esino hedebe Yesu dibolo to-budume egeiso.

<sup>9</sup> Osoloso diba mubi dokodooga see kumoo moulone, Yesuye to kitulugu sabolo dimapoo egeesee takaso, “Goo niyo egei ee odo abo mapoo na takee. Esino Odo Holo, a ta maga see hogado pala ogoloso, niyo hamamee ka takomo silesibe,” dee takaso.

<sup>10</sup> Esem Yesuye to taka diayo wulo kookodooso. Esino diayo Yesu ta maga see hogado pala goo eyo bei ee diesono nei woosa nei woosa demeleso.

<sup>11</sup> Osoloso diayo Yesu mapoo egeesee woosaso, “Bei kasalame tei eligili odo oso takolone, daga malalo Ilayaye sibilesi, Keliso hamamee sibileigo, dee ka takeliyo?” diso.

<sup>12</sup> Esem Yesuye nei dimapoo egeesee takaso, “Ilaya tei sibilesi goo susuga see medee mopoodoo dalaiso. Godeeyo to booka mapoo hogugu oso egeesee takooso, ‘Odo Holo, a dala toowa talaiso, osoloso edebeeyo a gowoolaiso.’

<sup>13</sup> Esino ayo nimapoo taka, Ilaya yo olo simiso. Osoloso edebeeyo yimapoo dala teneeso, bei Godeeyo to booka maga taka ee dodolone.”

*Yesuye giso holo bo holo pala tekepo moodoo*  
(Mat 17:14-21)

<sup>14</sup> Yesu o hamamee dili odo bakadio hedebe di sabolo mubi dokodooga meilesi egeino, Yesu o hamamee dili odo abo oso tei eligili odo sabolo agadiga molome egeiso. Esem odo susuga sibilesi mooloogoodoso.

<sup>15</sup> Diba diesono mooloogoodoloso balaga meleeno, Yesu dimapoo simi ogoloso, diya howogadooso. Osoloso diayo Yesu mapoo goomoga sabolo hoguga sibadeeso.

<sup>16</sup> Esem Yesuye dimapoo egeesee woosaso, “Niba ogo goo maga agadiga malala?” diso.

<sup>17</sup> Osoloso mooloogoodoo ee ma kulduga odo heeso egeesee takaso, “Eligili odo, mo giso holo bo holo pala oso ibaya paga, nayo moodoolame ido simino, no hamapoo mena.

<sup>18</sup> Esiga bo holo yimapoo pologa, yo miyomoo homodobuloso, kakawa molone o mei wulo tekeliso, osoloso maga maga makawo ti diliso. Esino nee hamamee dili odo dimapoo mo holo bo holo peegoo hasiso bigilame woosano, diayo bo holo peegoo hasiso bigile, bei diayo kitulugu tebilena.”

<sup>19</sup> Esem Yesuye dimapoo egeesee takaso, “Niba tei too mauwe odo. Niyo amapoo tei talame, a biame kasolo nibolo hodobo ka badalaiyo? Ayo biame sage nibolo hodobo badebeino, niyo amapoo tei telega osee dogo, a nimapoo diya gowooso. Esino giso holo ege amapoo ido sibe,” diso.

<sup>20</sup> Esem diayo giso holo Yesu mapoo ido simiso. Esino bo holo eyo Yesu ogoloso, giso holo yo bo holoso o kulodu degiga meleso miyomoo homodobiaso. Esem maga mapoo makawo oudoo sabolo mi mapoo bidigamo sileeso.

<sup>21</sup> Yesuye holopeyo ama mapoo egeesee woosaso, “Goo hagee kopolone holope yimapoo bei ka mooloogoowo?”

Esem holopeyo amameeye nei Yesu mapoo egeesee takaso, “Yo pepooko mapoo bei mooloogoo.

<sup>22</sup> Biame susuga bo holoso holope wooloomalame yo dou mapoo toodoo, osoloso howomoo huso demeleso. Esiga no kitulugu teiba mologa, nayo iba sooloo dele, osoloso iba pidi,” diso.

<sup>23</sup> Esem Yesuye yimapoo egeesee takaso, “Nayo taka, ‘No kitulugu teiba daga iba pidi,’ diso. Esino edebeeyo amapoo tei toga, goo susuga haga kalawane.”

<sup>24</sup> Esem holopeyo amameeye Yesu mapoo toso neligidi egeesee takaso, “Ayo namapoo tei tooso, esino nayo a pidi, mo tei too pepooko see toowa dee,” diso.

<sup>25</sup> Esem odo susuga oso Yesu mapoo saga mooloogoodalame sibadee ogoloso, Yesuye bo holo mapoo toso neligidi egeesee takaso, “No odo mapoo dulu taba ibaya teneli. Esiga ayo namapoo to kitulugu sabolo ka taka, no epedee holope



hageeyo kuloduga peegoo gasiboga, see holope hageeyo kulodu na gadi.”

<sup>26</sup> Osoloso bo holo gwa sabolo diya degiga meleso holope miyomoo togobuloso, yo peegoo gadiso. Esem holope mi mapoo degigilega kakawoloso meleso. Esem odoo aboso goolee, yo olo ta, dee gooleeso.

<sup>27</sup> Esino Yesuye holopeyo dee mapoo toloso, yo tabalame pidiso. Esem holope yo tabaso.

<sup>28</sup> Osoloso Yesu o hamamee dili odoo sabolo dibusomo moso kulodu dobolone, diayo Yesu mapoo egeesee woosaso, “Iyo kaseme bo holo holopeyo kulodu pala ee peegoo habigilei kitulugu mauwe ka poo-goowo?” diso.

<sup>29</sup> Esem Yesuye nei dimapoo egeesee takaso, “Niyo daga Godee mapoo takooga, bo holo egeesi masi peegoo ka hasiso bigiya,” diso.

*Yesu eyo talai goo see taka  
(Mat 17:22-23; Luka 9:44-45)*

<sup>30</sup> Yesu o hamamee dili odoo sabolo mi egee poogoloso, see Gelili mi ee ma kuloduga diso. Osoloso Yesu yo goomegele, odoo heeso yo egeyaga.

<sup>31</sup> Bei, Yesuye o hamamee dili odoo eligi meleso. Yayo dimapoo egeesee takaso, “Odo Holo, a amapoo ha teli odoo mapoo tenelame tiasalaiso. Osoloso diayo a wooloomalaiso, esino a bi mapoo ta moloso biame bakadio hedebe di mapoo gie badeli toloso hogadileiso.”

<sup>32</sup> Esino diayo Yesuye taka goo eyo bei medee kibiya gooledele. Esem diayo see Yesu mapoo woosalai ebigaso.

*Odo agayo wiligi doloso ka badalaiyo?  
(Mat 18:1-5; Luka 9:46-48)*

<sup>33</sup> Yesu o hamamee dili odoo sabolo Kapenyum mi mapoo peledabaso. Osoloso diba moso dieso dabalai mapoo dobolone, Yesuye o hamamee dili odoo mapoo egeesee woosaso, “Niba eli domopooga sibulone, ogoo goo maga toso agadigamo simiyo?”

<sup>34</sup> Esino diayo to nei wedi dile. Bei, diayo dieso nediliyo dima kulodu odoo agayo wiligi doloso badalai goo maga toso agadigaso.

<sup>35</sup> Yesu yo biamolone o hamamee dili odoo gilimadoloso, dimapoo egeesee takaso, “Edebeeyo malalo wiligi doloso badalai goomogoga, yo eyo nediliyo pepooko doloso badebee, osoloso yo tou teli odoo masi mesie sabolo odoo susuga ee halo tou tolone ka badebee.”

<sup>36</sup> Yesuye holope hee ido sibilesa, dibada mudugiyopoo tebidiso. Osoloso holope Yesuye maduloso dimapoo egeesee takaso,

<sup>37</sup> “Edebeeyo holope hageesi masi mo hu maga o mosopoo ido pologa, yayo a ido poloso. Osoloso edebeeyo o mosopoo a ido pologa, yayo mo Ma a diye di ee ido poloso.”

*Odo mapoo ha koo teli, diba ibada odoo  
(Luka 9:49-50)*

<sup>38</sup> Esem Yoneeye Yesu mapoo egeesee takaso, “Eligili odoo, iba odoo heeso bo holo ee nee hu maga odoo ma kuloduga peegoo hasiso bugume egeiso. Esem iyo yo hamaga takaso. Bei, yo ibada mooloo-goodoo ma kulodu koo badeli.”

<sup>39</sup> Esem Yesuye egeesee takaso, “Na hamaga takee. Odo heeso mo hu maga goo toowa opusomo di moodooga, yayo mo goo maga tokenee goo saga takalaime.

<sup>40</sup> Osoloso edebeeyo mapoo ha telega badoga, yo ibada odoo oso.

<sup>41</sup> Ayo nimapoo taka, bei niba Kelisowo odooga, odoo heeso nimapoo howo ke-neega, yo nei toowa talaiso. Esiga hagee tei goo.”

*Tokenee goo mapoo gido dili  
(Mat 18:6-9; Luka 17:1-2)*

<sup>42</sup> Esem Yesuye o hamamee dili odoo dimapoo egeesee takaso, “Odo heeso tei too odoo hee goo tokenee mapoo gido duga, nei odoo heeso o mu mapoo yo toowa bagagoloso howo bou mapoo toosoolai ee dala haga toowanee. Bei,

hamamee Godeeye odoo goo egeesi mood-eli mapoo dala toowa tenelaiso.

<sup>43</sup> Osoloso nee dee hodio oso no goo tokenee talame gido duga, dee hodio egee kobigi, dee hediliwe badoboso kookaiyo gie badeli talai tekepo. Esino nee dee bakadio sabolo Dou mi mapoo dilei tekeponee. Dou egee koo semili.\*

<sup>45</sup> Osoloso nee homo hodio oso no goo tokenee talame gido duga, homo hodio egee kobigi, homo hediliwe badoboso kookaiyo gie badeli talai tekepo. Esino nee homo bakadio sabolo Dou mi mapoo dilei tekeponee.

<sup>47</sup> Osoloso nee howo hodio oso no goo tokenee talame gido duga, nee howo hodio egee tabigi. Godeeye wiligi doloso badeli omapoo howo hediliwe gadilei tekepo. Esino howo bakadio sabolo Dou mi mapoo toodalai tekeponee.

<sup>48</sup> Bei, mi omapoo 'boobee egee molo koo wedili osoloso dou koo semili.'

<sup>49</sup> Esiga odoo susuga dala toga douso gawe masi gawoolaiso. Bei, Godee yo goomogoso, iba medee tekepo dabalame.

<sup>50</sup> Solu ee bi tekepo. Esino soluso hadali me poogooga, nayo solu ee see hadalame kasee moodoolaiyo? Esiga niba solu masi molone nemegei dimapoo mesie sabolo debee."

## 10

### *Sobo huloso pegeli goo* (*Mat 19:1-12; Luka 16:18*)

<sup>1</sup> Yesu o hamamee dili odoo sabolo Kapeniyum mi poogoloso abaga dino Yudiya mi mapoo peledoboloso, see abaga dino Yoden howo daso. Osoloso omapoo egeino, odoo mooloogoodoo yimapoo sibateme, Yesuye dimapoo Godeeyo goo eyo daga eligi egeesee eligiso.

<sup>2</sup> Esem Pelisi odoo aboso sibilesu Yesuye to tokenee takabeleso, kukulo agalame yimapoo egeesee woosaso, "Edebeeyo sobo huloso wulo goo hee maga osobo pagalai tei molosomo?" diso.

<sup>3</sup> Esem Yesuye dimapoo nei egeesee takaso, "Sobo huloso pegeli eyo goo Moseseeye nimapoo tei kasee eligiliyo?" diso.

<sup>4</sup> Esem diayo egeesee takaso, "Moseseeye imapoo tei egeesee eligiso, gisoso sobo poogooga, daga sobo pegeli peipa mapoo to hoguguloso sobo yo ka peegeena."

<sup>5</sup> Esino Yesuye nei dimapoo egeesee takaso, "Moseseeye egeino, yayo eligi goo mapoo niyo mesilega poogolo neme, bige, sobo pagalai soowa, dee takoloso tei hagee ka magoo.

<sup>6</sup> Godeeye mipoo hagee daga moodoo biame mapoo, giso sabolo sobo sabolo moodooso.

<sup>7</sup> Goo egeesi maga gisoso ama dio owee dio poogoloso, see osobo sabolo hedebe doloso dabalaiso.

<sup>8</sup> Osoloso obakadio su hedebe doloso dabalaiso. Esiga diayo debei ee ma kulodu diba bakadio nee, esino diba see olo hedebe doloso ka doso.

<sup>9</sup> Esiga Godeeye diba hedebe di goo ee see odoo heeso domo na pi," diso.

<sup>10</sup> Osoloso hamamee Yesu o hamamee dili odoo sabolo moso kulodu dobolone, sobo huloso pegeli goo maga diayo see tobu Yesu mapoo woosaso.

<sup>11</sup> Esem Yesuye dimapoo egeesee takaso, "Edebeeyo osobo poogoloso, see sobo hee huga, yo odoo heeyo osobo ee peedee huso.

<sup>12</sup> Osoloso sobo yo omo poogoloso, see giso hee mapoo obuoga, yo odoo heeyo giso ee peedee huso."

### *Yesu sabolo holaiso sabolo* (*Mat 19:13-15; Luka 18:15-17*)

<sup>13</sup> Biame hedebeso odoo aboso holaiso Yesu mapoo ido sibadeeso, o deeso sigoloso diba pidilame. Esino o hamamee dili odoo oso goo egee ogoloso hamaga takaso.

<sup>14</sup> Esem Yesuye o hamamee dili odoo oso holaiso hamaga taka ogoloso, komonolone dimapoo egeesee takaso, "Holaiso amapoo sibilei soowa. Niyo na hamaga takee. Bei, edebeeyo holaiso

\* **9:43:** 9:44 sabolo 9:46 sabolo Makaye hamapoo hogugule. Esino 9:48 maga taka to hedebe. **9:47:** Mat 5:29  
**9:48:** Isa 66:24 **9:50:** Mat 5:13; Luka 14:34 **10:4:** Deut 24:1-4; Mat 5:31 **10:6:** Gen 1:27; 5:2 **10:7:** Gen 2:24; Epe 5:31-33 **10:11:** Mat 5:32

hageesi masi oso Godeeye wiligi doloso badeli mapoo gasibileiso.

<sup>15</sup> Ayo nimapoo taka, edebeeyo o goo holaiso masi amamo to mapoo mesimo sili, egeesi selega poogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe.”

<sup>16</sup> Osoloso Yesuye holaiso gilimadoloso, yayo hedebe maduloso o deeso sigolone Godeeye no pidi dee takoo, hedebe maduloso o deeso sigolone Godeeye no pidi dee takoo, diso.

### *Bi bei odoo*

*(Mat 19:16-30; Luka 18:18-30)*

<sup>17</sup> Yesu o hamamee dili odoo sabolo mi hee mapoo dimeleeno, odoo heeso hoguo sibilesi, o homo beiyopoo gauwuloso, yimapoo egeesee takaso, “Eligili odoo tekepo, ayo ogoo goo toga badoboso kookaiyo gie badeli ka talaiyo?” diso.

<sup>18</sup> Esem e Yesu yo Godeeye hudi magoo doloso gooleedalame, yayo nei egeesee takaso, “Bei kasalame nayo a tekepo ka takala? Hedebe Godeeno medee tekepo.

<sup>19</sup> Esino nayo woosa to eyo nei, Godeeyo tei magoo no olo gooleedooso: odoo na wooloome, adaba kooka sobo sabolo kooka giso sabolo goo heli na te, heli na te, odoo hee mapoo gamenee na gigidi, odoo hee mapoo gamenee goo maga heli na te, osoloso nama dio noowee dio to taka mapoo mesie.”

<sup>20</sup> Esem e odoo ogoso Yesu mapoo egeesee takaso, “Eligili odoo, a holope maga simi tei magoo susuga hagee ayo tobuloso tomo simiso,” diso.

<sup>21</sup> Esem e Yesuye sooloo dala sabolo odoo omapoo bolone yimapoo egeesee takaso, “No goo hedebe dooboo dagadi moloso. No dileso, nee bi susuga odoo abo mapoo nei moleeso talame todi. Osoloso bi too eyo nei molee bi mauwe odoo mapoo pi. Nayo egeesee seega, Kei mi ma dokodoo bi tekepo nee hu sabolo mologa agalaiso. Osoloso no a dodomo sibe,” diso.

<sup>22</sup> Osoloso bi bei odoo oso Yesuwo to duloso, diya goohele sabolo diso. Bei, yo bi bei doloso badebeiga.

<sup>23</sup> Esem e bi bei odoo dime, Yesuye o hamamee dili odoo mapoo bolone egeesee takaso, “Bi bei odoo oso Godeeye wiligi doloso badeli mapoo gasibilei diya kalawa.”

<sup>24</sup> Yesuye to taka duloso diba howoogaso. Esino Yesuye see dimapoo egeesee takaso, “Mo holo dio, Godeeye wiligi doloso badeli mapoo gasibilei diya kalawa.

<sup>25</sup> Esiga dugo duseli midole ou maga kemol be toowa oso gadilei kalawa. Esino bi bei odoo oso Godeeye wiligi doloso badeli mapoo gasibilei diya kalawa toowa,” diso.

<sup>26</sup> Esem e o hamamee dili odoo oso yayo eligi goo hagee duloso diya howoogadooso. Osoloso diesono nei woosa nei woosa dolone egeesee takaso, “Goo egee diya kalawadoo. Esiga odoo agayo gie badeli ka talaisomo?” diso.

<sup>27</sup> Esem e Yesuye dimapoo bolone egeesee takaso, “Edebeeyo o gie badeli eyo nediliyo pidilei tebile. Esino Godee yo teiba. Bei, goo susuga yayo moodoolai haga kalawanee,” diso.

<sup>28</sup> Esem e Pitaye Yesu mapoo egeesee takaso, “No ege, iba ibada bi susuga hoo-goo poogoloso, nayo di hamamee deede simiso,” diso.

<sup>29</sup> Esino Yesuye egeesee takaso, “Ayo nimapoo taka, edebeeyo ayo di hamamee sibilame, osoloso to tekepo eyo goo maga, o moso, o emei, o omoo, o omolo, o owee, o ama, o holaiso, osoloso mi poogooga,

<sup>30</sup> odoo yayo o bi susuga poogoo eyo nei toowa talaiso. Esiga yo mipoo hamapoo badolone, see moso, emei, omoo, omolo, owee, holaiso, osoloso mi bei malaiso. Osoloso edebeeyo yimapoo dala tenelaiso, bei yayo mo to mapoo mesiliga. Osoloso hamamee yo kookaiyo badoboso gie badeli talaiso.

<sup>31</sup> Esiga odoo abo epedee hamapoo malalo hagee do ee see diba hamamee dabalaiso. Esino odoo abo epedee hamapoo hamamee hagee do oso see malalo dabalaiso.”

### *Yesu eyo talai see tobu taka*

*(Mat 20:17-19; Luka 18:31-34)*

<sup>32</sup> Yesu o hamamee dili odo sabolo Yelusalem mi mapoo dulone, Yesuye malaso. Esino o hamamee dili odo goo howoogamo dime, odo abo hamamee sibadee diya ebigaso. Bei, odo susuga oso goolee Yelusalem mapoo goo toke-nee peledobeyaga. Osoloso Yesuye o hamamee dili odoowe peegoo gilimado dileso dobolone, Yelusalem mapoo gooso yimapoo peledabalai goo ee takolone dimapoo egeesee takaso,

<sup>33</sup> “Iba Yelusalem mapoo peledobooga, Odo Holo, a Yu odo dia tei moso wiligi odo tebisa sabolo, osoloso tei eligili odo abo mapoo tiasalaso. Osoloso diayo mo goo midiloso, ayo talai goo ee takalaso. Osoloso Yu odoonee mapoo tenelaso.

<sup>34</sup> Diayo a manalaso, osoloso amapoo makawo pagalaso, osoloso a tiso dabalaiso, osoloso a wooloomalaso. Esino biame bakadio hedebe di poogoloso hamamee a ta maga see gie badeli tolosa hogadileiso.”

*Yemes dio Yonee dio goomoga goo Yesu mapoo ogo taka  
(Mat 20:20-28)*

<sup>35</sup> Osoloso Sebediyo owolo Yemes dio Yonee dio Yesu mapoo sibilesa egeesee takaso, “Eligili odo, goo iyo goomoga namapoo taka,” diso.

<sup>36</sup> Esem Yesuye nei egeesee takaso, “Ogoo goowo?”

<sup>37</sup> Esem diayo nei egeesee takaso, “Nama Godeeye wiligi doloso badeli mi toowa mapoo siboga, iba goomogo, odo hee nee dee deede dokolo buo, osoloso hee nee dee dobusu dokolo buo doloso goo susuga nobolo wiligi dalame,” diso.

<sup>38</sup> Esino Yesuye dimapoo nei egeesee takaso, “Niyo egee takoo goo ee niba koo gooleedo. Esiga dala toowa ayo talame egee molo, niba nose dala egeesee talai teibayo? Osoloso niba ayo talame egee molo, niba egeesee talai teibayo?” diso.

<sup>39</sup> Esem diayo nei egeesee takaso, “O. Iba teiba,” dee takaso.

Esem Yesuye nei dimapoo egeesee takaso, “Dala toowa ayo talame egee molo,

niba dala egeesee talaso. Osoloso ayo talame egee molo, niba egeesee talaso.

<sup>40</sup> Esino mo dee deede dokolo dabalai odo sabolo, osoloso mo dee dobusu dokolo dabalai odo hesigilei amapoo kitulugu mauwe. Esino hedebe Godeeye hesiga odo oso mi omapoo dabalaso.”

<sup>41</sup> Osoloso Yesu o hamamee dili odo abo 10 diayo Yemes dio Yonee dio to taka duloso, dimapoo diya kamaso.

<sup>42</sup> Esem Yesuye o hamamee dili odo gilimadoloso, dimapoo egeesee takaso, “Yu odoonee dia wiligi odo oso dima hemidu debeli odo ee diya kitulugu sabolo gidebeliso.

<sup>43</sup> Esino nima kulodu egeesee selai tekeponee. Esiga nima kulodu edebeeyo toowa doloso badalai goomogoga, yo tou teli odo masi mesie sabolo odo abo halo tou tolone ka badebee.

<sup>44</sup> Osoloso edebeeyo malalo badalai goomogoga, yo tou wulayo teli odo masi odo susuga halo tou tolone ka badebee.

<sup>45</sup> Bei, Odo Holo, ayo mipoo hamapoo simi hagee, edebeeyo a pidilame ka sibile. Esino ayo odo pidilame ka simi. Osoloso odo susuga Godee mapoo iyado sibilame a talame ka simi.”

*Yesuye odo howo neliga tekepo moodoo  
(Mat 20:29-34; Luka 18:35-43)*

<sup>46</sup> Osoloso diba Yeliko mi mapoo peledoboloso, Yesu o hamamee dili odo sabolo mi egee poogoloso dimeleeno, odo mooloogoodoo susuga diayo di hamamee simiso. Esem odo howo neliga o hu Batimeyes, Timayes eyo owolo, Yesuye sibilei eli pee mapoo badolone molee howameleeso.

<sup>47</sup> Esiga Batimeyesye Yesu Nasalet odo sibogo di duloso, toso neligidi takolone Yesu mapoo egeesee takaso, “Yesu, Deibidiyo amawe, nayo a sooloo dolone a pidiye!”

<sup>48</sup> Esem odo aboso yo hamaga takaso. Esino yo koodobilega, see diya neligidi egeesee takaso, “Deibidiyo amawe, nayo a sooloo dolone pidiye!” dee takaso.



<sup>49</sup> Esemе Yesuуe o to duloso, kookoo toboloso tobudulone egeesee takaso, “Yo hapoo sibe dee takee.” Esemе diayo howo neliga odoo iso, osoloso yimapoo egeesee takaso, “Goomege. No toboloso, di. Yesuуe no i,” diso.

<sup>50</sup> Esemе Batimeyes o gidei togobuloso, saga dokodoo pupeleso, Yesu mapoo simiso.

<sup>51</sup> Yesuуe yimapoo egeesee takaso, “No ayo namapoo ogoо goo moodolai goomogolo?”

Esemе howo neliga odoo oso nei egeesee takaso, “Eligili odoo, a see agalai goomogo.”

<sup>52</sup> Esemе Yesuуe yimapoo egeesee takaso, “No wulo di. Nee tei too goo oso no tekepo paso.” Esemе howo neliga odoo yo epedee omapoo see medee egeiso, osoloso yo Yesubolo eli maga diso.

## 11

*Yesuуe Yelusalem mi mapoo wiligi odoo masi toboloso gadi*

*(Mat 21:1-11; Luka 19:28-40; Yon 12:12-19)*

<sup>1-2</sup> Yesu o hamamee dili odoo sabolo Yelusalem mi koola mapoo dulone, Olipi mubi kumoo mosobia bakadio, Betapage osoloso Betani mapoo peledabaso. Osoloso Yesuуe o hamamee dili odoo bakadio diye doloso dimapoo egeesee takaso, “Mosobia koogee mapoo dileso, omapoo ogoga be hu gie kauwa donki, edebeeyo wagi ma dokodoo buloso dilega poogoo ee, o mu mapoo ebigiso bagagoloso, omou mapoo bagagoo moloso. Esiga be ee niyo ebigi pidi poogoloso, hapoo hado sibe.

<sup>3</sup> Egeesi ma kulodu odoo heeso sibilesa nimapoo takolone, niba ogoо toowala, dee takooga, niyo nei yimapoo egeesee takee, ‘Lodeeye donki be hagee epedee talai goomogogona, osoloso see hamamee odoo heeso ka hado sibileigo,’ dee takeeye,” diso.

<sup>4</sup> Yesu o hamamee dili odoo bakadio mosobia omapoo dileso, donki be moso peegoo ebigi bagagoloso eli palaga tobudume egeiso.

<sup>5</sup> Esemе diayo donki be ebigi bagagoo pidi meleeno, odoo abo omapoo debei oso dimapoo egeesee takaso, “Niyo ogoо talame donki be ebigi bagagoo egee ka pidala?”

<sup>6</sup> Esemе Yesu o hamamee dili odoo oso to nei Yesuуe dimapoo takee doloso taka tobuloso egeesee takaso. Esemе odoo abo oso donki be hado dilei soowa diso.

<sup>7</sup> Esemе diayo donki be Yesu mapoo hado sibume, o wagi mapoo dugo pooloso, Yesu dokodoo buloso diso. <sup>8</sup> Esemе odoo susuga oso Yesu mapoo gomogolone dia kekeisu dugo tigadoloso, eli Yesuуe dilei mapoo malalo palagamo dime, odoo aboso weiyо dibada go mapoo segei kookooloso eli mapoo palagamo diso.

<sup>9</sup> Esemе Yesuуe donki be ma dokodoo buloso dimolome, malalo diyadee odoo sabolo osoloso Yesu ma hamamee sibadee odoo oso to neligidi egeesee takaso, “Inolome! Iba Godee mapoo goomogo! Odoo Godeeyo hu maga kitulugu sabolo egee sibo yo Godeeye pidiye dee!

<sup>10</sup> Wiligi doloso badeli mi ee sibo Godeeye pidiye dee. Hagee ibada amawe Deibidiye wiligi doloso badebei mi egeesi masi malaiso.

Osoloso iba Kei mi ma dokodoo badeli Godee mapoo goomogo,” dee takomo diyadeeso.

<sup>11</sup> Osoloso Yesu o hamamee dili odoo sabolo Yelusalem mapoo sibilesa, Yesu Yu odoo dia tei moso ma kulodu gadiso. Yo moso kulodu bi susuga mapoo egegemeso diso. Bei olo neligime, osoloso o hamamee dili odoo 12 sabolo Betani mi mapoo diyadeeso.

*Yesuуe pigi homo mapoo to taka (Mat 21:18-19)*

<sup>12</sup> Yesu Betani mapoo tialoso, gesikolo Yelusalem mapoo dimeleeno, eli domopoo yo diya hodiaso.

<sup>13</sup> Esemе Yesu eli sage abaga sibulone, pigi homo du egeiso. Esemе ko pa beleso agalame hodu diso. Esino ko pelega wulo duwe molome egeiso. Bei, pigi ko peli eyo biamenee.

<sup>14</sup> Yesuуe pigi homo hamapoo egeesee takaso, “No hamamee homokoko see

palaimel!” Yesuye egeesee taka, o hamamee dili odoo duso.

*Yesuye Yu odoo dia tei moso ma kulduga odoo peegoo hasiso bugu*

*(Mat 21:12-17; Luka 19:45-48; Yon 2:13-22)*

<sup>15</sup> Yesu o hamamee dili odoo sabolo Yelusalem mapoo peledoboloso, Yesu Yu odoo dia tei moso ma kulodu gadileso egeino, odoo aboso bi abo nei moleeso talame si sabolo, osoloso odoo aboso bi abo nei moleeso telaga molome egeiso. Osoloso molee piligeli odoo dia debi pooba sabolo bidige buguso. Osoloso molo huyado sibilesi nei moleeso teli odoo susuga oso bili pooba sabolo bidege buguloso, diba susuga peegoo hasiso buguso.

<sup>16</sup> Osoloso odoo susuga bi toloso tei moso tegei eli pee kuloduga gadiyaga Yesuye hamaga takaso.

<sup>17</sup> Yayo dimapoo eligilone egeesee takaso, “Godeeyo to booka mapoo hogugu oso egeesee takooso, ‘Mo tei moso ee odoo mosobia susuga maga oso sibilesi Godee mapoo takeli moso,’ diso. Esino niyo goo egeesi tolone, adaba molee heli teliso. Esiga niyo Godeeyo moso hagee heli teli odoo oso mada wuli moso paso.”

<sup>18</sup> Esemee tei moso wiligi odoo tebisa sabolo, osoloso tei eligili odoo susuga oso to hagee duloso, diayo Yesu wooloomalame eli esigamo silesibiso. Bei, diayo Yesubolo ebiaso, bei diayo eligi mapoo odoo susuga oso tei telega peegeeyaga, osoloso odoo susuga oso Yesuye eligi goo ee duloso howoogadooso.

<sup>19</sup> Osoloso habe omapoo Yesu o hamamee dili odoo sabolo Yelusalem poogoloso diyadeeso.

*Pigi homo oso sia goo*

*(Mat 21:20-22)*

<sup>20</sup> Gesikolodee mapoo diba eli domopoo diyadeega meleeno, diayo pigi homo egeiso. Pigi homo o dee sabolo o kou sabolo, osoloso too susuga sio doloso molome egeiso.

<sup>21</sup> Pita Yesuye daga homo mapoo to taka goolebuguloso, Yesu mapoo egeesee

takaso, “Eligili odoo, no ege. Nayo daga pigi homo mapoo to taka oso olo sio doloso molo,” diso.

<sup>22</sup> Esemee Yesuye o hamamee dili odoo dimapoo egeesee takaso, “Niba Godee mapoo tei te,” diso.

<sup>23</sup> “Ayo nimapoo taka, edebeeyo mubi hamapoo egeesee takooga, ‘No dilesi, abei mapoo kulodu mei,’ dee takooga, o sooloo ma kulodu goo goolee bakadio delega, yayo taka goo oso tei peledabalai dee gooleega, Godeeye goo hagee tei peledabalame moodoolaiso.

<sup>24</sup> Esiga ayo nimapoo taka, niyo bi talame Godee mapoo takoloso, see bi egee talai doloso tei toga, bi egee niyo talaiso.

<sup>25</sup> Esiga niyo Godee mapoo takolone, odoo heeso nimapoo goo tokenee moodoo mologa, niyo odoo egeeyo goo tokenee daga malalo boobado bigi. Egeeseega nibada Ama Kei mi ma dokodoo egee bado, Godeeye nibada goo tokenee hapoloso boobado bigileiso. [

<sup>26</sup> Niyo odoo heeyo goo tokenee boobado bigilega poogooga, nei nibada Ama Kei mi ma dokodoo egee bado Godeeye nibada goo tokenee hapoloso boobado bigileime.”]\*

*Yesuye kitulugu maga woosa*

*(Mat 21:23-27; Luka 20:1-8)*

<sup>27-28</sup> Diba see Yelusalem mapoo sibadeeso, osoloso Yesu Yu odoowo tei moso ma kulodu sileeme, tei moso wiligi odoo tebisa sabolo, osoloso tei eligili odoo sabolo, osoloso Yu odoo dia wiligi odoo tebisa oso Yesu mapoo sibilesi egeesee woosaso, “No agamo kitulugu maga goo hagee ka moodoomo silala? Odoo agayo namapoo kitulugu hagee ka teneeyo?” diso.

<sup>29</sup> Esemee Yesuye dimapoo nei egeesee takaso, “Ayo woosali to hedebe nimapoo woosalaiso. Osoloso niyo to eyo nei amapoo takooga, ayo kitulugu toloso hagee silo eyo goo ee nimapoo takalaiso.”

<sup>30</sup> Esiga Yesuye dimapoo egeesee woosaso, “Odoo agayo Yonee mapoo kitulugu ka teneeyo, yayo odoo howo

olugulame? Kitulugu Godeeye teneeyo, o, edebeeyo teneeyo? Niyo amapoo to nei takee!” diso.

<sup>31</sup> Esemе diayo to hagee duloso dieso nediliyo to moulone egeesee takaso, “Iyo kasee takalaisomo? Iyo takolone Yoneeye kitulugu ee Godeeye teneedoo, dee takooga, see nei Yesuye imapoo egeesee takalaiso, ‘Niba bei kaseme Yoneeyo to mapoo tei telega ka poogoowo?’ dee takalaiso.

<sup>32</sup> Esino iyo takolone yayo kitulugu egee odoo maga simi dee takooga, odoo susuga oso imapoo diya kamanalaiso.” Bei, odoo susuga oso goolee Yonee yo tei Godee maga to toloso kokodo takomo sili odoo, dee gweli.

<sup>33</sup> Egeeseelone diayo nei Yesu mapoo egeesee takaso, “Yoneeye kitulugu too goo eyo bei, iba gooleedele,” diso.

Esemе Yesuye nei dimapoo egeesee takaso, “Esiga ayo goo hagee moodoomo silame kitulugu too hagee nimapoo takalaime,” diso.

## 12

*Geleipi ko segei homolee sabolo bali odoo sabolo*

*(Mat 21:33-46; Luka 20:9-19)*

<sup>1</sup> Yesuye see wudu takolone Yu odoo dia wiligi odoo tebisa mapoo egeesee takaso, “Biame heeso odoo hee o homolee mapoo geleipi ko sogoloso, pee maga beeleso. Osoloso ko i debilame, yo ou poogoloso, see homolee egee gibadalame doko moso tegeiso. Osoloso yayo homolee bali odoo abo mapoo bameleeye doloso, yo see mi eli sage mapoo badalame diso. <sup>2</sup> Osoloso yo omapoo dilesa badoboome, homokoko palagaloso olo bi moodoogaso. Esemе yayo o tou teli odoo hee mapoo takolone, o homolee mapoo dilesa homokoko egee gooloogaloso o hodio ee yimapoo tosi-beye diso. <sup>3</sup> Esino yo omapoo dilesa peledoboome, homolee bali odoo oso yo woomele poogoloso geleipi ko telega mosoowe see wedi diye diso.

<sup>4</sup> Esemе egeesee ogoloso, homolee eyo amaye see o tou teli odoo hee diye diso.

Esino homolee bali odoo oso odoo hagee o wiligi mapoo wooloso, yimapoo ebili goo teneloso see wedi diye diso.

<sup>5</sup> Esemе homolee eyo amaye o tou teli odoo hee diye diso. Esino homolee bali odoo oso yo wooloomaso. Esemе homolee eyo amaye o tou teli odoo abo susuga diye diso. Esino homolee bali odoo oso abo wulo wooloso poogooso, osoloso abo diayo piliguso.

<sup>6</sup> Esino yayo gooma owolo hedebe diye dolone egeesee gooleeso, ‘Homolee bali odoo oso mo holowo to duloso, yimapoo mesileiso,’ dee gooleeso.

<sup>7</sup> Esino homolee bali odoo diayo homolee eyo amayo owoloye simi ogoloso dieso nediliyo egeesee takaga meleeso, ‘Holo hagoso hamamee ama toga, yayo geleipi ko segei hagee talaiso. Esiga geleipi ko segei hagee see iyo talame yo wooloomamo,’ diso.

<sup>8</sup> Esemе diayo homolee eyo amayo owolo toloso wooloomaso. Osoloso o kou homolee maga peegoo togobuguso.”

<sup>9</sup> Yesuye to hagee taka koodobuloso badolone, o to dulone debei odoo mapoo egeesee takaso, “Esiga homolee eyo amaye see kasee moodoolaisomo? Yayo sibilesa homolee bali odoo piliguloso, see homolee bali odoo abo mapoo beye dalaiso.

<sup>10</sup> Esiga niba Godeeyo to booka mapoo hogugu hagee hesigeleyo? Bei, omapoo egeesee takooso,

‘Moso tegeli odoo diayo omou gowoolone togobugu oso epedee hamapoo moso omu domo pupodoo ka moloso.

<sup>11</sup> Goo hagee Godeeye ka moodoo. Esiga iba goo hagee ogoloso howoodolone tekepo deeso.’ ”

<sup>12</sup> Esemе Yu odoo dia wiligi odoo tebisa oso Yesuye wudu taka goo ee duloso, “Ibada goo takolone bado,” doloso egeesee gooleeso. Egeeseelone diayo Yesu talai eli esigamo silesibiso. Esino diba odoo mooloogoodoo toowa ogoloso, diayo yo talai ebigaso. Esiga Yesu telega poogoo diyadeeso.

*Sisa mapoo tekisi molee teneli  
(Mat 22:15-22; Luka 20:20-26)*

<sup>13</sup> Osoloso hamamee Yu odo dia wiligi odo tebisa oso Yesuye Loum gamalee mapoo goo tokenee abo takalame gooleeso. Esem diayo Pelisi odo abo sabolo Helodeeyo hamamee dili odo abo sabolo Yesu mapoo gamenee takalame diye diso.

<sup>14</sup> Esem odo egee bia oso dileso Yesu mapoo egeese takaso, “Eligili odo, iba gooleedooso, no tei goo takeli odo. Osoloso no odo bolo koo ebili, osoloso nayo odo kolo mapoo koo egeli. Osoloso nayo Godeeyo goo odo susuga mapoo tei eligi moloso. Esiga Loum gamalee wiligi odo Sisa mapoo tekisi molee tenelai tekepowo, o, tokeneeyo?”

<sup>15</sup> Iyo tenelaisomo, o, tenelaimeyo?” dee takaso.

Esino Yesuye diayo goo tokenee moodoolame to mou goo ee, yo olo gooleedoloso dimapoo egeese takaso, “Bei kasi maga niyo a kukulo agalame ka sala? Niba molee ko hedebe a agalaiya tosibe,” diso.

<sup>16</sup> Esem diayo Yesu mapoo molee ko hedebe tosibleso teneme, yayo dimapoo egeese takaso, “Molee hamapoo agamo mudu sabolo osoloso agamo hu oso ka mololo?”

Esem diayo nei yimapoo egeese takaso, “Sisayo mudu sabolo, osoloso o hu oso ka molo,” diso.

<sup>17</sup> Esem Yesuye nei dimapoo egeese takaso, “Niyo Sisayo bi ee Sisa mapoo tene. Osoloso Godeeyo bi ee Godee mapoo tene,” diso.

Esem diba to hagee duloso diya howoogadooso.

*Ta maga hogabili eyo goo maga Yesu mapoo woosa  
(Mat 22:23-33; Luka 20:27-40)*

<sup>18</sup> Osoloso Sedisi odo aboso Yesuye badebei mapoo sibadeeso. Odo hagee bia oso takolone, “Odo wedia see hogabileime,” dee takeliso. Esem diayo Yesu mapoo sibleso egeese woosaso,

<sup>19</sup> “Eligili odo, tei magoo Mosese-eye hogugu oso imapoo egeese takooso, ‘Gisoso sobo huloso holo soomagelega toga, see omoloye emei tayo osobo bau ee huloso emeiyo hu maga holo soolooga magee,’ diso.

<sup>20</sup> Esiga odo heeso giso holo 7 sooma-gooso. Osoloso daga emeiye sobo huso. Osoloso yo holo soomagelega taso.

<sup>21</sup> Esem omolo yima hamamee soomagooso oso emeiyo osobo bau ee huso. Esino yo holo soomagelega taso. Esem see omolo yima hamamee soomagooso oso emeiyo osobo bau ee huso. Esino yinosee holo soomagelega taso.

<sup>22</sup> Egeeseelone giso holo 7 susuga hagee bia oso holo soolooga magelega wediaso. Osoloso hamameedee sobo bau yinosee taso.

<sup>23</sup> Esiga odo wedia maga see hogogadilei biame mapoo sobo egee tei odo agamo osobo dalaisomo? Bei, giso 7 oso sobo hedebe hagee huso,” diso.

<sup>24</sup> Esem Yesuye nei dimapoo egeese takaso, “Niba goo dooboo gweli odo. Bei, niba Godeeye kitulugu sabolo osoloso o to sabolo gooleedelega ka doso.

<sup>25</sup> Bei, odo wedia ee bi maga see hogogabuoga, diba see sobo huleime, osoloso giso obileime. Esino diba see Godeeyo momaiye oso Kei mi mapoo egee do egeesi masi dabalaiso.

<sup>26</sup> Esiga Moseseeye odo wedia see hogogadilei goo ee o book mapoo hogugu, niyo hesigeleyo? Eibalaham, Aisek, osoloso Yekob olo taso. Esino homo douso nademe, paiya biame omapoo Godeeye Moses mapoo egeese takaso, ‘Epedee hamapoo a Eibalahameeyo Godee, Aisekeyo Godee, osoloso Yekobowo Godee doloso ka badoso,’ diso. Odo hagee wediaso, esino dibada dio oso epedee hamapoo gie doso.

<sup>27</sup> Esiga Godee hagee odo wedia eyo Godeenee. Hagee, odo gie egee do eyo Godee. Esino niyo odo toloso see gie badeli talaime dee gooleega, niba goo dooboo gweli odooso.”



*Tei magoo kaso toowa ka molosomo?*  
(*Mat 22:34-40; Luka 10:25-28*)

<sup>28</sup> Tei eligili odoos hee diayo toso agadigamelee omapoo sibilesa badolone dumeleeso. Osoloso Yesuye Sedisi odoos mapoo to nei tekepo taka duloso, yayo Yesu mapoo egeesee woosaso, “Tei magoo kaso diya toowa ka molosomo?” diso.

<sup>29</sup> Esemee Yesuye nei egeesee takaso, “Tei magoo toowa hagoso, ‘Isalael odoos niba dui! Ibada wiligi odoos Godee hedebe.

<sup>30</sup> Esiga nayo nee wiligi odoos Godee diya goolee, nee sooloo ma kuloduga goolee sabolo, osoloso nee dioso goolee sabolo, osoloso nayo goo goolee sabolo, osoloso nayo kitulugu oso diya goolee.’

<sup>31</sup> Osoloso tei magoo toowa hee hagoso: ‘Nayo no nediliyo diya egee goolee, egeesee goolone nee odoos noseediya egeesee goolee.’ Tei magoo toowa aboso, tei bakadio hagee dagadile,” diso.

<sup>32</sup> Esemee tei eligili odoos ogoso see Yesu mapoo egeesee takaso, “Eligili odoos, nayo tei goo olo takaso. Esiga Godee hedebe badoso, Godee hee mauwe.

<sup>33</sup> Esiga gala hu wooloso dou mapoo siloso Godee mapoo teneli sabolo, bi abo teneli sabolo, tei oso taka hagee haga goo toowanee. Esino tei magoo bakadio hagoso goo toowa ka moloso: Nayo Godee diya goolee, nee sooloo ma kuloduga goolee sabolo, osoloso nayo goo goolee sabolo, osoloso nayo kitulugu oso, diya goolee. Osoloso nayo no nediliyo diya egee goolee, egeesee goolone nee odoos noseediya egeesee goolee,” diso.

<sup>34</sup> Esemee Yesuye odoos ogoso to nei tekepo taka duloso yimapoo egeesee takaso, “No Godeeye wiligi doloso badeli mapoo gasibilei koola bado,” diso. Esemee odoos aboso goo abo Yesu mapoo woosalai obulone yimapoo hee woosalee poogooso.

*Keliso agamo owolowo?*  
(*Mat 22:41-46; Luka 20:41-44*)

<sup>35</sup> Hamamee Yesuye Yu odoos dia tei moso tegei ma kulodu odoos susuga mapoo eligilone yayo egeesee woosaso, “Bei kasi

maga tei eligili odoos diayo Keliso ee Deibidiyo amawe, dee ka takeliyo?

<sup>36</sup> Deibidiye to kitulugu sabolo Dio Tei maga egeesee takaso, ‘Godeeye mo Lodee mapoo egeesee takaso:

“No abolo wiligi doloso badalame mo dee deede dokolo bie.

Esiga nayo badolone namapoo ha teli odoos ee ayo dagadileiso,” diso.’

<sup>37</sup> Deibidiye Keliso o Lodee diso. Esiga bei kasi maga tei eligili odoos diayo ‘Keliso Deibidiyo amawe’ dee ka takeliyo? Kelisoye Lodee osoloso Deibidiyo amawe dalai teibayo? O, Keliso yo Lodee osoloso yo Deibidiyo amawe oso.”

Odoos susuga goomogolone o to mapoo medee duso.

*Yesuye tei eligili odoos dia goo taka*  
(*Mat 23:1-36; Luka 20:45-47*)

<sup>38</sup> Yesuye odoos susuga mapoo eligilone egeesee takaso, “Niba tei eligili odoos mapoo medee ege. Diba dugo medee tekepo megigaloso silesibiliso, osoloso bi neiso teli go mapoo debeli odoos oso diba ogoloso gauwuloso emegei di to takooga ee dulei onoseediya goomegeliso.

<sup>39</sup> Diba howo gisili moso ma kulodu wiligi odoos taba eyo debi mapoo bulumulame, osoloso wo toowa nologolone debi mi mapoo wiligi odoos toowa taba eyo debi mapoo bulumulame goomegeliso.

<sup>40</sup> Esino diayo sobo bauwe e bilame gamenee takoloso, dia moso sabolo bi sabolo diayo tolosa omapoo dobolone, dia goo gagaloso Godee mapoo taka diya sangeliso, odoos aboso diba tekepo odoos dee goolame. Esiga goo egeesi maga diba nei dala toowa talaiso.”

*Sobo bauso emegei di bi tenee*  
(*Luka 21:1-4*)

<sup>41</sup> Yesu tei moso tegei kulodu ede-beeyo emegei di molee tooseli ki bi oso moodoo mapoo soloogamelee koola mapoo badolone odoos susuga bameleeso. Bi bei odoos oso molee ko toowa sooso.

<sup>42</sup> Osoloso sobo bau bi mauwe oso sibilesa molee ko ta bakadio toosooso.

<sup>43</sup> Esemé Yesu o hamamee dili odoo gili-madoloso dimapoo egeesee takaso, “Ayo nimapoo taka, sobo bau bi mauwe hagoso tenee oso odoo abo susuga oso tenee ee dagadiso.

<sup>44</sup> Bei, bi bei odoo dia molee toowa osee molome molee su pepooko teneeso. Esino sobo bau bi mauwe hagee yimapoo molee ko esiesibo meleen teneeso. Esiga yo wo talai molee olo mauwe.”

## 13

*Yesuye Godeeyo tei moso tegei oso toke-nee palai goo taka*

*(Mat 24:1-2; Luka 21:5-6)*

<sup>1</sup> Biame omapoo Yesu tei moso poogoo dileso dimolome, o hamamee dili odoo heeso sibilesi yimapoo egeesee takaso, “Eligili odoo, ibada tei moso yoso tegei medee tekepo hagee, no ege, osoloso yo toowa medee tekepo, no ege,” diso.

<sup>2</sup> Esemé Yesuye to nei yimapoo egeesee takaso, “Tei moso tekepo tegei epedee no hagee ogo, hamamee guobigileiso, es-eega yo hedebeso yo hee ma tobudoo malaime,” diso.

<sup>3</sup> Osoloso Yesu Olipi mubi ma dokodoo peleso, tei moso tegei ma hodiokoo bolone badoboome, Pita, Yemes, Yonee, osoloso Endulu diayo dibusomo sibilesi yimapoo egeesee woosaso,

<sup>4</sup> “Nayo imapoo takee, goo susuga hagoso kopolone ka peledabalaiyo? Osoloso goo susuga hagoso peledabalame mologa, ogo gooso imapoo ka eligileiyo?” diso.

<sup>5</sup> Esemé Yesuye dimapoo to nei egeesee takaso, “Niba obeeyamo! Odoo heeso tei goodee maga niba peegoo gilimado diyaga.

<sup>6</sup> Odoo aboso mo hu maga sibilesi takolone, dieso nediliyo diba Kelisoso, dee takalaiso. Egeeseelone diayo odoo bei tei goo maga peegoo gilimado dileiso.

<sup>7</sup> Esiga ha too goo sabolo osoloso biliga goo oso peledoboomo duga goo ee dulo, niba haga na ebi. Bei, goo hageesi oso daga malalo peledabalaiso. Esino

biame egee hoo poogoo osonee, hamamee sibileiso.

<sup>8</sup> Osoloso mi toowa heeso mi toowa hee mapoo ha talaiso. Osoloso mi susuga mapoo mibia toowa sibileiso. Osoloso nei me pagalaiso. Esino goo susuga hagoso peledobooga, dala biame oso bei mooloogolone ka seeso.

<sup>9</sup> Esiga goo susuga hagoso peledobooga, niba obeeyamo. Edebeeyo niba toloso goo midili moso mapoo ido polo dolone dabalaiso. Osoloso niba dibada howo gisili moso mapoo ido peleso wooloogolone dabalaiso. Osoloso amapoo tei too goo maga niba gamalee wiligi odoo tebisa sabolo, osoloso wiligi odoo toowa tebisa abo dia mudugiyopoo gilimado peleso, niyo mo goo ee dimapoo takalaiso.

<sup>10</sup> Mi hoo pagalai hoogoo mologa, to tekepo hagee daga edebeeyo mi susuga mapoo takomo dileiso, odoo susuga oso to tekepo ee dulame.

<sup>11</sup> Osoloso edebeeyo niba goo midili moso mapoo ido pologa, niyo takalai goo ee haga na goolee. Bei, biame omapoo niyo takalai goo goolee tekepo ee nimapoo Godeeye tenelaiso. Esino niba niso goolee takalaime, Dio Tei oso nibolo toboloso to ka takalai.

<sup>12</sup> Biame omapoo edebeeyo emei dio omolo dio wooloomalame, diba goweli odoo mapoo tiasalaiso. Osoloso amaye owolo mapoo egeesee selaiso. Osoloso owoloye dibada ama dio owee dio mapoo mesilega poogoloso diba wooloomalame tiasalaiso.

<sup>13</sup> Bei niyo amapoo tei too goo omaga odoo susuga oso nimapoo heiga toowa malaiso. Esino edebeeyo eyo tei too kibiloso badolone, hoo poogoo mapoo dileso peledobooga, yo badoboso kookaiyo gie badeli talaiso.

<sup>14</sup> (Hesigeli odoo, no to hageeyo bei medee gooleede.) Niba bi diya tokenee mudu opusomo di oso tei moso ma kulodu molo agalaiso. Esiga bi ogo Godeeyo howo woola tei moso tokenee palaiso. Egeeseega Yudiya mi toowa mapoo debeli

odoo oso bi mudu opusomo di ee ogoga mubi ma dokodoo kukulo pele.

<sup>15</sup> Osoloso odoo moso hau mapoo badoga, bi talame moso kulodu na gadi.

<sup>16</sup> Osoloso odoo homolee mapoo nei howo sogomo siloga, o gidei talame mosopoo see na wedi di.

<sup>17</sup> Osoloso biame omapoo sobo koowasi sabolo, osoloso holope too nedili sobo ee kukulo dilei diya kalawa toowa molo agalaiso.

<sup>18</sup> Esiga Godee mapoo takee, goo hagoso wau biame mapoo peledebelega pagalame.

<sup>19</sup> Bei, biame omapoo dala toowa oso sibileiso. Esiga mi toowa bei mooloo-goo biame abaga simino epedee hamapoo, odoo susuga oso dala goo hageesi egele. Esino dala goo toowa hagoso sibileso koodobuoga, hamamee dala goo hageesi see agalaime.

<sup>20</sup> Esiga Godeeye dala biame deiyepo moodoolaiso. Esino yayo biame sage magoo diepi, odoo heeso dala ee ma kulodu badalai tebile pegeliyo. Esino dala ee ma kulodu Godee eyo hesiga odoo ee halo, yayo dala biame see deiyepo moodoolaiso.

<sup>21</sup> Biame omapoo odoo heeso sibileso nimapoo takolone, 'Hamapoo ege, Keliso hagoso' o, 'Koo ege, Keliso ogoso,' dee takooga, o to mapoo tei na te.

<sup>22</sup> Bei, gamenee keliso deli sabolo, osoloso gamenee godee maga to toloso kokodo takomo sili odoo oso sibileso goo toowa opusomo di edebeeyo howeli moodoolaiso, odoo susuga sabolo osoloso odoo Godeeye hesiga oso peegoo dia beleso kukulo agalame.

<sup>23</sup> Esiga niba obeeyamo! Goo hagee peledebelega mologa, ayo daga goo susuga nimapoo ka taka."

*Yesuye see sibilei goo*

*(Mat 24:29-44; Luka 21:25-33)*

<sup>24</sup> "Osoloso hamamee, biame omapoo dala goo hagoso dileso koodobuoga, 'osoko semelaiso. Egeeseega a nosee gadeebigileime.

<sup>25</sup> Osoloso giwo kei ma dokodoo egee molo mi hamapoo tigidibileiso. Osoloso kei ma dokodoo kitulugu bi egee molo Godeeye halabuga ki me pagalaiso.'

<sup>26</sup> Biame omapoo odoo susuga oso Odoos Holo, ayo kolobo maga gadeebugu sabolo, osoloso kitulugu toowa sabolo siboga agalaiso.

<sup>27</sup> Osoloso ayo sibileso, mo momaiye diye dalaiso, diayo dileso odoo susuga Godeeye hesiga mi susuga mapoo egee do ee gilimalame.

<sup>28</sup> Esiga niba sogai maga goo hagee medee gooleede. Sogai du pisigaga ogoloso, wau biame koola tooboo doloso gooleedeliso.

<sup>29</sup> Esiga goo hagee egeesi masi moloso. Goo ayo taka hagoso peledaba ogoga, Odoos Holo ayo sibilei olo koola tooboo doloso niba olo gooleedalaiso.

<sup>30</sup> Ayo nimapoo taka, epedee biame hamapoo odoo hagee do wedilega doga, goo susuga hagoso peledabalaiso.

<sup>31</sup> Kei sabolo mipoo sabolo mauwe pagalaiso. Esino mo to kookaiyo moloso osee malaiso."

<sup>32</sup> "Esiga Odoos Holo ayo sibilei biame ee odoo hee gooleede. Osoloso Godeeye momaiye Kei mi ma dokodoo egee do sabolo osoloso Godeeye owolo anosee gooleede. Esino hedebe mo Ma Godeeye biame egee gooleedoloso ka badoso.

<sup>33</sup> Esiga niba medee koolone ka debee. Bei, biame ogoso sibilei ee niba gooleede.

<sup>34</sup> Odoos Holo, ayo sibilei goo ee egeesi moloso. Odoos heeso mi hee mapoo dulone, o tou teli odoo mapoo moso hagee medee bameleeye, dee takoloso dileiso. Osoloso yayo tou teli odoo mapoo moso egee bamalame, tou opusomo opusomo di pileiso. Osoloso osulu gibalai odoo mapoo yayo see wedi sibilei maga egeese takalaiso, 'Medee be!'

<sup>35</sup> Esiga mosowo ama masi aso. Esiga niba mopoodoo doloso koolone ka debee. Bei, ayo sibilei biame ee niba gooleede.

Habe sibumobele, o gesi domo sibumobele, o kudi takooga sibumobele, o gesikolodee sibumobele.

<sup>36</sup> Osoloso ayo saga sibilesa ogoga, niba tiesa molo agalai tekeponee.

<sup>37</sup> Ayo nimapoo to taka see odoosusuga mapoo takooso, niba mopoodoo doloso, koolone ka debee,” diso.

## 14

*Yesu wooloomalame to mou*  
(*Mat 26:1-5; Luka 22:1-2; Yon 11:45-53*)

<sup>1</sup> Osoloso Godeeye Gababia wo nalai sabolo osoloso wo mosoowe nalai biame bakadio hoogoo meleeso. Esemetei moso wiligi odoosabolo, osoloso tei eligili odoosabolo diayo Yesu tolosomada wooloomalame eli esiamosilesibiso.

<sup>2</sup> Esino diayo dieso nediliyogeeseetakaso, “Iyo Gababia wo ne biame hamapoo yotolosowooloomalame. Bei, odoosusuga oso imapoo kamanaloso ibolo biligiya,” diso.

*Betani mi mapoo soboso mopoodoo soomedee tekepo oso Yesuwo wiligi mapoo soo*  
(*Mat 26:6-13; Yon 12:1-8*)

<sup>3</sup> Yesu Betani mi mapoo badolone, odoodaga agagisa bia Yesuye tekepo pa Simonowo moso mapoo palaso. Yo omapoo nei nolone badoboome, sobo heeso mai masipepooko yo alabastadeli oso moodo mapoo mopoodoo soomedee tekepo nad deli i salama soo tosimiso. Yayo tosibilesa, me gooboo buguloso Yesuwo wiligi mapoo sooso.

<sup>4</sup> Esemee odoosaboo omapoo debei oso ogoloso komonolone dieso nediliyogeeseewoosagaso, “Bei kasalame sobo hagosomopoodoo soomedee tekepo ee wulogoo mauwe yimapoo soomeleso ka hosudoowo?” diso.

<sup>5</sup> “Yayo mopoodoo soomedee tekepo hagee odoosaboo neiso talame teneedi, moleeko 300 ee tolosobi mauwe odoosaboo tenelai tebiliyo.” Diayo deetakoloso, sobo yimapoo kamanaso.

<sup>6</sup> Esemee Yesuye dimapoo egeeseetakaso, “Yimapoo egeeseena takee. Bei kasi maga

niyo yimapoo kamanaloso ka takala? Yayo amapoo gootekepo moodoso.

<sup>7</sup> Esigabi mauwe odoosaboo biame susuganibolohodobodabalaiso. Esiganiyo dibagooleebuguga, diba biso pidileitekepo. Esino biame susuga a nibolohobobobadalaimo.

<sup>8</sup> Esigasobohagosoyayomoodolai deegooleegoo ee amapoo moodoso. Yayo mopoodoo sooegee mo wiligi mapoo soososo bi ma kulodu malai ee mopoodoo doo.

<sup>9</sup> Ayo nimapoo ka taka. Edebeeyomi kamapoo Godeeyo to tekepo takooga, diayo sobohagosogoo amapoo moodoonoseetakalaiso. Osoloso edebeeyo o goonoseegooleemalaiso,” diso.

*Yudaseeye Yesu tiasalame goomoga magoo*  
(*Mat 26:14-16; Luka 22:3-6*)

<sup>10</sup> Osoloso Yesu o hamameedili 12 ee ma kulodu odoosaboo hee Yudas-Iskaliyot yayo teimoso wiligi odoosaboo mapoo dileso Yesu dimapoo tiasalame diso.

<sup>11</sup> Esemee diayo o gooduloso, diyagoomogolone yimapoo moleenei tenelame to takoloso edidimagooso. EsemeeYudaseeyeYesu dimapoo tiasalame eli esiamosilone biame tekepo bameleeso.

*Yesuye o hamamee dili odoosabolo Godeeye Gababia wo ne*  
(*Mat 26:17-25; Luka 22:7-14, 21-23; Yon 13:21-30*)

<sup>12</sup> Isipimi magapeegoodi gooleebuguwone bei mooloogoo biame mapoo, Yu odooso Godeeye Gababia wo nalame, sipibe hu weliso. EsemeeYesuwo hamameedili odoosaboo oso Yesu mapoo egeeseewoosaso, “Nayo iba kamapoo dileso Godeeye Gababia wo nalai mopoodoo dalai ka goomogolo?” diso.

<sup>13</sup> Esemee Yesu o hamameedili odoobakadio diye dolone egeeseetakaso, “Niba Yelusalemi mapoo diyadee. Osoloso niba omapoo dileso ogoga odoosaboo heehowokeedoloso eli domopoo dumologa tugodalaiso. Niba yo tugodoloso yo deedeedi.

<sup>14</sup> Osoloso niba yayo dileso mosokulodugaduga omapoo dobolone, mosowo



ama mapoo egeesee takee, ‘Eligili odoo oso egeesee taka, “Ayo mo hamamee dili odoo gilimadoloso, Godeeye gababia wo nalame debi pooba gooboogoo kasomo?’ dee takee.

<sup>15</sup> Osoloso yayo niba moso dokohodoo ido peleso debi pooba gooboogoo toowa olo moodoo doloso melee eligileiso. Esiga niba iyo Godeeye Gababia wo nalai omapoo ka mopoodoo de,” diso.

<sup>16</sup> Esemme Yesu o hamamee dili odoo bakadio oso Yelusalem mi mapoo diyadeeso. Diba omapoo dilesos egeino, goo susuga ee Yesuye dimapoo taka goo sabolo tobuloso molome egeiso. Esemme diayo Godeeye Gababia wo nalame omapoo mopoodoo doloso, diba see Yesuye o hamamee dili odoo abo sabolo debei mapoo wedi diso.

<sup>17</sup> Osoloso habedee mapoo Yesu o hamamee dili 12 sabolo sibilesos moso omapoo peledabaso.

<sup>18</sup> Diba omapoo wo nolone doboome, Yesuye dimapoo egeesee takaso, “Ayo nimapoo taka, nima kuloduga odoo hee abolo wo hagee namolo oso a ha teli odoo mapoo tiasalaiso,” dee takaso.

<sup>19</sup> Esemme Yesu o hamamee dili odoo oso to hagee duloso, goohele sabolo dobolone, Yesu mapoo egeesee takaso, “Ayonee, o ayowo?” dee takaga meleeso.

<sup>20</sup> Esemme yayo dimapoo nei takaso, “Odoos 12 mooloogoodoo hagee ma kulodu, odoo agayo mo peleta mapoo abolo hodobo wo olugudolosos naga, a ha teli mapoo tiasalai odoo ogoso.

<sup>21</sup> Esiga Godeeyo to booka mapoo hogugu oso taka ee dodolone, Odoos Holo a talaiso. Esino Odoos Holo a ha teli odoo mapoo tiaseli odoo yo dala toowa talaiso. Oweeye yo soomagelega poogoo diepi, yo dala tele pegeliyo,” diso.

### *Lodee gooleebugu wo ne*

*(Mat 26:26-30; Luka 22:19-20)*

<sup>22</sup> Diba wo nolone doboome, Yesuye wo tolosos Godee mapoo goomoga to takolosos wo popeisoo. Osolosos o hamamee dili odoo

mapoo wo pulone egeesee takasos, “Wos hagee tolosos ne. Hagee mos susos,” diso.

<sup>23</sup> Osolosos yo see kapu wain i keesos tolosos, Godee mapoo goomoga to takolosos, dimapoo teneme, diayo susuga wain i nesos.

<sup>24</sup> Esemme Yesuye see egeesee takasos, “Hagee mos sawos, odoo susuga dia tokenee hapalame ka sologos bugu. Mos sawos oso Godeeye o odoo mapoo to kitulugos magoo gos oso tei peledabalame.

<sup>25</sup> Esiga ayo nimapoo taka. Ayo epedee hamaga dulone wain i see nalaimes. Esino hamamee Godeeye wiligis dolosos badeli mi mapoo wain i dia see nalaisos,” diso.

<sup>26</sup> Osolosos diba goomoga kosaiya hedebe poulosos, see Olipi mubi dokodoo paladeesos.

### *Pitaye Yesu boobados bigilei gos ee Yesuye taka*

*(Mat 26:31-35; Luka 22:31-34; Yon 13:36-38)*

<sup>27</sup> Esemme Yesuye see o hamamee dili odoo mapoo egeesee takasos, “Odoos susuga niyos a poogolosos kukulos dileisoo. Bei, Godeeyos to booka mapoo hogugos oso egeesee takoosos,

‘Godeeye sipi be bali odoo ee wooloomaga, sipi be susuga oso yimaga peegoo kukulos dileisoo.’”

<sup>28</sup> Osolosos Yesuye see egeesee takasos, “Esinos a ta magas hogados dilesos, ayo dagas malalos dilesos Gelilis mi mapoo niba tugodalaisos.”

<sup>29</sup> Esemme Pitaye nei Yesu mapoo egeesee takasos, “Odoos susuga oso namagas peegoo kukulos dugas, hedebe ayo nos poogoo dileimesos.”

<sup>30</sup> Esinos Yesuye yimapoo see egeesee takasos, “Ayo namapoo tei gos taka. Epeis gesi kolokolosos taka bakadios delegas, malalos hoogoo mologas, nayos mos gos gagadileis ee bakadios hedebe dalaisos,” dee takasos.

<sup>31</sup> Esinos Pitaye to kitulugos sabolos nei egeesee takasos, “Ayo egeesee selaimes! Edebeeyos nos wooloomagas, a nobolos hodobo talaisos,” disos. Esemme Yesuwos

hamamee dili odoo susuga oso to hedebe egeesee takaso.

*Yesuye Getesemeni homolee mapoo Godee mapoo taka*

*(Mat 26:36-46; Luka 22:39-46)*

<sup>32</sup> Osoloso Yesu o hamamee dili odoo sabolo Getesemeni olipi homo segei homolee omapoo sibadeeso. Osoloso Yesuye o hamamee dili odoo dimapoo egeesee takaso, “A dileso Godee mapoo takalaiya, niba hamapoo debee,” diso.

<sup>33</sup> Osoloso yayo egeesee takoloso, hedebe Pita, Yemes osoloso Yonee esee ido palaso. Yo peleso badoboome, goohele goo sabolo osoloso su hegi goo oso yimapoo simiso.

<sup>34</sup> Osoloso yayo dimapoo egeesee takaso, “Mo su ma kulodu hegi goo toowa oso molone, ayo talai olo koola tooboo. Esiga niba hamapoo koolone debee,” diso.

<sup>35</sup> Osoloso Yesu egeesee takoloso, dimaga pepooko hoogoo dileso, ebiso miyomoo tugusaloso balaboo tialoso molone Godee mapoo takaso, yimapoo dala toowa egee sibo ee Godeeye peegoo magalame.

<sup>36</sup> Yayo Godee mapoo takolone egeesee takaso, “Ma, mo Ma! Goo susuga namapoo kalawanee. Esiga dala toowa oso amapoo hagee sibo, nayo peegoo magalai soowayo? Esino nayo goomoga goo moodee, ayo goomoga goonee,” diso.

<sup>37</sup> Osoloso yo Godee mapoo taka koodobuloso wedi dileso egeino, o hamamee dili odoo bakadio hedebe di tiesamolome egeiso. Esememe yayo Pita mapoo egeesee takaso, “Saimon, no tiayo? No biame deiyepo hamapoo abolo hodobo koolone badalai tebiledo?”

<sup>38</sup> Esiga niba bolone Godee mapoo takolone ka debee, niba kukuli goo mapoo homodobiyaga. Bei nibada goo goolee oso goo tekepo talame goomogoso, esino nibada su oso ki me ka poogooso,” diso.

<sup>39</sup> Osoloso yo see wedi dileso, Godee mapoo takolone goo hedebe onosee takaso.

<sup>40</sup> Osoloso yo see dimapoo wedi sibilesi egeino, diba tiesa molome egeiso, bei diba

tila paga oso howo seme. Osoloso diayo Yesu mapoo to nei takalai gooleedele poogooso.

<sup>41</sup> Yesu yo see bakadio hedebe di mapoo Godee mapoo takoloso, o hamamee dili odoo mapoo wedi sibilesi, dimapoo egeesee takaso, “Niba hosolone wulo tiesa malala? Tia olo oso! Odo Holo, a tokenee odoo mapoo toloso tenelai biame olo epedee hamapoo sibo.

<sup>42</sup> Esiga koo ege, a tokenee odoo mapoo tiasalai odoo ee olo sibo. Esiga niba tebise, dimapoo dimo!” diso.

*Edebeeyo Yesu too*

*(Mat 26:47-56; Luka 22:47-53; Yon 18:3-12)*

<sup>43</sup> Yesu to osee komolome, o hamamee dili odoo hee Yudaseeye Yesu talame odoo mooloogoodoo toowa gilimado simiso. Egeesi ma kulodu tei moso wiligi odoo tebisa sabolo, tei eligili odoo tebisa sabolo, osoloso Yu odoowo wiligi odoo tebisa oso Yesu talame odoo hagee bia diye diso. Esememe diayo sibulone kaiya sabolo kodolo sabolo toloso sibadeeso.

<sup>44</sup> Egeesi ma kulodu Yudas yo epedee sibilega badolone, odoo Yesu talai mapoo egeesee takaso, “Ayo dileso adaga, odoo ogoso. Eseega niyo yo toloso medee bolone ka ido di,” diso.

<sup>45</sup> Osoloso Yudas yo odoo mooloogoodoo poogoloso dileso, Yesuye tebidi mapoo hoogoo dileso, yayo egeesee takaso, “Eligili odoo!” dee takoloso, Yesu adaso.

<sup>46</sup> Esememe odoo abo oso sibilesi Yesu too.

<sup>47</sup> Esino Yesu o hamamee dili odoo hee koola omapoo tebidi oso o kaiya tadoloso, tei moso wiligi odoo taba eyo tou teli odoo kaiyaso woomeleso eyo dooboo poogoome, dulu asooso.

<sup>48</sup> Esememe Yesuye yo talame sibadee odoo omapoo egeesee takaso, “Niyo ogoga a mesiya daga, a talame kaiya sabolo osoloso kodolo sabolo misigaloso ka sibadala?”

<sup>49</sup> Esino ayo biame susuga tei moso ma kulodu eligimo sileeme, niyo a egeliso. Esiga bei kaseme niyo a omapoo telega ka poogoowo? Esino niyo epei a talame simi

hagoso Godeeyo to booka mapoo hogugu oso taka to sabolo olo tobuoso,” diso.

<sup>50</sup> Esemé Yesu o hamamee dili odoosuga oso yo poogoloso kukulo diyadeeso.

<sup>51</sup> Osoloso odoosuga gie kauwa dugo booloso, Yesu diayo toloso dime hamamee deede diso. Esemé diayo yo ogoloso, yibolo talame o dugo mapoo temeleso, o dugo puobuguso.

<sup>52</sup> Esino o dugo dimapoo yane poogoloso, yo boodo diwe piaso.

*Yesu wiligi odoosuga tebisa mapoo goo midilame ido di*

*(Mat 26:57-68; Luka 22:54-55, 63-71; Yon 18:13-14, 19-24)*

<sup>53</sup> Osoloso diayo Yesu toloso tei moso wiligi odoosuga taba eyo mosopoo ido diso. Esiga moso ee ma kulodu tei moso wiligi odoosuga tebisa sabolo, Yu odoosuga wiligi odoosuga tebisa sabolo, osoloso tei eligili odoosuga oso daga olo mooloogoodoloso debeiso.

<sup>54</sup> Esemé Pitaye hamameede Yesu deede dileso, tei moso wiligi eyo moso eyo beele ma kulodu gadiso. Yo omapoo badolone, tei moso gidebeli odoosuga sabolo kekeisime dou hameleeso.

<sup>55-56</sup> Esemé tei moso wiligi odoosuga tebisa sabolo, osoloso Yu odoosuga dia goo midili wiligi tebisa oso Yesuwo goo maga gameene takeli odoosuga ee esiaso, yimapoo goo tokenee hee mologa, Yesu ka wooloomalame. Egeeseelone edebeeyo wulo gameene takolone Yesuwo goo maga goo opusomo opusomo di takaso. Esino diayo taka ee ma kulodu, tei goo hee molo egele.

<sup>57</sup> Esino odoosuga aboso tebisaloso, Yesuwo goo maga gamenee egeese takaso,

<sup>58</sup> “Iba odoosuga hagoso egeese takeme duso, ‘Edebeeyo tei moso tegei hagee ayo guobuguloso, see biame bakadio hedebe di ee ma kulodu tei moso dia tege-laiso. Esino edebeeyo tegelaimé,’ yayo dee takeme duso,” diso.

<sup>59</sup> Esino diayo to opusomo opusomo di taka ee ma kulodu tei goo egele.

<sup>60</sup> Esemé tei moso wiligi odoosuga taba oso odoosuga susuga mooloogoodoo ma kuloduga toboloso Yesu mapoo egeese woosaso,

“Odoosuga hagee biaso nee goo maga goo opusomo opusomo di ege takoo mapoo nayo to eyo nei takalaiméyo?” diso.

<sup>61</sup> Esino Yesuwo tei nei takele poogoo.

Esemé tei moso wiligi odoosuga taba oso to see Yesu mapoo egeese woosaso, “No Godeeyo owolo, Kelisosomo?” diso.

<sup>62</sup> Esemé Yesuwo tei nei egeese takaso, “O, aso. Esiga hamamee Odoosuga Holo, a Kitulugu Godeeyo dee deede dokolo mapoo buloso yibolo wiligi doloso badoga niyo agalaiso, osoloso Kei mi ma dokodooga, kolobo ma kuloduga see wedi siboga niyo agalaiso,” diso.

<sup>63</sup> Esemé tei moso wiligi odoosuga taba oso to hagee duloso, diya komonolone o dugo tologo buguloso egeese takaso, “Iyo o goo see midilame to abo taka ee dulei koo goomoo.”

<sup>64</sup> Bei yayo ‘a Godeeyo owolo oso’ dee taka maga, yayo Godee mapoo mesilega osoloso ebilega to tokenee taka, niyo olo duso. Esiga niyo goolee yimapoo ogoosuga moodolaiyo?” diso.

Esemé Yu odoosuga dia wiligi odoosuga tebisa susuga oso egeese takaso, “Yesu diya tokenee odoosuga, esiga yo wooloomalai tekepo,” diso.

<sup>65</sup> Esemé odoosuga aboso Yesu mapoo makawo pagaso. Osoloso diayo o howo dugoso gagaloso, dibada dee tiadoo oso woolone yimapoo egeese takaso, “Keliso, no tei Godee maga to toloso kokodo takomo sili odoosuga daga, no odoosuga agayo woolo?” dee takaga meleeso. Osoloso tei moso gidebeli odoosuga oso yo ido dulone woomodiso.

*Pitaye Yesuwo goo gagadi*

*(Mat 26:69-75; Luka 22:56-62; Yon 18:15-18, 25-27)*

<sup>66-67</sup> Osoloso Pita yo tei moso wiligi odoosuga taba eyo moso beele ma kulodu kekeisime dou holone badebeiso. Esemé tei moso wiligi odoosuga taba o tou teli sobo heeso sibilesi yimapoo medee bolone, egeese takaso,

“No nose Nasalet odoosuga Yesubolo silee odoosuga hee noso,” diso.

<sup>68</sup> Esem Pitaye sobo yimapoo gamenee egeesee takaso, “Nayo egee takoo eyo goo ee, a gooleedele,” diso. Osoloso Pita yayo egeesee takoloso, moso beele osulu gasibili pee mapoo diso. Esem kolokolo takaso.

<sup>69</sup> Osoloso tei moso wiligi odoo taba eyo tou teli sobo hagoso Pita see omapoo tebidi ogoloso, yayo odoo abo omapoo tebisamelee mapoo egeesee takaso, “Odo hagee tei Yesubolo sili hee yoso,” diso.

<sup>70</sup> Esem Pitaye see egeesee takaso, “Haye! Asonee,” diso.

Esem diba pepooko doboso hamamee, odoo abo koola omapoo tebisamelee oso Pita mapoo see egeesee takaso, “Bei no Gelili odoo osoloso Yesu sabolo Gelili odoo, esiga no Yesubolo sili odoo hee noso,” diso.

<sup>71</sup> Esem Pitaye to kitulugu sabolo egeesee takaso, “Ayo tei goo takelega poogooga, Godeeye amapoo dala toowa tenelai goomogo! Niyo odoo egee takoo a gooleedele!” diso.

<sup>72</sup> Osoloso Pita yo egeesee takoloso epedee omapoo, kolokolo taka bakadio diso. Esem Pita Yesuye yimapoo to taka hagee gooleebuguso, “Epei gesi kolokoloso taka bakadio delega, malalo hoogoo mologa, nayo mo goo gagadilei ee bakadio hedebe dalaiso.” Esem Pitaye to hagee gooleebugume, goohele toowa sibume, diya pisaso.

## 15

### *Yesu Paillet mapoo ido di*

*(Mat 27:1-2, 11-14; Luka 23:1-5; Yon 18:28-38)*

<sup>1</sup> Osoloso gesikolodee mapoo tei moso wiligi odoo tebisa sabolo, osoloso tei eligili odoo sabolo, osoloso Yu odoo dia wiligi odoo tebisa sabolo, osoloso wiligi odoo tebisa abo susuga oso goo hee moodoolai to mouso. Osoloso diayo to mouloso, Yesuwo dee tiso tiegisaloso, Loum gamalee mi toowa wiligi odoo taba, Pailleteeye badebei mapoo ido dileso yimapoo teneeso.

<sup>2</sup> Esem Pailleteeye Yesu mapoo egeesee woosaso, “No tei Yu odoo dia wiligi odoo taba nosomo?” diso.

Esem Yesuye nei egeesee takaso, “O, no olo egee takooso,” diso.

<sup>3</sup> Esem tei moso wiligi odoo tebisa oso Yesu tokenee goo bei tooso doloso, diya gigidiso.

<sup>4</sup> Esem Pailleteeye see Yesu mapoo egeesee woosaso, “No odoo susuga oso nee goo maga goo opusomo opusomo di egee takoo omapoo nayo to nei takalaimoyo?” diso.

<sup>5</sup> Esino Yesuye to nei takele. Esem Paillet yayo goo egee ogoloso diya dio diso.

*Pailleteeye Yesu wooloomalame woosa  
(Mat 27:15-26; Luka 23:13-25; Yon 18:39–19:16)*

<sup>6</sup> Dugo susuga ma kulodu Pailleteeye Yu odoo goomogalame, Godeeye Gababia wo ne biame mapoo odoo susuga oso goomoga odoo hee neliga moso ma kuloduga peegoo tamageeye deliso.

<sup>7</sup> Biame omapoo odoo hee neliga moso ma kulodu badebeiso, o hu Balabas. Daga yayo o odoo sabolo oso Loum gamalee odoo mapoo ha temeleso, diayo odoo hee wooloomaso.

<sup>8</sup> Esem odoo mooloogoodoo oso sibilesi, Paillet mapoo egeesee takaso, “Nayo odoo hee neliga moso ma kuloduga peegoo tamageliso. Esiga nayo dugo hamapoo odoo hee neliga moso maga peegoo tamagee,” diso.

<sup>9-10</sup> Egeesi ma kulodu tei moso wiligi odoo tebisa oso Yesu mapoo koolone, yo Paillet mapoo ido simi goo ee, yo ogoloso olo gooleedooso. Esem Pailleteeye odoo susuga mapoo egeesee woosaso, “Ayo Yu odoo nibada wiligi odoo hagee peegoo tamagalai, niba goomogosomo?” dee takaso.

<sup>11</sup> Esino tei moso wiligi odoo tebisa diayo odoo susuga mapoo toso pupulone, Paillet mapoo egeesee takee diso, “Iba Yesu gowoo, esino Balabas neliga moso ma kuloduga peegoo tamageeye, dee takee,” diso.



<sup>12</sup> Esemé Paileteeye dimapoo egeesee woosaso, “Ayo Balabas yo neliga moso ma kuloduga peegoo tamagooga, odoó hee hagee niyo Yu odoowo wiligi odoó taba deli ee, ayo kasee moodoolaisomo?” dee takaso.

<sup>13</sup> Esemé nei diayo to neligidi takolone Paillet mapoo egeesee takaso, “Yo homo bulubo magoo ma dokodoo yoguso enige!” diso.

<sup>14</sup> Esemé Paileteeye egeesee woosaso, “Bei kasi magayo? Yayo ogoó goo tokenee toowo?” diso.

Esino odoó susuga oso to diya neligidi egeesee takaso, “Yo homo bulubo magoo ma dokodoo yoguso enige!” diso.

<sup>15</sup> Esemé odoó susuga goomogalame, Paileteeye Balabas yo neliga moso maga peegoo tamagooso. Osoloso yayo o ha teli odoó mapoo takolone, Yesu we tiso wooloso homo bulubo magoo ma dokodoo yoguso enige, dee takaso.

*Ha teli odoó oso Yesu mane  
(Mat 27:27-31; Yon 19:2-3)*

<sup>16</sup> Esemé Paillet o ha teli odoó oso Yesu we tiso wooloso Loum gamaleeyo moso mapoo ido palaso. Osoloso omapoo ha teli odoó susuga gilimadoloso mooloo-goodooso.

<sup>17</sup> Osoloso diayo Yesu manolone game-nee yo wiligi odoó taba masi palame, kali dugo bige sage ee yimapoo kadiloso, we ti sidoloso o wiligi mapoo kadiso.

<sup>18</sup> Osoloso diayo Yesu mapoo manolone egeesee takaso, “Yu odoó dia wiligi odoó taba, iyo nee hu dokodoo poudoso,” dee takaga meleeso.

<sup>19</sup> Osoloso Yesuwo wiligi mapoo diayo weiso see woo see woo dolone, yimapoo makawo paga demeleso. Osoloso diayo Yesu mapoo manolone o mudugiy-opoo dibada ebiso miyomoo tugusaloso wiligi gauwuloso gamenee yimapoo tei to demeleso.

<sup>20</sup> Egeesee soloso koodobuloso ha teli odoó oso dugo Yesuye ka ee tamagoloso see Yesu o dugo kadiso. Osoloso yo homo

bulubo magoo ma dokodoo yoguso enigil-ame ido diso.

*Yesu homo bulubo magoo ma dokodoo yoguso eniga*

*(Mat 27:32-44; Luka 23:26-43; Yon 19:17-27)*

<sup>21</sup> Osoloso ha teli odoó oso Yesu idoloso diyadaga meleeno, diayo Saimon eli domopoo Yelusalem mapoo sibumolome tugooso. Osoloso diayo yo idoloso Yesuwo homo bulubo magoo imado diye, diso. (Saimon hagee Alesanda dio Lupus dio dibada ama. Yo Kulene mi mapoo badeli odoó.)

<sup>22</sup> Osoloso diayo Yesu toloso Gologota mi mapoo ido simiso. (Mi hu eyo bei ee wiligi ki mi.)

<sup>23</sup> Osoloso mi omapoo ido dileso, diayo Yesu mapoo sibilesa wain i sabolo dala mauwe pegeli melesenee sabolo wuluguloso, Yesu mapoo tenelame siso. Esino Yesuye wain i egee nele poogooso.

<sup>24-25</sup> Esemé gesikolo osoko howo bakadio hedebe di poogoloso osoko pouneme, diayo Yesu homo bulubo magoo ma dokodoo yoguso enigaloso tuluguso. Osoloso Yesuwo dugo pilame, diayo yoso dasigeli hee dasigaso.

<sup>26</sup> Osoloso edebeeyo Yesu woolooma goo eyo bei ee odoó susuga oso gooleedalame, odoó heeso Yesuwo wiligi oo poogoo dokodooga to egeesee hoguguloso kalamaso,

“Yu odoó dia wiligi odoó taba.”

<sup>27</sup> Osoloso mesiya bakadio sabolo homo bulubo magoo ma dokodoo yoguso enigaso. Odoó hee Yesuwo dee deedeede dokolo tulugu, osoloso odoó hee o dee dobusu dokolo tulugu diso. [

<sup>28</sup> Esiga Godeeyo to booka mapoo hogugu oso egeesee takooso,

“Yo mesiya masi talaiso.” Esiga Yesuye mesiya masi talame homo bulubo magoo ma dokodoo molone, to hagee tei diso.]\*

<sup>29</sup> Osoloso odoó aboso eli omaga dulone, Yesu ogoloso manolone dia wiligi wabisaso. Osoloso diayo yimaga to tokenee yimapoo takaga meleeso. Egeeseelone

**15:21:** Loum 16:13    **15:24-25:** Psa 22:18    **15:27:** Isa 53:12    \* **15:28:** To hagee odoó abo oso taka Makaye hogugu dee takeliso, esino odoó bei oso taka Makaye hogugule dee takeliso.    **15:29:** Psa 22:7; 109:25; Maka 14:58

diayo yimapoo egeesee takaso, “Nayo takolone, tei moso ee guobuguloso, biame bakadio hedebe di ee ma kulodu see dia ka tegelaigona, dee taka.

<sup>30</sup> Esiga no telega pagalame homo bulubo magoo ma dokodooga miyomoo mei!” diso.

<sup>31</sup> Osoloso tei moso wiligi odoo tebisa sabolo, osoloso tei eligili odoo dibolosee Yesu manolone dieso dimapoo egeesee takaso, “Yayo odoo abo pidimo siliso. Esino yo epedee eyo nediliyo pidilei tebile-doo.

<sup>32</sup> Keliso, Isalael odoo ibada wiligi odoo daga, yo homo bulubo magoo ma dokodooga miyomoo meilei tekepo. Egeeseega yayo mou ogoloso iyo yimapoo tei talaiso,” diso. Esememe mesiya bakadio oso, homo bulubo magoo ma dokodoo yoguso enigaloso molone, dibolosee Yesu mapoo maneso.

*Yesuye ta*

*(Mat 27:45-56; Luka 23:44-49; Yon 19:28-30)*

<sup>33</sup> Osoloso osoko olo oo domopoo too-boome, mi toowa egee nolugo doloso melee, osoko howo bakadio hedebe di poogooso.

<sup>34</sup> Osoloso neliga melee ee mauwe poo-goome, Yesuye o to oso neligidi egeesee iso, “Eloi, Eloi, lama sabakatani?” To hageeyo bei ee egeesi moloso, “Mo Godee, mo Godee, bei kasi maga nayo a ka pagala?” diso.

<sup>35</sup> Esememe odoo koola omapoo tebisa melee oso to hagee duloso, diayo egeesee takaso, “Dui! Yo Ilaya i,” diso.

<sup>36</sup> Esememe odoo heeso hoguo dileso dugo toloso wain i mei nali mapoo olugu doloso homo sage su mapoo tialogoloso Yesuye nalame o maga mapoo heligiso. Osoloso yayo egeesee takaso, “Ougo. Ilayaye sibilesyo yo toloso miyomoo mouwa beleso bamo,” diso.

<sup>37</sup> Esememe epedee omapoo Yesuye neligidi iloso taso.

<sup>38</sup> Esememe Yesuye ta biame omapoo, tei moso tegei ma kulodu dugo kodia oso kisi melee ee, dokodooga eyo tologomo abaga mouno miyomoo sabuguso.

<sup>39</sup> Esememe ha teli odoo gibadeli odoo oso Yesuwo homo bulubo magoo ma koola omapoo tobudulone, Yesuye tolone goo moodoo ogoloso, yayo egeesee takaso, “Tei takoo, odoo hagee tei Godeeyo owolodoo,” diso.

<sup>40-41</sup> Esememe sobo abo Yesubolo Gelili abaga Yelusalem mapoo sibadee oso, eli sage abaga Yesu homo bulubo magoo ma dokodoo molome balaga meleeso. Sobo mooloogoodoo egee ma kulodu de-bei, dibada hu Meli-Magadalin sabolo, osoloso Meli hee (Yemes pepooko dio Yosep dio dibada owee) sabolo, osoloso Salome sabolo, diayo Yesu mapoo bameleeso. Sobo bakadio hedebe di hagoso daga Yesubolo Gelili mapoo silone, Yesu pidimo siliso.

*Yesu midoo ma kulodu toosoo*

*(Mat 27:57-61; Luka 23:50-56; Yon 19:38-42)*

<sup>42-43</sup> Yu odoowo hasali biame malalo hoogoo molome, diayo tei doloso dabalame bi mopoodoo doo biame habe omapoo, Yosep Alimatiya odoo yayo Paileteeye badebei omapoo diso. Yo Yu odoowo wiligi toboloso badolone, Godeeye wiligi doloso badeli oso sibilei omapoo bameli. Yayo ebilega Yesuwo kou talame Paillet mapoo woosaso.

<sup>44</sup> Esememe Yosepeeye Yesu taso dee takeme, Paillet diya hoowaso. Bei, Paileteeye goolee Yesu tele, dee gooleeso. Esino Yesu olo saga taso. Esememe yayo ha teli odoo gibadeli odoo Yesuye ta egei mapoo egeesee woosaso, “Yesu taso dee takemeni teiyo?” diso.

<sup>45</sup> Esememe ha teli odoo gibadeli odoo oso Yesu tei taso dee takeme, Paileteeye Yosep mapoo egeesee takaso, “Yesuwo kou todi,” diso.

<sup>46</sup> Esememe Yosepeeye dugo sage medee tekepo moleeso toloso, Yesuwo kou homo bulubo magoo ma dokodooga miyomoo tomeilesyo, dugoso tiadooso. Osoloso yayo Yesuwo kou toloso wulu ou sage yoso moodoo ma kulodu magooso. Osoloso yayo yo toowa bidigamo dileso, wulu ou miyopoo kisiso.

<sup>47</sup> Osoloso Meli-Magadalin dio Yosepeeyo owee Meli dio Yesuwo kou magoo mi diayo egeiso.

## 16

### *Yesu ta maga hogadi*

*(Mat 28:1-8; Luka 24:1-12; Yon 20:1-10)*

<sup>1</sup> Osoloso Yu odoowo hasali biame oso dileso koodobuloso, Meli-Magadalin, Yemeseeyo owee Meli, osoloso Salome, diayo sisigageli bi medee tekepo Yesuwo kou mapoo hedilame moleeso misigaso.

<sup>2</sup> Osoloso Sadee toowa biame gesikolodee osoko gie pouneme, diba Yesuwo bi agalame diyadeeso.

<sup>3</sup> Diba eli domopoo diyadulone, dieso dimapoo egeesee takaso, “Yo toowa wulu ou miyopoo kisi ee, odoo agayo peegoo bidige bigileisomo?” diso.

<sup>4</sup> Esino diba dileso egeino, yo toowa wulu ou miyopoo kisi ee peegoo bidigamo dileso molome egeiso. Yo hagee diya toowa.

<sup>5</sup> Esem sobo diayo wulu ou ma kulodu galaga dileso egeino, odoo gie kauwa dugo sage heliye mouloso dee deede dokolo badoboome egeiso. Esem sobo diayo ogoloso, diba diya ebigaso.

<sup>6</sup> Esino yayo dimapoo egeesee takaso, “Niba haga na ebi. A gooleedooso, niba Yesu Nasalet odoo homo bulubo magoo ma dokodoo yoguso eniga odoo ee esiamo silesibo. Esino yo hamapoo koo moloso. Yo ta maga hogado diso. Esiga niba sibilesa o kouso melee mi mapoo ege.

<sup>7</sup> Esiga niyo dileso, Yesu o hamamee dili Pita dimapoo takee, ‘Niba Gelili mapoo diyadee. Bei, Yesu yo daga malalo Gelili mapoo duso. Esiga niba dileso Gelili mapoo Yesu agalaiso. Bei, Yesu yayo to hagee daga nimapoo takaso,’” diso.

<sup>8</sup> Esem diayo goo tiadoo sabolo obulone kikiligolone midoo maga hoguo diyadeeso. Esino diayo eli domopooga diyadulone, odoo hee mapoo to takele poogooso, bei diba obume.

*Yesuye daga odoo abo mapoo dileso peledaba\**

*(Mat 28:9-10; Yon 20:11-18)*

[<sup>9</sup> Yesuye sadee toowa gesikolodee mapoo ta maga hogaduloso, yo daga Meli-Magadalin mapoo dileso peledabaso. Meli hagee Yesuye daga telega silone, bo holo 7 o kulodu doboome, yayo peegoo hasiso bugu sobo yoso.

<sup>10-11</sup> Esem Meli yayo Yesu ta maga hogaduloso silee ogoloso, Yesuwo hamamee dili odoo diayo goohele sabolo pupusugulone debei mapoo dileso egeesee takaso, “Yesu ta maga hogaduloso sileeme, ayo egeiso,” diso. Esino diayo to hagee duloso, o to mapoo tei tele poogooso.

<sup>12</sup> Osoloso see hamamee Yesubolo silesibili odoo bakadio Yelusalem abaga sibataga molome, Yesu yo mudu opusomo doloso dimapoo peledabaso.

<sup>13</sup> Esem diayo Yesu ogoloso, diba see wedi dileso, Yesuwo hamamee dili odoo dimapoo diayo Yesu egei takeme, diayo dibada to mapoo tei tele poogooso.

*Yesuye o hamamee dili odoo 11 dimapoo dileso peledaba*

*(Mat 28:16-20; Luka 24:36-49; Yon 20:19-23; Diye 1:6-8)*

<sup>14</sup> Osoloso hamamee, Yesuwo hamamee dili odoo 11 wo nalaga molome, Yesu omapoo dileso peledabaso. Osoloso Yesuye to kitulugu sabolo egeesee takaso, “Niba tei too mauwe odoo! Bei kasi maga odoo abo oso a ogoloso, sibilesa nimapoo takeme, dimapoo tei telega ka poogoowo?” diso.

<sup>15</sup> Osoloso Yesuye dimapoo egeesee takaso, “Niba mi susuga mapoo dileso, to tekepo odoo susuga mapoo takomo di.

<sup>16</sup> Esiga odoo agayo to tekepo mapoo tei toloso howo oluguga, yo badoboso, kookaiyo gie badeli talaiso. Esino odoo agayo to tekepo mapoo tei telega poogooga, Godeeye goo midilei biame mapoo o goo midiloso yimapoo nei dala tenelaiso.

**16:7:** Mat 26:32; Maka 14:28 \* **16:8:** To hagee odoo abo oso taka Makaye hogugu, dee takeliso. Esino odoo bei oso taka Makaye hogugule, dee takeliso. **16:14:** 1Kol 15:5 **16:15:** Diye 1:8 **16:16:** Diye 2:38 **16:17:** Diye 2:4; 8:7

<sup>17</sup> Osoloso edebeeyo to tekepo mapoo tei toga, diayo mo kitulugu sabolo goo toowa opusomo di moodoogamo silesibileiso. Egeesi ma kulodu diayo odoo bo holo oso paladee mo hu maga peegoo hasiso bigileiso. Osoloso diayo to opusomo opusomo di kalagalaiso.

<sup>18</sup> Osoloso dibada deeso sa talaiso, osoloso pei i nalagaga, diba wedileime. Osoloso odoo paigiga mapoo dibada deeso sigo daga, susuga weido dalaiso,” diso.

<sup>19</sup> Osoloso Lodee Yesuye dimapoo to taka koodobuloso, Godeeyo kitulugu oso yo Kei mi mapoo ido peleso, Godeebolo wiligi doloso badalame, Godeeyo dee deede dokolo peleso biaso. <sup>20</sup> Esem Yesu o hamamee dili odoo oso Yesuwo to ee mesilone, mi susuga mapoo to tekepo takomo diyadeeso. Egeeseelone diayo Lodeeye kitulugu sabolo goo toowa opusomo di moodoogaso. Bei, edebeeyo to tekepo mapoo tei doloso ogoloso gooleedalame.]



## Luka To tekepo Lukaye hogugu

### *Luka booka goo eyo bei*

Odoo Luka hagee Yu odoonee osoloso Yesuwo hamamee dili odoonee. Esino yo melesenee neli odoo badolone o odoo Poloye Godeeyo to takomo sileeme yibolosee silee. Lukaye goo toowa booka hamapoo hogugu ee egeesee moloso. Goo ee, Yesu Kelisoye hedebe Yu odoono pidilame ka sibile. Esino yayo Yu odoo sabolo osoloso mipoo toowa hamapoo debeli odoo susuga sabolo pidilame ka simi. Osoloso dala ma kulodu egee do sabolo osoloso goohela ma kulodu egee do sabolo pidilame ka simi. Osoloso Yesuye odoo susuga mapoo eligimo silee goo ee o booka hamapoo hoguguso.

<sup>1-2</sup> Godeeye ima kulodu tou temelee odoo aboso bei mooloogoo maga goo egee ogoloso diba see Godeeyo tou talame, odoo ma kulodu goo egee takomo silesibilame bei mooloogooso. Diayo egee takomo silesibo goo ee iba olo duso. Esemee goo tei duluga odoo sabolo osoloso goo tei egei odoo sabolo oso taka duloso, diayo goo ee hoguguso.

<sup>3-4</sup> Esino goo susuga bei mooloogoo maga ayo medee gooleedooga, ayo to hagee see medee ka hoguga. Esiga Tiyopoles wiligi odoo hu toowa too, nayo du goo ee medee tei goodoo dalame, ayo namapoo to hogugu hagee ka teneeso.

### *Yonee odoo howo oluguli soomagalai goo ee yebugu*

<sup>5</sup> Helodeeye Yudiya mi mapoo wiligi toboloso badebei biame omapoo, Godee ogo odoo ogo doloso domo badeli odoo hee badebeiso, o hu Sekalaya. Yo Godee ogo odoo ogo doloso domo badeli odoo mooloogoodoo hee Abiyayo mooloogoodoo ma kulodu badebeiso. Osoloso osobowo hu Elisabet, obakadio Elonowo soosoo.

<sup>6</sup> Sekalaya dio Elisabet dio Godeeyo howo woola mapoo tekepo doloso

dobolone, Godeeye kokodo taka to sabolo osoloso yayo tei magoo goo ee medee dodolone debeiso.

<sup>7</sup> Esino diba holo soomagelega debeiso. Bei, Elisabet yo sobo deme taba, osoloso sobo adaga poloso badebei. Osoloso Sekalaya onosee olo adaga poloso badebei.

<sup>8</sup> Biame heeso Sekalaya o mooloogoodoo oso tou talai biame simiso. Esemee Sekalayaye Yu odoo dia tei moso mapoo peleso Godeeyo howo woola tobodulone tou temelee.

<sup>9</sup> Osoloso Godee ogo odoo ogo doloso domo badeli odoo oso dima kulodu odoo hee hesilame diayo yo odoo hu ma ee kobumeleso Sekalaya hesiaso. Esemee diayo Sekalaya yo Godeeyo tei moso ma kulodu sisigageli medee tekepo Godee mapoo gicalagalame hesiaso. Esemee Sekalayaye Yu odoowo tei moso mapoo peleso sisigageli medee tekepo gigalegemeleeso.

<sup>10</sup> Esemee yayo sisigageli medee tekepo gicalogomolome, odoo susuga oso tei moso pee mapoo dobolone Godee mapoo takemeleeso.

<sup>11</sup> Sekalaya yo tei moso ma kulodu osee badoboome, Godeeyo momaiye oso sisigageli medee tekepo gicaligili dosulu deede dokolo mapoo peledoboloso tebidiso.

<sup>12</sup> Esemee Sekalayaye momaiye ogoloso dio dulone diya ebiaso.

<sup>13</sup> Esino Godeeyo momaiye oso yimapoo egeesee takaso, "Sekalaya, no haga na ebi! Nayo Godee mapoo taka ee yayo olo duso. Nosobo Elisabet koowasi moodooloso giso holo soomagalaiso. Eseega nayo holope o hu Yonee hedi.

<sup>14</sup> Yayo namapoo goomoga tosibileiso. Osoloso yo soomagooga, odoo susuga oso goomogalaiso.

<sup>15</sup> Bei, yayo Godeeyo howo woola hu toowa toloso badalaiso. Osoloso yo yugune nalaime. Esino oweeye yo soomagoo maga bei mooloogoloso Dio Tei oso kitulugu sabolo badalaiso.

<sup>16</sup> Osoloso yayo Isalael odoo see tobu dibada wiligi odoo Godee mapoo gilimado

sibileiso.

<sup>17</sup> Yo Ilayaye kitulugu sabolo badebei egeesi masi badolone, Lodeeye sibilei mologa daga malalo yayo sibileiso. Osoloso yayo odoo susuga Lodeeye egee sibo goo omapoo mopoodoo dolone dobolone, ma dio sabolo owolo dio sabolo mesie goo mapoo gilimado sibileiso. Osoloso yayo Godeeyo to mapoo koo mesimo silesibili odoo dia goo goolee ee see Godeeyo howo woola tekepo goo talame dia goo goolee su wudileiso.”

<sup>18</sup> Esino Sekalayaye Godeeyo momaiye mapoo egeese takaso, “Ayo ogoogo ogoloso nayo egee takoo goo mapoo tei doloso ka gooleedalaiyo? Bei, a olo giso adaga osoloso mo sobo onosee sobo adaga,” diso.

<sup>19</sup> Godeeyo momaiye oso yimapoo nei egeese takaso, “Mo hu ee Geibulu. A Godeeyo mudugiyopoo badeli. Ayo namapoo to tekepo hagee takalame, Godeeye a sibeye diso.

<sup>20</sup> Esino no dui! No to kelega poogoloso badalaiso. Bei, nayo mo to mapoo koo tei to. Esiga no to kelega badoga, ayo namapoo taka goo hagoso peledabalai biame tugodoo omapoo ogoloso see to kalaiso,” diso.

<sup>21</sup> Sekalayaye tei moso ma kulodu badebei diya koodoowoome, odoo aboso peegoo yo bolone dobolone egeese takaga meleeso, “Yo ogoogo tamalabele?” diso.

<sup>22</sup> Sekalaya tei moso maga gasibileso, to kelega tobudulone, wulo deeso edidi takaso. Esemee odoo susuga oso goo ee ogoloso gooleedooso, yo tei moso tegei ma kulodu badolone o howo opusomo deme, goo hee egeidoo, diso.

<sup>23</sup> Sekalayaye tei moso ma kulodu tou temelee biame ee koodobuloso, yo see o mi mapoo wedi diso.

<sup>24</sup> Osoloso hamamee Sekalayayo osobo Elisabet koowasi moodooloso badolone, a dee tiadoo ma kulodu Elisabeteeye o moso kuloduga peegoo gadile.

<sup>25</sup> Osoloso Elisabet eyo nediliyo egeese gweliso, “Godeeye a pidiso, osoloso ayo deme toboloso badolone odoo howo

woola simili goo ee yayo amaga peegoo togobuguso,” deliso.

### *Yesu soomagalai goo ee yebugu*

<sup>26-27</sup> Elisabet koowasi moodooloso badebei a 6 poogoloso badoboome, Godeeye o momaiye Geibulu sobo obuo Meli mapoo meiye, diso. Meli yo Gelili mi toowa ma kulodu Nasalet mi pepooko mapoo badeli. Esino odoo hee Meli hulame badebeiso, o hu ee Yosep, yo Deibidi dio bala hedebe.

<sup>28</sup> Osoloso Godeeyo momaiye oso meilesi Meli mapoo egeese takaso, “Emegei, Godeeye sobo no olo hesiaso. Osoloso Godeeye nobolo hodobo badoso,” dee takaso.

<sup>29</sup> Meli to hagee duloso goo tiademe, to hageeyo bei ee diya goolee meleeso.

<sup>30</sup> Esino Godeeyo momaiye oso Meli mapoo to nei egeese takaso, “Meli, no haga na ebi. Bei, Godeeye namapoo diya goomogoso.

<sup>31</sup> No koowasi moodooloso giso holo soomagalaiso. Osoloso nayo o hu Yesu hedi.

<sup>32</sup> Yayo hu toowa toloso badalaiso. Osoloso yo Godeeyo owolo dalaiso. Osoloso amawe Deibidiye wiligi toboloso badebei goo ee see wiligi odoo Godeeye yimapoo tenelaiso.

<sup>33</sup> Esiga yayo Yekobowo bala ma kulodu wiligi toboloso badalaiso. Osoloso yayo wiligi toboloso badoga hoo pagalai mauwe,” diso.

<sup>34</sup> Esemee Meliye Godeeyo momaiye mapoo to nei egeese takaso, “Goo hagee amapoo egeese kasee peledabalaiyo? A sobo obuo, esiga giso dia goo ee a gooleede,” dee takaso.

<sup>35</sup> Esino Godeeyo momaiye oso yimapoo egeese takaso, “Dio Tei oso namapoo sibileiso, osoloso Godeeye kitulugu oso no gagalaiso. Esiga nayo holope soomagalame egee see ee tei holo, osoloso yo Godeeyo owolo dalaiso.

<sup>36</sup> Esiga no dui! No nemisi Elisabet goolee. Yo sobo adaga poloso badolone deme toboloso badoso diso. Esino yo epedee koowasi badebei a 6 poogooso.

<sup>37</sup> Bei, Godeeye goo susuga ee moodoolai yo teiba,” diso.

<sup>38</sup> Meliye egeesee takaso, “A Godeeyo tou teli sobo. Esiga nayo amapoo taka goo ee amapoo moodoolai a goomogo,” diso. Esem Godeeyo momaiye oso Meli poogoo diso.

*Meliye Elisabet agalame di*

<sup>39-40</sup> Osoloso biame omapoo Meli yo mopoodoo doloso Elisabet agalame saga diso. Yo Yudiya esia mapoo peleso, Sekalayaye badebei mi pepooko mapoo peledoboloso, see Sekalayayo mosopoo diso. Yo Sekalayayo mosopoo dileso Elisabet ogoloso emegei di to takaso.

<sup>41</sup> Elisabet Meliye emegei di to taka du domo mapoo holope oso o beliyee ma kuloduga dabaso. Osoloso Dio Tei oso Elisabet mapoo sibume, yo kitulugu tooso.

<sup>42</sup> Esem yayo to neligidi egeesee takaso, “Sobo susuga ma kulodu Godeeye namapoo diya goomogolone, nama kulodu holope egee bado sabolo yimapoo diya goomogoso.

<sup>43</sup> A hu toowa too sobonee. Esino mo Lodeeyo oweeye a agalame simiso. Goo omapoo a diya goomogo.

<sup>44</sup> Esem nayo amapoo emegei di to takeme, holope mo beliyee ma kulodu badebei oso goomogolone dabaso.

<sup>45</sup> Godeeye namapoo peledabalai goo ee takeme duloso tei too maga, Godeeye namapoo goomoga tenelaiso,” diso.

*Meliye Godeeyo hu dokodoo poudoolone goomoga tenee*

<sup>46</sup> Osoloso Meliye egeesee takaso, “Mo sooloo ma kuloduga Godee mapoo goomoga to taka.

<sup>47</sup> Osoloso mo dio oso mo Godee mo gie badeli pidili mapoo goomogo.

<sup>48</sup> Bei, yayo o tou teli wuluge sobo a toowa doloso gooleeso.

Esiga epedee hamaga dulone odoo susuga oso a Godeeye pidi sobo dalaiso.

<sup>49</sup> Bei, Kitulugu Godeeye amapoo goo toowa abo olo moodooso. Yo tei.

<sup>50</sup> Edebeeyo Godee mapoo mesilone dogo, Godeeye sooloo deli goo oso dimapoo kookaiyo osee malaiso.

<sup>51</sup> Osoloso yayo kitulugu oso goo toowa abo olo moodoogaso.

Osoloso yayo odoo dieso nediliyo tekepo doloso si howeli odoo ee peegoo hasiso buguso.

<sup>52</sup> Osoloso yayo wiligi odoo tebisa diayo wiligi dalame kitulugu too hu ee peegoo tabuguso.

Esino odoo dieso pepooko doloso debeli odoo ee pidilone, diba dokodoo poudooso.

<sup>53</sup> Osoloso yayo nei mauwe odoo ee bi tekepo oso pidiso.

Esino bi bei odoo ee mosoowe peegoo hasiso buguso.

<sup>54-55</sup> Osoloso yayo ibada amawe dio sabolo to kitulugu magoo ee dodolone o to mapoo mesimo silesibili Isalael odoo pidiso.

Esiga yayo sooloo deli goo oso Eibalaham sabolo osoloso amawe dimapoo kookaiyo moloso osee malaiso,” diso.

<sup>56</sup> Meliye Elisabet dio badebei a bakadio hedebe di poogoloso see o mi mapoo wedi diso.

*Yonee odoo howo oluguli soomagoo*

<sup>57</sup> Elisabet damamee ti biame omapoo, yayo giso holo soomagooso.

<sup>58</sup> Godeeye Elisabet mapoo goo tekepo moodoo maga o soosoo sabolo, osoloso yima koola mapoo debeli odoo sabolo oso goo hagee duloso, goomoga hodobo Elisabet bolo poudooso.

<sup>59</sup> Osoloso giso holo soomagoloso abaga dino biame 8 mapoo diayo holope o kolo koolame mooloogoodooso. Osoloso diayo holope o hu amamo hu Sekalaya hedilame goomogaso.

<sup>60</sup> Esino owee Elisabeteeye egeesee takaso, “Haye, o hu Yonee hedilei,” diso.

<sup>61</sup> Esino diayo yimapoo egeesee takaso, “Yonee egee namawe dio eyo hunee,” diso.

62 Osoloso diayo see holope eyo ama mapoo o hu odoo ogu hedileiyo doloso deeso edidi takaso.

63 Esemé Sekalayaye holope eyo hu magalame odoo susuga mapoo dasogo sabolo homo kolo sabolo yimapoo tenee doloso deeso edidi takaso. Esemé yayo holope eyo hu egeesee magooso, o hu Yonee. Esemé odoo susuga oso goo hagee ogoloso dio diso.

64 Esemé epedee omapoo Sekalaya to kelega poogoloso badebei see to kolone Godeeyo hu dokodoo poudoomo sileeso.

65 Osoloso mi omapoo debeli odoo oso goo hagee ogoloso ebigaso. Osoloso Yudiya esia mapoo debeli odoo susuga oso goo hagee duloso to kesameleeso.

66 Osoloso goo hagee duli odoo oso goolone egeesee woosaso, “Holope hagee odoo kasi masi badobomobelee,” diso. Bei, diba egeiso, Godeeye kitulugu oso yibolo molome.

*Sekalayaye Godeeyo hu dokodoo poudoolone goomoga tenee*

67 Yoneeyo ama Sekalayaye Dio Tei oso kitulugu toloso badolone malalo hoogoo peledabalai Godeeyo to ee yayo malalo egeesee takaso,

68 “Isalael odoo dia wiligi odoo Godeeyo hu dokodoo poude!

Bei, yayo sibileso o odoo see eyo gili-madalame neiso tooso.

69 Osoloso Godeeyo tou teli odoo Deibidiyo bala ee ma kuloduga gie badeli pidili odoo kitulugu toowa imapoo olo teneeso.

70 Daga hoogoo Godeeye goo hagee o howo woola todoloso dobolone Godee maga to toloso kokodo takomo sili odoo oso imapoo olo takaso.

71 Esiga imapoo ha teli odoo osoloso imapoo hegili odoo oso kitulugu ee ma kuloduga Godeeye iba peegoo gilimado dileiso.

72-73 Osoloso Godeeye ibada amawe dio sooloo dolone pidileiso diso.

Osoloso yayo Eibalaham dio to kitulugu magoo ee osee goolee malaiso diso.

74 Esiga Godeeye imapoo ha teli odoo ma kuloduga gilimadoloso peegoo dileiso, iyo Godeeyo tou tolone dobolone ebia goo mauwe poogoloso dabalame.

75 Esiga iyo debei ma kulodu Godeeyo howo woola tekepo dobolone todolone dabalai tekepo.

76 Esino mo holo, no odoo susuga oso dokodoo badeli Godee maga to toloso kokodo takomo sili odoo dalaiso.

Bei, Lodee sibilega badoga, daga malalo nayo dileso yayo sibilei goo mapoo odoo mopoodoo dalame gu takala dileiso.

77 Nayo o odoo gie badeli pidilei goo ee eligileiso.

Goo ee dibada goo tokenee hapooga, gie badeli talaiso.

78 Godeeye iba sooloo dolone diya goolee moloso.

Esiga Kei mi ma dokodooga yayo hudi magoo odoo oso mi gie hadobuoga osokoso egee pouno egeesee masi imapoo sibileiso.

79 Godeeye hudi magoo odoo hagoso teli mapoo dili eli omapoo egee do sabolo osoloso neliga ma kulodu egee do odoo dimapoo pounileiso.

Osoloso yayo iba gilimado dileiso, Godee sabolo mesie dabalame,” diso.

80 Yonee kauwulone o dio oso kitulugu sabolo badebeiso. Yo miwe poogoo mi mapoo badoboso biame oso sibume, Isalael odoo dimapoo to tekepo takalame simiso.

## 2

*Yesu soomagoo  
(Mat 1:18-25)*

1 Biame omapoo Sisa-Ogastas yayo Loum odoo dia wiligi odoo toboloso badolone, odoo susuga eyo hu booka mapoo magalame tei magooso.



<sup>2</sup> Hu tomo di hagee hu telega moloso Kuliniyos yayo Siliya mi mapoo wiligi odoo toboloso badolone daga bei ka mooloogoo.

<sup>3</sup> Esemé odoo susuga dibada midee mapoo dia hu magalame diyadeeso.

<sup>4</sup> Yosep hagee Deibidiyo amawe. Esiga yo Gelili mi ee ma kulodu mi hee Nasalet maga, see Yudiya mi mapoo mi hee Betilihem mapoo o hu magalame palaso. Bei, Betilihem mi egee Deibidi o soosoo dibada midee.

<sup>5</sup> Yo Meli hulame dadagoloso dia hu magalame palaso. Esino Meli yo olo koowasi moodooloso badebeiso.

<sup>6</sup> Diba Betilihem mi mapoo dileso peledoboloso omapoo doboome, Meli damamee tiso.

<sup>7</sup> Osoloso yayo holope daga malalo giso holo soomagooso. Holope soomagoloso dugoso tiadoloso gala hu nei nedili moso tegei eyo kulodu howogi masi mapoo tiediso. Bei, odoo soo oso sibilesi tieli moso ee ma kulodu debi mauwe neme.

*Sipi be bali odoo oso Yesu soomagoo goo ee du*

<sup>8</sup> Yesu soomagoo gesi omapoo sipi be bali oso Betilihem mi koola mapoo dibada sipi be balaga meleeso.

<sup>9</sup> Esemé Godeeyo momaiye oso saga epedee omapoo dimapoo sibilesi peledabaso. Osoloso Godee yayo toowa doloso badeli goo omaga o gadeebugu oso diba teme, diya ebigaso.

<sup>10</sup> Esino momaiyeso dimapoo egeesee takaso, “Niba haga na ebi. Bei, odoo susuga oso goomogalame ayo nimapoo to tekepo tosiba.

<sup>11</sup> Epei Deibidiyo mi mapoo odoo susuga eyo gie badeli pidilei holope ee soomagooso. Yo Keliso Lodee.

<sup>12</sup> Yo dugoso tiadoloso gala hu nei nedili howogi masi mapoo tiamologa ogoloso gooleedalaiso,” dee takaso.

<sup>13</sup> Osoloso epedee saga omapoo momaiye mooloogoodoo toowa oso Kei mi maga sibilesi, momaiye daga malalo simi sabolo hodobo mooloogoodooso. Osoloso

momaiye susuga oso Godeeyo hu dokodoo poudoolone egeesee takaso,

<sup>14</sup> “Kei mi ma dokodoo badeli Godee mapoo goomoga poude!

Osoloso mipoo hamapoo Godeeye goomoga odoo dimapoo mesie goo oso mele dee,” diso.

<sup>15</sup> Osoloso momaiye susuga oso diba poogoloso Kei mi ma dokodoo see wedi paladeeso. Esemé sipi be bali odoo oso dieso nediliyo egeesee takaso, “Iba Betilihem mi mapoo Godeeye imapoo taka goo ee peledaba beleso agalame dimo,” diso.

<sup>16</sup> Esemé diba saga dileso egeino, Meli dio Yosep dio holope gala hu nei nedili howogi masi mapoo tiedi molome egeiso.

<sup>17</sup> Osoloso diba dileso holope ogoloso momaiyeso holopeyo goo dimapoo taka ee see diayo odoo abo omapoo debei mapoo takaso.

<sup>18</sup> Esemé sipi be bali odoo oso holope eyo goo takeme duloso odoo susuga diya howoogadooso.

<sup>19</sup> Esino Meli yo goo hagee duloso biame susuga ma kulodu boobado bigilega osee goolee meleeso.

<sup>20</sup> Esemé sipi be bali odoo diba see wedi dulone, diayo du goo sabolo osoloso diayo egei goo omaga Godee mapoo goomoga toowa poudooso. Bei, diayo egei goo susuga ee momaiyeso taka goo sabolo teibaneme.

*Yesu yo tei moso mapoo ido pala*

<sup>21</sup> Osoloso holope soomagoloso abaga dino biame 8 mapoo o kolo kooso. Osoloso yo Yesu hediso. Bei, daga yo Meliyo beliye ma kulodu mauwe mapoo momaiyeso hu hagee olo hediso.

<sup>22-24</sup> Meli dio Yosep dio Moseseeye tei magoo ee dodolone Godeeyo howo woola tokenee mauwe dabalame, mopoodoo doo biame koodobuloso, diayo Yesu idoloso Yelusalem mi mapoo diso. Osoloso diba Yu odoowo tei moso mapoo peleso, diba see Godeeyo howo woola tokenee mauwe dabalame, só bakadio wooloso Godee mapoo teneeso. Bei, Godee o tei magoo oso egeesee takooso, “Niba molo bakadio o, wi pepooko bakadio wooloso amapoo

tenee,” deeso. Osoloso diba tei moso tegei mapoo peleso, Yesu see Godee mapoo teneeso. Bei, Godee o tei magoo oso egeesee takooso, “Malalo soolooga magoo giso holo susuga Godee mapoo tenee,” deeso.\*

<sup>25</sup> Biame omapoo Yelusalem mi mapoo adaga hee badebeiso, o hu Simiyon. Yo Godeeyo howo woola tekepo doloso badolone, hedebe Godeeno diya goolee sabolo badeliso. Esino yayo Godeeye Isalael odoo mapoo hegi goo melee ee togobigilame biame oso sibilei ee bolone bameleeso. Osoloso Dio Tei oso yibolo badebeiso.

<sup>26</sup> Esino yo adaga poloso telega badolone, Godeeye hesia Keliso yo agalai goo ee Dio Tei oso yimapoo olo takaso.

<sup>27</sup> Osoloso Dio Tei oso Simiyon yo tei moso tegei mapoo ido diso. Osoloso Meli dio Yosep dio oso tei magoo ee dadalame holope Yesu yo tei moso mapoo ido palaso.

<sup>28</sup> Esemme adaga Simiyoneeye Yesu ogoloso maduloso Godee mapoo goomogolone to egeesee takaso,

<sup>29</sup> “Godee nayo takolone a Keliso ogoloso ka talai diso.

Esiga epei nee tou teli odoo ayo mesie sabolo talai tekepo.

<sup>30-31</sup> Bei, mo howoso gie badeli pidili odoo ee

nayo odoo susuga mapoo tenee a egeiso.

<sup>32</sup> Yo gadeebugu, Yu odoonee dimapoo Godeeyo goo ee yilige bigilame.

Osoloso yimaga nee Isalael odoo diba dokodoo poudileiso,” diso.

<sup>33</sup> Yesuwo ama dio owee dio Simiyoneeye taka to duloso diya howoogadooso.

<sup>34</sup> Osoloso Simiyoneeye Godeeye diba pidilame takoloso Meli mapoo egeesee takaso, “Godeeye holope hagee hesiaso, Isalael odoo aboso holope hagee gowooga, Godeeye diba pepooko dalame. Osoloso odoo aboso holope hamapoo tei toga,

Godeeye diba dokodoo poudileiso. Esiga odoo aboso o goo talai gowoolone yimapoo ha talaiso.

<sup>35</sup> Goo egeesi maga dibada sooloo ma kulodu egee molo goo ee woola yilige bigileiso. Osoloso goohele goo oso nee sooloo mapoo kaiyaso heleegee masi halagalaiso,” diso.

<sup>36</sup> Osoloso domo omapoo Godee maga to tolosokokodo takomo sili sobo hee tei moso tegei ma kulodu badebeiso, o hu Ana. Sobo yo o bala Asel. Osoloso amamo hu Panuwel. Yo sobo adaga poloso badebeiso. Yo daga gisoso huloso dugo 7 ma kulodu omobolo badoboso, omo taso.

<sup>37</sup> Esemme yayo badebei dugo 84 poogoloso, omapoo yo bau osee badebeiso. Yo biame susuga tei moso tegei mapoo howo gisimo silone, biame sabolo osoloso gesi sabolo Godeeyo hu dokodoo poudoolone nei tei yuloso badolone Godee mapoo takemeleeso.

<sup>38</sup> Osoloso Simiyoneeye Meli dio Yosep dio to kesamolome, yo domo omapoo simiso. Yo sibilesi Godee mapoo goomoga to takaso. Osoloso Yelusalem mi eyo hegi goo ee ma kuloduga gilimadoloso peego dilame balagamelee odoo dimapoo Yesuwo goo takaso.

<sup>39</sup> Yosep dio Meli dio Godeeye taka tei goo susuga tolosokoodobuloso, see Gelili mi ee ma kulodu dia midee Nasalet mapoo wedi diso.

<sup>40</sup> Osoloso holope oso kitulugu sabolo kauwuloso goo goolee medee tekepo yimapoo meleeso. Osoloso Godeeye yo sooloo dolone pidimeleeso.

*Yesu yo pepooko mapoo tei moso mapoo peleso badebei*

<sup>41</sup> Dugo susuga ma kulodu biame hedebe mapoo Yesuwo owee dio ama dio Yelusalem mapoo Godeeye gababia wo nalame diliso.

<sup>42</sup> Osoloso dugo hee mapoo diba see gababia wo nalame dime, Yesu yo dibolo diso. Biame domo omaga Yesu o dugo 12.

\* **2:22-24:** Yu soboso Moseseeye tei magoo ee dodolone giso holo soomagooga, yo biame 40 ee ma kulodu kee koododilega, o moso mapoo obusomo badeliso. Osoloso biame oso koodobuoga, see kee koododilame, Yu odoo dia tei moso mapoo dileso Godee mapoo emegei di bi teneliso. **2:30-31:** Isa 52:10; Luka 3:6; Tait 2:11 **2:32:** Isa 42:6; 49:6; 52:10 **2:34:** Isa 8:14; Mat 21:42; 1Pita 2:8 **2:39:** Mat 2:23 **2:41:** Exo 12:24-27; 23:14-17; Deut 16:1-8

<sup>43</sup> Gababia wo ne biame koodobume, diba see wedi diso. Esino Yesu yo dibolo dilega, Yelusalem mapoo badebeiso. Yesuye Yelusalem mapoo badebei owee dio ama dio gooleedele.

<sup>44</sup> Esino ama dio owee dio goolee, Yesu odo abo sabolo malalo di bele dolone, diba nosee diso. Diba dileso eli domopoo tilame dobolone, diayo dia soosoo ma kulodu osoloso dia odo ma kulodu Yesu esiaso.

<sup>45</sup> Diba omapoo Yesu esiameseo koo egeme, see Yelusalem mapoo Yesu esilame wedi diso.

<sup>46</sup> Osoloso biame bakadio hedebe di poogoloso hamamee diayo Yesu Yu odo dia tei moso mapoo Yu odoowo tei eligili odo abo sabolo to kolone doboome egeiso. Ee ma kulodu Yesuye tei eligili odo oso eligi goo ee dulone badolone, yayo nei dimapoo woosa demeleeso.

<sup>47</sup> Osoloso nei tei eligili odo oso woosa to eyo nei dimapoo medee tekepo wedi di duloso, osoloso o goo goolee tekepo ogoloso odo susuga oso diya howoogadooso.

<sup>48</sup> Yesuwo owee dio ama dio oso Yesuye tei eligili odo sabolo to kolone bado-boome ogoloso dio diso. Esemeweeye egeese takaso, “Mo holo, nayo kasalame goo egeesee imapoo ka moodoowo? Nama asalo no esiamo silone diya kukuda sabolo sileeso,” diso.

<sup>49</sup> Esino Yesuye nei dimapoo egeese takaso, “Niyo kasalame a ka esiamo sileeyo? Ayo mo mayo moso mapoo badalai goo ee niba gooleedeleyo?” diso.

<sup>50</sup> Esino Yesuye taka to eyo bei diba medee kibiya gooleedele.

<sup>51</sup> Osoloso Yesu see dibolo hodobo Nasalet mapoo wedi diso. Osoloso omapoo badolone, dibada to mapoo mesimo sileeso. Esino Meliye goo susuga hagee biame susuga osee goolee sabolo badebeiso.

<sup>52</sup> Yesu yo kauwulone goo goolee tekepo sabolo kauwaso. Esemeweeye sabolo osoloso odo sabolo oso yimapoo diya goomegeliso.

### 3

*Yonee odo howo oluguli oso to taka (Mat 3:1-12; Maka 1:1-8; Yon 1:19-28)*

<sup>1</sup> Sisa-Taibilyeseeye Loum wiligi toboloso badebei dugo 15 poogoloso, odo abo hagee bia oso yima hemi wiligi tebisa-losos debeiso. Pontiyus-Paileteeye Yudiya mi bameleeso, osoloso Helodeeye Gelili mi bameleeso, osoloso omolo Pilipiye Ituliyaya mi sabolo Talakonitis mi sabolo bameleeso. Osoloso Lisaniyaseeye Abilene mi bameleeso.

<sup>2</sup> Osoloso Anas dio Kayapas dio Yu odo dia tei moso wiligi toboloso debeiso. Biame omapoo Sekalayayo owolo Yonee miwe poogoo mi mapoo bado-boome, Godeeye o to yimapoo teneeso.

<sup>3</sup> Esemeweeye yayo dileso Yoden howo koola ogolone debeli mi mapoo Godeeyo to takomo silone, odo susuga mapoo egeese takomo sileeso, “Nibada tokenee mapoo miligi pialoso howo ogusige. Eseega Godeeye nibada tokenee hapoloso boobado bigileiso,” dee takemeleeso.

<sup>4</sup> Goo hagee Godee maga to tolosokokodo takomo sili odo Aisayaye o booka mapoo hogugu to sabolo tobuoso. Bei, yayo o booka mapoo hageese hoguguso, “Miwe poogoo mi omaga edebeeyo egeese idagoo,  
‘Lodee yayo sibilei eli moodee,  
osoloso medee hoodo magee.

<sup>5</sup> Osoloso mi godobia mologa, omapoo mi abo kuge.

Osoloso eli mapoo esia mologa, esia egee gebese.

Osoloso eli halaga medee hoodo magee.

Osoloso eli tokenee medee moodee.

<sup>6</sup> Eseega odo susuga oso gie badeli pidili Godee maga simi agalaiso, diso.”

<sup>7</sup> Odo mooloogoodoo Yoneeye diba howo ogusigilame sibateme, yayo dimapoo egeese takaso, “Niba hebise, nimapoo odo agayo takolone howo ogusiga goo oso Godeeye kamana goo egee sibo maga mada pia dabalaiso, dee ka takana?

<sup>8</sup> Esiga niyo debei goo maga nibada goo tokenee mapoo tei miligi pia goo ee eligi.

Osoloso niba niso nediliyo iba Eibalahameeyo amawe dioga, Godeeye kamana maga mada pia dabalaiso dee na goolee. Bei, ayo nimapoo taka. Godee yimapoo kitulugu moloso, yo hagoso see Eibalahameeyo amawe dio palai.

<sup>9</sup> Esiga kabee homo bei mapoo olo magoo moloso. Esiga homo kaso ko tekepo pelega mologa, homo egee holoso dou mapoo toodalaiso,” diso.

<sup>10</sup> Esemé odoo susuga Yoneeye taka to ee duloso nei egeesee takaso, “Egeesega iba oogo goo moodoolaisomo?” diso.

<sup>11</sup> Esemé Yoneeye nei dimapoo egeesee takaso, “Namapoo sedi bakadio mologa, nee odoo sedi me daga, hee yimapoo tenee. Osoloso namapoo nei mologa, nee odoo hee nei me daga, abo yimapoo tenee.”

<sup>12</sup> Osoloso tekisi molee misigeli odoo abo diba nosee howo ogusigilame sibilesi Yonee mapoo egeesee takaso, “Eligili odoo, iba oogo goo moodoolaisomo?” diso.

<sup>13</sup> Esemé Yoneeye nei egeesee takaso, “Niyo odoo mapoo tekisi molee misigaga, hodio niyo talai ee goolone tekisi molee magalame tobuloso magoo ee na dagapele. Esino hedebe teiba ono odoo mapoo ka misige,” diso.

<sup>14</sup> Osoloso ha teli odoo aboso Yonee mapoo egeesee takaso, “Iba nosee oogo goo moodoolaisomo?” diso.

Esemé Yoneeye nei dimapoo egeesee takaso, “Niyo emegei dia molee heli talame na seesee. Osoloso emegei dia molee heli talame dimaga gamenee goo na takee. Esino hedebe niso tou too eyo nei molee ee tolone goomoga sabolo ka debee,” diso.

<sup>15</sup> Odoo susuga oso Keliso bolone debei mapoo Yoneeye simi ogoloso, diayo goolee yo Keliso bele dee gooleeso.

<sup>16</sup> Esemé nei Yoneeye dimapoo egeesee takaso, “Ayo niba howodeeso oluguliso. Esino odoo hee ama hamamee egee sibo yayo kitulugu oso ayo kitulugu dagadi. Esiga ayo o homo beiyopoo gauwuloso o homo bi ee pidigilei a tebile. Osoloso yayo Dio Tei nima kulodu tenelaiso. Esino

yayo yimapoo tei tele poogoo odoo ee dou mapoo toodalaiso.

<sup>17</sup> Yayo witi wo ko sabolo osoloso so ee pilame o tou teli bi sabolo mopoodoo doloso badoso. Osoloso witi wo ko ee moso mapoo kukuleiso. Osoloso witi wo so dou koo semili mapoo toodalaiso,” diso.

<sup>18</sup> Yoneeye to tekepo ee eli opusomo opusomo di maga odoo Godee mapoo gilimado sibilame, Godeeye to tekepo takomo siliso.

<sup>19</sup> Esino Gelili mi eyo wiligi odoo taba Helodeeye goo tokenee tooso. Goo ee omolo osee badoboome, yayo omolowo osobo Helodiyes peedee huso. Esemé Yoneeye goo hagee ogoloso yimapoo diya takolone o tokenee goo abo sabolo yilige buguso.

<sup>20</sup> Esemé hamamee Helodee komonolone yo tokenee hee toowa tooso. Goo ee yayo Yonee neliga moso ma kulodu husooso.

### *Yesu howo olugu*

*(Mat 3:13-17; Maka 1:9-11)*

<sup>21</sup> Biame Yoneeye odoo howo ogusigamelee domo mapoo, Yesu yinosee howo oluguso. Yesu howo oluguloso gasibilesi tobudulone Godee mapoo takomolome Kei mi osulu yamagooso.

<sup>22</sup> Esemé Dio Tei oso molo masi pusibilesi yimapoo pubalagaso. Osoloso Kei mi ma dokodooga toso egeesee takaso, “No ayo gooma mo holo noso, a namapoo diya goomogo,” diso.

### *Yesuwo amawe diowo hu*

*(Mat 1:1-17)*

<sup>23</sup> Yesu yo dugo 30 domo mapoo badolone, o tou bei mooloogooso. Odoo susuga oso Yosepeeyo owolo gweliso.

Yosep yo Heliyo owolo.

<sup>24</sup> Heli yo Matateeyo owolo.

Matat yo Libaiyo owolo.

Libai yo Melkiyo owolo.

Melki yo Yanaiyo owolo.

Yanai yo Yosepeeyo owolo.

<sup>25</sup> Yosep yo Matatiyaseeyo owolo.

Matatiyas yo Amoseeyo owolo.

Amos yo Nahumeeyo owolo.

Nahum yo Esliyo owolo.



Esli yo Nagaiyo owolo.  
<sup>26</sup> Nagai yo Mateeyo owolo.  
 Mat yo Matatiyaseeyo owolo.  
 Matatiyas yo Semeineeyo owolo.  
 Semein yo Yosekeeyo owolo.  
 Yosek yo Yodayo owolo.  
<sup>27</sup> Yoda yo Yohanayo owolo.  
 Yohana yo Lesayo owolo.  
 Lesa yo Selubabeleeyo owolo.  
 Selubabel yo Selatiyeleeyo owolo.  
 Selatiyel yo Neliyo owolo.  
<sup>28</sup> Neli yo Melkiyo owolo.  
 Melki yo Adiyo owolo.  
 Adi yo Kosameeyo owolo.  
 Kosam yo Elamadameeyo owolo.  
 Elamadam yo Eleeyo owolo.  
<sup>29</sup> El yo Yosuwayo owolo.  
 Yosua yo Eliyeseleeyo owolo.  
 Eliyesel yo Yolimeeyo owolo.  
 Yolim yo Matateeyo owolo.  
 Matat yo Libaiyo owolo.  
<sup>30</sup> Libai yo Simiyoneeyo owolo.  
 Simiyon yo Yudayo owolo.  
 Yuda yo Yosepeeyo owolo.  
 Yosep yo Yonameeyo owolo.  
 Yonam yo Eliyakimeeyo owolo.  
<sup>31</sup> Eliyakim yo Meleyayo owolo.  
 Meleya yo Menayo owolo.  
 Mena yo Matatayo owolo.  
 Matata yo Neiteneeyo owolo.  
 Neiten yo Deibidiyo owolo.  
<sup>32</sup> Deibidi yo Yesiyo owolo.  
 Yesi yo Obedeeyo owolo.  
 Obed yo Bowaseeyo owolo.  
 Bowas yo Salmoneeyo owolo.  
 Salmon yo Nasoneeyo owolo.  
<sup>33</sup> Nason yo Aminadabeeyo owolo.  
 Aminadab yo Adimineeyo owolo.  
 Adimin yo Aliniyo owolo.  
 Alini yo Hesloneeyo owolo.  
 Heslon yo Peleseeyo owolo.  
 Peles yo Yudayo owolo.  
<sup>34</sup> Yuda yo Yekobeeyo owolo.  
 Yekob yo Aisekeeyo owolo.  
 Aisek yo Eibalahameeyo owolo.  
 Eibalaham yo Telayo owolo.  
 Tela yo Naholeeyo owolo.  
<sup>35</sup> Nahol yo Selugeeyo owolo.  
 Selug yo Lewuyo owolo.

Lewu yo Pelegeeyo owolo.  
 Peleg yo Ebeleeyo owolo.  
 Ebel yo Selayo owolo.  
<sup>36</sup> Sela yo Keinaneeyo owolo.  
 Keinan yo Alapakasadeeyo owolo.  
 Alapakasad yo Semeeyo owolo.  
 Sem yo Nowayo owolo.  
 Nowa yo Lamekeeyo owolo.  
<sup>37</sup> Lamek yo Metuselayo owolo.  
 Metusela yo Inokeeyo owolo.  
 Inok yo Yeleddeeyo owolo.  
 Yeled yo Mahalaleleeyo owolo.  
 Mahalalel yo Kenaneeyo owolo.  
<sup>38</sup> Kenan yo Enoseeyo owolo.  
 Enos yo Seteeyo owolo.  
 Set yo Adameeyo owolo.  
 Adam yo Godeeyo owolo.

## 4

### *Saitenso Yesu kukulo egei* (*Mat 4:1-11; Maka 1:12-13*)

<sup>1</sup> Yesu yo Yoden howo mapoo Yoneeye howo oluguloso, Yesu Dio Tei oso kitulugu toloso yo miwe poogoo mi mapoo Dio Tei oso ido diso.

<sup>2</sup> Yesu miwe poogoo mi mapoo biame 40 ee ma kulodu nei nelega badoboome, Saitenso yo kukulo ogo demeleeso. Osoloso biame 40 poogoloso hamamee Yesu yo diya hodiaso.

<sup>3</sup> Esem Saitenso ogoloso yimapoo egeese takaso, "No tei Godeeyo owolo daga, nayo yo hagoso see wo pe dee takee," diso.

<sup>4</sup> Esem Yesuye nei egeese takaso, "Godeeyo to booka mapoo hogugu oso egeese takooso, 'Edebeeyo hedebe nei nolone badoga oso gie badeli talaime,'" diso.

<sup>5</sup> Esem see Saitenso Yesu idoloso mubi dokodoo ido palaso. Esem saga omapoo Saitenso mi edebeeyo bia susuga yimapoo eligiso.

<sup>6-7</sup> Osoloso yayo Yesu mapoo egeese takaso, "Daga Godeeye bi susuga hagee amapoo teneme, ayo bamo simiso. Esiga nayo amapoo gasuwoloso a dokodoo poudoga, mi susuga hagee sabolo, osoloso bi susuga ee ma kulodu egee molo sabolo,

ayo namapoo tenelaiso. Bei, amapoo kitulugu moloso, odoo hee mapoo tenelai,” diso.

<sup>8</sup> Esemé Yesuye Saiten mapoo nei egeesee takaso, “Godeeyo to booka mapoo hogugu oso egeesee takooso,

‘Nayo hedebe nee wiligi odoo Godee mapoo gauwuloso yo dokodoo poude. Osoloso hedebe o to mapoo mesie,’” diso.

<sup>9</sup> Osoloso see tobu Saitenso Yesu idoloso Yelusalem mapoo diso. Osoloso tei moso tegei omu ma dokodoo ido peleso tobudume yimapoo egeesee takaso, “No tei Godeeyo owolo daga, no moso omu ma dokodooga miyomoo bologobigi.

<sup>10</sup> Bei, Godeeyo to booka mapoo hogugu oso egeesee takooso,

‘Godeeye o momaiye mapoo no medee bamelee dee takaso.

<sup>11</sup> Esiga diayo no dia deeso douguleiso, no yo mapoo homodobiyaga,’” diso.

<sup>12</sup> Esino Yesuye egeesee takaso, “Godeeyo to booka mapoo hogugu oso egeesee takooso,

‘Nee wiligi odoo Godee oso kitulugu ee hoodo agalame yimapoo na kukulo ege,’” diso.

<sup>13</sup> Saitenso Yesu kukulo ogomo silee koodobuloso yo see tobu kukulo agalame biame tekepo ee bolone Yesu epedee poogoloso diso.

*Yesuye Gelili mapoo o tou bei mooloo-goo*

*(Mat 13:53-58; Maka 6:1-6)*

<sup>14</sup> Yesu Dio Tei oso kitulugu sabolo Gelili mapoo wedi diso. Osoloso Gelili mi toowa ee ma kulodu odoo susuga oso Yesuwo goo dudobuguso.

<sup>15</sup> Yayo Yu odoowo howo gisili moso susuga mapoo eligimo sileeme, odoo susuga oso yimapoo goomegeliso.

<sup>16</sup> Biame heeso Yesu eyo yo kauwa o midee Nasalet mapoo diso. Osoloso Yu odoo oso hasali biame mapoo Yesu eyo seli egeesee solone, yo howo gisili moso mapoo palaso. Osoloso yo Godeeyo to booka mapoo hogugu ee hesigilame tabaso.

<sup>17</sup> Osoloso Godee maga to toloso kokodo takomo sili odoo Aisayaye hogugu booka ee yimapoo teneeso. Yo booka toloso piligamo abaga dino to hogugu domo ee ogoloso, to hagee hesigaso,

<sup>18</sup> “Godeeyo dio abolo hodobo badoso.

Bei, yayo a hesiaso, to tekepo bi mauwe odoo mapoo takalame.

Osoloso Godeeye a diye diso,

neliga moso ma kulodu debeli odoo mapoo yayo diba peegoo gilimado dileiso dee takalame.

Osoloso howo siliga odoo see agalaiso dee takalame.

Osoloso Godeeye a diye diso,

edebeeyo hegili odoo hegi goo ma kuloduga ayo peegoo gilimado dilame.

<sup>19</sup> Osoloso Godeeye a diye diso, ayo Lodeeye o odoo mapoo goo tekepo moodolai biame oso egee sibo goo ee odoo mapoo eligilame.”

<sup>20</sup> Yesu booka hesigamelee koodobuloso, see booka bali odoo omapoo teneloso biaso. Esemé odoo susuga moso ee ma kulodu debei oso howoso medee kitulugu sabolo yimapoo bologolone debeiso.

<sup>21</sup> Osoloso yayo dimapoo egeesee takaso, “Niyo Godeeyo to hogugu booka maga takeme du goo oso nimapoo epei olo simiso,” diso.

<sup>22</sup> Esemé o to du odoo susuga oso yo tekepo odoo doloso, yayo to taka susuga ee tekepo diso. Diayo egeesee takoloso, see egeesee takaga meleeso, “Iba gooleedooso yo Yosepeeyo owoloso. Egesino yayo kaseme to tekepo egeesee ka takayo?” dee takaga meleeso.

<sup>23</sup> Yesuye see dimapoo egeesee takaso, “A gooleedooso, niyo goo hamaga amapoo takalaiso, ‘Melesenee neli odoo, no no nediliyo tekepo moodee. Osoloso nayo Kapeniyum mi mapoo goo mudu opusomo di moodoogamelee see nee midee hamapoo moodee,’ dee takalai malaiso,” diso.

<sup>24</sup> Esino Yesuye see dimapoo egeesee takaso, “Ayo nimapoo taka, Godee maga to toloso kokodo takomo sili odoo yo o mosobia oso gowoolaiso.

<sup>25</sup> Esiga niba susuga dui. Ilayaye badebei biame omapoo mi toowa kibaso. Osoloso dugo bakadio hedebe osoloso a 6 ma kulodu howo sibilega nei mauwe badebeiso. Ee ma kulodu Isalael mi mapoo sobo bauwe debeiso.

<sup>26</sup> Esino ee ma kulodu Godeeye Ilayaye diba pidiye doloso yimapoo takele. Esino yo Ilayaye wulo Yu dele poogoo sobo Saidon mi ma kulodu mi hee Salipat mi mapoo badeli sobo bau ono pidilame diye diso.

<sup>27</sup> Osoloso Ilaisaye badebei biame omapoo, Isalael mi omapoo kolo tokenee odoo bei debeiso. Esino Ilaisaye odoo egee bia yayo pidile. Esino yayo Yu odoonee o hu Naman, Siliya mi mapoo badeli odoo ono tekepo moodooso,” diso.

<sup>28</sup> Esemee odoo howo gisili moso mapoo debei oso to hagee duloso diya kamana-gaso.

<sup>29</sup> Esemee diba tebisaloso Yesu toloso mosobia pee mapoo esia goosoo mapoo halagasalame ido diso.

<sup>30</sup> Esino Yesu odoo mooloogoodoo ee ma kuloduga peegoo diso.

*Odoo bo holo pala  
(Maka 1:21-28)*

<sup>31</sup> Osoloso Yesu Gelili mi toowa ma kulodu mi hee Kapeniyum mapoo diso. Yo omapoo dileso badolone Yu odoo oso hasali biame heeso yayo howo gisili moso ma kulodu Godeeyo to eligimeleeso.

<sup>32</sup> Esemee odoo susuga oso yayo eligi duloso diya howoogadoo. Bei, yayo diya kitulugu sabolo eligime.

<sup>33</sup> Howo gisili moso ma kulodu odoo bo holo pala hee omapoo badebeiso. Yayo to neligidi Yesu mapoo egeesee takaso,

<sup>34</sup> “Hei, Yesu Nasalet odoo, nayo imapoo ogoo goo moodoolame ka simiyo? Nayo iba tokenee palame ka simiyo? Esiga no iba poogoloso di. Bei, a gooleedoo no Godeeye hesia odoo oso,” diso.

<sup>35</sup> Esemee Yesuye to kitulugu sabolo bo holo mapoo egeesee takaso, “No to koodobuloso odoo ma kuloduga peegoo di,” diso. Yesuye egeesee takeme, bo holo oso peegoo poogolone odoo egee

odoo howo woola miyomoo homodobuloso molone yimaga peegoo diyadeeso. Esino bo holo oso yimaga peegoo dulone yimapoo dala hee tenele.

<sup>36</sup> Esemee odoo susuga oso goo hagee ogoloso howoogadolone egeesee takaga meleeso, “Yayo taka goo ee kasiyo? Bei, yayo to kitulugu sabolo bo holo mapoo takooga diba o to mapoo mesiloso peegoo dilidoo,” dee takaga meleeso.

<sup>37</sup> Esemee odoo susuga oso goo hagee ogoloso mosobia susuga koola mapoo debeli mapoo takomo diyadeeso.

*Yesuye odoo paigiga tekepo moodoo  
(Mat 8:14-17; Maka 1:29-34)*

<sup>38</sup> Yesu howo gisili moso maga see Saimonowo mosopoo diso. Moso ee ma kulodu sobo Saimonowo nalobo pailone kolo diya dei moodoome tiameleeso. Esemee odoo susuga oso yo Yesuye tekepo moodoolame Yesu mapoo o goo takaso.

<sup>39</sup> Esemee Yesuye sibileso yayo tiamelee koola mapoo gauwuloso badolone paiye mapoo egeesee takaso, “Yo poogoloso di,” diso. Esemee paiye saga weidooso. Esemee yayo toboloso nei toloso dimapoo piso.

<sup>40</sup> Esemee osoko todobume odoo susuga oso odoo paigiga susuga Yesu mapoo gilimado sibadeeso. Esemee yayo o deeso odoo paigiga susuga sigime wegigadoo.

<sup>41</sup> Esemee Yesuye odoo bo holo paladee tekepo moodoogoo bo holo oso pee-goo dulone to neligidi takolone egeesee takaso, “No Godeeyo owoloso,” dee takaga meleeso. Esino Yesuye to kitulugu sabolo dimapoo egeesee takaso, “Niba to na ke,” diso. Bei, bo holo oso Yesu yo Godeeye hesia Keliso doloso diba gooleedooso.

<sup>42</sup> Gesikolodee mi hadobilega, Yesu tia maga hogabuloso odoo koola mauwe mi mapoo diso. Esino odoo susuga oso egeino yo me neme yima hamamee yo esiamo silesibiso. Diba Yesu esiamo silesiboso yo ogoloso yimapoo egeesee takaso, “No iba na poogoo di,” diso.

<sup>43</sup> Esino Yesuye dimapoo egeesee takaso, “A mi abo mapoo Godeeye wiligi doloso

badeli goo ee takomo dilei tekepo. Bei, Godeeye goo hamaga a diye diso,” diso.

<sup>44</sup> Osoloso Yesuye Yudiya mi toowa mapoo diayo howo gisili moso susuga mapoo Godeeyo to eligimo sileeso.

## 5

*Yesuye o hamamee dili odo o daga malalo abo gilimadoo*

*(Mat 4:18-22; Maka 1:16-20)*

<sup>1</sup> Biame hee mapoo Yesuye Gelili abei palaga mapoo Godeeyo to takomolome odo susuga oso o to dulame diya mooloo-goodooso.

<sup>2</sup> Yesu osee tobudulone di kebigeli odo oso dia pei howo hapagalame dia du bakadio mubi dokodoo gisibado peleso ma molome egeiso.

<sup>3</sup> Yesu du bakadio ee ma kulodu Saimonowo du mapoo meilesa badolone Saimon mapoo takaso, “Du abei pee maga pepooko hoogoo pupubigi,” diso. Esemeyo du ma kulodu badolone odo susuga mubiyodoo doboome, yayo Godeeyo to dimapoo eligiso.

<sup>4</sup> Yesuye odo susuga mapoo Godeeyo to taka koodobuloso Saimon mapoo egeesee takaso, “Nee du howo bou mapoo sudo dileso di talame nibada pei howomoo oguse,” diso.

<sup>5</sup> Esino Saimonoye egeesee takaso, “Wiligi odo, iba eiyo gesi pei ogusulone tou toowa tooso, esino iba di giligile. Esino nayo amapoo takaga, mo pei howomoo ogusuleiso,” diso.

<sup>6</sup> Osoloso diba dia pei howomoo ogusume di susuga oso dia pei mapoo tulone, dibada pei tologo bugulame seeso.

<sup>7</sup> Esemeyo diayo dia odo abo du hee mapoo debee deeso iso, diba pidilame. Esemeyo diba sibademe dibada du bakadio ee diso metamagisilone howomoo owulame sino poogooso.

<sup>8</sup> Saimon-Pitaye goo hagee ogoloso, Yesuwo homo beiyopoo gauwuloso egeesee takaso, “Lodee, amaga peegoo di, a tokenee odo,” diso.

<sup>9</sup> Bei, yibolo osoloso o odo sabolo diayo di bei giliga ogoloso diya howoogadooso.

<sup>10</sup> Osoloso Saimonobolo tou teli odo Yemes dio Yonee dio diba nosee goo hagee ogoloso diya howoogadooso. Odo bakadio Yemes dio Yonee dio hagee Sebediyo owolo.

Osoloso Yesuye Saimon mapoo egeesee takaso, “No haga na ebi! No daga di giligeli odo badebeiso. Esino epei hamaga no see odo Godee mapoo gilimado sibili doloso badalaise,” diso.

<sup>11</sup> Osoloso diba dileso dia du oluguloso bi susuga omapoo poogoloso, see Yesubolo hodobo diyadeeso.

*Yesuye odo agagisa bia moodoo*

*(Mat 8:1-4; Maka 1:40-45)*

<sup>12</sup> Biame heeso Yesu see mi hee mapoo diso. Mi omapoo odo agagisa bia badebeiso. Odo ogoso Yesu ogoloso o homo beiyopoo ebiso miyomoo tugusaloso egeesee howaso, “Lodee, nayo a tekepo moodolai goomogoga, a tekepo moodee,” diso.

<sup>13</sup> Esemeyo Yesuye o deeso odo egee sigolone egeesee takaso, “Ayo no tekepo palai goomogo. Esiga no tekepo pe,” diso. Esemeyo omapoo o kolo mapoo agagisa bia saga mauwe poogooso.

<sup>14</sup> Esemeyo Yesuye yo diye dolone to kitulugu sabolo egeesee takaso, “Nayo dileso no ayo tekepo pa goo ee odo abo mapoo na takee. Esino, nee su tekepo pa goo ee, Godee ogo odo ogo doloso domo badeli odo yimapoo dileso eligi. Osoloso nee su tekepo pa omaga emegei di bi tenee, Moseseeye tei magoo goo ee dodolone, odo susuga oso ogoloso tekepo pa ee gooleedalame,” diso.

<sup>15</sup> Esino odo susuga oso Yesuwo goo ee mi susuga mapoo oposusumo dime, odo susuga oso dulugaso. Esemeyo odo susuga oso Yesuye Godeeyo to taka ee dulame sibadeeso. Osoloso Yesuye dimapoo paigiga egee molo tekepo palame.

<sup>16</sup> Esino Yesu biame susuga dimaga peegoo dileso, odo koola mauwe mi mapoo Godee mapoo takalame diliso.

*Yesuye odo su kakawa poogoo tekepo moodoo*

*(Mat 9:1-8; Maka 2:1-12)*



<sup>17</sup> Biame heeso Yesuye odoosusuga eligimolome, Pelisi odoosabolo tei eligili odoosabolo diba onosee omapoo debeiso. Odoohagee bia Gelili mi susuga maga, osolosobo oso Yudiya mi maga, osolosodoosobo oso Yelusalem mi maga sibadeeso. Esemes Yesuye odoopaigiga susuga tekepo moodoogalame Godeeye kitulugu oso yibolo meleeso.

<sup>18</sup> Esememi omapoo odoosaboso odoosukakawa poogoo kida mapoo magolosotosimiso. Osolosodiayo yo Yesuye badebeimapoo todilame goomogaso.

<sup>19</sup> Esino odoobeiga Yesu mapoo dilei eliegele. Esemediayo odoosukakawa poogoo kida sabolo mosomuma dokodoo imado palaso. Osolosodiayo to kemeleedomo omaga seme outologo poogolosotiso kida mapoo bagagoloso kida sabolomoso kulodu toosooso.

<sup>20</sup> Diayo odoosukakawa poogoo mosomoma maga toosooloso goolee, odooegee yayomoodolai teiba doloso, Yesuyedia tei too ogoloso, odoosukakawa poogoomapoo egeesee takaso, “Mo odoos, nee gootokenee olo hapoloso boobado buguso,” diso.

<sup>21</sup> Esememapoo debeitei eligili odoosabolo Pelisi odoosabolo oso o to duloso, dieso nediliyo egeesee gooleemeleso, “Odoohagoso kaseme egeesee ka takayo? Yayogodee dagadilame see, esinogootokenee hapeli hedebe Godeeso,” diso.

<sup>22</sup> Esemes Yesuyediayo dibada sooloo ma kulodu gooleemelee goo ee gooleedolosodimapoo egeesee takaso, “Niyo kasi maganibada sooloo ma kulodu egeesee ka goolee malala?”

<sup>23</sup> Niba odoosukakawa poogoo hageeege. Yimapoo gookasee takalai oso sebe ka mololo? Ayo odoosukakawa poogoomapoo ‘Nee tokenee ayo boobado buguso,’ deetakooga, o tokenee boobado buguniyo gooleedalaima. Esino ayo yimapoo takoo, ‘No toboloso nee kida tolosodi,’ deetakoloso, yotobooga, amapoo odoomodeli kitulugumolodolosoniyo gooleedalaiso.

<sup>24</sup> Esino OdoosHolo amapoo kitulugulo teneeso, mipoo hamapoo gootokenee hapoloso boobado bigilei goo eeniyo ogoloso gooleedalame, ayo nimapoo eligileiso,” dolosoyayo odoosukakawa poogoomapoo egeesee takaso, “No hogabuloso nee kida tolosomosopoo di,” diso.

<sup>25</sup> Diayo balagamolome odoosukakawa poogoo hogabuloso, o kida tolosoo mosopoo dulone Godeemapoo goomogapoudoomo diso.

<sup>26</sup> Diayo odoosukakawa poogoo toboloso di ogoloso diya howoogadooso, osolosogodeemapoo goomoga poudooso. Osolosodiayo obulone egeesee takaso, “Iba epei gootoowa mudu opusomodi egeiso,” diso.

*Yesuye Libai idoo goo  
(Mat 9:9-13; Maka 2:13-17)*

<sup>27</sup> Goo hageekoodobuloso hamamee, Yesumoso kuloduga peegoo gadiso. Esemeyayo dulone egeino, tekisimolee misigeli odoosLibai tekisimolee misigelimoso kulodu badoboome egeiso. Osolosoyesuyeyimapoo egeesee takaso, “Amahamamee sibe,” diso.

<sup>28</sup> EsemesLibaiye bisusuga omapoo poogoloso Yesuyedi hamameediso.

<sup>29</sup> Esemes YesuyesLibai yoidoo goomaga Libaiye o mosopoo nei toowa siso. Esemetekisimolee misigeli odoobei sabolo osolosodoosabosabolo Yesubolonei nameleeso.

<sup>30</sup> Esino Pelisi odoosabolo osolosotei eligili odoosabolo oso goohagee ogolosogowoolone Yesu o hamameedili odoomapoo egeesee woosaso, “Niyo kaseegatekisimolee misigeli odoosabolo osolosogootokenee teli odoosabolo nei nologolone ka dabala?” diso.

<sup>31</sup> Esemes Yesuyenei dimapoo egeesee takaso, “Odoopaiye mauwe meleseneeneli odoomapoo dileime. Esino odoopaiye ee meleseneeneli odoomapoo dileiso.

<sup>32</sup> Ayo simihagee, Godeeyohowowoola tekepo teli odoosadolosogweli odooeegilimalame ka sibile. Esinotokenee teli odoos

doloso gooleedoo odoo ee gilimadoloso Godee mapoo sibilame ka simi,” diso.

*Nei tei doloso badalai goo  
(Mat 9:14-17; Maka 2:18-22)*

<sup>33</sup> Esemee odoo aboso Yesu mapoo egeesee takaso, “Yoneeyo hamamee dili odoo oso howo gisilone nei tei doloso debeliso. Osoloso Pelisi dia hamamee dili odoo sabolo egeseliso. Esino bei kasi maga nee hamamee dili odoo oso biame susuga nei sabolo howo sabolo ka nalagamalala?” diso.

<sup>34</sup> Esemee Yesuye dimapoo egeesee takaso, “Edebeeyo sobo hulei biame omapoo yo o odoo abo sabolo osee doga, diba nei nelega dabalaisomo? Haye! Diayo sobo hulei odoo sabolo hodobo dobolone goomoga sabolo nei nalaiso.

<sup>35</sup> Esino biame heeso odoo hagee dimaga peegoo ido duga, nei nelega tei doloso dabalaiso,” diso.

<sup>36</sup> Esemee Yesuye dimapoo wudu taka hee hagee takaso, “Edebeeyo o sedi dia koodoloso sedi nape mapoo opodoloso koo duseli. Egeeseega o sedi dia tokenee palaiso. Osoloso sedi dia koodoloso sedi nape mapoo opodoloso dusa ee sedi nape sabolo tebileime.

<sup>37</sup> Osoloso see edebeeyo wain i dia katolo gout be koloso moodoo nape mapoo koo salama seli. Bei, wain i dia oso kitulugu oso katolo be gout koloso moodoo nape ee gabuguga, wain i ee peegoo sologo bigileiso. Osoloso katolo gout be koloso moodoo ee tokenee palaiso.

<sup>38</sup> Esiga wain i dia ee medee katolo gout be koloso moodoo dia mapoo salama salai tekepo.

<sup>39</sup> Esiga edebeeyo wain i nape naga, yo see wain i dia nalai koo goomegeli. Bei, yayo egeesee takalaiso, ‘Wain i nape ono diya hadali,’ dalaiso.”

## 6

*Yu odooso hasali biame  
(Mat 12:1-8; Maka 2:23-28)*

<sup>1</sup> Yu odooso hasali biame heeso, Yesu o hamamee dili odoo sabolo witi wo segei ma kuloduga diyadaga meleeso. Osoloso

o hamamee dili odoo oso witi wo ko ee gooloogaloso kolo soosoo poloso ko kulodu melee ono nalagamo diyadeeso.

<sup>2</sup> Esemee Pelisi odoo abo oso goo hagee ogoloso dimapoo egeesee takaso, “Niba bei kasi maga ibada hasali biame mapoo witi wo ka gwayo? Niyo ibada tei gababuo,” diso.

<sup>3</sup> Yesuye dimapoo to nei egeesee takaso, “Deibidiye o odoo sabolo houdume diayo moodoo goo ee Godeeyo toso booka mapoo hogugu niyo hesigeleyo?

<sup>4</sup> Bei, Deibidiye Godeeyo tei moso ma kulodu gadilesi tei wo toloso o odoo sabolo neso. Esino tei wo hagee Godee ogo odoo ogo doloso domo badeli odoo hedebe oso nali. Esino Deibidiye o odoo sabolo wo ne oso tei magoo ee gababiaso,” diso.

<sup>5</sup> Yesuye dimapoo see egeesee takaso, “Niyo hasali biame egee Odoo Holo ayo wiligi doloso ka badoso,” diso.

*Yesuye odoo dee deede seeseegedoo  
poogoo tekepo moodoo*

<sup>6</sup> See Yu odooso hasali biame hee mapoo, Yesu Yu odoowo howo gisili moso ma kulodu gapeleso odoo mapoo eligimeleeso. Moso ee ma kulodu odoo dee deede seeseegedoo poogoo badebeiso.

<sup>7</sup> Esino tei eligili odoo sabolo Pelisi odoo sabolo oso Yesu tokenee odoo dalame, Yesuwo goo ee medee balagamo silesibiso. Egeeseelone Yesuye dia hasali biame mapoo odoo dee deede seeseegedoo poogoo tekepo moodabeleso bologolone debeiso.

<sup>8</sup> Esino diayo goo goolee melee Yesuye ogoloso gooleedoloso, dee seeseegedoo poogoo odoo mapoo egeesee takaso, “No toboloso woola hamapoo sibilesi tebee,” diso. Esemee dee seeseegedoo poogoo odoo oso woola dilesi tabaso.

<sup>9</sup> Osoloso Yesuye Pelisi odoo sabolo osoloso tei eligili odoo sabolo mapoo egeesee takaso, “Ibada tei goo oso ibada hasali biame mapoo ogo goo takoosomo? Biame omapoo goo tekepo talai ee tekepowa? O, goo tokenee talai ee tekepowa? Osoloso tei goo oso imapoo ibada hasali biame

omapoo odoo gie badeli pidilei goo ee takoosomo? O, odoo gie badeli wooloomalai goo ee takoosomo?" diso.

<sup>10</sup> Yesuye dimapoo egeesee takoloso, see dimapoo bolone odoo dee seeseegedoo poogoo mapoo egeesee takaso, "Nee dee seeseegedoo poogoo egee see hoodode," diso. Esemee odoo dee seeseegedoo poogoo oso o dee hoododeme o dee see tekepo paso.

<sup>11</sup> Esemee Pelisi odoo sabolo tei eligili odoo sabolo oso goo hagee ogoloso diya komonogolone dieso nediliyo dima kulodu Yesu toloso kasee woolaisomo, doloso to mousu.

*Yesuye diye di odoo 12 gilimadoo goo (Mat 10:1-4; Maka 3:13-19)*

<sup>12</sup> Biame domo mapoo Yesu mubi ma dokodoo peleso gesi hedebe omapoo Godee mapoo takemeleeso.

<sup>13</sup> Esemee mi hadobume Yesu yima hamamee dodomo silesibili odoo susuga gilimadooso. Osoloso dima kulodu odoo 12 ono toloso, dimapoo diye di hu teneeso. Yesuye gilimadoo 12 odoo dia hu hagoso.

<sup>14</sup> Saimon (odoo hagee Yesuye o hu hee Pita hediso), osoloso Saimonowo omolo Endulu sabolo, osoloso Yemes, osoloso Yonee, osoloso Pilipi, osoloso Batolome,

<sup>15</sup> osoloso Matiyu, osoloso Tomas, osoloso Alpiyeseeyo owolo Yemes, osoloso Loum gamalee odoo mapoo ha teli odoo Saimon,

<sup>16</sup> osoloso Yemeseyo owolo Yudas, osoloso Yudas-Iskaliyot (yayo hamamee Yesu ha teli odoo dimapoo tiasooso).

*Yesuye odoo eligilone odoo susuga tekepo moodoo (Mat 4:23-25)*

<sup>17</sup> Yesuye o hamamee dili odoo 12 sabolo mubi dokodooga meilesu kubo mapoo debeiso. Diba omapoo meilesu dobolone egeino, Yesu o hamamee dili odoo susuga sabolo, osoloso odoo abo susuga Yudiya maga osoloso Yelusalem maga osoloso abei toowa palaga debeli Taya mi sabolo Saidon mi sabolo omaga sibileso doboome egeiso.

<sup>18</sup> Diayo Godeeyo to Yesuye taka ee dulame sibadeeso. Osoloso paiye dimapoo melee tekepo palame sibadeeso. Egeesi ma kulodu Yesuye odoo ma kulodu bo holoso dala tenemelee ee dimaga peegoo hasiso buguso.

<sup>19</sup> Odoo susuga oso Yesuwo kolo sigilame goomogaso. Bei, diayo egeino kitulugu Yesu maga simi oso odoo susuga tekepo moodooga neme.

*Niba goomege (Mat 5:1-12)*

<sup>20</sup> Yesuye o hamamee dili odoo mapoo bolone egeesee takaso,

"Bi mauwe odoo niba goomege.

Bei, Godeeye wiligi doloso badeli ee ma kulodu niba gasibileiso.

<sup>21</sup> Odoo epedee hodia hagee do, niba goomege.

Bei, hamamee niba nei nameleso diya edigileiso.

Osoloso goohele sabolo egee pupusiga molo, niba goomege.

Bei, niyo goomogalai biame ee nimapoo tenelaiso.

<sup>22</sup> Odoo Holo mo goo maga edebeeyo niba heigoga, niba goomege, osoloso diayo niba tokenee odoo doloso gowoolone managa niba goomege.

<sup>23</sup> Esiga domo omapoo goomoga toowa sabolo debee. Bei, Kei mi ma dokodoo niyo talai nei ee nibada hu sabolo olo mopoodoo doloso moloso. Esiga niyo medee goolee, nimapoo dala teneli odoo egee bia dia amawe dio oso Godee maga to toloso kokodo takomo silesibili odoo daga hoogoo debei mapoo dala hedebe hageesee masi tenemeleeso."

*Niba obeeyamo!*

<sup>24</sup> "Ye-ee! Bi bei odoo niba obeeyamo!

Bei, niso goomoga goo olo tooso.

<sup>25</sup> Ye-ee! Niba epedee nei naloso oduguloso egee do odoo, niba obeeyamo!

Bei, hamamee nimapoo hodia goo toowa oso sibileiso.

Ye-ee! Yiligeli odoo niba obeeyamo!

Bei, hamamee niba goohele goo sabolo dobolone pupusiga malaiso.

<sup>26</sup> Ye-ee! Odoo susuga oso niba tekepona deli odoo niba obeeyamo!

Bei, nimapoo tekepona deli odoo egee bia dia amawe dio oso game-nee godee maga to toloso kokodo takomo sili odoo onosee diba tekepo odoo dee takaga meleeso.”

*Nimapoo ha teli odoo mapoo sooloo dele*

*(Mat 5:38-48; 7:12)*

<sup>27</sup> “Mo to duli odoo, ayo nimapoo ka taka, nimapoo ha teli odoo ee sooloo dele osolosō niba hegili odoo mapoo goo tekepo moodee.

<sup>28</sup> Nimapoo duwa takeli odoo dimapoo goo tekepo tolone dimapoo goomoga tenee. Osoloso nimapoo dala teneli odoo diba halo Godee mapoo takee.

<sup>29</sup> Osoloso odoo heeso nee haleegi mapoo kobuguga, see nee haleegi hodio mapoo kobugulame heligi magalai tekepo. Osoloso odoo heeso nee kekeisu sedi tadoduga, see yimapoo nee sedidee tenee.

<sup>30</sup> Osoloso odoo heeso namapoo bi howaga yimapoo wulo tenee. Osoloso odoo heeso nee bi toloso toduga nayo nei yimaga see peedee dalame na takee.

<sup>31</sup> Esiga edebeeyo nimapoo ogoo goo moodoolame ka gooleesomo, nei niyo dimapoo goo hedebe egeesi masi moodolai tekepo.

<sup>32</sup> Niyo hedebe niba sooloo deli odoo mapoo sooloo dolone doga, odoo aboso niba tekepo odoo dalaisomo? Haye. Bei, tokenee teli odoo oso diba sooloo deli odoo mapoo nei diayo sooloo deliso.

<sup>33</sup> Osoloso niyo hedebe nimapoo goo tekepo moodeli odoo mapoo tekepo moodooga, edebeeyo niba tekepo odoo dalaisomo? Haye. Bei, tokenee teli odoo diba nose egeesee seliso.

<sup>34</sup> Niyo teneega nei tobuloso teneli odoo hedebe mapoo bi ka tenee domologa, edebeeyo niba tekepo odoo dalaisomo? Haye. Bei, tokenee teli odoo diba nose egeesee seliso. Diayo nei talai ee goolone dia bi odoo abo mapoo tenee deliso.

<sup>35</sup> Esino niba nimapoo ha teli odoo mapoo sooloo dolone ka debee. Osoloso

dimapoo goo tekepo moodee. Osoloso dimapoo bi wulo wulayo teneloso see nei talai doloso na goolee. Niyo goo hageesi tolone doga, niba nei toowa talaiso. Osoloso niba dokodoo badeli Godeeyo owolo dalaiso. Bei, Godeeye yimapoo goomoga to koo takeli odoo sabolo osoloso toke-nee teli odoo sabolo mapoo goo tekepo tenelone ka badoso.

<sup>36</sup> Nibada Ama Godee yo emegei sooloo dolone badoso. Esiga niba nose egeegi sooloo dolone ka debee.”

*Odoo heeyo goo tokenee haga na goolee mele*

*(Mat 7:1-5)*

<sup>37</sup> “Nayo nee odoo heeyo goo ee goo mauwe na midi, eseega nei nee goo midileime. Osoloso nee odoo ee tokenee odoo dee na takee, eseega nei no tokenee odoo dalaimo. Osoloso nee odoo oso namapoo goo tokenee toga, nayo o tokenee goo ee boobado bigi. Nayo egeesee seega nei nee goo tokenee onosee boobado bigileiso.

<sup>38</sup> Esiga nayo wulo tenemologa, no nei talaiso. Nayo odoo abo mapoo tenemologa, nei Godeeye namapoo toowa tenelaiso. Esiga Godeeye namapoo tenee goo hagoso bei molone abo peegoo misigedibileiso. Nayo bi kasee nee odoo mapoo ka teneesomo, nei Godeeye nei teiba egeesi namapoo tenelaiso,” diso.

<sup>39</sup> Osoloso Yesuye see wudu takolone egeesee takaso, “Odoo howo si oso o odoo hee howo si ido dilei tekepowa? Haye. Bei, o bakadio wulu mapoo tigidibileiso.

<sup>40</sup> Esiga holaiso goo goolee gie tomolo oso o eligili odoo oso gooleedoo ee dagadileime. Haye. Esino yo o eligili odoo oso holaiso medee kibiya eligiga, holaiso yayo gooleedoo goo ee o eligili odoo oso gooleedoo goo sabolo tebileiso.

<sup>41</sup> Nayo kasi maga nee odoowo howo mapoo gelesi pepooko egee molo medee ogolone, hee nee howo mapoo homo toowa egee molo egelega ka pagala?

<sup>42</sup> Osoloso nee howo mapoo homo toowa egee molo egelega no see kaseega nee odoo mapoo takolone, ‘Nee howo mapoo



gelesi pepooko egee molo ayo tabiga,' dee ka takeliyo? No tei goo goolee bakadio gweli odo. Bei, daga nee howo mapoo homo toowa egee molo ee tabigi. Egeeseega nee odoowo howo mapoo gelesi pepooko egee molo medee ogoloso nayo tabigilei tebileiso."

*Homokoko maga homo o su ee goolee deliso*

*(Mat 7:16-20; 12:33-35)*

<sup>43</sup> "Esiga homo ko tekepo peli oso ko tokenee koo peli. Osoloso homo ko tokenee peli oso ko tekepo koo peli. Haye.

<sup>44</sup> Bei, homo susuga ee ko oso pa maga goolee deliso. Esiga pigi ko sabolo geleipi ko sabolo oso wulo homo hee mapoo ko koo peli. Haye.

<sup>45</sup> Esiga odo tekepo oso o sooloo ma kulodu goo tekepo egee molo ee o maga maga woola yilige bigiliso. Osoloso odo tokenee oso o sooloo ma kuloduga goo tokenee ee woola yilige bigiliso. Esiga ogo goo oso odo sooloo ma kulodu bei mologa, o maga maga goo egeesee takamalaiso."

*Odo bakadio oso moso tegei*

*(Mat 7:24-27)*

<sup>46</sup> "Niyo kasi maga amapoo 'Lodee, Lodee,' dolone dobolone hee nei ayo taka goo ee telega ka poogoosomo?

<sup>47</sup> Odo agayo amapoo sibilesos mo to dulosos mesimos siloga, yo egeese badalaiso.

<sup>48</sup> Yo edebeeyo moso togolone mi nelegedi dooloso omou sooloso moso tegei egeesi masi badoso. Bei, howo duwolone howo ki simi oso moso omapoo weiso. Esino moso egee dabisile. Bei, moso medee kalawa tegeiga.

<sup>49</sup> Esino odo agayo mo to dulosos mesilega siloga, yo odo heeso moso togolone omou mi nelegedi doolega, moso tegei egeesi masi badoso. Bei, howo duwolone howo ki simi oso moso omapoo woome kibilega saga goboloso guobuguso."

## 7

*Loum ha teli odo gibadeli odo oso tei too*

*(Mat 8:5-13)*

6:46: Mat 7:21

<sup>1</sup> Yesu goo susuga odo mapoo eligimelee koodobulosos see Kapeniyum mi mapoo diso.

<sup>2</sup> Kapeniyum mi mapoo Loum ha teli odo 100 gibadeli odo badebeiso. Esino domo omapoo yo o tou teli odo hee paiye oso talai koola taba molome egeiso. Osoloso yayo o tou teli odo egee bia diya gweliso.

<sup>3</sup> Esiga yayo Yesuye simi dulosos Yu odoowo wiligi odo tebisa abo mapoo Yesu idilame diye diso, Yesuye sibilesos o tou teli odo ee tekepo palame.

<sup>4</sup> Osoloso Yu odoowo wiligi odo tebisa egee bia oso sibilesos Yesu mapoo howolone egeese takaso, "Iba diya goomogo, nayo dilesos ha teli odo gibadeli ee pidilei.

<sup>5</sup> Bei, yayo ibada odo halo ibada howo gisilos moso tegeiso."

<sup>6</sup> Esemes Yesu to hagee dulosos dibolo diso.

Yesu moso koola mapoo dimeleeno, ha teli gibadeli odo oso o odo abo diye neme, diayo sibilesos Yesu mapoo egeese takaso, "Ha teli odo gibadeli odo oso namapoo to egeese taka, nayo o moso mapoo dilei yo koo goomogogona. Bei, yo tokenee odooga, no o moso mapoo na sibiyeena.

<sup>7</sup> Esiga yo see nayo bado mapoo sibilei koo goomogogona. Esino yo goomogogona nayo wulo no egee bado maga toso takeeyena o tou teli odo ee tekepo palame.

<sup>8</sup> Osoloso yayo see egeese taka, yo odo abo ma hemiduga tou tolone dia to mapoo mesilosos siliso. Osoloso yima hemi tou teli odo abo dosogona. Esiga yayo dimapoo koo diye daga diliso. Osoloso yayo odo hee mapoo no hamapoo sibeye daga sibiliso. Osoloso goo egee teye daga, yo see goo egee tobulosos teliso. Esiga yo goo egeese teliga nayo see wulo hamaga badolone toso takeeyena, o tou teli odo ee weidilame."

<sup>9</sup> Esemes Yesuye ha teli odo gibadeli odo oso to taka dulosos diya howoodoosos. Osoloso odo mooloogoodos yima hamamee simi omapoo bidi tobolosos

dimapoo bolone egeesee takaso, “Ayo nimapoo taka, ayo Isalael mi mapoo silee ee ma kulodu odoo kibiya tei too odoo hee egeesi egele,” diso.

<sup>10</sup> Osoloso ha teli gibadeli odoo oso diye di odoo diayo see wedi dileso egeino, ha teli gibadeli odoo eyo tou teli odoo ee weidiloso badoboome egeiso.

*Yesuye sobo bauwo owolo giso holo ta maga see hogabidi*

<sup>11</sup> Osoloso biame abo olo poogoloso hamamee Yesu mi hee Nein mapoo diso. Esememe o hamamee dili odoo sabolo osoloso odoo abo susuga oso yo dodomo diso.

<sup>12</sup> Yesu dileso beele osulu miyopoo dumolome odoo aboso edebeeyo bia mi maga giso holo gie kauwa ta eyo su imadoloso sibadeeso. Giso holo ta hagee sobo bau heeyo owolo hedebe oso. Osoloso odoo susuga oso sobo bau sabolo sibadeeso.

<sup>13</sup> Lodeeye sobo bau hagee ogoloso yo diya sooloo dolone yimapoo egeesee takaso, “Haga na pise,” diso.

<sup>14</sup> Esememe Yesuye dileso giso holo ta eyo su magoo sa tegei homo su mapoo sigime, odoo ta imadoloso diyadee diba omapoo kookoodabaso. Esememe Yesuye giso holo ta yimapoo egeesee takaso, “Mo holo, ayo namapoo takooso, no tebee!” diso.

<sup>15</sup> Esememe giso holo yo hogabuloso badolone to kemeleeso. Esememe Yesuye giso holo yo owee mapoo ido diso.

<sup>16</sup> Odoo susuga oso goo hagee ogoloso diya dio dulone Godee mapoo goomoga goo poudo demeleeso. Egeeseelone diayo egeesee takaga meleeso, “Godee maga to toloso kokodo takomo sili kitulugu odoo oso imapoo peledabadoo. Osoloso Godeeye o odoo pidilame olo simidoo,” dee takaga meleeso.

<sup>17</sup> Edebeeyo Yesuye goo moodoo ogoloso Yu odoowo mi Yudiya mi susuga mapoo osoloso mi abo koola omapoo oposusumo diyadeeso.

*Yonee odoo howo oluguli oso Yesuwo goo duloso woosa*

*(Mat 11:2-6)*

<sup>18</sup> Yonee o hamamee dili odoo oso Yesuye goo tomo silee ee Yonee mapoo takaso. Esememe Yoneeye goo hagee duloso o hamamee dili odoo bakadio oso dileso, Yesu mapoo hageesee woosalo egeye diso,

<sup>19</sup> “No tei Keliso iyo hagee bamolo osomo? O, iyo odoo hee bamalaiyo?” diso.

<sup>20</sup> Esememe Yoneeyo hamamee dili odoo oso dileso, Yesu mapoo egeesee takaso, “Yonee odoo howo oluguli oso iba namapoo sibeye dolone egeesee taka, ‘No tei Keliso iyo bamelee osomo? O, iyo see odoo hee bamalaiyo?’ dee taka,” diso.

<sup>21</sup> Esino biame domo omapoo Yesuye odoo paigiga sabolo osoloso odoo bo holo paladee sabolo osoloso odoo howo siliga sabolo tekepo moodoomo sileeso.

<sup>22</sup> Yayo egeeseemo silone Yonee o hamamee dili odoo mapoo egeesee takaso, “Niba see wedi dileso Yonee mapoo niyo egei goo sabolo osoloso niyo du goo sabolo takee. Bei, odoo howo siliga oso see medee ogowa. Osoloso odoo kido tigidiba sabolo see tekepo poloso silesiboso. Osoloso odoo kolo e bia sabolo tekepo poloso silesiboso. Osoloso odoo dulu tabaga nosee tekepo poloso to taka dulugamo silesiboso. Osoloso odoo wedia sabolo hogogabuloso see silesiboso. Osoloso to tekepo hagee bi mauwe odoo oso duluga moloso.

<sup>23</sup> Esiga odoo agayo ayo goo moodoo ee ogoloso diayo amapoo tei too goo ee pegel-ega poogooga, Godeeye dimapoo goomoga goo tenelaiso,” diso.

*Yesuye Yonee odoo howo oluguli eyo goo taka*

*(Mat 11:7-19)*

<sup>24</sup> Yonee o hamamee dili odoo oso see wedi dime Yesuye odoo mapoo Yoneeyo goo ee takalame bei mooloogooso. Osoloso yayo egeesee takaso, “Niba miwe poogoo mi mapoo ogo goo agalame ka diyo? Pooso siboga obuso dabisa ee agalame ka diyo?”

<sup>25</sup> Niba edebeeyo dugo tekepo kaloso badoboome ee agalame ka diyo? Haye. Bei, dugo tekepo kalagali odoo ee wiligi odoo oso debeli moso tekepo mapoo debeli.

<sup>26</sup> Esino niba wulo Godee maga to toloso kokodo takomo sili odoo ee agalame ka diyo? O. Niyo dilesa egei odoo Yoneeye Godee maga to toloso kokodo takomo sili odoo daga hoogoo debei yayo dagadiso.

<sup>27</sup> Bei, Godeeyo to booka mapoo hogugu oso egeesee egee takoo, o goo ee takooso, ‘Ayo mo to tosili odoo yo daga malalo diye dalaiso.

Yayo nee eli hoodo magalame.’

<sup>28</sup> Esiga ayo nimapoo taka, odoo daga hoogoo debei susuga ee Yoneeye dagadilesa badoso. Esino Godeeye wiligi doloso badeli mapoo odoo wuluge oso Yonee dagadilesa ka badoso,” diso.

<sup>29</sup> Odoo susuga sabolo osoloso tekisi molee misigeli odoo abo sabolo to hagee duloso Godeeyo goo ee tekepo diso. Bei, diba nosee Yoneeye howo ogusigaso.

<sup>30</sup> Esino Pelisi odoo sabolo osoloso tei eligili odoo sabolo oso Godeeye goomoga goo diayo ee talai gowoolone diba howo ogusigilega poogooso.

<sup>31</sup> Osoloso Yesuye see egeesee takaso, “Epedee domo hamapoo egee do odoo ee odoo kasi masiyo?”

<sup>32</sup> Diba holaiso masi go domo mapoo dobolone emegei dimapoo nei takoo nei takoo dolone dobolone egeesee takaga meliso,

‘Iyo goomoga kosaiya poume niba hepele, osoloso iyo goohele kosaiya poume niba pupusigele.’

<sup>33</sup> Niba odoo egeesi masi doso. Bei, Yonee odoo howo oluguli oso simi ee yo wo sabolo wain i sabolo namo sile. Esino niyo yo bo holo paladoo dee takeliso.

<sup>34</sup> Osoloso hamamee Odoo Holo anosee olo simiso. Ayo sibilesa wo sabolo wain i sabolo namo siloga, niyo a wo sabolo yugune sabolo dooboo nali odoo deliso. Osoloso niyo a tekisi molee misigeli odoo sabolo osoloso tokenee teli odoo sabolo hedebe doloso ka badeli deliso.

<sup>35</sup> Esino odoo agayo Godeeye goo goolee tekepo gooleedoloso tomo siloga, yayo Godeeye goo goolee ee tekepo dolone ka eligiso,” diso.

*Tokenee teli sobo oso Yesuwo homo hapoo*

<sup>36</sup> Biame heeso Pelisi odoo Saimonoye Yesu idoloso o moso mapoo nei nalame diso. Esemee Yesu Saimonowo moso mapoo nei nalame biaso.

<sup>37</sup> Mi omapoo goo tokenee teli sobo hee badebeiso. Esino yayo Yesuye Pelisi odoowo moso mapoo nei namelee goo ee duloso sisigageli i medee tekepo yoso moodoo howogi mapoo salamasoloso tosimiso.

<sup>38</sup> Osoloso Yesuwo miligi maga gauwuloso pusulone o didawoso Yesuwo homo balagieso. Osoloso yayo see Yesuwo homo mapoo o wudu oso tolone adameleeso. Osoloso sisigageli i medee tekepo oso Yesuwo homo mapoo soomeleeso.

<sup>39</sup> Osoloso Pelisi odoo Saimonoye goo hagee ogoloso egeesee goolee meleeso, “Odoo hagee tei Godee maga to toloso kokodo takomo sili odoo oso diepi, soboso yo sige medee hoodo egeliyo. Bei, sobo hagee goo tokenee teli sobo,” diso.

<sup>40</sup> Esemee Yesuye Pelisi odoo mapoo egeesee takaso, “Saimon, ayo namapoo goo takalai, a goomogo,” diso.

Esemee Saimonoye egeesee takaso, “Eligili odoo, takee,” diso.

<sup>41</sup> Esemee Yesuye yimapoo egeesee takaso, “Odoo heeso odoo bakadio mapoo molee teneeso. Egeeseelone yayo odoo hee mapoo molee ko 500 tenelone, odoo hee mapoo hedebe molee ko 50 teneeso.

<sup>42</sup> Esino hamamee odoo bakadio hagee bia dimapoo molee mauwe poogoome, nei o hedebe egeesi yimapoo tenelega poogooso. Esemee bi eyo amameeye goo hagee ogoloso dimapoo egeesee takaso, ‘Bige boobado bigi,’ diso. Esiga odoo bakadio hagee ma kulodu odoo hee kaso bi eyo ama diya ka gooleebuguba?” diso.

<sup>43</sup> Esemee Saimonoye nei yimapoo egeesee takaso, “A goolee, molee toowa

too odoo oso ama diya goolee malaiso,” diso.

Eseme nei Yesuye Saimon mapoo egeesee takaso, “Nayo tei goo takoo,” diso.

<sup>44</sup> Yesuye sobo mapoo bolone Saimon mapoo egeesee takaso, “No sobo hagee ege! Ayo nee moso mapoo sibume, nayo mo homo hapalame howo amapoo tenele. Esino sobo hagoso o didawoso mo homo hapoloso see o wuduso mo homo taso.

<sup>45</sup> Osoloso ayo nee moso sibume nayo goomogolone a edele. Esino ayo nee moso mapoo simi domo omaga sobo hagoso mo homo mapoo adamelee koodobile.

<sup>46</sup> Osoloso nayo olipi i oso mo wiligi mapoo soole. Esino sobo hagoso sisi-gageli i medee tekepo oso mo homo mapoo sooso.

<sup>47</sup> Esiga ayo namapoo taka. Sobo hagee o goo tokenee susuga olo hapoloso boobado buguso. Esiga sobo hagoso a diya goolee goo ee weliga yilige buguso. Esino odoo agayo ayo o goo tokenee pepooko hedebe hapoloso boobado buguga, yayo a goolee goo ee haga toowanee,” diso.

<sup>48</sup> Osoloso Yesuye sobo omapoo egeesee takaso, “No nee goo tokenee susuga ee olo hapoloso boobado buguso,” diso.

<sup>49</sup> Eseme odoo abo yibolo hodobo dobolone nei nalaga melee odoo oso goo hagee ogoloso dieso nediliyo dima kulodu egeesee takaga meleeso, “Odo hagee odoo ogumo? Yayo goo tokenee hapoloso kasee boobado bugu domo ka silosomo?” diso.

<sup>50</sup> Diayo egeesee takomolome Yesuye sobo yimapoo egeesee takaso, “Nayo tei too goo maga badoboso kookaiyo gie badeli nayo olo tooso. Esiga no goomoga sabolo di,” diso.

## 8

### *Sobo aboso Yesubolo di*

<sup>1</sup> Goo hagoso dilesi koodobume, Yesuye to tekepo Godeeye wiligi doloso badeli goo ee eligimo silone, mi hee maga mi hee mapoo du domo silesibiso. Osoloso o hamamee dili odoo 12 yibolo hodobo sileeso.

<sup>2</sup> Osoloso sobo paigiga Yesuye tekepo moodoo sabolo osoloso sobo bo holo paladee Yesuye tekepo moodoo oso Yesubolo sileeso. Sobo egee bia hagoso: Meli, o hu hee Magadalin. Yesuye sobo hageeyo kuloduga bo holo 7 peegoo hasiso buguso.

<sup>3</sup> Osoloso sobo hee Helodeeyo moso bali odoo hee Kusayo osobo Yowana, osoloso Susana, osoloso sobo abo dibolo silesibiso. Sobo hagee bia oso Yesu sabolo osoloso o hamamee dili odoo sabolo dimapoo diayo dia molee oso diba pidimo silesibiso.

### *Witi wo ko segei maga wudu taka (Mat 13:1-9; Maka 4:1-9)*

<sup>4</sup> Odo susuga mi opusomo opusomo di maga sibilesi mooloogoodeme Yesuye wudu taka hamaga oposususo,

<sup>5</sup> “Biame heeso odoo hee witi wo ko segelame diso. Yo witi wo ko sogomo sileeme, ko abo eli domo mapoo misigedibaso. Eseme edebeeyo eli omaga silesibulone witi wo ko dia homososi topoomo dime sóso sibilesi neso.

<sup>6</sup> Eseme witi wo ko abo ee yugogisi mi mapoo misigedibaso. Osoloso bou gasibilesi palame sino haga booloogelega wediaso. Bei, yugogisi mi ee ma kulodu howo mauwega.

<sup>7</sup> Osoloso witi wo ko abo obu ma kulodu misigedibaso. Esino haga booloogelaga saga paladeeso. Esino oso polone obu sabolo palaga tiso tiadolone witi wo susuga wediaso.

<sup>8</sup> Osoloso witi wo ko abo mi tekepo mapoo misigedibaso. Osoloso bou pisaloso kauwuloso ko diya palagaso. Eseme witi wo ko susuga oso ko pa homokoko 100 egeesi oso palagaso.”

Yesuye to hagee takoloso tobudulone toso neligidi egeesee takaso, “Odo niba dulubolo, esiga ayo hagee takoo medee hoodo dui!” diso.

### *Wudu taka goo eyo bei (Mat 13:10-23; Maka 4:10-20)*

<sup>9</sup> Yesuwo hamamee dili odoo oso Yesu mapoo egeesee takaso, “Wudu taka goo hageeyo bei kasiyo?” diso.

<sup>10</sup> Eseme Yesuye nei dimapoo egeesee takaso, “Niyo Godeeye wiligi doloso badeli



goo ee ogoloso gooleedalaiso. Bei, daga Godeeye wiligi doloso badeli goo ee mada meleeso. Esino epei nimapoo woola ka yilige buguso. Esino odoo abo mapoo ayo biame susuga wudu takeliso. Bei, 'diayo ogoloso medee kibiya egelega pagalame.

Osoloso diayo duloso goo eyo bei medee kibiya gooleedelega pagalame.'

<sup>11</sup> Esiga wudu taka goo eyo bei hagoso: Witi wo ko ee Godeeyo to oso.

<sup>12</sup> Esiga odoo abo witi wo ko eli domopoo misigediba egeesi masi doso. Diba to tekepo duliso. Esino Godeeyo to hagee dibada sooloo ma kulodu egee molo ee boobado bigilame Saitenso dimapoo boobado bigili goo teneliso. Bei, diayo to omapoo tei tolosos gie badeli teyaga.

<sup>13</sup> Esiga odoo abo witi wo ko yugogisi mi mapoo misigediba egeesi masi doso. Esiga diba Godeeyo to taka duloso goomoga sabolo medee teliso. Esino witi wo ko oso yugogisi mi mapoo polone o too medee meilega poogoo egee, diba onosee egeese seliso. Godeeyo to oso dibada sooloo ma kulodu too medee koo meili. Osoloso diayo Godeeyo to duloso biame deiyepo mapoo wulo tei teliso. Esino diayo Godeeyo to mapoo tei too maga, hegi goo sabolo dala goo sabolo oso dimapoo siboga, diayo Godeeyo to mapoo tei too goo ee saga pegeliso.

<sup>14</sup> Osoloso odoo abo witi wo ko oso we ti kauwe kadee ma kulodu misigediba egeesi masi doso. Diba Godeeyo to duloso to ee teliso. Esino mi toowayo gie badeli goolee sabolo, osoloso bi bei doloso dabalai goo gweli sabolo, osoloso dibada su oso goomoga goo ee goolee sabolo diyadulone dibada tei too tokenee peliso. Goo egeesi maga diayo tei too goo oso homokoko masi koo peli.

<sup>15</sup> Osoloso odoo abo witi wo ko mi tekepo mapoo misigediba egeesi masi doso. Diayo dibada sooloo ma kuloduga tekepo goo gweli sabolo osoloso goomoga sabolo Godeeyo to duloso dibada sooloo ma kulodu medee tei teliso. Osoloso diayo o to kibiya kookoodoloso, dobolone homokoko masi diya peliso."

*Mo to medee dui  
(Maka 4:21-25)*

<sup>16</sup> "Edebeeyo keme pouloso tolo oso koo gagali, osoloso mada koo mageli. Yo keme pouloso woola mapoo pou mageliso, edebeeyo moso kulodu gasibilesos gadeebugu ee agalame.

<sup>17</sup> Bei, goo susuga epedee mada egee molo, see hamamee odoo susuga oso agalame woola peledabalaiso. Osoloso odoo susuga oso koo duli goo ee see odoo susuga oso dulame woola yilige bigileiso.

<sup>18</sup> Mo to hagee niyo medee dui. Bei, to taka medee duli odoo mapoo Godeeye goo goolee tekepo tenelaiso. Esino edebeeyo eyo nediliyo yo Godeeye wiligi doloso badeli goo ee yo gooleedoo doloso mo to dulega poogooga, Godeeye yimapoo goo goolee pepooko egee molo see eyo peedee dalaiso," diso.

*Yesuwo owee sabolo omolo dio sabolo  
(Mat 12:46-50; Maka 3:31-35)*

<sup>19</sup> Biame heeso Yesuwo owee sabolo omolo dio oso Yesu agalame sibadeeso. Esino odoo bei diya mooloogoodoloso ka doboome, diba Yesuye badebei mapoo hodu dilei tebile.

<sup>20</sup> Esemee odoo heeso diba ogoloso, Yesu mapoo egeese takaso, "Noowee sabolo osoloso nomolo dio sabolo oso peegoo no agalame balaga moloso," diso.

<sup>21</sup> Esemee Yesuye odoo mooloogoodoo mapoo nei egeese takaso, "Edebeeyo Godeeye eligi goo ee duloso mesimo sile-siboga, diba mo wee dio osoloso molo dio oso," diso.

*Yesuye i sabolo howo ki sabolo hamaga  
taka  
(Mat 8:23-27; Maka 4:35-41)*

<sup>22</sup> Biame heeso Yesuye o hamamee dili odoo dimapoo egeese takaso, "Iba abei hodiokoo dalo soowoomo," diso. Esemee diba du mapoo bulumaloso soowadeeso.

<sup>23</sup> Diba abei domopooga damolome, Yesu tila poogoomo tiaso. Esemee haga booloogelega i toowa sibume, abei omapoo howo ki toowa simiso. Esemee howo ki toowa oso sibulone dibada du ma

kulodu howo sasoo oso diba dia du sabolo howomoo owulame siso.

<sup>24</sup> Esemé Yesu o hamamee dili odoó oso dileso, Yesu tidilone egeesee takaso, “Wiligi odoó, iba howomoo owuloso wedilame see!” diso.

Esemé Yesu tia hogabuloso tobudulone i sabolo howo ki sabolo koodobilame to kitulugu sabolo takaso. Esemé i sabolo howo ki sabolo simi saga omapoo koodobiaso.

<sup>25</sup> Esemé Yesuye o hamamee dili odoó dimapoo egeesee takaso, “Niyo tei too kasomo?” diso.

Esemé Yesuwo hamamee dili odoó oso goo hagee ogoloso howoogadoloso obugulone diesono egeesee takaga meleeso, “Odoó hagee odoó ogumo? I sabolo howo ki sabolo o to duloso koodobiaso,” dee takaga meleeso.

*Yesuye odoó bo holo pala ee tekepo moodoo*

*(Mat 8:28-34; Maka 5:1-20)*

<sup>26</sup> Osoloso Yesu o hamamee dili odoó sabolo Gelili mi maga abei daloso Gelasa mi mapoo peledabaso.

<sup>27</sup> Yesu du maga widi pee mapoo pubal-ogolone egeino, odoó bo holo pala oso yo tugodalame sibume egeiso. Odoó hagee daga hoogoo dobudu boodo diwe silone biame susuga odoó bi mapoo badeli.

<sup>28-29</sup> Bei, bo holo oso kitulugu oso yimapoo toga edebeeyo ki tiso yo tialogoloso mageliso. Esino bo holoso kitulugu oso ki tiso tialogoloso magoo ee kookoobuguloso odoó ee idoloso dobudu diliso. Esino odoó hagosó Yesu ogoloso miyomoo gasuwoloso gwa sabolo tiamolone toso neligidi yimapoo egeesee takaso, “Dokodoo badeli Godeeyo owolo Yesu, nayo amapoo ogoó goo moodoolame ka simiyo?” diso. Osoloso yayo Yesu mapoo howoolone see egeesee takaso, “Nayo amapoo dala na tenee,” diso. Odoó bo holo pala oso to hageesee taka. Bei, daga Yesuye bo holo odoó ma kulodu egee bado mapoo takolone peegoo gasibeye, dee takeme ka taka.

<sup>30</sup> Esemé Yesuye yimapoo egeesee takaso, “Nee hu ogumo?” diso.

Esemé yayo to nei egeesee takaso, “Ibada hu ee Bei,” diso. Bei, bo holo susuga oso yima kulodu doso.

<sup>31</sup> Esemé bo holo odoó ma kulodu debei oso egeesee takaga meleeso, “Nayo iba Dou mi mapoo na seese peegee,” dee takaso.

<sup>32</sup> Esemé biame omapoo, esia ma dokodoo be hu susuga oso mooloogoo doloso, mi nalagamo silesibiso. Esemé bo holo odoó ma kulodu debei oso Yesu mapoo howoolone egeesee takaso, “Iba be ma kulodu galaga di dee takee,” diso. Esemé Yesuye dimapoo egeesee takaso, “Niba be ma kulodu galaga dilei soowa!” diso.

<sup>33</sup> Esemé bo holo susuga oso odoó ma kuloduga peegoo galaga dileso see be ma kulodu galaga diso. Esemé be susuga oso godobia maga kukolo meilesó, howomoo wediaso.

<sup>34</sup> Esemé be bali odoó oso goo hagee ogoloso kukulo dileso dia mi mapoo osoloso mi pepooko abo mapoo goo egee takomo diso.

<sup>35</sup> Esemé odoó susuga oso goo hagee duloso ee agalame sibadeeso. Diba sibilesó egeino, bo holo pala odoó ee tekepo poloso Yesuwo homo beiyopoo badolone goo goolee tekepo toloso dugo kaloso bado-boome egeiso. Esemé diba diya ebigaso.

<sup>36</sup> Esemé Yesuye odoó bo holo pala ee tekepo moodoome egei odoó oso diayo egei goo ee agalame sibadee odoó dimapoo oposususo.

<sup>37</sup> Esemé Gelasa mosobia odoó susuga sabolo osoloso koola omapoo debeli odoó susuga sabolo oso Yesu mapoo egeesee takaso, “No mi hamaga saga peegoo di,” diso. Bei, diba Yesuye goo moodoo mapoo ogoloso diya obugume. Esemé Yesu dilame yo du mapoo dabagaso.

<sup>38</sup> Esemé odoó bo holo pala Yesuye tekepo moodoo oso Yesubolo dilame goomogaso. Esino Yesuye yimapoo egeesee takaso,

<sup>39</sup> “Haye. No abolo na sibe. No nee mi mapoo see wedi dileso Godeeye namapoo goo toowa moodoo goo ee oposisi,” diso. Esemé odoó yo o mi mapoo see wedi dileso, Yesuye yo tekepo moodoo goo ee oposusumo sileeso.

*Yesuye Yailaseeyo owolo ta ee see hogabilame tekepo moodoo sabolo osoloso sobo*

*paiye tekepo moodoo goo**(Mat 9:18-26; Maka 5:21-43)*

<sup>40</sup> Yesu see abei hodiokoo dalo sibume, yo bolone debei odoosusuga oso yayo simi ogoloso diya goomogaso.

<sup>41</sup> Esememapoo haga booloogelega odooshe, Yu odoodia howo gisili moso gibadeli odooshe, Yailaseeye, sibilesosYesuwo homo beiyopoo gawusolosobadolone Yesu mapoo howoolone egeesetakaso, “No mosopoo sibe!”

<sup>42</sup> Bei, mosoboholo hedebe, o dugo 12, paiye oso olo talame soomoloso,” diso.

EsemesYesuye Yailaseeyomosopoo dumolome eli domopoo odoosusuga oso yimahodu diya mooloogoo dolosodulone nei halagabugu nei halagabugudomodiyadeeso.

<sup>43</sup> Osolosoo doos mooloogoo dolosodiyadee ee ma kulodu soboshe asowooloomaloso badebei sabolo diso. Yosowooloomaloso badebei osoosedugo 12 poogooso. Esino odoosheeso yotekepo moodoolaitebile.

<sup>44</sup> EsinosobohagososYesu dumolome, madamiligiyopooga sibilesosYesuwo dugo su mapoo sigeme, asowoolooma oso sawososomelee omapoo sagakoodobiaso.

<sup>45</sup> EsemesYesuye egeesetakaso, “Odoosagaya aka sigoba?” diso.

Esino odoosusuga oso Yesusigiledolosodiya pulugume, Pitaye Yesu mapoo egeesetakaso, “Wiligi odoosusuga ososobohodobodulone no kasingodomo du,” diso.

<sup>46</sup> EsemesYesuye neiegeesetakaso, “Haye. Egeesesele. Odoosheeso aka sigiwa. Esemesodoo weidilame moodelikitulugu amamelee oso peegoodimawo gooleedoso,” diso.

<sup>47</sup> Sobohagosogoo moodoo eemadamagalaitebile dolosogooledolosokikiliga sabolo dileso, Yesuwo homo beiyopoo gasuwolosobadebeiso. OsolososYesuyesoboyoweidilame moodoo gosabolo, osolosoyayosYesu sigegoo ee oposusumesodoo susuga osoduso.

<sup>48</sup> EsemesYesuyesoboyimapoo egeesetakaso, “Mosoboholo, no tei toomaganosobohodobodulone no kasingodomo du,” diso.

olo tekepo paso, esiga nosmesie sabolo di,” diso.

<sup>49</sup> OsolososYesuyesoboyimapoo totakomolome, odoosheeso Yailaseeyomosobabagasibilesos, Yailas mapoo egeesetakaso, “Neesoboholo olo tamolosos. Esiganayoseligili odooshamapoo wulogoo mauwe na idosibe,” diso.

<sup>50</sup> EsinosYesuyegoo hageesduloso Yailas mapoo egeesetakaso, “Nohaganabebi, wulo amapoo tei te. Egeeseeaganeesoboholo tamageesemolo see weidileiso,” diso.

<sup>51</sup> Dibadileso mosopoo doboome, Yesuyedulone hedebe Pita, Yonee, Yemes, osolososoboholo eyoswee diosama diosonosgilimadoloso, mosokulodugalagadiso.

<sup>52</sup> Diba mosokulodugalagadileso egeinos, odoosusuga ososoboholo tamahalopupusigamolome egeisos. EsemesYesuyedimapoo egeesetakaso, “Nibageesepupusigamolopedeesomapoo koodobie. Bei, soboholoyokoo tamolosos. Esinyowulotiamolosos,” diso.

<sup>53</sup> EsemesYesuyeegeesetaka dulosodibayiligaso. Bei, soboholosotadibaholoegeiga.

<sup>54</sup> EsinosYesuyesoboholotameesdeemapoo tolosoyimapoo egeesetakaso, “Soboholo, notebes,” diso.

<sup>55</sup> Esemesoboholotameesogiebadeeliseewedisibume, yohogabulosotabaso. EsemesYesuyedimapoo egeesetakaso, “Soboholomapoo neitenees,” diso.

<sup>56</sup> Esinosoboholoyosama dioswee diogoo hageesogolosodiya howoogadooso. EsemesYesuyedimapoo egeesetakaso, “Nisogeigoo hageesodoo abomapoo natakee,” diso.

**9***Yesuye o hamamee dili odoos 12 diye di*  
*(Mat 10:5-15; Maka 6:7-13)*

<sup>1</sup> Yesuye o hamamee dili odoos 12 gilimadoloso dimapoo kituluguteneeso, diayosoboholosomawokuloduga peegoo hasisobugudomosilesibulone odoospaigigasabolo tekepo moodoo dalame.

<sup>2</sup> Osoloso yayo diba diye diso, diayo dilesa Godeeye wiligi doloso badeli goo ee odoo mapoo eligimo silesibulone, odoo paigiga sabolo tekepo moodoo dalame.

<sup>3</sup> Osoloso yayo dimapoo egeesee takaso, “Niyo dulone, susu, osoloso o, osoloso wo, osoloso molee, osoloso kali bi bakadio na todi, wulo hedebe todi.

<sup>4</sup> Niba mi omapoo dilesa peledobooga, omapoo edebeeyo niba o moso mapoo ido pologa, moso hedebe omapoo tia melee. Osoloso niyo mi omaga mi hee mapoo dulone, mi egee wulo poogoo du domo silesibe.

<sup>5</sup> Osoloso niyo mi hee mapoo dilesa edebeeyo niba o moso mapoo ido pelega poogooga, niba mi egee poogoo dulone, nee homo mapoo basago mologa omapoo tegene peegee, Godeeye komonolone dimapoo dia goo tokenee eyo nei tenelai goo ee gooledalame,” diso.

<sup>6</sup> Osoloso diba see diyadeeso. Diba mi hee maga mi hee mapoo du domo silesibulone, Godeeyo to tekepo takomo silesibiso. Osoloso odoo paigiga susuga see tekepo moodoo domo silesibiso.

### *Helodeeye goo tiadoo*

*(Mat 14:1-12; Maka 6:14-29)*

<sup>7</sup> Yesuye moodoomo sili goo susuga ee Gelili mi ee bali odoo Helodee duso. Esemee goo hagee duloso yo diya goo tiadooso. Bei, odoo aboso Yesuwo goo mapoo egeesee takaso, “Yo Yonee odoo howo oluguli ta maga see ka hogabiadoo,” diso.

<sup>8</sup> Osoloso odoo aboso egeesee takaso, “Yo Ilayadoo.” Osoloso odoo aboso egeesee takaso, “Yo Godee maga to tolosa kokodo takomo sili odoo hee daga badebei oso ta maga hogabuloso see ka simidoo,” diso.

<sup>9</sup> Esemee Helodeeye goo hagee duloso egeesee takaso, “Yonee ayo wooloomeye neme olo woolomaso. Esino ayo goo toowa hagee dumolo ee agamo goo ee dumolosomo?” diso. Yo diya goo tiademe, yayo Yesu agalame diya goomogaso.

*Yesuye odoo 5,000 mapoo nei pi*  
*(Mat 14:13-21; Maka 6:30-44; Yon 6:1-14)*

<sup>10</sup> Yesuye diye di odoo 12 diba see wedige sibilesa, goo diayo moodoo sabolo osoloso goo diayo eligi susuga ee Yesu mapoo oposususo. Osoloso Yesuye diba gilimadoloso Betesaida mi mapoo dibusomo dabalame diyadeeso.

<sup>11</sup> Esino odoo susuga oso goo hagee duloso diba nosee hamamee diyadeeso. Esemee diayo simi Yesuye ogoloso diba gilimadoloso dimapoo Godeeye wiligi doloso badeli goo ee eligilone odoo paigiga sabolo weidilame tekepo moodoo demeleeso.

<sup>12</sup> Yesu yo egeeseemo sileeme, o hamamee dili odoo oso habe sibilesa yimapoo egeesee takaso, “Odoo susuga hagee epedee diye dee, diba mosobia koola omapoo dilesa dieso nei nalai sabolo moso tilei sabolo ee esilame. Bei, mi iyo hagee do mapoo nei iyo nalai sabolo moso iyo tilei sabolo mauwedoo,” diso.

<sup>13</sup> Esemee Yesuye dimapoo nei egeesee takaso, “Niyo dimapoo nei tenee,” diso.

Esemee diayo nei egeesee takaso, “Odoo hagee diya bei. Esino imapoo wo si hedebe dee tiadoo sabolo di bakadio sabolo moloso. Esino nayo imapoo nei abo talame diye doloso ka takala?” diso.

<sup>14</sup> Bei, biame omapoo mooloogoodoo ee ma kulodu gisowe hesiga ee 5,000.

Esemee Yesuye o hamamee dili odoo dimapoo egeesee takaso, “Odoo susuga nei nalame odoo 50 egeesiso mooloogoodolo ka buluma, odoo 50 egeesiso mooloogoodolo ka buluma dee takee,” diso.

<sup>15</sup> Esemee odoo susuga olo nei nalame egeesee bulumamo diso.

<sup>16</sup> Osoloso wo si dee tiadoo sabolo di bakadio Yesuye tolosa, Kei mi ma dokodoo bolone nei pidilame goomoga goo Godee mapoo takaso. Osoloso yayo wo popeiloso di bakadio agisaloso, o hamamee dili odoo mapoo piso, see diayo odoo susuga mapoo pilame. Esemee diayo wo si popei sabolo di hwei sabolo odoo susuga mapoo piso.



<sup>17</sup> Eseme odoo susuga nei ne oso diya edigime nei hosudelega abo poogooso. Osoloso diayo nei naloso abo poogoo ee Yesu o hamamee dili odoo oso misigamo dilesu bou tegei mapoo soo 12 egeesi metamagisaso.

*Pitaye Yesuwo goo yilige bugu  
(Mat 16:13-19; Maka 8:27-29)*

<sup>18</sup> Biame heeso Yesu obusomo Godee mapoo takolone badoboome, o hamamee dili odoo oso yimapoo sibadeeso. Eseme Yesuye dimapoo egeesee takaso, “Edebeeyo a odoo ugu deliyo?” diso.

<sup>19</sup> Eseme diayo nei Yesu mapoo egeesee takaso, “Odo aboso taka no Yonee odoo howo oluguli dee takeliso. Aboso taka no Ilaya deliso, osoloso odoo aboso taka no Godee maga to toloso kokodo takomo sili odoo hee daga badebei oso ta maga hogabuloso see ka simidoo, dee takeliso.”

<sup>20</sup> Eseme Yesuye nei dimapoo egeesee takaso, “Esino nei niyo a odoo ugu deliyo?” diso.

Eseme Pitaye nei egeesee takaso, “No Godeeye hudi magoo Kelisoso,” diso.

<sup>21</sup> Eseme see Yesuye nei o hamamee dili odoo dimapoo egeesee takaso, “Niyo odoo abo mapoo takolone a Keliso dee na takee,” diso.

*Yesuye eyo talai goo ee taka  
(Mat 16:21; Maka 8:31)*

<sup>22</sup> Osoloso see tobu Yesuye o hamamee dili odoo dimapoo egeesee takaso, “Odo Holo, a dala toowa bei talaiso. Osoloso Yu odoowo wiligi odoo tebisa sabolo, tei moso wiligi odoo tebisa sabolo, tei eligili odoo sabolo oso a diya gowoolone pagalaiso. Osoloso edebeeyo a teli mapoo magalaiso. Esino biame bakadio midoo ma kulodu ta moloso biame hee mapoo see hogabileiso.”

*Yesuye yayo di hamamee dilei goo ee eligi*

*(Mat 16:24-28; Maka 8:34-38)*

<sup>23</sup> Yesuye see odoo susuga mapoo egeesee takaso, “Edebeeyo ayo di hamamee sibilei goomogoga, yo daga

eyo goomoga goo tomo sili ee poogoloso, biame susuga ma kulodu eyo talai sabolo dala toowa talai goo sabolo medee mopoodoo doloso ama hamamee ka sibe.

<sup>24</sup> Osoloso odoo agayo o gie badeli eyo nediliyo pidilame seega, yo o gie badeli ee osugobalaiso. Esino odoo agayo mo goo maga o gie badeli peegoo magooga, yo badoboso kookaiyo gie badeli talaiso.

<sup>25</sup> Esino odoo agayo mipoo toowa hamapoo badolone, eyo goomoga goo susuga tomo siloso, hedebe gie badeli goo ee telega dagaduga, yo see ogooo goo talaisomo? Mauwe.

<sup>26</sup> Osoloso odoo agayo abolo osoloso mo to mapoo gowooga, Odo Holo ayo toowa doloso badeli goo omaga mo gadeebugu sabolo, osoloso mo Maye toowa doloso badeli goo omaga o gadeebugu sabolo, osoloso Godeeyo momaiye oso toowa doloso debei omaga gadeebugu sabolo sibilesu nei diba gowoolaiso.

<sup>27</sup> Esiga ayo nimapoo ka taka. Nima kulodu odoo abo olo doso, diba Godeeye wiligi doloso badalai biame oso simi ogoloso, hamamee wedileiso,” diso.

*Yesu o su opusomo di  
(Mat 17:1-8; Maka 9:2-8)*

<sup>28</sup> Osoloso biame 8 egeesi poogoloso, hamamee Yesuye dulone, Pita, Yonee, osoloso Yemes esee gilimadoloso mubi dokodoo Godee mapoo takalame palaso.

<sup>29</sup> Yesuye Godee mapoo takomolome, o mudu opusomo doloso o dugo diya heliye poloso omaga poniso.

<sup>30</sup> Eseme haga booloogelega, Ilaya dio Moses dio galaga sibilesu Yesubolo to kemeleeso.

<sup>31</sup> Diayo Kei mi diya gadeebugu sabolo peledoboloso Yesuye Godeeyo to dodolone Yelusalem mapoo dilesu talai goo ee opusususo.

<sup>32</sup> Pita o odoo abo sabolo tiesaloso hogogabuloso keesee egeino, Yesu yayo toowa doloso badeli goo omaga o gadeebugu sabolo tobudulone odoo bakadio sabolo to kesamolome egeiso.

<sup>33</sup> Odoo bakadio oso Yesubolo to ke-sameleso dilame doboome, Pitaye medee goo goolega Yesu mapoo egeesee takaso, “Wiligi odoo, iba hamapoo dabalai tekepo. Esiga iyo waseme bakadio hedebe di tegegalaiso. Hee nee, hee Moseseeyo, osoloso hee Ilayayo,” diso.

<sup>34</sup> Pita to osee komolome, koloboso sibilesa diba gidiseme, diya ebigaso.

<sup>35</sup> Osoloso kolobo maga toso egeesee taka, “Hagee mowolo, ayo hesia oso. Esiga o to medee dui!” diso.

<sup>36</sup> Kolobo ma kuloduga to taka koodobuloso, diayo Yesu obusomo tobudume egeiso. Pita diayo mubi ma dokodoo egei goo ee odoo abo mapoo saga takele.

*Yesuye giso holo bo holo pala tekepo moodoo*  
(Mat 17:14-18; Maka 9:14-27)

<sup>37</sup> Diba biame hee mapoo mubi maga kumoo meilesa doboome, odoo susuga oso Yesuye badebei mapoo saga sibadeeso.

<sup>38</sup> Esemee odoo mooloogoodoo ma kuloduga odoo hedebeeso toso neligidi Yesu mapoo egeesee takaso, “Eligili odoo, ayo namapoo howaso, nayo mo giso holo agalame sibe. Bei, yo mo holo hedebeega.

<sup>39</sup> Bei, bo holo oso yimapoo pologa, yo kikiliga sabolo homodobuloso gwa sabolo molone maga maga makawo tiodiliso. Bo holo oso yimapoo dala tenemolome yo biame susuga ma kulodu haga medee koo sili.

<sup>40</sup> Esino ayo nee hamamee dili odoo mapoo bo holo hagee peegoo hasiso bigi deme, diayo peegoo hasiso bigilei tebilena,” diso.

<sup>41</sup> Esemee Yesuye egeesee takaso, “Niba tei too mauwe tokenee odoo. Niyo amapoo tei talame a biame kasolo nibolo hodobo ka badalaiyo? Esino nowolo amapoo ido sibe,” diso.

<sup>42</sup> Giso holo Yesu mapoo ido sibumolome, bo holo yimapoo pala oso kilikolone mi mapoo homodobiaso. Esemee Yesuye bo holo peegoo hasiso buguloso, yo tekepo poloso oma mapoo ido diso.

<sup>43</sup> Esemee odoo susuga oso Godeeye kitulugu goo ogoloso diya howoogadooso.

9:35: Luka 3:22    9:44: Luka 9:22    9:45: Luka 18:34  
Luka 11:23

Odoo susuga oso Yesuye goo moodoo susuga ee osee goolone doboome, Yesuye o hamamee dili odoo mapoo egeesee takaso,

<sup>44</sup> “Odoo Holo, a ha teli odoo mapoo tiasalaiso. Esiga niba ayo epedee goo hagee takoo na boobadee,” diso.

<sup>45</sup> Esino o hamamee dili odoo oso Yesuye taka goo eyo bei medee kibiya gooledele poogooso. Bei, goo eyo bei ee dimaga mada magoloso meleeso. Esemee diayo see Yesu mapoo woosalai ebigaso.

*Odoo agayo toowa doloso ka badalaiyo?*  
(Mat 18:1-5; Maka 9:33-37)

<sup>46</sup> Yesu o hamamee dili odoo oso dima kulodu odoo agayo toowa doloso ka badalaisomo, doloso dieso nediliyo toso agadigasoo.

<sup>47</sup> Esino Yesuye dibada goo goolee ogoloso holope idoloso yima koola mapoo sibilesa tobudume, o hamamee dili odoo mapoo egeesee takaso,

<sup>48</sup> “Odoo agayo holope hageesi masi mo hu maga yibolo badalame idoga, yayo a idoso. Osoloso odoo agayo a idoga, yayo mo Ma a diye di ee idoso. Esiga nima kulodu odoo agayo eyo nediliyo pepooko daga, yo see toowa doloso badalaiso,” diso.

*Edebeeyo namapoo ha telega badoga, yo nee odooso*  
(Maka 9:38-40)

<sup>49</sup> Esemee Yoneeye egeesee takaso, “Wiligi odoo, iba odoo heeso bo holo ee nee hu sabolo odoo ma kuloduga peegoo hasiso bugume egeiso. Esemee iyo yo hamaga takaso. Bei, yo ibada mooloogoodoo ma kulodu koo badeli,” diso.

<sup>50</sup> Esino Yesuye yimapoo egeesee takaso, “Yo na hamaga takee. Bei, edebeeyo nimapoo ha telega badoga, yo nibada odoo oso,” diso.

*Samaliya odooso Yesu gowe*

<sup>51</sup> Yesu yo Kei mi ma dokodoo ido palai biame ee olo koola toboome, yo Yelusalem mapoo dilame goomogaso.

<sup>52</sup> Esemee yayo odoo abo Samaliya mi ee ma kulodu mi pepooko hee mapoo malalo

9:46: Luka 22:24    9:48: Mat 10:40    9:50: Mat 12:30;

diye diso, diayo dileso omapoo yayo tilei moso ee mopoodoo dalame.

<sup>53</sup> Esino mosobia oso Yesuye Yelusalem mapoo dileigo di goo ee duloso, diayo yo gowoolone yimapoo moso tenele.

<sup>54</sup> Esemé Yesu o hamamee dili odoó Yonee dio Yemes dio goo hagee duloso yimapoo egeesee takaso, “Lodee, douso mosobia odoó hagee piligilame, iyo Kei mi ma dokodooga dou toose dee takalai, no goomogosomo?” diso.

<sup>55</sup> Esino Yesuye dimapoo bidi toboloso tobudulone dimapoo diya takaso.

<sup>56</sup> Osoloso diba see mi hee mapoo diyadeeso.

*Yesu dadalai doloso to taka odoó  
(Mat 8:19-22)*

<sup>57</sup> Yesu o hamamee dili odoó sabolo eli maga diyadaga molome, odoó hedebe oso sibilesó Yesu mapoo egeesee takaso, “Nayo mi hee kamapoo dusomo, ayo no deedeé sileiso,” diso.

<sup>58</sup> Yesuye yimapoo nei egeesee takaso, “Dobu so oso debeli mi ee moloso. Osoloso sóso tieseli ou moloso. Esino Odoó Holo, ayo tieli moso mauwe,” diso.

<sup>59</sup> Esemé Yesuye see odoó hee mapoo egeesee takaso, “Nayo a deedeé sibe,” diso.

Esino odoó ogoso nei egeesee takaso, “Lodee, nayo epedee amapoo biame tenee, ayo mo ma toga midoosoolaiya,” diso.

<sup>60</sup> Esemé Yesuye yimapoo nei egeesee takaso, “Dio maga odoó wedia oso dieso nediliyo odoó wedia ee midoosodolone dabalai tekepo. Esino no sibilesó Godeeye wiligi doloso badeli goo ee odoó mapoo takomo sile,” diso.

<sup>61</sup> Esemé odoó heeso see egeesee takaso, “Lodee, a nama hamamee dadalai goomogo. Esino a epedee hamapoo mo soosoo dimapoo emegei di to takalame dia,” diso.

<sup>62</sup> Esemé Yesuye see yimapoo nei egeesee takaso, “Odoó agayo ama hamamee dodolone see wedi dilame hamamee bidi ogo domo duga, odoó

egeesi masi oso Godeeye wiligi doloso badeli goo ee halo tou talai tebile,” diso.

## 10

*Yesuye odoó 72 diye di*

<sup>1</sup> Goo hagoso dileso koodobume, Lodeeye odoó 72 hesigaso. Osoloso dima kulodu odoó bakadio tooboo bakadio tooboo doloso yayo dilei mosobia pepooko mapoo diba malalo diye diso.

<sup>2</sup> Egeeseelone yayo dimapoo egeesee takaso, “Homolee ma kulodu bi susuga ee olo teeleegeeloso goolai ee moloso. Esino bi ee gooloogalai odoó ee haga beinee. Esiga homolee gibadeli odoó mapoo woose, yayo o homolee ma kulodu bi susuga teeleegee ee gooloogali odoó diye dalame.

<sup>3</sup> Esiga niba di! Esino niba goolee sabolo di. Bei, ayo niba sipi be hu pe masi dobu so kamanali oso egee do mi ma kulodu diye deeso. <sup>4</sup> Niba dulone molee sabolo, o sabolo, osoloso homo mapoo kali bi sabolo na todi. Osoloso niba eli domopoo dulone, odoó abo tugodoloso dibolo to na ke.

<sup>5</sup> Niyo mi hee mapoo dileso peledo-booga, moso kamapoo gilimado polosomo, niyo daga moso mapoo egee do odoó mapoo emegei di to takolone, ‘Godeeyo mesie goo nibolo mele,’ dee takee.

<sup>6</sup> Esiga mesie odoó oso moso ee ma kulodu doga, niyo emegei di to taka oso dibolo osee malaiso. Esino moso ee ma kulodu debeli odoó koo mesili daga, niyo emegei di to taka oso dibolo malaime.

<sup>7</sup> Osoloso moso kasee nimapoo ka teneesomo, niba moso hedebe omapoo debbe. Osoloso niba moso hedebe omapoo dobolone, diayo nimapoo nei teneega, nei ee nolone ka debbe. Bei, tou teli odoó ee dia nei talai tebiliso. Esiga niba moso hee mapoo dobolone, moso hee mapoo na du dee.

<sup>8</sup> Niba mi hee mapoo duga, mosobia odoó oso emegei dolone nei teneega, hedebe ee namelee.

<sup>9</sup> Osoloso mi omapoo odoó paigiga tekepo moodoogolone dimapoo ‘Godeeye

wiligi doloso badeli goo ee nima koola mapoo moloso,' dee takee.

<sup>10-11</sup> Esino niba mi hee mapoo dileso peledobooga, mosobia oso niba gowoolone moso tenelega poogooga, niba diayo bia eli domopoo dileso, to kitulugu sabolo dia mi basago oso nibada homo mapoo obooga ee dia howo woola mapoo te, Godeeye komonolone dimapoo dia goo tokenee eyo nei tenelai goo ee gooleedalame. Osoloso niyo dimapoo egeesee takee, 'Niba medee goolee, Godeeye wiligi doloso badeli goo ee koola hamapoo moloso.'

<sup>12</sup> Esiga ayo nimapoo taka, mosobia kaso niba sibadeega, ogoloso goomoga sabolo niba iyadelega poogooga, nei Godeeye midilei biame omapoo dala toowa diayo talai oso Sodom mosobia oso dala talai ee dagadileiso."

*Yesuye tei tele poogoo mosobia odoo mapoo taka*

*(Mat 11:20-24)*

<sup>13</sup> "Ye-ee! Kolasin mosobia odoo osoloso Betesaida mosobia odoo sabolo. Dala toowa oso niba bamoloso. Bei, ayo nibada mi mapoo goo toowa mudu opusomo opusomo di ee moodoogamo silee egeesi masi Yu odoonee mosobia Taya mapoo osoloso Saidon sabolo mapoo moodoogamo silee diepi, diba haga booloogelega, dibada goo tokenee maga miligi pialoso debeli. Osoloso diayo dibada goo tokenee maga miligi pia goo ee eligilone dugo tokenee megigaloso dosou holugaloso silesibili.

<sup>14</sup> Goo egeesi maga Godeeye goo midilei biame mapoo dala toowa Kolasin mosobia sabolo osoloso Betesaida mosobia oso talai oso Taya mosobia sabolo osoloso Saidon mosobia oso dala talai ee dagadileiso.

<sup>15</sup> Esino Kapeniyum mosobia odoo niba biame omapoo Kei mi ma dokodoo ido palaiso, doloso goolee sabolo dosomo? Haye, niba tolosa Dou mi mapoo toodalaiso.

<sup>16</sup> Esiga odoo agayo nibada to duloso toga, yo mo to tolone ka seeso. Esino odoo agayo nibada to duloso niba diya

gowooga, yo a gowoolone ka seeso. Esino odoo agayo a gowooga, yayo mo Ma a diye di ee gowoolone ka seeso," diso.

*Odoo 72 oso see wedi simi*

<sup>17</sup> Yesuye odoo 72 diye di oso goomoga sabolo see wedi sibilesa egeesee takaso, "Lodee, iyo nee hu sabolo takomo sileeme, bo holo odoo ma kulodu debei oso ibada to duloso mesiloso peegoo galagadiso," diso.

<sup>18</sup> Yesuye dimapoo nei egeesee takaso, "Keiso saga egee ebedigebugu egeesi masi Kei mi ma dokodooga Saiten miyomoo homodobume ayo egeiso.

<sup>19</sup> Esiga niba dui, niyo hebise sabolo homolobe sabolo mapoo dokodoo nibada homosoma hamadabalame ayo nimapoo kitulugu olo teneeso. Esiga kitulugu oso Saitenso kitulugu ee dagadileso moloso. Esiga bi heeso nimapoo dala tenelai mauwe.

<sup>20</sup> Esino bo holo oso nibada to duloso mesiloso peegoo kukulo di goo mapoo haga na goomege. Esino nibada hu ee tei gie badeli booka mapoo egee molo omaga goomege," diso.

*Yesuye Ama Godee mapoo goomoga tenee*

*(Mat 11:25-27; 13:16-17)*

<sup>21</sup> Yesu yo Dio Tei oso kitulugu maga goomoga sabolo badolone egeesee takaso, "Ma, Kei mi sabolo osoloso mipoo sabolo nayo wiligi doloso badoso. Esiga a namapoo goomogo. Bei, nayo wiligi doloso badeli goo mada egee molo, goo goolee toowa odoo mapoo yilige bigile poogooso. Esino nayo goo goolee dele poogoo odoo mapoo yilige buguso. O. Tei takoo, Ma. Goo hagee nayo goomoga goo oso.

<sup>22</sup> Mo Maye goo susuga amapoo olo teneeso. Esiga odoo heeso Owolo a gooleede. Esino hedebe Maye Owolo, a ka gooleedoo. Osoloso odoo heeso Ma gooleede. Esino hedebe Owolo ayo Ma ka gooleedoo. Esiga odoo ugu bia mapoo Owolo ayo Mayo goo ee yilige bigilame gooleega, odoo egee bia oso Mayo goo ee diba gooleedalaiso," diso.



<sup>23</sup> Osoloso o hamamee dili odo mapoo bidi toboloso omapoo tobudulone dimapoo egeese takaso, “Niyo egeli goo susuga mapoo goomege.

<sup>24</sup> Bei, ayo nimapoo taka, Godee maga to toloso kokodo takomo sili odo daga hoogoo debei sabolo osoloso Yu odoowo wiligi odo tebisa daga debei oso niyo epedee hagee ogo goo ee agalai doloso balaga meleeso. Esino diayo egele. Osoloso diayo goo niyo epedee egee dumolo goo sabolo dulei doloso balaga meleeso. Esino diba dule,” diso.

### *Samaliya odooso emegei di goo*

<sup>25</sup> Biame hee mapoo tei eligili odo heeso sibilesu Yesu tei ma susuga ee gooleedoloso badaba beleso egeese takaso, “Eligili odo, a gie badeli talame ogo goo talaiyo?” diso.

<sup>26</sup> Yesuye to nei egeese takaso, “Godeeyo to booka mapoo hogugu oso kasee takoolo? Nayo hesigaloso kasee gweliyo?” diso.

<sup>27</sup> Odo oso to nei egeese takaso, “Nee sooloo ma kuloduga goolee sabolo, osoloso nee dio maga, osoloso nayo kitulugu sabolo, osoloso nayo goo goolee sabolo oso nee wiligi odo Godee diya goolee. Osoloso no nediliyo diya gweli egeesi masi nee odo onosee diya egeesee goolone ka badebee,” diso.

<sup>28</sup> Yesuye yimapoo nei egeese takaso, “Nayo tei goo takoo. Esiga no goo egeesi tolone badoga, goo oso no badoboso kookaiyo gie badeli talaiso,” diso.

<sup>29</sup> Esino odo yayo eyo nediliyo yo tekepo dolone egeese takaso, “Esino mo odo ogumo?” diso.

<sup>30</sup> Esem Yesuye yimapoo oposusu hee hagee oposususu, “Odo hee Yelusalem maga Yeliko mapoo moumeleeso. Yo eli domopoo moumolome, mesiya aboso yo woomele poogoloso eli domopoo magoloso o dugo yayo ka sabolo osoloso o bi susuga sabolo heli toloso diyadeeso.

<sup>31</sup> Yo eli domopoo talame seemolome, Godee ogo odo ogo doloso domo badeli odo oso eli hedebe omaga sibulone

egeiso. Osoloso yayo sibulone egeino, odo egee olo talame semelee ogoloso peegooga boloodabaso.

<sup>32</sup> Osoloso yima hamamee abaga tei moso tegei mapoo tou teli odo, o bala Libai, yinosee sibulone egeino, odo eli domopoo mi mapoo homodobuloso tiamolome, peegooga boloodabaso.

<sup>33</sup> Esino Samaliya odo yinosee eli hedebe omaga sibulone egeino, odo eli domopoo talame seemolome egeiso. Yayo odo egee ogoloso yo diya sooloo dalaso.

<sup>34</sup> Esem yo odo oso tiamelee mapoo dileso o kolo kookoo mapoo olipi i sabolo wain i sabolo oso hoduloso dugoso tialogooso. Osoloso yayo yo o be donki ma dokodoo tiedoloso, odo soowo moso mapoo ido dileso yo bameleeso.

<sup>35</sup> Osoloso see biame hee mapoo Samaliya odo oso odo soowo moso gibadeli odo mapoo molee ko bakadio yimapoo tenelone egeese takaso, ‘Odo hagee nayo medee bamelee. Esino nayo odo hagee bolone molee hagee hosudoloso, see nee molee oso pidimologa, ayo see wedi simi biame omapoo, nei o egeesi ayo namapoo tenelaiso,’ diso.”

<sup>36</sup> Osoloso Yesuye see egeese takaso, “Odo bakadio hedebe di hageeyo kulodu mesiyaso wei eyo odo tei ogumo?” diso.

<sup>37</sup> Esem tei eligili odo oso nei egeese takaso, “Edebeeyo yo sooloo dolone yo pidi odo ono tei o odo oso,” diso.

Esem Yesuye yimapoo egeese takaso, “O. Tei takoo. Esiga no dileso goo egeesi tomo sile,” diso.

### *Meli dio Mata dio*

<sup>38</sup> Yesu o hamamee dili odo sabolo dulone, mi hee mapoo dileso peledabaso. Esem mi omapoo badeli sobo hedebe Mataye o moso mapoo Yesu ido palaso.

<sup>39</sup> Esem Matayo omolo Meliye sibilesu Yesuwo homo beiyopoo badolone o to dulone badebeiso.

<sup>40</sup> Biame omapoo Mataye moso kulodu Yesuwo mooloogoodoo odo eyo wo silone, tou bei neme Yesu mapoo sibilesu egeese takaso, “Lodee, moloye nobolo badoga, ayo mobusomo tou ka toga, diya

kwasio. Esiga yayo a pidilame nayo yo sibeye dee takee,” diso.

<sup>41</sup> Esino Lodeeye egeesee takaso, “Mata emegei, no tou susuga tomo silone goolone goo diya kodio.

<sup>42</sup> Esino tou susuga ee ma kulodu tou hedebe hagono toowa ka moloso. Esino Meliye goo tekepo toowa olo tooso. Esiga odoos heeso goo egee yimaga peedee dalaime,” diso.

## 11

*Yesuye Godee mapoo takeli goo ee eligi (Mat 6:9-13; 7:7-11)*

<sup>1</sup> Biame heeso Yesu mi hee mapoo dileso Godee mapoo takemelee koodobume, o hamamee dili odoos heeso egeesee takaso, “Lodee, Yoneeye o hamamee dili odoos mapoo Godee mapoo takeli goo eligimo silee egeesi masi nayo iba nose Godee mapoo takeli goo ee eligi,” diso.

<sup>2</sup> Esem Yesuye dimapoo egeesee takaso, “Niyo Godee mapoo takolone egeesee takee:

‘Ma, biame susuga ma kulodu hedebe nee hu oso toowa doloso mele dee, odoos susuga oso dokodoo poudalame.

Esiga nayo wiligi doloso badeli goo oso sibilei iba goomogo.

<sup>3</sup> Osoloso biame susuga ma kulodu nei iyo nalai imapoo tenemelee.

<sup>4</sup> Osoloso ibada tokenee hapoloso boobado bigi.

Bei, iba nose odoos susuga oso goo tokenee susuga imapoo moodeli ee boobado bigiliso.

Osoloso iba goo tokenee mapoo na gido di dee’,” diso.

<sup>5-6</sup> Yesu Godee mapoo takeli goo hagee eligimeleso koodobuloso dimapoo see egeesee takaso, “Niba to hee hagee goolee. Odoos soo heeso gesi domo mapoo nee mosopoo sibileiso. Esino nayo yimapoo nei siloso tenelai nei mauwe daga, mosobia ma kulodu nee odoos mapoo nei talame dileiso. No nee odoos mosopoo dileso osulu mapoo kalamadulone egeesee takalaiso, ‘Mo odoos, odoos soo hee mo mosopoo simiga.

Esino ayo yo pidilei nei mauwe. Esiga ayo namapoo nei talame ka siba,’ dee.

<sup>7</sup> Eseega nee odoos moso kulodu badebei oso egeesee takalaiso, ‘No see wedi di. Bei, a mo holo dio sabolo osulu kisiloso tiesamoloso. Esiga a toboloso namapoo nei tenelaime,’ dee.”

<sup>8</sup> Esem Yesuye see dimapoo egeesee takaso, “Esino ayo nimapoo taka, yayo no wulo emegei doloso bi tenelaime. Esino nayo kalamadulone osee howamologa, yayo toboloso namapoo bi tenelaiso.

<sup>9</sup> Esiga ayo nimapoo taka, niba woose. Egeeseega nimapoo tenelaiso. Osoloso niba esie. Egeeseega, niyo agalaiso. Osoloso niba osulu mapoo kalamadi. Egeeseega osulu ee nimapoo yamagalaiso.

<sup>10</sup> Bei, woosali odoos oso goo talaiso. Osoloso esieli odoos oso goo agalaiso. Osoloso osulu mapoo kalamadili odoos mapoo osulu yamagalaiso.

<sup>11</sup> Esiga ma dio niba dui! Odoos agayo owoloye di nala poogoo daga, yimapoo sa teneliso? Haya.

<sup>12</sup> Osoloso yayo só ho nala poogoo daga, nayo yimapoo homolobe teneliso? Haya.

<sup>13</sup> Niba tokenee odoos. Esino niba gooleedoos, nibada owolo dimapoo bi tekepo tenelai. Esiga iba gooleedoos, Ma Godee Kei mi ma dokodoo egee bado oso yimapoo woosali odoos mapoo Dio Tei wulo tenemoloso,” diso.

*Yesu dio Belsebul dio (Mat 12:22-30; Maka 3:20-27)*

<sup>14</sup> Biame heeso odoos hee badebeiso. Daga bo holo oso odoos eyo su ma kulodu palademe, to kelega poogoloso badebeiso. Esem Yesuye odoos eyo su ma kulodu bo holo paladee peegoo habuguso. Osoloso bo holo oso odoos ma kuloduga peegoo gadime, to koo keli odoos yo see to keiso. Esem odoos susuga oso goo hagee ogoloso diya howoogadoos.

<sup>15</sup> Esino odoos aboso egeesee takaga meleeso, “Yesu yo Besebuleeye kitulugu maga bo holo peegoo ka hasiso bigili molodoo. Bei, Besebul yo bo holo dia wiligi odoos taba oso,” dee takaga meleeso.

<sup>16</sup> Esemé odoo aboso Yesuye kitulugu egee tomolo tei Godee maga simibeleso agalame yimapoo egeese takaso, “Nayo Kei mi ma dokodooga goo toowa opusomo di ee imapoo eligi,” diso.

<sup>17</sup> Esino Yesuye diayo goo goolee olo gooleedoloso dimapoo egeese takaso, “Mi toowa mapoo debeli odoo oso abo puloso dieso nediliyo ha toga mi toowa egee malaime, tokenee palaiso. Osoloso soosoo heeso abo puloso dieso nediliyo ha toga soosoo egee pododalaiso.

<sup>18</sup> Esiga Saitenso o mooloogoodoo ma kulodu domo puloso dieso nediliyo ha toga, kaseega yayo wiligi doloso badeli goo oso osee ka malaiyo? Tokenee palaiso. Bei, niyo a Belsebul oso kitulugu maga bo holo peegoo ka hasiso bugu deligo daga, ayo goo hagee nimapoo ka taka.

<sup>19</sup> Esino ayo bo holo peegoo hasiso bigili kitulugu hagee tei Belsebul oso kitulugu maga ka hasisimo silo daga, nibada hamamee dili odoo oso bo holo peegoo egee hasisimo silesibo kitulugu ee kamapoo toowo? Esiga diayo takooga, niyo amapoo egee takoo goo ee tei goonee, dee takalaiso.

<sup>20</sup> Esino ayo Godeeye kitulugu maga bo holo peegoo ka hasisimo silo daga, Godeeye wiligi doloso badeli goo ee nimapoo olo simiso.

<sup>21</sup> Esiga kituluguli odoo oso tai sabolo tio sabolo toloso o moso gibadoga, o bi moso kulodu meli ee edebeeyo heli talaime.

<sup>22</sup> Esino see diya kitulugu odoo oso siboga, yayo moso gibadeli odoo wooloso o tai sabolo tio sabolo peedee dalaiso. Osoloso moso kulodu peleso o bi susuga toloso odoo abo mapoo pileiso.

<sup>23</sup> Esiga odoo agayo a dokolo tebel-ega poogooga, yo amapoo ha tomoloso. Osoloso odoo agayo abolo odoo Godee mapoo gilimado sibilega poogooga, yayo odoo ee Godee maga peegoo hasiso bugu domoloso.”

*Bo holo oso see wedi sibili goo  
(Mat 12:43-45)*

<sup>24</sup> Esemé Yesuye egeese takaso, “Esiga bo holo oso odoo maga peegoo gaduga, yo

dilesi miwe poogoo mi mapoo eyo badalai mi esiamo sileiso. Yo mi esiamo siloso koo ogoga, eyo nediliyo egeese takalaiso, ‘A mawo daga badebei mapoo see wedi dia,’ dalaiso.

<sup>25</sup> Yo sibileso ogoga, moso gelesi kadoloso bi medee mopoodoo ma molo agalaiso.

<sup>26</sup> Osoloso yo see wedi dilesi bo holo diya kitulugu abo 7 gilimadoloso moso omapoo dabalaiso. Egeeseega odoo hagee eyo daga badeli poogoloso see diya tokenee badalaiso.”

*Odoo agayo goomoga sabolo ka dosomo?*

<sup>27</sup> Yesuye goo hagee odoo mapoo takomolome, odoo mooloogoodoo ma kuloduga sobo heeso toso neligidi egeese takaso, “No soomagoloso too nedimo silee sobo omapoo Godeeye goomoga tenelai tekepo,” diso.

<sup>28</sup> Esino Yesuye yimapoo egeese takaso, “Haye, emegei. Goo egeesi koo moloso. Odoo agayo Godeeyo to duloso omapoo mesie sabolo siloga, odoo yimapoo Godeeye goomoga teneliso,” diso.

*Edebeeyo goo opusomo di ee agalame goomoga  
(Mat 12:38-42)*

<sup>29</sup> Edebeeyo Yesu mapoo sibileso mooloogoodeme, Yesuye dimapoo egeese takaso, “Epedee hamapoo egee do odoo ee diya tokenee. Osoloso diba wulo goo opusomo di agalame amapoo takeliso. Esino ayo dimapoo goo toowa opusomo di hee eligileime. Esino hedebe Yonayo goo ono dimapoo ka eligilei.

<sup>30</sup> Bei, Godeeye Yona mapoo moodoo goo oso Niniba odoo mapoo yayo tei Yona diye di goo ee eligiso. Esiga Odoo Holo amapoo goo peledabalai ee odoo epedee hagee do mapoo Godeeye tei a diye di goo ee eligileiso.

<sup>31</sup> Osoloso goo midilei biame mapoo Siba mi eyo wiligi taba sobo onosee nibolo goo midi mapoo badolone nibada goo midiloso, niba tokenee odoo dalaiso. Bei, yayo eli sage abaga sibileso odoo toowa Solomonoye eligi goo ee dulame simiso.

Esino ayo Solomono dagadilesa ka badoso. Esino niyo mo to dulei ka gowooso.

<sup>32</sup> Esiga Niniba odoo oso goo midi mapoo nibolo dobolone, nibada goo midiloso, niba tokenee odoo dalaiso. Bei, Yonaye Godeeyo to dimapoo tosibume, diba dia goo tokenee mapoo miligi piaso. Esino Yona ayo dagadilesa badoso. Esino ayo Godeeyo to nimapoo takomo sibume, niyo duloso nibada goo tokenee mapoo miligi pile.”

*Ibada su mapoo howo oso gadeebugu ka moloso*

*(Mat 5:15; 6:22-23)*

<sup>33</sup> “Edebeeyo keme pouloso mada koo mageeya. Osoloso toloso koo geegeeya. Haye, keme pouloso woola mageeya edebeeyo moso kulodu gasiboga gadeebugu ee agalame.

<sup>34</sup> Esiga nee su mapoo nee howo oso keme masi ka moloso. Osoloso nee howo oso tekepo mologa, nee su susuga gadeebugu malaiso. Esino nee howo oso toke-nee poga nee su susuga neliga malaiso.

<sup>35</sup> Esiga obeeyamo. Nee su mapoo gadeebugu egee molo medee hoodo ege. Bei, gadeebugu ee neliga molo malaiso.

<sup>36</sup> Esiga nee su ma kulodu gadeebugu toowa oso molone neliga hee me daga, nee su mapoo kemeso pouni masi gadeebugu malaiso.”

*Yesuye Pelisi odoo sabolo osoloso tei eligili odoo dimapoo taka*

*(Mat 23:1-36; Maka 12:38-40)*

<sup>37</sup> Yesu to takameleso koodobume, Pelisi odoo heeso o mosopoo nei nalame ido diso. Esemé Yesu yibolo dilesa nei nalame biaso.

<sup>38</sup> Pelisi odoo oso Yesuye Yu odoo dia tei magoo ee dedelega poogoloso dee howo sawwilega nei ne ogoloso dio dulone diya gooleeso.

<sup>39</sup> Esemé Lodeeye yimapoo egeesee takaso, “Pelisi odoo niba wulo nibada kapu sabolo peleta sabolo hedebe kolo ee hapoolone hee kulodu hapelega pegeli niba egeesi masi doso. Bei, niyo nibada kolo ono hapeliso. Esino sooloo ma kulodu

tokenee goo sabolo osoloso bi goomegeli goo oso ka moloso.

<sup>40</sup> Niba boobada odoo! Bei, Godeeye kolo sabolo osoloso kulodu sabolo moodooso.

<sup>41</sup> Esiga nimapoo bi teiba mologa bi mauwe odoo pidi. Niyo egeesee seega niba tokenee goo mauwe malaiso.

<sup>42</sup> Ye-ee Pelisi odoo! Bei, niyo Godee mapoo emegei di bi kobu sabolo bi pepuso abo sabolo medee molone 10 ma kulodu hedebe Godee mapoo tenee dolone nei tei ma hogugu ee ma kulodu goo toowa magoo ee telega pegeliso. Goo ee odoo mapoo goo tekepo moodeli sabolo osoloso Godee gweli goo sabolo oso. Esiga niyo Godee mapoo emegei di bi tenelone goo toowa bakadio hagee tobuloso moodee.

<sup>43</sup> Ye-ee Pelisi odoo! Bei, edebeeyo niba agalame howo gisili moso kulodu peleso odoo hu toowa too oso bili mapoo bilame goomegeliso. Osoloso eli domopoo edebeeyo nimapoo gauwuloso emegei di to takooga ee dulei, niba diya goomegeliso.

<sup>44</sup> Ye-ee Pelisi odoo! Niba odoo bi mada magoo masi moloso. Edebeeyo odoo bi egelega, dokodooga diliso. Niba egeesi masi moloso.”

<sup>45</sup> Osoloso tei eligili odoo heeso Yesu mapoo egeesee takaso, “Eligili odoo, nayo Pelisi odoo mapoo tokenee sisi oso ibolo hodobo tokenee ka susu,” diso.

<sup>46</sup> Osoloso Yesuye see tei eligili odoo mapoo egeesee takaso, “Ye-ee, tei eligili odoo! Bei, niyo tei eligi goo oso odoo mapoo hegi goo teneliso. Esino niyo diba pidilone hegi goo ee see niso koo teli.

<sup>47</sup> Ye-ee tei eligili odoo! Bei, niyo Godee maga to toloso kokodo takomo sili odoo ta eyo bi mapoo moso pepooko medee tekepo tegeliso. Esino niba gooleedeleyo, odoo egee bia namawe diayo piligu oso?

<sup>48</sup> Niyo namawe diayo goo moodoo tekepona doloso odoo dieso piligu eyo bi ma dokodoo moso pepooko tegeliso.

<sup>49</sup> Esiga Godeeye niyo goo moodoo olo hoodo ogoloso egeesee takaso, ‘Ayo Godee maga to toloso kokodo takomo sili odoo sabolo diye di odoo sabolo Isalael odoo



mapoo diye dalaiso. Esino diayo abo piligilone abono wulo dala tenelaiso,' diso.

<sup>50-51</sup> Osoloso mi bei mooloogoo omaga sibulone namawe diayo Godee maga to toloso kokodo takomo sili odoo piligimo simiso. Egeeseelone diayo Eibol maga wooloomalai bei mooloogooloso abaga simino Sekalaya wooloomaloso omapoo koodobiaso. Bei, diayo Sekalaya yo tei moso tegei ogo osoloso Godee mapoo gala wooloso sili dousulu ogo doloso domo omapoo wooloomaso. Esiga epedee hagee do odoo niyo namawe diayo Godee maga to toloso kokodo takomo sili odoo piligu eyo nei tokenee niyo talaiso. Esiga ayo nimapoo tei goo taka. Bei, niyo namawe diowo tokenee eyo nei talaiso.

<sup>52</sup> Ye-ee tei eligili odoo! Bei, Godee gooleedalai osulu yeli ki bi niyo mada magoloso ka doso. Osoloso niyo edebeeyo osulu omaga gadiyaga, kisiloso see niso koo gadu domoloso.”

<sup>53-54</sup> Yesuye Pelisi odoo sabolo tei eligili odoo mapoo to takameleso koodoboloso diba poogoloso diso. Esemé diayo diya komonolone hamamee biame abo mapoo Yesu mapoo woosali goo opusomo opusomo di woosameleeso. Bei, diayo goomoga Yesuye to nei taka ee ma kulodu Moseseeye tei magoo gababuoga, yo toloso goo midilame.

## 12

*Yesuye goo bakadio gweli odoo mapoo kokodo taka*  
(Mat 10:26-27)

<sup>1</sup> Osoloso biame domo omapoo odoo susuga oso Yesu mapoo mooloogoodolone diya kumugulone nei halagabugu nei halagabugu diso. Esemé Yesuye daga o hamamee dili odoo mapoo egeese takaso, “Niba obeeyamo! Pelisi odoo oso goo bakadio gweli goo ee wo habia egeesi masi moloso. Bei, wo giedege wo habia sabolo hamaga, wo giedege tokenee palaiso.

<sup>2</sup> Esiga goo susuga mada egee molo see woola peledabalaiso. Osoloso edebeeyo koo duli goo ee see woola takooga duleiso.

<sup>3</sup> Osoloso niyo mada taka to ee see woola takooga duleiso. Osoloso niyo moso kulodu dulu mapoo mada taka see hamamee odoo susuga dulame moso omu ma dokodooga neligidi woola takalaiso.

*Godeebolo ebi*  
(Mat 10:28-31)

<sup>4</sup> Esiga emegei, ayo nimapoo taka. Odoo wulo su hagee wooloomali yibolo na ebi. Bei, yo hedebe su wooloomali ee gooleedoo, esino dio wooloomali yo tebile.

<sup>5</sup> Esino ayo nimapoo taka. Niba hedebe Godeebolo obulone ka debee. Bei, odoo wooloomaloso dio Dou mi mapoo toodalai kitulugu yimapoo moloso. Esiga niba hedebe Godeebolo obulone ka debee.

<sup>6</sup> Esiga niyo só pepuso dee tiadoo molee ko ta oso teliso. Esino ee ma kulodu Godeeye só pepuso hedebe koo boobado bigili.

<sup>7</sup> Osoloso Godeeye nibada wudu susuga yo gooleedooso. Bei, wudu susuga egee yayo olo hesigaso. Esiga niba haga na ebi. Bei, Godeeye howo woola só ee goo toowa koo moloso. Haya. Niyo goo toowa ka moloso.”

*Odoo howo woola Kelisowo goo yilige bigi*

(Mat 10:32-33; 12:32; 10:19-20)

<sup>8</sup> “Esiga ayo nimapoo taka. Odoo agayo odoo howo woola tobudulone yayo amapoo tei too goo ee woola yilige buguga, nei Odoo Holo ayo Godeeye momaiye eyo mudugiyo abaga tobudulone yo mo odoo dalaiso.

<sup>9</sup> Esino odoo agayo odoo howo woola tobudulone amapoo tei tele poogoo goo ee woola yilige buguga, nei ayo Godeeye momaiye dia mudugiyo abaga tobudulone yo mo odoonee dalaiso.

<sup>10</sup> Osoloso odoo agayo Odoo Holo amaga to tokenee takooga, Godeeye o tokenee hapoloso boobado bigileiso. Esino odoo agayo Dio Tei eyo goo maga to tokenee takooga, o tokenee ee Godeeye hapalaime.

<sup>11</sup> Esiga edebeeyo niba howo gisili moso mapoo osoloso wiligi odoo taba eyo moso mapoo nibada goo midilame ido pologa, niyo nei takalai ee haga na goolee.

<sup>12</sup> Bei, niyo omapoo peleso tobudulone, to takalai ee Dio Tei oso nimapoo eligileiso.”

*Yesuye bi bei odoowo goo oposusu*

<sup>13</sup> Odo mooloogoodoo ma kuloduga odo heeso Yesu mapoo egeesee takaso, “Eligili odo, nayo mo ei mapoo takee, yayo ibada ama ta eyo bi gilibo toloso badolone bi susuga yayo egee bamolo puloso abo hodio amapoo tenelame,” diso.

<sup>14</sup> Esem Yesuye yimapoo nei egeesee takaso, “Emegei, amapoo kitulugu mauwe, nee bakadio nimapoo nibada nama ta eyo bi domo puloso pilei,” diso.

<sup>15</sup> Yesuye see odo omapoo debei mapoo egeesee takaso, “Niba obeeyamo! Niba bi bei doloso badalai goo omapoo haga na goomege. Bei, bi bei doloso badalai goo oso tei gie badeli koo teneli,” diso.

<sup>16</sup> Osoloso Yesu to hagee takoloso see wudu taka hagee oposususo, “Bi bei odo o mi mapoo yayo nei howo segei oso nali bi diya palagaso.

<sup>17</sup> Osoloso eyo nediliyo egeesee takaso, ‘Nei nali bi hagee malai amapoo moso hee mauwe. Esiga ayo ogo goo talaiyo?’ diso.

<sup>18</sup> Esem yayo egeesee takaso, ‘A mo nei nali bi mageli moso guobuguloso see moso toowa abo tegelaiso. Osoloso ayo nei nali bi sabolo bi abo sabolo moso ee ma kulodu malaiso.

<sup>19</sup> Egeesee ga amapoo bi tekepo bei oso dugo susuga ee ma kulodu osee ma malaiso. Esiga a tou hee talai mauwe. Esino a goomoga sabolo wulo badolone, wo sabolo osoloso howo sabolo namalaiso,’ diso.

<sup>20</sup> Esem Godeeye yimapoo egeesee takaso, ‘No boobada odoodo! Esiga epei gesi nee gie badeli ayo namaga peedee dalaiso. Osoloso nayo nee su pidilame bi maloso meli see odo agayo ka talaiyo?’ diso.”

<sup>21</sup> Osoloso Yesuye see egeesee takaso, “Odo agayo mipoo hamapoo bi bei mooloogoo maloso badolone, nei Godeeyo howo woola goo toowa telega poogooga, goo hageesi oso yimapoo peledabalaiso,” diso.

*Tei toloso dobolone haga na goolee  
(Mat 6:19-21, 25-34)*

<sup>22</sup> Yesuye see o hamamee dili odo mapoo egeesee takaso, “Ayo nimapoo taka. Niyo dobolone nei nalai sabolo osoloso dugo kalai sabolo omapoo haga na goolee.

<sup>23</sup> Bei, nei nali bi oso goo toowa koo moloso. Haye. Esino nibada gie badeli goo oso goo toowa ka moloso. Osoloso kali bi oso goo toowa koo moloso. Haye. Esino nibada su oso goo toowa ka moloso.

<sup>24</sup> Esiga niba só ogoloso goolee. Diba nei nali bi dieso sogoloso koo gooloogali. Osoloso diba nei nali bi magalai moso mauwe. Esino Godeeye dimapoo nei nali bi ka tenemoloso. Esino Godeeyo howo woola só oso goo toowa koo moloso. Esino niyo goo toowa ka moloso.

<sup>25</sup> Esiga edebeeyo kali bi sabolo osoloso nei nali bi sabolo omapoo diya gooleega, o gie badeli see hoogoo sagelisomo? Haye.

<sup>26</sup> Goo pepooko hageesi moodoolai nimapoo kitulugu me daga, niba see goo abo mapoo haga na goolee.

<sup>27</sup> Osoloso niba see dobudu meli palapalawa tekepo ogoloso goolee. Bei, diayo dieso nediliyo pidilei tou koo teli. Osoloso dugo dieso kalai koo duseli. Esiga ayo nimapoo ka taka, daga Solomonoye wiligi odo toboloso badebei mapoo yayo kali bi medee tekepo kalaga meleeso. Esino dobudu meli palapalawa oso tekepo oso dugo tekepo Solomonoye kali ee dagadi.

<sup>28</sup> Esiga dobudu meli palapalawa tekepo oso epei gasibilesa moloso, see biame hee mapoo wooseliso. Esino Godeeye palapalawa omapoo dugo masi tekepo ka kadili daga, a tei toso, Godeeye nimapoo dugo tekepo tenelaiso. Niba tei too kibile odo oso debei masi na debee.

<sup>29</sup> Esiga niba nei sabolo howo sabolo namalai mapoo haga na goolee.

<sup>30</sup> Bei, mi odo oso bi egee talame diya gweliso. Esino Nama Godeeye bi niyo talame goomegeli ee yayo malalo olo gooleedooso.

<sup>31</sup> Esino niba daga malalo diya esie, Godeeye wiligi doloso badeli goo ee ta-

lame. Niyo egeese seega nei yayo bi niyo goomoga ee nimapoo tenelaiso.

<sup>32</sup> Esiga niba haga na ebi. Bei, sipi be bali odoososo o be medee bali egeesi masi, Godeeye niba medee egeese bamoloso. Osoloso niba ebia sabolo na debee. Bei, Godeeye niba yibolo wiligi doloso badalame yayo goomoga sabolo niba olo hesiaso.

<sup>33</sup> Nibada bi odoososo mapoo teneloso nei molee tolososo bi mauwe odoososo mapoo pi. Niyo egeese seega, nei Kei mi ma dokodoo bi bei nibada hu sabolo malaiso. Bi bei ogososo Kei mi ma dokodoo mologa mauwe pagalaime. Bei, mi omapoo heli teli odoososo ososobileso bi ee heli koo teli. Osoloso siso bi koo nali.

<sup>34</sup> Nimapoo bi bei toowa ma mologa, nibada goososo goolee osososo omapoo meliso.

*Odoo Holo ososobilei goososo mapoo mopoodoo doloso debee*  
(Mat 24:45-51)

<sup>35</sup> Esiga niba bi mopoodoo doloso goososo mapoo dulone dobolone keme peyigaloso debee.

<sup>36</sup> Bei, tou teli odoososo osososo dia wiligi odoososo ee sobo hu wo nalame di siboga, agalame bameli egeesi masi debee. Bei, yayo see wedi sobileso osulu mapoo kalamadiga osulu saga yadalaiso.

<sup>37</sup> Tou teli odoososo ososobilei mapoo dulone dobolone osee bamologa, yayo simi ogolososo dimapoo goomogalaiso. Esiga ayo nimapoo taka, wiligi odoososo yayo o tou teli odoososo ogolososo goomogolone, diba bulume doloso dimapoo nei nali tenelaiso.

<sup>38</sup> Esiga wiligi odoososo ososobilei, yo gesi domo sibumobeleo o, kudi daga takooga sibumobeleo, biame diba gooleede. Esino o tou teli odoososo osososo yayo egee sibo mapoo dulone dobolone osee bamologa, yayo sobileso diba ogolososo dimapoo goomogalaiso.

<sup>39</sup> Esino niba goososo hagee medee goolee. Edebeeyo heli teli odoososo osososo mosopoo sobilei biame ee duloso badebei diepi, yo olo mopoodoo doloso bolone badolone, heli teli odoososo osososo simi ogolososo yayo habigili.

<sup>40</sup> Esiga niba olo mopoodoo doloso dulone bolone ka debee. Bei, Odoososo Holo ayo sobilei biame niba gooleede.

<sup>41</sup> Esem Pitaye egeese takaso, "Lodee, no wudu hagee takoo wulo hedebe iyo dulame ka takala o, odoososo susuga osososo dulame ka takala?" diso.

<sup>42</sup> Esem Lodeeye nei egeese takaso, "Goo mapoo mesimo silone tou tekepo teli bali odoososo ogumo? Wiligi odoososo osososo odoososo masi mapoo kitulugu tenelaiso, yayo o tou teli odoososo susuga gibolone yayo dimapoo wo tenemalame.

<sup>43</sup> Osoloso wiligi odoososo osososo peegoo dileso badoboso see wedi sobileso ogoga o tou teli odoososo osososo o tou ee medee tekepo tolone badebei ogolososo yimapoo goomogalaiso.

<sup>44</sup> Esiga ayo nimapoo taka, wiligi odoososo osososo o tou teli odoososo osososo tou medee tekepo tolone badebei ogoga, yayo see yimapoo o bi susuga ee bamelee dalaiso.

<sup>45</sup> Esino tou tokenee teli odoososo osososo wiligi odoososo saga sobilega poogooga eyo nediliyo egeese takalai malaiso, 'Mo wiligi odoososo saga koo sibo,' doloso, emegei sobo sabolo giso sabolo tou teli odoososo abo woomele poogolososo, wo sabolo yugune sabolo ee nolone halabolone badalaiso.

<sup>46</sup> Yo egeese badolone mopoodoo delaga badebei mapoo, o wiligi odoososo ososobileso peledabalaiso. Egeeseega o wiligi odoososo ososobileso yo Godee mapoo odoososo koo mesili sabolo badalame, yo diya woomeleso peegoo togobigileiso.

<sup>47</sup> Esiga tou teli odoososo osososo wiligi odoososo osososo goomoga goososo ee gooleedolososo tou ee telega poogolososo mopoodoo delega badoga, yo diya woolaiso.

<sup>48</sup> Esino tou teli odoososo osososo wiligi odoososo osososo goomoga goososo ee gooleedelega badolone goososo ee telega badoga yo haga woolaime. Esiga Godeeye edebeeyo yo tou toowa talame goososo goolee tekepo teneeso. Esiga yo goomogososo, goososo goolee tekepo sabolo tou ee toowa tolone badalame. Osoloso Godeeye edebeeyo tou pepooko talame goososo goolee tekepo teneeso. Esiga yo goomogososo, goososo goolee tekepo sabolo tou pepooko ee tolone badalame.

*Mesie goo mauwe, esino domo pilei moloso*

*(Mat 10:34-36)*

<sup>49</sup> Ayo odoo susuga domo puloso dou gigalagalame mi toowa mapoo ka simi. Esino dou oso paiya ee agalai a goomogo.

<sup>50</sup> Esino ayo dala talai biame olo siboso. Esiga amapoo goohele toowa oso moloso. Esino ayo dala ma kulduga gaduga, goohele amapoo egee molo amapoo mauwe pagalaiso.

<sup>51</sup> Esiga niyo goo goolee oso a mipoo hamapoo mesie goo tosimidoo dee gweliyo? Haye, domo pilei goo ee tosimi.

<sup>52</sup> Esiga epedee domo hamaga dulone soosoo ma kulodu domo pimalaiso.

<sup>53</sup> Egeeseelone ama dio owolo giso holo dio domo pileiso. Osoloso owee dio owolo sobo holo dio domo pileiso. Osoloso gisowo owee dio osobo dio domo pileiso.”

*Gooso peledabalai biame ee medee ogoloso gooleedalai*

*(Mat 16:2-3)*

<sup>54</sup> Yesuye see odoo susuga mapoo egeesee takaso, “Niba kei ma dokodoo ogoga hemiye mologa, niyo egeesee takeliso, ‘Epedee howo sibulodoo,’ deliso. Egeeseega howo tei sibiliso.

<sup>55</sup> Osoloso niba kei ma dokodoo ogoga kolobo me poogoloso kei dasege mologa, niyo egeesee takeliso, ‘Epei mi kibolodoo,’ deliso. Egeeseega mi kibiliso.

<sup>56</sup> Niba goo bakadio gweli odoo! Howo sibilei goo sabolo osoloso mi kibilei goo sabolo niba olo gooleedooso. Esino bei kasi maga niba epedee hamapoo goo egee peledoboo ogoloso gooleedelega ka dabala?”

*Namapoo goweli odoo sabolo mesie*

*(Mat 5:25-26)*

<sup>57</sup> “Niba kasi maga nisono goo tekepo talai goo ee gooleedelega ka dabala?”

<sup>58</sup> Esiga namapoo goweli odoo oso no goo midilei mapoo ido duga, no saga eli domopoo yibolo dulone yayo namapoo gowe egee molo pagalame yibolo emegei dee. Esino nayo goo egeesi moodelega poogooga, yayo no goo midili odoo mapoo

ido peleso nee goo midileiso. Egeeseega see goo midili odoo oso no neliga moso gibadeli odoo mapoo tenelaiso. Egeeseega see yayo no neliga moso ma kulodu toosoolaiso.

<sup>59</sup> Esiga ayo namapoo taka, no neliga moso ee ma kulodu badolone, nayo peegoo dilei eli agalaime. Esino molee yayo hesia sabolo tobuloso nayo yimapoo teeneega, no peegoo dileiso.”

## 13

*Niba nibada goo tokenee maga miligi pilega poogooga, niba wedileiso*

<sup>1</sup> Biame omapoo odoo abo oso sibilesi Yesu mapoo Gelili odoo aboso Godee mapoo gala hu wooloso tenelone do-boome, Paileteeye diba piligu goo ee opo-sususoo.

<sup>2</sup> Esemee Yesuye nei dimapoo egeesee takaso, “Niyo goo hagee ogoloso kasee gooleesomo? Gelili odoo abo piligu odoo hagee biaso Gelili odoo susuga ma kulodu hedebe diayo goo tokenee toowa tomo silesibume ka seeyo?”

<sup>3</sup> Haye, egeeseenee. Esino niyo nibada goo tokenee maga miligi pialoso Godee mapoo bidiga debelega poogooga, goo hedebe egeesee nose nimapoo peledabalaiso.

<sup>4</sup> Osoloso niba goo hee hagee goolee. Sailowam mi mapoo moso egi doko tegei oso goboolone odoo 18 piligusoo. Odoo 18 piligu hagee biaso Yelusalem odoo ma kulodu hedebe diayo goo tokenee toowa tomo silesibume ka seeyo?”

<sup>5</sup> Haye, egeeseenee. Esino niyo nibada goo tokenee maga miligi pialoso Godee mapoo bidiga debelega poogooga, goo hedebe egeesee nose nimapoo peledabalaiso.”

<sup>6</sup> Osoloso Yesuye dimapoo wudu taka hee hagee takaso, “Odoo heeso geleipi ko segei ma kulodu pigi homo tabameleeso. Esino biame heeso segeli odoo oso pigi ko goolame agalame simiso. Esino sibilesi egeino, pigi ko pelega molome egeiso.



<sup>7</sup> Esemé yayo o homolee bali tou teli odoo mapoo egeesee takaso, ‘Dugo bakadio hedebe di ma kulodu a goomogaso, pigi homo hagoso ko poga nalame. Esino yo ko pele. Esiga heemagee. Yayo mo homolee ma kulodu molone mi tekepo ee namalai tekeponee,’ diso.

<sup>8</sup> Esemé o tou teli odoo oso yimapoo egeesee takaso, ‘Iba epedee dugo hedebe ma kulodu bolone, ayo medee mi nemalaiso.

<sup>9</sup> Egeesi ma kulodu yayo ko poga, tekepo. Esino yayo ko pelega poogooga, omapoo iba homo su egee heemagalaiso,’ diso.”

*Yesuye sobo gauwuloso sili tekepo moodoo*

<sup>10</sup> Yu odoowo hasali biame hee mapoo Yesuye dia howo gisili moso mapoo peleso eligimeleeso.

<sup>11</sup> Biame omapoo sobo hee dugo 18 ee ma kulodu badolone bo holoso o kulodu badoboome, yayo biame susuga ma kulodu gauwuloso siliso.

<sup>12</sup> Esino Yesuye yo ogoloso yo malalo hapoo sibe doloso yimapoo egeesee takaso, “Sobo no biame susuga ma kulodu gauwuloso egee silo epedee hamapoo olo mauwe poogooso,” diso.

<sup>13</sup> Egeesee takoloso Yesuye o deeso sobo ee sigeso. Esemé biame omapoo sobo gauwuloso sili ee see hoododoloso tekepo silame bei mooloogooloso Godee mapoo goomoga poudooso.

<sup>14</sup> Esemé howo gisili moso wiligi odoo taba oso Yesuye diayo hasali biame mapoo sobo tekepo moodoo ogoloso diya komonolone odoo susuga mapoo egeesee takaso, “Sadee hedebe ma kulodu biame 7 moloso. Esiga odoo susuga oso biame 6 ma kulodu tou talai tekepo. Esiga niyo biame 6 hama kulodu odoo paiye susuga gilimado sibilesi tekepo moodolai tekepo. Esino niyo iyo hasali biame mapoo sibilesi goo egeesi moodolai tekeponee,” diso.

<sup>15</sup> Esemé Lodeeye nei yimapoo egeesee takaso, “Niba goo bakadio gweli odoo. Bei, niba susuga oso hasali biame mapoo

bulumakau ebigi pidiga buguloso howo nalame hado diliso.

<sup>16</sup> Esiga niyo iyo hasali biame mapoo nibada be hu pidiliso. Esino iyo hasali biame mapoo Eibalahameeyo eiye hagee tiso tia masi tiamolome pidibugu egee tekeponeeyo? Bei, Saitenso kitulugu oso sobo hagee dugo 18 ee ma kulodu tiso tialoso melee masi meleeso.”

<sup>17</sup> Yesuye to hagee taka goo oso yimapoo kamanali odoo mapoo simili goo teneeso. Esino odoo abo oso Yesuye goo medee tekepo moodoogamo sili ogoloso diya goomogaso.

*Godeeye wiligi doloso badeli goo ee Yesuye wudu takolone eligi*

*(Mat 13:31-33; Maka 4:30-32)*

<sup>18</sup> Osoloso Yesuye see dimapoo egeesee takaso, “Godeeye wiligi doloso badeli goo ee kaseeyo? Ayo ogoo goo maga Godeeye wiligi doloso badeli goo ee nimapoo ka eligileiyo?

<sup>19</sup> Esiga Godeeye wiligi doloso badeli goo ee egeesi masi moloso. Odoo heeso ko pepooko masted deli todilesi o homolee mapoo segeiso. Esiga ko pepooko oso peleso homo toowa poloso, dee bo moodooga, sóso sibilesi omapoo ou tegegeliiso.

<sup>20</sup> Ayo ogoo goo maga Godeeye wiligi doloso badeli goo ee nimapoo ka eligileiyo?

<sup>21</sup> Ee egeesi masi. Soboso palawa wo silame, daga homolone palawa wo toowa ma kulodu yist pepooko kuko siliso. Egeeseega yist pepooko oso palawa wo ee diya kodiliso.”

*Osulu pepooko*

*(Mat 7:13-14, 21-23)*

<sup>22</sup> Yesuye Yelusalem mapoo dulone, mosobia pepooko abo eli domopooga dagamo dulone, Godeeyo to eligimo diso.

<sup>23</sup> Egeeseemo dumolome odoo heeso Yesu mapoo egeesee woosaso, “Lodee, odoo wulo hedebe bakadio oso gie badeli ka talaiyo?” diso.

Esemé yayo nei yimapoo egeesee takaso,

<sup>24</sup> “Niba osulu pepooko maga gadilame diya kitulugi. Bei, ayo nimapoo taka, odoosusuga osu osulu pepooko omaga gadilame diya kituluguleiso, esino diba omapoo gadilei tebileime.

<sup>25</sup> Bei, moso eyo amaye toboloso osulu kisileiso. Egeeseega niyo peegooga silesibulone osulu yamagalame osulu mapoo kalamadileiso. Egeeseelone egeeseetakalaisy, ‘Wiligi odoos, iba gasibileiya osulu yamagee,’ dalaisy.

Esino yayo egeeseetakalaisy, ‘A niba gooleedele. Niba mi kamaga sibadeeyo?’

<sup>26</sup> Egeeseega niyo nei egeeseetakalaisy, ‘Iba nobolo hodobo silesibulone wo sabolo howo sabolo namo siliso. Osolosoo ibada mi mapoo nayo imapoo to tekepo eligimo siliso,’ dalaisy.

<sup>27</sup> Esino yayo nimapoo see egeeseetakalaisy, ‘A niba gooleedele. Niba mi kamaga sibadeeyo? Niba ayo hageebado mapoo na sibadee. Amaga peegoodiyadee, niba goo tokenee tomo silesibili odoos,’ dalaisy.

<sup>28</sup> Esiga niba Godeeye wiligi dolosobadeli mi maga peegoo poogooga, peegooga dobolone, Eibalaham dio Yekob dio osolosoo Aisek dio osolosoo Godee magato tolosoo kokodoo takoomo sili odoosusuga osoo Godeeye wiligi dolosobadeli mi mapoo do ogolosoo gooholone mei kumudoo sabolo dobolone pupusiga malaisy.

<sup>29</sup> Osolosoo mipoo toowa hamapoo debeli mi susuga maga odoosusuga osoo Godeeye wiligi dolosobadeli mi mapoo wonalame sibilesoo dabalaisy.

<sup>30</sup> Esiga odoosusuga eyo howo woola odoos hu toowa tolosoo epedee hageedo, ee see hamamee Godeeyo howo woola odoowuluge masi dabalaisy. Esino odoosusuga eyo howo woola odoowuluge epedee hageedo, ee see hamamee Godeeyo howo woola diba hu toowa tolosoo dabalaisy.”

*Yesuye Yelusalem goolee goo*  
(Mat 23:37-39)

<sup>31</sup> Biame omapoo Pelisi odoos abosoo sibilesoo Yesu mapoo egeeseetakasoo, “No mi hagee poogoloso see mi hee mapoo

di. Bei, Helodeeye no wooloomalame ina,” disoo.

<sup>32</sup> Esemenei Yesuye dimapoo egeeseetakasoo, “Niba dilesoo dooboo so masi Helodee mapoo takee, ‘A epei osolosoo godigi mapoo bo holo paladee odoosabolo osolosoo odoopaigiga sabolo ee tekepo moodoolone badalaisy. Osolosoo see biame bakadio hedebe di mapoo a mo tou hosudalaisy,’ dee takee.

<sup>33</sup> Tei taka, epei sabolo osolosoo godigi sabolo osolosoo biame hee sabolo mapoo mo tou ee osee tomo dileiso. Bei, edebeeyo Godee maga to tolosoo kokodoo takoomo sili odoos ee Yelusalem mi peegoo wooloomalai tekeponee.

<sup>34</sup> Yelusalem, Yelusalem, nayo kasi maga Godee magato tolosoo kokodoo takoomo sili odoos piligulosoo see Godeeye diye di odoos ee piligilame yosoo ka enigeliyo? A biame kasolo mapoo kolokolosoo o pe medee gilimadolosoo wili egeeseeselame ayo nee holo gilimado sibilame goomegelisoo. Esino no koo goomegeli.

<sup>35</sup> Esiga Yelusalem odoos, niba dui. Nibadei tei mosoo ee mosooowe malaisy. Esiga ayo nimapoo taka. Niyo a see agalaimoo. Esino biame osoo sibogaa, niyo egeeseetakalaisy, ‘Odoos Godeeyo hu maga kitulugoo sabolo egee sibo Godeeye yimapoo goomogosoo,’ dalaisy. Biame omapoo niyo a see agalaisy.”

## 14

*Yesuye Pelisi odoowo mosopoo di*

<sup>1</sup> Yu odoos diayo hasali biame heeso Yesu Pelisi odoowo wiligi odoos taba eyo mosopoo pelesoo nei nalame badebeisoo. Esemee odoosusuga osoo Yesu mapoo medee hodoo dilesoo yimapoo balagameleeso.

<sup>2</sup> Bei, mosoo ee ma kulodoo odoos hee paiye toowa osoo tolosoo o su susuga tidodolosoo molome egeisoo.

<sup>3</sup> Egeesee ogolosoo Yesuye Pelisi odoos sabolo osolosoo tei eligili odoos dimapoo egeeseetakasoo, “Iyo hasali biame mapoo odoos tekepo moodoolai ee ibada teiyo?” disoo.

<sup>4</sup> Esino diba to hee takele. Esemé Yesuye odoó ee o deeso sigime tekepo paso. Osoloso yo diye diso.

<sup>5</sup> Osoloso yayo see Pelisi odoó sabolo osoloso tei eligili odoó sabolo mapoo egeesee takaso, “Nima kulodu nibada holo hee, o, bulumakau egeesi oso iyo hasali biame mapoo midoo ma kulodu todobuoga, yo peegoo tamagelega pagalaisomo? Haye. Niyo yo midoo ma kuloduga peegoo tamagalaiso,” diso.

<sup>6</sup> Esemé diayo Yesu mapoo nei takalai me poogooso.

*Eyo nediliyo toowa dalai sabolo osoloso pepooko dalai goo sabolo*

<sup>7</sup> Yesu moso ee ma kulodu badolone egeino, odoó susuga oso wo ne mapoo sibulone odoó hu toowa too oso bili mapoo bulumalame diya goolee sabolo sibume egeiso. Esemé Yesuye wudu taka hagee dimapoo egeesee takaso,

<sup>8</sup> “Odoó heeso namapoo takolone sobo hu wo ne mapoo sibeye daga, no sibilesi wo nalame saga dilesi odoó hu toowa too oso bili mapoo na bie. Bei, odoó hu toowa too hee nama hamamee sibilei malaiso.

<sup>9</sup> Egeeseega mosowo amaye namapoo egeesee takalaiso, ‘Nayo egee bado mapoo odoó toowa oso bie dee. Esiga no toboloso hamamee koo bilame di,’ dalaiso. Egeeseega no hamameedee mapoo bilame diya simiye sabolo dilesi bileiso.

<sup>10</sup> Esino sobo hu wo nalame no sibeye daga, no sibilesi hamameedee bie. Egeeseega mosowo amaye no hamameedee mapoo badebei ogoloso no see malalo koodoo peleso bie dalaiso. Osoloso wo ne mapoo buluma odoó oso goo hagee ogoloso no odoó toowa dalaiso.

<sup>11</sup> Esiga odoó agayo eyo nediliyo yo toowa daga, nei yo Godeeye pepooko dalaiso. Esino odoó agayo eyo nediliyo yo pepooko daga, nei yo Godeeye toowa dalaiso.”

<sup>12</sup> Osoloso Yesuye see yo sibeye dee taka Pelisi odoó mapoo egeesee takaso, “No wo toowa nalame nee odoó sabolo osoloso nemei dio sabolo osoloso nee soosoo sabolo osoloso nee bi bei odoó sabolo na gilime.

Bei, nayo diba gilimaga, nei diayo dibolo hodobo wo nalame no idileiso. Egeeseega no nei hee talaime.

<sup>13</sup> Esino no wo toowa nalame mopoodoo doloso wulo bi mauwe odoó sabolo, osoloso kido todobia odoó sabolo, osoloso su kakawa poogoo odoó sabolo, osoloso howo si odoó sabolo ee gilime.

<sup>14</sup> Bei, nayo goo hageesi moodooga, Godeeye namapoo nei tenelaiso. Bei, diayo nei namapoo egeesi pidilei tebile. Esiga Godeeyo howo woola tekepo debeli odoó oso wedia maga hogadilei biame omapoo Godeeye namapoo nei tenelaiso.”

*Wo ne toowa eyo goo maga wudu taka (Mat 22:1-10)*

<sup>15</sup> Yesubolo hodobo wo nolone debei odoó heeso to hagee duloso Yesu mapoo egeesee takaso, “Godeeye wiligi doloso badeli mi mapoo peleso hodobo wo nalai odoó diba diya goomogalaiso,” diso.

<sup>16</sup> Esemé Yesuye yimapoo egeesee takaso, “Odoó heeso wo toowa nalame mopoodoo doloso odoó susuga gilimaso.

<sup>17</sup> Osoloso wo olo nalame o tou teli odoó hee mapoo dilesi yayo gilimadoo odoó ee iyado sibe diso.

<sup>18</sup> Esemé o tou teli odoó oso diba gilimalame simi ogoloso diayo wo ne mapoo sibilei gowoolone goo abo maga gameenee goo takaso. Egeeseelone odoó heeso yimapoo egeesee takaso, ‘A mi neiso epedee too. Esiga a dilesi mi egee agalaiso. Esiga nayo dilesi nee wiligi odoó mapoo takee, a wo ne mapoo sibileimego dee takee,’ diso.

<sup>19</sup> Esemé see odoó heeso egeesee takaso, ‘A bulumakau 10 neiso epedee too. Esiga bulumakau egee sabolo tou talai teiba beleso dibolo tou talame dileiso. Esiga nayo dilesi nee wiligi odoó mapoo takee, a wo ne mapoo sibileimego dee takee,’ diso.

<sup>20</sup> Osoloso see odoó heeso egeesee takaso, ‘A sobo epedee hu. Esiga a wo ne mapoo sibileime,’ diso.

<sup>21</sup> Odoó susuga oso egeesee takageme, to todili odoó oso see wedi dilesi o wiligi odoó mapoo odoó susuga oso taka goo susuga ee yimapoo takaso. Esemé wo ne

eyo wiligi odoo taba oso diya komonolone see o tou teli odoo mapoo egeesee takaso, 'No saga dileso mosobia domopoo bi mauwe odoo sabolo, osoloso kido todobia odoo sabolo, osoloso su kakawa poogoo odoo sabolo, osoloso howo si odoo sabolo iyado sibe,' diso.

<sup>22</sup> Esememe o tou teli odoo oso saga dileso odoo iyado sibilesi o wiligi odoo mapoo egeesee takaso, 'Wiligi odoo, ayo odoo abo olo iyado simiso. Esino debi pooba abo odoo mauwe moloso,' diso.

<sup>23</sup> Esememe wiligi odoo oso see o tou teli odoo mapoo egeesee takaso, 'No see dileso odoo eli domopoo egee silesibo sabolo osoloso wadou moso mapoo debeli odoo ee hapoo sibilame to kitulugu sabolo takee, mo moso kulodu debi pooba ee edebeeyo tolo tebilame.

<sup>24</sup> Esiga ayo namapoo taka, wo ne hagee ma kulodu odoo daga ayo gilimome sibilei gowe odoo oso wo ayo mopoodoo doo nalaima,' diso."

*Yesu dadalai goo ee kaseeyo?  
(Mat 10:37-38)*

<sup>25</sup> Odoo susuga oso Yesu dedeme, Yesuye dimapoo bidi toboloso tobudulone egeesee takaso,

<sup>26</sup> "Odoo agayo ama sabolo, osoloso owee sabolo, osoloso osobo sabolo, osoloso owolo sabolo, osoloso o soosoo sabolo, osoloso o gie badeli sabolo mapoo diya goolone, nei a goolee pepooko daga, yo ayo di hamamee deede sibilei tebile.

<sup>27</sup> Osoloso odoo agayo talai sabolo dala toowa talai sabolo goo medee moodelega poogoloso ayo di hamamee dedelega poogoga, yo ayo di hamamee deede sibilei tebile.

<sup>28</sup> Edebeeyo kulo moso tegelame gooleega, yo daga badolone yayo kulo moso tegelai molee teiba beleso agalame hesigileiso.

<sup>29-30</sup> Bei, yo daga molee hesigelega tou bei mooloogoga, molee hosudoga, tou hoo malaime. Egeeseega odoo susuga oso moso ee togodelega poogoo ogoloso manolone yiligilone egeesee takalaiso,

'Odoo hagee moso tegelame bei mooloogoo. Esino hosudalai tebile,' dalaiso.

<sup>31</sup> Wudu taka hee hagoso. Mi bakadio oso ha talaiso. Egeesi ma kulodu mosodei heeso odoo 10,000 gilimado sibileiso. Osoloso mosodei heeso odoo 20,000 gilimado sibileiso. Esino odoo 10,000 gilimado ha teli wiligi odoo taba oso daga medee badolone, odoo 20,000 mapoo ha talai teiba beleso goo ee goolone badalaiso.

<sup>32</sup> Osoloso yayo o odoo sabolo odoo 20,000 mapoo ha talai ee koo tobuoga, yayo o odoo hee odoo 20,000 gilimado simi dia wiligi odoo taba mapoo to todi dalaiso, yibolo see mesilame.

<sup>33</sup> Esiga odoo agayo ama hamamee dadalame gooleega, yayo o bi susuga poogoloso a ka deede sibe.

<sup>34</sup> Solu ee bi tekepo. Esino solu hadali me daga, nayo solu ee see hadalame kasee moodolaiyo?

<sup>35</sup> Esiga solu egee goo mauwe mologa, odoo susuga oso solu egee togobigileiso.

Odoo niba dulubolo, esiga ayo hagee takoo medee hoodo dui."

## 15

*Yesuye sipi be osugoba maga wudu taka  
(Mat 18:12-24)*

<sup>1</sup> Tekisi molee misigeli odoo sabolo osoloso goo tokenee teli odoo sabolo Yesuwo to dulame sibilesi debeiso.

<sup>2</sup> Esino Pelisi odoo sabolo osoloso tei eligili odoo sabolo oso goo hagee ogoloso gowoolone egeesee takaga meleeso, "Odoo hagoso tokenee teli odoo ee gilimadoloso dibolo hodobo wo namo siliso," diso.

<sup>3</sup> Esememe Yesuye wudu taka hagee dimapoo takaso,

<sup>4</sup> "Sipi be hu bali odoo oso o sipi 100 bameleeso. Egeesi ma kulodu hedebe osugobooga, yayo ogo goo moodolai-somo? Yayo go woolalowe poogoo mapoo o sipi be abo 99 omapoo hoologoloso, see hedebe osugoba ee esiamo dileiso.

<sup>5-6</sup> Yayo esiameliso ogoga, yo goomogolone sipi be ee mosopoo imado



sibileiso. Osoloso o odoo abo ee gili-madoloso egeesee takalaiso, 'Mo sipi be osugoba epedee olo egeiso. Esiga niba sibileso abolo goomoga poude,' dalaiso. <sup>7</sup> Esiga ayo nimapoo taka, Kei mi mapoo odoo 99 Godeeyo howo woola tekepo debeli dia goo mapoo goomoga goo oso osee moloso. Esino goo tokenee teli odoo hedebeso o goo tokenee maga miligi pialoso see Godee mapoo bididoobooga, Kei mi mapoo goomoga toowa oso malaiso."

*Yesuye molee ko oso osugoba maga wudu taka*

<sup>8</sup> "Biame hee mapoo sobo hee o molee ko 10 ma kulodu hedebe osugobalaiso. Eseega yo ogoo goo moodoolaisomo? Yayo keme pudoloso esiamo silone, o moso kulodu goko oso kakabalaiso.

<sup>9</sup> Osoloso yayo o molee ko osugoba ee ogoga, yayo o odoo ee iyadoloso egeesee takalaiso, 'Mo molee ko osugoba epedee olo egeiso. Esiga niba sibileso abolo hodobo goomoga poude,' dalaiso.

<sup>10</sup> Esiga ayo nimapoo taka. Goo tokenee teli odoo hedebeso o goo tokenee maga miligi pialoso see Godee mapoo bididoobooga, Godeeyo momaiye susuga Kei mi ma dokodoo egee do oso goomoga toowa poudileiso."

*Yesuye holaisoso peegoo dobudo di maga wudu taka*

<sup>11</sup> Yesuye see wudu taka hee hagee odoo mapoo egeesee oposususo, "Odo hee owolo giso holo bakadio debeiso.

<sup>12</sup> Esino biame heeso omoloye ama mapoo egeesee takaso, 'No toga nee bi ayo talai malalo epedee amapoo tenee,' diso. Esem amaye owolo bakadio ee ma kulodu o bi abo puloso dimapoo piso.

<sup>13</sup> Esem omoloye biame abo poogoloso hamamee amameeye yimapoo bi pi ee toloso see odoo abo mapoo neiso toloso see mi hee eli sage mapoo diso. Yo omapoo dileso tokenee goo ma kulodu badolone, o molee toowa hosudooso.

<sup>14</sup> Yayo o molee toowa hosudoloso melee biame omapoo mi kibiya oso mi omapoo hodia goo meleeso. Esem yayo see gilibo

holo masi badolone, hodia goo toowa ege-liso.

<sup>15</sup> Esiga yayo molee tou talame mosobia odoo hee mapoo dileso peledabaso. Esem mosodei odoo ogoso yo o go mapoo dileso o be bamelee diso.

<sup>16</sup> Esem yo dileso be hu nei nolone beso nali nei ee ogoloso nalame gweliso. Esino odoo heeso beyo nei sabolo osoloso nei abo sabolo yayo nalame koo tosibili.

<sup>17</sup> Yayo egeesee badebei ma kulodu, biame heeso yimapoo goo goolee tekepo oso sibume, yayo egeesee gooleeso, 'Mo mamou toloso nei teli odoo susuga ee hodia sabolo koo debeli. Esino a hamapoo hodia sabolo badolone talame ka seeso.

<sup>18</sup> Esiga a see wedi dileso mo ma mapoo egeesee takalaiso: Ma, ayo Godee mapoo osoloso namapoo goo tokenee olo tooso.

<sup>19</sup> A tokenee odoo. Esiga nayo see epedee amapoo mo holo dalai tekeponee. Esino tekepo, nayo a nee tou toloso nei teli odoo hee dee takee,' diso.

<sup>20</sup> Osoloso yo amameeye badebei mi mapoo diso.

Esino yo eli sage abaga osee sibu-molome, amaye ogoloso owolo diya sooloo dolone, yayo saga hoguo dileso owolo mapoo booloomaloso adaso.

<sup>21</sup> Esem owoloye yimapoo egeesee takaso, 'Ma, a Godee mapoo osoloso namapoo goo tokenee olo tooso. A tokenee odoo. Esiga nayo amapoo mo holo dalai tekeponee,' diso.

<sup>22</sup> Esino amaye o tou teli odoo mapoo egeesee takaso, 'Dugo tekepo sabolo osoloso homo bi sabolo osoloso dee sesa mapoo kali ki bi sabolo saga tosibileso yimapoo kadige.

<sup>23</sup> Osoloso mo gala hu ma kulodu bulumakau be hu kauwa wooloso si. Osoloso hodobo wo nolone goomogalaiso.

<sup>24</sup> Bei, mo holo hagee olo tano, see epedee gie badoso. Osoloso olo dobudo diso, esino epedee ogoso,' diso. Esiga diayo hodobo wo nolone goomoga poudooso.

<sup>25</sup> Diba egeeseelone doboome, emei o homolee ma kulodu tou temeleso sibu-lone, amayo moso kulodu odoo susuga

goomogolone hopolone kosaiya pegig-  
amolome duso.

<sup>26</sup> Esemé yayo o tou teli odoó hee idoloso yimapoo woosaso, ‘Mo mamó moso ma kulodu ogoó goo tolo?’ diso.

<sup>27</sup> Esemé o tou teli odoó oso yimapoo egeesee takaso, ‘Nomolo epei simiso. Esiga namaye owolo yo medee tekepo wedi simi ogoloso, goomogolone bulumakau be hu kauwa wooloso siloso wo toowa ka nalagamoloso,’ diso.

<sup>28</sup> Esemé emei goo hagee duloso komonolone wo ne mapoo dile. Esemé amaye sibilesó o daga holo yo wo ne mapoo gadilame giso.

<sup>29</sup> Esino yayo ama mapoo egeesee takaso, ‘Ayo dugo susuga ma kulodu nee tou teli odoó masi silone nee to mapoo mesimo silone tou toowa temeleso. Esino nayo gout be hu pepooko wooloso amapoo takolone, nee odoó sabolo neye, dee takele.

<sup>30</sup> Esino nowolo hagoso nee bi sabolo nee molee sabolo tolosó domo sili sobo sabolo badolone hosudoloso sibume, nei nayo yimapoo goomogolone be kauwa wooloso wo toowa nolone ka dabala?’ diso.

<sup>31</sup> Esino amaye owolo mapoo egeesee takaso, ‘Mo holo, nayo biame susuga abolo badebeiso. Esiga mo bi susuga ee nee.

<sup>32</sup> Esino epei iba goomogolone tekepo. Bei, nomolo hagee olo tano, epedee yo see gie ka badoso. Osoloso yo osugobano, see epei yo ogoó,’ diso.”

## 16

### *Molee gibadeli odoó maga wudu taka*

<sup>1</sup> Yesuye o hamamee dili odoó mapoo egeesee takaso, “Biame heeso bi bei odooso o molee gibadeli idoloso badebeiso. Egeesi ma kulodu bi bei odoó o molee gibadeli odoó oso o molee mada namelee goo ee yo duso.

<sup>2</sup> Osoloso yayo o molee gibadeli odoó ee idoloso yimapoo egeesee takaso, ‘Nayo mo molee tokenee bameleena. Esiga no tekepo, nayo tou temelee goo susuga ee booka mapoo hoguguloso amapoo eligi.

Bei, nayo see mo molee gibadalai tekeponee. Esiga no tou epedee pagalaiso,’ diso.

<sup>3</sup> Esemé molee gibadeli odoó oso egeesee gooleeso, ‘Mo wiligi odoó oso mo tou ee olo peegoo magooso. Esiga a see ogoó tou toomoba? A nei howo segelame mi gabalai a kitulugu mauwe. Osoloso ayo odoó mapoo wulo hoowamo silei diya simileeyo.

<sup>4</sup> Esino ayo mo tou poogooga, mo odooso a dia mosopoo ido palame, ayo goo talai epedee olo gooleedoso.’

<sup>5</sup> Egeesee gooloso yayo o wiligi odoó mapoo bi wulayo temelee odoó ee gili-madooso. Osoloso daga odoó hee mapoo egeesee takaso, ‘Nayo mo wiligi odoó mapoo bi wulayo too eyo nei tenelega ka pagala? Nei kasolowo?’ diso.

<sup>6</sup> Esemé odoó ogoó nei egeesee takaso, ‘Ayo mo dalamoo 100 mapoo olipi i keedoo ee nei tenele,’ diso.

Esemé molee gibadeli odoó oso nei yimapoo egeesee takaso, ‘Wiligi odoó o booka hagoso. Esiga no saga buloso booka hamapoo nayo dalamoo 100 mapoo olipi i keedeme hogugu ee tabuguloso, see dalamoo 50 mapoo olipi i keedoo ono too doloso hogugi,’ diso.

<sup>7</sup> Osoloso molee gibadeli oso see odoó hee mapoo egeesee takaso, ‘Nayo mo wiligi odoó mapoo bi wulayo too eyo nei tenelega ka molosomo? Nei kasolowo?’ diso.

Esemé odoó ogoó nei egeesee takaso, ‘Ayo mo wogai 100 mapoo palawa wo soo too eyo nei tenele,’ diso.

Esemé molee gibadeli odoó oso yimapoo nei egeesee takaso, ‘Wiligi odoó o booka hagoso. Esiga no saga buloso booka hamapoo nayo wogai 100 mapoo palawa wo soo too hogugu ee tabuguloso, see wogai 80 mapoo palawa wo soo ono too doloso hogugi,’ diso.

<sup>8</sup> Esino o wiligi odoó oso goo hagee duloso o molee tokenee gibadeli odoó mapoo egeesee takaso, ‘Nayo odoó abo pidi goo oso see hamamee no pidileiso,’ diso.”

Esemé Yesuye see egeesee takaso, “O, mi odoó oso eyo nediliyo goolone emegei

dimaga pidili goo susuga ee medee gooleedooso. Esino Godeeyo odoosoo oso goo egeesi moodoolai kibiya gooleede.

<sup>9</sup> Esiga ayo nimapoo taka, niyo mipoo toowa hamapoo dobolone, nibada molee sabolo osoloso nibada bi sabolo oso emegei pidi osoloso emegei dolone ka debbee. Niyo egeeseega nei bi egee mauwe poogooga, Godeeye niba Kei mi ma dokodoo kookaiyo moloso osee malai moso omapoo ido palaiso.

<sup>10</sup> Esiga edebeeyo goo pepooko medee kibiya bamologa, yo see goo toowa balai tebileiso. Osoloso odoosoo agayo goo pepooko balai tebilega poogooga, yo goo toowa balai tebileime.

<sup>11</sup> Esiga niyo mi toowa eyo bi medee belega poogooga, see niyo Kei mi eyo goo ee medee kasee balaisomo?

<sup>12</sup> Osoloso see niyo nee odoowo bi medee belega poogooga, odoosoo agayo nee bidee ee no balame namapoo ka tenelaiyo?

<sup>13</sup> Esiga edebeeyo wiligi odoosoo baka-dio eyo to mapoo mesiloso silone tou talai tebile. Bei, yo o wiligi odoosoo hee goomogolone hee gowoolaiso. Egeeseelone yayo wiligi odoosoo heeyo to mapoo mesiloso silone, see heeyo to mapoo mesileime. Esiga edebeeyo Godee mapoo mesimo silone molee toowa tolosoo badalai goo mapoo mesilei tebile.”

<sup>14</sup> Esemee Pelisi odoosoo oso Yesuye to taka hagee duloso manolone yiligaso. Bei, Pelisi odoosoo hagee bia molee diya goomegeli.

<sup>15</sup> Esemee Yesuye dimapoo egeesee takaso, “Niba wulo edebeeyo tekepo odoosoo dalame, odoosoo howo woola gamenee goo tekepo moodeliso. Esino ee ma kulodu Godeeye niyo goo goolee olo gooleedooso. Esiga edebeeyo nibada goo ogoloso tekepo deli ee nei Godeeye nibada goo ee diya tokenee deliso.

<sup>16</sup> Godeeye tei magoo Moses mapoo tenee ee hogugu sabolo osoloso Godee maga to tolosoo kokodo takomo sili odoosoo oso to hogugu oso odoosoo abaga gilimado simino, Yoneeye badebei biame omapoo peled-abaso. Osoloso Yoneeyo biame poogoloso

hamamee mapoo to tekepo Godeeye wiligi doloso badeli goo ee odoosoo mapoo takaso. Esiga edebeeyo Godeeye wiligi doloso badeli goo mapoo gadilame diya ka kituluguso.

<sup>17</sup> Esiga mipoo sabolo kei sabolo oso me pagalai ee teiba. Esino Godeeye tei magoo hogugu ee ma kulodu hu bei pepuso hee peegoo pagalai tebile.

<sup>18</sup> Esiga edebeeyo osobo poogoloso, see sobo hee huga, yo sobo egee goo heli toso. Osoloso edebeeyo sobo omoye poogoo huga, yo odoosoo heeyo osobo ee peedee huso.”

### *Bi bei odoosoo dio Lasales dio*

<sup>19</sup> “Biame heeso bi bei odoosoo badebeiso. Yo biame susuga dugo kali bi tekepo kaloso badolone nei medee tekepo nolone badebeiso.

<sup>20-21</sup> Biame domo mapoo bi mauwe odoosoo badebeiso, o hu Lasales. Yo o su susuga e buloso badebeiso. Esino yo biame susuga bi bei odoosoo moso osulu miyopoo iboduloso badolone bi bei odoosoo oso nei ne kokou mou ee nalame goomegeliso. Osoloso soso sibilesosoo o e mapoo pieliso.

<sup>22</sup> Osoloso biame abo poogoloso hamamee bi mauwe odoosoo Lasales taso. Esemee Godeeyo momaiye oso yo todilesosoo Eibalahameeye badebei koola mapoo ibediso. Osoloso hamamee bi bei odoosoo taso. Esemee odoosoo abosoo o su midoosoo.

<sup>23</sup> Yo tolosoo abaga dino odoosoo wedia oso debeli mi mapoo dala ma kulodu badebeiso. Yo omapoo badolone, dokodoo egeino, Eibalaham eli sage badoboome ogoloso, yima koola mapoo Lasales bado-boome egeiso.

<sup>24</sup> Esemee yo ilone egeesee takaso, ‘Ma Eibalaham, nayo a sooloo dele. Osoloso Lasales amapoo sibeye dee, yayo sibilesosoo o dee wolugu oso howomoo olugudolosoo, mo i mapoo sigoga, kekebie palame. Bei, a dou hagee ma kulodu dala sabolo bado,’ diso.

<sup>25</sup> Esino Eibalahameeye nei egeesee takaso, ‘Mo holo, no goolee. Nayo gie badebei biame omapoo bi medee tekepo ono temelesoo. Esino Lasales yo bi mauwe gilibo holo masi badebeiso. Esiga

epedee Lasaleseeeye hamapoo goomoga sabolo badoga, nei nayo dala ma kulodu ka badoso.

<sup>26</sup> Osoloso goo hee ee, niba ogo osoloso iba ogo doloso domo omapoo goodobia diya toowa edebeeyo hodiokoo dabagalai tebile moloso. Esiga iyo hagee do omaga niyo egee do mapoo dabagalai eli mauwe. Osoloso niyo egee do omaga edebeeyo iyo hagee do mapoo dabagalai onosee eli mauwe,' diso.

<sup>27</sup> Esememe bi bei odoo oso nei egeesee takaso, 'Ma Eibalaham, ayo namapoo howaso, nayo Lasales mo mayo moso mapoo wedi diye dalame.

<sup>28</sup> Bei, mo mayo moso mapoo molo dio dee tiadoo omapoo doso. Esiga Lasaleseeeye see wedi dileso dimapoo kokodo takalai tekepo, diba toga see dala mi hamapoo sibiya,' diso.

<sup>29</sup> Esememe Eibalahameeye egeesee takaso, 'Dimapoo Moseseeye tei hogugu sabolo osoloso Godee maga to toloso kokodo takomo sili odoo oso Godeeyo to hogugu sabolo olo moloso. Esiga dia goo goolee tekepo palame, diayo kokodo taka to ee dulei tekepo,' diso.

<sup>30</sup> Esememe bi bei odoo oso nei egeesee takaso, 'Haye, egeesee selaime. Esino odoo hee ta maga see hogado sibilesi dimapoo takooga, diayo dibada goo tokenee maga miligi pialoso Godee mapoo ka sibilesi,' diso.

<sup>31</sup> Esino Eibalahameeye see tobu yimapoo egeesee takaso, 'Diayo Moseseeye tei hogugu sabolo osoloso Godee maga to toloso kokodo takomo sili odoo oso Godeeyo to hogugu omapoo tei telega poogooga, diayo see kasi maga odoo hee ta maga hogado sibilesi to takooga, omapoo tei ka talaiyo?' diso."

## 17

*Tokenee goo mapoo gido dili goo  
(Mat 18:6-7, 21-22; Maka 9:42)*

<sup>1</sup> Biame heeso Yesuye o hamamee dili odoo mapoo egeesee takaso, "Edebeeyo goo tokenee mapoo gido dilei goo ee tei

sibilesi. Esino goo egee bei mooloo-goomo sili odoo mapoo, ayo yimapoo ka taka, ye-ee!

<sup>2</sup> Esiga odoo heeso tei too odoo hee goo tokenee mapoo gido duga, nei odoo heeso o mu mapoo yo toowa bagagoloso howo bou mapoo toosoolai ee dala haga toowanee. Bei, hamamee Godeeye odoo goo egeesi moodeli mapoo dala toowa tenelaiso.

<sup>3</sup> Esiga niba niso nediliyo medee bamelee.

Osoloso nee odoo tei too odoo oso goo tokenee toga, yimapoo takee. Osoloso yayo o goo tokenee mapoo goohele sabolo o tokenee mapoo miligi piaga, o tokenee egee boobado bigi.

<sup>4</sup> Osoloso yayo biame hedebe ma kulodu namapoo tokenee too ee 7 daga, osoloso namapoo sibilesi yayo emegei di to taka onosee 7 daga, nayo o tokenee goo ee boobado bigi."

*Tei too goo*

<sup>5</sup> Diye di odoo oso Lodee mapoo egeesee takaso, "Iyo tei too goo ee toowa moodee," diso.

<sup>6</sup> Esememe Lodeeye nei egeesee takaso, "Niyo tei too goo oso homokoko pepooko egeesi masi nimapoo mologa, niba teiba niyo molobei hamapoo takolone, 'No nee too sabolo tado dileso abei mapoo tebee,' daga egeesee selaiso," diso.

*Wiligi odoo o tou teli odoo eyo goo*

<sup>7</sup> "Tou teli odoo oso o wiligi odoowo homolee mapoo mi doomelee maga, o, sipi be hu bamelee maga siboga, yo wulo sibilesi nei nalaima, haye.

<sup>8</sup> Yo daga o wiligi odoo taba eyo nei siloso, dugo hapoo ee kaloso, nei si ee yimapoo tenelaiso. Osoloso o wiligi odoo taba oso nei naloso koodobuoga, see hamamee yayo wo sabolo howo sabolo nalaiso.

<sup>9</sup> Esino yayo tou egeesi tomo siloga, o wiligi odoo taba oso nei yimapoo goomoga to takalaime. Bei, egee o tou.

<sup>10</sup> Esiga niba egeesee selai tekepo. Ayo nimapoo tou teye daga, niyo goo egee toloso egeesee takalai tekepo, 'Iba wulo



tou teli odo. Esiga iyo tou hagee tomo silesibo goo hee talame koo seeso,' dee takee," diso.

*Yesuye odo e bia 10 ee tekepo moodoo*

<sup>11</sup> Yesu Yelusalem mi mapoo dulone, Gelili mi ogo osoloso Samaliya mi ogo doloso domo abaga diso.

<sup>12</sup> Yo eli domo mapoo mi pepooko hee mapoo dumolome, odo e bia 10 egeiso. Odo e bia 10 oso Yesu ogoloso yima hegi sibadele. Esino wulo eli sage tebisamolone,

<sup>13</sup> toso neligidi yimapoo egeese takaso, "Yesu, wiligi odo, nayo iba sooloo dolone pidi!" diso.

<sup>14</sup> Esem e yayo diba ogoloso egeese takaso, "Niba dilesi Godee ogo odo ogo doloso domo debeli odo mapoo nibada su eligi," diso. Diba Yesuye egeese taka dulosi dimelee omapoo, dia kolo see tekepo paso.

<sup>15</sup> Osoloso dima kulodu odo hee o kolo tekepo pa ogoloso Yesu mapoo wedi sibulone, toso neligidi Godee mapoo goomoga poudoomo simiso.

<sup>16</sup> Egeeseemo sibilesi Yesuwo homo beiyopoo gasuwoloso badolone Yesu mapoo goomoga teneeso. Odo hagee Samaliya odo.

<sup>17</sup> Esem Yesuye egeese takaso, "Ayo odo 10 olo tekepo moodoso. Esino odo abo egee bia kasomo?"

<sup>18</sup> Bei kasi maga, Yu odoonee hedebe hagoso obusomo Godee mapoo goomoga tenelame ka wedi simiyo?" diso.

<sup>19</sup> Osoloso Yesuye odo hamapoo egeese takaso, "Nayo amapoo tei too maga no olo tekepo paso. Esiga no toboloso di," diso.

*Godeeye wiligi doloso badeli goo oso sibilei*  
(Mat 24:23-28, 37-41)

<sup>20</sup> Biame heeso Pelisi odo oso Yesu mapoo egeese takaso, "Godeeye wiligi doloso badeli goo ee kopolone sibileiyo?" diso.

Esem Yesuye nei dimapoo egeese takaso, "Godeeye wiligi doloso badeli goo ee woola sibo agalaime.

<sup>21</sup> Osoloso edebeeyo Godeeye wiligi doloso badeli goo ee hamapoo hagee moloso, o, koogee moloso, dee takalaime. Bei, Godeeye wiligi doloso badeli goo ee nima kulodu moloso," diso.

<sup>22</sup> Osoloso see o hamamee dili odo mapoo egeese takaso, "Odo Holo mo biame oso siboga niyo agalame goomogalai biame ee sibileiso. Esino niba agalaime.

<sup>23</sup> Osoloso see edebeeyo nimapoo takolone, 'Odo Holo a koo badoso, o, hamapoo badoso,' dee takooga, dia to mapoo tei toloso omapoo na agala di.

<sup>24</sup> Esino Odo Holo ayo sibilei biame ee, kei ebiedi buguga mi susuga egee gadeebugu egeese selaiso. Egeeseega odo susuga oso agalaiso.

<sup>25</sup> Esino daga Odo Holo a dala toowa talaiso. Osoloso odo epedee hagee do oso a diya gowoolaiso.

<sup>26</sup> Nowaye badebei biame omapoo goo peledaba, goo hedebe egeesi masi oso Odo Holo ayo sibilei biame omapoo peledabalaiso.

<sup>27</sup> Nowaye badebei biame mapoo edebeeyo nei na howo na dolone dobolone, soboso giso obuo osoloso gisoso sobo huya dolone debeiso. Egeese solone doboome, biame heeso Nowa du ma kulodu gadiso. Esem howo toowa duwa oso sibilesi odo susuga piliguso.

<sup>28</sup> Osoloso goo hedebe egeesi masi oso Loteeye badebei biame mapoo peledabaso. Bei, Loteeye badebei biame mapoo edebeeyo nei na howo na dolone debeiso. Osoloso biso emegei nei pidi nei pidi dolone debeiso. Osoloso nei howo sogo, moso togo dolone debeiso.

<sup>29</sup> Egeese solone doboome biame heeso, Loteeye Sodom mi poogoloso dime, kei ma dokodooga dou sabolo osoloso yo dei heliye oso sibilesi odo Sodom mi mapoo debeli susuga piliguso.

<sup>30</sup> Esiga Odo Holo ayo sibilei biame mapoo odo susuga oso goo egeesi tolone daga, ee ma kulodu a ka sibilei.

<sup>31</sup> Esiga biame omapoo odoos hau mapoo badebei oso see moso kulodu o bi talame gadilei tekeponee. Osoloso odoos homolee mapoo nei howo sogomologa, yo see mosopoo wedi dilei tekeponee.

<sup>32</sup> Esiga niba Loteeyo osobowo goo ee goolee.

<sup>33</sup> Esiga odoos agayo o gie badeli eyo nediliyo pidilame wegegeega, o gie badeli egee osugobalaiso. Esino odoos agayo mo goo maga o gie badeli peegoo magooga, yo badoboso kookaiyo gie osee badalaiso.

<sup>34</sup> Esiga ayo nimapoo taka, biame omapoo giso bakadio kida hedebe mapoo tileiso. Esino odoos hee ido polone, odoos heeno omapoo pagalaiso.

<sup>35</sup> Osoloso biame omapoo sobo bakadio wo gamalaiso. Esino sobo hee ido polone, sobo heeno omapoo pagalaiso. [

<sup>36</sup> Osoloso biame omapoo giso bakadio homolee ma kulodu tou tomo sileiso. Esino odoos hee ido polone, heeno omapoo pagalaiso.”]

<sup>37</sup> Yesuye to hageesee takoloso koodobume, o hamamee dili odoos oso yimapoo egeesee takaso, “Lodee, goo hagee kamapoo peledabalaiyo?” diso.

Eseme Lodeeye dimapoo nei egeesee takaso, “Mi hee mapoo gala ta eyo su hune mologa, kukodee susuga hune egee nalame omapoo busiliso,” diso.

## 18

### *Sobo bauwo goo maga wudu taka*

<sup>1</sup> Osoloso Yesuye see tobu wudu taka hamaga o hamamee dili odoos dimapoo eligiso, diayo biame susuga Godee mapoo takomo silone gowoolega pagalame.

<sup>2</sup> Egeeseelone yayo egeesee takaso, “Mi hee mapoo goo midili odoos badebeiso. Esino yo Godeebolo ebilega badolone, odoos koo gweli.

<sup>3</sup> Osoloso mi hedebe omapoo sobo bau hee badebeiso. Esino sobo hagos biame susuga goo midili odoos hamapoo sibilesos howolone egeesee takeliso, ‘Nayo a pidilone odoos amapoo ha egee tomolo eyo goo midi,’ deliso.

<sup>4</sup> Esino goo midili odoos oso daga sobo hagee pidilei yo goomegele. Esino biame susuga sobo hagos yimapoo sili sileeme ogoloso egeesee gooleeso, ‘A Godeebolo koo ebili osoloso a odoos koo gweli.

<sup>5</sup> Esino a sobo hageeyo to dumeleso diya gowoo. Esiga yayo see mo moso mapoo sibili ee pagalame yo pidileiso,’ diso.”

<sup>6</sup> Esiga Lodeeye egeesee takaso, “Goo medee koo midili odoos eyo goo hagee ogoloso goo goolee medee kibiya te. Bei, goo midili odoos hagos daga sobo hagee pidilei gowoomeleso see hamamee yo pidiso.

<sup>7</sup> Esiga Godeeye hesiga odoos oso biame sabolo gesi sabolo yimapoo hoowa mologa ogoloso diba tei pidileiso. Osoloso yayo diayo yimapoo taka to ee duloso nei tenelai koo dagili.

<sup>8</sup> Esiga ayo taka, Godee o odoos oso yimapoo hoowa duloso goomoga sabolo diba pidiliso. Esino Odoos Holo ayo see wedi sibilei biame mapoo, mipoo hamapoo tei too goo ee molo agalaisomo?”

### *Pelisi odoos sabolo osoloso tekisi molee misigeli odoos sabolo*

<sup>9</sup> Odoos abo dieso nediliyo diba Godeeyo howo woola tekepo dolone, hee odoos abo tokenee deli odoos mapoo Yesuye wudu taka hageesee takaso,

<sup>10</sup> “Odoos bakadio, Pelisi odoos sabolo osoloso tekisi molee misigeli odoos sabolo, Yu odoowo tei moso mapoo Godee mapoo takalame palaso.

<sup>11</sup> Osoloso Pelisi odoos oso toboloso obusomo tobudulone dokodoo hageesee takaso, ‘Godee, a namapoo goomoga to taka. Bei, a odoos abo egeesinee. Bei, diba adaba bi teliso, osoloso goo tokenee teliso, osoloso diba adaba sobo sabolo giso sabolo heli teliso. Osoloso a see tobu namapoo goomoga to taka. Bei, a tekisi molee misigeli odoos keeseenee.

<sup>12</sup> Bei, a sadee hedebe ee ma kulodu biame bakadio nei nelega tei doloso badeliso. Osoloso ayo bi too biame mapoo mo bi 10 ee ma kulodu hedebe namapoo teneliso,’ diso.

<sup>13</sup> Esino tekisi molee misigeli odoosoo hamameedee hoogoo bia omaga toboloso o goo tokenee mapoo gooholone o su eyo nediliyo o budo mapoo kobuguloso oo goobodo buloso tobudulone Godee mapoo egeesee takaso, 'Godee, a tei medee diya tokenee odoosoo. Esiga nayo a sooloo dolone mo goo tokenee eyo nei na tenee,' diso.

<sup>14</sup> Esiga ayo nimapoo taka, tekisi molee misigeli odoosoo hagoso o mosopoo wedi dulone, Godeeyo howo woola abaga tekepo odoosoo doloso diso. Esino Pelisi odoosoo mapoo goo hageesi mauwe meleeso. Esiga odoosoo agayo eyo nediliyo yo toowa daga, nei yo Godeeye pepooko dalaiso. Esino odoosoo agayo eyo nediliyo yo pepooko daga, nei Godeeye yo toowa dalaiso."

*Yesu sabolo holaiso sabolo  
(Mat 19:13-15; Maka 10:13-16)*

<sup>15</sup> Biame hedebeeso odoosoo aboso holope Yesu mapoo ido sibadeeso, o deeso sigoloso pidilame. Esino o hamamee dili odoosoo oso goo egee ogoloso hamaga takaso.

<sup>16</sup> Esemee Yesuye holaiso gilimadoloso, o hamamee dili odoosoo dimapoo egeesee takaso, "Holaiso amapoo sibilei soowa. Niyo na hamaga takee. Bei, edebeeyo holaiso hageesi masi poga, diba Godeeye wiligi doloso badeli mapoo gasibileiso.

<sup>17</sup> Ayo nimapoo taka, edebeeyo o goo holaiso masi amamo to mapoo mesimo sili, egeesi selega poogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe."

*Bi bei odoosoo  
(Mat 19:16-30; Maka 10:17-31)*

<sup>18</sup> Wiligi odoosoo heeso sibileso Yesu mapoo egeesee takaso, "Eligili odoosoo tekepo, ayo ogoosoo toga kookaiyo badoboso gie badeli ka talaiyo?" diso.

<sup>19</sup> Esemee Yesuye nei yimapoo egeesee takaso, "Bei kasalame nayo a tekepo odoosoo dee ka takala? Tekepo odoosoo hee koo badoso. Esino hedebe Godeeno tekepo.

<sup>20</sup> Esiga Godeeyo tei magoo no olo gooleedoosoo: adaba kooka sobo na peedee hui, osoloso odoosoo na wooloome, osoloso

heli na te, osoloso odoosoo hee mapoo gameenee na gigidi, osoloso nama dio noowee dio oso taka to omapoo mesie."

<sup>21</sup> Esemee odoosoo oso Yesu mapoo egeesee takaso, "A holope pepooko maga simi tei magoo susuga hagee tobuloso tomo simiso," diso.

<sup>22</sup> Esemee Yesuye o to duloso nei egeesee takaso, "No goo hedebe dooboo dagadi moloso. No dileso nee bi susuga odoosoo abo mapoo tenee, nei molee talame. Osoloso bi too eyo nei molee ee bi mauwe odoosoo mapoo pi. Nayo egeesee seega, Kei mi ma dokodoo bi tekepo nee hu sabolo mologa agalaiso. Esiga no a deede sibe," diso.

<sup>23</sup> Odoosoo hagoso Yesuwo to duloso diya pupudasoo. Bei, yimapoo bi bei meleega.

<sup>24</sup> Esemee Yesuye yimapoo bolone egeesee takaso, "Bi bei odoosoo oso Godeeye wiligi doloso badeli mapoo gadilei diya kalawa.

<sup>25</sup> Esiga dugo duseli midole ou maga kemol be toowa oso gadilei kalawa. Esino bi bei odoosoo oso Godeeye wiligi doloso badeli mapoo gasibilei diya kalawa toowa."

<sup>26</sup> Esemee o hamamee dili odoosoo oso eligi goo hagee duloso egeesee takaso, "Esino kalawa egee odoosoo agayo gie badeli ka talaisomo?" diso.

<sup>27</sup> Esemee Yesuye dimapoo egeesee takaso, "Edebeeyo eyo nediliyo o gie badeli pidilei tebile. Esino hedebe Godee yino teiba. Bei, yayo goo susuga ee moodoolai yimapoo kalawa mauwe," diso.

<sup>28</sup> Esemee Pitaye Yesu mapoo egeesee takaso, "Iba ibada bi susuga poogoloso, no dodomo simiso," diso.

<sup>29-30</sup> Esemee Yesuye dimapoo nei egeesee takaso, "Ayo nimapoo taka, edebeeyo Godeeye wiligi doloso badeli goo maga o moso sabolo, osoloso osobo sabolo, osoloso emei dio sabolo omolo sabolo, osoloso ama dio owee dio sabolo, osoloso owolo dio sabolo poogoloso siboga, yayo epedee hamapoo nei toowa talaiso. Osoloso hamamee yo kookaiyo badoboso gie badeli talaiso," diso.

*Yesuye see eyo talai goo ee taka  
(Mat 20:17-19; Maka 10:32-34)*

<sup>31</sup> Osoloso see Yesuye o hamamee dili odoos 12 gilimadoloso peegoo gilimado dilesos dobolone dimapoo egeesee takaso, “Iba epei Yelusalem mi mapoo polosos. Esiga Godee maga to tolosos kokodos takomos silis odoos osos daga Odoos Holo mo goos hogugus susugas omapoo peledabalaisos.

<sup>32</sup> Osoloso a Yu odoonee mapoo tenelaisos. Osoloso diayos a manalaisos, osoloso amapoo tokenee goos moodoolaisos, osoloso amapoo makawo pagalaisos.

<sup>33</sup> Osoloso a tisos dabalaisos, osoloso a wooloomalaisos. Esinos a midos ma kulodus tamolosos, biame bakadio hedebe di poogolosos see gie badelis tolosos hogabileisos,” disos.

<sup>34</sup> Esinos Yesu o hamamee dili odoos osos to hagee dulosos goos eyos bei medee kibiyas gooleedeles. Bei, goos eyos bei dimagas mada magoogas.

*Yesuye odoos howos neligas tekepos moodos  
(Mat 20:29-34; Maka 10:46-52)*

<sup>35</sup> Yesu Yelikos mi koolas mapoo sibumolomes, odoos howos neligas osos Yesuyes sibileis elis pee mapoo badolones molees howameleesos.

<sup>36</sup> Egeeseelones odoos mooloogoodos susugas osos to boowoomos sibumes dulosos odoos abos mapoo woosagos, ogoos goos osos peledabas belesos.

<sup>37</sup> Esemes odoos abos yimapoo takolones egeesee takasos, “Yesu Nasalet odoos osos odoos abos sabolos ka diyadees,” disos.

<sup>38</sup> Yos to hagee dulosos neligidis isos, “Yesu, Deibidiyos amawes, nayos a sooloo dolones a pidiyes!” demeleesos.

<sup>39</sup> Esinos odoos malalos diyadees osos yimapoo to kitulugus sabolos egeesee takasos, “No to mauwes badebees,” disos. Esinos edebeeyos yimapoo egeesee takemes, yayos dia to mapoo dulegas, to kitulugus sabolos neligidis egeesee takolones badebeisos, “Deibidiyos amawes, nayos a sooloo dolones a pidiyes!” demeleesos.

<sup>40</sup> Esemes Yesu o to dulosos omapoo kookos tobolosos tobudulones, odoos abos

dimapoo egeesee takasos, “Odoos egees hamapoo idos sibe,” disos. Osolosos odoos howos si olos Yesu mapoo idos sibilesos badoboomes, Yesuyes yimapoo egeesee takasos,

<sup>41</sup> “No ayos namapoo ogoos goos moodoolais goomogodos?” disos.

Esemes howos neligas odoos osos nei yimapoo egeesee takasos, “Lodees, mo howos tekepos pe. A see agalais goomogos,” disos.

<sup>42</sup> Esemes Yesuyes yimapoo egeesee takasos, “Esigas nos epedees nees howos see eges. Bei, nos teis toogas, nos see olos tekepos pasos,” disos.

<sup>43</sup> Esemes hagas booloogelegas o howos bakadio sees tekepos pasos. Esemes yayos Yesubolos dulones Godees mapoo goomogas poudoomos disos. Esemes goos peledabas hagees egeis odoos susugas osos Godees mapoo goomogas poudoomos diyadeesos.

## 19

*Sekiyes tekis molees misigelis odoos*

<sup>1</sup> Yesu Yelikos mi mapoo peledobolosos, sees mi domos abagas dimeleesos.

<sup>2</sup> Mis omapoo tekis molees misigelis wiligis odoos tabas badebeisos, o hus Sekiyes. Osolosos yos bis bei odoos.

<sup>3</sup> Yesu elis domos abagas dumolomes, odoos susugas osos yos agalames diyas mooloogoodosos. Sekiyes yos Yesu agalais goomogagos. Esinos yos odoos diyas deiyepogas, yayos Yesu agalais odoos mooloogoodos osos yos gooloogosos.

<sup>4</sup> Esemes Sekiyes yos Yesu agalames Yesu diayos sibademelees elis sus mapoo malalos sagas hoguos dilesos homos mas dokodoo pelesos badebeisos.

<sup>5</sup> Esemes Yesuyes sibilesos egeinos, Sekiyes yos homos mas dokodoo pelesos badoboomes ogolosos yimapoo egeesee takasos, “Sekiyes, nos sagas miyomos meis. A epei nobolos hodobos nees mosopoo dileis goomogos,” disos. <sup>6</sup> Esemes yos sagas miyomos meilesos, goomogas sabolos Yesu o mosopoo idos disos.

<sup>7</sup> Osolosos odoos susugas osos goos hagees ogolosos diyas gowoolones egeesee takasos, “Yesu tokenees telis odoowos mosopoo disos,” dees takagas meleesos.



<sup>8</sup> Osoloso diba dileso Sekiyeseeyo moso mapoo dobolone Sekiyeseeye toboloso egeese takaso, “Lodee, a epei goo hageesi moodoolaiso: Ayo mo bi abo hodio ee bi mauwe odoo mapoo pileiso. Osoloso adaba molee ayo gamenee taka maga ayo hedebe too eyo nei see mawo dimapoo nei toowa bakadio bakadio di egeesi dimapoo tenelaiso,” diso.

<sup>9</sup> Esemee Yesuye Sekiyeseeyo to dulosu yimapoo egeese takaso, “Epei moso hageeyo kulodu debeli odoo mapoo gie badeli goo olo tosimiso. Bei, Sekiyes hagee nose Eibalahameeyo amawe.

<sup>10</sup> Bei, Odoo Holo ayo simi hagee tei tele poogoo odoo peegoo osugoba ee esiameliso ogoloso diba gilimadoloso dimapoo gie badeli tenelame ka simi,” diso.

*Wiligi odoo oso o tou teli odoo mapoo molee tenee*  
(Mat 25:14-30)

<sup>11</sup> Edebeeyo Yesuwo to hagee dulone dobolone egeesee goolone debeiso, “Yesu Yelusalem koola mapoo sibilesu badoso. Esiga Godeeye wiligi doloso badeli goo onosee koola tooboo malaiso,” demeleeso. Egeesee goologamelee ogoloso, Yesuye wudu taka hagee takaso,

<sup>12-13</sup> “Osoloso wiligi odoo hee mi eli sage mapoo gibadeli hu tala dilame badolone, o tou teli odoo 10 gilimadoloso dimapoo molee ko mina\* deli hedebe tenee, hedebe tenee diso. Esiga yayo dimapoo egeese takaso, ‘Niyo ayo see wedi sibilei ee bolone molee see toowa palame, biyo moso togoloso bei mooloogee,’ diso.

<sup>14</sup> Osoloso yo dime, o mosobia oso yo diya gowoolone, yima hamamee odoo abo diye diso, yayo diba gibadalai goo maga diayo gowe goo ee takalame.

<sup>15</sup> Esino odoo egee gibadeli hu toowa tolosu see wedi simiso. Yo see wedi sibilesu odoo molee yayo pi ee gilimadooso, molee toowa mala belesu agalame.

<sup>16</sup> Osoloso daga odoo heeso malalo sibilesu egeese takaso, ‘Nayo molee

amapoo tenemeni oso biyo mosu togoloso bei mooloogoloso see molee ko mina deli abo 10 egeesi tooso,’ diso.

<sup>17</sup> Esemee gibadeli odoo oso yimapoo goomogolone egeese takaso, ‘No tou medee tekepo todoo. Esiga nayo goo pepooko hagee medee bameleega, see nayo mi 10 wiligi doloso bolone badalaiso,’ diso.

<sup>18</sup> Esemee see omapoo badeli tou teli odoo hee oso sibilesu egeese takaso, ‘Nayo molee amapoo tenemeni oso biyo mosu togoloso bei mooloogoloso see molee ko mina deli abo dee tiadoo egeesi tooso,’ diso.

<sup>19</sup> Esemee gibadeli odoo oso yimapoo egeese takaso, ‘Nayo mi dee tiadoo wiligi doloso bolone badalaiso,’ diso.

<sup>20</sup> Osoloso see tou teli odoo hamameedee oso sibilesu egeese takaso, ‘Wiligi odoo, nee molee hagoso. Nayo amapoo teneme, todilesu dugoso tiadoloso mada magooso.

<sup>21</sup> Bei, no diya kitulugu odoo. Esiga a nobolo diya ebiaso. Osoloso nayo kitulugu maga odoo aboso bi ma ee teliso. Osoloso odoo aboso nei segei nayo gebiseliso,’ diso.

<sup>22</sup> Esemee o wiligi odoo taba oso yimapoo egeese takaso, ‘No tou tokenee teli odoo. Esiga no to egeese taka goo omaga, ayo nee goo midileiso. Bei, nayo takolone a diya kitulugu odoo diso. Osoloso nayo amapoo takolone ayo kitulugu maga odoo aboso bi ma ee teliso diso. Osoloso odoo aboso nei segei nayo wulo gebiseliso.

<sup>23</sup> Egeesi ma kulodu bei kasi maga molee toowa palame molee gibadeli odoowo mosopoo magelega ka poogoowo, ayo see wedi sibilesu molee toowa poloso mologa ka talai?’ diso.

<sup>24</sup> Yo egeese badolone odoo koola omapoo tebidi mapoo egeese takaso, ‘Niba yimapoo molee ko mina deli egee molo tolosu see molee ko mina deli 10 too odoo mapoo tenee,’ diso.

<sup>25</sup> Esemee diayo yimapoo egeese takaso, ‘Wiligi odoo, no ege, yo molee ko mina deli 10 olo tolosu badoso,’ diso.

<sup>26</sup> Esino wiligi odoo oso dimapoo egeese takaso, ‘Ayo nimapoo taka,

**19:9:** Diye 16:31; Luka 13:16    **19:10:** Luka 15:4-5; Yon 3:17; 1Tim 1:15    \* **19:12-13: Molee ko mina** deli hagee molee toowa. Esiga tou teli odoo oso tou tomo dimelesu biame 100 tugodoga, eyo nei molee ko mina deli hedebe teliso.    **19:17:** Luka 16:10    **19:26:** Mat 13:12; Luka 8:18

odoo agayo dimapoo bi tenee ee medee gibadoga, dimapoo see bei tenelaiso. Esino odoo agayo dimapoo tenee bi ee medee gibadelega poogooga, dimapoo bi pepuso abo egee molo toloso peegoo todileiso.

<sup>27</sup> Osoloso odoo agayo ayo diba gibadalame seme amapoo gowe, diba hamapoo iyado sibilesa mo howo woola piligi, diso.”

*Yesuye Yelusalem mi mapoo wiligi odoo masi toboloso gadi*

*(Mat 21:1-11; Maka 11:1-11; Yon 12:12-19)*

<sup>28</sup> Yesuye to taka hagee koodobuloso see Yelusalem mapoo dimeleeso.

<sup>29</sup> Yo Olipi mubi kuli mapoo mosodei bakadio, Betapage osoloso Betani koola mapoo peledabaso. Osoloso o hamamee dili odoo bakadio diye dolone dimapoo egeese takaso,

<sup>30</sup> “Mosodei koogee mapoo dileso omapoo ogoga, be hu gie kauwa donki edebeeyo wagi ma dokodoo buloso dilega poogoo ee, o mu mapoo ebigiso bagagoloso, omou mapoo bagagoo moloso. Esiga be ee niyo ebigi pidi poogoloso, hapoo hado sibe.

<sup>31</sup> Egeeseega odoo heeso sibilesa nimapoo takolone, ‘Bei kasalame be hu donki ebigi ka pidibagala’, dee takooga, niyo yimapoo to nei egeesee takee, ‘Lodeeye be hagee talai goomogona,’ dee takee,” diso.

<sup>32</sup> Esemee o hamamee dili odoo oso Yesuye taka to ee duloso mi omapoo diyadeeso. Diba dileso egeino, goo susuga Yesuye taka to sabolo tobuloso molome egeiso.

<sup>33</sup> Esemee diba donki be hu ee ebigi pidimeleeno, be eyo amameeye dimapoo egeese takaso, “Niba kasalame be ebigi ka pidibagala?” diso.

<sup>34</sup> Esemee nei diayo dimapoo egeese takaso, “Lodeeye be hagee talai goomogona,” diso.

<sup>35</sup> Esemee diayo donki be ee Yesu mapoo hado simiso. Osoloso dibada kekeisili dugo tigadoloso donki be eyo wagi ma

dokodoo malosoo, Yesu dee mapoo toloso dokodoo bediso.

<sup>36</sup> Yo be ma dokodoo buloso dumolome, odoo susuga oso dibada kekeisu dugo susuga tigadoloso yayo dilei eli mapoo poomo diso.

<sup>37</sup> Osoloso Yesuye Olipi mubi ma dokodooga Yelusalem mapoo moumolome, o hamamee dedeli odoo susuga oso yayo goo opusomo di moodoomo silee goo maga Godee mapoo goomoga neligidi poudoomo mousoo.

<sup>38</sup> Egeeseelone diayo egeese takaga meleeso,

“Wiligi odoo taba ee Godeeyo hu maga kitulugu sabolo egee sibo o hu dokodoo poude!

Osoloso Kei mi ma dokodoo mesie goo oso mele dee!

Osoloso Kei mi ma dokodoo badeli Godee mapoo goomoga poude!” dee takolone debeiso.

<sup>39</sup> Esino mooloogoodoo toowa ee ma kulodu Pelisi odoo abo omapoo debeiso. Diayo Yesu mapoo egeese takaso, “Eligili odoo, no nee hamamee dedeli odoo diba to koodobilame dimapoo to kitulugu sabolo takee,” diso.

<sup>40</sup> Esemee Yesuye nei dimapoo egeese takaso, “Ayo nimapoo taka, odoo hagee bia oso to mauwe duga, nei yo susuga hagoso to neligidi kesalaiso,” diso.

*Yesuye Yelusalem mi ogoloso pisa*

<sup>41</sup> Yesu Yelusalem koola mapoo dulone, Yelusalem mi ee malalo molo ogoloso pusulone egeese takaso,

<sup>42</sup> “Yelusalem odoo, niba kaseeyo? A diya goomogo, epedee niyo mesie goo toloso sibilei goo ono diya gooleedalame. Esino niba goo hagee medee ogoloso koo gooleedo. Bei, mesie goo ee nimaga mada magoo moloso.

<sup>43</sup> Esiga nimapoo ha teli odoo oso nee mi beele pee maga sulo doboloso mi kukaloso omaga peleso mi edebeeyo bia ee ma kulodu gadilei biame oso nimapoo sibileiso.

<sup>44</sup> Osoloso diayo nibada moso guobuguloso odoo susuga piligileiso. Osoloso nibada mi guobugu ee ma kulodu yo heeso

yo hee ma tobudoo molo agalaime. Esiga goo hageesi oso nimapoo peledabalaiso. Bei, Godeeye niba pidilame simi ee niyo medee ogoloso koo gooleedo.”

*Yesuye Yu odoowo tei moso mapoo pala (Mat 21:12-17; Maka 11:15-19; Yon 2:13-22)*

<sup>45</sup> Yesu Yelusalem mi mapoo gadilesu Yu odoowo tei moso mapoo palaso. Yo moso ee ma kulodu gapeleso tobudulone egeino, odoosusuga oso bi odoosaboo mapoo tenelo nei ka to domolome egeiso. Esemeyayo bi eyo ama dio susuga moso ee ma kuloduga peegoo hasiso bugulone egeesee takomo sileeso,

<sup>46</sup> “Niba goolee, Godeeyo to booka mapoo hogugu oso egeesee takooso, ‘Mo tei moso ee howo gisili moso oso,’ diso. Esino niyo Godeeyo moso hagee heli teli odoososo mada debeli moso paso,” diso.

<sup>47</sup> Yesu Yelusalem mi mapoo dileso badolone biame susuga Yu odoowo tei moso ma gapeleso odoosusuga mapoo Godeeyo to eligimeleeso. Esemeyo tei moso wiligi odoosabolo, osolosotei eligili odoosabolo, osolosoyu odoowo wiligi odoosabolo oso Yesu wooloomalame eli esiamo silesibiso.

<sup>48</sup> Esino diba Yesu wooloomalai eli egele. Bei, odoosusuga oso Yesuye eligi goo ee hodudileso diya goomoga sabolo duliso.

## 20

*Yesuye kitulugu maga woosa (Mat 21:23-27; Maka 11:27-33)*

<sup>1</sup> Biame hee mapoo Yesu Yu odoowo tei moso mapoo peleso odoosusuga mapoo Godeeyo to eligimolome, tei moso wiligi odoosabolo, osolosotei eligili odoosabolo, osolosoyu odoowo wiligi odoososo Yesu mapoo sibilesogegeesee takaso,

<sup>2</sup> “No ogoso kitulugu maga goo hagee ka moodoomo silala? Odoosagayo namapoo kitulugu hagee ka teneeyo?” diso.

<sup>3</sup> Esemeyo Yesuye dimapoo nei egeesee takaso, “Ayo woosali to hedebe nimapoo woosalaiso. Esiga niyo amapoo takee,

<sup>4</sup> Odooshowo olugumo silame Yonee mapoo kitulugu odoosagayo ka teneeyo?”

Godeeye teneeyo, o, edebeeyo teneeyo?” diso.

<sup>5</sup> Esemeyo diayo to hagee duloso, dieso nediliyo dima kulodu to moulone egeesee takaso, “Iyo kasee takalaiyo? Iyo Godee maga simi dee takooga, yayo imapoo egeesee takalaiso, ‘Bei kasi maga niyo Yoneeyo to mapoo tei telega ka poogoowo?’ dee takalaiso.

<sup>6</sup> Osoloso iyo see yayo kitulugu ee edebeeyo teneedo, dee takooga, see odoosusuga oso imapoo komonolone iba wooloomalame yoso enigileiso. Bei, odoosusuga oso Yonee yo tei Godee maga to tolosokokodo takomo sili odoosoo, dee gweliso,” diso.

<sup>7</sup> Egeeseelone diayo nei Yesu mapoo egeesee takaso, “Yoneeye kitulugu too eyo bei, iba gooleedele,” diso.

<sup>8</sup> Esemeyo Yesuye dimapoo egeesee takaso, “Esiga ayo kitulugu tomo hagee sulo goo ee nimapoo takalaime,” diso.

*Tou tokenee gibadeli odoosoyoo maga wudu taka (Mat 21:33-46; Maka 12:1-12)*

<sup>9</sup> Osoloso Yesuye see wudu taka hamaga odoosmapoo egeesee takaso, “Biame heeso odooshee o homolee ma kulodu geleipi howo segeiso. Yo geleipi howo sogoloso eyo nei odoosaboo maga nei tamalame dimapoo bameleeye doloso, yo mi hee eli sage mapoo badalame diso.

<sup>10</sup> Yo omapoo dileso badoboome, homokokoso bi moodolai biame oso simiso. Osoloso yayo o tou teli odooshee mapoo o homolee mapoo dileso homokoko abo diayo goolooga ee tala dileso tosibeye diso. Esino omapoo dileso peledoboome, homolee gibadeli odoososo yo woomele poogoloso bi mauwe see wedi di diso.

<sup>11</sup> Egeesee ogoloso amameeye tou teli odooshee diye diso. Esino gibadeli odoososo odoosagee sabolo woolone yimapoo ebili goosoteneloso bi mauwe see wedi diye diso.

<sup>12</sup> Esemeyo amameeye see tobu o tou teli odooshee diye diso. Esino yinosee

gibadeli odoo oso woomele poogoloso pee-goo habuguso.

13 Egeesee see ogoloso amameeye eyo egeesee gooleeso, 'Ayo ogoogo moodoolaiyo? A see mo holo ayo gooma diye dalaiso. Egeesee seega diayo o to mapoo mesilei malaiso,' diso.

14 Esino homolee gibadeli odoo oso homolee eyo amayo owoloye simi ogoloso dieso nediliyo egeesee takaga meleeso, 'Holo hagoso ama toga, amamo bi gilibo susuga ee yayo talaiso. Esiga yo wooloomaloso homolee hagee iyo tomo,' dee takaga meleeso.

15 Egeeseelone diayo holo egee homolee peegoo ido dilesos wooloomaso."

Yesuye to hagee taka koodobuloso badolone o to dulone debei odoo mapoo egeesee takaso, "Homolee eyo amameeye homolee gibadeli odoo mapoo ogoogo moodoolaiyo?

16 Yo sibilesos diba piligulosos see odoo dia tolosos o homolee gidebeeye dalaiso," diso.

Eseme odoo susuga Yesuwos to dulone debei osos egeesee takaso, "Goo hageesi osos peledabalai tekeponee," dee takaga meleeso.

17 Esino Yesuyes dimapoo bolones egeesee takaso, "Esino bei kasalame Godeeyos to booka mapoo hogugus osos egeesee ka takosomos?

'Mosos tegelis odosos omous gowoolones togobugus osos see mosos omu domos pupodoo ka molosos.'

18 Esiga odoo agayos omous omapoo takodee bugulosos homodobuogas, yos dala toowa talaisos. Osolosos omous osos odoo hee bulugus magoogas, odoo ee ebidi bigileisos," diso.

19 Eseme teis eligilis odoo sabolos osolosos teis mosos wiligis odoo tebisas sabolos osos Yesuyes wudus takas hagee gooleedolosos takolones, "Ibadas goos ees takos," dolosos, yos omapoo talames elis esiasos. Esino dibas odoo mooloogoodos toowa ogolosos Yesu talais ebigasos.

*Sisa mapoo tekisis molee tenelais goos*  
(*Mat 22:15-22; Maka 12:13-17*)

20 Egeesis mas kulodus teis eligilis odoo sabolos, osolosos teis mosos wiligis odoo tebisas sabolos osos Yesu wooloomalames elis esilones, diayos elis kwelis odoo abos diyes dolones egeesee takasos, "Nibas dilesos gamenees odoo tekepos masi silesibulones, yimapoo woosalis to osos woosamos silesibes. Egeesis mas kulodus Yesuyes neis to tokenees kasees takooagas, iyos yos tolosos gamalees wiligis odoo mapoo tenelaisyas," diso.

21 Eseme diayos Yesu mapoo dilesos to hodolones egeesee takasos, "Eligilis odoo, ibas gooleedosos, nayos eligis mas kulodus no hedebe tekepos goos onos eligilis. Osolosos no odoo sus mapoo koo egelis. Esino no teis Godeeyos goos onos ka eligimos sili.

22 Esiga Loum gamalees wiligis odoo Sisa mapoo tekisis molee tenelais tekepows, osos tokeneeyos?" diso.

23 Esino diayos Yesu yimapoo gameenees takalames sis gooleedolosos dimapoo egeesee takasos,

24 "Amapoo molee kos hee eligis," diso. Osolosos yayos molee kos tolosos tobudulones egeesee takasos, "Molee hamapoo agamos mudus sabolos osolosos agamos hus sabolos mololos?" diso.

25 Eseme diayos neis yimapoo egeesee takasos, "Sisayos mudus sabolos, osolosos osos hus sabolos osos kas molo," diso.

Eseme Yesuyes tobudulones dimapoo egeesee takasos, "Nibas Sisayos bis ees Sisa mapoo tenees, osolosos Godeeyos bis ees Godee mapoo tenees," diso.

26 Eseme diayos Yesuyes to neis tekepos takas dulosos diyas howoogadolones to abos takeles poogoosos. Egeesis mas kulodus Yesuyes odoo howos woolas to tokenees takelegas poogoome, diayos yos talais elis egeles poogoosos.

*Ta magas sees hogabilis eyos goos magas Yesu mapoo woosas*  
(*Mat 22:23-33; Maka 12:18-27*)

27 Osolosos Sedisis odoo abosos Yesuyes badebeis mapoo sibadeesos. Odoo hagees biasos takolones odoo wedias sees hogogabileimes delisos. Eseme diayos sibilesos Yesu mapoo egeesee takasos,



<sup>28</sup> “Eligili odoo, Moseseeye imapoo kokodo takolone egeesee hoguguso, ‘Gisoso sobo huloso holo soomagelega toga, see omoloye emei ta eyo osobo bau huloso emeiyo hu maga holo soolooga magee,’ diso.

<sup>29</sup> Esiga odoo heeso giso holo 7 sooma-gooso. Osoloso daga emeiye sobo huso. Osoloso yo holo soomagelega taso.

<sup>30</sup> Osoloso omoloye emei ta eyo osobo bau huso. Esino holo soomagelega taso.

<sup>31</sup> Osoloso omolo hee domo oso bau see huloso, holo soomagelega taso. Egeesee semelee ososee omolo dio 7 susuga holo soolooga magelega wediaso.

<sup>32</sup> Osoloso hamameedee sobo bau yinosee taso.

<sup>33</sup> Esiga odoo wedia maga see hogogadilei biame mapoo sobo egee tei odoo agamo osobo dalaisomo? Bei, giso 7 oso sobo hedebe hagee huso,” diso.

<sup>34</sup> Esino Yesuye to nei dimapoo egeesee takaso, “Epedee hagee do biame omapoo gisoso sobo huya, osoloso soboso giso obuo dolone ka doso.

<sup>35</sup> Esino Godeeye hesiga odoo oso wedia maga hogabuloso doga, diba see giso sabolo sobo sabolo huleime.

<sup>36</sup> Bei, diba Godeeyo momaiye masi dobolone see wedileime. Osoloso diba Godeeyo owolo dio doloso dabalaiso. Bei, diba wedia maga hogogadi goo oso ka eligiso.

<sup>37</sup> Esiga Moseseeye daga hoogoo ede-beeyo wedia maga hogogabilei goo ee o booka mapoo hoguguso. Bei, yayo homo du douso namolome, ogoloso goo ee hogugulone egeesee takaso, ‘Lodee yo Eibalaham, Aisek, osoloso Yekob dibada Godeeso,’ diso.

<sup>38</sup> Esiga Godee hagee wedia odoo dia Godeenee. Haye, odoo gie egee do dia Godee. Bei, Godeeyo howo woola odoo susuga gie doso.”

<sup>39</sup> Esemee tei eligili odoo abo oso Yesu mapoo nei egeesee takaso, “Eligili odoo, nayo egee takoo tekepo,” diso.

<sup>40</sup> Esemee ee ma kulodu odoo susuga oso see Yesu mapoo woosalai ebiaso.

*Keliso agamo owolowo?*

*(Mat 22:41-46; Maka 12:35-37)*

<sup>41</sup> Osoloso Yesuye see odoo susuga mapoo woosali to hagee takaso, “Bei kasi maga odoo aboso takolone Keliso ee Deibidiyo amawe dee ka takeliyo?”

<sup>42</sup> Esino Deibidi eyo Sam booka ma kulodu egeesee takaso,

‘Godeeye mo Lodee mapoo egeesee takaso:

No abolo wiligi doloso badalame mo dee deedee dokolo bie.

<sup>43</sup> Esiga nayo badolone namapoo ha teli odoo ee ayo dagadileiso.’

<sup>44</sup> Esiga Deibidiye Keliso o Lodee diso. Esino kasi maga Keliso ee Deibidiyo amawe dee ka takalaiyo?” diso.

*Yesuye tei eligili odoo eyo goo taka*

*(Mat 23:1-36; Maka 12:38-40)*

<sup>45</sup> Odoo susuga oso to dulone osee doboome, Yesuye o hamamee dili odoo mapoo egeesee takaso,

<sup>46</sup> “Niba obeeyamo! Niyo tei eligili odoo mapoo medee ege. Diba dugo medee tekepo megigaloso silesibiliso, osoloso bi neiso teli mi mapoo debeli odoo oso diba ogoloso gauwuloso emegei di to takooga ee dulei onosee diya goomegeliso. Osoloso diba howo gisili moso ma kulodu wiligi odoo taba eyo debi mapoo bulumulame, osoloso wo toowa nolone odoo hu toowa too oso bili mapoo bulumulame goomegeliso.

<sup>47</sup> Esino diayo sobo bauwe ebilame gamenee takoloso, dia moso sabolo bi sabolo diayo tolosa omapoo dobolone, dia goo gagaloso Godee mapoo taka diya sangeliso, odoo aboso diba tekepo odoo dee goolame. Esiga goo egeesi maga diba nei dala toowa talaiso.”

## 21

*Sobo bauso emegei di bi tenee*

*(Maka 12:41-44)*

<sup>1</sup> Yesu tei moso mapoo osee badolone egeino, bi bei odoo oso emegei di molee tooseli ki bi oso moodoo mapoo soomolome egeiso.

<sup>2</sup> Osoloso biame omapoo sobo bau bi mauwe oso molee ko ta bakadio tosilaleso toosoome egeiso.

<sup>3</sup> Esememe Yesuye goo hagee ogoloso egeese takaso, “Ayo nimapoo taka, sobo bau bi mauwe hagoso tenee oso bi bei odoo oso tenee ee dagadiso.

<sup>4</sup> Bei, bi bei odoo dia molee toowa osee molome molee su pepooko teneeso. Esino sobo bau bi mauwe hagee yimapoo molee ko esiesibo meleeno teneeso. Esiga yo wo talai molee olo mauwe,” diso.

*Yesuye tei moso guobigilei goo sabolo osoloso mi hoo poogoo mapoo gooso peledabalai goo ee taka*

*(Mat 24:1-14; Maka 13:1-13)*

<sup>5</sup> Biame omapoo odoo aboso tei moso yo tekeposo tegei sabolo osoloso odoo susuga oso Godee mapoo tenee bi tei moso ma kulodu ma molome ogoloso tekepo dee takaga meleeso. Esino Yesuye diayo takaga melee to ee duloso dimapoo egeese takaso,

<sup>6</sup> “Niyo epedee moso sabolo osoloso bi sabolo ogoloso tekepo dee takemeni, ee hamamee guobigileiso. Egeesi ma kulodu yo heeso hee ma tobudoo malaima. Esino moso guobuguga, yo susuga oso mi mapoo misigeduboloso molo agalaiso,” diso.

<sup>7</sup> Esememe odoo aboso yimapoo egeese takaso, “Eligili odoo, goo hagee kopolone ka peledabalaiyo? Osoloso goo hagoso peledabalame mologa, ogo gooso imapoo ka eligileiyo?” diso.

<sup>8</sup> Esino Yesuye see dimapoo egeese takaso, “Niba obeeyamo! Odoo heeso niba tei goo maga see peegoo gilimado diyaga. Bei, odoo aboso sibilesi gamenee takolone ayo diba diye di, dee takolone dieso nediliyo diba Kelisoso dalaiso. Egeeseelone diayo takolone Godeeyo biame olo simiso dee takooga, dia to duloso omapoo tei na te.

<sup>9</sup> Esiga ha too goo sabolo osoloso galali goo sabolo oso peledoboomo duga, duloso niba haga na ebi. Bei, goo hageesi oso malalo peledabalaiso. Esino ee ma kulodu biame hamameede saga sibileime.”

<sup>10</sup> Osoloso Yesuye see tobu dimapoo egeese takaso, “Mi toowa heeso mi toowa hee mapoo ha talaiso.

<sup>11</sup> Osoloso biame omapoo mi abo mapoo mibia toowa sibileiso, osoloso hodia goo sibileiso. Osoloso paiye opusomo opusomo di oso mi abo mapoo sibileiso. Egeese semelee mapoo goo opusomo di oso kei ma dokodoo peledaba ogoloso odoo susuga oso diya ebigileiso.

<sup>12</sup> Esino goo hagoso epedee peledabega mologa, niyo mo goo maga dala toowa talaiso. Egeesi ma kulodu odoo susuga oso nibada goo midilame dibada howo gisili moso mapoo ido polo dolone dabalaiso. Osoloso diayo niba neliga moso mapoo huyaso dolone dabalaiso. Osoloso see diayo mo goo maga niba gamalee wiligi odoo toowa tebisa mapoo gilimado peleso nibada goo midileiso.

<sup>13</sup> Esino domo egee niyo mo goo ee dimapoo yilige bigilei biame tekepo ogoso.

<sup>14</sup> Esiga niba goo medee goolee. Bei, odoo susuga oso niba goo midilei mapoo ido duga, niyo to takalai goo mapoo haga na koude.

<sup>15</sup> Bei, domo omapoo ayo nimapoo goo goolee tekepo sabolo osoloso to tekepo takalai goo sabolo tenelaiso, nimapoo goweli odoo oso nibada to ee duloso to nei takelega pagalame.

<sup>16</sup> Osoloso biame omapoo nibada ama dio sabolo, osoloso noowee dio sabolo, osoloso nemei dio sabolo, osoloso nomolo dio sabolo, osoloso nee sooso sabolo, osoloso nemegei odoo sabolo oso nimapoo dala teneli odoo mapoo tiasalaiso. Osoloso diayo nima kulodu odoo abo piligileiso.

<sup>17</sup> Esiga odoo susuga oso mo goo maga nimapoo heiga toowa malaiso.

<sup>18</sup> Esino goo hagoso niba Godee maga pileime.

<sup>19</sup> Esiga medee kibiya debbe. Niba kibiya dogo, gie badeli talaiso.”

*Yesuye Yelusalem mi oso tokenee palai goo ee taka*

*(Mat 24:15-21; Maka 13:14-19)*

<sup>20</sup> “Esiga niba Yelusalem mi ee ha teli odoo oso moso silodoboloso tebisamelee

ogoga, Yelusalem mi ee olo tokenee palame ka seeso doloso ogoloso niba gooleedalaiso.

<sup>21</sup> Egeeseega biame omapoo Yudiya mi mapoo debeli niba mubi dokodoo kukulo pele. Osoloso edebeeyo biame omapoo Yelusalem mi ma kulodu osee dogo, diba onosee saga kukulo di. Osoloso odo agayo biame omapoo Yelusalem mi pee-goo dogo, diba mi ee ma kulodu na gadi.

<sup>22</sup> Bei, biame omapoo Godeeyo to booka mapoo hogugu goo sabolo tobulone, nei dala tenelame ka selai.

<sup>23</sup> Osoloso biame omapoo sobo koowasi sabolo osoloso holope too nedili sobo oso dala toowa agalaiso. Bei, biame omapoo Godeeyo kamana goo oso siboga, goohele toowa sabolo osoloso dala toowa sabolo mi hamapoo sibileiso.

<sup>24</sup> Ee ma kulodu odo abo ee ha teli odo oso kaiyaso piligileiso. Osoloso odo abo ee tiso tegisaloso tou nei mauwe talame mi abo mapoo iyado du dolone dabalaiso. Osoloso biame omapoo Yelusalem ee Yu odoonee oso gagalabuguloso homoso abalaiso. Diba osee tebisa mologa, di-ayo goo egeesee semelee oso hoo pagalai Godeeye biame ee tenelaiso.”

*Odoo Holo oso sibilei goo*  
(Mat 24:29-35; Maka 13:24-31)

<sup>25</sup> “Esiga goo opusomo di oso osoko mapoo, osoloso a mapoo, osoloso giwo mapoo peledabalaiso. Osoloso mi toowa hamapoo abei maga howo ki toowa oso goowa duleiso. Egeeseega odoosusuga oso dimapoo ogoo goo oso peledaba beleso obulone goo tiadalaiso.

<sup>26</sup> Osoloso kei ma dokodoo kitulugu bi egee molo ee Godeeye halabigileiso. Egeeseega odo susuga oso dimapoo ogoo goo oso peledaba beleso obugulone hoowama dalaiso.

<sup>27</sup> Esiga biame omapoo Odoo Holo ayo kitulugu sabolo osoloso ayo toowa doloso badeli goo omaga mo gadeebugu sabolo osoloso kolobo sabolo siboga agalaiso.

<sup>28</sup> Esiga niba goo susuga hagoso bei mooloogoo ogoga, ebilega toboloso bolone

ka debee. Bei, Godeeye niba gilimado dilei biame ee koola toobooso.”

*Sogai maga wudu taka*  
(Mat 24:32-35; Maka 13:28-31)

<sup>29</sup> Yesuye see goo hamapoo wudu taka hamaga egeese takaso, “Niba sogai ogoloso homo abo mapoo egege.

<sup>30</sup> Sogai du pisigaga ogoloso, wau biame koola tooboo doloso gooleedeliso.

<sup>31</sup> Esiga hagonosee egeesi masi moloso. Niba goo ayo taka hagoso peledaba ogoga, Godeeye wiligi doloso badeli goo oso sibilei koola tooboo doloso gooleedalaiso.

<sup>32</sup> Ayo nimapoo taka, odo biame omapoo dabalai ee osee dogo, goo susuga hagoso peledabalaiso.

<sup>33</sup> Esiga kei sabolo osoloso mi toowa sabolo mauwe pagalaiso. Esino mo to ee mauwe pagalaime.”

*Niso nediliyo medee be*

<sup>34</sup> “Esiga niba niso nediliyo medee be. Osoloso niba wo sabolo howo sabolo nolone dobolone mi toowa eyo goo mapoo haga na goolee. Bei, ti gama mapoo beso gaduga, tiso be egee bagagooga egee dio du egeesi masi ayo sibilei biame oso nimapoo dio di egeesi masi tenelai malaiso.

<sup>35</sup> Bei, biame ogoso odo susuga mi toowa hamapoo egee do mapoo sibileiso.

<sup>36</sup> Esiga niba niso nediliyo medee bolone Godee mapoo takolone ka debee, niba biame oso peledabalai ee ma kuloduga kitulugu sabolo peegoo ka gadilame. Osoloso Odoo Holo mo mudugiyopoo kitulugu sabolo dabalame.”

<sup>37</sup> Yesu biame susuga Yu odoowo tei moso mapoo peleso odo susuga mapoo Godeeyo to eligimeleso koodobuloso, see tilame gesi Olipi mubi mapoo polo demeleeso.

<sup>38</sup> Esemee odo susuga oso Yesuye eligi goo ee dulame gesikolodee tei moso mapoo sibilesi mooloogoo deliso.

## 22

*Yudaseeye Yesu wiligi odoo tebisa mapoo tiasalame to magoo*

*(Mat 26:14-16; Maka 14:10-11)*

<sup>1</sup> Isipi mi maga peegoo di ee gooleebugu wo nalai biame ee koola tabaso. Wo nali hagee Yu odooso takolone Godeeye gababia wo nali deliso.

<sup>2</sup> Biame omapoo tei moso wiligi odoo tebisa sabolo osoloso tei eligili odoo sabolo oso odoo mooloogoodoo toowa ogoloso obugulone, mada Yesu wooloomalame eli esiaso.

<sup>3</sup> Biame omapoo Saitenso Yudas-Iskaliyot eyo kulodu gapalaso. Yudas hagee Yesuwo hamamee dili odoo 12 ma kulodu odoo hee yoso.

<sup>4</sup> Esiga Yudaseeye tei moso wiligi odoo tebisa sabolo osoloso tei moso pee mapoo gidebeli dia wiligi odoo tebisa mapoo dileso, yayo Yesu toloso dimapoo tenelame dibolo to mouso.

<sup>5</sup> Esem diayo goo hagee duloso tekepo doloso goomogolone Yudas mapoo molee tenelame takaso.

<sup>6</sup> Esem Yudaseeye yibolosee goo hamapoo tekepo dolone mada Yesu toloso dimapoo tenelame eli esiaso.

*Godeeye gababia wo nalame mopoodoo doo*

*(Mat 26:17-25; Maka 14:12-21; Yon 13:21-30)*

<sup>7</sup> Isipi mi maga peegoo di gooleebugu wo ne bei mooloogoo biame mapoo, Yu odooso Godeeye gababia wo nalame, sipi be hu weliso.

<sup>8</sup> Esem Yesuye see Pita dio Yonee dio mapoo egeese takaso, “Niba dileso iyo gababia wo nalai ee mopoodoo dalame di,” diso.

<sup>9</sup> Esem diayo nei yimapoo egeese takaso, “Iyo kamapoo dileso wo nalai ee ka mopoodoo dalaiyo?” diso.

<sup>10-11</sup> Esem Yesuye dimapoo nei egeese takaso, “Niba Yelusalem mapoo gadi. Niba omapoo gadilesu ogoga, odoo hee howo keedoloso dumologa tugodalaiso. Niba yo tugodoloso yo deede di. Niba yayo dileso moso kulodu gaduga omapoo dobolone, mosowo ama mapoo egeese takee, ‘Eligili

odoo oso o hamamee dili odoo sabolo Godeeye gababia wo nalai debi ee kaso?” dee takee.

<sup>12</sup> Egeeseega yayo moso dokohodoo debi pooba toowa nimapoo eligileiso. Egeeseega niba iyo Godeeye gababia wo nalai omapoo ka mopoodoo de,” diso.

<sup>13</sup> Esem Pita dio Yonee dio to hagee duloso dileso egeino, goo susuga ee Yesuye taka goo sabolo tobuloso molome egeiso. Esem diba gababia wo nalame omapoo mopoodoo dooso.

*Lodee gooleebugu wo ne*

*(Mat 26:26-29; Maka 14:22-25; 1Kol 11:23-25)*

<sup>14</sup> Esem diayo wo nalai biame ee sibume, Yesuye o hamamee dili odoo sabolo wo nalame bulumaso.

<sup>15</sup> Yesu badolone o hamamee dili odoo mapoo egeese takaso, “A goomoga toowa sabolo badebeiso, ayo dala ma kulodu gadilega badolone, ayo nibolo Godeeye gababia wo nalai.

<sup>16</sup> Bei, ayo nimapoo taka, ayo Godeeye gababia wo nali hagee hamamee see saga nalaimo. Esino Godeeye wiligi doloso badeli mi oso sibulone wo nali hageeyo goo bei woola yilige buguga, ayo wo nali hagee see nalaiso,” diso.

<sup>17</sup> Esem Yesuye kapu wain i keeso toloso Godee mapoo goomoga takoloso koodobuloso dimapoo tenelone egeese takaso, “Niba kapu wain i keeso toloso odoo heeso naloso koodobuuga see odoo hee mapoo ka tenee domo di.

<sup>18</sup> Bei, ayo nimapoo taka, a epedee wain i naloso hamamee see wain i saga nalaimo. Esino Godeeye wiligi doloso badeli mi oso siboga, ayo see wain i ee nalaiso,” diso.

<sup>19</sup> Yesu see wo toloso Godee mapoo goomoga takoloso wo popeiso. Osoloso o hamamee dili odoo mapoo pulone egeese takaso, “Hagee mo suso, niba halo ka teneeso. Esiga niba a goolee sabolo dobolone wo hagee nolone ka debee,” diso.

<sup>20</sup> Diba wo naloso koodobuloso Yesu see kapu wain i keeso toloso Godee mapoo goomoga takaso. Osoloso o hamamee



dili odoo mapoo tenelone egeesee takaso, “Kapu wain i keesoo hagee Godeeye mo sawo maga to kitulugu magoo dia hagoso. Mo sawo hagoso niba halo ka sologo buguso.

<sup>21</sup> Esino niba ege. A ha teli odoo mapoo tiasalai odoo ee mooloogoodoo hageeyo kulodu abolo badolone wo namoloso.

<sup>22</sup> Esiga Godeeye to magoo ee dodolone Odoo Holo a talaiso. Esino Odoo Holo a ha teli odoo mapoo tiaseli odoo yo, ye-ee! Bei, odoo yo dala talaiso.”

<sup>23</sup> Esem e o hamamee dili oso to hagee duloso dieso nediliyo dima kulodu egeesee takaga meleeso, “Agayo ima kulodu goo hageesi ka moodolaiyo?” diso.

*Toowa doloso badalai goo maga wegiga*

<sup>24</sup> Esem e Yesu o hamamee dili odoo oso dieso nediliyo dima kulodu odoo agayo toowa ka badosomo doloso wegigas.

<sup>25</sup> Osoloso Yesuye goo hagee ogoloso dimapoo egeesee takaso, “Yu odoonee dia wiligi odoo tebisa oso dima hemi debeli odoo ee diayo diya kitulugu sabolo gidebeliso. Esino diba dieso nediliyo odoo susuga mapoo takolone diba odoo susuga eyo odoo deliso.

<sup>26</sup> Esino niba nima kulodu egeesee selai tekeponee. Esiga nima kulodu odoo agayo toowa ka badosomo? Yo daga malalo eyo nediliyo pepooko doloso badebee. Osoloso nima kulodu odoo agayo gibadeli odoo masi ka badosomo? Yo tou teli odoo masi mesie sabolo tou tolone ka badebee.

<sup>27</sup> Niba medee goolee, wo nalame badeli odoo sabolo wo pili odoo sabolo dima kulodu, odoo agayo toowa doloso ka badosomo? Odoo ee badolone wo nalame badeli oso toowa doloso ka badoso. Esino nima kulodu a wo pili odoo masi badoso.

<sup>28</sup> Niba ayo hegi goo ee ma kulodu sileeme, a koo poogoo dili.

<sup>29</sup> Esiga mo Mameeye o odoo gibadame kitulugu amapoo tenee egeesi ayo nimapoo tenelaiso.

<sup>30</sup> Esiga ayo wiligi doloso badeli mi oso siboga, ee ma kulodu niba abolo hodobo

dobolone wo nalaiso. Osoloso niyo wiligi odoo oso debeli debi mapoo dobolone Isalael odoowo bala 12 ee gidobolone dia goo ee midileiso,” diso.

*Pitaye Yesu boobado bigilei goo ee Yesuye taka*

(*Mat 26:31-35; Maka 14:27-31; Yon 13:36-38*)

<sup>31</sup> Yesu badolone Saimon-Pita mapoo egeesee takaso, “Saimon, Saimon, Saitenso niba tei kibiya beleso kukulo agalame Godee mapoo woosome, Godeeye yimapoo kitulugu olo teneeso, yayo egeesee moodoolame.

<sup>32</sup> Esino ayo no halo Godee mapoo dokodoo olo takaso, nayo tei too peegeeyaga. Osoloso nayo amapoo see wedi simi biame mapoo, mo hamamee dili odoo hagee bia oso tei too ma kulodu kibiya dabalame nayo diba pidi,” diso.

<sup>33</sup> Esem e Pitaye nei yimapoo egeesee takaso, “Lodee, a nobolo neliga moso ma kulodu osoloso teli mapoo dilei mopoodoo doloso ka siloso,” diso.

<sup>34</sup> Esem e Yesuye Pita mapoo nei egeesee takaso, “Pita, ayo namapoo taka, epei gesi kolokolo takelega mologa, nayo a gooleedele doloso puodalai ee bakadio hedebe dalaiso,” diso.

<sup>35</sup> Yesuye see o hamamee dili odoo mapoo egeesee takaso, “Ayo daga niyo to tekepo takomo silesibilame diye dolone molee sabolo, osoloso o sabolo, osoloso kali bi abo sabolo toloso na di diso. Esino niba ee ma kulodu silesibilone, hegi goo abo egeisomo?” diso.

Esem e diayo nei egeesee takaso, “Haye, egele,” diso.

<sup>36</sup> Esem e Yesuye see dimapoo egeesee takaso, “Epedee hamapoo nimapoo molee sabolo o sabolo mologa, ee toloso di. Osoloso nimapoo kaiya mauwe daga, nibada kekeisu dugo odoo hee mapoo teneloso nei molee toloso kaiya te.

<sup>37</sup> Bei, Godeeyo to booka mapoo hogugu oso egeesee takooso, ‘Edebeeyo yo mesiya masi wooloomalaiso,’ diso. Esiga Godeeyo

to booka mapoo hogugu oso taka goo oso amapoo peledabalaiso. O, tei takoo, Godeeyo to booka mapoo hogugu oso mo goo maga taka goo susuga oso peledabalame siboso,” diso.

<sup>38</sup> Esemé o hamamee dili odoo oso yimapoo egeesee takaso, “Lodee, no ege. Iba kaiya bakadio moloso,” diso.

Esemé Yesuye dimapoo egeesee takaso, “Bige oso,” diso.

*Yesuye Olipi mubi mapoo badolone Godee mapoo taka*

*(Mat 26:36-46; Maka 14:32-42)*

<sup>39</sup> Yesu goo eyo moodeli egeesee moodoolone Yelusalem maga peegoo dilesó Olipi mubi mapoo palaso. Esemé o hamamee dili odoo yibolo diyadeeso.

<sup>40</sup> Osoloso diba dilesó omapoo dobolone, Yesuye dimapoo egeesee takaso, “Niba Godee mapoo takolone ka debee, goo tokenee mapoo gido duga homodobiyaga.”

<sup>41</sup> Yesu egeesee takoloso dimaga pepooko hoogoo dilesó ebiso miyomoo tugalaloso Godee mapoo takemeleeso.

<sup>42</sup> Yesuye Godee mapoo takolone egeesee takaso, “Ma, no goomogoga, amapoo dala hagee sibo peegoo magee. Esino no goomoga goo ee te, ayo goomoga goo ee na te,” diso.

<sup>43</sup> Esemé Godeeyo momaiye oso Kei mi ma dokodooga sibilesó yo pidilone kitulugu teneeso.

<sup>44</sup> Egeesi ma kulodu Yesu dala talame hegi goo oso sibume, yo sooloo habasaga toowa sabolo Godee mapoo diya takaso. Esemé o debiaso sawo masi mi mapoo salagadibaso.

<sup>45</sup> Osoloso yo Godee mapoo taka koodobuloso dilesó egeino, o hamamee dili odoo goo halagamelesó tiesamolome egeiso.

<sup>46</sup> Esemé Yesuye dimapoo egeesee takaso, “Niba kaseega ka tiesamalala? Niba hogogabuloso Godee mapoo takolone ka debee, goo tokenee mapoo gido duga homodobiyaga,” diso.

*Odoo susuga oso Yesu wooloomalame ido di*

*(Mat 26:47-56; Maka 14:43-50; Yon 18:3-11)*

<sup>47</sup> Yesu o hamamee dili odoo sabolo to osee komolome, o hamamee dili odoo hee Yudaseeye odoo mooloogoodoo gili-madoloso sibilesó omapoo peledabaso. Esemé Yudaseeye Yesu adalame simiso.

<sup>48</sup> Esino Yesuye yimapoo egeesee takaso, “Yudas, nayo Odoo Holo a ada sabolo ha teli odoo mapoo tiasalame ka sala?” diso.

<sup>49</sup> Esemé Yesu o hamamee dili odoo diayo odoo susuga oso Yesu talame simi ogoloso egeesee takaso, “Lodee, iyo kaiyaso ka biligileiyo?” diso.

<sup>50</sup> Egeeseeme Yesu o hamamee dili odoo heeso tei moso wiligi odoo taba eyo tou teli odoo hee kaiyaso o dulu deedeé dokolo ee kobuguso.

<sup>51</sup> Esino Yesuye o hamamee dili odoo mapoo egeesee takaso, “Omapoo koodobie! Goo egeesee na moodee!” diso. Osoloso Yesuye odoo o dulu mapoo sigime see tekepo paso.

<sup>52</sup> Yesu yo omapoo tobudulone yo talame sibadee, tei moso wiligi odoo tebisa sabolo, tei moso pee maga gidebeli dia wiligi odoo tebisa sabolo, Yu odoowo wiligi odoo tebisa sabolo mapoo egeesee takaso, “Niyo ogoga a mesiya daga a talame, kaiya sabolo wei sabolo toloso ka sibadeeyo?”

<sup>53</sup> Esino niba ayo biame susuga tei moso ma kulodu eligimo sili egeliso. Esino niyo kaseme a omapoo badoboome telega ka poogoowo? Esino epedee hamapoo nibada biame oso olo siboso. Bei, epedee hagee neliga wiligi odoo taba Saiteneeyo biameso,” diso.

*Pitaye Yesuwo goo puodoo*

*(Mat 26:69-75; Maka 14:66-72; Yon 18:15-18, 25-27)*

<sup>54</sup> Osoloso odoo susuga oso Yesu toloso tei moso wiligi odoo taba eyo mosopoo ido diso. Esemé Pitaye hamameedee toboloso deedeé diso.

<sup>55</sup> Yo deedeé dilesó, odoo susuga oso moso pee beele ma kulodu dou tooloso dou halagamolome, yo dibolo hodobo omapoo badolone dou hameleeso.

<sup>56</sup> Pita omapoo dou holone badoboome, sobo obuo omapoo tou teli oso sibilesó Pita mapoo medee bolone egeesee takaso, “Odoo hagee Yesubolo sili hee yoso,” diso.

<sup>57</sup> Esino Pitaye nei egeesee takaso, “Sobo, odo egee a gooleedele,” diso.

<sup>58</sup> Osoloso see hamamee odo heeso sibilesi yo ogoloso yimapoo egeesee takaso, “No Yesubolo sili odo hee noso,” diso.

Eseme Pitaye nei egeesee takaso, “Giso, asonee,” diso.

<sup>59</sup> Osoloso osoko howo hedebe poogoloso hamamee odo heeso sibilesi to kitulugu sabolo egeesee takaso, “Tei takoo, odo hagee Yesubolo sili hee yoso. Bei, yinosee Gelili odooso,” diso.

<sup>60</sup> Eseme Pitaye nei egeesee takaso, “Giso, nayo egee takoo goo ee tei a gooleedele,” diso. Pita to osee komolome, kolokolo takaso.

<sup>61</sup> Eseme Lodeeye hamameegoo bidi toboloso Pita mapoo bameleeso. Eseme biame omapoo Yesuye taka to hagee Pitaye gooleebuguso, “No epei gesi kolokolo takelega mologa nayo a gooleedele doloso puodalai ee bakadio hedebe dalaiso,” diso.

<sup>62</sup> Egeeseelone yo to hagee gooleebuguloso diya goheleme peegoo gadilesi pisaso.

*Yesu wiligi odo tebisa oso to mou mapoo ido pala*

*(Mat 26:59-68; Maka 14:55-65; Yon 18:19-24)*

<sup>63</sup> Eseme Yesu yo gidebeli odo oso yo manolone toloso weiso.

<sup>64</sup> Osoloso diayo o howo dugoso gagaloso wooloso egeesee takaso, “Imapoo takee, no odo agayo wala?” dee takaso.

<sup>65</sup> Egeeseelone to tokenee abo sabolo yimapoo takaso.

<sup>66</sup> Osoloso mi hadobume gesikolodee Yu odoowo wiligi odo tebisa sabolo, osoloso tei moso wiligi odo tebisa sabolo, osoloso tei eligili odo sabolo hodobo mooloogoodoso. Osoloso diayo to moulone debei mapoo Yesu ido palaso.

<sup>67</sup> Eseme diayo dobolone Yesu mapoo egeesee takaso, “Nayo imapoo takee, no tei Godeeye hudi magoo Keliso nosomo?” diso.

Eseme Yesuye dimapoo nei egeesee takaso, “Ayo nimapoo takooga, niyo ayo taka goo mapoo tei talaima.

<sup>68</sup> Ayo nimapoo woosaga, niyo amapoo to eyo nei takalaima.

<sup>69</sup> Esino epedee biame hamaga Odo Holo a Godee kitulugu eyo dee deede dokolo mapoo yibolo wiligi doloso badalame bileiso,” diso.

<sup>70</sup> Eseme odo susuga oso yimapoo egeesee takaso, “Esiga no tei Godeeyo owolowo?” diso.

Eseme Yesuye nei dimapoo egeesee takaso, “Niyo a Godeeyo owolo dee egee takoo ee tei goo takoo,” diso.

<sup>71</sup> Eseme diayo egeesee takaso, “Esiga iba o goo midilei maga to abo dulei koo goomogo. Bei, yo eyo o goo ee olo yebugulone yo Godeeyo owolo diso. Esiga yo wooloomalai tekepo,” diso.

## 23

*Yesu yo Paillet sabolo osoloso Helodee mapoo ido di*

*(Mat 27:1-2, 11-26; Maka 15:1-15; Yon 18:28-19:16)*

<sup>1</sup> Osoloso wiligi odo tebisa mooloogoodoo oso tebisaloso Yesu Paillet mapoo ido diso.

<sup>2</sup> Diayo dileso Paillet mapoo Yesuwo goo maga takolone egeesee takaso, “Odo hagoso ibada odo eli tokenee mapoo gilimado di ogoloso ka too. Bei, yayo ibada odo oso Sisa mapoo tekisi molee misigeli hamaga takoloso see eyo nediliyo yo wiligi odo Keliso dee takemeleeso,” diso.

<sup>3</sup> Eseme Pailleteeye Yesu mapoo egeesee takaso, “No tei Yu odo dia wiligi odoowo?” diso.

Eseme Yesuye nei egeesee takaso, “O, nayo olo egee takooso,” diso.

<sup>4</sup> Osoloso Pailleteeye Yu odoowo tei moso wiligi odo tebisa sabolo osoloso odo abo omapoo mooloogoodoloso debei mapoo egeesee takaso, “Ayo yo talaino yimapoo goo tokenee hee koo ogo,” diso.

<sup>5</sup> Esino diba goo egee pagalai gowoolone to kitulugu sabolo egeesee takaso, “Edebeeyo Loum gamalee mapoo kamanalame, yayo Yudiya mi toowa mapoo silone odo goo tiadili goo ee eligimo siliso. Osoloso yayo goo hagee Gelili mi

maga bei mooloogooloso see hamapoo sibilesa ka eligimo siloso,” diso.

<sup>6</sup> Osoloso Pailleteeye goo hagee duloso, Yesu tei Gelili odoo beleso odoo mapoo woosaso.

<sup>7</sup> Egeesi ma kulodu yayo Yesu tei Gelili odoo dee taka goo ee duloso, Yesu Helodee mapoo ido di diso. Bei, Helodeeye Gelili mi mapoo wiligi odoo toboloso ka badebei. Biame omapoo Helodee Yelusalem mapoo sibilesa badebeiso.

<sup>8</sup> Ee ma kulodu Helodeeye Yesu ogoloso diya goomogaso. Bei, yo Yesuwo goo epedee eiyo dumelega, yo agalai goomegeli. Osoloso Yesuye goo opusomo di o mudugiyo moodoolame diya goomogaso.

<sup>9</sup> Esem Helodeeye Yesu mapoo woosali to bei woosagaso. Esino ee ma kulodu Yesuye yimapoo to nei hee takele.

<sup>10</sup> Osoloso biame omapoo tei moso wiligi odoo tebisa sabolo osoloso tei eligili odoo tebisa sabolo oso to kitulugu sabolo takolone Yesu mapoo gigidiso.

<sup>11</sup> Esem Helodeeye o odoo sabolo Yesu manolone wiligi odooso kali dugo kadiso. Osoloso yo Paillet mapoo see ido di diso.

<sup>12</sup> Biame domo omapoo Paillet dio Helodee dio emegei diso. Esino daga debei ee ma kulodu dieso nediliyo nei heigo nei heigo dolone debeiso.

<sup>13</sup> Esem Yesu Paillet mapoo see ido di ogoloso, Pailleteeye tei moso wiligi odoo tebisa sabolo osoloso Yu odoowo wiligi odoo tebisa sabolo osoloso odoo susuga gilimadoloso egeese takaso,

<sup>14</sup> “Niyo odoo hagosu Yu odoo oso Loum gamalee mapoo kamanalame, odoo goo tiadili goo ee eligimo silo doloso, amapoo ka ido simi. Esino ayo nibada mudugiyo o goo midino, yimapoo goo tokenee hee molo egele.

<sup>15</sup> Osoloso Helodee nose Yesu mapoo goo tokenee hee molo egele. Egeeseeme yayo yo see imapoo ido sibe dee takaso. Esiga niso ogoso, odoo hagee wooloomalai yimapoo goo tokenee hee mauwe.

<sup>16</sup> Esiga ayo yo wulo woomele poogoloso diye dalaiso.”

[

<sup>17</sup> Esino Pailleteeye Yu odoo oso goomogalame diayo Godeeye gababia wo nali biame mapoo odoo hee neliga moso ma kuloduga peegoo diye deliso.]

<sup>18</sup> Osoloso odoo susuga oso to neligidi egeese takaso, “Yesu wooloomolone, nei Balabas neliga moso ma kuloduga peegoo diye dee!” dee takaga meleeso.

<sup>19</sup> Balabas hagosu daga Loum gamalee mapoo ha temeleso odoo hee woolomaso. Egeeseega yo neliga moso ma kulodu husooso.

<sup>20</sup> Pailleteeye Yesu peegoo tamagalame diya goomogolone, see tobu odoo mooloogoodoo mapoo woosaso.

<sup>21</sup> Esino odoo susuga oso to neligidi yimapoo nei egeese takaso, “Yo homo bulubo magoo ma dokodoo yoguso enige! Yo homo bulubo magoo ma dokodoo yoguso enige!” dee takaga meleeso.

<sup>22</sup> Esem Pailleteeye see tobu odoo mooloogoodoo mapoo egeese takaso, “Bei, niyo kasalame yo wooloomalame ka sala? Yayo goo tokenee kasee toowo? Ayo o goo midi mapoo ayo yo wooloomalame ido dino, yimapoo goo tokenee hee molo egele. Esiga ayo yo wulo woomele poogoloso diye dalaiso,” diso.

<sup>23</sup> Esino odoo susuga oso toso neligidi diya takaso, “Yesu homo bulubo magoo ma dokodoo yoguso enige!” dee takaga meleeso. Diayo egeese takemelee Paillet to ee dulei diya gowoolone, bige dimapoo deedebeegee diso.

<sup>24</sup> Egeeseeme yayo dia to duloso odoo susuga oso goomoga goo ee tooso.

<sup>25</sup> Esiga Pailleteeye Loum gamalee mapoo ha tolone odoo wooloomali Balabas ono neliga moso ma kuloduga peegoo diye diso. Esino Yesu homo bulubo magoo ma dokodoo talame yayo yo odoo susuga mapoo teneeso.

*Yesu homo bulubo magoo ma dokodoo yoguso eniga*

*(Mat 27:32-44; Maka 15:21-32; Yon 19:17-27)*

<sup>26</sup> Osoloso ha teli odoo oso Yesu toloso mi ee ma kuloduga peegoo ido dumolome, Kulene odoo Saimon Yelusalem mi mapoo



dumolome eli domopoo tugodooso. Osoloso diayo homo bulubo magoo toloso see o ei mapoo imeduloso Yesu ma hamamee diye diso. <sup>27</sup> Osoloso biame omapoo, Yesu toloso diyadaga molome odoosusuga hamamee diyadeeso. Osoloso ee ma kulodu sobo abo sabolo dulone Yesu halo goholone hamamee dulone pupusigamo diyadeeso.

<sup>28</sup> Esemes Yesuye bidi toboloso dimapoo bolone egeesee takaso, “Yelusalem sobo, niba a halo haga na pupusige. Esino niso nediliyo osoloso nibada holo halo ka pupusige.

<sup>29</sup> Bei, dala biame oso siboga, edebeeyo egeesee takagalaiso, ‘Sobo deme taba nibolo osoloso sobo holo soomagoloso too koo nedili niba diya goomege.’

<sup>30</sup> Bei, biame egeesi oso peledaba omapoo edebeeyo egeesee takagalaiso, ‘Mubi sabolo osoloso esia niyo goodobuloso iba toogoode!’ dee takalaiso.

<sup>31</sup> Esiga goo hageesi oso homo su gie mapoo peledobooga, see ogoosoo oso homo su sia mapoo ka peledabalaisomo?” diso.\*

<sup>32</sup> Osoloso biame omapoo ha teli odoosoo oso Yesu ido dulone, mesiya bakadio homo bulubo magoo ma dokodoo wooloomalame ido diso.

<sup>33</sup> Diba sibilesomubi hee, eyo hu Wiligi ki mi deli mapoo, Yesu homo bulubo magoo ma dokodoo yoguso enigaloso tuluguso. Osoloso mesiya bakadio onosee homo bulubo magoo mapoo yoguso enigaloso, odoosoo hee Yesuwo deedeedokolo tulugu, osoloso hee dobusu dokolo tulugu diso.

<sup>34</sup> Osoloso Yesuye homo bulubo magoo ma dokodoo telega molone egeesee takaso, “Ma, odoosoo hageebia oso gootokenee amapoo egee moodoo ee nayo hapoloso boobadobigi. Bei, diayo gooegee moodoo eyobei diba gooleedele,” diso. Osoloso ha teli odoosoo oso Yesuwo dugotalame diayo yopepusoo odoosoo hu ma ee kobuso.

<sup>35</sup> Odoosoo susuga oso peegooga tebisamolone balaga molome, Yu odoosoo wiligi odoosoo tebisa oso manolone egeesee takagameleeso, “Yayo odoosoo abo pidimosiliso. Esiga yotei Godeeye hudi magoo Keliso oso daga, o su eyo nediliyo pidileitekepo,” deetakagameleeso.

<sup>36</sup> Osoloso ha teli odoosoo sabolo oso Yesu manolone, wain i mei nali keesoloso Yesuye nalame tenelone yimapoo egeesee takaso,

<sup>37</sup> “No medee tei Yu odoosoo diawiligi odoosoo tabadaga, no telega pagalame, no nediliyopidi,” diso.

<sup>38</sup> Yesu o wiligi oopogoo dokodooga to hageesee hoguguloso kalamaso, “Odoosoo hagee Yu odoosoo diawiligi odoosoo taba.”

<sup>39</sup> Mesiya hee Yesuwo hodiokooga eniga oso Yesu mapoo tokeneesisilone yimapoo egeesee takaso, “No medee tei Keliso daga, nee su no nediliyopidilone, ibanoseepidi,” diso.

<sup>40</sup> Esino mesiya hee oso o odoosoo to su maga to kitulugu sabolo egeesee takaso, “No Godeebolokoo obudo? Bei, yayo dala egeeto, no nosee dala hedebeegeesi toso.

<sup>41</sup> Esiga iba asalo ibadatokeneeyo nei maga ka wodioso. Esino Yesu mapoo tokenee hee mauwe,” diso.

<sup>42</sup> Osoloso yayo see Yesu mapoo egeesee takaso, “Yesu, nayo wiligidolosobadebeimapoo, nayo a gooleebigi,” diso.

<sup>43</sup> Esemes Yesu nei yimapoo egeesee takaso, “Ayo namapoo tei gootaka, esiga epei no abolo hodobo goomogami Paladais mapoo badalaiso,” diso.

### *Yesuye ta eyo goo*

(*Mat 27:45-56; Maka 15:33-41; Yon 19:28-30*)

<sup>44</sup> Osoloso osoko olo oodomo tooboome, mi susuga neligaso, mi neligamelee ososee osoko howo bakadio hedebedi poogooso.

<sup>45</sup> Bei, goosoo ogosopeledoboome, osoko pelega poogooso. Osoloso teimosotegeima kulodu dugokodia oso kisimelee ee eyomosoo domo tologodooso. <sup>46</sup> Esemes

<sup>23:29:</sup> Luka 21:23    <sup>23:30:</sup> Hos 10:8; Yili 6:16    \* <sup>23:31:</sup> Esiga to hogugu hageeyobeiegeesee moloso, “Niyo kasee gooleedo? Goo hagoso tokenee mauwe odoosoo mapoo peledabalaitaiba daga, hee tokenee teli odoosoo dimapoo ogoosoo peledabalaiyo?”    <sup>23:34:</sup> Psa 22:18    <sup>23:35:</sup> Psa 22:7-8    <sup>23:36:</sup> Psa 69:21    <sup>23:45:</sup> Hib 6:19-20; 10:19-20

Yesuye to neligidi egeesee takaso, “Ma, a mo dio nee dee mapoo maga,” diso. Yesu to hamameedee hageesee takoloso taso.

<sup>47</sup> Osoloso ha teli odoosoo gihadeli odoosoo oso Yesuwo homo bulubo magoo ma hemidu badolone Yesuye ta goo ee ogoloso, Godeeyo hu dokodoo poudoolone egeesee takaso, “Tei takoo, odoosoo hagee Godeeyo howo woola tekepo odoodoo,” diso.

<sup>48</sup> Osoloso odoosoo susuga oso goosoo peledaba ee agalame omapoo dileso balagamelee odoosoo oso goo hagee ogoloso dulone diya gooholone dia budo mapoo kobugumo see wedi diyadeeso.

<sup>49</sup> Osoloso Yesu o odoosoo sabolo osoloso sobo abo Yesubolo Gelili abaga sibadee oso wulo eli sage abaga tebisamolone goo hagoso peledaba mapoo balaga meleeso.

*Yesu mi doosoo*  
(*Mat 27:57-61; Maka 15:42-47; Yon 19:38-42*)

<sup>50-51</sup> Dima kulodu odoosoo hee badebeiso, o hu Yosep. Yudiya mi toowa ee ma kulodu mi pepooko Alimatiya ee o midee. Yo Godeeyo howo woola tekepo badolone Godeeye wiligi doloso badeli goo oso siba beleso bameleeso. Osoloso yo Yu odoosoo wiligi odoosoo tebisa oso mooloogoodoo ee ma kulodu yo dibolo hodobo badebeiso. Esino Yu odoosoo wiligi odoosoo tebisa oso Yesu Loum gamalee odoosoo oso wooloomalame dimapoo tiaseme, yo goo omapoo gowoolone yayo hamaga takaso.

<sup>52</sup> Osoloso yayo Yesu ta eyo su ee talame, Paillet mapoo dileso woosaso.

<sup>53</sup> Osoloso yayo Yesuwo kou homo bulubo magoo ma dokodooga miyomoo to meilesa, dugoso tiadoloso yo ou madu magoosoo. Midoo hagee dia. Esiga daga odoosoo hee teme omapoo magele.

<sup>54</sup> Esino biame domo egee Yu odoosoo diayo hasali biame bei mooloogoolai osoko howo koola tooboome ka see.

<sup>55</sup> Osoloso sobo abo Yesubolo Gelili abaga sibadee oso Yosepeeye Yesuwo kou mi doo ma kulodu magalame todime, diba yima hamamee diyadeeso. Diba omapoo dileso Yosepeeye Yesuwo kou magoo medee egeiso.

<sup>56</sup> Osoloso diba see wedi dileso sisigageli bi medee tekepo Yesuwo su mapoo hedilame mopoodoo doosoo. Esino diba Yu odoosoo diayo hasali biame olo bei mooloogoome, Moseseeye tei magoo ee dodolone epedee koodobuloso hasaso.

## 24

*Yesu midoo ma kuloduga hogabia*  
(*Mat 28:1-10; Maka 16:1-8; Yon 20:1-10*)

<sup>1</sup> Esiga Sadee toowa biame gesikolodee sobo hagee bia oso sisigageli bi medee tekepo mopoodoo doo ee tolosa Yesuwo bi mapoo diyadeeso.

<sup>2</sup> Diba omapoo dileso egeino, yo toowa wulu ou miyopoo kisi ee peegoo bidigamo dileso molome egeiso.

<sup>3</sup> Esemee diayo kulodu galagadileso egeino, Lodee Yesuwo su omapoo mauwe molo egeiso.

<sup>4</sup> Osoloso diayo kulodu galagadileso goo tiademe balaga meleeno, odoosoo bakadio dugo diya gadeebugu kalaga oso saga peledoboloso soboso debei mapoo hodiokooga tebisaso.

<sup>5</sup> Osoloso sobo diba diya dio dulone, ebia sabolo miyomoo gawuaso. Esemee odoosoo bakadio oso dimapoo nei egeesee takaso, “Niyo kasalame odoosoo see gie badeli too ee midoo ma kulodu ka esiamo silesibala?”

<sup>6</sup> Yo kulo hadu mauwe. Esino yo see hogado dina. Esiga niba Yesubolo Gelili mapoo silone, yayo nimapoo taka goo ee gooleebigi.

<sup>7</sup> Bei, yayo egeesee takaso, ‘Odoosoo Holo, a tokenee teli odoosoo dimapoo tiasalaise, osoloso a homo bulubo magoo ma dokodoo yoguso enigileiso. Osoloso a biame bakadio midoo ma kulodu tamoloso, biame bakadio hedebe di mapoo midoo ma kuloduga see hogado dileiso,’ diso.”

<sup>8</sup> Esemee sobo diba to hagee duloso Yesuye takomo sili to ee gooleebuguso.

<sup>9</sup> Osoloso diba midoo maga see wedi dileso, diye di odoosoo 11 sabolo osoloso odoosoo susuga mapoo diayo egei goo susuga ee dimapoo oposususo.

<sup>10</sup> Esiga sobo hagee bia oso goo peledaba hagee ka egei, Meli-Magadalin osoloso

Yowana osoloso Yemeseeyo owee Meli osoloso sobo abo.

<sup>11</sup> Esino sobo hagee bia oso sibilesi diye di odo mapoo takeme diba duno, halabolone taka masi takeme to omapoo tei tele poogooso.

<sup>12</sup> Esino Pita toboloso midoo ee agalame hoguo diso. Yo dileso gasuwoloso wulu ma kulodu egeino, dugo Yesuwo su tiadoloso magoo ee see mosoowe wulu ma kulodu molome egeiso. Esem Pita goo hagee ogoloso howoodoomo wedi diso.

*Odo bakadio oso Emaus mi mapoo dulone Yesu egei*

<sup>13</sup> Biame hedebe omapoo Yesuwo hamamee dili odo bakadio oso Yelusalem mi poogoloso, see Emaus mi mapoo diyadaga meleeso. Emaus mi egee Yelusalem omaga haga hoogoonee, wulo 11 kilomita egeesi masi.

<sup>14</sup> O bakadio dumo dulone goo susuga Yesu mapoo peledaba goo ee oposusumo diyadeeso.

<sup>15</sup> Osoloso o bakadio osee oposusumo diyadaga molome, Yesu dima hamamee sibilesi diba tugodoloso dibolo hodobo diso.

<sup>16</sup> Esino odo bakadio hagoso Yesu medee kibiya hoodo egele. Bei, diayo Yesu kibiya hoodo egeyaga, Godeeye diba gooloogooso.

<sup>17</sup> Esem Yesuye dimapoo egeese takaso, “Niba ogo goo oposusumo diyadaga malana?” diso.

Esem diba eli domo omapoo kookoo toboloso goohele sabolo mudu olugodoloso tebisameleeso.

<sup>18</sup> Osoloso dima kulodu odo hee, o hu Keleopas, yayo Yesu mapoo egeese takaso, “Yelusalem mi mapoo odo soo sibadee ee ma kulodu mi omapoo goo peledaba ee, no dulega badosoba?” diso.

<sup>19</sup> Esem Yesuye nei dimapoo egeese takaso, “Nayo egee takoo ogo goo takala?” diso.

Esem diayo nei yimapoo egeese takaso, “Iba Yesu Nasalet odo eyo goo ee taka. Bei, yo Godee maga to toloso kokodo takomo sili odo doloso badolone

Godeeyo howo woola osoloso odo susuga eyo mudugiyo Godeeyo to kitulugu sabolo takomo siliso. Osoloso yayo goo toowa opusomo di moodoomo siliso.

<sup>20</sup> Esino tei moso wiligi odo tebisa sabolo osoloso ibada wiligi odo tebisa oso Yesu Loum gamalee oso wooloomalame dimapoo teneeso. Esem yo homo bulubo magoo ma dokodo yoguso enigaloso taso.

<sup>21</sup> Esino iyo goolee, yayo Isalael odo iba Loum gamalee gidebeli omaga peegoo gilimado dileiso doloso dobolone balaga meleeso. Esiga goo hagoso peledaba ee biame bakadio olo poogooso.

<sup>22-23</sup> Osoloso ibada mooloogoodoo ee ma kulodu sobo abo oso epei gesikolodee dileso midoo mapoo egeino, Yesuwo su mauwe molo egeiso. Esem diayo sibilesi imapoo takolone, ‘Ibada howo opusomo doloso Godeeyo momaiye egeiso,’ diso. Esem momaiye oso Yesu ta maga hogado di goo ee dimapoo takaso. Esem goo susuga hagee takeme, iba diya dio diso.

<sup>24</sup> Osoloso ibada mooloogoodoo ma kulodu debeli odo abo diba nose dileso midoo egeino, soboso taka to sabolo tobulone, Yesuwo su midoo ma kulodu mauwe molo egeiso.”

<sup>25</sup> Esem Yesuye nei dimapoo egeese takaso, “Niba medee diya boobada odo doo. Niba kaseega Godee maga to toloso kokodo takomo sili odo dia to mapoo tei telega ka dosomo?”

<sup>26</sup> Bei, diayo egeese takaso, ‘Godeeye hesia Kelisoye dala goo hageesi toloso see Godeeye egee bado mapoo peleso hu toowa toloso kitulugu sabolo badalaise,’ diso.”

<sup>27</sup> Osoloso Yesuye dimapoo Moses sabolo osoloso Godee maga to toloso kokodo takomo sili odo susuga oso Kelisowo goo hogugu goo eyo bei dimapoo medee eligiso.

<sup>28</sup> Osoloso diba Emaus mi olo koola too-boome omapoo dulone Yesuye dimapoo egeese takaso, “A hamapoo hasalaimo. Esino a olo wulo duso,” diso.

<sup>29</sup> Esem odo bakadio oso to kitulugu sabolo yimapoo egeese takaso, “Emegei,

no epedee na di, no ibolo hodobo tiamo. Bei, olo nolugo,” diso. Esemé Yesu yo dibolo hodobo tilame diso.

<sup>30</sup> Osoloso diba moso kulodu peleso nei nalame dobolone, Yesuye wo tolosó goomoga to takoloso koodobuloso wo populosó dimapoo piso.

<sup>31</sup> Egeesee semelee biame omapoo diayo Yesu medee kibiya hoodo egeiso. Omapoo diayo Yesu medee kibiya hoodo egeme, yo saga omapoo osugoboodooso.

<sup>32</sup> Esemé obakadio dobolone dibusomo egeesee takaga meleeso, “O. Tei takoo, iba eli domo abaga sibataga molome, yayo Godeeyo to eyo bei imapoo takeme, ibada sooloo ma kulodu diya goomogaso,” diso.

<sup>33</sup> Osoloso diba saga tebisaloso see Yelusalem mapoo wedi diyadeeso. Diba omapoo dilesó egeino, diye di odoó 11 sabolo osoloso Yesuye di hamamee dedeli odoó susuga oso diesono hodobo mooloo-goodoloso doboome egeiso.

<sup>34</sup> Esemé odoó omapoo mooloo-goodoloso debei oso dimapoo egeesee takaso, “O. Tei takoo, Lodee yo ta maga see hogado didoo. Osoloso yo see Saimon-Pitaye badebei mapoo peledabadoo,” dee takaga meleeso.

<sup>35</sup> Osoloso odoó bakadio hagee bia oso Yesu eli domopoo diba tugodoloso di eyo goo sabolo osoloso Yesuye dibolo hodobo nei nalame dobolone, wo tolosó popume, diayo yo medee kibiya hoodo egei goo ee dimapoo oposususo.

*Yesuye o hamamee dili odoó dimapoo dilesó peledaba*

*(Mat 28:16-20; Maka 16:14-18; Yon 20:19-23; Diye 1:6-8)*

<sup>36</sup> Diba goo hamapoo to osee kesamolome, haga booloogelega diayo debei domo omaga Yesu peledoboloso tobudulone dimapoo egeesee takaso, “Emegei, mesie goo oso nibolo hodobo mele,” diso.

<sup>37</sup> Esino diayo goolee yo odoó dio bele dolone, dio dulone diya ebigaso.

<sup>38</sup> Esemé Yesuye nei dimapoo egeesee takaso, “Niba kaseega ebia sabolo goo

tiadoo sabolo nibada goo goolee ma kulodu ka malana?

<sup>39</sup> Esiga niba mo dee sabolo osoloso mo homo sabolo ogoloso tei aso doloso gooleede. Osoloso mo su sige, niyo a tei su moloso doloso gooleedalame. Bei, odoó dio diba su mauwe,” diso.

<sup>40</sup> Yo to hagee takoloso o dee boowo sabolo osoloso o homo boowo sabolo dimapoo eligiso.

<sup>41</sup> Esino diayo medee tei telega goomoga sabolo osoloso dio dulone debei ogoloso Yesuye dimapoo egeesee takaso, “Nimapoo nei nali hee molosomo?” diso.

<sup>42</sup> Esemé diayo yimapoo di si pepooko teneeso.

<sup>43</sup> Osoloso yayo dia howo woola di egeesee neso.

<sup>44</sup> Osoloso yayo dimapoo egeesee takaso, “Ayo nibolo hodobo silone nimapoo take-liso, ‘Mo goo maga Moseseeye hogugu sabolo, osoloso Godee maga to tolosó kokodo takomo sili odoó oso hogugu sabolo, osoloso Sam booka mapoo hogugu goo oso amapoo peledabalaiso,’ deliso. Esiga epei goo hagoso amapoo olo ka peledobooso,” diso.

<sup>45</sup> Osoloso Godeeyo to booka mapoo hogugu goo ee medee kibiya gooleedalame, Yesuye dibada goo goolee medee hoodo magooso.

<sup>46</sup> Yesu egeesee solone tobudulone dimapoo egeesee takaso, “Esiga Godeeyo to booka mapoo hogugu ee egeesee moloso: Godeeye hesia Keliso, a dala tolosó biame bakadio midoo ma kulodu ta moloso see biame bakadio hedebe di mapoo hogabuloso toboloso dileiso.”

<sup>47</sup> Osoloso Yesuye see tobu dimapoo egeesee takaso, “Niba Yelusalem abaga bei mooloogooloso mipoo toowa mapoo mo hu maga odoó mapoo hageesee eligimo silesibe, ‘Niba goo goolee su wuduloso nibada goo tokenee maga miligi pie. Eseega nibada goo tokenee hapoloso boobado bigileiso,’ dee takomo silesibe.

<sup>48</sup> Esiga niyo mo goo hagee ogoloso takomo silesibileiso.

<sup>49</sup> Osoloso niba Yelusalem poogoloso epedee na di. Esino niba epedee hamapoo



osee doga, Kei mi ma dokodooga kitulugu siboga talaiso. Bei, ayo mo Maye taka to ee dodolone nimapoo Dio Tei tenelaiso,” diso.

*Yesu Kei mi ma dokodoo ido pala  
(Maka 16:19-20; Diye 1:9-11)*

<sup>50</sup> Osoloso Yesuye o hamamee dili odoo gilimadoloso Betani mi koola mapoo diyadaga meleeso. Diba omapoo dilesos peledoboloso Yesuye dee dokodoo poudoloso diba halo Godee mapoo takolone diba pidilame goomoga to takaso.

<sup>51</sup> Yo egeesee takomolome, Yesu Kei mi ma dokodoo ido palaso.

<sup>52</sup> Esem diayo Yesuwo hu dokodoo poudoloso, goomoga sabolo Yelusalem mi mapoo see wedi diyadeeso.

<sup>53</sup> Osoloso biame susuga ee ma kulodu, diba Yu odoowo tei moso mapoo dobolone, Godee mapoo goomoga poudoolone debeiso.

## Yonee To tekepo Yoneeye hogugu

### *Yonee booka goo eyo bei*

Yonee booka hagee Yesu o hamamee dili odoo hee Yoneeye hogugu. Yayu to hogugu ee ma kulodu goo toowa hagosu. Yesu yo Keliso\* osoloso yo tei Godeeyo Owolo. Esiga iyo Yesu mapoo tei toga, iba gie badeli talaiso.

### *Toso odoo su paso*

<sup>1</sup> Daga mipoo hagee moodelega molome, To\* olo badebeiso. To oso Godee sabolo badebeiso. Osoloso To ee Godee.

<sup>2</sup> Yo mipoo gie daga moodoo omapoo Godee sabolo badebeiso.

<sup>3</sup> Esiga bi hee yo mauwe moodele poo-goo me. Esino bi susuga hedebe yimaga ka moodoo.

<sup>4</sup> Esiga gie badeli eyo bei hedebe yoso. Gie badeli oso odoo susuga mapoo gadeebugu tenemeleeso.

<sup>5</sup> Esiga gadeebugu oso neliga ma kulodu ka pounimoloso. Esiga gadeebugu egee neligasos semidilei tebile.

<sup>6</sup> Esiga biame omapoo Godeeye odoo hee diye diso, o hu ee Yonee.

<sup>7</sup> Yayu odoo mapoo gadeebugu oso sibilei goo ee takalame simiso. Osoloso odoo susuga oso to yayu taka ee duloso tei ka talame.

<sup>8</sup> Yonee yo gadeebugunee, esino yayu gadeebugu eyo goo ee odoo mapoo takalame ka simi.

<sup>9</sup> Bei, tei gadeebugu oso odoo susuga mapoo pouni meli oso mipoo hamapoo sibilei ee olo koola tabaso.

<sup>10</sup> Esiga To ee mipoo hamapoo meleeso. Osoloso mipoo hagee yimaga moodooso. Esino mi odoo oso yo medee hoodo egele.

<sup>11</sup> Yo o odoo mapoo simiso. Esino o odoo oso yo idile.

<sup>12</sup> Esino edebeeyo yo idoloso yimapoo tei teme, yayu odoo egee bia dimapoo kitulugu teneeso, diayo Godeeyo owolo dio doloso dabalame.

<sup>13</sup> Esino edebeeyo owee dio ama dio eyo sawoso, o, suso gilee, o, odoo heeso gilee goo maga diba Godeeyo owolo dio dee ka sele. Esino Godeeye goomoga goo omaga diba Godeeyo owolo dio diso.

<sup>14</sup> Osoloso Toso odoo su poloso ima kulodu badebeiso. Yayu iba diya sooloo dolone pidiliso. Osoloso yayu tei goodee ee takeliso. Osoloso yayu hu toowa toloso badeli goo ee iyo egeiso. Esiga Ma Godee maga simi, Owolo hedebe yayu hu toowa egeesi toloso ka badoso.

<sup>15</sup> Yoneeye o goo maga takolone toso neligidi egeesee takaso, "Ayo takolone, odoo hee ama hamamee sibileiso dee takomo silimenee, odoo ee hagosu. Yayu kitulugu oso ayo kitulugu ee dagadi. Bei, a soomagelega badoboome, yo daga olo badebeiso."

<sup>16</sup> Esiga sooloo dolone pidili goo toowa yimapoo egee molo maga biame susuga yayu iba ka pidimoloso.

<sup>17</sup> Tei magoo goo ee Godeeye Moses maga imapoo teneeso. Esino sooloo dolone pidili goo sabolo osoloso tei goodee ee Yesu Keliso maga simi.

<sup>18</sup> Egeesi ma kulodu odoo heeso Godee egele. Esino hedebe Godeeyo Owolo yayu imapoo Godeeyo goo ee yilige buguso. Bei, yayu Godee koola ogolone badolone yo tei Godee doloso ka badoso.

### *Yoneeye takolone a Kelisonee dee taka (Mat 3:1-12; Maka 1:1-8; Luka 3:1-18)*

<sup>19</sup> Yelusalem mapoo debeli Yu odoo dia wiligi odoo oso Godee ogo odoo ogo doloso debeli sabolo, osoloso odoo abo Libaiyo bala\* maga Yonee mapoo diye diso, diayo Yonee yo tei odoo ogumo doloso woosalame. Esem diayo Yonee mapoo dileso

\* :: **Keliso** dee egee takoo hu eyo bei ee Godeeye hesia dolone ka takooso. **1:1:** Yon 17:5; 1Yon 1:1-2; Yili 19:13

\* **1:1:** To ee Yesu **1:3:** 1Kol 8:6; Kol 1:16-17; Hib 1:2 **1:4:** Yon 5:26 **1:5:** Yon 3:19 **1:6:** Mat 3:1; Luka 1:13-17, 76 **1:9:** Yon 8:12 **1:13:** Yon 3:3-6; 2:11; 1Pita 1:23 **1:14:** Pil 2:7 **1:17:** Exo 34:28; Loum 6:14

**1:18:** Exo 33:20; Yon 6:46; 1Tim 6:16 \* **1:19: Libaiyo bala** eyo bei ee egeesi moloso. Eibalahameeyo amawe Yekobowo owolo hee eyo hu ee Libai. Osoloso Libaiyo bala ee ma kulodu debeli odoo oso Yu odoo dia tei moso ma kulodu tou opusomo opusomo di ee teliso. Esino Godee ogo odoo ogo doloso debeli odoo diba nose tei moso ma kulodu tou teliso. Diba Eloneeyo bala hedebe.

egeesee woosaso, “No tei odoo ogumo?” diso.

<sup>20</sup> Esemee Yonee yo to nei takalai gowelee. Esino yayo nei dimapoo egeesee takaso, “A Kelisonee,” diso.

<sup>21</sup> Esemee diayo see yimapoo egeesee woosaso, “No odoo ogumo? No Ilayayo?” diso.

Esemee yayo nei egeesee takaso, “Haye, a Ilayanee,” diso.

Esemee see diayo yimapoo egeesee woosaso, “No Godee maga to toloso kokodo takomo sili odoo sibileigo neme bamelee,\* odoo ee nosomo?” dee takaso.

Esemee yayo nei dimapoo egeesee takaso, “Haye, asonee,” diso.

<sup>22</sup> Esemee see diayo yimapoo egeesee takaso, “No tei odoo ogumo? Iba goomogo, to nei nayo taka ee iyo todileso ibada wiligi odoo iba diye di mapoo takalaiya. Esiga no tei odoo ogumo?” diso.

<sup>23</sup> Esemee nei Yoneeye Godee maga to toloso kokodo takomo sili odoo Aisayaye taka to ee dimapoo egeesee takaso, “A miwe poogoo mi maga idageli odoo ee aso,

Niba Lodeeye sibilei eli medee hoodo magee.”

<sup>24</sup> Esemee Pelisi odoo dia wiligi odoo oso diye di odoo oso dileso, nei Yonee mapoo egeesee takaso,

<sup>25</sup> “Nayo takolone, no Kelisonee, osoloso no Ilayanee, osoloso no Godee maga to toloso kokodo takomo sili odoo osonee, dee takooso. Esino bei kasalame nayo odoo howo ka olugumo silala?” diso.

<sup>26</sup> Esemee nei Yoneeye dimapoo egeesee takaso, “Ayo wulo odoo howomoo oluguliso. Esino odoo hee nima kulodu badoso. Esino niba yo gooleedelee.

<sup>27</sup> Yo ama hamamee egee siboso. Esino a tekeponee, ayo o homo mapoo kali bi ee pidigilei.”

<sup>28</sup> Osoloso Yoden howo hodiokoo Yoneeye odoo howo olugumelee Betani mi mapoo goo ogoso peledabaso.

### *Yesu Godeeyo Lam be*

<sup>29</sup> Biame hee mapoo Yesu Yonee mapoo sibume ogoloso Yoneeye egeesee takaso, “Ege, hagee Godeeyo Lam beso.\* Yayo mipoo hamapoo debeli odoo dia goo tokenee susuga ee hapoloso boobado bigileiso.

<sup>30</sup> Ayo takolone, odoo sibileisogo doloso takomo sileemeni, odoo ee hagoso. Bei, ayo egeesee takomo sileeso, odoo hee ama hamamee sibileiso. Esino yayo kituluguso ayo kitulugu ee dagadi, dee takeliso. Bei, a soomagelega molome, yo daga olo badebeiso, dee takeliso.

<sup>31-33</sup> Esiga Isalael odooso Kelisowo goo ee medee gooleedalame ayo diba howo olugulame ka simi.”

Esiga Yonee eyo egei goo ee egeesee takaso, “Ayo daga Keliso odoo ogu bele dolone medee kibiya gooleedelee. Esino ayo odoo howomoo olugulame, Godeeye a diye dolone amapoo egeesee taka, ‘Nayo Keliso egeesee gooleedaiso. Dio Tei sibileso yibolo hodobo badoga agalaiso. Osoloso yayo odoo mapoo Dio Tei tenelaiso,’ diso. Godeeye egeesee taka duloso hamamee Dio Tei molo masi pusibileso yimapoo pubalegeme egeiso.

<sup>34</sup> Esiga ayo goo hagee tei ogoloso yo tei Godeeyo Owolo dolone to hagee ayo nimapoo ka taka.”

### *Yesuye o hamamee dili odoo daga hudi magoo*

<sup>35</sup> Biame hee mapoo Yonee o hamamee dili odoo bakadio dibolo hodobo mi hedebe omapoo tebisa meleeso.

<sup>36</sup> Egeesee semelee omapoo Yesuye di ee ogoloso dimapoo egeesee takaso, “Niso ege, odoo egee Godeeyo Lam be ogoso,” diso.

<sup>37</sup> Esemee Yonee o hamamee dili odoo oso to egee duloso Yesuye di hamamee diso.

<sup>38</sup> Esemee Yesuye bidi toboloso, odoo bakadio oso yima hamamee simi ee ogoloso, yayo dimapoo egeesee takaso, “Niba ogoo goo tala sibala?” diso.

**1:21:** Deut 18:15, 18; Mat 11:14 \* **1:21:** Yu odooso Godee maga to toloso kokodo takomo sili odoo Moses egeesi masi oso sibilei ee bameleeso. (Deut 18:18) **1:23:** Isa 40:3 **1:27:** Yon 1:15 **1:29:** Isa 53:6-7; 1Pita 1:18-19

\* **1:29:** *Lam be* dee egee takoo sipi be hu gie kauwa ee takooso. Bei, Isalael odoo oso tokenee goo hapalame sipi be gie kauwa wooloomaloso Godee mapoo teneliso. **1:30:** Yon 1:15 **1:31-33:** Mat 3:16 **1:34:** Mat 3:17 **1:36:** Yon 1:29

Eseme diayo nei yimapoo egeesee takaso, “Labai, no kapoo badeliyo?” diso. Labai hu eyo bei ee eligili odoo dolone ka takooso.

<sup>39</sup> Eseme yayo nei egeesee takaso, “Niso sibilesa ege,” diso. Osoloso neli tigime, odoo bakadio hagoso Yesubolo dilesa yayo badeli mi ee egeiso. Eseme diba biame omapoo yibolo hodobo debeiso.

<sup>40</sup> Odoo bakadio hagee bia dia kulodu odoo hee o hu ee Endulu. Endulu yo Saimon-Pitayo omolo.

<sup>41</sup> Esiga Enduluye Yesu ogoloso emei Saimon esiaso. Yo ogoloso yimapoo egeesee takaso, “Iba Mesaya egeiso,” diso. Mesaya hu eyo bei ee Keliso dolone ka takooso.\*

<sup>42</sup> Osoloso Enduluye Saimon Yesu mapoo ido diso. Eseme Yesuye yo ogoloso yimapoo egeesee takaso, “Saimon, Yoneeyo owolo, nee hu see Kepas hedileiso.” Kepas dee egee takoo ee Pita dolone ka takooso.\*

### *Yesuye Pilipi dio Nataniyol dio gilimadoo*

<sup>43</sup> Osoloso biame hee mapoo Yesu yo see Gelili mi mapoo dilame goomogaso. Esino biame omapoo yo odoo hee Pilipi tugodoloso yimapoo egeesee takaso, “No ama hamamee sibe,” diso.

<sup>44</sup> Pilipi hagee Betesaida odoo. Betesaida mi hagee Endulu dio Pita dio dia midee.

<sup>45</sup> Osoloso Pilipiye dilesa Nataniyol ogoloso yimapoo egeesee takaso, “Moses sabolo osoloso Godee maga to toloso kokodo takomo sili odoo oso dia booka mapoo to hogugu oso takolone, odoo hee hamamee sibileisogo, dee takemelee odoo ee iyo olo egeiso. Yo Yesu, Nasalet mi mapoo badeli, yo Yosepeeyo owolo,” dee takaso.

<sup>46</sup> Esino Nataniyoleeye Pilipi mapoo egeesee takaso, “Goo tekepo oso Nasalet mi maga kasee sibileiyo?” diso.\* Eseme

Pilipiye nei yimapoo egeesee takaso, “No sibilesa ege,” diso.

<sup>47</sup> Eseme Nataniyoleeye Yesu yima hegi simi ee ogoloso Yesuye o goo maga egeesee takaso, “Niso ege, odoo hagee tei Isalael odoo. Yo medee tei goo takeli odoo,” diso.

<sup>48</sup> Eseme Nataniyoleeye nei yimapoo egeesee takaso, “Nayo a kasee goolee-doowo?” diso. Eseme Yesuye nei yimapoo egeesee takaso, “No daga Pilipiye dilesa egelega badoboome, no pigi homo bei mapoo badoboome, ayo no egeiso,” diso.

<sup>49</sup> Eseme Nataniyoleeye Yesu mapoo egeesee takaso, “Eligili odoo, no Godeeyo Owolo. Osoloso no Isalael odoo ibada wiligi odoo,” dee takaso.

<sup>50</sup> Eseme Yesuye nei Nataniyol mapoo egeesee takaso, “No homo bei mapoo badoboome, ayo egei goo maga nayo amapoo tei ka toowala? Esino goo hagee pepooko, no hamamee goo toowa agalaiso.

<sup>51</sup> Esiga ayo nimapoo tei goo taka. Niyo Kei mi osulu yamagoloso mologa, Godeeyo momaiye oso Odoo Holo\* amaga dokodoo polo osoloso amapoo sibo domologa agalaiso,” dee takaso.

## 2

### *Yesuye howo ee wain i palame moodoo*

<sup>1</sup> Biame bakadio poogoloso hamamee Gelili mi toowa ee ma kulodu Kana mi pepooko mapoo odoo heeso sobo hu wo neso. Biame domo omapoo Yesuwo owee onosee omapoo badebeiso.

<sup>2</sup> Osoloso Yesu sabolo o hamamee dili odoo sabolo sobo hu wo ne ee agalame diba gilimadoloso debeiso.

<sup>3</sup> Wo ne biame domo mapoo wain i hosudoo ee ogoloso Yesuwo oweeye Yesu mapoo egeesee takaso, “Wain i olo hosudoona,” diso.

<sup>4</sup> Eseme Yesuye nei owee mapoo egeesee takaso, “Mo wee, ayo oogo goo talame no

**1:40:** Mat 4:18-20 \* **1:41:** Esiga Hibulu dia toso Mesaya dee egee takoo sabolo osoloso Guliki toso Keliso dee egee takoo goo eyo bei ee hedebe Godeeye hesia dolone ka takooso. **1:42:** Mat 16:18 \* **1:42:** Esiga Hibulu toso Kepas dee egee takoo sabolo osoloso Guliki toso Pita dee egee takoo hu eyo bei ee yo dolone ka takooso. **1:45:** Deut 18:18; Isa 7:14; 9:6; Jer 23:5; Ezek 34:23 \* **1:46:** Yu odooso goolee, Nasalet mi ee haga goo toowanee, dee gweliso. Esiga odoo hu toowa too oso mi omaga sibileime, dee gweliso. **1:49:** Mat 14:33; 16:16; Maka 3:11 **1:51:** Gen 28:12 \* **1:51: Odoo Holo** - Yesuye eyo nediliyo takolone, a Odoo Holo, dee taka hagee yo tei odoo dolone ka takomo silee. **2:4:** Yon 7:30; 8:20



amapoo ka simiyo? Mo biame tugodele,”  
dee takaso.

<sup>5</sup> Esemе oweeye nei odoо mosо kulo-  
lodu tou teli mapoo egeesee takaso, “Niba  
Yesuye to nimapoo takooga duloso to egee  
te,” dee takaso.

<sup>6</sup> Egeesi ma kulodu sesepeni yugoso  
moodoo <sup>6</sup> omapoo bediga meleeso.  
Sesepeni <sup>6</sup> hedebe hedebe di egee howo  
100 lita egeesi keeseli. Yu odooso dia  
adaga dia goo ee dodolone, sesepeni howo  
keesoo hamapoo dee sabolo, homo sabolo,  
osoloso bi abo hapeliso.

<sup>7</sup> Esemе Yesuye odoо mosо kulodu tou  
teli dimapoo egeesee takaso, “Sesepeni  
susuga hagee howoso metamagise,” diso.  
Esemе diayo sesepeni susuga egee howoso  
metamagisaso.

<sup>8</sup> Esemе yayo tou teli odoо mapoo  
egeesee takaso, “Niba sesepeni omapoo  
howo keesaloso todileso, odoо sobo hu wo  
ne eyo wiligi odoо mapoo tenee,” diso.  
Esemе diayo egeesee moodooso.

<sup>9</sup> Esino howo eyo see wain i paso. Esemе  
wiligi odoо oso wain i egee wulo nalo  
egeiso. Egeesi ma kulodu wain i hagoso  
simi eyo bei yo gooleedele. Esino o tou teli  
odoo diba olo gooleedoo.

<sup>10</sup> Egeeseelone yayo sobo hulame simi  
giso ee idoloso yimapoo egeesee takaso,  
“Odoо susuga oso Yu odoо dia adaga dia  
goo ee dodolone, wo ne mapoo sibadee  
odoo mapoo daga wain i hadali keeneliso.  
Osoloso diba wain i toowa naloso hal-  
abolone doga, see wain i haga koo hadali  
ee dimapoo keeneliso. Esino nayo wain  
i dooboo hadali ee magoo moloso, see  
epedee keedoloso ka teneeso,” diso.

<sup>11</sup> Esiga Gelili mi toowa ma kulodu Kana  
mi pepooko mapoo Yesuye daga malalo  
goo toowa opusomo di ee moodoo maga,  
yayo hu toowa tolosa badeli goo ee eligiso.  
Esemе o hamamee dili odoо oso goo hagee  
ogoloso yimapoo tei tooso.

<sup>12</sup> Osoloso goo hagoso dileso koodobume,  
Yesuye owee sabolo, osoloso omolo dio  
sabolo, osoloso o hamamee dili odoо

sabolo Kapeniyum mi mapoo diso. Os-  
oloso diba omapoo dileso dobolone biame  
abo poogooso.

*Yesuye tei moso ma kuloduga  
odoo peegoo hasiso bugu*

*(Mat 21:12-13; Maka 11:15-17; Luka  
19:45-46)*

<sup>13</sup> Osoloso Yu odoо dia Gababia wo  
nali biame ee olo koola tooboome, Yesu  
Yelusalem mi mapoo palaso.

<sup>14</sup> Osoloso yo omapoo peleso egeino,  
odoo susuga oso tei moso beelee ma ku-  
lodu bulumakau be sabolo, osoloso sipi  
be sabolo, osoloso molo sabolo edebeeyo  
neiso talame, tosibileso odoо mapoo tenee  
domolome egeiso. Osoloso odoо aboso  
molee opusomo opusomo di ee tei moso  
eyo molee piligeli debi pooba mapoo do-  
boome egeiso.

<sup>15</sup> Osoloso Yesuye gowoolone tiso wei  
masi moodooloso wei oso sipi be sabolo,  
osoloso bulumakau be sabolo, osoloso  
odoo susuga peegoo hasiso buguso. Os-  
oloso molee piligeli debi pooba bidige  
buguloso molee ko sabolo peegoo kugob-  
uguso.

<sup>16</sup> Osoloso see molo neiso talame de-  
bei odoо mapoo egeesee takaso, “Bi  
susuga hagee tolosa moso hamaga peegoo  
diyadee. Niyo mo Mamo moso ee bi teli  
moso dee na see,” dee takaso.

<sup>17</sup> Esiga goo hagoso peledaba ogoloso  
Yesu o hamamee dili odoо oso Godeeyo  
to booka mapoo hogugu oso taka goo ee  
egeesee gooleebuguso,

“Ayo nee moso ee diya gooleeso.

Esiga edebeeyo a wooloomalaiso.”

<sup>18</sup> Esemе Yu odoо dia wiligi odoо tebisa  
oso bi susuga maloso gidebei odoо egee  
bia ee Yesuye tei moso ma kuloduga pee-  
goo hasiso bugu goo ee ogoloso diayo  
yimapoo egeesee takaso, “No ogoso kitu-  
lugu tolosa goo hageesee ka moodoowo?  
Esiga nayo kitulugu egee Godee maga too,  
dee takooga, nayo goo toowa opusomo di  
hee imapoo eligilei tekepo,” diso.

<sup>19</sup> Esemе Yesuye dimapoo nei egeesee  
takaso, “Niyo tei moso hagee guobigi.  
Egeeseega, ayo see tobu biame bakadio

hedebe di ee ma kulodu tegelaiso,” dee takaso.

<sup>20</sup> Esemé diayo yimapoo egeesee takaso, “Iyo dugo 46 ee ma kulodu tei moso hagee tegeiso. Esiga biame bakadio hedebe di ee ma kulodu nayo saga kasee togo dalaiyo?” diso.

<sup>21</sup> Esino Yu odoowo wiligi odoó hagee biaso Yesuye taka goo ee medee kibiya gooleedele. Bei, Yesuye tei moso eyo goo maga taka hagee, eyo nediliyo o su ee taka.

<sup>22</sup> Esiga Yesuye tolosó hogado polome, hamamee Yesu o hamamee dili odoó oso Yesuye taka goo hagee gooleebuguso. Egeeseelone diayo Godeeyo to booka maga taka sabolo osoloso Yesuye taka to omapoo tei tooso.

<sup>23</sup> Yesuye Gababia wo ne biame omapoo Yelusalem mapoo peleso goo toowa opusomo di moodoo ogoloso odoó susuga oso yimapoo tei tooso.

<sup>24</sup> Esino Yesuye dimapoo haga tei dele. Bei, yo odoó susuga dia sooloo ma kulodu goo goolee ee yo olo gooleedoo.

<sup>25</sup> Esiga yimapoo odoó heeso odoó dibada goo goolee ee takalai ee bei me. Bei, goo goolee susuga dibada sooloo ma kulodu egee molo ee, yayo malalo olo gooleedooso.

### 3

#### *Nikodimaseeye Yesu mapoo simi*

<sup>1</sup> Esiga odoó hee badebeiso, o hu Nikodimas. Yo Pelisi odoó, osoloso Yu odoó dia wiligi odoó tebisa ee ma kulodu yinosee wiligi odoó hee yoso.

<sup>2</sup> Osoloso yayo gesi sibilesó Yesu mapoo egeesee takaso, “Eligili odoó, iba gooleedoo, no eligili odoó Godeeye diye di ee noso. Bei, edebeeyo eyo goolee goo toowa opusomo di nayo egee moodoomo silo egeesi moodolai tebile. Esino Godee nobolo hodobo badoga, nayo goo toowa opusomo di hageesi moodolai tebileiso,” diso.

<sup>3</sup> Esemé Yesuye nei yimapoo egeesee takaso, “Ayo namapoo taka. Edebeeyo see soomagelega poogooga, yo Godeeye wiligi

dolosó badeli goo mapoo gadileime,” dee takaso.

<sup>4</sup> Esemé Nikodimaseeye nei yimapoo egeesee takaso, “Odoó kauwa ee oweeyo beliye maga see tobu kasee soomagalaiyo? Yo see holope poloso oweeye see tobu soomagalai tebile,” diso.

<sup>5</sup> Esino Yesuye see egeesee takaso, “Ayo namapoo taka. Edebeeyo howo maga osoloso Dio Tei maga see dia delega poo-googa, yo Godeeye wiligi doloso badeli goo mapoo gadileime.

<sup>6</sup> Mi odoó oso holope soomagoloso mi hamapoo debeliso. Esino Dio Tei oso gie badeli egee tenemolo odoó ee, Godeeyo owolo dio doloso badoboso kookaiyo gie badalaiso.

<sup>7</sup> Esiga ayo namapoo takolone no see tobu soomagee dee hagee takoo duloso haga na dio di.

<sup>8</sup> No pooso eyo goomoga maga sibulone goowa ee duliso. Esino yayo sibili eli sabolo osoloso yayo dili eli ee no gooleedele. Esiga Dio Tei oso odoó mapoo gie badeli egee tenemolo edebeeyo ogoloso koo gooleedeli.”

<sup>9</sup> Esemé Nikodimaseeye egeesee takaso, “Ha? Goo hagoso kasee peledabalaiyo?” diso.

<sup>10</sup> Esemé Yesuye yimapoo egeesee takaso, “No Isalael odoó dia eligili odoó, esino no goo hagee koo gooleedolo?”

<sup>11</sup> Esiga ayo namapoo taka. Iyo gooleedoo sabolo osoloso iyo egei goo ee Yu odoó nimapoo ka takomo siloso. Esino niyo ibada to mapoo tei talai ee ka gowooso.

<sup>12</sup> Esiga ayo nimapoo mi goo maga takeme, niyo tei tele. Egeesi ma kulodu ayo see nimapoo Kei mi eyo goo maga takooga, niyo kasee tei talaisomo?

<sup>13</sup> Odoó heeso bi Kei mi ma dokodoo egee molo ee agalame pele. Haye. Hedebe Odoó Holo ayo Kei mi mapoo ka badebei. Osoloso ayo Kei mi ma dokodooga mipoo hamapoo simiso.

<sup>14</sup> Esiga daga hoogoo Isalael odoó diba miwe poogoo mi mapoo doboome, Moseseeye hebise ki biso moodoo ee homo

sabolo poudooso.\* Goo hedebe egeesi masi, edebeeyo Odoos Holo anosee toloso egeesee poudileiso. <sup>15</sup> Goo egeesi maga edebeeyo amapoo tei toga, yo badoboso kookaiyo gie badeli talaiso.

<sup>16</sup> Godeeye mi odoos diya sooloo dolone Owolo hedebe a meiyee diso, ayo mi odoos ee halo talame. Esiga edebeeyo amapoo tei toga, diba Godee maga pileime, esino diba badoboso kookaiyo gie badeli talaiso.

<sup>17</sup> Esiga Godeeye Owolo a mipoo hamapoo meiyee dee taka hagee, mi odoos dia goo tokenee eyo nei tenelame ka meiyee dele. Esino mi odoos oso amaga gie badeli pidili talame ka simi.

<sup>18</sup> Osoloso edebeeyo Godeeyo Owolo amapoo tei toloso dogaa, dia goo tokenee eyo nei dimapoo dala tenelaime. Esino odoos agayo amapoo tei telega dogaa, diba dia goo tokenee eyo nei talame ka doso. Bei, diba Godeeyo Owolo hedebe amapoo tei telega.

<sup>19</sup> Gadeebugu mipoo hamapoo simiso. Esino mi odoos oso gadeebugu egee goomegele poogoloso see neliga ono diya goomogaso. Bei, diayo dia suso goo moodoo ee diya tokeneeega. Goo egeesi maga Godeeye dia goo tokenee eyo nei tenelaiso.

<sup>20</sup> Esiga goo tokenee teli odoos ee gadeebugu hegilone gadeebugu mapoo sibilei diya ebiliso. Bei, gadeebugu oso dia goo tokenee ee woola eligiyaga.

<sup>21</sup> Esino edebeeyo Godeeye goomoga goo ee tomo siloga, diba gadeebugu mapoo sibilei ebileime. Bei, gadeebugu oso dia goo ee yilige buguga, goo susuga diayo moodoo ee Godeeye kitulugu maga ka moodoodoo doloso edebeeyo gooleedalaiso.”

*Yonee odoos howo oluguli oso  
Yesuwo goo taka*

<sup>22</sup> Osoloso goo hagoso dileso koodobume, Yesuye o hamamee dili odoos sabolo Yelusalem poogoloso see Yudiya mi toowa ee ma kulodu mi pepooko abo mapoo diso.

Diba omapoo dileso dobolone odoos howo olugumeleeso.

<sup>23-24</sup> Esino Yonee yo neliga moso ma kulodu tooselega badolone, Salim mi koola mapoo Ainon mi mapoo yayo odoos howo oluguso. Bei, mi omapoo howo toowa meleega, odoos susuga diba Yoneeye howo olugulame yimapoo sibumeleeso.

<sup>25</sup> Egeesee semelee biame omapoo Yonee o hamamee dili odoos aboso Yu odoos dia adaga dia goo ee dodolone dee sabolo, homo sabolo, osoloso bi abo hapeli goo maga Yu odoos hee sabolo toso agadigaso.

<sup>26</sup> Osoloso diayo sibileso Yonee mapoo egeesee takaso, “Eligili odoos, daga Yoden howo hodiokoo odoos nobolo hodobo badebei ee no gooleedoo. Esiga nayo odoos egeeyo goo imapoo takemeni oso odoos howo ka olugumoloso. No ege, odoos susuga oso no poogoloso see yimapoo ka duso,” dee takaso.

<sup>27</sup> Esino Yoneeye egeesee takaso, “Edebeeyo eyo goolee goo hee moodoolai tebile. Esino Godeeye yimapoo kitulugu teneega, yo goo egee moodoolai ee tebileiso.

<sup>28</sup> Esiga ayo nimapoo takolone, a Kelisonee, dee taka goo ee niba olo duso. Esino a wulo o eli moodoolame malalo diye di odoos ee aso.

<sup>29</sup> Soboso giso obuoga, yo olo giso egeeyo. Odoos giso ido peli ee omapoo tobudulone, giso sibabeleso bameliso. Osoloso gisoso peledoboloso to taka ee duloso yo diya goomegeliso. Egeesi ma kulodu odoos giso ido peli masi ee aso. Esiga a epedee diya goomoga sabolo ka badoso.

<sup>30</sup> Esiga Kelisoye toowa dolone, nei ayo pepooko dolone badalai tekepo.

<sup>31</sup> Esiga Kei mi ma dokodooga simi odoos oso odoos susuga dagadileso ka badoso. Esino mipoo hamapoo soomagoo ee mi odooso. Esiga yo wulo mipoo hageeyo goo ee takomo sili. Esino Kei mi ma dokodooga simi odoos yayo goo susuga diya dagadileso ka badoso.

\* **3:14: hebise ki biso moodoo** - Daga hoogoo Isalael odooso Godee mapoo mesile poogoome, diba palame hebise diye diso. Esino Moseseeye hebise ki biso moodoo ee homo sabolo poudoome omapoo ogoloso diba hebiseso pa ee see weidooso. **3:15:** Yon 20:31 **3:16:** Yon 3:36; 10:28; Loum 5:8; 8:32; 1Yon 4:9-10 **3:17:** Luka 19:10 **3:18:** Yon 5:24 **3:19:** Yon 1:5, 9; 8:12 **3:22:** Yon 4:1-2 **3:28:** Yon 1:20; Mat 11:10 **3:31:** Yon 8:23

<sup>32</sup> Osoloso yayo egei goo sabolo osoloso yayo du goo ee takeliso. Esino odoos heeso o to mapoo tei koo teli.

<sup>33</sup> Esino odoos agayo o to duloso tei too goo oso Godee yo tei goo takeli dolone ka eligiso.

<sup>34</sup> Esiga Godeeye diye di odoos oso Godee maga to tolosos takomo siliso. Bei, Godeeye o Dio Tei su goodegelega yimapoo olo teneeso.

<sup>35</sup> Godeeye Owolo sooloo dolone goo susuga ee yayo wiligi doloso badalame kitulugu yimapoo olo teneeso.

<sup>36</sup> Esiga odoos agayo Owolo mapoo tei toga, yo badobosos kookaiyo gie badeli talaiso. Esino odoos agayo Owolo mapoo mesile poogooga, yo badobosos kookaiyo gie badeli talaimo. Esino Godeeyo kamana goo oso yimapoo kookaiyo osee malaiso.”

## 4

### *Yesu dio Samaliya sobo dio*

<sup>1</sup> Yesuye howo olugu odoos oso diya bei molone, yima hamamee deedeeso. Osolosos diayos Yoneeyo hamamee dili odoos ee dagadi goo ee, Pelisi odoos diba duso.

<sup>2</sup> Esino Yesuye odoos howo olugumos sile. Hedebe o hamamee dili odoos oso odoos howo ka olugumos silee.

<sup>3</sup> Esino Yesu yo Pelisi odoos oso o goo gooleedoo goo ee yo olo duloso, Yudiya mi poogolosos see Gelili mi mapoo wedi diso.

<sup>4</sup> Osolosos yo Gelili mi mapoo wedi dulone, Samaliya mi domo abaga dili eli omaga diso.

<sup>5</sup> Yesuye Samaliya mi mapoo sibilesos mi edebeeyo bia Saika deli mapoo peledabaso. Esiga Saika mi edebeeyo bia hagee mi hee daga hoogoo Yekobeeye owolo Yosep mapoo tenee eyo koola omapoo moloso.

<sup>6</sup> Esiga Yekobeeyo howo ou omapoo osee meleeso. Egeesi ma kulodu Yesu yo mi eli sage simiga kwasime, howo ou koola ogolone omapoo badebeiso. Biame egee osokos olo oo domo taba mapoo egeesee ka see.

<sup>7-8</sup> Osolosos Yesu o hamamee dili odoos ee edebeeyo bia mi mapoo nei neisos talame

dime, Samaliya sobo howo ou omapoo howo kalame simisos. Esemo Yesuye yimapoo egeesee takasos, “Nayo a howo keenee,” diso.

<sup>9</sup> Esino sobo egee yayo taka to ee duloso dio diso. Bei, Yu odoosos Samaliya odoos maga peegooga booloogamos silesibilisos. Esemo sobo ogosos Yesu mapoo egeesee takasos, “Nayo kasi maga amapoo howo keenee dee ka takala? Bei, no Yu odoos. Esino a Samaliya sobo,” dee takasos.

<sup>10</sup> Esemo Yesuye nei yimapoo egeesee takasos, “Nayo Godeeye wulos egee tenemolos goo ee gooleedolosos, odoos namapoo howo hoowa mo goo ee, no gooleedolosos badebei diepi, nayo amapoo kookaiyo gie badeli teneli howo ee hoowali. Osolosos nayo amapoo hoowa diepi, ayo nei namapoo howo egee teneli,” diso.

<sup>11</sup> Esemo sobo ogosos nei Yesu mapoo egeesee takasos, “Wiligi odoos, no gie badeli teneli howo ee kamapoo keelaiyo? Osolosos namapoo ou howo keli me. Osolosos howo ou hagonossee diya goobodomou.

<sup>12</sup> Esiga ibada amawe Yekob pepookos dolone see nayo toowa dalame ka sala? Bei, ibada amawe Yekobeeye howo hagee ka ou, osolosos yayo owolos dio sabolos osolosos o be sabolos howo ou hedebe hagee nalisos. Osolosos yayo howo ou hagee imapoo poogoo diso.”

<sup>13</sup> Esemo Yesuye nei yimapoo egeesee takasos, “Edebeeyo howo ou hamapoo howo naga, diba see howo nala pagalaisos.

<sup>14</sup> Esino odoos agayo howo ayo hagee keenee ee naga, yo see howo nala pagalaime. Esiga kookaiyo gie badeli teneli howo ayo yimapoo tenelai osos yima kulodu howo ou masi molone, yimapoo badobosos kookaiyo gie badeli ee tenelaisos.”

<sup>15</sup> Esemo sobo ogosos nei yimapoo egeesee takasos, “Wiligi odoos, nayo egee takos howo egee amapoo tenee, a hamamee see howo nala pegelega pagalame. Osolosos hamamee a hamapoo



see howo kala sibilega pagalame,” dee takaso.

<sup>16</sup> Esemé Yesúye yimapoo egeesee takaso, “No dileso nomo ido sibe,” diso.

<sup>17</sup> Esemé sobo ogoso nei yimapoo egeesee takaso, “A giso me,” diso.

Esemé Yesúye nei egeesee takaso, “Nayo takolone, no giso me, dee egee takoo tei goo takoo.

<sup>18</sup> Bei, no daga giso dee tiadoo egeesi mapoo obiaso. Esino giso epedee nobolo hagee bado ee tei nomonee. Esiga nayo egee takoo, tei goo takoo,” dee takaso.

<sup>19</sup> Esemé sobo ogoso nei yimapoo egeesee takaso, “Wiligi odoó, a gooleedo, no Godee maga to toloso kokodo takomo sili odoó hee nosodoo.

<sup>20</sup> Samaliya bia ibada amawe dio oso mubi hagee ma dokodoo Godeeyo hu dokodoo poudiliso. Esino Yu odoó niyo takolone hedebe Yelusalem mi mapoo Godeeyo hu dokodoo ka poudilei tekepo dee takeliso. Esiga nayo amapoo takee, mi tekepo kamapoo iyo Godeeyo hu dokodoo ka poudileiyo?” dee takaso.

<sup>21</sup> Esemé Yesúye nei yimapoo egeesee takaso, “Emegei, no mo to mapoo tei te. Edebeeyo Ma Godeeyo hu dokodoo poudalame Yelusalem mapoo osoloso mubi hamapoo sibilega pagalai biame ee olo siboso.

<sup>22</sup> Samaliya odoó niyo goomoga poudili goo ee niba gooleedele. Esino Yu odoó iyo goomoga poudili goo ee iba gooleedooso. Bei, gie badeli pidili odoó ee hedebe Yu odoó imaga sibileiso.

<sup>23</sup> Esiga biame olo siboso, esino biame ee olo simiso, tei yimapoo goomoga poudili odoó oso Dio Tei oso kitulugu maga, osoloso tei goo maga, Ma Godee mapoo goomoga poudalame. Bei, Ma Godeeye goo hageesi maga yimapoo goomoga poudili odoó omapoo diya goomegeliso.

<sup>24</sup> Godee yo Dio. Osoloso yimapoo goomoga poudili odoó oso Dio Tei maga, osoloso tei goo maga yimapoo goomoga ka poudilei tekepo,” dee takaso.

<sup>25</sup> Esemé sobo ogoso nei yimapoo egeesee takaso, “A gooleedooso, Mesaya edebeeyo takolone Keliso deli ee sibileiso. Osoloso yayo sibileso imapoo goo susuga medee eligileiso,” diso.

<sup>26</sup> Esemé Yesúye nei yimapoo egeesee takaso, “Odoó ee Mesaya aso, nobolo to egee komolo,” dee takaso.

<sup>27</sup> Egeesee semelee mapoo Yesuwo hamamee dili odoó oso edebeeyo bia mi ee ma kuloduga wedi sibileso egeino, Yesúye sobo sabolo to komolome, diya dio diso. Esino odoó heeso sobo omapoo woosolone, no ogoó goomogolo, dee takele. Osoloso odoó heeso Yesu mapoo woosolone, nayo kasalame sobo sabolo to ka kamalala, dee takele.

<sup>28</sup> Osoloso sobo oso o ou howo keli omapoo magoloso see o moso bia takalame see wedi diso.

<sup>29</sup> Sobo ogoso dileso egeesee takaso, “Niba odoó hee hagee agalame sibe. Yayo goo ayo moodoo susuga ee takaso. Esiga odoó egee Keliso malaiso.”

<sup>30</sup> Esemé moso bia susuga Yesu agalame diyadeeso.

<sup>31</sup> Odoó susuga Yesu agalame sibataga molome, Yesuwo hamamee dili odoó oso Yesu mapoo egeesee takaso, “Eligili odoó, no nei ne,” diso.

<sup>32</sup> Esino Yesúye dimapoo egeesee takaso, “A nei moloso. Esino nei ayo nali ee niba gooleedele,” dee takaso.

<sup>33</sup> Esemé Yesu o hamamee dili odoó oso diesono egeesee takaso, “Odoó heeso yimapoo nei tenee bele?” dee takaga meleeso.

<sup>34</sup> Esemé Yesúye dimapoo egeesee takaso, “Mo nei ee Godeeye goomoga goo talai goo oso. Osoloso yayo a diye diso, tou yayo amapoo tenee ee tomo dimeleso hoo poogoo mapoo hosudalame.

<sup>35</sup> Niyo egeesee takeliso, ‘a bakadio bakadio di poogoloso nei howo segei tala dileiso,’ dee takeliso. Esino ayo nimapoo taka. Niba howo puo ogoloso nei howo

**4:20:** Deut 12:5-14; Psa 122:1-5    **4:22:** 2Ki 17:29-41; Isa 2:3; Loum 9:4-5    **4:24:** 2Kol 3:17; Loum 12:1; Pil 3:3  
**4:25:** Yon 1:41    **4:26:** Maka 14:61-62    **4:34:** Yon 6:38    **4:35:** Luka 10:2    \* **4:35:** *nei howo segei* - Yesúye wudu taka hagee tei neidee eyo goo maga takele. Esino edebeeyo Godeeyo to tekepo takomo dilei goo sabolo, osoloso odoó Godee mapoo gilimado sibilei goo ee wudu taka.

segei\* mapoo ege. Bei, epedee hagee nei telegee ee talai biame hagoso.

<sup>36</sup> Esiga nei howo segei teli odoososo dia tou eyo nei epedee hamapoo toso. Osoloso diayo odoososo ee homokoko masi gooloogaloso tosibilesososo kookaiyo gie badeli talai mi mapoo mooloogoo mageliso, nei howo segeli odoososo sabolo, osoloso nei howo segei teli odoososo sabolo hodobososo goomogalame.

<sup>37</sup> Egeesi ma kulodu toso hagee takoo ee tei takoososo, 'Odoososo heesososo nei howo segeliso. Osoloso see odoososo heesososo nei howo segei ee teliso.'

<sup>38</sup> Esiga a niyo nei howo segele poogoo mi mapoo nei howo segei ee talame diye diso. Bei, mi omapoo odoososo abososo daga tou toowa toososo. Esino see niyo dilesososo talaisososo."

### *Samaliya odoososo tei too*

<sup>39</sup> Samaliya sobososo dilesososo o odoososo mapoo takolone, "Goo susuga ayo moodososo ee yayo amapoo taka," dee takeme, Samaliya odoososo susuga mi omapoo debeli oso to hagee duloso Yesu mapoo tei toososo.

<sup>40</sup> Osoloso diayo sibilesososo Yesu mapoo egeesee takasoso, "No epedee ibolososo hodobososo hamapoo badebeesoso," diso. Esemesoso Yesu yo biame bakadio dibolososo hodobososo omapoo badebeisososo.

<sup>41</sup> Egeesi ma kulodu odoososo susuga oso to yayo taka ee duloso yimapoo tei toososo.

<sup>42</sup> Esemesoso diayo sobososo omapoo egeesee takasoso, "Nayo daga Yesuwo goososo ee imapoo takeme, nee to duloso tei toososo. Esino iba epedee yayo takooga isososo duloso tei toso. Esiga iba gooleedoososo, odoososo hagee mi odoososo susuga dia gie badeli pidili odoososo osodoo," diso.

<sup>43-44</sup> Egeesi ma kulodu Yesu eyo daga egeesee takasoso, "Godee maga to tolososo kokodo takomososo sili odoososo ee tei o mosososo bia osososo goweliso," diso. Yesu biame bakadio Samaliya mi mapoo badobososo see Gelili mapoo diso.

<sup>45</sup> Osoloso yo Gelili mapoo sibilesososo peledobososo, edebeeyososo yo idososo diso. Bei, diba noseesoso Yesuye Yelusalemsoso mapoo Gababia

wo ne biame mapoo goososo susuga yayo moodososo ee diba egeiga.

### *Yesuye gamalee odoososo eyo owolo tekepo pa*

<sup>46</sup> Osoloso Yesu Gelili mi toowa omapoo badolone see Kana mi pepookososo mapoo diso. Daga mi omapoo howodee ee see yayo wain i palame moodososo.

Biame omapoo Kapeniyumsoso mi mapoo gamalee odoososo heeyososo gisososo holo paiyesoso badebeisososo.

<sup>47</sup> Esinososo gamalee odoososo ogosososo Yesuye Yudiya mi maga see Gelili mi mapoo simi goososo ee duloso Yesu mapoo diso. Yo dilesososo howolone egeesee takasoso, "Mo holo paiyesososo talame badososo. Esiga nayososo mo holo tekepososo palame Kapeniyumsoso mi mapoo abolososo sibe," dee takasoso.

<sup>48</sup> Esinososo Yesuye yimapoo egeesee takasoso, "Niyo ayo goososo toowa opusomososo di moodososo ee egelegasoso poogooga, amapoo tei talaimesoso," dee takasoso.

<sup>49</sup> Esemesoso odoososo ogosososo nei Yesu mapoo egeesee takasoso, "Wiligisoso odoososo, mososo holo teyagasoso, nayo sagasoso sibilesososo yo tekepososo palame moodee," diso.

<sup>50</sup> Esinososo Yesuye yimapoo egeesee takasoso, "Nososo see wedi di. Nee holo wedileisososo," diso.

Esemesoso odoososo yo Yesuwo to duloso tei tolosososo see o mi mapoo wedi diso.

<sup>51</sup> Osoloso yo see eli domopoo osee dimolomesoso, o tou teli odoososo osososo sibilesososo yimapoo egeesee takasoso, "Nee holo olososo weidilosososo badososo," dee takasoso.

<sup>52</sup> Esemesoso odoososo ogosososo nei dimapoo egeesee takasoso, "Osokososo howososo domososo kamapoo molomesoso, yo kekebisasoso ka koododiala?" diso. Esemesoso diayososo nei yimapoo egeesee takasoso, "Eiyososo osokososo olososo wudu magososo mapoo ka koododia," diso.

<sup>53</sup> Esemesoso odoososo yo gooleedolosososo egeesee gooleebugusososo, bei, eiyososo osokososo howososo hedebe omapoo Yesuye yimapoo takolone, "nee holo weidileisososo," dee taka goososo ee gooleebugusososo. Esemesoso odoososo susuga o mosososo kulodu debeli sabolososo osolosososo yibolososo Yesu mapoo tei toososo.

<sup>54</sup> Esiga Yesuye Yudiya mi maga see Gelili mi mapoo sibilesu goo toowa opusomo di moodoo hagoso olo bakadio diso.

## 5

*Yesuye Betesada howo sawwili ou mapoo odoo hee tekepo moodoo*

<sup>1</sup> Osoloso goo hagoso dileso koodobume, Yu odooso wo nali hee nalame Yelusalem mapoo polome, Yesu yinosee omapoo palaso.

<sup>2</sup> Esiga Yelusalem mi beele mapoo osulu hee Sipi Be Osulu deli meleeso. Osoloso ee ma kulodu howo sawwili dadabayo ou toowa meleeso. Howo sawwili dadabayo ou o hu ee Yu odoo dia toso takolone Betesada deliso. Osoloso howo ou pee mapoo hau pooba dee tiadoo egeesi meleeso.

<sup>3-4</sup> Egeeseelone odoo paigiga sabolo, osoloso odoo howo neliga sabolo, osoloso odoo kido todobia sabolo, osoloso odoo su kakawa poogoo sabolo hau omapoo tieseliso. [Osoloso diba omapoo tiesamolone, biame abo mapoo Godeeyo momaiye heeso sibilesu howo egee wolabeleso bolone osee tiesameliso. Bei, momaiyeso howo wolomeleso koodobuoga, odoo daga malalo howo ee ma kulodu meili odoo ee tekepo peliso.]

<sup>5</sup> Egeeseelone giso hee dugo 38 ee ma kulodu paiye melee onosee hau omapoo badebeiso.

<sup>6</sup> Odoo daga yayo hoogoo pailoso badebei Yesuye ogoloso yimapoo egeese takaso, “No see weidilei goomogolo?” dee takaso.

<sup>7</sup> Esem e odoo ogoso yimapoo nei egeese takaso, “Wiligi odoo, howo weeleega, a pidilame ido meilei odoo hee me. Bei, a meilame seega, odoo heeso malalo meiliso,” dee takaso.

<sup>8</sup> Esem e Yesuye yimapoo egeese takaso, “No toboloso nee kida toloso di,” diso.

<sup>9</sup> Osoloso biame omapoo odoo egee see olo tekepo poloso o kida toloso diso. Esino goo hagoso peledaba ee Yu odoo dia hasali biame omapoo ka peledaba.

<sup>10</sup> Esem e Yu odoo dia wiligi odoo tebisa oso odoo hagoso o kida toloso di ee ogoloso

yimapoo egeese takaso, “Hasali biame hamapoo odoo heeso o kida toloso dilei tei,” dee takaso.

<sup>11</sup> Esem e odoo ogoso nei egeese takaso, “Odo a tekepo pa oso amapoo takolone, mo kida toloso di, dee takeme a ka di,” diso.

<sup>12</sup> Esem e diayo yimapoo nei egeese takaso, “Odo agayo namapoo takolone, nee kida toloso di, dee ka takala?” dee takaso.

<sup>13</sup> Esino odoo yo tekepo pa ee yo medee kibiya gooleede. Bei, odoo susuga oso diya mooloogoodeme, Yesu yo mooloogoodoo ee ma kulodu esigaboodooso.

<sup>14</sup> See hamamee Yesuye odoo egee tei moso tegei ma kulodu badebei ogoloso yimapoo egeese takaso, “No, no medee goolee, no epedee olo tekepo paso. Esiga no see goo tokenee na te. Nayo goo tokenee see tobu tomo siloga, goo tokenee toowa see namapoo peledebeyaga,” dee takaso.

<sup>15</sup> Esem e odoo ogoso dileso Yu odoo dia wiligi odoo dimapoo takolone egeese takaso, “Yesuye a tekepo ka pa,” diso.

<sup>16</sup> Egeesi ma kulodu Yesuye Yu odoo dia hasali biame mapoo goo hageese teme, Yu odoo dia wiligi odoo tebisa oso komonolone yimapoo hegi goo tenelame bei mooloogooso.

<sup>17</sup> Esino Yesuye dimapoo egeese takaso, “Mo Ma biame susuga tou tomoloso. Esiga anosee biame susuga tou ka tomoloso,” diso.

<sup>18</sup> Yesuye to egeese takeme, nei diayo yo wooloomalame diya goomogaso. Bei, yayo hedebe Yu odoo dia hasali biame ee gababile, esino yayo takolone, Godee yo tei Ama, dee taka goo omaga, eyo nediliyo yo Godee sabolo hodobo teiba neme.

*Godeeye kitulugu Owolo  
Yesu mapoo tenee*

<sup>19</sup> Esiga Yesuye Yu odoo dia wiligi odoo tebisa mapoo egeese takaso, “Ayo nimapoo taka. Owolo ayo mawo goomoga goo hee talai tebile. Esino Owolo ayo hedebe Maye teli goo ee ogoloso anosee goo ee teliso.

<sup>20</sup> Maye Owolo a diya sooloo dalaga, goo yayo teli susuga ee Owolo amapoo eligiliso. Esem niyo Owolo ayo goo moodoo ee ogoloso hoowoolame, Maye amapoo goo diya toowa moodoolai eligileiso.

<sup>21</sup> Egeesi ma kulodu Maye odoo wedia hogogaduloso see gie badeli egee tenemolo, egeesee solone, Owolo ayo odoo mawo goomoga mapoo gie badeli ka tenemoloso.

<sup>22</sup> Esiga Maye odoo goo koo midili. Esino yayo Owolo amapoo kitulugu olo teneeso, ayo odoo susuga dia goo ee midilame.

<sup>23</sup> Egeesi ma kulodu Maye goo egee moodooso, odoo susuga oso Ma mapoo goomogolone o hu dokodoo poudalame. Osoloso diayo Owolo amapoo goomogolone mo hu onosee dokodoo ka poudalame. Esiga odoo agayo Owolo amapoo goomoga poudilega badoga, yo Ma Godee a diye di odoo mapoo goomoga koo poudoso.

<sup>24</sup> Esiga ayo nimapoo ka taka. Mo to duloso a diye di odoo mapoo tei teli odoo ee badoboso kookaiyo gie badeli olo tooso. Odoo egeesee seli ee o goo tokenee eyo nei talaime. Yo teli maga dagadileso see gie badeli mapoo badoso.

<sup>25</sup> Esiga ayo nimapoo ka taka. Biame oso sibileiso, esino biame ee olo simiso, odoo tei telega wedia oso Godeeyo Owolo mo to dulei. Egeesi ma kulodu edebeeyo mo to duloso tei toga, yo badoboso kookaiyo gie badeli talaiso.

<sup>26</sup> Bei, Ma yo gie badeli eyo bei yoso. Esiga Owolo ayo gie badeli eyo bei doloso badalame, yayo kitulugu amapoo olo teneeso.

<sup>27</sup> Osoloso Maye Owolo amapoo kitulugu olo teneeso, ayo odoo susuga dia goo ee midilame. Bei, a Odoo Holo.

<sup>28</sup> Esiga ayo taka to hagee duloso niba haga na dio di. Bei, biame oso sibileiso, odoo wedia dia bi mapoo egee tiesamolo oso Odoo Holo mo to duloso dia bi maga hogogadileiso.

<sup>29</sup> Egeesi ma kulodu goo tekepo tomo sili odoo diba badoboso gie badeli talame hogogadileiso. Esino goo tokenee tomo sili

odoo diba dia goo tokenee eyo nei talame hogogadileiso.

<sup>30</sup> Ayo goo mawo goolee ee tomo silei tebile. Bei, Ma a diye di oso goo midilei goo amapoo takooga, ayo goo egeesi ka midili. Esiga ayo goo midili ee diya tekepo. Bei, ayo mawo goomoga goo koo tomo sili. Esino ayo hedebe odoo a diye di oso goomoga goo ee ka tomo siloso.

### *Yesuwo goo taka*

<sup>31</sup> Esiga ayo hedebe mo goo maga takooga, edebeeyo mo to mapoo tei talai goo eyo bei mauwe dalaiso.

<sup>32</sup> Esino mo Maye mo goo maga takomoloso. Bei, a gooleedoo, yayo mo goo maga egee takoo, ee tei takooso.

<sup>33</sup> Esiga niyo odoo abo Yonee mapoo diye diso. Esem yayo dimapoo tei goo takaso.

<sup>34</sup> Esino edebeeyo mo goo maga tei goo egee takoo goo ee tei beleso, a medee koo gooleeso. Esino niyo gie badeli talame ayo goo susuga hagee nimapoo takaso.

<sup>35</sup> Yonee yo keme masi gadeebugu nimapoo teneeso. Esiga niyo biame deiyepo ee ma kulodu gadeebugu sabolo dabalame diya goomogaso.

<sup>36</sup> Esiga Yoneeye mo goo maga tei goo takomo siliso. Esino tou ayo temeleso hosudalame Godeeye amapoo tenee oso Yoneeye mo goo takomo sili ee dagadiso. Bei, tou ayo tomo sili oso Maye a diye di goo ee ka eligiso.

<sup>37</sup> Osoloso mo Maye a diye di oso mo goo maga tei goo ka takooso. Esino niyo to yayo taka ee dule, osoloso o mudu egele.

<sup>38</sup> Esiga niba Godeeyo to duloso nibada sooloo ma kulodu tei koo teli. Bei, niyo Maye diye di odoo amapoo tei koo teli.

<sup>39</sup> Niyo Godeeyo to booka mapoo hogugu medee hesigaloso gooleedoloso dobolone, nei to oso nimapoo gie badeli tenelaiso doloso doso. Esino niyo to hesiga ee mo goo takeli.

<sup>40</sup> Esino ayo nimapoo gie badeli tenelame seega, niyo amapoo sibilei koo goomegeli.



<sup>41</sup> Osoloso niyo see mo hu dokodoo poudilei, ayo haga koo gooleeso.

<sup>42</sup> Bei, a gooleedooso, niyo nibada sooloo ma kulodu Godee goolee mauwe.

<sup>43</sup> Esiga ayo mo Ma Godeeyo hu maga simiso. Esino niyo a koo goomogoso. Esino edebeeyo eyo goolee o hu maga siboga, niyo odoo egee goomogolone yo idiliso.

<sup>44</sup> Esiga niyo wulo edebeeyo nibada hu dokodoo poudilei goomogolone debeliso. Esino Godee hedebe yayo nibada hu ono dokodoo poudalame, niyo ki koo kituluguli. Esiga niyo amapoo kasee tei talaiyo?

<sup>45</sup> Esiga ayo Mayo mudugiyopoo niba odoo tokenee dee takeeya dee na goolee. Niyo goolee, Moseseeye niba pidilei gooleeso. Esino yayo Mayo mudugiyopoo niba odoo tokenee dalaiso.

<sup>46</sup> Egeesi ma kulodu niyo Moseseeye taka to mapoo tei too diepi, niba ayo taka to mapoo tei teliyo. Bei, Moseseeye mo goo ee Godeeyo to booka mapoo ka hogugu.

<sup>47</sup> Esino niyo Moseseeye to hogugu mapoo tei telega ka doso. Esiga niyo to ayo hagee takoo mapoo kasee tei talaiyo?"

## 6

### *Yesuye odoo 5,000 mapoo nei pi*

*(Mat 14:13-21; Maka 6:30-44; Luka 9:10-17)*

<sup>1</sup> Esemee goo hagoso dileso koodobume, Yesu yo see Gelili abei hodiokoo du maga dalo soowaso. Gelili abei hageeyo hu hee ee Taibilyes deliso.

<sup>2</sup> Egeeseelone Yesuye goo toowa opusomo di moodoolone, odoo paigiga susuga tekepo moodoo demelee maga, odoo mooloogoodoo toowa oso goo egee ogoloso yima hamamee mili diyadeeso.

<sup>3</sup> Esemee Yesuye o hamamee dili odoo sabolo mubi ma dokodoo peleso debeiso.

<sup>4</sup> Osoloso biame omapoo Yu odoo dia Gababia wo nali biame ee olo koola tabaso.

<sup>5</sup> Biame omapoo odoo mooloogoodoo toowa oso yimapoo sibadee ee ogoloso Yesuye Pilipi mapoo egeesee takaso, "Iyo

nei moleeso kamapoo toloso odoo susuga hamapoo ka pileiyo?" diso.

<sup>6</sup> Esiga Yesuye odoo hagee bia dimapoo moodoolai goo ee yo olo gooleedoloso badolone, see wulo Pilipiye tei too ee agalame yimapoo egeesee ka taka.

<sup>7</sup> Esemee Pilipiye nei egeesee takaso, "Odoosusuga hagee bia dimapoo iyo nei toloso pilei ee, molee toowa kamapoo talaiyo? Bei, edebeeyo odoo susuga hagee bia nei pilame molee talame biame 200 ee ma kulodu tou toowa toga, molee oso odoo hedebe hedebe di mapoo wulo nei pepooko pilei tebileime," dee takaso.

<sup>8-9</sup> Esemee Yesu o hamamee dili odoo hee Saimon-Pitayo omolo Enduluye Yesu mapoo egeesee takaso, "Hagee ma kulodu giso holo heeso wo si dee tiadoo sabolo osoloso di bakadio sabolo toloso badoso. Esino nei pepooko hagoso odoo susuga ee pilei tebile," diso.

<sup>10</sup> Esemee Yesuye o hamamee dili odoo dimapoo egeesee takaso, "Odoosusuga hagee bia bulume doloso takee," diso. Mi omapoo obu bouwe meleeso. Esemee odoo susuga go domo omapoo bulumaso. Egeesi ma kulodu hedebe gisowe hesiga ee 5,000 egeesi tugodooso.

<sup>11</sup> Esemee Yesuye wo si toloso Godee mapoo goomoga to takoloso, wo si popeiloso odoo susuga mapoo piso. Osoloso di bakadio toloso goo hedebe o egeesi moodooso. Esemee odoo susuga oso nei egee naloso diya edigasaso.

<sup>12</sup> Diba nei naloso oduguloso doboome, Yesuye o hamamee dili odoo dimapoo egeesee takaso, "Nei abo poogoo susuga ee misigamo di. Nei abo wulo gamenee peegeeyaga," diso.

<sup>13</sup> Esemee wo si dee tiadoo odoo susuga oso naloso abo poogoo ee, Yesu o hamamee dili odoo oso misigamo dileso bou tegei 12 egeesi metamagisaso.

<sup>14</sup> Odoosusuga oso Yesuye goo toowa opusomo di moodoo hagee ogoloso egeesee takaso, "Tei takoo, odoo hagee Godee maga to toloso kokodo takomo sili odoo iyo sibileiso doloso bolone debei odoo ee hagosodoo," dee takaga meleeso.

15 Esemé Yesúye díá wíligi odoo tabalame, Yesú mapoo sibilesó seselame gooleemelee goo ee, yo olo gooleedooso. Esino Yesúye olo ogoloso díba poogoloso see obusomo mubi ma dokodoo palaso.

*Yesúye howo ma dokodooga dí  
(Mat 14:22-33; Maka 6:45-52)*

16 Olo habedee mapoo Yesú o hamamee díli odoo oso yo balame abei mapoo mousó.

17 Esino Yesú sibilega molome olo neli-gaso. Esemé díba díá du mapoo toboloso Kapeníyum mí mapoo dalo soowaso.

18 Díba sudaso olo sulugamo diyadaga molome, i toowa simi oso howo kí toowa simiso.

19 Díba eli sage 5 kilomita egeesi diyadaga molome, Yesúye howo ma dokodooga dímapoo sibume egeiso. Esemé díba díya obulone díó díso.

20 Esino Yesúye dímapoo egeesee takaso, “Níba haga na ebi. Ayo síba,” díso.

21 Esemé díayo goomoga saboló yo díá du ma kulodu dabeegée díso. Egeesee semelee mapoo haga booloogelega mí díayo dí omapoo peledoboloso díá du omapoo oluguso.

*Yesú yo wo gie badeli teneli*

22 Biame hee mapoo Yesúye nei pí odoo susuga oso du dali hedebe omapoo meilesó Yesú bameleeso, daga omapoo du hedebe meleega, díayo goolee Yesú omapoo badaba bele dolone. Bei, Yesú o hamamee díli odoo díbusomo daga malalo du egee tolosó díme díayo egeiga.

23 Esemé biame domo omapoo odoo du abo maga Taibilyes mí maga sibilesó odoo mooloogoodoo toowa oso debei mapoo peledabaso. Daga mí koola omapoo Yesúye Godee mapoo goomoga to takoloso odoo susuga mapoo nei píso.

24 Esino díayo omapoo egeino, Yesú saboló o hamamee díli odoo saboló me neme, see díayo du omaga Yesú esilame Kapeníyum mí mapoo soowaso.

25 Díayo abei daloso Kapeníyum mí mapoo peledoboloso Yesú ogoloso

yimapoo egeesee takaso, “Elígili odoo, no kopolone hamapoo ka simiyo?” dee takaso.

26 Esemé Yesúye nei egeesee takaso, “Ayo nímapoo taka. Níyo a esiamo simi egee, ayo goo toowa opusomo dí moodoo ee egeiga, níyo a ka esiamo sibile. Esino níba ayo nei píme ne oso díya edígaga, níyo wuló a ka esiamo simidoo.

27 Esiga níba nei saga me pegeli egeesi haga na esiamo sílesibe. Esino níba kookaiyo moloso osee meli nei ono ka esiamo sílesibe. Odoo Holo ayo nei hagee nímapoo tenelaisó. Bei, Ma Godeeye Owoló ayo goo hagee talame amapoo kí-tulugu olo teneeso.”

28 Esemé díayo nei egeesee takaso, “Godeeye iyo ogoo goo talame díya ka goomogosomo?” dee takaso.

29 Esemé Yesúye nei dímapoo egeesee takaso, “Godee yo goomogoso, yayo díye dí odoo amapoo tei talame.”

30-31 Esemé odoo mooloogoodoo oso yimapoo egeesee takaso, “Iyo namapoo tei talame, nayo ogoo goo toowa opusomo dí ka moodolaiyo? Bei, Godeeyo to booka mapoo hogugu oso takolone, íbada amawe díó oso míwe poogoo mí mapoo sílesibume, Moseseeye Kei mí ma dokodooga wo mana deli\* ee díayo nalame teneliso. Esiga Moseseeye íbada amawe dímapoo goo hagee moodooso. Esino iyo namapoo tei talame, nayo ímapoo ogoo goo moodolaiyo?” dee takaso.

32 Esemé Yesúye nei dímapoo egeesee takaso, “Ayo nímapoo taka. Moseseeye níbada amawe díó mapoo Kei mí wo ee tenele. Esino mó Maye dímapoo wo egee ka tenee. Goo hedebe egeesi masi, yayo Kei mí ma dokodooga tei wodee ee nímapoo ka tenemoloso.

33 Esiga Godeeyo wo Kei mí ma dokodooga mí hamapoo sibeye dee taka ee aso. Bei, ayo mí odoo mapoo gie badeli ka tenemoloso.”

6:27: Yon 6:48-58 6:29: 1Yon 3:23 6:30-31: Exo 16:14-15; Num 11:7-9; Psa 78:24; Mat 16:1; Yon 2:18 \* 6:30-31: **wo mana deli** - Yu odooso dugo 40 ee ma kulodu míwe poogoo mí mapoo sílesibume, Godeeye wo mana deli hagee díayo nalame teneliso. Mana deli hagee, wo masi heliye pepooko dooboo hadali.

<sup>34</sup> Eseme nei diayo yimapoo egeesee takaso, “Wiligi odoo, biame susuga gie badeli wo egee nayo imapoo tenemelee,” dee takaso.

<sup>35</sup> Eseme Yesuye egeesee takaso, “Gie badeli teneli wo aso. Esiga odoo agayo amapoo siboga, yo see hodileime. Osoloso odoo agayo amapoo tei toga, yo see howo nala pagalaime.

<sup>36</sup> Daga ayo nimapoo takolone, goo toowa opusomo di ayo moodoo ee niyo olo egeiso, dee takaso. Esino niba amapoo tei koo to.

<sup>37</sup> Odoo mo Maye amapoo tenee oso amapoo sibileiso. Esiga dima kulodu odoo hee ayo peegoo habigileime.

<sup>38</sup> Bei, ayo Kei mi ma dokodooga mi hamapoo simi egee, mawo goomoga goo ee talame ka sibile. Esino mo Ma, a diye di odoo oso goomoga goo ee talame ka simi.

<sup>39</sup> Egeesi ma kulodu yayo goomoga goo ee hagoso. Odoo yayo amapoo tenee dima kulodu ayo hedebe osugobalai, yo koo goomogoso. Esino hamameedee biame mapoo ayo diba wedia maga see gie badeli talame hogogadileiso.

<sup>40</sup> Bei, mo Ma yo goomogoso, odoo agayo Owolo a ogoloso amapoo tei toga, diba badoboso kookaiyo gie badeli talaiso. Osoloso hamameedee biame mapoo ayo diba wedia maga see hogogadileiso.”

<sup>41</sup> Egeesee semelee biame omapoo Yesuye takolone, “A Kei mi ma dokodooga simi wo aso,” dee takeme, Yu odoo oso duloso komonolone to boowaso.

<sup>42</sup> Eseme diayo egeesee takaso, “Odoo hagee Yosepeeyo owolo Yesuso. Esiga ama dio owee dio, iba gooleedoo. Esino yayo takolone, yo Kei mi maga simi, diso. Yayo kasalame egeesee ka takayo?” dee takaso.

<sup>43</sup> Esino Yesuye nei dimapoo egeesee takaso, “Nima kulodu to boowa egee molo omapoo koodobie.

<sup>44</sup> Bei, edebeeyo eyo goolee amapoo sibileime. Esino Ma a diye di oso amapoo sibilame gi odoo oso amapoo sibileiso. Osoloso hamameedee biame mapoo ayo yo ta maga see hogadileiso.

<sup>45</sup> Osoloso Godee maga to toloso kokodo takomo sili odoo heeso egeesee hoguguso, ‘Godeeye odoo susuga eligileiso,’ diso. Esiga odoo agayo Mayo to duloso yimaga goo gooleedoga, diayo amapoo sibileiso.

<sup>46</sup> Odoo heeso Ma egele. Esino hedebe Ma Godee maga simi odoo ayo Ma egeiso.

<sup>47</sup> Esiga ayo nimapoo taka. Amapoo tei too odoo yo olo badoboso kookaiyo gie badeli tooso.

<sup>48</sup> Gie badeli teneli wo ee aso.

<sup>49</sup> Esino nibada amawe dio oso miwe poogoo mi mapoo dobolone, wo mana deli ee nolone debeiso. Esino wo mana deli ee nali odoo egee bia olo wediaso.

<sup>50</sup> Esino wo hagee Kei mi maga simi. Esiga wo hagee naga odoo egee bia wedileime.

<sup>51</sup> Kei mi ma dokodooga simi gie badeli teneli wo ee aso. Esiga edebeeyo wo hagee naga, yo badoboso kookaiyo gie badalaiso. Osoloso wo ayo tenelai egee molo ee mo hwei, mi odoo oso gie badeli talame.”

<sup>52</sup> Eseme Yu odooso to hagee duloso dima kulodu to boowolone egeesee takaso, “Odoo hagoso o hwei iyo nalame kasee tenelaiyo?” dee takaso.

<sup>53</sup> Eseme Yesuye nei dimapoo egeesee takaso, “Ayo nimapoo taka. Niyo Odoo Holo mo sawo sabolo osoloso mo hwei sabolo nelega poogooga, niba gie badeli talaime.

<sup>54</sup> Esiga mo hwei sabolo osoloso mo sawo sabolo nali odoo, diba badoboso kookaiyo gie badeli talaiso. Osoloso hamameedee biame mapoo ayo diba wedia maga see hogogadileiso.

<sup>55</sup> Mo hwei sabolo osoloso mo sawo ee tei nei dee oso.

<sup>56</sup> Egeesi ma kulodu mo hwei sabolo osoloso mo sawo sabolo nali odoo oso abolo hedebe doloso ka badoso. Osoloso anosee dibolo hodobo badoso.

<sup>57</sup> Esiga Ma a diye di oso gie badoga anosee ka badoso. Esiga mo hwei sabolo osoloso mo sawo sabolo nali odoo oso amaga gie badeli talaiso.

<sup>58</sup> Egeesi ma kulodu a nibada amawe diayo namo silee wo egeesinee. Bei, diayo wo egee ne oso dimapoo gie badeli tenele.

Esino a Kei mi ma dokodooga simi wo tei aso. Esiga edebeeyo wo hagee naga, diba badoboso kookaiyo gie badalaiso.”

<sup>59</sup> Yesuye Kapeniyum mapoo howo gisili moso ma kulodu odoosusuga mapoo eligilone goo susuga egeesee ka taka.

### *Yesuwo to ee gie badeli teneli*

<sup>60</sup> Esino Yesu yo deedee silesibili odoososo Yesuye eligi goo ee duloso egeesee takaso, “Eligi goo hagee diya koudadoo. Odoosagayo to hagee talai ka teibayo?” dee takaso.

<sup>61</sup> Egeesi ma kulodu Yesu yo deedee silesibili odoososo dima kulodu to boowoogamelee ee gooleedolosodimapoo egeesee takaso, “Goo ayo hagee takoo oso nimapoo dala teneedo?”

<sup>62</sup> Goo hagoso nimapoo dala teneega, niyo OdoosHolo ayo see Kei mi ma dokodoowedi pala ogoloso kasee goolaisomo?”

<sup>63</sup> Dio Tei oso gie badeli ka tenemoloso. Esino suso goomoga goo oso gie badeli koo tenemoloso. To ayo nimapoo taka ee Dio Tei maga simi, esiga to oso gie badeli ka tenemoloso.”

<sup>64</sup> Yesu yo daga malalo olo gooleedooso, yimapoo tei telega pagalai odoosoo ee. Osolosoyo tolosoha teli odoosmapoo tiasalai odoosonosee yo olo gooleedooso. Esiga yayo dimapoo egeesee takaso, “Odoosabonima kulodu egee do amapoo tei koo toso.

<sup>65</sup> Goo egeesi maga ayo to hagee nimapoo olo takaso, ‘Edebeeyo eyo goolee amapoo sibileime. Esino Maye amapoo sibilame kitulugu tenee odoososo amapoo sibileiso,’ dee takooso.”

<sup>66</sup> Yesuye to hagee taka koodobume, yo deedee silesibili odoosaboso yo deedee silei gowoolone yo poogoo diso.

<sup>67</sup> EsemesYesuye o hamamee dili odoos12 mapoo egeesee takaso, “Niba nosee ayo poogoo dilei goomogosomo?” dee takaso.

<sup>68</sup> EsemesSaimon-Pitaye nei egeesee takaso, “Lodee, iba odoosogu mapoo

dileiyo? Hedebe nee to oso gie badeli ka tenemoloso.

<sup>69</sup> Esiga iyo namapoo tei toso. Osolosoba gooleedooso, no tei odoosGodee maga simi oso,” diso.

<sup>70</sup> EsemesYesuye nei dimapoo egeesee takaso, “Ayo odoos12 niba olo hudi ma-gooso. Esino nima kulodu odooshebebe Saiteneeyo tou teli odoosbadoso.”

<sup>71</sup> Esiga Yesuye to hageesee taka egee, Saimon-Iskaliyot eyo owolo Yudas eyo goo ee taka. Bei, Yudas yinosee Yesuwo hamamee dili odoos12 ee ma kulodu badeli. Esino yayo hamamee Yesu ha teli odoosmapoo tiasalaiso.

## 7

### *Yesuwo omolo dio oso yimapoo tei tele poogoo*

<sup>1</sup> Esiga goo hagoso dileso koodobume, Yesu yo Yudiya mi mapoo silei gowoolone, see Gelili mi mapoo dileso siliso. Bei, Yudiya mi omapoo Yu odoosdia wiligi odoososo Yesu wooloomalame eli esiamo siliso.

<sup>2</sup> Osolosoyu odoosdia Waseme moso maga wo nalai biame\* olo koola tabaso.

<sup>3</sup> EsemesYesuwo omolo dio oso yimapoo egeesee takaso, “No mi hagee poogoloso see Yudiya mi mapoo di, no deedee silesibili odoososo nayo goo toowa opusomo di moodooga ee agalame.

<sup>4</sup> Bei, edebeeyo o goo ee odoosusuga oso gooleedalai goomogoga, yo goo mada koo moodoomo siliya. Esiga no goo toowa opusomo di medee woola moodoomo sile, odoosusuga oso nee goo ee ogoloso gooleedalame,” diso.

<sup>5</sup> Goo egeesi ma kulodu Yesuwo omolo dio oso yimapoo tei telega debeiso.

<sup>6</sup> EsemesYesuye nei dimapoo egeesee takaso, “Ayo Yelusalem mapoo dilei biame koo tugodo. Esino niba dilei goomogoga, wulo biame hee mapoo dilei tekepo.

<sup>7</sup> Mi odoososo niba hegilei eyo bei me. Esino diayo a hegiliso. Bei, ayo dia goo tokenee ee woola yilige buguga.

**6:64:** Yon 13:11    **6:65:** Yon 6:44    **6:68:** Mat 16:16    **7:1:** Yon 5:18    **7:2:** Lev 23:34    \* **7:2:** Yu odoosdia amawe diayo miwe poogoo mi mapoo dobolone, dugoso moso tegegaloso omapoo debeliso. Biame ee goolone, Yu odoosWaseme moso maga wo nali biame mapoo homo deeso waseme moso tegegaloso omapoo debeliso. Osolosoyu odoosdia wo nali hagee sabolo osolosoba ee Yelusalem mapoo naliso.    **7:5:** Diye 1:14



<sup>8</sup> Esiga niba wo ne mapoo diyadee. Esino a dileime. Bei, mo biame tugodel-ega.”

<sup>9</sup> Yesuye egeesee takoloso Gelili mi mapoo badebeiso.

*Waseme moso maga wo ne biame mapoo Yesuye odoo mapoo eligi*

<sup>10</sup> Yesuwo omolo dio oso Waseme moso maga wo nalame Yelusalem mapoo paladee neme, Yesu yinosee hamamee palaso. Esino odoo howo woola palai gowoolone mada palaso.

<sup>11</sup> Osoloso wo ne ee ma kulodu Yu odoo dia wiligi odoo oso Yesu esilone egeesee takaso, “Yesu kasomo?” dee takaso.

<sup>12</sup> Esemé odoo mooloogoodoo toowa oso mada dima kulodu Yesuwo goo maga mada takomo silesibulone, odoo aboso egeesee takaso, “Yesu odoo tekepo,” dee takaso. Esino odoo aboso takolone, “Haye, yo wulo gamenee goo maga odoo peegoo ka gilimado du,” dee takaso.

<sup>13</sup> Esino Yu odoo dia wiligi odoo bolo obulone, diayo Yesuwo goo maga to woola takele.

<sup>14</sup> Osoloso wo ne olo domo taba mapoo, Yesuye tei moso mapoo peleso Godeeyo to eligilame bei mooloogooso.

<sup>15</sup> Esemé Yu odoo oso yayo eligi goo ee duloso diya howoogadolone diayo egeesee takaso, “Odoó hagee kasi maga Godeeyo to susuga ka gooleedoowo? Bei, yo Godeeyo to gooleedeli sukulu mapoo dile,” dee takaso.

<sup>16</sup> Esemé Yesuye nei dimapoo egeesee takaso, “Ayo hagee eligi wulo mawo goolee koo eligili. Esino a diye di Godee maga simi goo ee eligili.

<sup>17</sup> Esiga Godeeye goomoga goo ee talame goomoga odoo oso ayo eligi goo hagee tei Godee maga simidoo doloso gooleedalaiso. Osoloso ayo mawo goolee koo eligili goo onosee gooleedalaiso.

<sup>18</sup> Edebeeyo eyo goolee eligimo siloga, yo o hu eyo nediliyo doko topoloso. Esino edebeeyo yo diye di odoo oso goolee ee eligimo siloga, yo diye di odoo eyo hu ee

doko topoloso. Esiga yo tei goo takeli, osoloso yo gamenee koo takeli.

<sup>19</sup> Moseseeye nimapoo tei magoo hogugu ee teneeso. Esino niba susuga tei magoo hagee koo dedeli. Esiga kasi maga niyo a wooloomalame ka sala?”

<sup>20</sup> Esemé odoo mooloogoodoo oso nei yimapoo egeesee takaso, “Bo holoso nama kulodu palaga, no to egeesee ka takoo. Iba no wooloomalame koo seeso,” diso.

<sup>21</sup> Esino Yesuye dimapoo nei egeesee takaso, “Niyo hasali biame mapoo ayo goo toowa opusomo di hedebe moodoo ogoloso niba susuga dio diso.

<sup>22</sup> Egeesi ma kulodu niba noseé Moseseeye tei magoo ee dodolone niyo hasali biame mapoo tou teliso. Bei, niyo Moseseeye tei magoo ee dodolone holope kolo kweliso. Esino holope kolo koolame tei magoo hagee Moseseeye magele. Esino nibada amawe diayo ka magoo.

<sup>23</sup> Esiga Moseseeye tei magoo gababiyaga hasali biame mapoo niyo holope kolo kweliso. Esino niyo kaseega ayo niyo hasali biame mapoo odoo paiye tekepo moodooga niyo amapoo ka komonowala?

<sup>24</sup> Esiga niyo wulo edebeeyo o suso goo moodoo ee ogoloso saga na midi. Esino tei goodee maga niyo o goo ka midi.”

*Yesu tei Kelisowo?*

<sup>25</sup> Osoloso Yesuye to taka hagee duloso, Yelusalem odoo aboso dieso nediliyo egeesee takaso, “Odoó hagee ibada wiligi odoo oso wooloomalaigo dee takemeni osobele?”

<sup>26</sup> Niba ege, yayo odoo susuga eyo howo woola eligime, odoo heeso yimapoo to hee koo takooso. Esiga ibada wiligi odoo oso goolee yo tei Keliso goolee malaiso.

<sup>27</sup> Esiga Kelisoye siboga, mi yayo simi ee odoo heeso gooleedalaimé. Esino mi Yesuye simi ee iba gooleedooso,” diso.

<sup>28</sup> Esemé Yesuye tei moso mapoo osee eligilone toso neligidi egeesee takaso, “O. Tei takoo. Mo goo sabolo osoloso ayo simi mi sabolo niba olo gooleedoodoo. Esino a mawo goolee maga sibilesó hamapoo koo

badoso. Haye, a diye di odoos eyo goo ee tei, esino niba yo gooleedele.

<sup>29</sup> Esino hebebe ayo yo ka gooleedoo. Bei, a yimaga simi osoloso yayo a nimapoo sibeye diso.”

<sup>30</sup> Esememe biame omapoo wiligi odoos diba goomogaso, Yesu omapoo talame. Esino odoos heeso yimapoo goo hee mood-ele. Bei, o biame tugodelega.

<sup>31</sup> Esino odoos mooloogoodoo ee ma kulodu odoos aboso Yesu mapoo tei tolone egeesee takaso, “Odoos heeso sibilesos goo toowa opusomos di moodooga, goo toowa opusomos di Yesuye moodoo hagee dagadileime. Esiga Yesu hagee tei iyo hagee bamolo Kelisos oso,” dee takaso.

<sup>32</sup> Esiga odoos mooloogoodoo oso Yesuwo goo maga taka ee Pelisos odoos oso duso. Esiga Pelisos odoos egee bia sabolos osolosos tei moso wiligi odoos tebisa oso tei moso gidebeli odoos diye diso, diayo dilesos Yesu talame.

<sup>33</sup> Yesuye see odoos mapoo takolone egeesee takaso, “A biame deiyepo hamapoo nibolos hodobos badalaiso. Osolosos a diye di odoos mapoo see wedi dileisos.

<sup>34</sup> Niyo a esileisos. Esino niyo a agalaime. Bei, ayo badalais mi omapoo sibilei niba tebileime,” diso.

<sup>35</sup> Esememe Yu odoosos dieso nediliyo dima kulodu egeesee takaga meleesos, “Yo kamapoo duga iyo yo egelega ka pagalaiyo? Yo ibada odoos abo Gulikis odoosos debeli mi mapoo egee do mapoo dilesos Gulikis odoos mapoo Godeeyo to eligilame ka sabele.

<sup>36</sup> Osolosos yayo imapoo takolone, iyo yo esileisos, esino iyo yo agalaime. Osolosos, yayo badalais mi omapoo sibilei iba tebileime, dee taka eyo bei ogoobo?” dee takemeleesos.

### *Gie badeli teneli howo*

<sup>37</sup> Esiga Waseme moso maga wo ne hamameedee biame egee goo toowa. Osolosos biame omapoo Yesuye tobolosos to neligidi egeesee takaso, “Odoos agayo

howo ka na poogoosomos, yo amapoo howo nala sibeye dee.

<sup>38</sup> Osolosos Godeeyo to booka mapoo hogugu oso egeesee takoosos, ‘Edebeeyo amapoo tei toga, gie badeli teneli howo oso yima kuloduga gasibileisos.’”

<sup>39</sup> Esiga Yesuye goo taka hagee, yimapoo tei too odoos mapoo Dio Tei tenelais goo ee takolone egeesee ka taka. Esino epedee omapoo Dio Tei dimapoo tenele. Bei, Yesu yo Ama mapoo pelega.

<sup>40</sup> Esiga odoos mooloogoodoo ee ma kuloduga odoos aboso Yesuye taka to ee dulosos egeesee takaso, “Odoos hagee tei Godee maga to tolosos kokodos takomos sili odoos sibabeleos iyo bamelees osodos,” dee takaga meleesos.

<sup>41</sup> Esememe odoos aboso egeesee takaso, “Yo Kelisos,” dee takemeleesos. Esino aboso egeesee takaso, “Haye, yo Kelisonee. Bei, Kelisos yo Gelili mi maga sibileime.

<sup>42</sup> Bei, Godeeyo to booka mapoo hogugu oso egeesee takoosos, ‘Kelisos yo Deibidiyo amawe dio dima kuloduga sibileisos. Osolosos yo Deibidiye badebei mi Betilihem mapoo soomagalaiso,’ diso,” dee takaso.

<sup>43</sup> Egeeseelone Yesuwo goo maga odoos abo pulosos debeisos.

<sup>44</sup> Osolosos odoos aboso Yesu talame goomogaso. Esino odoos heeso yimapoo goo hee moodele.

### *Yu odoos dia wiligi odoos tebisa oso tei tele poogoo*

<sup>45</sup> Esememe epedee omapoo tei moso gidebeli odoos oso see mosoowe wedi simi ogolosos, tei moso wiligi odoos tebisa sabolos, osolosos Pelisos odoos oso dimapoo egeesee takaso, “Bei kaseme niyo Yesu hamapoo ido sibilega ka poogoowo?” diso.

<sup>46</sup> Esememe diayo nei egeesee takaso, “Daga odoos heeso to Yesuye keli egeesee koo keli,” dee takaso.

<sup>47</sup> Esememe Pelisos odoosos nei dimapoo egeesee takaso, “Niba nosees yayo eligi goo oso peegoo gilimados disomos?”

<sup>48</sup> Esino Pelisi odoo ima kulodu osoloso ibada wiligi odoo dima kulodu odoo heeso yimapoo tei too niyo egeisomo? Haye.

<sup>49</sup> Esino odoo mooloogoodoo hagee ma kulodu, odoo aboso Moseseeye tei magoo goo ee kibiya gooleedelega tei tooso. Esiga diba Godeeyo kamana ma hemidu doso.”

<sup>50</sup> Esiga dima kulodu Pelisi odoo hee badebeiso, o hu Nikodimas. Daga yayo gesi Yesu agalame diso. Esiga yayo dimapoo egeesee takaso,

<sup>51</sup> “Moseseeye tei magoo ee dodolone iyo daga odoo o goo midilega, wulo o tokenee eyo nei tenelai ee tekeponee,” diso.

<sup>52</sup> Esememe Pelisi odoo abo sabolo osoloso wiligi odoo tebisa oso yimapoo egeesee takaso, “Nonosee Gelili odoowo? No Godeeyo to booka mapoo hogugu ee medee hesigaloso gooleede. Bei, Godeeyo toso egeesee takaso, Godee maga to toloso kokodo takomo sili odoo ee Gelili mi maga sibileime.”

[<sup>53</sup> Osoloso to kesamelee omapoo koodobuloso odoo susuga dia mosopoo diyadeeso.

## 8

### *Kooka soboso adaba giso goo heli too Yesu mapoo ido simi*

<sup>1</sup> Esino Yesu Olipi mubi ma dokodoo palaso.

<sup>2</sup> Osoloso gesikolodee Yesu yo tei moso mapoo wedi sibilesa badoboome, odoo susuga oso yimapoo simiso. Esememe yayo omapoo badolone odoo eligimeleeso.

<sup>3</sup> Esememe domo omapoo tei eligili odoo sabolo, osoloso Pelisi odoo oso kooka sobo heeso adaba giso goo heli too ee ogoloso, diayo yo ido sibilesa odoo howo woola tebediso.

<sup>4</sup> Esememe diayo Yesu mapoo egeesee takaso, “Eligili odoo, kooka sobo hagos

adaba giso goo heli tomo sileeme ogoloso yo hamapoo ka ido simi.

<sup>5</sup> Moseseeye tei magoo hogugu oso egeesee takaso, ‘Sobo heeso goo hageesee toga, yo yoso enigameleso wooloome,’ dee takaso. Esiga nayo imapoo takee, iyo sobo hamapoo goo kasee moodoolaisomo?” dee takaso.

<sup>6</sup> Goo egeesi maga Yesuye to tokenee takooga ka midilame, diayo yo kukolo egeiso.\*

Esino Yesu miyomoo gauwuloso dee woluguso mi mapoo hogugu meleeso.

<sup>7</sup> Esino diayo yimapoo osee woosa molome, Yesu yo toboloso dimapoo egeesee takaso, “Esiga nima kulodu odoo hee goo tokenee koo teli daga, odoo ogoso malalo sobo omapoo yoso ka enige,” diso.

<sup>8</sup> Osoloso Yesu see tobu miyomoo gauwuloso dee woluguso mi mapoo hogugu meleeso.

<sup>9</sup> Esememe odoo susuga sobo egee ido simi oso Yesuwo to duloso obulone, daga adaga dimaga bei mooloogooloso hedebe du, hedebe du diso. Osoloso odoo susuga olo poogoo dulone, hedebe Yesu dio sobo egee dio omapoo poogooso.

<sup>10</sup> Esememe Yesuye toboloso sobo mapoo egeesee takaso, “Sobo, no goweli odoo hamapoo debee ee kasomo? Odo hee nee tokenee eyo nei namapoo dala tenelai hedebe badolo?” dee takaso.

<sup>11</sup> Esememe sobo ogoso nei Yesu mapoo egeesee takaso, “Wiligi odoo, haye, odoo hee medoo,” diso.

Esememe Yesuye yimapoo egeesee takaso, “Anosee nee tokenee eyo nei ayo namapoo dala tenelaime. Esiga no di. Esino no tokenee see tobu na te,” dee takaso.]

### *Yesu mipoo hageeyo gadeebugu*

<sup>12</sup> Esememe Yesuye odoo mooloogoodoo mapoo see egeesee takaso, “Mipoo hageeyo gadeebugu ee aso. Esiga a dodomo sili odoo yo neliga ma kulodu

**7:50:** Yon 3:1-2    **7:52:** Yon 7:41-42    **8:5:** Lev 20:10; Deut 22:22-24    \* **8:6:** Biame omapoo Yu odoo oso tei magoo bakadio ee dodolone debeiso. Moseseeye tei magoo hogugu oso egeesee takaso, “Sobo heeso goo hageesee toga, yo yoso enigameleso wooloome,” dee takaso. Esino Loum gamalee eyo tei magoo hogugu oso egeesee takaso, “Goo ee tei.” Yesuye takolone, sobo egee wooloome, dee takooga, yayo Loum gamalee eyo tei magoo ee gababileiso. Esino yayo takolone, sobo egee na wooloome, dee takooga, yayo Moseseeye tei magoo ee gababileiso.    **8:7:** Deut 17:7    **8:11:** Yon 5:14    **8:12:** Isa 49:6; Yon 1:4-9; 9:5; 12:46

sileime. Esino yo gie badeli talai eligili gadeebugu ee talaiso,” dee takaso.

<sup>13</sup> Esem e odoo mooloogoodoo ee ma kuloduga Pelisi odooso nei egeesee takaso, “No wulo nee goo ee takomolo. Esiga nayo egee takoo goo ee iba tei koo toso,” dee takaso.

<sup>14</sup> Esem e Yesuye nei dimapoo egeesee takaso, “O. Tei takoo. A mo goo ee takooso. Esino ayo hagee takoo tei goo taka. Bei, ayo simi mi ee a gooleedoo. Osoloso ayo dilesa badalai mi onosee a gooleedoo. Esino ayo simi mi sabolo, osoloso ayo dilesa badalai mi ee, niba gooleedele.

<sup>15</sup> Esiga mi odoo dia goo ee dodolone, niyo emegei dia goo ee midiliso. Esino ayo emegei dia goo ee koo midili.

<sup>16</sup> Esino ayo emegei dia goo midilei gooleega, ayo medee tei goo maga dia goo midileiso. Bei, ayo mobusomo koo midili. Esino mo Ma a diye di sabolo goo ka midili.

<sup>17</sup> Esiga Moseseeye tei magoo hogugu oso egeesee takooso, ‘Goo hedebe mapoo odoo bakadio oso to hedebe onosee takooga, diayo egee takoo ee tei goo takooso,’ deliso.

<sup>18</sup> Esiga anosee tei magoo egee dodolone mawo nediliyo mo goo maga tei goo takooso. Osoloso mo Ma a diye di oso mo goo maga tei goo takeliso.”

<sup>19</sup> Esem e Pelisi odooso nei yimapoo egeesee takaso, “Nama kasomo?” diso. Esino Yesuye dimapoo egeesee takaso, “Mo Ma sabolo osoloso a, niba gooleedele. Niba a gooleedoo diepi, mo Ma nose niba gooleedeliyo,” dee takaso.

<sup>20</sup> Yesuye tei moso ma kulodu emegei di molee tenee mageli koola omapoo to-bodulone, goo susuga hagee eligimeleeso. Esino odoo heeso yo tele. Bei, o biame tugodelega.

### *Yesu eyo o goo taka*

<sup>21</sup> Esem e Yesuye see dimapoo egeesee takaso, “Ayo peegoo duga, niyo a esileiso. Esino niba goo tokenee ma kulodu

dobolone, nibada goo tokenee hapelega poogoloso wedileiso. Osoloso ayo badalai mi omapoo sibilei, niba tebileime,” dee takaso.

<sup>22</sup> Esino Yu odoo oso egeesee takaso, “Bei kasi maga Yesuye takolone, yayo badalai mi omapoo sibilei, iba tebileime, dee ka takayo? Iba gooleedele, Yesu eyo nediliyo wooloomalame ka sabele,” diso.

<sup>23</sup> Esem e Yesuye dia to duloso nei egeesee takaso, “Niba mipoo hamapoo debeli odoo. Esino a Kei mi ma dokodooga simi. Esiga niba mi odoo. Esino a mi odoonee.

<sup>24</sup> Goo egeesi maga ayo nimapoo takolone, nibada goo tokenee hapelega poogoloso wedileiso, dee ka taka. Bei, ayo mo goo\* maga taka mapoo niyo tei telega poogooga, niba nibada goo tokenee hapelega poogoloso wedileiso.”

<sup>25</sup> Esem e diayo nei egeesee takaso, “No odoo ogumo?” diso. Esem e Yesuye nei dimapoo egeesee takaso, “Ayo nimapoo eligi bei mooloogooloso abaga simino epedee hamapoo mo goo nimapoo olo eligiso.

<sup>26</sup> Esiga ayo nimapoo tokenee odoo dee takalai goo bei moloso. Esino a diye di odoo oso takeme du goo ono ayo odoo mapoo ka takomo sili. Bei, yo tei goo takeli.”

<sup>27</sup> Egeesi ma kulodu Yesuye amamo goo takano, Yu odooso duloso medee kibiya gooleedele.

<sup>28</sup> Esem e Yesuye see dimapoo egeesee takaso, “Niyo Odoo Holo a tolosa dokodoo poudoga,\* omapoo niyo mo goo ee medee kibiya gooleedalaiso. Osoloso ayo mawo goomoga goo koo tomo sili goo onosee niba gooleedalaiso. Bei, mo Maye amapoo taka goo hedebe ee ayo ka eligimo sili.

<sup>29</sup> Esiga a diye di odoo ee abolo hodobo badoso. Yo a koo poogoo dili. Bei, ayo hedebe yo goomogalai goo ono tomo sili.”

<sup>30</sup> Esiga Yesuye goo hagee takeme, odoo susuga yimapoo tei tooso.

**8:14:** Yon 5:31-32; 7:28    **8:15:** Yon 12:47    **8:16:** Yon 5:30; 8:29    **8:17:** Deut 19:15    **8:18:** 1Yon 5:9    **8:20:** Yon 7:30    **8:21:** Yon 7:34; 13:33    **8:23:** Yon 3:31    \* **8:24:** *ayo mo goo* - Godeeyo to Guliki odoo dia toso hogugu mapoo Yesuye takolone, yo aso, dee taka egee yo Keliso, Godeeye hesia dolone ka taka.    **8:28:** Yon 3:14    \* **8:28:** *a tolosa dokodoo poudoga* - Yesuye taka hageeyo bei ee, yo homo bulubo magoo ma dokodoo yoguso enigaloso pouduloso tulugilei ee taka.



*Tei goo oso odoo tokenee ma kuloduga peegoo gilimado dili*

<sup>31</sup> Esemé Yesuyé Yu odoo yimapoo tei telaga odoo mapoo egeesee takaso, “Niyo ayo eligi goo hamapoo medee kibiya kookoodoloso dodomo silesiboga, niba tei mo hamamee dili odoo dalaiso.

<sup>32</sup> Esiga niba tei goo ee gooleedalaiso. Osoloso tei goo oso niba nei mauwe tou teli goo maga peegoo gilimado dileiso.”

<sup>33</sup> Esemé diayo Yesu mapoo egeesee takaso, “Eibalahameeyo amawe dio ibaso. Esiga iba odoo heeso wiligi doloso bado-boome, hegi goo ma kulodu nei mauwe o tou tolone ka debele. Bei kasi maga nayo imapoo takolone, ‘hegi goo ma kuloduga puo pagalaiso,’ dee ka takala?”

<sup>34</sup> Esemé Yesuyé nei dimapoo egeesee takaso, “Ayo nimapoo taka. Edebeeyo goo tokenee tolone badoga, yo goo tokeneeso wiligi doloso ka badoso.

<sup>35</sup> Esiga nei mauwe tou teli odoo ee o wiligi odoo eyo soosoo sabolo kookaiyo osee koo badeli. Esino owoloye o soosoo sabolo kookaiyo osee badeliso.

<sup>36</sup> Esiga Owolo ayo niba tokenee goo ma kuloduga puo poogooga, niba tokenee goo ma kuloduga tei olo puo pagalaiso.

<sup>37</sup> A gooleedooso, niba Eibalahameeyo amawe dio. Esino niyo a wooloomalame ka goomogoso. Bei, ayo eligi goo ee nima kulodu malai, niba koo goomogoso.

<sup>38</sup> Mo Maye goo amapoo eligi ee ayo nimapoo ka takomo siloso. Esino niba noseé nibada amaye takeme dugoo ee tomo silesiboso.”

<sup>39</sup> Esemé diayo nei Yesu mapoo egeesee takaso, “Ibada ama ee Eibalaham,” diso.

Esemé Yesuyé nei dimapoo egeesee takaso, “Niba tei Eibalahameeyo owolo dio diepi, niyo goo Eibalahameeye moodoo egeesee moodoolone debeli.

<sup>40</sup> Esino tei goo Godeeye amapoo tenee ee ayo takomo sileeme, niyo a wooloomalame seeso. Esino Eibalaham goo egeesi moodele.

<sup>41</sup> Esiga goo nibada amaye moodoo hedebe onosee niyo ka moodoomo siloso.”

Esemé diayo Yesu mapoo egeesee takaso, “Iba giba holonee. Esino ibada Amadee ee hedebe Godeeso,” dee takaso.

<sup>42</sup> Esemé Yesuyé nei dimapoo egeesee takaso, “Godee tei nibada Ama diepi, a niyo diya goolee sabolo debeliyo. Bei, a Godee maga sibilesó hamapoo ka badoso. Yayó a diye diso. Esiga a mawo goolee sibilesó hamapoo koo badoso.

<sup>43</sup> Niba kasi maga goo ayo taka ee duloso gooleedelega ka dabala? Niba goo ayo eligi ee dulei gowoolone ka seeso.

<sup>44</sup> Esiga nibada ama ee Saiten. Esiga niyo o goo ogoloso yayó goomoga goo ee talame diya goomegeliso. Bei, bei mooloogoo biame maga epedee hamapoo sibulone yo odoo wooloomali doloso badebeiso. Osoloso yo gamenee takeli odoo. Bei, yima kulodu tei goo takeli me. Osoloso yayó gamenee takooga, yayó wulo o goo ee takeli. Bei, yo gamenee takeli odoo. Osoloso gamenee takeli eyo bei yoso.

<sup>45</sup> Esino ayo nimapoo tei goo takeliso. Goo egeesi maga niyo mo to mapoo tei koo teli.

<sup>46</sup> Esiga goo tokenee ayo moodoo ee niyo egeisomo? Haye, me. Ayo tei goo takomo silino, niyo kaseega mo to mapoo tei tele ka pagala?

<sup>47</sup> Godeeyo odoo oso o to duloso omapoo mesimo silesibiliso. Esino niba Godeeyo odoonee. Esiga goo egeesi maga niba o to duloso omapoo mesilega ka poogooso.”

*Yesuyé Eibalaham dagadi*

<sup>48</sup> Esemé Yu odooso nei Yesu mapoo egeesee takaso, “Iyo namapoo takolone no Samaliya odoo bo holo pala, dee takemeni ee tei taka.”

<sup>49</sup> Esemé Yesuyé nei dimapoo egeesee takaso, “Mo kulodu bo holo koo badoso. Esino ayo mo Mayo hu dokodoo poudiliso. Esino niyo abolo takolone mo hu dokodoo poudilega pegeliso.

<sup>50</sup> Esiga edebeeyo mo hu dokodoo poudalame ayo goo hagee koo tomo siloso. Esino odoo heeso diya goomogoso, edebeeyo mo hu dokodoo poudalame. Yo goo midili odoo.

<sup>51</sup> Esiga ayo nimapoo tei goo taka. Odo agayo mo to mapoo mesimo siloga, yo talaime.”

<sup>52</sup> Esem Yu odooso Yesu mapoo egeese takaso, “Iba epedee olo gooleedo, no tei nee kulodu bo holo bado. Bei, nayo daga egeese takaso, ‘odoo agayo nee to mapoo mesimo siloga, yo talaime,’ diso. Esino ibada amawe Eibalaham dio osoloso Godee maga to toloso kokodo takomo silesibili odoo diba olo wediaso.

<sup>53</sup> Esiga ibada amawe Eibalaham ee nayo dagadi doloso ka takala? Bei, ibada amawe Eibalaham olo taso, osoloso Godee maga to toloso kokodo takomo silesibili odoo onosee olo wediaso. Egeesi ma kulodu nayo goolee no odoo ogu gweliyo?” dee takaso.

<sup>54</sup> Esem Yesuye nei dimapoo egeese takaso, “Ayo goo tomo sili hagee mo hu dokodoo poudalame ka tomo sili diepi, goo hagee bei mauwe meliyo. Esino mo Maye mo hu dokodoo ka poudomoloso. Yo niyo takolone nibada Godee deliso.

<sup>55</sup> Esino niba yo gooleede. Esino ayo yo ka gooleedo. Esino ayo takolone, ‘a o goo gooleede,’ dee takeli diepi, a game-nee takeli odoo niba egeesi masi badeliyo. Esino a o goo gooleedo, osoloso a to yayo taka mapoo mesimo siliso.

<sup>56</sup> Esiga nibada amawe Eibalaham goomogaso, ayo mipoo hamapoo simi ee agalame. Osoloso a olo sibume, yayo ogoloso diya goomogaso.”

<sup>57</sup> Esem Yu odooso nei yimapoo egeese takaso, “No dugo 50 tugodele. Esino nayo takolone, no Eibalaham olo egeiso, dee ka takala?”

<sup>58</sup> Esem Yesuye nei dimapoo egeese takaso, “Ayo tei goo nimapoo ka taka. Bei, Eibalaham soomagelega badoboome, daga a olo badebeiso.”

<sup>59</sup> Yesuye egeese taka duloso diayo komonolone, yo toloso enigilame sino poogooso. Esem Yesu mada wua moloso tei moso ma kuloduga peegoo diso.

## 9

*Yesuye odoo howo neliga osee soomago ee tekepo pa*

<sup>1</sup> Esiga Yesu yo dulone odoo hee egeiso. Odo egee oweeye soomagolone howo neliga o egeesi soomagoona.

<sup>2</sup> Esem Yesu o hamamee dili odoo oso Yesu mapoo egeese takaso, “Eligili odoo, odoo agamo goo tokenee oso yo howo neliga egeese ka soomagoowo? O goo tokenee oso egeese ka soomagoowo, o owee dio ama dio eyo goo tokenee maga howo neliga egeese ka soomagoowo?” dee takaso.

<sup>3</sup> Esem Yesuye egeese takaso, “Odo howo neliga hagee o goo tokenee oso egeese ka sele, osoloso ama dio owee dio eyo goo tokenee oso egeese ka sele. Esino odoo howo neliga soomagoo goo eyo bei ee egeesi moloso. Godeeye kitulugu goo ee yimaga woola yilige bigilame, yo howo neliga egeese ka soomagoo.

<sup>4</sup> Esiga biame osee mologa, iba odoo a diye di eyo tou ee tomo. Esino gesi olo siboga, odoo heeso tou hee talai tebileime.

<sup>5</sup> Esiga ayo mipoo hamapoo osee hagee bado oso mipoo hamapoo keme masi gadeebugu ka moloso.”

<sup>6</sup> Yesu to hagee takoloso mi mapoo magawo pagamagoloso, deeso deeseegoloso omapoo beese doloso odoo howo neliga eyo howo mapoo hediso. <sup>7</sup> Osoloso odoo omapoo egeese takaso, “No Sailowam howo ou mapoo nee howo hapalame di,” diso. Esiga Sailowam hu eyo bei ee diye dolone takeli. Esem odoo egee dileso o howo hapoome tekepo paso. Esem yo see wedi sibulone medee ogomo simiso.

<sup>8</sup> Egeesi ma kulodu odoo koola mapoo debeli sabolo osoloso odoo aboso yo daga eli domopoo bi howolone badoboome egei oso egeese takaso, “Odo hagee eli palaga bi howolone badoboome osobe,” diso.

<sup>9</sup> Esem odoo aboso egeese takaso, “O. Odo hedebe ogoso,” dee takemeleeso. Esino odoo aboso egeese takaso, “Haye, odoo ogosonee, odoo hee yo masi molodoo,” dee takemeleeso. Esem odoo

eyo egeesee takaso, “Odoe egee tei aso,” dee takemeleeso.

<sup>10</sup> Esemē diayo yimapoo egeesee takaso, “Nee howo kaseme tekepo ka payo?” diso.

<sup>11</sup> Esemē yayo egeesee takaso, “Ede-beeyo takolone Yesu deli oso mi mapoo magawo pagamagoloso, deeso deesegoloso omapoo beesee doloso mo howo mapoo basago hediloso amapoo egeesee taka, a Sailowam howo ou mapoo mo howo hapalame diyena. Esemē a dileso mo howo keesee hapoono tekepo ka poowa,” diso.

<sup>12</sup> Esemē diayo yimapoo egeesee takaso, “Odoe egee kasomo?” Esemē yayo dimapoo egeesee takaso, “A gooleedele,” dee takaso.

*Pelisi odooso odoe howo neliga tekepo pa mapoo woosa*

<sup>13-14</sup> Yesuye odoe howo neliga tekepo pa hagee, Yu odooso hasali biame mapoo tekepo ka pa. Esiga odoe aboso odoe howo neliga Yesuye tekepo pa ee Pelisi odoe mapoo ido diso.

<sup>15</sup> Esemē Pelisi odooso yimapoo egeesee takaso, “Nee howo kaseme tekepo ka payo?” diso. Esemē nei yayo dimapoo egeesee takaso, “Yesuye basago beesee doloso mo howo mapoo hedime, mo howo howomoo keesee hapoono, see tekepo ka pa,” dee takaso.

<sup>16</sup> Egeesee taka duloso Pelisi odoe aboso egeesee takaso, “Yesu hagee Godee maga sibile. Bei, yo Godee maga simi diepi, ibada hasali biame mapoo tou tolone tei magoo ee gababile pegeliyo,” diso.

Esino odoe aboso egeesee takaso, “Kasee maga goo tokenee teli odoe oso goo toowa opusomo di hageesee ka moodoomo silosomo?” dee takemeleeso. Goo egeesi maga Pelisi odooso Yesuwo goo maga dieso dima kulodu domo pi meleeso.

<sup>17</sup> Osoloso Pelisi odooso odoe howo neliga tekepo pa mapoo see tobu egeesee woosaso, “Odoe nee howo tekepo pa ee odoe ugu gooleesomo?” diso. Esemē odoe ogoso nei egeesee takaso, “Ayo goolee, yo Godee maga to toloso kokodo takomo sili odoe gooleeso,” dee takaso.

<sup>18</sup> Esino odoe hagee daga tei howo noluguloso badebei goo omapoo Yu odoe dia wiligi odoe diba tei dele. Esiga tei goo beleso gooleedalame, diayo owee dio ama dio idooso.

<sup>19</sup> Osoloso diba olo sibileso tebisamolome, wiligi odooso dimapoo egeesee takaso, “Niyo takolone, nowolo howo neliga osee soomagoogo, dee takemeni ee hagosomo? Esiga kasi maga epedee o howo olo tekepo poloso ka badosomo?” dee takaso.

<sup>20</sup> Esemē owee dio ama dio oso nei egeesee takaso, “O. Hagee tei ibada owolo howo neliga osee soomagoo oso, goo ee iba gooleedooso.

<sup>21</sup> Esino o howo kasee tekepo payo? Iba gooleedele. Osoloso odoe yo tekepo pa onosee, iba gooleedele. Esiga niso ibada owolo mapoo woosalo ege. Bei, yo olo kauwudooga, yayo o goo ee nimapoo takalai teiba,” dee takaso.

<sup>22</sup> Diayo dia wiligi odoe tebisa ogoloso obulone wulo dimapoo to hageesee ka taka. Bei, Yu odoe dia wiligi odoe oso goomoga goo hageesee olo magooso, “Ede-beeyo takolone Yesu ee Keliso dee takooga, yo Yu odoe dia howo gisili moso ma kulduga hu taloso peegoo magoo damalaiso,” dee takaso.

<sup>23</sup> Goo egeesi maga owee dio ama dio oso takolone, “Yo olo kauwudooga, yayo o goo ee nimapoo takalai teiba,” dee ka taka.

<sup>24</sup> Esiga Yu odoe dia wiligi odoe oso see tobu odoe howo neliga tekepo pa ee idolooso yimapoo egeesee takaso, “Godeeyo howo woola nayo imapoo tei goo takee. Bei, odoe no tekepo pa egee goo tokenee teli odoe, iba gooleedoo.”

<sup>25</sup> Esemē odoe ogoso nei egeesee takaso, “A gooleedele, yo goo tokenee teli odoe bele, o, goo tekepo teli odoowo. Egeesi ma kulodu goo hagee a gooleedoo, a daga howo neliga badebeiso. Esino epedee hamapoo mo howo olo tekepo poloso see ka ogomo siloso.”

<sup>26</sup> Esemē diayo nei yimapoo egeesee takaso, “Odoe hagosomo namapoo kasee moodoome, nee howo see tekepo ka payo?” dee takaso.

<sup>27</sup> Esemе odoo ogoso nei egeesee takaso, “Ayo nimapoo goo susuga olo takaso. Esino niyo mo to medee dule. Esiga niyo bei kasalame goo egee see dulame ka sala? Esiga niba noseе yayo di hamamee dilei goomogolone ka sala?” dee takaso.

<sup>28</sup> Esemе diayo yo manolone yimapoo egeesee takaso, “No o hamamee dili odoo. Esino iba Moseseeyo hamamee dili odoo.

<sup>29</sup> Bei, Godeeye Moses mapoo to taka ee, iba gooleedooso. Esino odoo no tekepo pa ee, iba gooleedele.”

<sup>30</sup> Esemе odoo ogoso nei egeesee takaso, “Goo hagee kaseeyo? Yayo mo howo tekepo paso. Esino niba o goo gooleedel-ega ka dosomo?”

<sup>31</sup> Bei, iba gooleedoo, Godee yo goo toke-nee teli odoo eyo to koo duli. Esino yayo o to mapoo mesiloso yayo goomoga goo tomo silesibili odoo eyo to ee duli.

<sup>32</sup> Esiga mipoo hagee bei mooloogoo maga simino epedee hamapoo, odoo heeso odoo howo neliga soomagoo ee tekepo paso dee taka goo ee iba dule.

<sup>33</sup> Esino Yesuye mo howo tekepo ka pa. Esiga yo Godee maga sibile diepi, yayo goo hee moodoolai tebile pegeliyo.”

<sup>34</sup> Esemе diayo gowoolone nei yimapoo egeesee takaso, “No gie daga soomagoo biame maga simino epedee hamapoo, no goo tokenee teli odoo doloso badebeiso. Esiga nayo kasalame imapoo goo eligil-ame ka sala?” dee takaso. Esemе diayo yo toloso howo gisili moso ma kuloduga peegoo ido diso.

#### *Diowo howo seme*

<sup>35</sup> Esino Yu odoo dia wiligi odoo tebisa oso odoo howo neliga tekepo pa ee howo gisili moso maga peegoo ido di goo ee Yesu yo duso. Esiga yayo odoo egee ogoloso yimapoo egeesee takaso, “No Odoo Holo mapoo tei tosomo?” dee takaso.

<sup>36</sup> Esemе odoo ogoso nei egeesee takaso, “Odoo Holo ee odoo ogumo? Amapoo takee, eseega ayo yimapoo tei ka talaiya,” dee takaso.

<sup>37</sup> Esemе Yesuye yimapoo egeesee takaso, “No yo olo egeiso. Esiga yayo epedee nobolo to egee komoloso,” diso.

<sup>38</sup> Esemе odoo ogoso nei egeesee takaso, “Lodee, a namapoo tei toso.” Osoloso yo gasuwoloso badolone Yesuwo hu dokodoo poudooso.

<sup>39</sup> Esemе Yesuye egeesee takaso, “Ayo mipoo hamapoo goo midilame simiso. Goo ee odoo howo neliga oso see medee agalame, osoloso odoo howo tekepo ee see howo neligalame,” dee takaso.

<sup>40</sup> Esemе Pelisi odoo abo koola omapoo tebisamelee oso Yesuye to egeesee taka ee duloso yimapoo egeesee takaso, “Nayo goolee, iba howo neliga goolone, egeesee ka takala?” dee takaso.

<sup>41</sup> Esemе Yesuye nei dimapoo egeesee takaso, “Niba howo neliga odoo diepi, niba goo tokenee teli odoo dele pegeliyo. Esino niyo takolone, niba howo neliga odoonee dee egee takoo oso niba goo to-kenee teli odoo doloso osee ka doso.”

## 10

### *Sipi be bali odoo eyo goo maga wudu taka*

<sup>1</sup> Yesuye see egeesee takaso, “Ayo nimapoo taka. Edebeeyo sipi be beele ma kulodu osulu maga gadilega, see eli hee maga sibilesi kulodu gaduga, yo heli teli odooso.

<sup>2</sup> Esino osulu maga gadili odoo ee tei sipi be bali odoo oso.

<sup>3</sup> Esiga osulu gibadeli odoo oso osulu yadeliso, sipi be bali odoo oso kulodu gadilame. Osoloso sipi beso dia bali odoo eyo to duliso. Osoloso dia bali odooso dia hu hesigaloso, beele ma kuloduga peegoo gilimado diliso.

<sup>4</sup> Osoloso yayo o sipi be susuga peegoo gilimado dilesi, daga yayo malalo duga, diba yima hamamee diliso. Bei, diba o to gooleedooga.

<sup>5</sup> Esino diba odoo heeso di hamamee koo dili. Esino ee ma kulodu odoo heeso diba sibilame haga, diayo yimaga kukulo dileiso. Bei, diba odoo egeeyo to gooleedelega.”

<sup>6</sup> Yesuye wudu takolone odoo mapoo hageesee eligiso. Esino wudu taka goo eyo bei ee diba medee kibiya gooleedele.



### *Yesu yo osulu*

<sup>7</sup> Osoloso Yesuye dimapoo see egeesee takaso, “Ayo nimapoo taka. Sipi be beelee eyo osulu ee aso.\* <sup>8</sup> Esino a sibilega bado-boome, odoo susuga daga malalo sibadee egee bia ee heli teli odooso. Esiga sipi beso dibada to duloso mesile.

<sup>9</sup> Osulu aso. Edebeeyo amaga gaduga, yo Godeeye wiligi doloso badeli goo mapoo gadilesa, kookaiyo badoboso gie badeli talaiso. Osoloso yo siloga, Yesuye medee bamalaiso.

<sup>10</sup> Esiga heli teli odoo ee wulo heli talame, osoloso odoo wooloomalame, osoloso tokenee palame ka sibili. Esino ayo simi hagee, niyo gie badeli toloso, goo tekepo susuga ee tolone dabalame ka simi.”

### *Yesu sipi be medee bali odoo*

<sup>11</sup> “Esiga sipi be medee bali odoo ee aso. Egeesi ma kulodu sipi be medee bali odoo oso o sipi be ee gooloogalame o gie badeli teli mapoo mageliso.

<sup>12</sup> Esino nei talame tou teli odoo oso sipi be medee belega pegeliso. Bei, yo sipi be bali odoonee, osoloso sipi be hagee tei onee. Esiga dobu so simi ogoloso sipi be omapoo poogoloso yo pulo diliso. Eseega dobu soso sibilesa sipi be abo wooloomaga, abo kukulo diliso.

<sup>13</sup> Bei, nei talame tou teli odoo oso sipi be medee goolega, wulo pulo diliso.

<sup>14-15</sup> Esiga sipi be medee bali odoo ee aso. Egeesi ma kulodu mo Maye mo goo ee gooleedoloso ka badoso. Osoloso ayo mo Mayo goo onosee gooleedoloso ka badoso. Goo egeesi masi mo sipi beso a gooleedoloso ka doso, osoloso ayo diba gooleedoloso ka badoso. Esiga mo sipi be ee gooloogalame ayo mo gie badeli teli mapoo magalaiso.

<sup>16</sup> Osoloso mo sipi be abo\* dono, diba mooloogoodoo hagee ma kulodu mauwe.

\* **10:7:** Edebeeyo Godeeye wiligi doloso badeli goo mapoo gadili ee Yesu maga ka gadili. **10:8:** Jer 23:1-2; Ezek 34:2-3 **10:11:** Psa 23:1; Yili 7:17 **10:12:** Diye 20:29 **10:14-15:** Mat 11:27; 1Yon 3:16 **10:16:** Isa 56:8; Ezek 34:23 \* **10:16: sipi be abo** - odoo hagee Yu odoonee ee takooso. Osoloso mooloogoodoo hagee Yu odoo ee takooso.

\* **10:17:** Pil 2:8-9 \* **10:22:** Daga hoogoo Siliya biaso Yu odoo sabolo ha temeleso Yelusalem peedee buguso. Osoloso diayo tei moso mapoo be wooloso, siloso dia godee mapoo teneeso. Esiga tei moso ee Godeeyo howo woola tokenee paso. Osoloso see hamamee Yu odooso Siliya bia habuguloso Yelusalem see dieso peedee dooso. Osoloso see tobu tei moso ee Godeeyo dalame peegoo magoloso see osulu yaso.

Esiga a goomogoso, diba nosee gilimado sibilame. Osoloso diayo mo to duleiso. Osoloso diba soosoo hedebe doloso dogo, bali odoo hedebeso bamalaiso.

<sup>17</sup> Esiga mo Maye a diya gweliso. Bei, ayo mo gie badeli ee teli mapoo magalaiso, osoloso see ka talame.

<sup>18</sup> Esiga odoo heeso mo gie badeli ee amaga peedee dalaime. Esino mawo goomoga goo ee dodolone, ayo mo gie badeli ee wulo wulayo tenelaiso. Esiga ee ma kulodu, ayo mo gie badeli ee odoo halo teli mapoo magalai amapoo kitulugu moloso, osoloso see peedee dalai amapoo kitulugu moloso. Bei, goo hagee mo Maye ayo moodoolame amapoo kitulugu sabolo olo takaso.”

<sup>19</sup> Esemu Yu odooso Yesuwo to duloso dieso dima kulodu toso agadigilone abo piso.

<sup>20</sup> Egeeseelone odoo aboso egeesee takaso, “Yo bo holo peleso badolone ka halaboomo silo. Esiga o to na dui,” dee takaga meleeso.

<sup>21</sup> Esino odoo aboso egeesee takaso, “Odo bo holo pala oso goo tekepo hageesi kasee takomo sileiyo? Osoloso bo holoso odoo howo neliga tekepo palai teibayo?” dee takaga meleeso.

### *Yu odooso Yesu mapoo tei tele poogoo*

<sup>22</sup> Esiga wau biame mapoo Yelusalem mi mapoo Yu odooso dia tei moso osulu ya ee gooleebugulone wo neso.\*

<sup>23</sup> Osoloso wo ne biame omapoo Yesuye tei moso tegei beelee ee ma kulodu Solomonowo hau mapoo sileeso.

<sup>24</sup> Esemu Yu odooso yo ogoloso sibilesa tobolo sidiboloso yimapoo egeesee takaso, “Iba biame susuga nee goo mapoo diya goolone ka doso. Esiga nayo imapoo woola takee, no tei Kelisowo?” dee takaso.

<sup>25</sup> Esemé Yesúye nei dimapoo egeesee takaso, “Ayo nimapoo olo takaso. Esino niyo mo to mapoo tei tele. Esiga goo toowa opusomo di ayo mo Mayo hu maga moodeli oso nimapoo mo goo ee eligiso.

<sup>26</sup> Esino niyo tei koo toso. Bei, niba mo sipi benee.

<sup>27</sup> Mo sipi beso mo to duliso. Osoloso a diba gooleedoo. Osoloso diayo ama hamamee dedeliso.

<sup>28</sup> Osoloso ayo dimapoo kookaiyo badoboso gie badeli teneliso. Osoloso diba Godee maga pileime. Osoloso diba mo dee maga odoó heeso peedee dalaime.

<sup>29</sup> Mo Maye mo sipi be hagee amapoo olo teneeso. Osoloso yayo kitulugu oso odoó susuga oso kitulugu ee dagadi. Esiga odoó heeso mo Mayo dee maga peedee dalai tebile.

<sup>30</sup> A mo Ma sabolo hedebe.”

<sup>31</sup> Esemé Yu odooso Yesu enigilame yo see tobu misigaso.

<sup>32</sup> Esemé Yesúye nei dimapoo egeesee takaso, “Mo Maye amapoo kitulugu teneme, ayo nibada howo woola goo tekepo moodoomo sileeso. Esino goo tekepo susuga ayo moodoo ee ma kulodu goo hee kaso tokenee daga, niyo a wooloomalame ka sala?” dee takaso.

<sup>33</sup> Esemé see Yu odoó dia wiligi odoó tebisa oso egeesee takaso, “Nayo goo tekepo moodoo maga iyo no wooloomalame koo seeso. Esino nayo Godeeyo goo maga to tokenee taka ee duloso no wooloomalame ka seeso. Bei, no wulo odoó wuluge, esino see nayo takolone, no Godee, dee takeliso.”

<sup>34</sup> Esemé Yesúye nei dimapoo egeesee takaso, “Nibada tei magoo ee ma kulodu Godeeye egeesee takooso, ‘Niba godee,’ deliso.

<sup>35</sup> Egeesi ma kulodu iba gooleedoo, Godeeyo to booka mapoo hogugu oso tei goo takooso. Esiga Godeeye o to mapoo tei teli odoó mapoo takolone, diba godee, deliso.

<sup>36</sup> Esiga ayo takolone, a Godeeyo Owolo doloso ka takano, bei kasi maga niyo

takolone, ayo Godeeyo goo maga to tokenee takoo, dee ka takala? Bei, mo Maye a hesialoso mipoo hamapoo sibeye diso.

<sup>37</sup> Esiga ayo mo Maye goomoga goo ee moodelega badoga, niyo to ayo taka mapoo tei tele ka peegee.

<sup>38</sup> Esino niyo to ayo taka mapoo tei tele poogolone, wulo goo ayo hagee tomo silo ee ogoloso to ayo taka mapoo tei ka te. Bei, niyo egeesee seega, mo Ma asalo hedebe doloso hagee do goo ee niba gooleedalaiso.”

<sup>39</sup> Esemé odoó susuga oso to hagee duloso Yesu see talame seme, Yesu dimaga peegoo diso.

<sup>40</sup> Osoloso Yesu see Yoden howo dalo sooweleso, Yoneeye daga odoó howo olugumelee mi omapoo badebeiso.

<sup>41</sup> Esemé odoó susuga oso yimapoo sibilesó egeesee takaso, “Yoneeye goo toowa opusomo di moodoomo sile. Esino yayo Yesuwo goo maga taka goo susuga ee tei goodoo,” dee takaga meleeso.

<sup>42</sup> Esemé odoó susuga omapoo debeli oso Yesu mapoo tei tooso.

## 11

### *Lasalesee ye ta*

<sup>1</sup> Betani mi mapoo badeli odoó hee paiye badebeiso, o hu Lasales. Osoloso omoo Meli dio Mata dio onosee Betani mi omapoo debeli.

<sup>2</sup> Meli hagoso hamamee Lodeeyo homo mapoo mopoodoosoo sooloso o wuduso talaiso.

<sup>3</sup> Esiga Meli dio Mata dio odoó hee mapoo dia to takaso, yayo dilesó Yesu mapoo takalame. Esemé yayo dilesó Yesu mapoo egeesee takaso, “Lodee, odoó no gooma ee paiyega badoso,” dee takaso.

<sup>4</sup> Esino Yesu to hagee duloso egeesee takaso, “Paiye ogoso yo talaime. Esiga goo hagoso peledabalaiso, edebeeyo goo hagee ogoloso Godeeye kitulugu sabolo osoloso Owolo ayo kitulugu ee gooleedalame,” dee takaso.

<sup>5</sup> Esiga ee ma kulodu Yesuye Mata dio, omolo Meli dio, osoloso Lasales diya gweliso.

<sup>6</sup> Esino yo Lasaleseeeye paiye goo ee dulososo saga dilega, biame bakadio omapoo badebeiso.

<sup>7</sup> Biame bakadio poogoloso Yesuye o hamamee dili odoo mapoo egeesee takaso, “Iba see Yudiya mi mapoo wedi dimo,” dee takaso.

<sup>8</sup> Esemee o hamamee dili odoo oso yimapoo egeesee takaso, “Eligili odoo, no omapoo badoboome, Yu odooso no yoso wooloomalame sino poogooso. Esiga no see kasalame mi omapoo wedi dilame ka sala?” dee takaso.

<sup>9</sup> Esemee Yesuye egeesee takaso, “Biame hedebe ma kulodu osoko howo 12 moloso. Esiga edebeeyo biame siloga, yo takodee bigileime. Bei, yo gadeebugu ma kulodu siloga.\*

<sup>10</sup> Esino edebeeyo gesi siloga, yo takodee bigileiso. Bei, yimapoo gadeebugu mega.”

<sup>11</sup> Yesuye to hagee takoloso see egeesee takaso, “Ibada odoo Lasales yo tiamoloso. Esiga ayo yo tidibigileiso,” dee takaso.

<sup>12</sup> Esemee o hamamee dili odoo oso egeesee takaso, “Lodee, yo wulo tiaga, see weidileiso,” dee takaso.

<sup>13</sup> Esino Yesuye taka goo ee ma kulodu Lasales yo tei olo ta neme ka taka. Esino Yesu o hamamee dili odoo oso goolee Lasales wulo tiamolo gooleeso.

<sup>14</sup> Esemee Yesuye dimapoo woola egeesee takaso, “Lasales olo ta moloso.

<sup>15</sup> Esiga a goomogoso, ayo niba halo yo agalame dile. Esino ayo yimapoo goo moodoo ee niso ogoloso amapoo tei talaiso. Esiga yimapoo dimo.”

<sup>16</sup> Esemee Tomas, o hu hee Didimas deli, oso Yesu o hamamee dili odoo abo mapoo egeesee takaso, “Iba nosee Yudiya mi mapoo dimo, Yesu bolo hodobo talame,” dee takaso.

*Odoo wedia hogogaduloso see gie badeli teneli ee Yesu yoso*

<sup>17</sup> Yesuye sibilesoso Betani mi mapoo peledoboloso egeino, Lasales bi ma kulodu tamelee biame bakadio bakadio di poogoloso molome egeiso.

<sup>18</sup> Betani mi hagee Yelusalem mi maga haga hoogoonee, wulo kilomita bakadio hedebe di egeesi.

<sup>19</sup> Osoloso Meli dio Mata dio omolo Lasaleseeeye ta maga goohele sabolo do-boome, Yu odoo aboso dibolo hodobo dalame, Yelusalem maga sibadeeso.

<sup>20</sup> Esemee Mataye Yesuye simi goo ee dulososo, yo eli domopoo tugodalame diso. Esino Meli yo mosopoo badebeiso.

<sup>21</sup> Esemee Mataye Yesu tugodoloso yimapoo egeesee takaso, “Lodee, no hamapoo badebei diepi, molo telega pegeliyo.

<sup>22</sup> Esino a gooleedoo, goo hagee ma kulodu, nayo ogo goo ee Godee mapoo woosaga, Godeeye goo egee namapoo tenelaiso,” dee takaso.

<sup>23</sup> Esemee Yesuye yimapoo egeesee takaso, “Nomolo see hogabileiso,” diso.

<sup>24</sup> Esemee Mataye nei yimapoo egeesee takaso, “A gooleedoo, yo biame hamameedee mapoo odoo wedia oso hogogabuoga, yinosee omapoo hogadileiso,” dee takaso.

<sup>25</sup> Esemee Yesuye yimapoo egeesee takaso, “Odoowedia maga hogogaduloso see gie badeli teneli ee aso. Esiga edebeeyo amapoo tei toloso badobosoga, yo kookaiyo gie badalaiso.

<sup>26</sup> Osoloso edebeeyo amapoo tei toga, o dio talaime, esino yo kookaiyo gie badalaiso. Esiga Mata no goo hamapoo tei tosomo?”

<sup>27</sup> Esemee Mataye nei yimapoo egeesee takaso, “O, Lodee, a goo hamapoo tei toso. Bei, no Keliso, Godeeyo Owolo, mipoo hamapoo sibileigo dee takemelee ee noso,” dee takaso.

<sup>28</sup> Mataye to hagee taka koodobuloso see wedi dileso omolo Meli mapoo mada egeesee takaso, “Eligili odoo olo sibilesoso bado. Esiga yayo no agalai goomogona,” dee takaso.

\* **11:9:** To hageeyo bei ee egeesi moloso. Yesu yo gadeebugu. Yayo o hamamee dili odoo dibolo hodobo egee bado goo maga, diayo goo kodilei bei mauwe. Bei, Godeeye goomoga goo ee talame yayo biame teiba dimapoo teneeso.

**11:16:** Maka 14:31    **11:24:** Yon 6:40    **11:27:** Yon 6:69

<sup>29</sup> Meli to hagee duloso toboloso Yesu agalame saga diso.

<sup>30</sup> Yesu mosopoo peledebelega, Mataye dileso yo tugodoo mi omapoo osee badebeiso.

<sup>31</sup> Esemé Yu odooso Meli pidilone diba yibolo hodobo mosopoo debeiso. Esino yayo saga toboloso di ogoloso yima hamamee diso. Diayo goolee Meli bi mapoo dileso pisilei gooleeso.

<sup>32</sup> Esino Meliye Yesuye badebei mapoo dileso o homo beiyopoo gauwuloso badolone egeesee takaso, “Lodee, no hamapoo badebei diepi, molo telega pegeliyo,” dee takaso.

<sup>33</sup> Yesuye Meli dio osoloso Yu odo abo Melibolo sibadee oso hodobo pupusiga molome ogoloso su hegi sabolo badolone diya goheleso.

<sup>34</sup> Osoloso yayo dimapoo egeesee takaso, “Niyo yo kapoo magooba?” diso. Esemé diayo nei egeesee takaso, “Lodee, no agalame ibolo hodobo sibe,” dee takaso.

<sup>35</sup> Esemé Yesu yinosee pisaso.

<sup>36</sup> Esemé Yu odooso goo egee ogoloso egeesee takaso, “Yesuye Lasales diya gweli goo ee niso ege,” diso.

<sup>37</sup> Esino odo aboso egeesee takaso, “Odo hagoso odo howo neliga ee tekepo paso. Esiga bei kasi maga yayo Lasales tel-ega pagalame pidile ka poogoowo?” dee takaso.

### *Yesuye Lasales ta maga see hogadi*

<sup>38</sup> Yesu su hegi osee molone, Lasales magoo wulu ou miyopoo simiso. Osoloso wulu ou ee yo toowaso kisiso.

<sup>39</sup> Osoloso Yesuye egeesee takaso, “Yo egee peegoo bidibigi,” diso.

Esemé Lasaleseeyo omoo Mataye egeesee takaso, “Lodee, o kou ee wulu ma kulodu melee biame bakadio bakadio di egeesi poogooga, olo hune koko,” dee takaso.

<sup>40</sup> Esemé Yesuye nei yimapoo egeesee takaso, “Ayo namapoo daga takolone egeesee takaso, nayo tei toga, no Godeeye kitulugu ee agalaiso,” diso.

<sup>41</sup> Esemé odo aboso yo toowa wulu ou kisi ee peegoo bidibuguso. Esemé Yesuye

dokodoo bolone egeesee takaso, “Ma, ayo namapoo goomoga to ka taka. Bei, ayo namapoo taka goo ee nayo duga.

<sup>42</sup> Osoloso a gooleedoo, nayo biame susuga ayo namapoo taka goo ee nayo duliso. Esino odo hamapoo egee tebisamoloso nayo a diye di goo mapoo tei talame, goo hagee ayo ka taka.”

<sup>43</sup> Yesuye egeesee takoloso to neligidi egeesee takaso, “Lasales, no wulu ma kuloduga peegoo gasibe,” dee takaso.

<sup>44</sup> Esemé Lasales o dee sabolo, osoloso o homo bodo sabolo, osoloso o mudu ee dugo semeso tiegisa sabolo wulu ma kuloduga peegoo gasibilesa tobudume egeiso. Esemé Yesuye dimapoo egeesee takaso, “Dugo egee puobigi, osoloso yo diye dee,” dee takaso.

### *Yesu wooloomalame eli esia (Mat 26:1-5; Maka 14:1-2; Luka 22:1-2)*

<sup>45</sup> Esiga Yu odo susuga Meli agalame sibadee oso goo Yesuye moodoo ee ogoloso yimapoo tei tooso.

<sup>46</sup> Esino odo aboso dileso goo Yesuye moodoo ee Pelisi odo mapoo takaso.

<sup>47</sup> Esiga tei moso wiligi odo tebisa sabolo osoloso Pelisi odo oso Yu odo dia wiligi odo mooloogoodoo Sanhedelin deli ee gilimadoloso dimapoo egeesee takaso, “Iyo kasee selaisomo? Bei, odo hagoso goo toowa mudu opusomo di bei moodoogamo siliso.

<sup>48</sup> Iyo wulo бага, odo susuga oso yimapoo tei talaiso. Osoloso Loum gamalee odo oso ibada tei moso ee guobuguloso ibada odo tokenee palaiso,” dee takaso.

<sup>49</sup> Esemé dima kulodu odo hee badebeiso, o hu Kayapas. Dugo omapoo yayo tei moso wiligi odo toboloso badolone, odo mooloogoodoo mapoo egeesee takaso, “Niba goo goolee mauwe odo.

<sup>50</sup> Esiga niba koo gooleedolo? Odo hedebesoo odo susuga ee halo talai tekepo. Egeeseega, Yu odo susuga iba tokenee palaime,” diso.

<sup>51</sup> Esiga Kayapaseeye taka goo hagee, wulo eyo goolee takele. Esino yayo dugo omapoo tei moso wiligi odo toboloso



badoboome, Yesuye Yu odoo halo talai goo ee Godeeye yimapoo eligime, yayo egeese ka taka.

<sup>52</sup> Esino hedebe Yu odoo halo talaime. Esino Godeeyo odoo mi opusomo opusomo di mapoo egee do ee see hedebe dalame ka talai.

<sup>53</sup> Esiga biame omaga bei mooloogoloso dulone Yu odoo dia wiligi odoo tebisa oso Yesu wooloomalame eli esiameleeso.

<sup>54</sup> Goo egeesi maga Yesu see Yu odoo dia howo woola koo sili. Esino yayo o hamamee dili odoo sabolo mi egee poogoloso, see miwe poogoo mi koola mapoo mi hee, Epelaim deli, mapoo dilesa debeiso.

<sup>55</sup> Osoloso Godeeye Gababia wo nalai biame olo koola tooboome, Yu odoo dia mi pepuso maga Yelusalem mapoo palaso, Godeeyo howo woola diba medee mopoodoo doloso tekepo dabalame.\*

<sup>56</sup> Osoloso diayo Yelusalem mapoo dobolone Yesu esiamo silesibiso. Egeeseelone tei moso ma kulodu mooloogodoloso dieso nei woosa nei woosa demeleeso, “Niyo kasee gooleedo? Yesu wo ne hamapoo sibileisomo?” dee takaga meleeso.

<sup>57</sup> Esino tei moso wiligi odoo tebisa sabolo osoloso Pelisi odoo oso to kitulugu sabolo odoo susuga mapoo egeese takaso, “Odo heeso Yesuye badebei egei daga, imapoo takee, egeeseega iyo dilesa yo ka talaiya,” dee takaso.

## 12

*Meliye Yesuwo homo mapoo mopoodoo soo soo*

*(Mat 26:6-13; Maka 14:3-9)*

<sup>1</sup> Gababia wo nalai ee biame 6 malalo hoogoo molome, Yesu yo Lasalesee mi Betani mapoo see wedi diso. Lasales hagee daga Yesuye ta maga hogadi ee yoso.

<sup>2</sup> Osoloso habe mi omapoo diayo Yesuwo nei toowa mopoodoo dooso. Osoloso Mataye nei piso. Osoloso Lasales yinosee

ee ma kulodu dibolo hodobo dobolone Yesubolo nei nameleeso.

<sup>3</sup> Esemeliye mopoodoo soo tekepo nad deli i salama soo lita botoloo gegelee egeesi toloso Yesuwo homo mapoo sooso. Osoloso o homo o wuduso taso. Esemeliye mopoodoo soo oso sisigage oso moso kulodu tiadooso. Mopoodoo soo tekepo hagee molee toowaso teli.

<sup>4</sup> Esino domo omapoo Yesu o hamamee dili odoo hee badebeiso, o hu ee Yudas-Iskaliyot. Odo hagoso hamamee Yesu ha teli odoo mapoo tiasalaso. Osoloso yayo egeese takaso,

<sup>5</sup> “Mopoodoo soo tekepo hagee molee ko\* 300 oso teli. Esino bei kasi maga mopoodoo soo tekepo hagee, iyo odoo mapoo teneloso nei molee toloso bi mauwe odoo mapoo tenele ka poogoowo?” dee takaso.

<sup>6</sup> Esino Yudaseeye to hageese taka egee, yo bi mauwe odoo ee sooloo dolone to hagee ka takele. Esino yo heli teli odooga to hageese ka taka. Bei, yayo Yesu o hamamee dili odoo dia molee ee gibadolone abo mada heli temeleso.

<sup>7</sup> Esemeliye Yesuye egeese takaso, “Meliye goo egee moodoo ogoloso yimapoo goo hee na moodee. Bei, yayo goo egeesi moodoo egee a toga mi doosalai ee gooleebugulone ka moodoo.

<sup>8</sup> Osoloso bi mauwe odoo oso biame susuga nibolo dabalaso. Esino a biame susuga nibolo badalaime,” dee takaso.

*Wiligi odoo oso Lasales wooloomalame to mou*

<sup>9</sup> Esiga biame domo omapoo Yu odoo mooloogoodoo toowa oso Yesuye Betani mi mapoo sibilesa badebei goo ee dulooso Yesu agalame dulone, Lasales yinosee agalame diyadeeso. Bei, Yesuye yo ta maga see hogadiso.

<sup>10</sup> Goo egeesi maga tei moso wiligi odoo tebisa oso Lasales onosee wooloomalame to mouso.

**11:52:** Yon 10:16    **11:53:** Yon 5:18    \* **11:55:** Biame omapoo Yu odoo diba Godeeyo howo woola subugo mauwe dabalame, dia adaga dia goo ee dodolone, dia su medee hapoloso gala wooloso, siloso Godee mapoo teneliso.    **12:1:** Yon 11:1, 43    **12:2:** Luka 10:40    **12:3:** Luka 7:37-38    \* **12:5:** molee ko hagee denaliyus deli ee, biame hedebe mapoo tou too eyo nei hedebe hageese teliso.    **12:8:** Deut 15:11    **12:11:** Yon 11:45

11 Bei, Lasales see hogadi eyo goo maga Yu odoos aboso dia wiligi odoos ee poogoloso see Yesu mapoo tei tooso.

*Yesuye Yelusalem mi mapoo gadi*  
(*Mat 21:1-11; Maka 11:1-11; Luka 19:28-40*)

12 Osoloso biame hee mapoo odoos mooloogoodoo toowa Yelusalem mapoo Gababia wo ne mapoo di odoos oso Yesu sibosogo di goo ee duso.

13 Osoloso diayo weiyo kookoloso Yesu tugodalame dulone to neligidi egeesee takomo diyadeeso,  
“Iba Godeeyo hu dokodoo poudoomo.

Odoos Godeeyo hu maga kitulugu sabolo egee sibo, yo wiligi odoos Godeeye pidiye dee.

Osoloso Isalael odoos dia wiligi odoos, yo Godeeye pidiye dee,” dee takomo diyadeeso.

14 Biame domo omapoo Yesuye donki be gie kauwa ogoloso o wagi ma dokodoo biaso. Goo peledaba hagee Godeeyo to booka mapoo hogugu sabolo tebilame ka seeso. Bei, Godeeyo toso egeesee takooso,

15 “Yelusalem odoos, niba haga na ebi.

Nibada wiligi odoos donki be pe eyo wagi ma dokodoo buloso siboso,” diso.

16 Esino biame omapoo Yesuwo hamamee dili odoos oso goo hagee medee kibiya gooleedele. Esino Yesu ta maga hogaduloso hamamee goo susuga Yesu mapoo moodoo oso Godeeyo to booka mapoo hogugu sabolo tobume, goo ee ogoloso gooleedoos.

17 Esiga Yesuye Lasales ta maga hogaduloso see wulu ou ma kuloduga peegoo gasibilame i goo ee egei odoos mooloogoodoo hagee biaso odoos abo mapoo takalame diyadeeso.

18 Esemee odoos susuga oso goo toowa opusomo di Yesuye moodoo ee duga, diba Yesu tugodalame diso.

19 Esemee Pelisi odoos dieso dima kulodu egeesee takaso, “Niso ege. Iba kitulugu olo me poogoo. Bei, odoos

susuga oso yima hamamee deedeeso,” dee takemeleeso.

*Yesuye eyo talai goo ee edidi taka*

20 Osoloso Guliki odoos aboso odoos Yelusalem mapoo Gababia wo ne mapoo paladee sabolo palaso, Godeeyo hu dokodoo poudalame.

21 Osoloso diba dileso Gelili mi ma kulodu mi pepooko Betesaida mapoo badeli odoos hee Pilipi mapoo egeesee takaso, “Emegei, iba Yesu agalai goomogo,” dee takaso.

22 Esemee Pilipiye Endulu takala dileso obakadio Yesu takalame diso.

23 Esemee Yesuye nei dimapoo egeesee takaso, “Odoos Holo ayo toowa doloso badalai biame ee olo siboso.

24 Esiga ayo nimapoo ka taka. Edebeeyo ko mi mapoo segele poogooga, ko egee see opusomo dalaimo. Esino ko hedebe onosee osee malaiso. Esino ko mi mapoo sogoloso opusomo doloso pologa, bou dia gasibileso kauwuloso ko okopolo palaiso.\*

25 Esiga edebeeyo o gie badeli ee eyo diya goodogoga, o gie badeli ee osugobalaiso. Esino edebeeyo mipoo hamapoo badolone o gie badeli goodogel-ega badoga, odoos egee o gie badeli osugobalaimo. Esino yo badoboso kookaiyo gie badeli talaiso.

26 Esiga edebeeyo mo tou talai goomogoga, yo a deede sibe. Eseega, yo ayo egee bado mi omapoo yayo abolo hodobo badalaiso. Esiga mo tou teli odoos ee mo Maye o hu dokodoo poudileiso.

27 Epedee hamapoo a su diya hegi moodoo. Esiga ayo mo Ma mapoo takolone, ‘Ma, dala amapoo egee sibo nayo peegoo magee,’ dee takalai tekepowo? Haye, tekeponee. Bei, a dala egee talame mipoo hamapoo ka simi.

28 Esiga Ma, nayo toowa doloso egee bado goo ee odoos mapoo eligi.”

Esemee toso Kei mi ma dokodooga egeesee taka, “Ayo toowa doloso egee bado goo ee odoos mapoo olo eligiso. Osoloso ayo dimapoo see eligileiso,” dee takaso.

12:13: Psa 118:25-26; Yon 1:49    12:15: Zec 9:9    12:16: Yon 2:22    12:23: Yon 13:31-32; 17:1    12:24: 1Kol 15:36    \* 12:24: Yesuye wudu taka hagee, eyo tolosos see hogadilei goo sabolo, osoloso edebeeyo yimapoo tei talai goo maga ka taka.    12:25: Mat 16:25    12:27: Psa 6:3; 42:5; Mat 26:38

<sup>29</sup> Esino odoo mooloogoodoo omapoo tebisamelee oso to hagee duloso egeesee takaso, “Kei woo,” diso. Osoloso odoo aboso takolone, momaiyeso Yesu mapoo to takoo, dee takaso.

<sup>30</sup> Osoloso Yesuye see egeesee takaso, “To taka hagee a pidilame ka takele. Esino niba pidilame ka taka.

<sup>31</sup> Esiga Godeeye mi odoo dia goo midilei biame ee hagoso. Osoloso mipoo hageeyo wiligi odoo Saiten ee Godeeye daga dileiso.

<sup>32</sup> Esiga edebeeyo a toloso mi hamaga dokodoo poudoga,\* ayo odoo susuga amapoo gido sibileiso.”

<sup>33</sup> Yesuye taka hagee, eyo talai goo ee kasee tomoba dolone ka taka.

<sup>34</sup> Esemé odoo mooloogoodoo oso egeesee takaso, “Ibada tei magoo oso egeesee taka duliso, Keliso yo badoboso kookaiyo badalaise, dee takeliso. Esino bei kasi maga nayo takolone, Odoo Holo yo toloso mi hamaga dokodoo poudileiso, dee ka takeliyo? Osoloso Odoo Holo hagee odoo ogumo?” dee takemeleeso.

<sup>35</sup> Esemé Yesuye dimapoo egeesee takaso, “Gadeebugu oso biame deiyepo nibolo malaise. Esiga gadeebugu nimapoo mologa, niba gadeebugu ee ma kulodu silesibe, neligaso niba gooloogeyaga. Egeesi ma kulodu niba neliga ma kulodu silesiboga, niba niso egee du eli ee medee ogoloso gooleedalaime.

<sup>36</sup> Esiga gadeebugu nimapoo osee egee molo mapoo tei te. Niyo egeesee seega, niba gadeebugu eyo owolo dio dalaise.” Yesu to hagee takoloso koodobuloso peegoo dileso dimaga mada wuaso.

### *Yu odooso Yesu mapoo tei tele poogoo*

<sup>37</sup> Yesuye goo toowa opusomo di susuga odoo howo woola moodoogaso. Esino edebeeyo yimapoo tei tele.

<sup>38</sup> Esiga Godee maga to toloso kokodo takomo sili odoo Aisayaye taka goo sabolo tebilame, goo hagoso peledabaso. Aisayaye egeesee takaso,

“Lodee, odoo agayo iyo taka goo ee tei ka toba?

Osoloso Lodeeye kitulugu ee odoo ogu bia dimapoo ka yilige buguba?” dee takaso.

<sup>39</sup> Esiga edebeeyo Yesu mapoo tei talai tebile. Bei, Aisayaye see egeesee takaso,

<sup>40</sup> “Godeeye odoo susuga dia howo gooloo-gooso.

Osoloso yayo diba goo goole pagalame moodooso,

dia howoso kibiya egelega pagalame, osoloso diayo medee kibiya gooleedele-pagalame,

osoloso see Godee mapoo wedi sibileso tekepo pelega pagalame.”

<sup>41</sup> Aisayaye Yesuye toowa doloso badeli goo ee ogoloso o goo maga egeesee ka taka.

<sup>42</sup> Esino odoo abo sabolo osoloso Yu odoo dia wiligi odoo abo oso Yesu mapoo tei tooso. Esino diba Pelisi odoobolo obulone, diayo tei too goo ee woola yilige bigile. Bei, Pelisi odooso dia hu howo gisili moso ma kulodu magoo ee tabigiyyaga.

<sup>43</sup> Osoloso diayo Godee maga goomoga talai haga goole poogoloso, hee odoo maga goomoga talai ono diya gweliso.

<sup>44</sup> Esemé Yesuye to neligidi egeesee takaso, “Edebeeyo amapoo tei toga, yo hedebe amapoo tei koo toso. Esino a diye di odoo omapoo nose tei toso.

<sup>45</sup> Osoloso edebeeyo a ogoga, yo a diye di odoo onosee ogoso.

<sup>46</sup> Esiga ayo mipoo hamapoo neliga ma kulodu keme masi poudo simiso. Egeesi ma kulodu edebeeyo amapoo tei toga, yo neliga ma kulodu osee badalaime.

<sup>47</sup> Esiga edebeeyo mo to duloso mesilega poogooga, ayo o goo midileime. Bei, ayo mipoo hamapoo simi hagee, odoo goo midilame ka sibile. Esino odoo dia gie badeli ee pidilame ka simi.

<sup>48</sup> Esino edebeeyo a gooolone mo to telega poogooga, Godeeye goo midilei biame mapoo to ayo taka oso nei dia goo ee midileiso.

<sup>49</sup> Bei, a mawo gooleeso to hagee ka takele. Esino mo Ma, a diye di oso to ayo

<sup>12:32:</sup> Yon 3:14 \* <sup>12:32:</sup> Yesuye taka hageeyo bei ee, yo homo bulubo magoo ma dokodoo yoguso enigaloso pouduloso tulugilei ee taka. <sup>12:33:</sup> Yon 19:6 <sup>12:34:</sup> Psa 110:4; Isa 9:7; Dan 7:14 <sup>12:35:</sup> Yon 8:12 <sup>12:36:</sup> Epe 5:8 <sup>12:38:</sup> Isa 53:1 <sup>12:40:</sup> Isa 6:10 <sup>12:41:</sup> Isa 6:1 <sup>12:42:</sup> Yon 9:22 <sup>12:43:</sup> Yon 5:44 <sup>12:45:</sup> Yon 14:9 <sup>12:47:</sup> Yon 3:17

takalai sabolo osoloso ayo kasee takalai goo ee, yayo amapoo takaga, ayo egeesee ka taka.

<sup>50</sup> Esiga Godeeye taka to hagoso odo mapoo gie badeli tosililiso. Goo egeesi maga mo Maye amapoo taka goo ee see nimapoo ka takomoloso.”

## 13

### *Yesuye o hamamee dili odo dia homo howo hapoo*

<sup>1</sup> Yu odooso Gababia wo nali biame olo koola tooboome, Yesu yo mipoo hagee poogoloso see Ama mapoo palai biame ee olo koola tooboo, doloso gooleedooso. Esiga yayo mipoo hamapoo gie badolone, o hamamee dili odo ee sooloo deliso. Esino yayo diba diya sooloo deli goo ee epedee dimapoo eligiso.

<sup>2</sup> Osoloso Yesuye o hamamee dili odo sabolo habe nei nolone debeiso. Esino ee ma kulodu Saimon-Iskalyoteeyo owolo Yudas mapoo Saitenso goo goolee olo teneeso, yayo Yesu ha teli odo\* mapoo tiasalame.

<sup>3</sup> Osoloso Amaye goo susuga ee balame kitulugu Yesu mapoo tenee goo ee yo olo gooleedooso. Osoloso yo Godee maga simi, esiga yo see Godee mapoo wedi palai goo ee yo olo gooleedooso.

<sup>4</sup> Osoloso nei nolone debei maga toboloso o dugo sage tamagoloso see dugo howo i tali ee toloso o bagi mapoo booso.

<sup>5</sup> Osoloso katolo mapoo howo salama soloso o hamamee dili odo hedebe hedebe di eyo homo hapoloso, dugo howo i tali o bagi mapoo boo oso howo i ka ta domo dilame bei mooloogooso.

<sup>6</sup> Egeeseelone Saimon-Pitayo homo hapalame seme, yayo egeesee takaso, “Lodee, nayo mo homo hapalame ka sala?” dee takaso.\*

<sup>7</sup> Esem Yesuye egeesee takaso, “Goo ayo hagee moodoo eyo bei no epedee koo gooleedoso. Esino no hamamee gooleedalaiso,” diso.

<sup>8</sup> Esem Pitaye egeesee takaso, “Nayo mo homo hapalaime,” diso. Esem Yesuye nei yimapoo egeesee takaso, “Ayo nee homo hapelega poogooga, no mo hamamee dili odoonee,” dee takaso.

<sup>9</sup> Esem Saimon-Pitaye see egeesee takaso, “Lodee, nayo hedebe mo homowe ono na hapee. Esino mo dee sabolo osoloso wiligi sabolosee hapee,” diso.

<sup>10</sup> Esem Yesuye egeesee takaso, “Odo howo sauwe ee o su mapoo subugo me meleeya. Esiga hedebe o homowe hapalai tekepo. Esiga niba olo subugo mauwe. Esino nima kulodu odo hee subugo sabolo badoso.”

<sup>11</sup> Osoloso Yesu yo ha teli odo mapoo tiasalai odo ee, yo olo gooleedooso. Esiga yayo egeesee ka taka, “Odo hee nima kulodu subugo sabolo badoso,” dee ka taka.

<sup>12</sup> Yesuye o hamamee dili odo dia homo hapaga koodobuloso o dugo sage kaloso wedi sibilesa bulone egeesee takaso, “Niba goo ayo epedee nimapoo moodoo eyo bei gooleedoosomo?”

<sup>13</sup> Esiga niyo amapoo takolone, ‘eligili odo,’ osoloso ‘Lodee,’ deliso. Niyo amapoo egeesee takeli ee tei goo. Ee aso.

<sup>14</sup> Esiga nibada eligili odo osoloso nibada Lodee ayo nibada homo ka hapooso. Esiga niyo nee odoowo homo nei hapoo nei hapoo dolone ka debee.

<sup>15</sup> Goo ayo nimapoo hagee edidi ee peedee.

<sup>16</sup> Esiga ayo nimapoo taka. Odo tou nei mauwe teli oso o wiligi odo dagadilesa koo badoso. Osoloso to tosili odo oso yo diye di odo ee dagadilesa koo badoso.

<sup>17</sup> Egeesi ma kulodu niyo goo hagee gooleedoloso peedeega, Godeeye goo hagee ogoloso nimapoo goomogalaiso.

<sup>18</sup> Esiga goo ayo hagee takoo, haga odo susuga nimapoo koo takooso. Bei, odo ayo hesiga ee, a olo gooleedooso. Esino Godeeyo to booka mapoo hogugu oso egeesee takooso, ‘Odo abolo wo nolone

**13:2:** Luka 22:3; Yon 13:27 \* **13:2:** *Yesu mapoo ha teli odo* ee Yu odo dia wiligi odo tebisa ee takooso.

**13:3:** Yon 3:35; 16:28 \* **13:6:** *Homo hapeli* ee nei mauwe tou teli odo dia tou. Esiga Yesuye o hamamee dili odo dia homo hapoo ee ogoloso diya dio diso. Bei, Yesu yo dia wiligi odooga. **13:10:** Yon 15:3; 6:64, 70-71

**13:14:** Mat 20:28; Luka 22:27 **13:15:** Pil 2:5; Kol 3:13; 1Pita 2:21 **13:16:** Mat 10:24 **13:18:** Psa 41:9



badebei oso amapoo ha talaiso.’ To hagosoo gooso peledabalai sabolo tebilame ka hogugu.

<sup>19</sup> Esiga goo hagee peledabelega mologa, ayo nimapoo malalo ka taka. Goo hagosoo tei peledobooga, niyo a tei Kelisodoo doloso tei ka talame.

<sup>20</sup> Esiga ayo nimapoo taka. Edebeeyo odoos ayo diye di ee idoga, yayo a idoso. Osolosoo edebeeyo a idoga, mo Ma a diye di ee idoso.”

*Yesu yo tiasalai odoos eyo goo taka*

*(Mat 26:20-25; Maka 14:17-21; Luka 22:21-23)*

<sup>21</sup> Yesuye to hagee taka koodobulosoo su hegi sabolo badolone, o hamamee dili odoos mapoo egeesee takasoo, “Ayo nimapoo taka. Odoos heeso nima kuloduga a ha teli odoos mapoo tiasalaisoo,” dee takasoo.

<sup>22</sup> Esemee o hamamee dili odoos oso diesoo dima kulodu nei ogo nei ogo dolone egeesee gooleesoo, “goo hagee odoos ogu mapoo takabele,” dee gooleesoo.

<sup>23</sup> Osolosoo Yesu o hamamee dili odoos dima kulodu odoos hee Yesuye diya gooma ee\* yima koola ogolone badebeisoo.

<sup>24</sup> Esemee Saimon-Pitaye odoos omapoo howoo gisoloo gosoo, Yesuye odoos ogu taka belesoo yayo yimapoo woosalame.

<sup>25</sup> Esemee yayo Yesu mapoo bouwa molone yimapoo egeesee takasoo, “Lodee, odoos agayoo no ha teli odoos mapoo ka tiasalaiyo?” dee takasoo.

<sup>26</sup> Esemee Yesuye nei egeesee takasoo, “Ayo wo i mapoo olugulosoo teneega, odoos oso a ha teli odoos mapoo tiasalaisoo.” Osolosoo Yesuye wo tolosoo i mapoo olugulosoo Saimon-Iskaliyoteeyoo owoloo Yudas mapoo teneesoo.

<sup>27</sup> Yudaseeyoo wo temee, Saitenso o kulodu palasoo. Esemee Yesuye yimapoo egeesee takasoo, “Nayoo goo talame egee gooleemoloo goo ee saga moodee,” disoo.

<sup>28</sup> Egeesoo ma kulodu Yesuye Yudas mapoo egeesee takasoo, “No epedee ayo hagee du mapoo sibilei tebile. Esino no see hamamee sibileisoo,” dee takasoo.

<sup>29</sup> Esiga odoos abosoo goolee, Yudaseeyoo Gababia wo nalame bi abo talame di, dee takoo gooleesoo. Osolosoo odoos abosoo goolee, ee molee odoos bi mauwe mapoo tenelame di, dee takoo gooleesoo. Bei, Yesu o hamamee dili odoos dia molee ee Yudaseeyoo gibadeliga.

<sup>30</sup> Osolosoo gesoo Yudaseeyoo wo Yesuyoo tenee ee tolosoo peegoo gadisoo.

*Kokodo takeli to dia*

<sup>31</sup> Yudas olo peegoo dime, Yesuye egeesee takasoo, “Epedee Odoos Holo ayo toowa dolosoo badeli goo ee woola yilige bigileisoo. Osolosoo Godeeyoo toowa dolosoo badeli goo ee amaga woola yilige bigileisoo.

<sup>32</sup> Esiga Godeeyoo toowa dolosoo badeli goo ee amaga woola yilige buguga, nei Godee eyoo Odoos Holo ayo toowa dolosoo badeli goo onosee woola yilige bigileisoo. Esiga goo hagee saga moodoolaisoo.

<sup>33</sup> Esiga mo odoos, ayo biame deiyepoo niboloo hodobo badalaisoo. Osolosoo a duga, niyo a esileisoo. Esino niyo a agalaime. Esiga ayo Yu odoos dimapoo taka goo ee see tobu nimapoo ka taka. Niba mi ayo hagee du mapoo dilei tebile.

<sup>34</sup> Esiga kokodo takeli to dia hagee ayo nimapoo ka taka. Niyo nee odoos nei sooloo dolo, nei sooloo dolo dolone ka dabalame. Ayo niba goolee sabolo egee bado egeesee masi, nee odoos nei sooloo dolo, nei sooloo dolo dolone ka debee.

<sup>35</sup> Egeesoo ma kulodu niyo emegei nei sooloo dolo, nei sooloo dolo dolone dogaa, odoos susugaa oso niba tei mo hamamee dili odoos dolosoo gooleedalaisoo.”

*Pitaye Yesuwo goo gagadilei goo ee Yesuye taka*

*(Mat 26:31-35; Maka 14:27-31; Luka 22:31-34)*

<sup>36</sup> Esino Saimon-Pitaye egeesee takasoo, “Lodee, no kapoo dilame ka sala?” disoo. Esemee Yesuye nei egeesee takasoo, “No epedee ayo hagee du mapoo sibilei tebile. Esino no see hamamee sibileisoo,” dee takasoo.

**13:19:** Yon 14:29; 16:4    **13:20:** Mat 10:40    \* **13:23:** Yonee eyoo nediliyo o hu dokodoo poudilei goomegele. Esiga o hu woola hesile.    **13:27:** Yon 13:2    **13:31:** Yon 12:23    **13:32:** Yon 17:5    **13:33:** Yon 7:33-34    **13:34:** Yon 15:12, 17; 1Yon 3:23; 2Yon 1:5

<sup>37</sup> Esemе Pitaye see egeesee takaso, “Lodee, bei kaseega ayo epedee nobolo sibilei tebile ka molosomo? Ayo no halo talame olo mopoodoo doloso ka badoso,” dee takaso.

<sup>38</sup> Esemе Yesuye nei egeesee takaso, “No tei a halo talame mopoodoo doloso ka badosomo? Esiga ayo namapoo tei goo taka. Kolokolo takelega mologa, nayo mo goo gagadilei ee bakadio hedebe dalaiso,” dee takaso.

## 14

### *Eli hedebe Yesuso Ma Godee mapoo palai*

<sup>1</sup> Esemе Yesuye egeesee takaso, “Niba goo haga koudulone na debee. Esino niba Godee mapoo tei tolone amapoosee tei te.

<sup>2</sup> Bei, mo Mayo moso mapoo debi bei moloso. Esiga goo hagee tei goonee diepi, ayo goo hagee nimapoo takele pegeliyo. Esiga ayo omapoo niyo dabalai debi ee moodoolame dileiso.

<sup>3</sup> Osoloso ayo omapoo dileso debi mopoodoo doloso see sibileso niba gilimadoloso abolo hodobo palaiso. Osoloso niba mi omapoo abolo hodobo dabalaiso.

<sup>4</sup> Esiga ayo hagee du eli ee niba olo gooleedooso.”

<sup>5</sup> Esemе Tomaseeye Yesu mapoo egeesee takaso, “Lodee, mi nayo egee du, iba gooleedele. Nayo egee du eli ee iyo kasee gooleedalaiyo?” dee takaso.

<sup>6</sup> Esemе Yesuye egeesee takaso, “Eli aso. Osoloso tei goo takeli eyo bei aso. Osoloso gie badeli eyo bei aso. Esiga odoo heeso eli hee maga Ma Godee mapoo palaime. Esino yo hedebe amaga Ma mapoo ka palai.

<sup>7</sup> Niyo mo goo gooleedoo diepi, niba mo Ma nosee gooleedeliyo. Esino epedee domo hamaga niyo yo olo gooleedooso. Osoloso yo olo egeiso.”

<sup>8</sup> Esemе Pilipiye egeesee takaso, “Lodee, nayo Ma imapoo eligi, iba hemisileiya,” dee takaso.

<sup>9</sup> Esemе Yesuye nei Pilipi mapoo egeesee takaso, “Pilipi, ayo biame susuga nibolo hodobo badebeiso. Esino egeesi ma kulodu nayo a gooleedelega osee ka badosoba? Esiga edebeeyo a ogoga, yo Ma olo egeiso. Esiga bei kasi maga nayo amapoo takolone, ‘Ma imapoo eligi,’ dee ka takala?”

<sup>10</sup> Ayo mo Ma sabolo hedebe doloso egee bado sabolo, osoloso mo Maye abolo hedebe doloso egee bado goo mapoo no tei telega ka badosoba? Esiga to ayo nimapoo hagee takomo silo mawo goolee koo takomo siloso. Esino Maye abolo badolone yayo amaga o goo ee ka to-moloso.

<sup>11</sup> Esiga ayo takolone, ayo mo Ma sabolo hedebe doloso egee bado sabolo, osoloso mo Maye abolo hedebe doloso badoso, dee egee takoo goo omapoo tei te. Esino niyo to ayo taka mapoo tei telega poogooga, goo toowa opusomo di ayo moodoo ee ogoloso to ayo taka mapoo tei dee.

<sup>12</sup> Esiga ayo nimapoo taka. Edebeeyo amapoo tei toga, goo toowa opusomo di ayo moodeli egeesi masi yayo moodoolaiso. Osoloso goo toowa opusomo di abo yayo moodooga, oso ayo moodeli ee dagadileiso. Bei, a mo Ma mapoo duso.

<sup>13</sup> Osoloso niyo mo hu maga ogoo goo ee woosaga, ayo goo egee moodoolaiso, Maye toowa doloso egee bado goo ee Owolo amaga ka yilige bigilame.

<sup>14</sup> Esiga niyo amapoo mo hu maga ogoo goo talame woosaga, ayo goo egee moodoolaiso.”

### *Yesuye Dio Teiso sibilei goo ee taka*

<sup>15</sup> “Niyo a gooleega, niyo ayo kokodo taka goo mapoo mesimo silesibileiso.

<sup>16</sup> Osoloso ayo Ma mapoo woosalaiso, yayo pidili odoo hee nimapoo tenelame. Pidili odoo hagoso kookaiyo nibolo hodobo osee badalaiso.

<sup>17</sup> Pidili odoo egee Dio Tei ee takooso. Yayo tei goodee ee eligiliso. Esino mi odooso yo talai tebile. Bei, diayo yo

ogoloso koo gooleedeli. Esino niba o goo olo gooleedooso. Bei, yo nibolo hodobo badoso. Osoloso nima kulodu badalaiso.

<sup>18</sup> Esiga ayo niba gilibo holo masi wulo domopoo poogoloso badalaime. Esino a see tobu nimapoo wedi sibileiso.

<sup>19</sup> Osoloso biame deiyepo poogoloso mi odoosoo a see agalaime. Esino niyo a see agalaiso. Egeesi ma kulodu a gie badeliga, niba nosesee gie dabalaiso.

<sup>20</sup> Egeesi ma kulodu a ta maga see hogadiga, ayo mo Ma sabolo hedebe doloso egee bado goo ee, niba gooleedalaiso. Osoloso niyo abolo hedebe doloso egee do goo sabolo, osoloso ayo nibolo hedebe doloso egee bado goo ee gooleedalaiso.

<sup>21</sup> Esiga edebeeyo ayo kokodo taka to ee duloso mesimo siloga, odoosoo egee a diya goolee sabolo badoso. Osoloso odoosoo a diya goolee sabolo badeli mapoo mo Maye yo sooloo dolone ka badoso. Osoloso anosee odoosoo egee diya sooloo dolone ka badoso. Osoloso ayo mo goo ee yimapoo yilige bigileiso.”

<sup>22</sup> Esemé Yudas-Iskariyot nee, esino Yudas heeso egeese takaso, “Lodee, bei kasi maga nayo nee goo ee mi odoosoo mapoo yilige bigile poogoloso, see imapoo ka yilige bigileiyo?” dee takaso.

<sup>23</sup> Esemé Yesuye nei egeese takaso, “Edebeeyo a diya gooleega, yayo goo ayo eligi mapoo mesimo sileiso. Osoloso mo Maye yo diya sooloo dalaiso. Osoloso mo Ma asalo sibileiso yibolo hodobo badalaiso.

<sup>24</sup> Esino edebeeyo a goolega badoga, yo goo ayo eligi mapoo mesiloso koo siloso. Egeesi ma kulodu goo ayo eligime niyo du ee, ayo mawo goolee eligimo sile. Esino eligi hagee mo Ma, a diye di oso taka ee eligi.

<sup>25</sup> Esiga ayo nibolo hodobo osee badolone, goo susuga hagee nimapoo olo takaso.

<sup>26</sup> Esino mo Maye mo hu maga Dio Tei ee nimapoo meiyee dalaiso. Osoloso yayo niba pidilone badolone goo susuga nimapoo eligileiso. Osoloso goo susuga ayo nimapoo taka ee see niyo goolee

sabolo dabalame, yayo nibada goo goolee pileiso.

<sup>27</sup> Esiga mesili goo ayo nimapoo ka tonowa. Mo mesili goo ayo nimapoo hagee tenee ee mi odoosoo mesili goo egeesinee. Esiga niba goo diya koudulone ebia sabolo na debee.

<sup>28</sup> Esiga ayo nimapoo takolone, ‘a mo Ma mapoo peleso badoboso see nimapoo ka wedi sibileisogo,’ dee taka goo ee, niba olo duso. Esiga niyo a tei diya goolee sabolo debee diepi, ayo mo Ma mapoo pologa niba goomegeliyo. Bei, yayo toowa doloso badolone, a dagadileso ka badoga.

<sup>29</sup> Egeesi ma kulodu goo egee peledbelega molome, ayo goo susuga hagee nimapoo olo takaso, goo ogoso hamamee peledobooga ogoloso niyo tei ka talame.

<sup>30</sup> Esiga ayo niba eligi ee koodobilei olo koola toobooso. Bei, mi odoosoo dia wiligi odoosoo Saiten olo sibo. Yayo a dagadilei yimapoo kitulugu mauwe.

<sup>31</sup> Esino ayo mo Ma diya goolee sabolo egee bado goo ee mi odoosoo oso ogoloso gooleedalame, to mo Maye amapoo taka ee ayo tobuloso moodeliso.

Esiga niba tebise, iba dimo.”

## 15

### *Yesu tei homokoko su*

<sup>1</sup> “Esiga tei homokoko sudee aso. Osoloso mo Maye homo su ee ka gibadoso.

<sup>2</sup> Osoloso homo dee amaga agaga oso ko pelega mologa, yayo kookooloso peegoo togobiseliso. Esino homo dee ko peli eyo dee abo ee kookeliso, oso see homokoko okopolo palame.

<sup>3</sup> Egeesi ma kulodu goo ayo nimapoo eligi oso niba homo dee abo egeesi masi olo kookooloso subugo mauwe ka doso.

<sup>4</sup> Esiga niba amapoo oluguloso ka debee. Eseega ayo nimapoo oluguloso badalaiso. Esiga dee obusomo molone ko palai mauwe. Esino dee oso homo su mapoo oluguloso mologa, ko palaiso. Goo egeesi maga, niba amapoo olugulega dogo, homokoko palaime. Esino niyo amapoo oluguloso dogo, homokoko okopolo palaiso.

<sup>5</sup> Esiga homokoko su aso. Osoloso homo dee ee nibaso. Egeesi ma kulodu edebeeyo amapoo sibilesa oluguloso badoga, ayo yimapoo oluguloso badalaiso. Eseega yo homokoko okopolo palaiso. Esino niba a mauwe doga, niyo goo hee moodoolai tebileime.

<sup>6</sup> Esiga edebeeyo amapoo sibilesa olugulega doga, yo homo dee ko koo peli koodoloso peegoo togobugu egeesi masi moloso. Esiga homo dee egee sioga misiga magoloso dou mapoo todeliso.

<sup>7</sup> Goo egeesi maga niyo amapoo oluguloso dobolone, ayo eligi goo omapoo mesimo silesibulone, niyo ogoo goo talame amapoo woosaga, niba goo egee talaiso.

<sup>8</sup> Esiga niyo homokoko okopolo poloso mologa, oso mo Mayo hu dokodoo poudiliso, osoloso niba mo hamamee dili odo doloso egee do goo ee yilige bigiliso.

<sup>9</sup> Esiga mo Maye a diya sooloo dolone egee bado egeesi masi ayo niba diya sooloo dolone ka badoso. Esiga niba ayo sooloo deli goo ee ma kulodu debee.

<sup>10</sup> Egeesi ma kulodu ayo mo Maye kokodo taka to omapoo mesimo silone, yayo sooloo deli ma kulodu ka badoso. Osoloso hedebe egeesi masi niyo ayo kokodo taka to omapoo mesimo silesiboga, niba nosee ayo sooloo deli goo ee ma kulodu dabalaiso.

<sup>11</sup> Esiga goo hagee ayo nimapoo olo takaso, goomoga goo amapoo egee molo niyo talame. Osoloso nimapoo goomoga goo oso kauwuloso ka malame.

<sup>12</sup> Esiga ayo kokodo taka to hagoso. Ayo niba sooloo deli egeesi masi niyo nee odo nei sooloo dolo, nei sooloo dolo dolone ka debee.

<sup>13</sup> Egeesi ma kulodu edebeeyo o odo diya sooloo dolone, yo halo o su teli mapoo magalai, goo oso toowa ka moloso.

<sup>14</sup> Esiga niyo ayo kokodo taka to mapoo mesimo siloga, niba tei mo odo.

<sup>15</sup> Esiga niba ayo wulo mo tou teli odo dee koo takooso. Bei, tou teli odo ee o wiligi odo eyo goo ee yo gooleedele. Esino niba tei mo odo deeso. Bei, mo

Maye amapoo taka goo susuga ee ayo nimapoo olo eligiso.

<sup>16</sup> Egeesi ma kulodu niyo a ka hesile. Esino ayo niba ka hesiga, niyo homokoko okopolo palame. Homokoko egee kookaiyo moloso osee malaiso. Niyo egeese solone, ogoo goo talame mo hu maga mo Ma mapoo woosaga, yayo nimapoo tenelaiso.

<sup>17</sup> Esiga ayo nimapoo kokodo taka to ee hagoso. Niyo nee odo nei sooloo dolo, nei sooloo dolo dolone ka debee.”

### *Mi odo oso heiga goo*

<sup>18</sup> “Mi odo oso niba heigoga, daga diayo a heigoso doloso gooleede.

<sup>19</sup> Esiga niba mi odo sabolo hedebe doloso ka debei diepi, diayo niba dia odo dolone diya goolee sabolo debeliyo. Esino ayo niba mi odo dima kuloduga olo hesiaso, niyo dibolo hedebe doloso debelega pagalame. Goo egeesi maga diayo nimapoo heiga ka moloso.

<sup>20</sup> Esiga to ayo nimapoo taka ee medee goolee. Bei, ayo egeese takaso. Wulo tou teli odo oso o wiligi odo ee dagadileso koo badoso. Egeesi ma kulodu edebeeyo amapoo dala olo teneega, diayo niba nosee dala tenelaiso. Osoloso diayo ayo eligi goo mapoo mesiega, diba nosee niyo eligi goo mapoo mesileiso.

<sup>21</sup> Esino niba mo odooga, diayo goo susuga hagee nimapoo moodoolaiso. Bei, a diye di odo ee diba gooleedele.

<sup>22</sup> Egeesi ma kulodu ayo sibilesa dimapoo to takele diepi, Godeeye dia goo tokenee midilei ee pegeliyo. Esino epedee hamapoo ayo sibilesa olo takaso. Goo egeesi maga goo tokenee diayo moodoo ee Godeeye midileiso. Esino diayo to nei takalai tebileime.

<sup>23</sup> Edebeeyo a heigoga, yo mo Ma nosee heigoso.

<sup>24</sup> Esiga goo toowa opusomo di ayo moodoomo silee egeesi odo heeso moodoomo sile. Osoloso ayo dima kulodu goo hageese moodele diepi, Godeeye dia goo tokenee midilei ee pegeliyo. Esino



diayo goo toowa ayo moodoo ee egeliso. Esino diayo mo Ma asalo imapoo heiga ka moloso.

<sup>25</sup> Esiga goo hagee olo peledabaso, Godeeyo to booka mapoo hogugu oso taka sabolo tebilame. Bei, Godeeyo toso egeesee takooso, 'Diayo wulo goo mauwe amapoo heiga ka moloso,' deliso.

<sup>26</sup> Ayo niba pidilame Dio Tei nimapoo diye dalaiso. Dio Tei oso mo Ma maga sibiliso, osoloso tei goodee eligiliso. Osoloso Dio Tei oso sibilesi, mo goo ee woola yilige bigileiso.

<sup>27</sup> Osoloso niba nose niyo mo goo odo mapoo yilige bigi. Bei, niba daga bei mooloogoo biame omaga abolo hodobo sileeso."

## 16

<sup>1</sup> "Esiga niyo tei too goo maga peegoo diyaga, ayo goo susuga hagee nimapoo olo takaso.

<sup>2</sup> Bei, odo aboso nibada hu howo gisili moso ma kulodu egee molo taloso niba peegoo hasiso bigileiso. Osoloso odo aboso tei too odo ee piliguga, diayo goolee Godeeyo tou to dee goolai, biame ee sibileiso.

<sup>3</sup> Esiga diayo goo hageese nimapoo moodoolaiso. Bei, mo goo sabolo osoloso mo Mayo goo ee diba gooleedelega.

<sup>4</sup> Esiga goo hagee ayo nimapoo olo takaso. Egeesi ma kulodu goo hagoso tei peledobooga, niba to ayo taka ee goolee-bigileiso."

### *Dio Tei oso sibilei eyo goo taka*

"Esiga ayo daga Godeeyo tou bei mooloogolone a nibolo hodobo badebeiso. Goo egeesi maga, ayo goo hagee nimapoo takele.

<sup>5</sup> Esino a epei odo a diye di mapoo duso. Esino nima kulodu odo heeso amapoo takolone, a kapoo diala, doloso koo woosa.

<sup>6</sup> Esiga ayo takolone, a epei dileiso, dee taka goo ee niyo duloso niba diya ka gooholoso.

<sup>7</sup> Esino ayo tei goo nimapoo ka taka. Ayo niba poogoloso duga, goo oso niba

pidileiso. Bei, a duga, nei ayo Dio Tei nimapoo diye dalaiso, yayo niba pidilame. Esino a dilega poogooga, Dio Tei ee nimapoo sibileime.

<sup>8</sup> Egeesi ma kulodu Dio Tei siboga, yayo mi odo mapoo goo tokenee eyo goo maga tei goo takalaiso. Osoloso odo Godeeyo howo woola tekepo dabalai goo onosee takalaiso. Osoloso Godeeye goo midilei goo eyo bei onosee takalaiso.

<sup>9</sup> Esiga Dio Tei oso goo tokenee eyo goo maga tei goo takolone, amapoo tei tele pagalai goo ee mi odo dia goo tokenee toowa ka moloso, dee takalaiso.

<sup>10</sup> Osoloso a mo Ma mapoo hagee polo see niyo a agalaime. Goo ogo Godeeyo howo woola tekepo badalai goo ee yilige bigileiso.

<sup>11</sup> Osoloso Dio Tei oso Godeeye goo midili goo ee tei goo takolone, mi odo dia goo ee midileiso, dee takalaiso. Bei, mi odo dia wiligi odo Saiteneeyo goo ee olo midiso.

<sup>12</sup> Esiga amapoo goo bei moloso, ayo nimapoo takalai. Esino epedee niyo goo bei egee gooleedalai tebile. Esiga ayo goo egee nimapoo takalaime.

<sup>13</sup> Esino Dio Tei oso nimapoo siboga, yayo niba tei goo susuga mapoo gilimado dileiso. Yayo eyo goolee takalaime. Esino yayo to ayo takeme du goo ee takomo sileiso. Osoloso hamamee goo ogo peledabalai ee yayo nimapoo eligileiso.

<sup>14</sup> Esiga Dio Tei oso to ayo yimapoo takalai ee see nimapoo takalaiso. Goo egeesi maga yayo mo hu dokodoo poudileiso.

<sup>15</sup> Esiga goo susuga mo Maye toloso hagee molo ee mo. Goo egeesi maga ayo takolone, Dio Tei oso to ayo taka ee nimapoo takalaiso, dee ka taka."

### *Goohle goo oso goomoga goo tosibileiso*

<sup>16</sup> "Biame deiyepo badoboso hamamee niyo a agalaime. Esino see biame deiyepo poogoloso hamamee niyo a see agalaiso."

<sup>17</sup> Esiga Yesuwo hamamee dili odo aboso dieso nediliyo egeese takaso, "Yayo

imapoo takolone, biame deiyepo bado-boso hamamee iyo yo agalaime, doloso see, biame deiyepo poogoloso hamamee iyo yo see ka agalai, dee taka goo eyo bei ee ogoobo? Osoloso yayo takolone, yo Ama mapoo dia, dee taka goo eyo bei ee ogoobo?

<sup>18</sup> Osoloso yayo imapoo takolone, biame deiyepo, dee taka goo eyo bei ogoobo? Iba to yayo taka eyo bei medee koo gooleedo,” dee takemeleeso.

<sup>19</sup> Yesuye o hamamee dili odoos o yimapoo woosalo agalame debei goo ee, yo olo gooleedoloso dimapoo egeese takaso, “Ayo nimapoo takolone, ‘biame deiyepo badoboso hamamee niyo a agalaime,’ dee taka sabolo osoloso, ‘see biame deiyepo poogoloso hamamee niyo a see ka agalai,’ dee taka goo omaga niyo amapoo woosalame ka dabala?”

<sup>20</sup> Egeesi ma kulodu ayo nimapoo taka. Niba gooholone pisileiso. Esino mi odoos ee goomogalaiso. O, tei takoo, niba goohalaiso. Esino goohele goo oso nimapoo goomoga goo tosbileiso.

<sup>21</sup> Esiga niba medee goolee, soboso holo soomagoo biame omapoo yo dala teliso. Esino yo holo soomagoloso hamamee eyo dala too goo ee boobado bigiliso. Bei, yayo holope soomagoo goo maga diya goomogolone.

<sup>22</sup> Esiga niba egeesi masi doso. Bei, niba epedee goohele sabolo doso. Esino a see wedi sibilesos niba agalaiso. Eseega domo omapoo niba diya goomogalaiso. Goomoga goo hagee odoos heeso nimaga peedee dalaimo.

<sup>23</sup> Biame omapoo niyo goo hee talame amapoo woosalaime. Esino ayo nimapoo tei taka. Niyo ogoos goo talame mo hu maga Ma mapoo woosaga, yayo nimapoo tenelaiso.

<sup>24</sup> Esiga niyo daga goo abo talame mo hu maga woosalo egele. Esino epedee hamaga dulone niyo ogoos goo talame mo hu maga woosaga, niyo goo egee talaiso. Eseega goomoga goo nimapoo egee molo ee kauwuleiso.”

*Yesuye mi odoos dia wiligi*

### *odoo ee dagadi*

<sup>25</sup> “Esiga ayo goo susuga hagee takomo silone, wulo wudu takomo sileeso. Esino biame siboga, ayo goo susuga ee see nimapoo wulo wudu takomo sileime. Esino ayo Mayo goo ee nimapoo woola takomo sileiso.

<sup>26</sup> Esiga biame omapoo nibada goo ee ayo Ma mapoo woosalaime. Bei, niyo nibada goo ee mo hu maga Ma mapoo woosamalaiso.

<sup>27</sup> Bei, niyo tei tolone, a tei Ma maga simi doloso, a diya goolee sabolo egee doo maga Mayo niba diya sooloo dolone ka badoso.

<sup>28</sup> Esiga ayo Mayo badeli mi maga mipoo hamapoo simiso. Osoloso see epedee mipoo hagee poogoloso Mayo badeli mi mapoo ka wedi poloso,” dee takaso.

<sup>29</sup> Esem o hamamee dili odoos o yimapoo egeese takaso, “Epedee nayo goo hagee imapoo wulo koo wudu takoo. Esino nayo goo susuga hagee imapoo woola yilige buguso.

<sup>30</sup> Esiga iba tei toso, no tei Godee maga simiga. Bei, goo susuga ee no diya gooleedo. Osoloso odoos heeso namapoo woosalame gooleemelee ee ogoloso daga nayo yimapoo nei takeliso,” dee takaso.

<sup>31</sup> Esem Yesuye nei egeese takaso, “Niba epedee tei tosomoo?”

<sup>32</sup> Esino niba medee dui. Biame olo sibileiso, osoloso olo simiso, niyo a poogoloso nibada mosopoo kukulo dilei. Esino a mobusomo koo badeli. Bei, mo Mayo abolo hodobo badeliso.

<sup>33</sup> Niyo amapoo tei too goo maga nimapoo mesie goo oso malame, ayo goo susuga hagee nimapoo olo takaso. Niba mipoo hamapoo dala ma kulodu dabalaiso. Esino niba ebilega medee kibiya debee. Bei, mipoo hagoso kitulugu ee ayo dagadileso ka badoso.”

## 17

### *Yesuye o su halo Godee mapoo taka*

<sup>1</sup> Yesu to hagee taka koodobuloso, Kei mi ma dokodoo bolone egeese takaso, “Ma, mo biame olo siboso. Esiga Nowolo ayo

toowa doloso badeli goo ee odoo susuga mapoo eligi, Nowolo ayo nei nayo toowa doloso badeli goo ee odoo susuga mapoo eligilame.

<sup>2</sup> Bei, odoo susuga ee balame nayo Nowolo amapoo kitulugu olo teneeso, see ayo odoo nayo amapoo tenee dimapoo kookaiyo badoboso gie badeli tenelame.

<sup>3</sup> Osoloso kookaiyo badoboso gie badeli goo ee, tei Godee hedebe no gooleedalai sabolo, osoloso nayo diye di odoo, Yesu Keliso a gooleedalai ee takooso.

<sup>4</sup> Tou nayo amapoo tenee ee ayo hosudoo maga, ayo mipoo hamapoo badolone, nayo toowa doloso badeli goo ee odoo susuga mapoo eligiso.

<sup>5</sup> Esiga Ma, mipoo hagee moodelega molome, ayo nobolo badolone ayo toowa doloso badebeiso. Esiga goo egee see epedee amapoo tenee.”

*Yesuye o hamamee dili odoo halo  
Godee mapoo taka*

<sup>6</sup> “Ma, mipoo hagee ma kuloduga odoo nayo amapoo tenee mapoo ayo nee goo olo eligiso. Hagee nee odoo, nayo amapoo teneeso. Osoloso diayo nee to mapoo mesimo silesibiliso.

<sup>7</sup> Esiga goo susuga nayo amapoo tenee ee, namaga siboso doloso diba epedee olo gooleedooso.

<sup>8</sup> Osoloso eligi goo nayo amapoo tenee ee, see ayo dimapoo teneme, see diayo eligi goo omapoo tei tooso. Osoloso ayo namaga simi goo ee, diba olo gooleedooso. Osoloso diba nosee nayo a diye di goo mapoo tei tooso.

<sup>9</sup> Esiga ayo namapoo hagee takoo mi odoo halo koo takooso. Esino odoo nayo amapoo tenee ee halo namapoo ka taka. Bei, odoo hagee nee odoo.

<sup>10</sup> Egeesi ma kulodu odoo hagee bia ee ibada odoo. Diba mo odoo osoloso diba nosee nee odoo oso. Osoloso ayo toowa doloso badeli goo ee dimaga woola yilige bigiliso.

<sup>11</sup> Esiga a mipoo hagee poogoo dileiso. Bei, a namapoo olo siboso. Esino mo hamamee dili odoo oso mipoo hamapoo

osee dabalaiso. Ma, no tei. Nee hu oso kitulugu amapoo tenee oso odoo hagee bia medee bamelee, nayo abolo hedebe doloso egee bado egeesee solone, diba nosee dieso hedebe doloso dabalame.

<sup>12</sup> Egeesi ma kulodu ayo dibolo hodobo badolone, nee hu oso kitulugu nayo amapoo tenee goo oso ayo diba medee bameleeso. Esemee odoo hee osugobelee. Esino odoo hee Godee maga pileigo dee taka hedebe ono osugobaso, Ma Godee nee to booka mapoo hogugu oso taka sabolo tebilame.

<sup>13</sup> Esiga a namapoo olo siboso. Esino a mipoo hamapoo osee badolone, goo hagee ayo namapoo ka taka, goomoga goo amapoo egee molo oso mo hamamee dili odoo dima kulodu toowa doloso malame.

<sup>14</sup> Esiga ayo nee to dimapoo olo takaso. Esino mi odoo oso diba heigaso. Bei, a mi odoonee, egeeseelone diba nosee mi odoo doloso koo doso.

<sup>15</sup> Esiga Ma, ayo namapoo hagee takoo, nayo mo hamamee dili odoo mi hamaga peegoo gilimado dilame koo takooso. Esino diba Saitenso tokenee peeyaga nayo medee balame ka taka.

<sup>16</sup> Esiga a mi odoonee, egeeseelone diba nosee mi odoo doloso koo doso.

<sup>17</sup> Nee to ee tei goo. Esiga nayo nee to omaga diba nee odoo dalame peegoo pi magee.

<sup>18</sup> Esiga nayo a diye di egeesee solone, ayo diba nosee mipoo hagee ma kulodu diye deeso.

<sup>19</sup> Osoloso ayo diba halo a namapoo teneeso, diba nosee tei nee odoo doloso peegoo pi magoloso ka dabalame.”

*Yesuye tei telaga odoo halo  
Godee mapoo taka*

<sup>20</sup> “Esiga ayo hedebe mo hamamee dili odoo ee halo namapoo koo takooso. Esino diayo eligi goo ee duloso edebeeyo amapoo tei talai odoo sabolosee diba halo ka takooso.

<sup>21</sup> Osoloso Ma, ayo namapoo to egeesee ka taka. Ayo nobolo hedebe doloso egee bado, egeesee solone nei nayo abolo hedebe doloso ka badoso. Egeesee solone diba nosee hedebe doloso dabalame ka

taka. Osoloso diba nosee ibolo hedebe doloso dabalame ka taka. Egeeseega mi odoososo a tei nayo diye di goo mapoo tei ka talame.

<sup>22</sup> Esiga toowa doloso badeli goo nayo amapoo tenee ee, see ayo dimapoo teneeso, diba dieso hedebe doloso dabalame. Egeesi ma kulodu iba nosee hedebe doloso egeesee ka doso.

<sup>23</sup> Esiga ayo dibolo hodobo badoso, osoloso nayo abolo hodobo badoso. Iyo egee do egeesi masi diba nosee hedebe doloso dabalai a goomogo. Eseega mi odoososo goo egee ogoloso a tei nayo diye di goo ee gooleedalaiso. Osoloso nayo a diya sooloo dolone egee bado, egeesee solone nayo tei telaga odoososo diya sooloo dolone egee bado goo sabolo mi odoososo gooleedalaiso.

<sup>24</sup> Esiga Ma, tei telaga odoososo nayo amapoo tenee hagee bia ee ayo badalai mi mapoo abolo hodobo dabalai, a goomogoso. Osoloso toowa doloso badeli goo ee nayo amapoo tenee ee diayo agalai, a goomogo. Mipoo moodelega molome, nayo a sooloo dolone, toowa doloso badeli goo egee nayo amapoo teneeso.

<sup>25</sup> Esiga Ma, hedebe no tekepo. Mi odoososo no gooleedele. Esino ayo no ka gooleedoo. Osoloso nayo a diye di goo ee tei telaga odoososo diba olo gooleedoososo.

<sup>26</sup> Ayo nee goo dimapoo olo yilige buguso, osoloso see yilige bigileiso, nayo a sooloo dolone egee bado goo egeesi masi oso dima kulodu ka malame. Osoloso anosee dibolo hodobo badalame.”

## 18

### *Edebeeyo Yesu too*

(*Mat 26:47-56; Maka 14:43-50; Luka 22:47-53*)

<sup>1</sup> Yesuye Godee mapoo taka koodobuloso, see o hamamee dili odoososo sabolo Kidilon howo tolobo dalo diso. Osoloso mi omapoo olipi segei homolee meleeso. Esemes Yesuye o hamamee dili odoososo sabolo omapoo gadiso.

<sup>2</sup> Egeesi ma kulodu Yudas, Yesu ha teli odoososo mapoo tiaseli odoososo onosee homolee ee yo gooleedoo. Bei, biame

abo mapoo Yesuye o hamamee dili odoososo sabolo omapoo dileso mooloogoodeliso.

<sup>3</sup> Esiga Yudaseeye Loum ha teli odoososo mooloogoodoo sabolo osoloso tei moso gidebeli odoososo gilimado simiso. Tei moso gidebeli odoososo hagee bia ee tei moso eyo wiligi odoososo tebisa sabolo osoloso Pelisi odoososo ka diye di. Diayo sibulone kemesabolo, egimesabolo, osoloso ha teli bi tolososibilesos peledabaso.

<sup>4</sup> Esemes Yesuye goo susuga yimapoo peledabalai ee yo olo gooleedolosomalalotobolosodimapoo egeeseetakaso, “Niba odoososo ogu esiamosilala?” diso.

<sup>5</sup> Esemes diayo nei yimapoo egeeseetakaso, “Iba Nasalet odoososo Yesu ee esiamosila,” diso. Esemes Yesuye nei dimapoo egeeseetakaso, “Niyo egee esiamosiloo doo ee aso,” diso. Epedees egeeseesemelees mapoo Yesu ha teli odoososo mapoo tiaseli odoososo Yudas yinosees omapoo dibolohodobotebidiso.

<sup>6</sup> Esemes Yesuye dimapoo takolone, odoososo egee aso, dees taka duloso diba badayo dilesomi yomoo misigedibaso.

<sup>7</sup> Esemes Yesuye sees tobuso dimapoo egeesees woosaso, “Niba odoososo ogu esiamosilala?” Esemes sees diayo nei yimapoo egeeseetakaso, “Iba Nasalet odoososo Yesu ee esiamosila,” dees takaso.

<sup>8</sup> Esemes Yesuye nei egeesees takaso, “Odoososo egee aso doloso ayo nimapoo olo takaso. Esiga niyo tei a esiamosilesiboga, odoososo abolo hageesilesibodiba noseediye dalai tekepo.”

<sup>9</sup> Esiga goo hagoso egeesees peledabaso. Bei, Yesuye daga o hamamee dili odoososo sabolosilesibulone taka to sabolotebilmame. Bei, yayo egeesees ka taka, “Ma, odoososo nayo amapoo tenee ee ayo diba medees bameleeso, odoososo hees peegoo osugobeles,” dees takaso.

<sup>10</sup> Esemes Saimon-Pitaye o kaiya tadolosotei moso wiligi odoososo taba eyo tou teli odoososo hees Malakuseeyo dulu deedes dokolo eekobuguso.

<sup>11</sup> Esemes Yesuye Pita mapoo egeeseetakaso, “Nees kaiya egee o moso mapoo



toose. Maye dala amapoo tenelame egee molo, ayo talai tekepo,” dee takaso.

<sup>12</sup> Esemé Loum ha teli odoó mooloo-goodoo toowa sabolo, osoloso dia wiligi odoó taba sabolo, osoloso Yu odoó dia tei moso gidebeli odoó oso Yesu toloso dee tiaso.

<sup>13</sup> Osoloso diayo yo Kayapaseeyo nalobo Anas mapoo ido diso. Kayapas hagoso dugo omapoo tei moso wiligi odoó to-boloso badebeiso.

<sup>14</sup> Kayapas hedebe hagoso daga Yesuwo goo maga Yu odoó dia wiligi odoó mapoo takolone, “Odoó hedebeeso odoó susuga ee halo talai tekepo,” dee ka taka.

*Pitaye Yesuwo goo gagadi*

*(Mat 26:69-70; Maka 14:66-68; Luka 22:54-57)*

<sup>15</sup> Edebeeyo Yesu toloso ido dime, Saimon-Pita dio osoloso Yesu o hamamee dili odoó hee dio hamamee diso. Esino tei moso wiligi odoó taba oso odoó Pitabolo di ee\* yo olo gooleedooso. Esemé yayo Yesuye di hamamee deedeé dileso, tei moso wiligi odoó taba eyo moso\* beeleé ee ma kulodu gadiso.

<sup>16</sup> Esino Pita yo beeleé osulu miyopoo tebidiso. Esemé odoó Pitabolo simi oso see osulu miyopoo wedi dileso, sobo osulu gibadeli mapoo takoloso, Pita kulodu ido diso.

<sup>17</sup> Esemé sobo ogoso Pita ogoloso yimapoo egeesee woosaso, “No noseé, Yesu o hamamee dili odoó hee nosomo?” dee takaso. Esemé Pitaye nei egeesee takaso, “Haye, asoneé,” diso.

<sup>18</sup> Biame omapoo tei moso wiligi odoó taba eyo tou teli odoó abo sabolo osoloso tei moso gidebeli odoó diba diya kekeisime, dou toloso dou halagameleeso. Esemé Pita yinosee dileso dibolo hodobo tobudulone dou hameleeso.

*Tei moso wiligi odoó taba oso*

*Yesu mapoo woosa*

*(Mat 26:59-66; Maka 14:55-64; Luka 22:66-71)*

<sup>19</sup> Biame omapoo tei moso wiligi odoó taba oso Yesu yayo eligi goo sabolo, osoloso o hamamee dili odoó dia goo ee yimapoo woosaso.

<sup>20</sup> Esemé Yesuye nei yimapoo egeesee takaso, “Odoó susuga eyo howo woola ayo goo susuga hagee takomo sileeso. Osoloso ayo ibada howo gisili moso mapoo osoloso tei moso ma kulodu peleso odoó mapoo eligimo siliso. Bei, Yu odoó susuga oso sibilesó omapoo mooloogoo deliso. Egeesi ma kulodu ayo goo hee mada takele.

<sup>21</sup> Esiga bei kasi maga nayo amapoo ka woosowala? Nayo odoó ayo eligime du mapoo woose. Bei, to ayo taka ee, diba gooleedooga.”

<sup>22</sup> Yesuye goo hagee takeme, tei moso gibadeli odoó hee koola omapoo tebidi oso Yesuwo mudu mapoo kobugulone egeesee takaso, “Nayo ibada tei moso wiligi odoó taba mapoo to nei egeesee takalai tekeponeé,” diso.

<sup>23</sup> Esemé Yesuye odoó yo kobugu mapoo nei egeesee takaso, “To ayo taka ee ma kulodu to tokeneé hee taka daga, nayo goo egee woola odoó susuga hamapoo yebigi. Esino ayo tei goo takano, bei kasalame nayo a ka kobuguwo?” dee takaso.

<sup>24</sup> Esemé Yesu o dee tia sabolo osee tobudume, Anaseeye tei moso wiligi odoó taba Kayapas mapoo ido diye diso.

*Pitaye Yesuwo goo see tobu gagadi*

*(Mat 26:71-75; Maka 14:69-72; Luka 22:58-62)*

<sup>25</sup> Saimon-Pita dou holone osee tobudume, odoó aboso yo ogoloso yimapoo egeesee takaso, “No Yesu o hamamee dili odoó hee nosomo?” diso. Esemé Pitaye egeesee takaso, “Haye, asoneé,” diso.

<sup>26</sup> Esemé tei moso wiligi odoó taba eyo tou teli odoó hee omapoo tebidiso, yo odoó Pitaye dulu kobugu sabolo soosoo hedebe. Osoloso yayo Pita mapoo egeesee takaso, “Ayo no Yesubolo olipi segei homolee ma kulodu sileeme egeiso,” diso.

**18:14:** Yon 11:49-51 \* **18:15:** Odoó Pitabolo di ee Yonee. \* **18:15:** *tei moso wiligi odoó taba eyo moso* hagee Anaseeyo moso. Daga yayo tei moso wiligi odoó toboloso badoboome, see hamamee Kayapaseeye o debi tooso. Esino edebeeyo takolone, Anas yo tei moso eyo wiligi odoó taba doloso osee takeliso. **18:27:** Yon 13:38

<sup>27</sup> Esem Pitaye see tobu egeesee takaso, “Odo egee asonee,” diso. Esem epedee omapoo kolokolo takaso.

*Yesu Paillet mapoo ido di*

*(Mat 27:1-2, 11-14; Maka 15:1-5; Luka 23:1-5)*

<sup>28</sup> Gesikolodee Yu odoo dia wiligi odoo oso Yesu Kayapaseeyo moso abaga see Loum gamalee odoo Paillet mapoo ido diso. Esino diba moso ee ma kulodu gadi-lega peegoo debeiso. Bei, diba goomegele, diayo Yu odoonee dia moso ma kulodu gaduga goo oso diba subugo kauwe dolone Gababia wo nelega peegeeyaga.\*

<sup>29</sup> Esem Paillet peegoo dileso tobudulone dimapoo egeesee takaso, “Odo hagoso goo kasi moodoowo, esiga niyo yo hamapoo ka ido simiyo?” dee takaso.

<sup>30</sup> Esem diayo nei yimapoo egeesee takaso, “Odo hagee goo hee tele diepi, iyo yo namapoo ido sibile pegeliyo,” diso.

<sup>31</sup> Esem Pailleteeye dimapoo egeesee takaso, “Niso yo ido dileso nibada tei magoo sabolo tebilame o goo midi,” dee takaso.

Esem Yu odoo dia wiligi odoo oso nei egeesee takaso, “Iyo yo wooloomalai goomogo. Esino iyo odoo wooloomalai Loum gamalee odooso imapoo kitulugu tenele,”

<sup>32</sup> Esiga goo hagoso olo peledabaso, Yesuye eyo talai goo ee takomo silee sabolo tebilame.

<sup>33</sup> Yayo egeesee taka dulosu Paillet yo see moso kulodu gadilesu badolone, Yesu idolosu yimapoo egeesee takaso, “No tei Yu odoo dia wiligi odoo taba nosomo?” dee takaso.

<sup>34</sup> Esem Yesuye nei egeesee takaso, “Nayo amapoo egee woosa ee no goolee takala, o, odoo heeso mo goo ee namapoo takaga ka takala?” diso.

<sup>35</sup> Esem Pailleteeye nei egeesee takaso, “Hagee mo goonee. Bei, a Yu odoonee. Teiyo? Esino nee odoo sabolo, osolosu tei moso wiligi odoo tebisa oso no amapoo ido simiso. Esiga no goo kasi moodoowo?”

<sup>36</sup> Esem Yesuye nei egeesee takaso, “Ayo wiligi doloso badeli goo ee mipoo hamaga koo siboso. Egeesi ma kulodu ayo wiligi doloso badeli goo ee mipoo hamapoo meli diepi, Yu odooso a teyaga, mo tou teli odooso a galalo biligeliyo. Esino ayo wiligi doloso badeli goo ee mipoo hamaga koo siboso,” dee takaso.

<sup>37</sup> Esem Pailleteeye see egeesee takaso, “Esiga no tei wiligi odoo. Teiyo, ha?” diso.

Esem Yesuye nei egeesee takaso, “Nayo amapoo takolone, a tei wiligi odoo, dee takemeni, ee tei taka. A mipoo hamapoo soomagooso, ayo odoo mapoo tei goodee takomo silame. Esiga edebeeyo tei goo ma kulodu dogo, diba mo to dulone ka doso.”

<sup>38</sup> Esem Pailleteeye nei egeesee takaso, “Tei goo ee ogoobo?” diso.

*Pailleteeye Yesu wooloomalame kitulugu tenee*

*(Mat 27:15-31; Maka 15:6-20; Luka 23:13-25)*

Paillet see peegoo gadilesu tobudulone Yu odoo dia wiligi odoo tebisa mapoo egeesee takaso, “Ayo odoo hamapoo goo hee koo ogo.

<sup>39</sup> Esino ayo nibada adaga dia goo ee dodolone, niyo Gababia wo ne biame mapoo, ayo odoo hee neliga moso ma kuloduga peegoo tamageliso. Esiga ayo Yu odoo nibada wiligi odoo hagee peegoo tamagalai, niba goomogosomo?” dee takaso.

<sup>40</sup> Esem diayo toso neligidi nei egeesee takaso, “Haye, odoo egee peegoo tamagalai, iba koo goomogo. Esino nayo Balabas ono peegoo ka tamagee,” dee takaga meleeso. Esino Balabas hagoso Loum odoo dia wiligi odoo tebisa mapoo ha temeleso.

## 19

<sup>1</sup> Osolosu Pailleteeye o ha teli odoo mapoo takolone, Yesu tolosu we tiso we-eye, diso.

<sup>2</sup> Esem diayo yo wooloso we ti sidolosu, o wiligi mapoo mediso, osolosu wiligi odoo

\* **18:28:** Yu odoo dia tei magoo oso egeesee takooso, “Yu odoo oso Yu odoonee dia moso ma kulodu gaduga, yo subugo kauwe badalaiso.” **18:31:** Yon 19:6-7 **18:32:** Yon 3:14; 12:33 **18:35:** Yon 1:11 **19:2:** Luka 23:11

tebisa oso kali dugo bige sage yimapoo kadiso.

<sup>3</sup> Osoloso diayo yo manolone yimapoo takolone, “Yu odoo dia wiligi odoo taba, iyo nee hu dokodoo poudoso,” dolone o mudu mapoo kobugu demeleeeso.

<sup>4</sup> Esem Pailteeye see o moso kulo-duga peegoo gadilesos tobudulone odoo mooloogoodoo mapoo egeesee takaso, “Niso be, ayo Yesu nimapoo ido sibileiso, ayo yimapoo goo hee egele poogoo goo nimapoo ee eligileiya,” dee takaso.

<sup>5</sup> Yayo egeesee takeme, Yesu we ti sidoo o wiligi mapoo mediloso dugo bige sage ka sabolo peegoo gasimiso. Esem Pailteeye dimapoo egeesee takaso, “Niso ege, odoo hagoso,” diso.

<sup>6</sup> Esem epedee omapoo tei moso wiligi odoo tebisa sabolo, osoloso tei moso gidebeli odoo oso yo ogoloso toso neligidi egeesee takaso, “Yo homo bulubo magoo ma dokodoo yoguso enige. Yo homo bulubo magoo ma dokodoo yoguso enige,” dee takemeleeeso.

Esem Pailteeye dimapoo egeesee takaso, “Niso yo homo bulubo magoo ma dokodoo yoguso enigilame ido di. Bei, ayo yimapoo goo hee koo ogo,” diso.

<sup>7</sup> Esem Yu odoo dia wiligi odoo tebisa oso nei yimapoo egeesee takaso, “Ibada tei magoo oso egeesee takooso, yo talai tekepo. Bei, yayo takolone, yo Godeeyo Owolo, dee takeliso,” diso.

<sup>8-9</sup> Esino Pailteeye goo hagee duloso diya obulone, see moso kulodu gadilesos tobudulone, Yesu mapoo egeesee takaso, “No odoo ogu biayo?” dee takaso. Esem Yesuye Pailteeye taka to eyo su nei takele.

<sup>10</sup> Esem Pailteeye yimapoo egeesee takaso, “Nayo amapoo to nei takele poogoo? Bei, no gooledeleyo, ayo no peegoo tamagee dee takalai, osoloso no homo bulubo magoo ma dokodoo yoguso enige dee takalai, amapoo kitulugu moloso?” dee takaso.

<sup>11</sup> Esem Yesuye nei yimapoo egeesee takaso, “Kitulugu epedee namapoo egee molo ee no goolee tele. Esino kitulugu hagee Godeeye namapoo ka tenee. Esiga

odoo a toloso namapoo tenee eyo goo tokenee oso nee goo tokenee ee dagadilesos ka moloso,” diso.

<sup>12</sup> Pailteeye to hagee duloso, Yesu peegoo tamagalai yo goomogaso. Esino Yu odoo dia wiligi odoo tebisa oso to neligidi egeesee takaso, “Odo agayo eyo nediliyo takolone yo wiligi odoo, dee takomo siloga, yo Loum wiligi odoo Sisa mapoo ha toso. Osoloso nayo odoo hagee peegoo tamagooga, no Sisayo odoonee,” dee takaga meleeso.

<sup>13</sup> Pailteeye to hagee duloso, Yesu peegoo ido sibileiso, yo goo midili odoo oso bili mapoo biaso. Bili mi egee takolone, yopoo mi, deliso. Osoloso Hibulu toso takolone, Gabata, deliso.

<sup>14</sup> Esiga goo hagee diayo Gababia wo nali sadee ee ma kulodu dia hasali biame ee mopoodoo dalai biame mapoo ka peledaba. Epedee omapoo osoko howo olo oo domo talai koola tabaso. Esem Pailteeye Yu odoo mapoo egeesee takaso, “Niso ege. Nibada wiligi odoo hagoso,” dee takaso.

<sup>15</sup> Esem diayo toso neligidi egeesee takaso, “Yo wooloome. Yo wooloome. Yo homo bulubo magoo ma dokodoo yoguso enige,” dee takemeleeeso.

Esem Pailteeye dimapoo egeesee takaso, “Niba goomogosomo, ayo nibada wiligi odoo ee homo bulubo magoo ma dokodoo yoguso enigilei?” dee takaso.

Esem tei moso wiligi odoo tebisa oso nei yimapoo egeesee takaso, “Ibada wiligi odoo hedebe Sisaso, odoo hee me,” diso.

<sup>16</sup> Esem Yesu homo bulubo magoo ma dokodoo yoguso enigilame, Pailteeye yo dimapoo teneeso. Esem o ha teli odoo oso Yesu toloso ido diso.

*Yesu homo bulubo magoo ma dokodoo yoguso eniga*

*(Mat 27:32-44; Maka 15:21-32; Luka 23:26-43)*

<sup>17</sup> Ha teli odoo oso Yesu toloso ido dulone, o homo bulubo magoo ee eyo eimaloso mi hee eyo hu wiligi ki mi deli mapoo ido diso. Mi hagee Hibulu toso takolone Gologota deli.

18 Osoloso mi omapoo diayo Yesu homo bulubo magoo ma dokodoo yoguso enigaloso tuluguso. Osoloso odoo bakadio onosee homo bulubo magoo mapoo yoguso enigaloso, odoo hee Yesuwo deede dokolo tulugu, osoloso hee dobusu dokolo tulugu diso.

19 Osoloso Pailteeye o odoo mapoo takolone, to hogugiye dee takeme, diayo to hageese hoguguloso Yesuwo oo poogoo ma dokodooga kalamaso,

“Yesu Nasalet odoo, Yu odoo dia wiligi odoo taba.”

20 Esiga to hogugu hagee Yu odoo dia to sabolo, osoloso Loum odoo dia to sabolo, osoloso Guliki odoo dia to oso hogugu. Esiga odoo susuga to hogugu egee ogoloso hesigaso. Bei, Yesu homo bulubo magoo ma dokodoo yoguso eniga mi ee Yelusalem maga haga hoogoonee.

21 Egeesi ma kulodu tei moso wiligi odoo tebisa oso sibilesu Paillet mapoo egeese takaso, “Nayo to hogugulone, yo Yu odoo dia wiligi odoo taba doloso na hogugi. Esino hageese hogugi, ‘Odoos hagosu takolone, yo Yu odoo dia wiligi odoo taba, dee takomo siliso,’ dee,” dee takaso.

22 Esem Pailteeye nei dimapoo egeese takaso, “To ayo hogugu hagee osee hogugu malaiso,” dee takaso.

23 Ha teli odoo bakadio bakadio di oso Yesu homo bulubo magoo ma dokodoo yoguso enigaloso, o dugo diesono domo puloso tooso. Osoloso o sedi sage edebeyo dusele poogoo sabolo diayo tooso.

24 Osoloso ha teli odoo dieso nei takoo nei takoo dolone egeese takaso, “Iba dugo hagee wulo domo na didamo. Esino dugo hagee odoo agayo toowa beleso yoso dasigeli hee dasigalo ogomo,” diso. Osoloso goo hagosu olo peledabaso, Godeeyo to booka mapoo hogugu sabolo tebilame. Bei, Godeeyo to oso egeese takooso, “Diayo mo dugo diesono puloso tooso.

Osoloso mo dugo sage ee talame yoso dasigeli hee dasigaso,” diso. Esiga ha teli odoo oso egee moodooso.

25 Egeese somolome, Yesuwo owe sabolo, osoloso oweyo omolo sabolo, osoloso Kolopaseeyo osobo Meli sabolo, osoloso Meli-Magadalin oso Yesu homo bulubo magoo ma dokodoo molome, koola omaga tebisamolone balaga meleeso.

26 Esem Yesuwo owe sabolo osoloso o hamamee dili odoo yayo diya gweli diba koola mapoo tebisamolome ogoloso owe mapoo egeese takaso, “Mo wee, odoo hagee nowoloso,” dee takaso.

27 Osoloso see o hamamee dili odoo hedebe omapoo egeese takaso, “No ege, noowee hagosu,” diso. Biame domo omaga Yesuwo hamamee dili odoo hagosu o moso mapoo Meli ido dileso medee bameleeso.

### *Yesuwo ta*

(*Mat 27:45-56; Maka 15:33-41; Luka 23:44-49*)

28 Esiga goo hagosu dileso koodobume, tou susuga Godeeye Yesu mapoo tenee ee yayo olo hosudooso doloso gooleedooso. Egeeseelone Godeeyo to booka mapoo hogugu sabolo tebilame egeese takaso, “A howo na poogoo,” diso.

29 Mi omapoo wain i koo hadali\* katolo mapoo keeso ee magoo meleeso. Esem odoo heeso homo sage toloso su mapoo dugo tialogoloso, wain i omapoo olugu doloso yayo nalame, Yesuwo maga mapoo heligiso.

30 Esem Yesuwo wain i egee olo naloso egeese takaso, “Goo susuga olo hosudooso,” dee takaso. Osoloso oo goobodo buloso taso.

31 Esiga biame egee Yu odooso hasali biame ee mopoodoo deli biame oso. Esino dia hasali biame egee goo diya toowa. Bei, Godeeye Gababia goo ee Yu odooso gooleebigili sadee ee ma kulodu hasali biame egee meleeso.\* Goo egeesi maga Yu odoo dia wiligi odoo tebisa oso dia hasali biame mapoo odoo ta eyo kou ee homo bulubo magoo ma dokodoo osee malai, diba goomegele. Esiga diayo Paillet

19:24: Psa 22:18    19:25: Mat 27:55-56    19:26: Yon 13:23    19:28: Psa 22:15    19:29: Psa 69:21    \* 19:29: *wain i koo hadali* - bi mauwe odoo sabolo osoloso ha teli odoo oso wain i koo hadali naliso, howo nala pegelega pagalame.    19:31: Deut 21:22-23    \* 19:31: Godeeye Gababia goo ee Yu odooso gooleebigili sadee ee ma kulodu, diayo Tasdee biame gesi mapoo Gababia wo naliso.



mapoo egeesee takaso, “Odoos homo bulubo magoo ma dokodoo egee molo saga wedilame, dibada homo gebisa poogoloso, dia kou miyomoo tomeilesa peegoo todi,” dee takaso.

<sup>32</sup> Esemee ha teli odoos oso dileso odoos hee Yesuwo dee deedeede dokolo eniga eyo homo gebisa poogooso. Osoloso see odoos hee Yesuwo dee doobusu dokolo eniga eyo homo onosee gebisa poogooso.

<sup>33</sup> Esino diayo sibilesa egeino, Yesu olo taneme, o homo gebisa pegele.

<sup>34</sup> Esino ha teli odoos heeso o molo tolosa Yesuwo ho hodio mapoo guso. Esemee haga booloogelega, sawo sabolo osoloso howo sabolo moloso gu omaga sooso.

<sup>35</sup> Esiga goo hagosa peledaba egei odoos\* oso goo hamaga tei goo takaso. Osoloso yo gooleedoo, yo tei goo takeli. Egeesi ma kulodu goo yayo taka hamapoo niyo tei talame ka taka.

<sup>36</sup> Esiga goo hagosa tei peledabaso, Godeeyo to booka mapoo hogugu oso taka sabolo tebilame. Bei, Godeeyo to oso egeesee takooso,

“O ki hee gebisa pagalaime,” dee takooso.

<sup>37</sup> Osoloso Godeeyo to hogugu heeso see egeesee takooso,

“Edebeeyo odoos dieso moloso gu mapoo balaga malaiso,” dee takooso.

### *Yesu mi doosoo*

*(Mat 27:57-61; Maka 15:42-47; Luka 23:50-56)*

<sup>38</sup> Osoloso hamamee, odoos hee Alimatiya mi mapoo badeli, o hu Yosep, yayo Yesuwo kou talame Paillet mapoo dileso woosaso. Yosep hagee Yesu o hamamee dili odoos hee yoso. Esino yo Yu odoos dia wiligi odoos tebisa ee bolo obulone, mada Yesuye di hamamee diliso. Esemee Pailleteeye yimapoo kitulugu teneeso, yayo Yesuwo kou talame. Esemee Yosepeeye dileso Yesuwo kou ee homo bulubo magoo ma dokodooga miyomoo tomeilesa peegoo todiso.

<sup>39</sup> Esemee Nikodimaseeye yo pidimo diso. Nikodimas hagee daga gesi Yesu agalame di odoos oso. Yayo sisigageli bi

medee tekepo Yesuwo kou mapoo hedilame todiso. Sisigageli bi medee tekepo hagosa hegi ee 30 kilo egeesi masi.

<sup>40</sup> Osoloso odoos bakadio oso Yesuwo kou tolosa, Yu odoos odoos toga mi dooseli goo ee dodolone, sisigageli bi medee tekepo oso Yesuwo kou mapoo hediloso dugo semeso tiegisaso.

<sup>41</sup> Egeesi ma kulodu Yesu homo bulubo magoo ma dokodoo eniga mi eyo koola omapoo homolee meleeso. Homolee ee ma kulodu bi dia yo ou poogoo mapoo daga odoos tayo kou magele poogoo meleeso.

<sup>42</sup> Esiga dia hasali biame bei mooloogalai koola tooboome, diayo Yesuwo kou tolosa saga yo ou poogoo ee ma kulodu magooso. Bei, yo ou poogoo egee haga hoogooneega.

## 20

### *Bi mosoowe molo egei*

*(Mat 28:1-8; Maka 16:1-8; Luka 24:1-12)*

<sup>1</sup> Sadee toowa gesikolo mi hadobilega molome, Meli-Magadalineeye Yesuwo bi agalame diso. Yayo sibilesa egeino, yo toowaso wulu ou kisi ee peegoo bidigamo dileso molome egeiso.

<sup>2</sup> Esemee Meliye see hoguo dileso Saimon-Pita dio osoloso Yesuwo hamamee dili odoos yayo diya gweli mapoo egeesee takaso, “Lodeeyo kou peegoo todina. Osoloso diayo o kou todilesa magoo mi ee, iba gooleedele,” dee takaso.

<sup>3</sup> Esemee Pita dio osoloso o hamamee dili odoos hee egee dio bi mapoo agalame diso.

<sup>4</sup> Diba hoguo diyadaga molome, o hamamee dili odoos heeso Pita dagadilesa bi mapoo peledabaso.

<sup>5</sup> Osoloso yo gauwuloso yo ou poogoo ma kulodu keesee egeino, hedebe dugo seme Yesuwo kou tiegisa ono molome egeiso. Esino yo yo ou poogoo ma kulodu gadile.

<sup>6</sup> Esemee Saimon-Pitaye hamamee sibilesa peledoboloso, yo ou poogoo ma kulodu gadilesa egeino, dugo Yesuwo kou tiadoo hedebe ono omapoo molome egeiso.

<sup>19:35:</sup> Yon 21:24 \* <sup>19:35:</sup> Odoos hagee Yonee <sup>19:36:</sup> Psa 34:20; Exo 12:46; Num 9:12 <sup>19:37:</sup> Zec 12:10; Yili 1:7 <sup>19:39:</sup> Yon 3:1-2

<sup>7</sup> Osoloso dugo Yesuwo wiligi tiadoo ee medee tiadoloso obusomo peegoo magoo molome egeiso.

<sup>8</sup> Esemé o hamamee dili odoó hee bi mapoo daga malalo peledaba oso yo ou poogoo ma kulodu gadiso. Yo gadilesó goo hágeé ogoloso tei tooso.

<sup>9</sup> Egeesi ma kulodu Godeeyo to booka mapoo hogugu oso takolone, yo ta maga hogaduloso gie badalaiso, dee taka goo eyo bei ee, diba medee kibiya gooleedelega osee debeiso.

<sup>10</sup> Osoloso o bakadio see mosopoo wedi diso.

*Yesuye Meli-Magadalin mapoo peledaba*

*(Mat 28:9-10; Maka 16:9-11)*

<sup>11-12</sup> Esino Meli-Magadalin bi ma peegoo tobudulone pusumeleeso. Yo omapoo pusulone gauwuloso, yo ou poogoo ma kulodu keesee egeino, Godeeyo momaiye bakadio dugo heliye kalagaloso doboome egeiso. Momaiye heeso Yesuwo wiligi poogoo dokolo buo, osoloso heeso kai poogoo dokolo buo doloso doboome egeiso.

<sup>13</sup> Esemé momaiye bakadio oso yimapoo egeesee takaso, “Sobo no, bei kaseega ka pusumalala?” dee takaso.

Esemé Meliye dimapoo egeesee takaso, “Diayo mo Lodeeyo kou ee peegoo todina. Esino diayo o kou magoo ee a gooleedele,” diso.

<sup>14</sup> Meliye to egeesee takoloso bidi toboloso keesee egeino, Yesu tobudo egeiso. Esino yayo goolee, Yesu odoó hee gooleeso.

<sup>15</sup> Esemé Yesuye yimapoo egeesee takaso, “Sobo no, bei kaseega ka pusumalala? Osoloso no odoó ogu esiamo silala?” dee takaso.

Esemé Meliye goolee yo homolee mapoo tou teli odoó oso bele dolone yimapoo egeesee takaso, “Emegei, nayo Yesuwo kou peegoo todilesó ka magoo daga, mi egee amapoo takee. Eseega ayo dilesó o kou egee ka talaiya,” dee takaso.

<sup>16</sup> Esemé Yesuye yimapoo egeesee takaso, “Meli,” diso.

Esemé Meliye bidi toboloso yimapoo Hibulu toso egeesee takaso, “Laboni.” To hágeeyo bei ee eligili odoó dolone ka takooso.

<sup>17</sup> Esemé Yesuye yimapoo egeesee takaso, “A nayo na gide. Bei, a mo Ma mapoo wedi pele. Esino nayo dilesó mo hamamee dili odoó mapoo takee, ‘A mo Ma Godee mapoo palame ka seeso. Ma Godee hedebe onosee dibada Godee osoloso nibada Godee,’ dee takee,” diso.

<sup>18</sup> Esemé Meli-Magadalineeye see wedi sibilesó Yesu o hamamee dili odoó mapoo egeesee takaso, “Ayo Yesu olo egeiso,” diso. Osoloso goo susuga Yesuye yimapoo taka ee see yayo dimapoo takaso.

*Yesuye o hamamee dili odoó mapoo peledaba*

*(Mat 28:16-20; Maka 16:14-18; Luka 24:36-49)*

<sup>19</sup> Sadee toowa habe omapoo Yesu o hamamee dili odoó oso Yu odoó dia wiligi odoó tebisa ee bolo obulone, hodobo mooloogoo doloso moso osulu medee kisigaloso debeiso. Esemé omapoo Yesuye sibilesó peledoboloso tobudulone dimapoo egeesee takaso, “Mesie goo oso nibolo osee mele dee,” dee takaso.

<sup>20</sup> Yayo to egeesee takoloso tobudulone, o dee boowo sabolo, osoloso o ho hodio mapoo moloso gu eyo boowo ee dimapoo eligiso. Esemé Yesu o hamamee dili odooso yo ogoloso diya goomogaso.

<sup>21</sup> Osoloso Yesuye see tobu dimapoo egeesee takaso, “Mesie goo oso nibolo osee mele dee. Esiga Maye a diye diga, ayo niba nosee diye deeso,” dee takaso.

<sup>22</sup> Yesuye goo hágee takoloso see dimapoo magaso hologoo nilone egeesee takaso, “Niba Dio Tei te,” diso.

<sup>23</sup> Osoloso see dimapoo egeesee takaso, “Niyo odoó heeyo goo tokenee boobado buguga, odoó egee bia dia goo tokenee ee hapoloso boobado bigileiso. Esino niyo odoó heeyo goo tokenee boobado bigilega poogooga, odoó egee bia dia goo toke-nee ee hapoloso boobado bigileime,” dee takaso.

*Tomaseeye Yesu ogoloso tei too*

<sup>24</sup> Esino Yesu o hamamee dili odoo hee Tomas, o hu hee Didimas\* deli, yo Yesuye o hamamee dili odoo mapoo dileso peledaba biame mapoo yo omapoo badele.

<sup>25</sup> Esememe Yesu o hamamee dili odoo oso yimapoo egeesee takaso, “Iba Lodee olo egeiso,” dee takaga meleeso. Esino Tomaseeye dimapoo egeesee takaso, “A niyo egee takoo duloso epedee tei talaime. Esino a mawo o dee boowo ogoloso mo dee woluguso omapoo sigo, osoloso o ho hodio mapoo moloso gu eyo boowo ee ogo doloso mo deeso omapoo sigoga, a tei ka talai,” dee takaso.

<sup>26</sup> Osoloso sadee hedebe poogoloso hamamee, Yesu o hamamee dili odoo oso moso hedebe mapoo mooloogoo doloso debeiso. Biame omapoo Tomas yinosee dibolo hodobo omapoo badebeiso. Esino diba osulu susuga kisigaloso doboome, Yesuye diayo debei domo mapoo peledoboloso tobudulone egeesee takaso, “Mesie goo oso nibolo osee mele dee,” diso.

<sup>27</sup> Osoloso tobudulone Tomas mapoo egeesee takaso, “Nee dee wolugu oso mo dee boowo hamapoo sigolo ege. Osoloso mo ho hodio mapoo moloso gu eyo boowo mapoo nee deeso sige. No goo haga na egege, esino amapoo tei te,” dee takaso.

<sup>28</sup> Esememe Tomaseeye nei yimapoo egeesee takaso, “Mo Lodee osoloso mo Godee,” diso.

<sup>29</sup> Esememe Yesuye yimapoo egeesee takaso, “Nayo a egeiga, amapoo tei ka toso. Esino edebeeyo a egelega poogoloso wulo amapoo tei toga, Godeeye nei dimapoo diya goomogalaiso,” dee takaso.

*Yoneeye to booka hamapoo hogugu goo eyo bei*

<sup>30</sup> Esiga Yesuye o hamamee dili odoo dia howo woola goo toowa opusomo di abo hee moodoogamo siliso. Esino goo egee booka hagee ma kulodu hogugule.

<sup>31</sup> Esino to hagee hoguguso, niyo Yesu yo tei Kelisodoo doloso goo omapoo tei talame. Osoloso niyo yo tei Godeeyo

Owolodoo doloso goo omapoo tei talame. Osoloso yimapoo tei too goo maga gie badeli ka talame.

## 21

*Yesuye Gelili abei mapoo o hamamee dili odoo mapoo peledaba*

<sup>1</sup> Osoloso see hamamee Yesu o hamamee dili odoo oso Gelili abei\* palaga mapoo doboome, yayo omapoo peledabaso. Goo hagoso egeesee peledabaso.

<sup>2</sup> Biame omapoo Yesu o hamamee dili odoo hagee biaso hodobo debeiso. Saimon-Pita, osoloso Tomas (o hu hee Didimas), osoloso Gelili mi toowa ee ma kulodu mi pepooko Kana mapoo badeli odoo hee Nataniyol, osoloso Sebediyo owolo bakadio, osoloso Yesu o hamamee dili odoo bakadio omapoo debeiso.

<sup>3</sup> Esememe Saimon-Pitaye o odoo mapoo egeesee takaso, “A pei olugulei dia,” diso. Esememe odoo aboso egeesee takaso, “Iba nobolo hodobo siba,” dee takaso. Esememe diba du mapoo hodobo tebisaso. Esino diba gesi di kobumo sileeno, di hedebe gile.

<sup>4</sup> Egeeseelone gesikolodee Yesuye abei palaga mapoo tobudume egeiso. Esino Yesu o hamamee dili odoo du ma kulodu tebisamolone Yesu ogoloso, diayo goolee yo odoo hee gooleeso.

<sup>5</sup> Esememe Yesuye abei palaga maga tobudulone dimapoo egeesee idagaso, “Emegei, niba di giligasomo?” diso. Esememe diayo nei egeesee takaso, “Haye, iba di hedebe gile,” dee takaso.

<sup>6</sup> Esememe Yesuye dimapoo egeesee takaso, “Nibada pei toloso see deede dokolo mapoo olugi, egeeseega niba di giligileiso,” diso. Esememe diba Yesuwo to duloso goo egeesi moodooso. Esememe di bei dia pei ma kulodu galagadiso. Esememe diayo dia pei pouduloso du ma kulodu magalai tebile poogooso.

<sup>7</sup> Esememe Yesu o hamamee dili odoo hee yayo diya gweli oso Pita mapoo egeesee takaso, “Egee yo Lodeedoo,” diso. Pitaye

to egeesee taka duloso o dugo tigama-goo see kaloso Yesu mapoo tabuo dilame howomoo bologobuguso.

<sup>8</sup> Esino Yesu o hamamee dili odoo aboso du sumo dulone, dia pei ee di sabolo howo kulomooga abei pee mapoo gisibamo diso. Bei, diayo pei olugu omaga widi pee ee haga hoogoonee, wulo 100 mita egeesi.

<sup>9</sup> Osoloso diba sibilesi dia du gimagoloso mubi mapoo daboogoloso egeino, dou hoo mapoo di sabolo wo sabolo si molome egeiso.

<sup>10</sup> Esemé Yesuye dimapoo egeesee takaso, “Di niyo epedee giliga egee abo hamapoo tosibe,” dee takaso.

<sup>11</sup> Esemé Saimon-Pitaye du ma kulodu daboogoloso pei di sabolo widi pee mapoo gisibamo dileso booboosee mapoo gisubumagooso. Pei ee ma kulodu di toowa bei, 153 egeesi molome egeiso. Esino pei ma kulodu di bei galaga dino dia pei tologo bigile.

<sup>12</sup> Esemé Yesuye dimapoo egeesee takaso, “Niba nei nalame sibadee,” diso. Esino Yesu o hamamee dili odoo dima kulodu odoo heeso Yesu mapoo takolone, “no odoo ogumo?” dee takele. Bei, diba olo gooleedoo, yo tei Lodee.

<sup>13</sup> Esemé Yesuye di sabolo wo sabolo toloso dimapoo teneeso.

<sup>14</sup> Esiga Yesu ta maga hogaduloso hamamee, o hamamee dili odoo mapoo peledaba hagoso bakadio hedebe diso.

### *Yesu dio Pita dio*

<sup>15</sup> Osoloso diba nei naloso koodobuloso, Yesuye Saimon-Pita mapoo egeesee takaso, “Saimon, Yoneeyo owolo, nayo a gweli oso odoo hagee biaso a gweli ee dagadusomo?” dee takaso.

Esemé Pitaye nei egeesee takaso, “O, Lodee. Ayo no diya goolee sabolo hagee bado goo ee, no gooleedoo,” diso.

Esemé Yesuye nei yimapoo egeesee takaso, “Mo sipi be ee nayo medee poopomelee,” dee takaso.

<sup>16</sup> Osoloso Yesuye see tobu egeesee takaso, “Saimon, Yoneeyo owolo, nayo a diya goolee sabolo badosomo?” diso.

Esemé yayo nei Yesu mapoo egeesee takaso, “O, Lodee. Ayo no diya goolee sabolo hagee bado goo ee, no olo gooleedoo,” dee takaso.

Esemé Yesuye yimapoo egeesee takaso, “Mo sipi be nayo medee bamelee,” diso.

<sup>17</sup> Osoloso see bakadio hedebe di mapoo Saimon-Pita mapoo egeesee takaso, “Saimon, Yoneeyo owolo, nayo a diya goolee sabolo badosomo?” dee takaso.

Esemé Pita to hedebe hagonosee Yesuye bakadio hedebe di taka ee duloso diya gooheleso. Esiga yayo nei egeesee takaso, “Lodee, goo susuga no gooleedooso. Osoloso ayo no diya goolee sabolo hagee bado goo ee, no olo gooleedooso,” diso.

Esemé Yesuye yimapoo egeesee takaso, “Mo sipi be nayo medee poopomelee.”

<sup>18</sup> Esiga ayo namapoo tei taka. No gie kauwa mapoo bi medee mopoodoo doloso no goomoga mi mapoo diliso. Esino no adaga poloso badoga, odoo heeso nee dee mapoo tiso bagagoloso, no mi nayo goweli mapoo gisibado dileiso.”

<sup>19</sup> Yesuye Pita mapoo taka hagee, Pitaye dooboo kasee talai goo ee taka. Esiga Pitaye ta maga Godeeyo hu dokodoo poudileiso. Osoloso Yesuye yimapoo mapoo egeesee takaso, “No a deede,” diso.

<sup>20</sup> Esemé Pitaye bidi toboloso egeino, o hamamee dili odoo Yesuye diya gweli oso dima miligiyopooga sibume egeiso. Yesuwo hamamee dili odoo hagee biaso daga o hamamee dili odoo sabolo nei nolone dobolone, Yesu mapoo bouwa melee oso, yimapoo egeesee ka woosa, “Lodee, odoo agayo no ha teli odoo mapoo ka tiasalaiyo?” dee taka odoo ee hagoso.

<sup>21</sup> Esemé odoo ogoso dima hamamee simi ee ogoloso, Pitaye Yesu mapoo egeesee takaso, “Lodee, odoo hamapoo kasee moodoolaisomo?” dee takaso.

<sup>22</sup> Esemé Yesuye yimapoo egeesee takaso, “Yo osee badoga, ayo see wedi sibilesi yo agalai, a goomogoga, egeesee selaiso. Esino egee nee goonee. No wulo a deede,” dee takaso.



<sup>23</sup> Eseme Yesu o hamamee dili odoo egee talaime, dee taka goo ee tei telaga odoo abo mapoo dudobuguso. Esino Yesuye takolone odoo egee talaime, dee takele. Yo wulo egeesee taka, “Yo osee badoga, ayo see wedi sibilesa yo agalai, a goomogoga, egeesee selaiso. Esino egee nee goonee,” dee ka taka.

<sup>24</sup> Esiga Yesu o hamamee dili odoo hagoso goo susuga yayo egei ee booka hamapoo hoguguso. Iba gooleedooso, goo susuga yayo hogugu ee tei goo.

<sup>25</sup> Esiga Yesuye goo hagee sabolo osoloso goo abo sabolo olo moodooso. Esino goo susuga egee booka hamapoo hogugule. Esino goo susuga egee booka abo mapoo hogugu diepi, mipoo hamapoo booka bei meliyo. Egeeseelone booka magalai debi me meliyo.

## Diye Di Odo

### *Diye di odo booka goo eyo bei*

Lukaye daga malalo o booka mapoo to tekepo Yesu Kelisowo goo hoguguloso, see Diye di odo booka hagee hoguguso.

Odo Luka yo daga melesenee neli odo badolone, o odo Poloye Godeeyo to takomo sileeme, yibolo sileeso.

Booka hagoso Yesuye toloso see hogabuloso kei mi ma dokodoo polome, hamamee sosee bei mooloogoo goo ee takooso. Diye di odo booka hageeyo kuloduga taka goo ee dugo 30 egeesi ee ma kulodu sibulone peledoboomo simiso.

Esiga sapta 1 abaga dino sapta 7 omaga takooso, daga malalo Yelusalem mapoo to tekepo Yu odoowe dibusomo toloso debei goo ee. Esino sapta 8 abaga dino sapta 12 omaga takooso, to tekepo Yu odo abo Yelusalem peegoo debeli odo mapoo takomo di goo ee. Osoloso see sapta 10 maga takooso, Yu odoonee oso daga malalo to tekepo duloso tei too goo ee. Osoloso hamamee sapta 13 abaga dino hoo poogoo maga takooso, Poloye mi opusomo opusomo di susuga mapoo Yu odo sabolo, osoloso Yu odoonee sabolo dimapoo to tekepo takomo di goo ee.

Lukaye Diye di odo booka hageeyo kulodu hogugu goo toowa bakadio hagoso. Malalo goo hagoso. To tekepo hagee mi opusomo opusomo di mapoo debeli odo susuga dibada. Bei, Godeeyo to tekepo tenee hagee hedebe Yu odo mapoo tenele. Haye, Yu odoonee diba nose to tekepo dimapoo teneeso.

Osoloso goo hee hagoso. Diye di odo booka oso daga malalo Dio Tei oso tei telaga odo mapoo meledaba goo ee eligiso. Osoloso omaga bei mooloogoloso abaga simino epedee hamapoo Dio Tei oso tei telaga odo susuga pidilone kitulugu ka tenemoloso.

### *Yesu kei mi ma dokodoo ido pala goo*

<sup>1-2</sup> Tiyopoles emegei,

Ayo daga namapoo booka hoguguloso tenee omapoo, Yesuye goo tomo sili sabolo yayo eligi goo sabolo hoguguso. Osoloso yo kei mi mapoo ido palai goo sabolo hoguguso. Osoloso yo kei mi mapoo ido pelega badolone, Dio Tei oso kitulugu maga diye di odo yayo gilimadoo odo dimapoo kokodo takaso.

<sup>3</sup> Osoloso Yesu toloso midoo maga hogabuloso biame 40 eyo kulodu yayo tei hogabia goo ee diayo ogoloso tei talame yayo silone, o hamamee dili odo mapoo peledoboo demeleso. Osoloso dibolo silone, Godeeye wiligi doloso badeli goo dimapoo takomo siliso.

<sup>4</sup> Osoloso biame hedebeo Yesu o hamamee dili odo gilimadoloso nei nolone badolone, Yesuye to kitulugu sabolo takaso, “Niba Yelusalem poogoloso na di! Esino mo Maye taka Dio Tei oso sibilei omapoo dulone bolone ka debee, bei mo Maye to hagee nimapoo olo takaso.

<sup>5</sup> Esiga Yoneeye niba howodeeso ogusigaso, esino biame koola mapoo Dio Tei oso sibleso nimapoo kitulugu tenelaiso,” diso.

<sup>6</sup> Esem diye di odo Yesubolo Olipi mubi mapoo mooloogoodoloso dobolone, diayo yimapoo woosaso, “Lodee, nayo epedee hamapoo Isalael odo oso ibada mi gidabalame kitulugu see imapoo tenelaisomo?” diso.

<sup>7</sup> Esem Yesuye dimapoo nei egeese takaso, “Hedebe Maye biame hageesi yayo kitulugu sabolo mageliso. Esiga biame egeesi niyo gooledalai nibada goonee.

<sup>8</sup> Esino Dio Tei nimapoo meledobooga, niba kitulugu talaiso. Osoloso niyo mo goo mi toowa mapoo takomo dileiso, Yelusalem abaga bei mooloogoloso abaga dino, Yudiya mi toowa mapoo, osoloso Samaliya abaga dino mi toowa hoopogoo mapoo takomo dileiso.”

<sup>9</sup> Yesuye to hagee takoloso tobudulone, diayo balaga molome, Godeeyo kitulugu oso kei mi mapoo yo ido palaso. Esem

kei ma dokodooga kolobo oso sibilesu Yesu gooloogo bugume diayo egele poogooso.

<sup>10</sup> Diba Yesuye kei ma dokodoo pala mapoo osee balaga molome, odo baka-dio dugo heliye megiga oso dima koola omapoo saga sibilesu, tebisa meleeso.

<sup>11</sup> Diayo egeese takaso, “Gelili odo, niba bei kasi maga kei ma dokodoo ka balaga malala? Nibada howo woola Godeeye Yesu kei mapoo ido palaso. Esiga Yesu kei ma dokodoo poolome niso egemenee, yayo hamamee kolobo ma dokodooga, see egeese siboga agalaiso,” diso.

### *Diye di odo hee, Matiyas hesia goo*

<sup>12</sup> Diye di odo oso Yesu kei mi ma dokodoo pala ogoloso, Olipi mubi maga Yelusalem mapoo wedi diyadeeso. Yelusalem ee Olipi mubi abaga hoo-gonee.

<sup>13</sup> Diba Yelusalem mapoo peledoboloso, diso debeli moso mapoo paladeeso. Odo abo hagoso moso eyo kulodu debeiso: Pita, Yonee, Yemes, Endulu, Pilipi, Tomas, Batolome, Matiyu, Alpiyeseeyo owolo Yemes, Saimon (daga Loum gamalee maga ha teli odo), osoloso Yemeseeyo owolo Yudas.

<sup>14</sup> Diye di odo, sobo abo sabolo, osoloso Yesuwo owee Meli sabolo, osoloso Yesuwo omolo dio sabolo hagee hodobo mooloo-goodoloso biame susuga Godee mapoo takeliso.

<sup>15</sup> Biame hedebe mapoo tei telaga odo susuga 120 oso hodobo mooloo-goodoloso doboome, Pitaye toboloso dimapoo egeese takaso,

<sup>16-20</sup> “Mo odo, ayo Yudaseeyo goo nimapoo taka. Yo ibada mooloo-goodoo ma kulodu Godeeyo tou hodobo tomo siliso. Esino yayo Yesu ha teli odo mapoo tiasooso.”

(Eseme tei moso wiligi odo tebisa oso Yudas yimapoo molee teneme, yayo molee oso mi su neiso tooso. Osoloso yo mi omapoo dileso, miyomoo homodobuloso, beliye tologonuloso, kakobo gwadobuloso taso. Eseme Yelusalem mapoo debeli odo susuga oso goo hagee duloso, mi egee dibada toso hu egeese hediso,

“Akeledama.” Hu hageeyo bei, “sawo go.”)

Eseme Pitaye see egeese takaso, “Esiga Godeeyo to booka mapoo hogugu oso tei diso. Bei, Dio Tei oso Deibidi mapoo eligi maga yayo Yudaseeyo goo daga hogoo Godeeyo to hogugu Sam booka mapoo egeese hoguguso,

‘O mi mapoo odo mauwe pagalaiso.

Odo heeso omapoo badalaime.’

Osoloso see egeese hoguguso,

‘O tou su see odo heeso talaiso,’” diso.

<sup>21-22</sup> Pitaye see egeese takaso, “Esiga Yudaseeye tou teli ee see odo heeso talame odo hee hesiamo. Yayo ibolo silone Yesuye toloso hogabia goo ee takomo silame. Osoloso odo yayo biame susuga ibolo hodobo silone, Yonee odo howo ogusiga molome egei sabolo, osoloso abaga simino Yesuye kei ma dokodoo polome egei odo ee hesileiso,” diso.

<sup>23</sup> Eseme tei telaga odo susuga oso Yosep dio Matiyas dio hesiaso. Yosep hagee hu bakadio hedebe di (Balasabas osoloso Yustus).

<sup>24-25</sup> Diayo odo bakadio hagee hesialoso dobolone Yesu mapoo egeese takaso, “Lodee, no odo susuga oso goo goolee no gooleedooso. Esiga odo bakadio hamapoo nayo hesia imapoo eligi, yayo Yudaseeyo debi omapoo badolone, diye di odo eyo tou su ee talame. Bei, Yudas yo tokenee tooga, eyo nei yo dou mi mapoo diso,” diso.

<sup>26</sup> Diayo Yesu mapoo taka koodobuloso, diye di odo heeso yo bakadio toloso hee mapoo Matiyaseeyo hu magoo, osoloso hee mapoo Yosepeeyo hu magoo doloso toloso halabume, yo hedebe miyomoo homodobiaso, diayo odo bakadio hesia ma kulodu Godeeye hesia odo ee talame. Diayo egeese moodooloso, odo hedebe Matiyas tooso. Eseme yo diye di tou ee talame diye di odo 11 sabolo hedebe diso.

## 2

### *Dio Tei oso meledaba*

1 Pentikos biame omapoo, tei telaga odoo susuga moso hedebe mapoo mooloo-goodoloso debeiso.

2 Esemе haga booloogelega kei ma dokodooga iso goowa masi oso diayo mooloo-goodoloso debei moso omapoo tooso.

3 Esemе dou paiya masi oso odoo susuga moso kulodu mooloo-goodoloso debei, dimapoo tugusume egeiso.

4 Esemе Dio Tei oso dibada kulodu mele-doboloso molome, Dio Tei oso kitulugu maga to opusomo opusomo di kesaso.

5 Biame omapoo Godeeyo goo diya gooleedoo Yu odoo mi susuga maga sibilesa, Yelusalem mapoo debeiso.

6 Esino diba iso goowa masi goowa ee duloso, goo ee agalame sibadeeso. Diba sibilesa egeino, tei telaga odoo susuga oso to opusomo opusomo di kesamolome duso. Diayo to opusomo opusomo di kesamelee ma kulodu diayo dibada to kei duloso, diya howoogadooso.

7 Esemе diba howoogadoloso goo tiadoo sabolo dobolone egeesee takaso, “Odoo to egee kesa, Gelili odoo oso kesa.

8 Bei kasi maga diayo ibada to kesa iyo ka dusomo?

9 Bei, iba mi opusomo opusomo di hamaga sibadee odoo: Patiya abaga, osoloso Mediya, Elam, Mesopotamiya, Yudiya, Kapadokiya, Pontus, Asiya,

10-11 Piligiya, Pampiliya, Isipi, Libiya mi toowa ma kulodu mi pepooko Kulene abaga sibadee. Osoloso odoo abo Loum mi abaga sibadee. Osoloso Yu odoonee abo Loum mi abaga sibadee oso, Yu odoowo Godee mapoo tei too maga, Yu odoowo hu too odoo oso. Osoloso odoo abo Kiliti sabolo Alabiya mi abaga sibadee odoo oso. Iba mi opusomo opusomo di omaga sibadee oso. Esino diayo ibada to keseme duso. Esiga diayo to hagee boowoo Godeeye goo toowa moodoo maga ka boowoo,” diso.

12 Diba howooga sabolo, goo tiadoo sabolo, dobolone dieso nediliyo egeesee takaso, “Hagee ogoowoo?” diso.

13 Esino odoo abo Yelusalem mapoo

sibadee oso tei telaga odoo dimapoo manolone dieso nediliyo egeesee takaso, “Odoo hagee yugune naloso ka halabaga,” diso.

### *Pitaye to taka goo*

14 Esemе Pitaye goo hagee duloso, diye di odoo sabolo tebisaloso to neligidi takolone, odoo mooloo-goodoo mapoo egeesee takaso, “Yu odoo Yelusalem mapoo debeli sabolo, osoloso odoo soo sibadee, niba mo to hagee medee dui!

15 Odoo abo niyo imapoo takolone, iba yugune naloso ka halabaga, diso. Esino iba egeesee koo seeso. Bei, gesikolo osoko simi domo taba mapoo, edebeeyo yugune naloso koo halabagali.

16 Esino to niyo du sabolo, osoloso goo niyo egei sabolo egee, Godee maga to tolosa kokodo takomo sili odoo Yoweliye to taka goo sabolo olo teibaso:

17 ‘Godeeye egeesee takaso,

“Biame hamameedee omapoo ayo Dio Tei odoo susuga mapoo tenelaiso.

Osoloso nibada giso holaiso sabolo, sobo holaiso sabolo, oso to Godeeye taka goo ee takalaiso.

Nibada holaiso gie kakauwa oso howo opusomo doloso, Godee maga simi goo ee agalaiso.

Osoloso nibada adaga oso Godee maga simi goo ee sapootileiso.”

18 Osoloso Godeeye see egeesee takaso,

“Biame hamameedee omapoo mo tou teli odoo susuga, giso sabolo, sobo sabolo, dimapoo Dio Tei tenelaiso.

Osoloso diayo Godeeye taka to ee duloso odoo mapoo takalaiso.

19 Osoloso kei ma dokodoo osoloso mi hamapoo goo mudu opusomo di moodoolaiso.

Biame omapoo mi toowa hamapoo niyo ha too sabolo, dou sabolo, osoloso dei i toowa sabolo agalaiso.

20 Osoloso kei ma dokodoo osoko neligidi bigileiso.

Osoloso a see sawo masi bigileiso.

Goo egeesi oso peledobooga, Lodeeyo biame goo toowa oso sibilei koola toobooga ka selai.



21 Osoloso edebeeyo Lodeeye pidilame yimapoo woosaga, nei yayo yimapoo gie badeli tenelaiso.”’

22 Esiga Isalael odoo, niba to hagee dui! Yesu, Nasalet odoo, Godeeye niba gooleebugulone hesiaso. Osoloso Yesuye nima kulodu goo mudu opusomo opusomo di moodoomo silone, Godeeye yo hesia goo ee woola yilige buguso. Esiga goo oso peledaba niba gooleedooso.

23 Esino Godee eyo goomoga maga daga hoogoo Yesu toloso nimapoo tenelame to takoloso magooso. Egeesi maga yayo Yesu toloso nimapoo teneme, Yu odoo niyo osoloso Godeeye tei magoo mapoo koo mesili odoo sabolo oso yo homo bulubo magoo ma dokodoo yoguso eniga maga yo wooloomaso.

24 Esino Godeeye Yesu dala teli goo maga peegoo tamagalame, Godeeye yo ta maga hogabidiso. Bei, teli oso yo talai tebile.

25 Esiga ibada amawe wiligi odoo taba Deibidiye Yesuwo goo Godeeyo to booka mapoo hogugu maga egeesee takooso, ‘A biame susuga Godeeye mo mudugiyopoo tobudo doloso gooleedeliso.

Yo koola mapoo tobudoso. Esiga a ebileime.

26 Esiga mo sooloo ma kulodu goomoga toowaso molone, goomoga goo hagee ka taka.

A tei toso, mo su see gie badalaiso.

27 Bei, Godee nayo a toga mo gie badeli ee odoo wedia eyo dio oso debeli mi mapoo a pagalaime.

Nayo hesia odoo eyo su midoo ma kulodu hunulame pagalaime.

28 Osoloso gie badeli eli nayo amapoo eligiso.

Esiga ayo nobolo badolone, diya goomogalaiso,’ diso.

29 Emegei, Deibidiye goo taka hagee, yayo o goo eyo nediliyo takele. Bei, yo teme midoosooso. Osoloso midoo ibolo moloso.

30 Esiga Godee maga to toloso kokodo takomo sili odoo daga malalo badebeiso. Esiga Godeeye to takoloso magoo ee gooleemeleso. Bei, Godeeye yimapoo

to magolone egeesee takaso, ‘Deibidiyo amawe heeso Deibidiye wiligi doloso badeli mi omapoo, see yayo wiligi doloso badalaiso,’ diso.

31 Esiga Deibidiye malalo hoogoo peledabalai goo ee ogoloso, Godeeye hesia Kelisoye midoo maga hogabilei maga egeesee takaso, ‘Godeeye yo midoo mapoo pagalaime, osoloso o su hunuleime,’ diso.

32 Esiga Godeeye Yesu ta maga see gie badeli mapoo hogabidiso. Goo ee iyo susuga ogoloso ka takomo siloso.

33 Osoloso Godeeye Yesu kei ma dokodoo ido peleso, o dee deede dokolo badoso, yayo yimapoo hu toowa tenelame. Osoloso yayo to magoo ee dodolone, o Dio Tei Yesu mapoo teneme, see Yesuye imapoo teneeso. Goo hagee niyo epedee hamapoo ogolone dulone ka badoso.

34 Esiga Deibidi yo kei ma dokodoo pele. Haye! Yayo taka egee Yesuwo goo ee taka, ‘Godeeye mo Lodee mapoo takaso:

No abolo wiligi doloso badalame mo dee deede dokolo bie.

35 Esiga nayo badolone namapoo ha teli odoo ee ayo dagadileiso.’

36 Esiga Isalael odoo, niba goo hagee medee goolee! Niyo Yesu homo bulubo magoo ma dokodoo yoguso eniga ee, Godeeye yo Lodee wiligi toowa taba doloso hudi magoo Keliso,” diso.

37 Esemee odoo mooloogoodoo oso to hagee duloso, dieso nediliyo dibada goo tokenee gooleedoloso, sooloo dala sabolo, ebia sabolo, Pita diye di odoo abo sabolo mapoo egeesee takaso, “Emegei, iyo ogoo goo moodolaiyo?” diso.

38 Esemee Pitaye dimapoo nei egeesee takaso, “Niba susuga nibada goo tokenee maga miligi pialoso, Yesu Kelisowo hu maga howo ogusige. Egeeseega nibada goo tokenee hapoloso boobado bigileiso. Egeeseega niba Godeeye Dio Tei wulayo egee tenemolo niyo talaiso.

39 Bei, Godeeye to magoo ee dodolone, yayo Dio Tei nimapoo, osoloso nowolo dimapoo, osoloso eli sage debeli odoo dimapoo tenelaiso. Osoloso odoo susuga

Godeeye gilimalalai goo ee dimapoo tenelaiso.”

<sup>40</sup> Esem Pitaye to sage takolone kokodo takaso, “Goo tokenee teli odo epedee hamapoo egee do dala talaiso. Esiga niba dala teyaga, goo tokenee ee pagalame Godeeye pidilame yimapoo takee.”

<sup>41</sup> Esem odo Pitayo to duloso, tei too odo diba howo ogusigaso. Esiga biame omapoo 3,000 odo oso howo ogusigaloso, tei telaga odo sabolo hedebe doloso mooloogoodoso.

<sup>42</sup> Osoloso diba howo ogusigaloso, biame susuga eyo kulodu diesono mooloogoodoloso, diye di odo oso eligime, medee duluga meleeso. Osoloso diba Lodee gooleebugu wo nalagamo silesibulone, biame susuga Godee mapoo takeliso.

### *Tei telaga odo oso mooloogoodoloso debei goo*

<sup>43</sup> Diye di odo diayo Godeeyo kitulugu sabolo goo mudu opusomo opusomo di moodoogamo silesibume, odo susuga oso ogoloso diya ebia sabolo howoogadooso.

<sup>44</sup> Osoloso tei telaga odo susuga oso biame susuga hodobo mooloogoodoloso, bi nei pidi, nei pidi deliso.

<sup>45</sup> Egeeseemo silesibulone, dibada mi sabolo, bi sabolo, odo mapoo teneloso, nei molee tooso. Osoloso molee oso tei telaga odo abo bi mauwe odo ee pidigamo siliso.

<sup>46-47</sup> Osoloso biame susuga diayo howo gililame, Yu odoowo tei moso beele ma kulodu hodobo mooloogoo deliso. Osoloso diayo Yesu gooleebugu wo nolone, diba moso opusomo opusomo di mapoo nalagaliso. Osoloso diayo silesibulone, dibada sooloo ma kulodu goo goolee hedebe doloso, goomoga goo Godee mapoo poudiliso. Esem Yelusalem odo susuga oso dibada goo ogoloso tekepo deliso. Osoloso Lodeeye biame susuga odo abo mapoo gie badeli teneliso. Egeeseelone tei telaga odo bei deliso.

**2:41:** Diye 2:47; 4:4  
Diye 4:10; 16:18

**2:42:** Diye 20:7

**2:44:** Diye 4:32-35

**2:46-47:** Diye 6:7; 11:21

**3:4:** Diye 14:9

**3:6:**

## 3

### *Pitaye odo kido todobia tekepo moodoo goo*

<sup>1</sup> Biame heeso habe Yu odooso Godee mapoo takeli osoko howo teme, Pita dio Yonee dio Yu odoowo tei moso mapoo palaso.

<sup>2</sup> Diba omapoo peleso egeino, odo kido todobia osulu mi eyo hu Osulu Medee Tekepo deli omapoo badoboome egeiso. Odo hagee soomagolone kido todobia sabolo soomagooso. Esiga biame susuga o odo abo oso yo sa mapoo magoloso imado peleso, osulu mi hamapoo ka ibedi deliso. Osoloso yo omapoo badolone, odo tei moso mapoo pala ogoga, yayo dimapoo molee howaliso.

<sup>3</sup> Yo omapoo howolone badolone egeino, Pita dio Yonee dio moso kulodu gadime, dimapoo molee howaso.

<sup>4</sup> Esem Pita dio Yonee dio yimapoo bolone, Pitaye yimapoo egeese takaso, “Imapoo ege!” diso.

<sup>5</sup> Esem yayo goolee, yimapoo molee tenelame kasabele dolone dimapoo egeiso.

<sup>6</sup> Esem Pitaye yimapoo egeese takaso, “Amapoo molee tei mauwe. Esino goo hagee amapoo egee molo wulo namapoo tenelaiso. Esiga ayo Yesu Keliso Nasalet odoowo hu maga namapoo ka taka, no toboloso di,” diso.

<sup>7</sup> Yayo egeese takoloso, odo kido todobia o dee deede mapoo toloso tebidime, o kido see tekepo paso. <sup>8</sup> Yo o kido tekepo poloso silone, Pita dibolo tei moso ma kulodu galaga diso. Yo tei moso ma kulodu gadilesu pupulodomo silone, Godee mapoo goomoga poudooso.

<sup>9-10</sup> Odo susuga oso odo kido todobia yayo Godee mapoo goomoga poudoomo sili ogoloso howoogadooso. Osoloso dieso nediliyo egeese takaga meleeso, “Odo hagee kido todobia Osulu Medee Tekepo deli eyo osulu miyopoo badolone molee howali hagoso. Esino yo kasee toboloso silone, goo hageesi ka tomo silosomo?” diso.

*Pitaye Yu odoowo tei moso mapoo to taka*

11 Odoowo daga kido todobia oso Pita dio Yonee dio dee mapoo toloso, Solomonowo hau\* mapoo silesibi ogoloso, odoowo susuga oso howoogadoloso, diayo debei omapoo hoguga sibadeeso.

12 Esem Pitaye odoowo susuga ogoloso, dimapoo egeese takaso, "Isalael odoowo, niba bei kasi maga ka howoogowala? Osoloso bei kasi maga niyo imapoo bologolone, goo diya ka tiadowala? Bei, odoowo hagee ibada kitulugu sabolo osoloso iyo tekepo doloso debei maga tekepo poloso koo siloso.

13 Esino Eibalaham, Aisek, Yekob, osoloso ibada amawe dibada Godeeye o tou teli odoowo Yesu mapoo kitulugu toowa olo teneloso, o hu dokodoo poudoso. Esino diayo yo wooloomalame, niyo yo Yu odoowo wiligi odoowo tebisa mapoo teneeso. Osoloso yo goo midilame Paillet mapoo ido dime, Pailteeye egeese takaso, 'Ayo yimapoo goo tokenee koo ogo,' dee takeme, niyo yo goweso.

14 Esino Yesu tekepo, tokenee mauwe odoowo oso. Esino niyo yo gowoolone, Balabas odoowo wooloomali odoowo ee Pailteeye neliga moso ma kuloduga peegoo di diso.

15 Esino niyo Yesu gie badeli teneli wooloomaso. Esino Godeeye yo ta maga see hogadiso. Esiga yo ta maga see hogabuloso silime, iyo egei goo ee ka takomo siloso.

16 Esiga odoowo kido todobia oso Yesu mapoo tei too maga yo tekepo paso. Esiga niba odoowo hagee gooleedooso, yo daga kido todobuloso badebeiso. Esino yayo Yesuwo kitulugu mapoo tei too maga odoowo susuga oso balaga molome, yo tekepo paso."

17 Osoloso Pitaye odoowo mooloogoodoo mapoo see egeese takaso, "Emegei, a gooleedooso, nibada wiligi odoowo tebisa sabolo oso Yesu boobadolone, yimapoo goo moodoo eyo bei niba gooleedele.

18 Esino daga hoogoo Godeeye o odoowo yimaga to toloso kokodo takomo silesibili odoowo dimaga Kelisoye dala talai goo ee malalo olo takaso. Esiga goo hagee peledabalame Godeeye moodooso.

19 Esiga nibada goo su wuduloso, goo tokenee maga miligi pialoso, Godee mapoo bidiga debee. Egeeseega Godeeye nibada tokenee hapoloso boobado bigileiso. Nibada goo su wuduloso, goo tokenee maga miligi pialoso, Godee mapoo bidiga dobooga, Godeeye nimapoo kitulugu dia tenelaiso.

20 Osoloso owolo Yesu, Godee yayo hesia Keliso nimapoo di dalaiso.

21 Esiga epedee biame hamapoo Yesu kei ma dokodoo badoso. Yo kei ma dokodoo badolone Godeeye goo susuga dia daga, omapoo sibileiso. Esiga Godeeye o odoowo yimaga to toloso kokodo takomo silesibili hesia odoowo daga hoogoo debei dimaga goo hagee olo takaso.

22 Esiga Godee maga to toloso kokodo takomo sili odoowo hee Moseseeye Godeeyo to booka mapoo egeese takaso,

'Godeeye niba gooleebugulone, nima kuloduga o odoowo yimaga to toloso kokodo takomo sili odoowo hee a egeesi masi hesileiso.

Esiga goo susuga yayo taka mapoo medee dui.

23 Osoloso edebeeyo o to duloso, tei telega poogooga, odoowo ee Godeeyo mooloogoodoo ma kuloduga peegoo peledoboloso, talaiso,' diso.

24 Godee maga to toloso kokodo takomo sili odoowo hee Semuweleeyo hamamee tebisa sabolo oso epedee biame hamapoo peledabalai goo ee takaso.

25 Esiga Godeeye nibada amawe sabolo, osoloso o odoowo yimaga to toloso kokodo takomo silesibili odoowo daga hoogoo debei sabolo, oso to magoo ee nibada. Bei, yayo Eibalaham mapoo egeese takaso, 'Namawe hee maga ayo odoowo susuga mi toowa mapoo hagee do ee pidileiso,' diso.

\* **3:11: Solomonowo hau** - Solomonowo yo daga hoogoo Yu odoowo wiligi odoowo taba Deibidiyo owolo oso. Yelusalem mi mapoo Yu odoowo tei moso tegei mapoo hau meleeso, hau eyo hu Solomonowo hau. **3:13:** Exo 3:6, 15; Luka 23:13-25; Diye 2:23 **3:17:** Luka 23:34; 1Tim 1:13 **3:19:** Diye 2:38 **3:22:** Deut 18:15, 18-19 **3:25:** Gen 22:18 **3:26:** Diye 13:46

<sup>26</sup> Esiga Godeeye hesia tou teli odo Yesu ee nimapoo di diso, niyo malalo to tekepo dulame. Esiga yayo niba pidi maga nibada goo goolee mudu opusomo doloso, nibada tokenee maga miligi pilame,” diso.

## 4

### *Pita dio Yonee dio goo midilame ido pala*

<sup>1-4</sup> Pita dio Yonee dio odo mooloo-goodoo mapoo to takolone Yesuye ta maga hogabia eyo goo takaga meleeso. Esiga di-ayo egeesee takaso, “Yesu ta maga hogabia maga niba ta maga see hogabileiso,” diso. Esem omapoo Pitaye to taka duloso tei telaga odo sabolo, osoloso daga tei telaga odo sabolo, hodobo mooloo-good-eme 5,000 tugodooso. Esem tei moso wiligi odo tebisa sabolo, tei moso gidebeli odo dia wiligi odo taba sabolo, Sedisi odo sabolo sibilesi, Pitaye Godeeyo to takolone, ta maga see hogabilei goo maga taka duloso, diya kamaso. Osoloso di-ayo Pita dio Yonee dio tooso. Osoloso olo neligime diba epedee neliga moso tegei ma kulodu toosooso, osoloso see gesikolo Yu odoowo wiligi odo tebisa mapoo ka ido dilame.

<sup>5</sup> Osoloso gesikolo Yu odoowo tei moso wiligi odo tebisa sabolo, osoloso Yu odoowo wiligi tebisa adaga susuga sabolo, osoloso Godeeye tei magoo ee eligili odo susuga sabolo, Yelusalem mapoo mooloo-goodooso.

<sup>6</sup> Dibada mooloo-goodoo ma kulodu tei moso wiligi odo taba Anas sabolo, o soosoo Kayapas sabolo, Yonee sabolo, Alesanda sabolo, osoloso o soosoo abo sabolo mooloo-goodooso.

<sup>7</sup> Esiga wiligi odo tebisa susuga oso omapoo mooloo-goodoloso dobolone, di-ayo odo abo oso Pita dio Yonee dio ido sibe, diso. Esem Pita dio Yonee dio omapoo doboome, wiligi odo tebisa oso dimapoo egeesee woosaso, “Niyo odo kido todobia tekepo kasee moodoowo? Niba agamo kitulugu osoloso agamo hu maga yo tekepo ka payo?” diso.

<sup>8</sup> Pita Dio Tei oso kitulugu toloso badolone Dio Tei maga dimapoo to nei egeesee takaso, “Wiligi odo tebisa sabolo, Yu odoowo wiligi tebisa adaga sabolo, niba mo to dui.

<sup>9</sup> Niba iyo odo kido todobia yo pidilone tekepo moodoome niyo ogoloso, ibada goo midilame ka ido dila? Niba yo tekepo pa eyo bei gooleedalai goomogosomo?

<sup>10</sup> Esino nibolo Yu odo susuga sabolo goo hagee gooleedalai tekepo. Bei, Yesu Keliso, Nasalet odo, niyo woolooma Godeeye ta maga hogadi eyo kitulugu maga, iyo epedee niyo egee ogo odo hagee olo tekepo paso.

<sup>11</sup> Esiga Yesuwo goo maga Godeeyo to booka mapoo hogugu oso egeesee takooso, ‘Moso tegeli odo diayo omou gowoolone togobugu oso epedee hamapoo moso omu domo pupodoo ka moloso.’

<sup>12</sup> Esiga Yesu mapoo gie badeli teneli ka moloso. Esiga mi toowa hamapoo odo hee mauwe edebeeyo badoboso gie badeli talai, hedebe Yesu yimapoo moloso.”

<sup>13</sup> Esem Yu wiligi odo tebisa oso Pita dio Yonee dio dimapoo ebilega, diayo dimapoo to nei tekepo taka duloso, diba diya howoogadooso. Pita dio Yonee dio sukulu tele osoloso wulo mosoowe odo. Esem wiligi odo tebisa oso egeesee gooleedooso, odo bakadio hagee Yesu-olo silidoo, diso.

<sup>14</sup> Osoloso diayo Pita dio Yonee dio odo kido todobia tekepo moodooloso, Pita dibolo tebisa melee ogoloso, wiligi odo tebisa oso to nei takele poogooso.

<sup>15</sup> Diayo to nei takalai mauwe poo-goome, Pita dio Yonee dio moso kuloduga peegoo galaga diye doloso, balaga melee diso. Osoloso wiligi odo tebisa diesono to mouso.

<sup>16</sup> Esem diesono to moulone egeesee takaso, “Iyo dimapoo ogo goo moodolaisomo? Bei, Yelusalem odo susuga oso di-ayo mudu opusomo di goo toowa moodoo egee egeiso. Esiga iyo goo hamapoo game-nee takalai tekeponee.

<sup>17</sup> Esiga goo hageesi oso toowa diyaga, odo bakadio hagee toloso, see Yesuwo hu



maga odoo susuga mapoo na eligimo silesibe, kitulugu sabolo egeesee takalaiso,” diso.

<sup>18</sup> Esiga wiligi odoo tebisa oso Pita dio Yonee dio gilimadoloso dimapoo egeesee takaso, “Niyo silesibulone, Yesuwo hu maga goo abo na eligi,” diso.

<sup>19</sup> Esememe Pita diayo dimapoo to nei egeesee takaso, “Esiga niba niso nediliyo goo hagee medee goolee. Godeeyo howo woola abaga, nibada to mapoo iyo mesilone, nei iyo Godeeyo to mapoo mesilega pagalai tekepedo?”

<sup>20</sup> Bei, iyo Yesuye goo tomo silime egei goo sabolo osoloso Yesuye takeme du goo ee takalai pagalame,” diso.

<sup>21</sup> Esememe wiligi odoo tebisa oso dimapoo to kitulugu sabolo takolone, “Yesuwo hu maga niyo see eligimo silesiboga, iyo nimapoo dala tenelaiso,” dee takoloso, goo midili moso maga peegoo diye diso. Bei, odoo susuga oso odoo kido todobia tekepo pa maga Godee mapoo diya goomogome. Esememe wiligi odoo tebisa oso Pita dimapoo dala tenelai biame egele poogooso.

<sup>22</sup> Esiga odoo kido todobuloso badebei dugo 40 poogooso.

### *Tei telaga odoo oso Godee mapoo takeli goo*

<sup>23</sup> Pita dio Yonee dio goo midili moso maga peegoo galaga dileso, tei telaga odoo sabolo mooloogoodoloso tei moso wiligi odoo tebisa sabolo, osoloso Yu odoowo wiligi odoo tebisa diayo taka goo ee dimapoo takaso.

<sup>24</sup> Esememe tei telaga odoo oso to hagee duloso, diesono mooloogoodoloso Godee mapoo takolone egeesee takaso, “Kitulugu Godee, nayo mi sabolo, kei sabolo, osoloso abei sabolo, osoloso bi susuga ee ma kulodu egee molo moodooso.

<sup>25</sup> Esiga nayo Dio Tei maga nee tou teli odoo ibada amawe Deibidiye egeesee takaso,

‘Bei kasi maga Yu odoonee oso diya ka kamanaliyo?’

Osoloso goo bei mauwe maga to wulo ka moumo siliyo?

<sup>26</sup> Mi toowa eyo wiligi odoo tebisa oso diesono hodobo mooloogoodoloso kitulugu Godee sabolo, osoloso yayo hesia Keliso sabolo, mapoo ha talame mopoodoo doloso doso,’ diso.

<sup>27</sup> Deibidiye tei goo takaso, bei Yu odoowo wiligi odoo taba Helodee sabolo, Loum gamalee odoo Pontiyus-Paillet sabolo, osoloso Isalael odoo sabolo, Yu odoonee sabolo, diesono Yelusalem omapoo mooloogoodoloso Yesu nayo hesia tou teli odoo Keliso wooloomalame to mouso.

<sup>28</sup> Esino diayo goo moodoo hagee, daga hoogoo nayo gooleedoloso, goo hagoso peledabalame, nayo kitulugu sabolo goomoga magooso.

<sup>29</sup> Esiga kitulugu Godee, wiligi odoo tebisa hagoso epedee nee tou teli odoo imapoo ebili to taka ee nayo duso. Esiga imapoo kitulugu tenee, iyo nee to takomo silesibulone, ebia goo mauwe pagalame.

<sup>30</sup> Esiga nayo kitulugu eligilone, odoo paigiga tekepo pe. Osoloso nee tou teli odoo nayo hesia Yesuwo hu maga goo toowa mudu opusomo di moodee,” diso.

<sup>31</sup> Esino diayo Godee mapoo taka koodobuloso, diayo debei moso ee halabume egeiso. Esememe Dio Tei oso dimapoo meledoboloso, diba Dio Tei oso kitulugu toloso dobolone, ebia goo mauwe poogoloso, Godeeyo to takomo silesibilame bei mooloogooso.

### *Tei telaga odoo oso debei goo*

<sup>32</sup> Esiga tei telaga odoo mooloogoodoo oso dibada sooloo ma kulodu goo goolee hedebe doloso dobolone, odoo heeso bi koo goodegeli, diba diso biso nei pidi, nei pidi deliso.

<sup>33</sup> Egeeseelone diye di odoo oso kitulugu toowa sabolo silesibulone, Yesuye toloso hogabia eyo goo takomo silesibiliso. Osoloso Godeeye tei telaga odoo susuga dimapoo goo tekepo moodeliso.

<sup>34-35</sup> Esiga tei telaga odoo oso dibada mi sabolo moso sabolo odoo mapoo teneloso,

nei molee toloso diye di odoo mapoo teneliso. Egeeseega diye di odoo oso molee egee papisaloso, tei telaga odoo abo bi tebile poogoo mapoo teneliso. Osoloso dibada kulodu odoo heeso bi mauwe koo sili.

<sup>36-37</sup> Osoloso tei too odoo hee Yosepeeye o mi odoo abo mapoo teneloso nei molee tooso. Osoloso yayo sibilesa, molee ee diye di odoo dimapoo teneeso. (Yosep hagee Saiples mi te omapoo badeli, yo o bala Libai. Esino diye di odoo oso yimapoo hu hee teneeso, Banabas, hu eyo bei emegei pidili odoo.)

## 5

### *Ananayas dio osobo Sapila dio dibada goo*

<sup>1</sup> Osoloso odoo hee badebeiso, o hu Ananayas, osoloso osobowo hu Sapila, diayo dibada mi su pepooko odoo mapoo teneloso nei molee tooso.

<sup>2</sup> Osoloso mosopoo sibilesa, obakadio to mouloso, molee abo mada magoloso, Ananayaseeye diye di odoo dimapoo molee abo tosililesa teneeso.

<sup>3</sup> Esem Pitaye Ananayas mapoo egeese takaso, “Bei kasi maga nayo Saitenso gamenee taka to mapoo mesilone, Godeeyo Dio Tei mapoo gamenee takolone, mi molee too abo mada ka magoowo?”

<sup>4</sup> Mi hagee odoo mapoo tenelega melee omapoo nee mi diso. Esino nayo odoo mapoo mi teneloso, nei molee too egee neeso. Esiga nee molee oso, no goomoga goo ee talai tekepo. Bei kasi maga, nayo molee abo nee mosopoo mada magoo egee imapoo takele, esino nayo gamenee takolone, ayo molee susuga tosimi hagosu, dee ka takayo? Esino nayo hedebe imapoo gamenee takele, esino nayo Godee mapoo gamenee takaso,” diso.

<sup>5-6</sup> Esem Ananayaseeye to hagee du- loso, yo toloso homodobiaso. Esem odoo gie kakauwa oso dugoso o su tiadoloso midoososo. Esem goo hagee takeme duluga, odoo susuga oso diya ebigaso.

<sup>7</sup> Esino Ananayaseeye osobo goo hagee dule. Esino yo osoko howo bakadio

hedebe di poogoloso, hamamee Pita diayo debei mapoo simiso.

<sup>8</sup> Esem Pitaye yimapoo egeese takaso, “Amapoo takee, niyo mi su odoo mapoo teneme molee too ee hagosomo?”

Esem Ananayaseeye osoboye nei egeese takaso, “O, molee iyo too olo ogoso.”

<sup>9</sup> Esino Pitaye yimapoo egeese takaso, “Bei kasi maga nee bakadio Godeeyo Dio Tei mapoo gamenee takalame goomoga ka magoowo? No ege, gie kakauwa odoo oso nomo midoosoo odoo, osulu miyopoo tebisa moloso. Osoloso no toga, diayo no midoosoolaiso,” diso.

<sup>10</sup> Osoloso yo to kemelee biame omapoo Ananayaseeye osobo toloso, Pitayo homo beiyomoo homodobiaso. Esem odoo gie kakauwa odoo oso sibilesa ogoloso yo ta molome, diayo o su toloso, omowo midoo hodiokooga midoososo.

<sup>11</sup> Esem tei telaga odoo susuga sabolo, osoloso goo hagee du odoo susuga sabolo oso diya ebigaso.

### *Diye di odoo oso odoo paigiga susuga tekepo moodoo*

<sup>12</sup> Diye di odoo oso goo toowa mudu opusomo opusomo di odoo ma kulodu moodoogamo silesibiliso. Osoloso tei telaga odoo susuga oso tei moso tegei Solomonowo hau mapoo diesono mooloo- goodeliso.

<sup>13</sup> Esem tei tele poogoo odoo oso, diye di odoowo goo ee tekepo dee take- liso. Esino diayo dibolo hodobo mooloo- goodoloso hedebe dalai diya ebigeliso.

<sup>14</sup> Esino biame susuga ma kulodu, sobo sabolo, giso sabolo, Lodee mapoo tei toloso, tei telaga odoo mooloogoodoo sabolo hedebe deliso.

<sup>15</sup> Diye di odoo oso goo mudu opu- somo opusomo di moodoogamo silesimi ogoloso, odoo susuga oso odoo paigiga iyado sibilesa, eli domopoo kida palaga- loso, kida mapoo tiedigeliso. Bei, Pitaye osoko pa maga dulone, o dio taba oso gooloogooga, diba ka wedilame.

<sup>16</sup> Esem Yelusalem koola omapoo mosobia pepooko oso odoo paigiga sabolo,

odoo bo holo paladee oso dala temelee sabolo, iyado sibiliso. Egeeseega diye di odoo oso diba tekepo peliso.

*Diye di odoo oso*  
*Yesuwo goo maga dala too*

<sup>17</sup> Diye di odoo oso goo mudu opusomo opusomo di hagee moodoogamo silesibume, tei moso wiligi odoo taba sabolo, osoloso o emegei Sedisi odoo sabolo, goo hagee ogoloso, diye di odoo dimapoo diya kooloogaso.

<sup>18</sup> Esem diayo diye di odoo toloso neliga moso tegei ma kulodu toosooso.

<sup>19</sup> Esino gesi mapoo Lodeeyo momaiye oso sibileso neliga moso eyo osulu kisi yamagooso. Esem diye di odoo neliga moso ma kuloduga peegoo iyado dileso, dimapoo egeese takaso,

<sup>20</sup> “Niba tei moso tegei mapoo dileso odoo mapoo gie badeli goo dia hagee takee,” diso.

<sup>21</sup> Esem diye di odoo oso o to mapoo mesiloso, gesikolodee osoko gie sibume, tei moso ma kulodu galaga dileso, Yesuwo goo ee eligilame bei mooloogooso.

Esem tei moso wiligi odoo taba sabolo, osoloso Sedisi odoo sabolo, oso diye di odoo eyo goo mapoo to meilame, Yu odoowo wiligi odoo tebisa susuga gilimadooso. Osoloso diayo neliga moso gibadeli odoo dimapoo to takaso, diayo diye di odoo susuga iyado sibilame.

<sup>22</sup> Esem gibadeli odoo oso neliga moso tegei mapoo dileso egeino, diye di odoo me molo egeiso. Esem diba see wedi dileso, wiligi odoo tebisa mapoo egeese takaso,

<sup>23</sup> “Iyo dileso neliga moso mapoo egeino, osulu diya kisina, osoloso gibadeli odoo oso pee maga gidoboome egeiso. Esem iyo osulu yamagoloso, moso kulodu galaga dileso egeino, diye di odoo mauwena,” diso.

<sup>24</sup> Esem tei moso wiligi odoo tebisa sabolo, osoloso tei moso gidebeli odoo dia wiligi odoo taba oso goo hagee duloso, goo diya gooleeso, ogooo oso hamamee ka peledoboomobelee doloso.

<sup>25</sup> Esem odoo heeso dimapoo sibileso egeese takaso, “Dui! Niyo odoo neliga moso tegei mapoo tooso ee, see dileso tei moso mapoo odoo eligi moloso,” diso.

<sup>26</sup> Esem to ee duloso, tei moso gibadeli dibada wiligi odoo taba oso o odoo sabolo diye di odoo ee see iyadalame, diso. Esino diayo diba iyadoloso wele. Bei, edebeeyo gibadeli odoo mapoo gowoolone, yoso diba piligiyaga.

<sup>27</sup> Esino diayo diye di odoo wiligi odoo tebisa dibada mudugiyopoo iyado simiso. Esem tei moso wiligi odoo taba oso dimapoo egeese takaso,

<sup>28</sup> “Iyo to kitulugu sabolo nimapoo egeese takaso, ‘Niyo Yesuwo goo eligimo na silesibe,’ diso. Esino niyo ibada to mapoo mesile. Esiga niba ege! Niyo eligi goo oso Yelusalem mi toowa ee tooso. Osoloso Yesuye ta goo ee see niyo imapoo gigidilame ka see,” diso.

<sup>29</sup> Esino Pitaye diye di odoo abo sabolo to nei egeese takaso, “Iba Godee mapoo mesimo silesibiliso. Esino edebeeyo goomoga goo ee talaime.

<sup>30</sup> O, tei takoo, niyo Yesu homo bulubo magoo mapoo yoguso eniga oso wooloomaso. Esino ibada amaweyo Godeeye Yesu niyo woolooma ta maga see hogadiso.

<sup>31</sup> Osoloso Godeeye Yesu ta maga hogadiloso o dee deede dokolo mapoo ibediso, yayo wiligi doloso badolone gie badeli ee pidili odoo dalame. Esiga epedee hamapoo yimapoo kitulugu moloso, Yu odoo susuga oso dibada goo goolee opusomo doloso, dibada goo tokenee mapoo miligi piaga, goo tokenee hapoloso boobado bigileiso.

<sup>32</sup> Esiga goo susuga hagee Yesuye moodoomo sili goo sabolo, osoloso yimapoo peledaba goo sabolo, ee iyo ogoloso, see odoo mapoo takomo silesibiliso. Osoloso Dio Tei ima kulodu egee molo oso goo hamapoo tei takoo, deeso. Bei, Godeeyo to mapoo mesimo silesibili odoo mapoo Dio Tei teneliso,” diso.

<sup>33</sup> Esem Yu odoowo wiligi odoo tebisa oso goo hagee duloso komonolone, diye di

odoo piligilame goomogaso.

<sup>34</sup> Esino dima kulodu Pelisi odoo hee, o hu Gamaliyoye tabaso, odoo hagee Godeeye tei magoo ee eligili odoo. Osoloso odoo susuga oso yo tekepo odoo dolone, yo dokodoo maluguso. Esino yayo tobudulone, diye di ee epedee biame deiyepo peegoo gilimadoo di, diso.

<sup>35</sup> Esem wiligi odoo tebisa mapoo egeesee takaso, "Isalael odoo, niyo odoo hagee dimapoo goo moodoolame medee gooleemeleso ka moodee.

<sup>36</sup> Bei, niba goolee, daga odoo hee Tudeeeye goo hageesi moodoolone o su toowa diso. Osoloso 400 odoo oso yibolo silesibiliso. Esino edebeeyo yo wooloomome, yibolo silesibili odoo 400 diba kukulo diyadeeso. Egeesi maga goo mauwe poogooso.

<sup>37</sup> Esem yima hamamee, gamalee odoo oso odoo susugayo hu tomo silesimi biame omapoo odoo hee Yudas Gelili odoo oso peledabaso. Yibolosee o su toowa doloso, odoo gilimado sileeso. Esem edebeeyo yo wooloomome, yibolo silesibili odoo ee kukulo diyadeeso.

<sup>38</sup> Esiga ayo goo hagee gooleebuguloso, nimapoo ka kokodo taka, odoo hagee dimapoo goo hee na moodee. Bei, diayo goo moodoogamo egee silesibo, odoo maga simi daga, goo hagoso mauwe pagalaiso.

<sup>39</sup> Esino goo egee Godee maga siboga, niyo diba hamaga takooga tebileime. Esino wulo niyo Godee mapoo ha talame ka selai," diso.

<sup>40</sup> Esem wiligi odoo tebisa oso Gamaliyowo to mapoo tei takoo diso. Osoloso diayo diye di odoo see iyado sibe diso. Osoloso diye di odoo diba sibilesodo-boome, edebeeyo diba woolooge, diso. Osoloso diba wooloogaloso, wiligi odoo tebisa oso diba diye dolone to kitulugu sabolo egeesee takaso, "Niba see Yesuwo goo ee takolone eligimo na silesibe!" diso.

<sup>41</sup> Diye di odoo oso wiligi odoo tebisa diba poogoloso dulone, diya goomogaso. Bei, diayo Yesu mapoo tei too maga dala teme, Godeeye diba dokodoo poudooso.

<sup>42</sup> Osoloso diba biame susuga tei moso tegei ma kulodu, osoloso odoo abo dia moso ma kulodu odoo mapoo to hagee eligimo silesibulone, "Yesu Godeeye hudi magoo Keliso oso," dee taka koodobile.

## 6

### *Pidili odoo 7 daga hesia goo*

<sup>1</sup> Biame omapoo tei telaga odoo oso bei moodooso. Esino tei telaga odoo susuga ma kulodu, Guliki to kesali odoo oso Hibulu to kesali odoo sabolo toso agadigaso. Bei, diayo mooloogoodoo ma kulodu, Guliki to kesali dibada sobo bau mapoo nei koo teneme.

<sup>2</sup> Esem diye di odoo oso tei telaga odoo susuga gilimadoloso egeesee takaso, "Iyo Godeeyo to takomo sili poogoloso see sobo bau mapoo nei pilei ee tekeponee.

<sup>3</sup> Esiga emegei, nima kulodu pidili odoo giso 7 hesie. Niyo diba hesiaga, odoo goo goolee medee tekepo, osoloso Godeeyo Dio Tei oso kitulugu toloso debeli giso ee hesie. Egeeseega diba iyo emegei pidili tou dimapoo tenelaiso.

<sup>4</sup> Esino iba wulo Godeeyo to takomo silesibulone, yimapoo takomo silesibileiso," diso.

<sup>5</sup> Esiga tei telaga odoo susuga oso to hagee duloso tekepo doloso, odoo 7 hagee hesiaso: Sitiben (odoo hagee tei too kibiloso badolone Dio Tei oso kitulugu toloso badeli), osoloso Pilipi, osoloso Polokolus, osoloso Nikanolo, osoloso Timono, osoloso Palemenas, osoloso Antiyoka odoo, Nikolas. Odoo hagee Yu odoonee, esino yayo Yu odoowo Godee mapoo tei too maga Yu odoo dia hu ka too.

<sup>6</sup> Diba odoo 7 hagee hesialoso diye di odoo mapoo iyado sibadeeso. Esem diye di odoo oso dimapoo deeso sigolone Godee mapoo takaso, bei diba tou hageesee teli odoo dalame.

<sup>7</sup> Esem tei telaga odoo oso odoo susuga mapoo Godeeyo to takomo sileeme, tei telaga odoo oso Yelusalem mi ee ma kulodu bei moodooso. Osoloso tei moso wiligi odoo tebisa bei oso Yesu mapoo tei tooso.



*Tei moso wiligi odoo tebisa oso**Sitiben too*

<sup>8</sup> Godeeye Sitiben tei pidilone kitulugu teneeso, yayo odoo ma kulodu goo toowa mudu opusomo opusomo di moodoolame.

<sup>9</sup> Esino Yu odoo abo Libetini howo gisili moso ma debeli odoo oso yimapoo toso agadigaso.\* Odo hagee Kulene mi mapoo debeli, osoloso odoo abo Alesandiliya mi mapoo debeli, osoloso Kiliya mi mapoo debeli, osoloso odoo abo Asiya mi mapoo debeli. Diayo sibilesa Sitiben mapoo toso agadigaso.

<sup>10</sup> Esino diayo toso agadiga ma kulodu, Sitibeneeye Dio Tei oso kitulugu maga to takeme, odoo susuga oso to takalai eli egele poogooso.

<sup>11</sup> Esem Sitibenbolo toso agadiga melee odoo oso Sitiben maga gamenee takalame, odoo abo mapoo mada sibilesa toso pupume, diayo egeese takaso, "Sitibeneeye Godeeye hu sabolo, osoloso Moseseeye hu mapoo duwa takeme duso," diso.

<sup>12</sup> Esem odoo susuga sabolo, osoloso Yu odoowo wiligi odoo tebisa sabolo, osoloso Godeeye tei magoo ee eligili odoo sabolo oso to hagee duloso, diya komonolone Sitiben tooso. Osoloso diayo Sitiben toloso wiligi odoo tebisa oso to kesamelee mapoo ido palaso.

<sup>13</sup> Diba omapoo peleso dobolone, Sitibeneeye goo maga gamenee takeli odoo oso gamenee egeese takaso, "Odo hagosu ibada tei moso maga tokenee goo takeliso, osoloso Moseseeye eligi goo hogugu goo maga tokenee goo takeliso.

<sup>14</sup> Osoloso iba yayo egeese takeme duso, 'Yesu Nasalet odoo oso ibada tei moso tegei guobuguloso, see Moseseeye tei magoo hogugu ee abo poogoloso, see tei dia abo magalaiso,'" diso.

<sup>15</sup> Esem wiligi odoo tebisa susuga dobolone Sitiben mapoo bolone egeino, Sitibeneeye mudu Godeeye momaiye eyo mudu masi poloso tobudume egeiso.

**7***Sitibeneeye to toowa taka goo*

<sup>1</sup> Esem tei moso wiligi odoo taba oso Sitiben mapoo egeese woosaso, "Odo susuga oso nee goo maga egee takoo teiyo?" diso.

<sup>2</sup> Esem Sitibeneeye tei moso wiligi odoo tebisa dimapoo to nei takolone egeese takaso, "Mo ei dio osoloso mo ma dio, niba mo to hagee medee dui. Ibada amawe Eibalaham yo Halan mi mapoo dilega, Mesopotamiya mi mapoo bado-boome, ibada Godee kitulugu toowa oso yimapoo peledabaso.

<sup>3</sup> Esem Godeeye Eibalaham mapoo egeese takaso, 'Nee mi sabolo nee odoo sabolo poogoloso ayo namapoo eligilei mi mapoo di,' diso.

<sup>4</sup> Esiga Eibalaham Mesopotamiya mi poogoloso see Halan mi mapoo badalame diso. Esino Eibalaham yo mi omapoo badoboso, ama teme, Godeeye yo see epedee niyo egee do mi hamapoo sibe, diso.

<sup>5</sup> Esem Godeeye mi hamapoo Eibalaham mapoo mi su pepooko tenele. Esino Godeeye Eibalaham bolo osoloso amawe dibolo oso hamamee mi hagee talai maga to takoloso magooso. Biame omapoo Eibalaham yo holo soomagelega badebeiso.

<sup>6</sup> Osoloso Godeeye yimapoo egeese takaso, 'Namawe dio oso mi hee mapoo dileso odoo soo masi dabalaiso. Egeeseega mosobia odoo oso namawe dimapoo tou nei mauwe wulayo talaiso. Osoloso diayo dala ma kulodu dobolone dugo 400 pagalaiso.

<sup>7</sup> Esino namawe dimapoo dala egee tenemolo odoo dimapoo ayo nei dala tenelaiso. Egeeseega namawe diayo mi egee poogoloso see hamapoo sibilesa, amapoo goomoga tenelone mo hu dokodoo poudileiso,' diso.

<sup>8</sup> Osoloso Godeeye Eibalaham dio to takoloso magolone egeese takaso, 'Ayo

\* **6:9: Libetini howo gisili moso ma debeli odoo** - Odo hagee dibada goo egeesi: Daga hoogoo Loum odoo oso gibamelee biame omapoo, diba iyado dileso neliga moso tegei ma kulodu toosooso. Osoloso odoo abo nei mauwe tou talagamo silesibe, diso. Osoloso hamamee Loum odoo oso dibada mi mapoo wedi diyadee, diso. **6:10:** Luka 21:15 **7:2:** Gen 11:31; 12:1 **7:5:** Gen 12:7; 15:18; 17:8 **7:6:** Gen 15:13-14; Exo 12:40 **7:7:** Exo 3:12 **7:8:** Gen 17:9-14; 21:4

nobolo osoloso namawe dio eyo Godee doloso badolone, nima koola hamapoo badalaiso. Osoloso niyo amapoo tei too goo ee eligilone nibolo, osoloso nowolo dibolo, osoloso namawe dio susuga hamamee soolooga magalai sabolo, kolo kookoolone dabalaiso,' diso. Esem e Eibal-ahameeye giso holo Aisek soomageme, biame 8 poogoloso kolo kooso. Osoloso hamamee Aisekeeye giso holo Yekob soomageme, kolo kooso. Osoloso Yekob sabolo owolo giso holo 12 susuga kolo kookooso. Esiga Yekobowo owolo 12 odo hagoso ibada bala 12 eyo bei ka moloso.

<sup>9</sup> Esino Yekobowo owolo susuga hagoso dibada omolo Yosep mapoo diya kweliso. Egeeseelone dibada omolo Yosep yo Isipi odo mapoo ido dilesos neiso talame teneeso. Yayo mi omapoo dilesos, nei mauwe tou toowa wulayo tolone badalame. Esino Godee yibolo badolone,

<sup>10</sup> dala goo ma kuloduga yo medee pidiliso. Osoloso Godeeye Yosep mapoo goo goolee tekepo teneeso. Esem e Isipi odoowo wiligi odo taba oso goo hagee ogoloso, Yosep mapoo diya goomogaso. Esem e Yosep mapoo egeese takaso, 'Nayo ama hemi tou tolone badolone, Isipi mi toowa nayo gibalaiso. Osoloso mo moso sabolo nayo gibalaiso,' diso.

<sup>11</sup> Osoloso hamamee Isipi mi sabolo, ibada amawe diayo debei Keinen mi sabolo, mapoo osoko pa toowa biame oso nei mauwe poogooso. Esem e odo omapoo debeli oso dala ma kulodu debeiso. Osoloso ibada amawe sabolo nei mauwe debeiso.

<sup>12</sup> Esino Yekobeeye Isipi mi mapoo nei melee goo ee duloso, owolo diayo nei ee neiso talame diye diso. Esem e diayo dilesos nei tolosos sibadeeso.

<sup>13</sup> Nei diayo tosi badee mauwe poogoome, see Isipi mi mapoo nei abo talame diyadeeso. Diba dilesos nei talame doboome, Yosep yimapoo pelebada goo ee yayo emei dimapoo woola takaso. Esem e Isipi wiligi odo taba oso Yosepeeye soosoo eyo goo gooleedooso.

<sup>14</sup> Esem e Yosepeeye ama sabolo, o soosoo sabolo, Isipi mi mapoo sibilesos dabalame to teneeso. Esem e diba Yosepeeye to egeese takas duloso, diba susuga 75 odo oso Isipi mi mapoo sibadeeso.

<sup>15</sup> Esem e Yekobowo owolo dio Isipi mi mapoo dilesos dobolone, yibolo, osoloso owolo dibolo mi omapoo wediaso.

<sup>16</sup> Hamamee diba wedime, dibada su Sekem mi mapoo midoosalame todiyadeeso. Midoo wulu ou hagee daga hoogoo Eibalahameeye Hamolowo owolo mapoo neisos tooso.

<sup>17</sup> Dugo bei poogoloso hamamee ibada amawe dio oso Isipi mi mapoo bei moodooso. Esem e biame omapoo Godeeye Keinen mi Eibalaham mapoo, osoloso amawe dimapoo tenelaiso, doloso to takoloso magoo biame oso koola simiso.

<sup>18</sup> Esiga wiligi odo taba dia, Yosepeeye goo gooleedele poogoo odo oso Isipi mi ee gibadebeiso.

<sup>19</sup> Wiligi odo taba hagoso ibada amawe dio diya gowoolone, dimapoo kukulone dala tenelone badebeiso. Osoloso yayo to kitulugu sabolo pupulone, ibada amawe dia holope gie soolooga magoo susuga ee wedilame, peegoo malosos peegee diso.

<sup>20</sup> Egeeseelone debei biame omapoo, Isalael sobo hedebe oso giso holo mudu medee tekepo soomagooso, o hu Moses. Osoloso a bakadio hedebe di ma kulodu ama dio owee dio oso dibada moso kulodu mada gibadebeiso.

<sup>21</sup> Osoloso a bakadio hedebe di poogoloso holope peegoo magooso. Esem e Isipi wiligi odo taba eyo owolo sobo holo oso holope ogoloso, yayo maduloso, owolo doloso mosopoo madio dilesos poopooso.

<sup>22</sup> Esem e Moses kauwume, Isipi odo oso yimapoo sukulu goo goolee tekepo eligiso. Osoloso yayo to takas sabolo, tou too sabolo, kitulugu toowa tomo sileeso.

<sup>23</sup> Osoloso Moses dugo 40 poogoloso badolone, yayo o odo Isalael odo ee agalame dilame gooleeso.

**7:9:** Gen 37:11, 26-28; 39:1-3, 21-23    **7:10:** Gen 41:37-44    **7:11:** Gen 41:54; 42:1-2    **7:13:** Gen 45:1-4, 16    **7:14:** Gen 45:9-11; 46:27    **7:15:** Gen 46:1-7; 49:33    **7:16:** Gen 23:2-20; 33:19; Josh 24:32    **7:17:** Exo 1:7-8    **7:19:** Exo 1:11-22    **7:20:** Exo 2:2    **7:21:** Exo 2:3-10    **7:24:** Exo 2:11-15

<sup>24</sup> Yayo dulone egeino Isipi odoo heeso Isalael odoo hee woomelee ogoloso, yayo nei Isipi odoo hee wooloomaso.

<sup>25</sup> Osoloso Moseseeye egeese gooleeso, 'Isalael odoo oso goolee, ayo diba dala ma kuloduga peegoo gilimado dilame, Godeeye a dimapoo ka sibeye di doo,' dee gooleeso. Esino Isalael odoo oso goo ee gooleede.

<sup>26</sup> Biame hee mapoo Moseseeye Isalael odoo bakadio biliga molome egeiso. Esememe yayo diba biliga melee hamaga takalame hodu dileso, egeese takaso, 'Emegei, niba kasi maga ka biliga malala? Niba soosoo hedebe,' diso.

<sup>27</sup> Esememe odoo hee emegei woomelee oso Moses halaga buguloso egeese takaso, 'No ibada wiligi tabayo, osoloso goo midili odoowo?'

<sup>28</sup> Nayo eiyo Isipi odoo hee wooloomaso. Esiga nayo a woolomalame ka sala?' diso.

<sup>29</sup> Esememe Moseseeye to ee duloso obulone, Isipi mi maga see Midiyan mi mapoo pulo diso. Osoloso Midiyan mi omapoo odoo soo masi badolone sobo huloso, giso holo bakadio soolooga magooso.

<sup>30-31</sup> Moses Midiyan mi mapoo dileso dugo 40 poogoloso badolone, see Sainai mubi esia kumoo miwe poogoo mi mapoo silone egeino, homo su deiyepo o du douso nadelega dou omapoo paiya molome ogoloso howoodooso. Esino dou paiya oma kulodu Godeeyo momaiye oso tebidi egeiso. Esememe Moses yo dou paiya mapoo agalame hodu dimeleeno, Godeeye yimapoo egeese takaso,

<sup>32</sup> 'A namawe dio Eibalaham, Aisek, osoloso Yekob dibada Godee oso,' diso. Esememe Moses ebia sabolo kikiligolone see tobu egele poogooso.

<sup>33</sup> Esiga kitulugu Godeeye see yimapoo egeese takaso, 'Mi nayo taba egee molo tei mi. Esiga nee homo bi ka egee tiga magee.

<sup>34</sup> Ayo mo odoo susuga oso Isipi mi mapoo dobolone dala egee tomolo, ayo egeiso. Osoloso diayo dala ma kulodu

dobolone pupusiga melee ayo duso. Esiga ayo diba Isipi mi maga gilimadoloso peegoo dilame ka simi. Esiga no epedee Isipi mi mapoo see wedi di,' diso.

<sup>35</sup> Esiga Moses hagee daga Isalael odoo oso gowoolone egeese takaso, 'No ibada wiligi tabayo, osoloso goo midili odoowo?' diso. Esino Godeeye Moses hedebe yo hesiaso, yayo Isalael odoowo wiligi odoo toboloso badolone, diba dala ma kuloduga gilimadoloso peegoo dilame. Esiga homo deiyepo o du douso nadelega paiya molone, Godeeyo momaiye oso goo hagee takaso.

<sup>36</sup> Osoloso Moseseeye o odoo Isipi mi maga gilimadoloso peegoo dilame, yayo goo toowa mudu opusomo opusomo di Isipi mi mapoo, osoloso Abei Bige mapoo moodoogaso. Esememe yayo o odoo Isalael odoo gilimadoloso Isipi mi maga peegoo diso. Osoloso yayo miwe poogoo mi mapoo o odoo gilimadoloso dugo 40 ma kulodu silone goo mudu opusomo opusomo di moodoogamo sileeso.

<sup>37</sup> Osoloso Moses hedebe hagoso o odoo Isalael odoo dimapoo egeese takaso, 'Godeeye niba ee gooleebugulone, nima kuloduga o odoo yimaga to toloso kokodo takomo sili odoo a egeesi masi hesileiso,' diso.

<sup>38</sup> Esiga Moses hedebe hagoso ibada amawe dio Isalael odoo sabolo, miwe poogoo mi mapoo silone, yayo Sainai mubi dokodoo peleso badoboome, Godeeyo momaiye oso yibolo to kolone yimapoo gie badeli to imapoo tenelame teneeso.

<sup>39</sup> Esino ibada amawe dio oso Moseseeye to mapoo gowoolone, o to mapoo mesile. Esememe diba Isipi mi mapoo wedi dilame goomogaso.

<sup>40</sup> Osoloso Moses Sainai mubi dokodoo osee badoboome, odoo susuga oso Moseseeye emei Elon mapoo egeese takaso, 'Moseseeye iba Isipi mi maga gilimado simiso. Esino Moseseeye di, iba gooleede. Esiga iba ee gilimado dilei godee masi deeso moodee,' diso.

<sup>41</sup> Esemme biame omapoo Isalael odoo oso gamenee godee bulumakau pe be masi dadabayoo moodooso. Osoloso diayo gameenee godee omapoo goomogolone, o hu dokodoo poudalame gala hu wooloogaso.

<sup>42</sup> Esiga Godeeye goo hagee ogoloso dimapoo miligi piasso. Esemme diba kei ma dokodoo bi egee molo, a, osoko, osoloso giwo, omapoo godee masi goomogolone doboome, Godeeye diba hamaga takele. Esiga goo hagee Godeeyo to oso booka mapoo taka Godee maga to toloso kokodo takomo sili odoo heeso booka maga egeesee hoguguso:

'Isalael odoo, niba dui!

Niyo miwe poogoo mi mapoo dugo 40 ma kulodu silesibilone,

amapoo emegei di bi sabolo gala hu sabolo wooloso teneliso?

Haye! Esino niyo gamenee godee mapoo teneliso.

<sup>43</sup> Esiga niba tei moso dugoso tegei ee imadoloso silesibiliso.

Osoloso niyo moso oma kulodu goomoga poudili ee amapoo goomoga koo poudili.

Esino niyo deeso moodoo gamenee godee Moloko sabolo Lapan godeeyo giwo sabolo omapoo goomoga poudiliso.

Esiga niba ayo nibada midee hamaga see mi eli sage Babilon mi hodiokoo hasiso bigileiso,' diso.

<sup>44</sup> Esiga tei moso dugoso tegei hagee Godeeye Moses mapoo eligilone egeesee tege diso. Esemme edebeeyo Godeeyo to ee dodolone, moso hagee tegeiso. Osoloso ibada amawe diayo miwe poogoo mi mapoo moso hagee imado silesibilone, 'Godeeye ibolo badoso,' deliso.

<sup>45</sup> Esemme dugo abo poogoloso hamamee see Yoswaye ibada amawe dio gilimadoloso mi hagee talame silone, tei moso hagee sabolo imado sibadeeso. Esemme Godeeye ibada amawe dio ee pidilone, mibia odoo susuga ee mi hamaga peegoo hasiso buguso. Osoloso diayo mi hamapoo tei moso dugoso tegei ee toloso dobolone, wiligi odoo taba Deibidiyo biame mapoo peledabaso.

<sup>46</sup> Esemme Godeeye Deibidi mapoo goomogaso. Esemme Deibidiye tei moso Godee eyo badalame tei moso dia tege-lame woosaso.

<sup>47</sup> Esino tei moso dia egee yayo tegele. Owolo Solomonoye tegei.

<sup>48</sup> Esino ibada Godee kitulugu toowa edebeeyo deeso tegei moso oma kulodu koo badeli. Esiga Godee maga to toloso kokodo takomo sili odoo oso Godeeyo goo maga egeesee takaso,

<sup>49</sup> 'Godeeye egeesee takooso:

Kei mi mapoo ayo badolone ka gibadoso.

Osoloso mi toowa hagee ayo mo homoso kokusoloso ka tobudoso.

Esiga niyo moso togoga, ayo moso omapoo badalai koo tebili.

Osoloso niyo ayo badeli moso ee tege-lai koo tebili.

<sup>50</sup> Ayo mi toowa sabolo, kei mi sabolo, osoloso bi susuga sabolo moodooso,' diso."

<sup>51</sup> Osoloso Sitibeneeye o to hamameedee see wiligi odoo tebisa mapoo egeesee takaso, "Niba koo mesili odoo. Osoloso nibada sooloo ma kulodu tei too goo mauwe. Esiga niba Godeeyo to mapoo koo duli. Osoloso namawe dio Dio Tei oso eligi goo ee gowoolone poogooso. Esiga niyo see egeeseelone, Dio Tei oso eligi goo ee gowoolone poogooso.

<sup>52</sup> Osoloso namawe diayo Dio Tei oso eligi gowoolone, Godee maga to toloso kokodo takomo silesibili odoo susuga mapoo dala teneeso. Esiga Godee maga to toloso kokodo takomo silesibili odoo aboso egeesee takaso, 'Odoo tekepo Keliso hamamee sibileiso,' diso. Esemme namawe dio oso diba piliguso. Egeesi ma kulodu odoo tekepo Keliso simiso. Esino niyo gowoolone yo tiasoloso wooloomaso.

<sup>53</sup> Osoloso daga hoogoo Godeeyo mo-maiye oso Godeeyo tei magoo nimapoo olo teneme, niyo omapoo mesilega poogooso," diso.

### *Sitiben woolooma goo*

<sup>54</sup> Esemme wiligi odoo tebisa oso Sitibeneeye to duloso, diya komonolone, dibada mei diya kumudooso.



<sup>55</sup> Esemé Sitibeneeye Dio Tei oso kitulugu toloso badolone, kei mi ma dokodoo egeino, Godeeyo gadeebugu kitulugu toowa ma kulodu Yesu Godeeyo dee deede dokolo mapoo tobudume egeiso.

<sup>56</sup> Esemé yayo wiligi odoo tebisa mapoo egeese takaso, “Ege! A kei mi yamagoloso Odo Holo Godeeyo dee deede dokolo mapoo tobudo ogoso,” diso.

<sup>57</sup> Esemé odoo susuga oso Sitibeneeye to ee dulei gowoolone neligidi agadiga sabolo, dibada dulu tobooga doloso sibilesi Sitiben tooso.

<sup>58</sup> Osoloso diayo Sitiben mosobia oma kuloduga peegoo ido dilesi badoboome, yoso enigilame bei mooloogooso. Osoloso Sitibeneeye goo mapoo gamene takeli odoo abo oso dibada kekeisu dugo tigadoloso, odoo giekauwa, Solowo homo beiyomoo tigamagooso.

<sup>59</sup> Odo susuga oso yimapoo yoso enigime, Sitibeneeye Godee mapoo takolone egeese takaso, “Lodee Yesu, mo dio nayo te,” diso.

<sup>60</sup> Diayo yoso enigime, yo mi mapoo ebisi tugusaloso badolone, toso neligidi takolone egeese takaso, “Lodee, dibada goo tokenee hagee hapoloso boobado bigi!” diso. Sitiben to hagee takoloso taso.

## 8

<sup>1-3</sup> Solo omapoo tobudulone Sitiben yoso enigaloso wooloomalame odoo dimapoo goomoga goo takeme, yo woolomaso. Esemé tei telaga odoo abo oso sibilesi Sitibeneeye su midoosoloso diya pupusigaso.

### *Edebeeye tei telaga odoo dimapoo gowe*

Esemé Sitiben woolooma biame omapoo Yelusalem mapoo debeli tei telaga odoo mapoo odoo susuga oso gowoolone, dimapoo dala tenelame bei mooloogooso. Esemé Soloye moso susuga mapoo peleso tei telaga odoo, giso sabolo, sobo sabolo, toloso neliga moso mapoo huyaseliso. Esemé tei telaga odoo susuga oso Yelusalem maga kukulo dulone, mi pepooko abo susuga mapoo Yudiya mi mapoo osoloso Samaliya mi ma kulodu

diyadeeso. Esino hedebe diye di odoo susuga Yelusalem mapoo debeiso.

### *Pilipiye Samaliya mi mapoo Godeeyo to taka*

<sup>4</sup> Esiga tei telaga odoo susuga oso Yelusalem maga kukulo dilesi, mi pepooko opusomo opusomo di mapoo to tekepo takolone, Kelisowo goo takagamo silesibiliso.

<sup>5</sup> Osoloso Pilipiye Samaliya mi toowa ee ma kulodu Sebasete mi mapoo dilesi peledoboloso, Kelisowo goo odoo susuga mapoo takaso.

<sup>6</sup> Esemé Pilipiye to tekepo Kelisowo goo takolone, goo opusomo opusomo di moodoogamo silee diayo ogoloso, odoo susuga oso o to medee duso.

<sup>7</sup> Osoloso odoo susuga mooloogoodoo oma kulodu bo holo odoo ma kulodu paladee, Pilipiye peegoo hasiso buguso. Esemé bo holo oso neligidi googa sabolo peegoo galagadiso. Osoloso odoo su kakawa poogoo sabolo, kido tigidiba sabolo, tekepo moodoogaso.

<sup>8</sup> Esemé Sebasete mi oma kulodu odoo susuga oso goomoga toowa meleeso.

<sup>9-11</sup> Esino Sebasete mi ma kulodu odoo googoo gooleedoo badebeiso, o hu Saimon. Esiga yayo biame susuga o googoo oso goo toowa opusomo opusomo di moodoogamo siloga, Samaliya mi toowa mapoo debeli odoo susuga oso ogoloso howoogadeliso. Egeeseelone yayo goolee, eyo nediliyo yo tekepo doloso, suwa peliso. Osoloso odoo susuga, hu toowa too odoo sabolo osoloso goo mauwe odoo sabolo oso, yayo goo opusomo opusomo di moodoo ogoloso, o to mapoo medee duloso tei tooso. Osoloso diayo egeese takaso, “Odo hagee Godee masi osoloso o hu Kitulugu Toowa,” diso.

<sup>12</sup> Esino Pilipiye to tekepo takolone, Godeeye wiligi doloso badeli eyo goo sabolo, Yesu Kelisowo goo sabolo, taka duloso, to omapoo tei teme, giso sabolo, sobo sabolo, howo ogusigaso.

<sup>13</sup> Osoloso Saimoneeye Pilipiyo to mapoo tei toloso howo oluguloso, Pilipi bolo sileeso. Osoloso yayo yibolo silone,

Pilipiye goo toowa opusomo opusomo di moodoogamo silee ogoloso, diya howoodooso.

<sup>14</sup> Esemé Yelusalem mi mapoo diye di odoo oso Samaliya odoo oso Godeeyo to duloso tei too goo ee duloso, Pita dio Yonee dio Samaliya tei telaga odoo dimapoo diye, diso.

<sup>15-17</sup> Esino Samaliya mi toowa ee ma kulodu Sebasete mi mapoo debeli tei telaga odoo oso Lodee Yesuwo hu maga howo ogusigaloso, debei odoo omapoo Dio Tei oso dimapoo meledebelega debeiso. Esemé Pita dio Yonee dio Sebasete mi mapoo sibilesa, tei telaga odoo mapoo dibada deeso sigolone, Godee mapoo takeme, Dio Tei oso dimapoo meledabaso.

<sup>18</sup> Esemé Saimoneeye goo hagee ogoloso, diye di odoo dimapoo molee ayo tosimi ee tenelame goolone,

<sup>19</sup> egeesee takaso, “A goomogo, mo deeso odoo mapoo sigolone, Godee mapoo takooga, Dio Tei oso dimapoo ka meledoboo dalame. Niyo kitulugu egee tomo silesibo amapoo tenee,” diso.

<sup>20</sup> Esino Pitaye yimapoo egeesee takaso, “No nee molee sabolo Dou mi mapoo dileiso. Bei, Godeeye emegei di bi maga Dio Tei wulayo hagee tenemolo, nayo see moleeso talai diso.

<sup>21</sup> Osoloso no ibolo Godeeyo tou hodobo talai koo tobuo. Bei, Godeeyo howo woola nee goo goolee egee diya tokenee.

<sup>22</sup> Esiga no epedee nayo tokenee goolee omaga mudu opusomo doloso Godee mapoo takee. Egeeseega nayo tokenee egee goolee molo, yayo hapoloso boobado bigilei malaiso,” diso.

<sup>23</sup> Esemé Pitaye Saimon mapoo see egeesee takaso, “Ayo ogoso, nee sooloo ma kulodu emegei heiga toowa molone, goo tokenee mapoo hamamee dodomo siliso,” diso.

<sup>24</sup> Esiga Saimoneeye obulone see Pita dio Yonee dio dimapoo egeesee takaso, “A goomogo, niyo a Godee mapoo takee, bei niyo taka goo oso amapoo peledbelega pagalame,” diso.

<sup>25</sup> Osoloso hamamee Pita dio Yonee dio oso Yesu sabolo silee goo ee odoo susuga mapoo takoloso, see Yelusalem mapoo dulone, Samaliya ma kulodu mibia pepooko abo mapoo to tekepo takomo diso.

### *Itiyopiya odoo Pilipiye howo olugu goo*

<sup>26</sup> Biame heeso Godeeyo momaiye oso Pilipi mapoo egeesee takaso, “No toboloso Yelusalem maga Gasa mi mapoo dili eli omapoo di. Eli egee osoko sibili deede dokolo mapoo miwe poogoo mi mapoo moloso,” diso.

<sup>27-28</sup> Esemé Pilipiye toboloso dulone eli domopoo egeino, Itiyopiya wiligi odoo hee, Itiyopiya mi eyo wiligi taba sobo Kandake\* eyo molee gibadeli odoo egeiso. Yo Yelusalem mapoo Godeeyo hu dokodoo poudalame di oso see wedi sibulone, talaka masi, esino hosee be omapoo bagagoloso, hosee be oso gisibamo dimolome mapoo buloso, Godee maga to toloso kokodo takomo sili odoo Aisayaye hogugu booka hesigamo sibumeleeso.

<sup>29</sup> Esemé Dio Tei oso Pilipi mapoo egeesee takaso, “No dileso odoo koola omapoo tebee,” diso.

<sup>30</sup> Esemé Pilipiye odoo hee yima koola omapoo hoguo sibilesa tobudulone duno, odoo yayo Godee maga to toloso kokodo takomo sili odoo Aisayaye hogugu booka hesigamelee duso. Esemé Pilipiye yimapoo egeesee woosaso, “Nayo egee hesigamolo goo eyo bei no gooleedoo-somo?”

<sup>31</sup> Esino odoo yayo yimapoo nei egeesee takaso, “Haye, oposusu eyo bei a gooleede. Bei, edebeeyo oposusu hagee eyo bei amapoo koo eligili.” Osoloso yayo Pilipi mapoo egeesee takaso, “No talaka masi ma dokodoo peledoboloso ama hodiokooga bilei sibe,” diso. Esemé yo peledoboloso biaso.

<sup>32</sup> Esiga odoo yayo badolone Godeeyo to hogugu hesigamelee hagoso:

“Yo sipi be hu wooloomalame ido dili egeesi masi ido diso.

<sup>8:15-17</sup>: Diye 19:6 \* <sup>8:27-28</sup>: **Kandake** to eyo bei egeesi moloso. Itiyopiya odoo dia toso wiligi taba sobo dolone ka takeli. <sup>8:32</sup>: Isa 53:7-8

Yo sipi be hu masi o too edebeeyo kooga, to mauwe tabameli egeesi masi, edebeeyo yimapoo dala teneme, dimapoo hamaga takele.

<sup>33</sup> Edebeeyo yo manolone yo pepooko dolone, o goo medee hooda midile. Edebeeyo o amawe dio eyo goo opo-sisileime.

Bei, yo amawe dio mauwe.

Osoloso edebeeyo yo wooloomaso, esiga yo mi toowa hamapoo holo soomagele,” diso.

<sup>34</sup> Esem e Itiyopiya odo oso Pilipi mapoo egeese woosaso, “Amapoo takee, Godee maga to toloso kokodo takomo sili odo hagoso agamo goo takoolo? Eyo nediliyo o goo takoolo, o odo heeyo goo takoolo?” diso.

<sup>35</sup> Osoloso Pilipiye, odo yayo Godeeyo to hesigamelee eyo bei yimapoo takolone bei mooloogoolone, to tekepo Yesuwo goo sabolo takaso.

<sup>36</sup> Osoloso obakadio eli domopooga dulone, howo tolobo mapoo peledabaso. Esem e Itiyopiya odo oso Pilipi mapoo egeese takaso, “No ege! Howo tolobo bou hagoso. Nayo a howo olugulei soowayo?” diso.

<sup>37</sup> [Esem e Pilipiye nei egeese takaso, “Nee sooloo ma kulodu tei too mologa, no howo olugulei soowa,” diso. Osoloso Itiyopiya odo oso Pilipi mapoo nei egeese takaso, “Ayo Yesu Keliso ee Godeeyo owolo doloso yimapoo tei toso,” diso.]\*

<sup>38</sup> Esem e Itiyopiya odo oso talaka masi hosee be mapoo bagagoloso ido dili odo mapoo egeese takaso, “Talaka masi omapoo kookodebee,” diso. Esem e obakadio howo tolobo omapoo meilesa, Pilipiye Itiyopiya odo howo oluguso.

<sup>39-40</sup> Osoloso diba howo tolobo maga mubi dokodoo peledoboome, Dio Tei oso Pilipi toloso mi eli sage Asotus mapoo holoogooso. Esem e Itiyopiya odo oso yo see egele poogooso. Esem e yo Godee mapoo tei tooga, yayo dulone goomoga sabolo o mi mapoo diso. Esino Pilipiye Asotus mi mapoo peledoboloso, to tekepo

Yesuwo goo takoloso, see Kasaliya mi mapoo dulone, mi pepooko abo mapoo takomo diso.

## 9

### *Yesuye Solo mapoo peledaba goo*

<sup>1-2</sup> Osoloso biame omapoo Soloye Yelusalem mapoo badolone, tei telaga odo dimapoo komonolone heiga toowa molone, “diba piligileiso,” diso. Egeeseelone yayo Damasko mi mapoo tei telaga odo, giso sabolo, sobo sabolo, diba dee tiso tegisaloso Yelusalem mapoo iyado sibilame tei moso wiligi odo taba agalame diso. Esem e tei moso wiligi odo taba oso peipa mapoo to hogugulone egeese hoguguso, “To hogugu hagee namapoo kitulugu teneeso, nayo Damasko mi mapoo dileso, Yesu mapoo tei telaga odo susuga talame. Esiga no Damasko mi mapoo dileso, Yu odoowo howo gisili moso wiligi odo tebisa dimapoo to hogugu peipa hagee tenee,” diso.

<sup>3</sup> Esem e Soloye odo abo oso kitulugu toloso Damasko mi mapoo debeli tei telaga odo susuga talame diso. Esem e diba Damasko mi koola mapoo peledabalame dimeleeno, kei ma dokodooga gadeebugu oso sibilesa Solo tooso.

<sup>4</sup> Esem e Solo yo mi mapoo homodobuloso molone, to taka duno, to oso yimapoo egeese takaso, “Solo, Solo, bei kasi maga nayo amapoo dala ka tenemalala?” diso.

<sup>5</sup> Esem e Soloye woosaso, “Wiligi odo, no ogumo?” diso.

Esem e to oso Solo mapoo egeese takaso, “A Yesu, nayo tei telaga odo dimapoo dala ege tenemolo amapoo tenemoloso.

<sup>6</sup> Esiga no toboloso Damasko mi toowa ma kulodu di. Egeeseega mi omapoo badeli odo hee oso nayo goo talai namapoo eligileiso,” diso.

<sup>7</sup> Esem e odo abo Solobolo diyadee oso goo hagee ogoloso, ebiga sabolo tebisamolone to takele poogooso. Bei, to taka diba duso, esino odo tei egele poogooso.

**8:36:** Diye 10:47 \* **8:37:** To hagee odo abo oso taka Lukaye hogugu, dee takeliso. Esino odo bei oso taka Lukaye hogugule, dee takeliso. **8:39-40:** Diye 21:8 **9:1-2:** Diye 8:3

8 Solo homodobia maga hogabuloso howo puo egeino, howo bakadio siliwe meleeso. Esemе yibolo diyadee odoo abo oso Damasko mi mapoo dulone, o dee mapoo toloso ido diso.

9 Solo howo bakadio siliwe molone Damasko mi mapoo dileso badolone, biame bakadio hedebe di eyo kulodu nei sabolo howo sabolo nelega badebeiso.

10 Esemе Damasko mi toowa ma kulodu tei too odoo hee badebeiso, o hu Ananayas. Biame omapoo Lodeeye Ananayaseeyo howo opusomo doloso yimapoo egeesee takaso, "Ananayas!"

Esemе Ananayaseeye nei egeesee takaso, "Lodee, nayo egee takoo a duso," diso.

11 Esemе Lodeeye yimapoo egeesee takaso, "No toboloso eli hee, o hu Hooda omaga Yudaseeyo moso ma kulodu peleso, Talesas odoo, o hu Solo, yo agalame woose, bei yo amapoo takolone badoso.

12 Bei, ayo o howo opusomo doloso, Ananayas nayo sibilesos nee deeso yo sigoga, o howo tekepo palame ka eliga," diso.

13 Esemе Ananayaseeye egeesee takaso, "Esino Lodee, odoo susuga oso odoo hagee eyo o goo amapoo oposususo. Osoloso a gooleedooso, yayo Yelusalem mapoo Godeeyo odoo mapoo dala teneli.

14 Esiga tei moso wiligi odoo tebisa oso yimapoo kitulugu teneme, Damasko mi hamapoo dobolone, Yesu namapoo tei telagali odoo susuga iyadoloso see Yelusalem mapoo iyado diyadeeso," diso.

15 Esino Lodeeye Ananayas mapoo egeesee takaso, "Di, bei ayo Solo yo mo tou talame yo hesiaso. Osoloso Yu odoonee susuga sabolo, osoloso dibada wiligi odoo tebisa sabolo, osoloso Yu odoo susuga mapoo mo goo woola yilige bigileiso.

16 Osoloso yayo amapoo tei too maga dala toowa talai goo ee ayo yimapoo eligileiso," diso.

17 Esemе Ananayaseeye dileso Yudaseeyo moso kulodu peleso, Solo mapoo o deeso sigolone egeesee takaso, "Mo odoo, Solo, nayo eli domopooga sibulone,

Lodee Yesu egei yayo a diye diso. Osoloso yayo nee howo tekepo poloso Dio Tei namapoo meledabalaiso," diso.

18 Biame omapoo di bee masi oso Solowo howo maga homodobume, o howo tekepo paso. Esemе Ananayaseeye yo howomoo ido meilesos, howo oluguso.

19 Osoloso Solo nei naloso kitulugu tooso.

Esemе biame abo ma kulodu Soloye tei telaga odoo abo sabolo Damasko mi mapoo debeiso.

### *Soloye Damasko mi mapoo to tekepo Yesuwo goo taka*

20 Biame olo omapoo yayo Yu odoowo howo gisili moso tegei ma kulodu gapeleso, to tekepo Yesuwo goo takolone bei mooloogoolone egeesee takaso, "Yesu Godeeyo owolo oso," diso.

21 Esiga odoo susuga to hagee dulugaloso howoodolone egeesee takaso, "Odoo hagoso daga Yelusalem mapoo badolone, odoo susuga oso Yesu mapoo tei telagaga, yayo dimapoo dala teneloso piligiliso. Esiga tei moso wiligi odoo tebisa oso yo diye deme, tei telaga odoo susuga ee yayo iyadoloso Yelusalem mapoo dilame ka simidoo," diso.

22 Esemе Soloye Godeeyo to takalame, Godeeye yimapoo kitulugu tenee oso diya toowa diso. Esemе yayo Yesu Godeeye hudi magoo Keliso oso doloso dimapoo eligiga, Yu odoo susuga Damasko mi mapoo debeli oso to nei takalai gooleedele pegeliso.

23 Osoloso biame bei poogoloso hamamee, Yu odoo oso Solo wooloomalame to mouso.

24 Osoloso diayo mosobia pee beele eyo osulu miyopoo tebisamolone, Solo toloso wooloomalame biame susuga sabolo gesi susuga sabolo gidebeiso. Esino edebeeyo yimapoo sibilesos goo hagee takeme, yo duso.

25 Esemе Solo o odoo abo oso yo pidilame yo pulo dilame, gesi hee mapoo yo wogai toowa ma kulodu husoloso beele dokodooga peegoo toosooso.



<sup>26</sup> Esem Solo Yelusalem mapoo pulo sibilesi, tei telaga odoo omapoo debe sabolo hedebe dalame seme, diayo yibolo ebiaso. Bei, Soloye Lodee mapoo tei too goo ee duloso, medee tei tele.

<sup>27</sup> Esino Banabaseeye yo pidilone diye di odoo mapoo Solo ido dileso egeese takaso, "Solo Damasko eli domopooga dimolome omapoo Lodeeye peledoboloso yimapoo to keiso. Esem Soloye yimapoo tei toloso Damasko mi mapoo kitulugu sabolo Godeeyo to Yesu Kelisowo goo takalai ebile," diso.

<sup>28</sup> Esem Soloye tei telaga odoo sabolo Yelusalem mapoo badolone, odoobolo ebilega, Lodee Yesuwo goo diya kitulugu sabolo mi ee ma kulodu takomo sileeso.

<sup>29</sup> Egeeseelone, Guliki dia to keli Yu odoo sabolo Yesuwo goo maga Soloye dimapoo toso agadigeliso. Eseega diayo yo wooloomalame gweliso.

<sup>30</sup> Osoloso tei telaga odoo oso goo hagee duloso, Solo ido dileso Kasaliya mi mapoo peledabaso. Osoloso see abaga o midee Talesas mapoo diye diso.

<sup>31</sup> Esem Yudiya, Gelili, osoloso Samaliya mi bakadio hedebe di hageeyo kulodu mi susuga mapoo tei tele poogoo odoo oso tei telaga odoo mapoo dala teneli goo oso mauwe poogoome, dibada tei too toowa diso. Egeeseelone diba Lodee Yesu mapoo mesilone Dio Tei oso pidi goo sabolo badolone tei too odoo bei moodooso.

### *Pitaye Ainiyas tekepo moodoo goo*

<sup>32</sup> Pitaye Yu odoowo mi susuga mapoo silone, Godeeyo odoo mapoo Godeeyo to oso pidimo siliso. Egeeseemo silone, Godeeyo odoo abo Lida mi mapoo debeli odoo mapoo dileso peledabaso.

<sup>33</sup> Osoloso mi omapoo egeino, odoo su kakawa poogoo, o hu Ainiyas, o kida mapoo teleme egeiso. Yo su kakawoloso dugo 8 ma kulodu biame susuga tiameliso.

<sup>34</sup> Esino Pitaye yo ogoloso yimapoo egeese takaso, "Ainiyas, Yesu Kelisoye no epedee tekepo poso. Esiga no toboloso nee kida booloogee," diso. Esem biame omapoo Ainiyas tekepo poloso tabaso.

<sup>35</sup> Osoloso Lida mi mapoo debeli odoo sabolo Salon mi kubo mapoo debeli odoo sabolo oso odoo su kakawa poogoo tekepo poloso silee ogoloso, diayo Lodee Yesu mapoo tei telagaso.

### *Pitaye Tabita tekepo moodoo*

<sup>36</sup> Esino Yopa mi mapoo tei too sobo badebeiso, o hu Tabita (o hu hee Guliki toso hedi Dokas). Yayo odoo abo pidimo silone, emegei bi mauwe odoo sabolo diya pidimo siliso.

<sup>37</sup> Esino Pita Lida mi mapoo osee bado-boome, Tabita paiye toloso taso. Esem o odoo oso o su howo sawudoloso moso egi doko tegei ma kulodu debi pooba goopoo-goo mapoo magooso.

<sup>38</sup> Esino Lida mi egee Yopa mi maga haga hoogoonee. Esem tei telaga odoo Yopa mi mapoo debeli odoo oso Pita Lida mi mapoo badoso doloso odoo bakadio oso Pita takalame diye diso. Esem diayo Pita sibilame egeese takaso, "Pita, no ibada mi mapoo saga sibe!" diso.

<sup>39</sup> Esem Pita dibolo diso. Osoloso yo Yopa mi mapoo peledoboome, diayo Pita yo soboso tamelee debi dokodoo pooba mapoo ido palaso. Moso oma kulodu sobo bau susuga pupusiga melee oso, Pita ogoloso yimapoo Tabitaye telega silone dugo dusa eligiso.

<sup>40</sup> Esino Pitaye sobo bau sabolo, osoloso odoo abo sabolo peegoo di doloso, ebiso miyomoo tugusaloso badolone Godee mapoo takaso. Yayo takoloso, sobo ta mapoo bidibuguloso yimapoo bolone egeese takaso, "Tabita, no tebee," diso. Esem Tabita howo puo ogoloso, Pita ogoloso hogabiaso.

<sup>41</sup> Esem Pitaye yo pidilone, o dee mapoo toloso tebidiso. Osoloso tei telaga odoo sobo bau sabolo, osoloso odoo abo sabolo gilimadoloso, Tabita tekepo poloso badebei dimapoo eligiso.

<sup>42</sup> Esem Yopa mi mapoo debeli odoo oso goo hagee duloso, Lodee mapoo tei telagaso.

<sup>43</sup> Esem Pitaye Yopa mi mapoo biame susuga badolone, gala kolo sabolo tou teli odoo Saimonobolo o mosopoo badebeiso.

## 10

### *Godeeye Yu odoonee Konelias mapoo to taka goo*

<sup>1</sup> Kasaliya mi mapoo Loum ha teli odo mooloogoodoo meleeso. Mooloogoodoo hagee Itali mi toowa eyo mooloogoodoo oso. Esino Konelias mooloogoodoo egee gibadeliso.

<sup>2</sup> Odo Konelias hagee Godeeye goomoga goo tomo silame goomegeliso. Osoloso Konelias yibolo osoloso o moso kulodu debeli odo susuga oso Godee mapoo mesiliso. Osoloso yayo bi mauwe odo mapoo biso pidilone, biame susuga ma kulodu Godee mapoo takolone badebeiso.

<sup>3</sup> Osoloso biame hee habe mapoo Godeeye Konelias ee howo opusomo doloso, yayo Godeeye momaiye tei egeiso. Osoloso momaiye oso sibilesi yimapoo egeese takaso, “Konelias!”

<sup>4</sup> Esem e Konelias ee Godeeye momaiye mapoo ebia sabolo bolone egeese takaso, “Wiligi odo, nayo ogo goomogolo?” diso.

Esem Godeeye momaiye oso yimapoo egeese takaso, “Nayo Godee mapoo takemelee goo ee yayo duso. Osoloso nayo bi mauwe odo pidimelee Godeeye ogoloso goomogoso.

<sup>5</sup> Esiga nayo epedee odo abo Yopa mi mapoo diye, dee takee, diayo Saimon-Pita namapoo ido sibilame.

<sup>6</sup> Yo gala kolo sabolo tou teli odo Saimonobolo o mosopoo badoso. O moso ee abei toowa palaga mapoo tegei moloso,” diso.

<sup>7</sup> Osoloso Godeeye momaiye oso yibolo to kemeleso dime, o tou teli odo bakadio sabolo, osoloso ha teli odo hee Godee mapoo tei teli odo sabolo gilimadooso. Ha teli odo hagee Konelias pidili.

<sup>8</sup> Osoloso Konelias ee Godeeye momaiye oso yimapoo taka goo ee dimapoo takoloso see diba Yopa mi mapoo diyadee diso.

### *Pitaye howo opusomo di goo*

<sup>9</sup> Esem diba Yopa mi mapoo dulone eli domopoo tiesaso. Osoloso mi

hadobume dulone, osoko oo domo toboome, Yopa mi koola mapoo peledabalame dimeleeso. Osoloso biame omapoo Pitaye Godee mapoo takalame moso omu ma dokodoo palaso.

<sup>10</sup> Esem yayo Godee mapoo takolone badoboome, hodiaso. Esem odo abo oso o nei simolome, Godeeye o howo opusomo diso.

<sup>11</sup> Esem yayo egeino, kei mi yamagoloso molome egeiso. Esem kei ma dokodoo dugo masi eyo pee mapoo tiso bagagisaloso o mudugiyopaga mi mapoo kukoosoo molome egeiso.

<sup>12</sup> Dugo ee ma kulodu gala opusomo opusomo di susuga, homo bakadio bakadio di oso dili sabolo, osoloso beliyeso kolo dili sabolo, osoloso só egeiso.

<sup>13</sup> Esem kei ma dokodoo toso yimapoo egeese takaso, “Pita, no gala susuga hagee ma kulodu nayo abo wooloso ne,” diso.

<sup>14</sup> Esino Pitaye nei egeese takaso, “Haye, Lodee, a gala egeesi koo nali. Bei, nayo gala egeesi na ne doloso daga hoogoo tei magooso. Esiga ayo gala abo wooloso nalaime,” diso.

<sup>15</sup> Esem toso see nei egeese takaso, “Godee, ayo bi susuga tekepo di, bi egeese nayo tokenee dee na takee,” diso.

<sup>16</sup> Godeeye Pita mapoo gala susuga nalai tekepo doloso taka goo ee bakadio hedebe di takoloso dugo masi ee see kei ma dokodoo topeleso osugoboooso.

<sup>17</sup> Esem Pitaye o howo opusomo doloso egei goo eyo bei ee goolone badoboome, Konelias ee diye di odo oso sibilesi, Saimonowo moso beele osulu miyopoo tobudulone bameleeso.

<sup>18</sup> Osoloso diayo egeese takaso, “Odo hee Saimon-Pita yo moso kulodu badolo?” diso.

<sup>19</sup> Esino Pita yayo egei goo ee eyo bei goolone osee badoboome, Dio Tei oso yimapoo egeese takaso, “Pita, odo bakadio hedebe di oso no esigamoloso.

<sup>20</sup> Esiga no toboloso miyomoo meilesi dibolo di, bei ayo diba no hamapoo esiamo sibe,” diso.

<sup>21</sup> Esemе Pitaye miyomoo meilesо dimapoo egeesee takaso, “Niyo одoo egee esigamo silesibo одoo ee aso. Esiga niba hamapoo ogoo talame ka sibadeeyo?” diso.

<sup>22</sup> Esemе diayo Pita mapoo nei egeesee takaso, “Ibada wiligi одoo taba Konelias Loum ha teli одoo gibadeli одoo oso iba diye diso. Konelias yo Godeeye goomoga goo tomo silame goomegeliso, osoloso yo Godee mapoo mesiliso. Osoloso Yu одoo susuga oso yo tekepo deliso. Esiga Godeeyo momaiye oso sibilesо Konelias mapoo takolone, Pita nayo Konelias mapoo Godeeyo to takee, diso. Esiga iyo no Konelias mapoo ido dilame ka simi,” diso.

<sup>23</sup> Osoloso diayo goo hagee taka koodobuloso, Pitaye diba o mosopoo gesi hedebe omapoo tilame ido palaso.

Osoloso diba omapoo tiesaloso, mi biamome Koneliasеeye diye di одoo sabolo, tei telaga одoo abo Yopa mi mapoo debeli одoo sabolo Pita idoloso Yopa mi maga Kasaliya mi mapoo diyadeeso.

*Pitaye Koneliasеeyo moso kulodu Yu одoonee dimapoo Godeeyo to taka*

<sup>24</sup> Diayo dilesо eli domopoo tiesaloso biame hee oso Kasaliya mi mapoo dilesо peledabaso. Konelias yo biame omapoo bolone, o soosoo susuga sabolo, o одoo susuga sabolo, gilimadoloso balaga meleeso.

<sup>25</sup> Esemе Pitaye Koneliasеeyo moso kulodu gasibume, Koneliasеeye Pitayo homo beiyomoo ebiso miyomoo tugusaloso yimapoo goomogalame balaboo tiaso.

<sup>26</sup> Esino Pitaye Koneliasеeyo dee mapoo tolosо yo tobudulone egeesee takaso, “No tebee, nayo a toowa doloso amapoo na gauwe. Bei, a mosoowe одoo,” diso.

<sup>27</sup> Osoloso Pita dio Konelias dio to komo moso kulodu gadulone egeino, одoo bei mooloogoodoo egeiso.

<sup>28</sup> Esemе Pitaye Yu одoonee oso mooloogoodoloso debei ogoloso dimapoo egeesee takaso, “Niba Yu одoowo tei gooleedooso. Esiga Yu одoo oso Yu одoonee sabolo

hedebe doloso goo tomo silei tei. Osoloso Yu одoo oso Yu одoonee dibada moso kulodu palai tei deliso. Esino Godeeye mo howo opusomo doloso amapoo egeesee eligiso, ‘Yu одoo ibolo osoloso Yu одoonee nibolo Godeeyo howo woola hedebe.’ Esiga ayo Yu одoonee maga Godeeyo howo woola одoo hee tokenee dee takalai koo tobuo.

<sup>29</sup> Esiga niyo a ime, ayo nimapoo sibilei gowelee. Esiga niyo a hamapoo sibe dee taka goo eyo bei amapoo takee,” diso.

<sup>30</sup> Esemе Koneliasеeye yimapoo nei egeesee takaso, “A biame bakadio hedebe di poogoloso biame hee habe mapoo moso kulodu Godee mapoo takolone badebeiso. Esemе haga booloogelega, одoo hee dugo heliye hohodi kaloso mo mudugiyopoo sibilesо tobudume egeiso.

<sup>31</sup> Esemе yayo amapoo egeesee takaso, ‘Konelias nayo Godee mapoo takemelee goo ee yayo duso. Osoloso nayo bi mauwe одoo pidimelee Godeeye ogoloso goomogoso.

<sup>32</sup> Esiga nayo epedee одoo abo Yopa mi mapoo diye, dee takee, diayo Saimon-Pita namapoo ido sibilame. Yo gala kolo sabolo tou teli одoo Saimonowo mosopoo badoso. O moso ee abei toowa palaga mapoo tegei moloso,’ diso.

<sup>33</sup> Esemе biame omapoo ayo одoo abo oso no hamapoo ido sibilame diye diso. Osoloso nayo hamapoo simi ogoloso a goomogo. Esiga iba hamapoo Godeeyo mudugiyopoo sibilesо mooloogoodoo hagee, to susuga Godeeye namapoo tenee goo ee imapoo takee dee taka, goo ee dulame ka sibadee,” diso.

<sup>34</sup> Esemе Pitaye to taka bei mooloogoolone egeesee takaso, “A epedee gooleedoso, Godeeye egei maga одoo susuga ma kulodu одoo heeso, одoo hee dagadi molo koo ogoso.

<sup>35</sup> Osoloso mi toowa hamapoo mi opusomo opusomo di ma kulodu edebeeyo Godeeye goomoga goo tomo silone, Godee mapoo mesimo silesibili одoo mapoo Godeeye goomegeliso.

<sup>36</sup> Esiga niba Godeeye Isalael одoo dimapoo to tekepo tenee goo ee niba duso.

To tekepo ee hagoso, Yesu Kelisoye odoo susuga ma kulodu wiligi odoo toowa taba doloso badoso. Esiga Yesu Keliso maga Godeebolo hedebe doloso mesiloso badeli goo ee imapoo teneeso.

<sup>37</sup> Osoloso Yonee odoo howo oluguli oso to takolone, odoo susuga dibada goo tokenee maga miligi pialoso howo ogusige, dee takoloso koodobume, Gelili maga bei mooloogooloso Yudiya mi toowa mapoo peledaba goo ee, niba olo gooleedooso.

<sup>38</sup> Osoloso Godeeye Yesu Nasalet odoo hesialoso yimapoo Dio Tei sabolo osoloso kitulugu sabolo tenee, niba gooleedooso. Bei, Godeeye biame susuga yo pidilone yibolo badolone, yayo Yu odoowo mi susuga mapoo silone, tekepo goo susuga moodoogamo sileeso. Osoloso Saiten oso gibadeli odoo susuga ee tekepo moodoogamo sileeso.

<sup>39</sup> Esiga diye di odoo, iba Yesuye Yelusalem mapoo osoloso Yu odoowo mi abo mapoo goo susuga hagee tomo silee, iyo egeiso. Osoloso Yelusalem mapoo debeli odoo oso Yesu homo bulubo magoo ma dokodoo yoguso enigaloso woolooma, iyo egeiso.

<sup>40-41</sup> Esino biame bakadio poogoloso see biame hee mapoo Godeeye Yesu ta maga hogadiso. Osoloso Yesu yo ta maga hogabuloso silone odoo susuga mapoo peledoboo dele. Esino hedebe Godeeye daga hoogoo iba hesialoso diye di odoo imapoo Yesuye ta maga hogabuloso peledoboo demeleeso. Esemе yayo hogabuloso silee ogoloso, iyo yibolo silesibulone, wo sabolo howo sabolo nolone silesibiso.

<sup>42</sup> Esiga Yesuye imapoo to kitulugu sabolo egeesee takaso, ‘Niyo odoo susuga mapoo Godeeyo to tekepo takomo silesibe diso. Osoloso Godeeye Yesu ayo odoo susuga wedia sabolo, osoloso mi toowa hamapoo hagee do sabolo, goo midileiso,’ diso.

<sup>43</sup> Osoloso daga hoogoo Godee maga to toloso kokodo takomo silesibili odoo susuga oso goo hamapoo tei takoo diso. Edebeeyo Yesu mapoo tei toga, Gode-

eye Yesu maga o goo tokenee hapoloso boobado bigileiso,” diso.

### *Dio Tei oso Yu odoonee dimapoo daga meledaba goo*

<sup>44</sup> Pita to osee takomolome, Dio Tei oso meileso Pitaye to takomolome dulgamelee odoo mapoo meledabaso.

<sup>45-46</sup> Esemе Dio Tei oso kitulugu maga diayo to opusomo opusomo di ee keselone Godeeyo hu dokodoo poudooso. Esemе Yu odoo tei telaga Pitabolo sibadee oso goo hagee ogoloso diya howoogadooso. Bei, Godeeye Dio Tei Yu odoonee sabolo dimapoo teneeso.

Esemе Pitaye dimapoo egeesee takaso,

<sup>47</sup> “Bei, Godeeye Dio Tei imapoo tenee egee egeesi masi dimapoo ka teneeso. Esiga diayo howo olugulei edebeeyo hamaga takalaime,” diso.

<sup>48</sup> Esemе Pitaye see egeesee takaso, “Niyo Yesu Keliso mapoo tei too goo ee eligilame, niba howo ogusige,” diso. Osoloso diba howo ogusigaloso, diayo Pita biame abo mapoo dibolo hodobo badoboso dilame goomogaso. Esemе Pitaye Yopa mapoo tei telaga odoo sabolo omapoo debeiso.

## 11

### *Pitaye Yu odoonee dia goo ee Yelusalem mapoo taka*

<sup>1</sup> Diye di odoo sabolo, tei telaga odoo Yudiya mapoo debeli sabolo, oso Yu odoonee oso Godeeyo to duloso tei too goo ee duso.

<sup>2</sup> Esiga Pitaye Yu odoonee sabolo badoboso, see Yelusalem mi mapoo wedi sibume, Yu odoo tei telaga odoo oso toso kitulugu sabolo yimapoo diya takolone egeesee takaso,

<sup>3</sup> “Bei kasi maga no Yu odoonee dia mosopoo dilesi dibolo badolone wo ka nameleeyo? Goo egee tekeponee,” diso.

<sup>4</sup> Esemе Pitaye goo susuga eyo bei medee dimapoo takolone bei mooloogolone egeesee takaso,



5-6 “A Yopa mi mapoo badolone Godee mapoo takolone badoboome, Godeeye mo howo opusomo diso. Goo egeesi ma kulodu egeino, dugo masi eyo pee mapoo tiso bagagisaloso kei ma dokodooga holomo sibumolome egeiso. Bi oso holomo sibumolome, ayo koola mapoo tobudulone egeino, dugo masi eyo kulodu gala opusomo opusomo di susuga, homo bakadio bakadio di oso dili sabolo, osoloso beliyeso kolo dili sabolo, gala seebee sabolo, osoloso só egeiso.

7 Esemé biame omapoo kei ma dokodooga toso amapoo egeese takaso, ‘Pita nayo gala susuga hagee ma kulodu abo wooloso ne,’ diso.

8 Esemé ayo yimapoo nei egeese takaso, ‘Haye, Lodee, a gala egeesi koo nali. Bei, nayo gala egeesi na ne doloso daga hoogoo tei magooso. Esiga ayo gala abo wooloso nalaime,’ diso.

9 Esemé toso see nei egeese takaso, ‘Godee, ayo bi susuga tekepo di, bi egee see nayo tokenee dee na takee,’ diso.

10 Goo hagoso peledaba bakadio hedebe doloso see kei ma dokodooga peleso osugob-oodooso.

11 Esemé haga booloogelega odo baka-adio hedebe di oso Kasaliya mi maga a agalame diye di odo oso ayo tieli moso mapoo sibilesos peledabaso.

12 Egeesi ma kulodu Dio Tei oso a Kasaliya mi mapoo dibolo dilei na ebi, dee takaso. Esemé tei telaga odo 6 hamapoo buluma hagee molo oso abolo diso. Osoloso iba dileso Koneliyaseeyo moso kulodu hodobo paladeeso.

13 Esemé Koneliyaseeye Godeeyo mo-maiye oso moso kulodu peledoboome egei goo ee imapoo oposususo. Godeeyo mo-maiye oso yimapoo egeese takabu, ‘Nayo odo abo Yopa mi mapoo diyadee dee takee. Diayo dileso Yopa mi mapoo Saimon-Pita, a Koneliyas namapoo ido sibenabu.

14 Pita, ayo namapoo sibilesos nobolo, osoloso nee moso kulodu debeli odo mapoo Godee maga gie badeli teli goo ee takalaiso,’ dee takeme duso.

15 Esemé ayo dimapoo dileso to tekepo takalame bei mooloogoome, Dio Tei daga Pentikos biame mapoo imapoo meledaba egeesi masi oso dimapoo meledabaso.

16 Esemé ayo Lodeeye to taka hagee gooleebuguso, yayo egeese takaso, ‘Yone-eye niba howodeeso oluguso, esino niba hamamee Godeeyo Dio Tei oso sibilesos nimapoo kitulugu tenelaiso,’ diso.

17 Esemé iyo daga Yesu Keliso mapoo tei teme, Godeeye Dio Tei imapoo teneeso. Egeesi masi diayo Yesu Keliso mapoo tei teme, Godeeye dimapoo Dio Tei ka tenee. Esiga ayo Godeeyo goo ee hamaga takalaime,” diso.

18 Esino Yu odo tei telaga oso Pitaye to taka duloso diayo kamanamelee omapoo poogooso. Esemé diayo Godeeyo hu dokodooga poudoolone egeese takaso, “Godeeye Yu odoonee mapoo osulu yamagooso, diayo dibada goo tokenee maga miligi pialoso Godee mapoo bidiga toboloso gie badeli talame,” diso.

*Yu odoonee Antiyoka mi mapoo debeli odo oso Lodee Yesu mapoo tei too goo*

19 Sitiben woolooma biame omapoo tei tele poogo odo oso tei telaga odo mapoo dala teneli goo oso toowa moodoome, tei telaga odo susuga Yelusalem mi maga mi opusomo opusomo di mapoo kukulo diyadeeso. Diayo kukulo dulone odo abo oso mi eli sage Ponesiya mi toowa mapoo kukulo diyadeeso. Osoloso odo abo Saiples mi te mapoo kukulo diyadeeso. Osoloso odo abo Antiyoka mi mapoo kukulo diyadeeso. Osoloso diba mi omapoo kukulo dileso dobolone, to tekepo Yesu Kelisowo goo hedebe Yu odo dimapoo takomo silesibiso.

20 Esino Yelusalem maga kukulo diyadee odo ee ma kulodu Kulene odo abo sabolo, Saiples odo abo sabolo, Antiyoka mi mapoo sibilesos, Yu odoonee dimapoo Lodee Yesuwo goo takomo silesibiso.

21 Godeeyo kitulugu dimapoo molone, Yu odoonee oso dibada to mapoo tei toloso, dibada goo tokenee maga miligi pialoso Lodee Yesu mapoo bidiga dabaso.

<sup>22</sup> Esemе tei telaga odoо Yelusalem mapoo debeli odoо oso Yu odoonee oso tei too goo ee duloso, Antiyoka mi mapoo Banabas diye diso.

<sup>23-24</sup> Esiga Banabas odoо tekepo doloso badebeiso, yo tei too kibiya Dio Tei oso kitulugu toloso badebeiso. Osoloso yo Antiyoka mi mapoo dilesо badoboome, odoо susuga Godeeye pidi ogoloso, yo diya goomogaso. Esemе diba Lodee Yesu mapoo hedebe doloso dobolone, tei too kibiloso badalame, yayo dimapoo kokodo takaso. Esemе Banabaseeye to takomo silee diayo duloso to omapoo tei teme, tei too odoо bei moodooso.

<sup>25</sup> Esemе Banabas Talesas mi mapoo Solo esiamo diso.

<sup>26</sup> Yayo Solo ogoloso see Antiyoka mi mapoo ido simiso. Osoloso dugo hedebe ma kulodu obakadio tei telaga odoо sabolo badolone, Godeeyo goo eligimeleeso. Esiga Antiyoka mi mapoo odoо susuga oso daga malalo takolone tei telaga odoо ee Kelisowo odoо deliso.

<sup>27</sup> Esemе Banabas dio Solo dio Antiyoka mi omapoo osee doboome, Godee maga to toloso kokodo takomo silesibili odoо abo oso Yelusalem mi maga mi hamapoo sibadeeso.

<sup>28</sup> Esiga dima kulodu odoо hee, o hu Agabus, yayo dibolo sileeso. Esiga yayo Dio Tei oso kitulugu maga egeesee takaso, “Mi susuga mapoo dala goo oso siboga, nei nali bi mauwe pagalaiso,” diso. (Esiga daga hoogoo goo hagoso Sisa-Kolodiyaseeye Loum mi toowa wiligi doloso badebei biame omapoo hodia goo toowa hageesi oso peledabaso.)

<sup>29</sup> Esemе Antiyoka mi mapoo debeli tei telaga odoо oso emegei Yudiya mi toowa mapoo debeli odoо ee pidilame molee mooloogooso. Egeesi ma kulodu bi bei odoо oso molee toowaso pidiso. Osoloso bi pepooko melee odoо oso molee pepookoso pidiso.

<sup>30</sup> Osoloso diayo molee ee toloso Banabas dio Solo dio dimapoo teneeso. Esemе diayo Yelusalem mi mapoo tei telaga wiligi odoо tebisa mapoo todiso.

## 12

### *Helodeeye tei telaga odoо dimapoo dala tenee goo*

<sup>1</sup> Biame omapoo Yu odoowo wiligi odoо taba Helodee-Agilipaye tei telaga odoо abo toloso dimapoo dala tenelone badebeiso.

<sup>2</sup> Egeeseelone yayo diye di odoо hee Yoneeyo emei Yemes toloso odoо mapoo tenelone, kaiya sage oso wooloome diso. Esemе diayo Yemes wooloomaso.

<sup>3</sup> Esemе Yu odoо oso goo hagee ogoloso goomogolone tekepo dee takeme, Helodeeye odoо mapoo Pita onosee wooloomalame te doloso takeme, diayo Pita tooso. Goo moodoo hagee Isipi mi maga peegoo di ee gooleebugu wo nali biame mapoo ka moodoo.

<sup>4</sup> Helodeeye goomogaso, Godeeye gababia wo nali biame ee daga dilesо, odoо howo woola mapoo goo midiloso ka wooloomalame, Pita yo epedee neliga moso mapoo toosooso. Osoloso o ha teli odoо 16 gilimadoloso diayo Pita medee gibadebee, diso.

<sup>5</sup> Esino Pita yo neliga moso ma kulodu badoboome, tei telaga odoо oso yo Godee mapoo takolone debeiso.

<sup>6</sup> Helodeeye Pita neliga moso tegei ma kuloduga peegoo tamagoloso, odoо susuga eyo howo woola goo midilei biame godigi molome gesi omapoo, ha teli odoо bakadio oso Pita gitilone, Pitayo dee hodio sabolo, ha teli odoо eyo dee hodio sabolo, ki ti oso tialogoo, osoloso ha teli odoо hee eyo dee sabolo, Pitayo dee sabolo, ki ti oso tialogoo doloso tiesaso. Osoloso ha teli odoо abo oso osulu miyopoo gidebeiso.

<sup>7</sup> Esemе epedee omapoo Godeeyo momaiye oso Pita mapoo sibilesо peledabaso. Esemе gadeebugu oso neliga moso eyo kulodu gadee magoo meleeso. Osoloso Godeeyo momaiye oso Pita tidilone egeesee takaso, “Pita, no saga tebee,” diso. Esemе ki ti oso o dee sabolo ha teli odoо dibada dee sabolo tiegisamelee eyo mosoowe pidiga poogooso.

<sup>8</sup> Esemе Godeeyo momaiye oso Pita mapoo egeesee takaso, “No toboloso nee dugo kolaiyoga gidili ee boolooma doloso

nee homo mapoo kali bi ke,” diso. Esem Pitaye bi egee kalagaso. Osoloso momaiye oso Pita mapoo see egeese takaso, “Nee dugo sage kaloso abolo sibe,” diso.

<sup>9</sup> Esem Pitaye Godeeyo momaiye sabolo neliga moso tegei debi gooboogoo ma kuloduga peegoo dulone, Pitaye goo hagee ogoloso gooleeso, Godeeye o howo opusomo doloso goo hagee ka ogo diso.

<sup>10</sup> Diayo egeeseelone, Godeeyo momaiye sabolo osulu gidebeli odo bakadio oso gidoboome, diba galagadiso. Esino diayo diba egele. Osoloso diba see ki biso moodoo osulu oso kisi hamameedee omapoo dileso tebisa molome, osulu egee eyo mosoowe yamagooso. Esem diba neliga moso ma kuloduga peegoo galagadileso dumolome, Godeeyo momaiye omapoo osugoboodooso.

<sup>11</sup> Esem hamamee Pitaye goo omapoo ogoloso gooleedoloso eyo nediliyo egeese takaso, “O, goo hagee teidoo. Esiga a epedee gooleedoso, Godeeye o momaiye ee amapoo sibe diso, yayo a Helodeeyo dee maga idoloso peegoo peledabalame. Esiga epedee Helodeeye Yu odoowo mudugiyopoo a wooloomalaime,” diso.

<sup>12</sup> Esem yayo egeese goole sabolo Yonee-Makayo owee Meliyo mosopoo dileso palaso. Moso egee ma kulodu odo susuga oso mooloogoodoloso dobolone Godee mapoo takemeleeso.

<sup>13</sup> Esem Pitaye dileso osulu mapoo kalamadime, moso ee ma kulodu tou teli sobo obuo, o hu Loda, yayo osulu mapoo odo agayo kalamadia beleso agalame diso.

<sup>14</sup> Yayo osulu yilame dulone duno, Pitayo to duloso gooleedoloso diya goomogolone, osulu yilega see moso kulodu gasibileso, odo susuga mapoo egeese takaso, “Pita osulu miyopoo tobudo!” diso.

<sup>15</sup> Esino odo susuga oso to ee dulo nei yimapoo egeese takaso, “No boobadolone ka takoo,” diso. Esino yayo goo egee taka koodobilega osee takemeleeso. Esem diayo egeese takaso, “Egee Pitanee, esino egee Godeeyo momaiye Pita yo bali oso malaiso,” diso.

<sup>16</sup> Pita yo peegoo osee tobudulone osulu mapoo osee kalamadimeleeso. Esem odo susuga sibilesa, osulu yimagoloso egeino, Pita ogoloso diya howoogadooso.

<sup>17</sup> Esem Pitaye diba to kesamelee koodobilame deeso wabisaso. Osoloso Godeeye yo neliga moso maga idoloso peegoo di goo ee dimapoo oposususo. Osoloso yayo see egeese takaso, “Tei telaga odoowo wiligi odo taba Yemes sabolo, tei telaga odo abo sabolo mapoo goo hagee takee,” diso. Esem Pitaye to hagee takoloso see mi hee mapoo diso.

<sup>18</sup> Gesikolodee mapoo ha teli odo Pita gidebei oso Pita mauwe molo ogoloso goo diya tiadolone ebigaso.

<sup>19</sup> Esem Helodeeye o odo sabolo Pita diya esiaso. Esino diayo Pita egele poogoome, see wedige dileso, Pita gidebei odo mapoo woosaso. Esem yayo odo abo mapoo takolone Pita gidebei odo ee piligi diso. Goo oso dileso koodobume, Helodeeye Yudiya mi poogoloso see Kasaliya mi mapoo badalame diso.

### *Helodee-Agilipaye ta*

<sup>20</sup> Esino Helodee yayo Kasaliya mi mapoo badolone, Taya mosobia odo sabolo, osoloso Saidon mosobia odo sabolo, mapoo diya komonolone badebeiso. Esem Taya mosobia odo sabolo, Saidon mosobia odo sabolo, mesiloso badalame Helodee sabolo to meilame, Helodee mapoo diso. Bei, diba Helodeeyo mi toowa mapoo nei nali ka teli. Bei, Helodeeye dimapoo kamana sabolo osee badoga, diayo nei talai hamaga takeeyaga, Helodeebolo to meilame sibadeeso. Osoloso diayo sibilesa Helodeeyo moso gibadeli odo, o hu Balastus, sabolo emegei diso. Yo dibolo toboloso dibada goo ee Helodee sabolo to tekepo ka moodoolame.

<sup>21</sup> Esem Helodeeye dibolo to meilame biame magooso. Osoloso biame omapoo Helodeeye dibolo to meilame, yayo wiligi odo taba oso kali dugo tekepo kaloso, wiligi odo taba oso badeli debi mapoo biaso. Osoloso yayo badolone odo susuga mapoo to takaso.

<sup>22</sup> Yayo to taka koodobume, odo susuga oso goomogolone to neligidi takolone, diso dimapoo egeese takaso, “Odo hagee Godeeye to kei masi keliso, yo edebeeyo to kei masi koo keli!” diso.

<sup>23</sup> Esino goo hamaga Helodeeye Godeeyo hu dokodoo poudile. Hedebe o hu ee dokodoo poudooso. Esem Godeeyo momaiye oso yimapoo paiye saga teneeso. Esem seeso o su nadoloso taso.

<sup>24</sup> Esino tei telaga odo oso Godeeyo to mi susuga mapoo takomo dime, odo susuga oso to ee dulo to mapoo tei teme, tei telaga odo bei moodooso.

<sup>25</sup> Esem Banabas dio Solo dio Antiyoka mi mapoo tei telaga odo oso molee mooloogo ee tosibiles, Yelusalem mi mapoo tei telaga wiligi odo tebisa dimapoo teneloso, see Antiyoka mi mapoo wedi dulone diayo Yonee-Maka ido diso.

## 13

### *Banabas dio Solo dio diye di goo*

<sup>1</sup> Antiyoka mi mapoo tei telaga odo oso mooloogoodoloso, debei ma kulodu Godee maga to toloso kokodo takomo silesibili odo sabolo Godeeyo goo ee eligili odo ee dibada hu hagoso: Banabas, osoloso Simiyon (o hu hee Nigele), osoloso Kulene odo Lukiyas, osoloso Manayen (wiligi odo taba Helodee dio hodobo kauwa), osoloso Solo.

<sup>2</sup> Diba nei teyuloso, Godeeyo hu dokodoo poudoolone doboome, Dio Tei oso dimapoo egeese takaso, “Banabas dio Solo dio idoloso tou ayo hesia ee talame diba diye dee takee,” diso.

<sup>3</sup> Esem diayo nei teyuloso dobolone, Godee mapoo takemelee koodobuloso, Banabas dio Solo dio mapoo dibada deeso sigeso. Bei, diayo Godeeye kitulugu toloso o tou talame. Osoloso diba Godeeyo tou talame diye diso.

### *Banabas dio Solo dio Saiples mi te mapoo diye di goo*

<sup>4-5</sup> Banabas dio Solo dio Dio Tei oso diye dee takeme, Selukiya mi omaga du toowa toloso Saiples mi te mapoo dulone, diba

pidili odo Yonee-Maka idoloso diso. Diba sibiles Saiples mi te mapoo mi hee eyo hu Salami mi mapoo du oluguso. Osoloso diayo mi omapoo dobolone, Yu odoowo howo gisili moso mapoo peleso Godeeyo to takoo demeleeeso.

<sup>6-8</sup> Osoloso mi te omapoo osee silesibulone, mi hee Papos mapoo dileso peled-abaso. Diba mi omapoo egeino, Yu odo hee googoo sabolo badoboome egeiso. O hu Bale-Yesu (o hu hee Guliki dia toso hedi Elimas). Yayo mi omapoo gamenee goo eligili odo badebeiso. Mi te eyo wiligi odo taba Selegiyas-Polus eyo odo. Mi te eyo wiligi odo taba yo goo goolee medee tekepo. Esiga yayo Godeeyo to dulame goomogolone, Banabas dio Solo dio ime simiso. Esino googoo gooleedo odo Elimas yayo gowoolone, wiligi odo taba oso Godeeyo to dulo, Yesu mapoo tei talai goomegele. Esem yayo Banabas dio Solo dio Godeeyo to takeeyaga gowoolone hamaga takaso.

<sup>9</sup> Esino biame omapoo Solo, o hu hee Polo, Dio Tei oso kitulugu toloso badolone, googoo gooleedo odo Elimas yimapoo howo hooda tulugu bolone

<sup>10</sup> egeese takaso, “No Saiteneeyo owolo! Nayo goo tekepo susuga mapoo ha teliso. Nayo biame susuga ma kulodu odo susuga mapoo wulo kukuliso. Esiga nayo Godeeyo goo maga tei goodee, ee see opusomo dee na see.

<sup>11</sup> Esiga epedee Godeeye no dala tenelaiso. Epedee no howo bakadio siloso molone, biame abo ma kulodu bi susuga agalaime,” diso. Esem biame omapoo neliga oso o howo mapoo gidiseme, o howo siso. Esem yo odo heeso eli eligilame odo esiamo sileeso.

<sup>12</sup> Esem wiligi odo taba oso Elimas mapoo goo moodoo ee ogoloso, yayo Lodee Yesu mapoo tei tooso. Bei, yayo Polo dio Banabas dio Lodee Yesuwo goo kitulugu sabolo eligi ogoloso howoodooso.

### *Poloye Pisidiya mi Antiyoka mapoo Godeeyo to taka*



<sup>13</sup> Osoloso Polo sabolo, odoo yibolo sibadee sabolo, Papos mi maga du toowa toloso abei toowa daloso see Pampiliya mi toowa mapoo sibilesa peledabaso. Mi toowa ma kulodu mi hu Pelega mapoo dibada du oluguso. Esememe biame omapoo Yonee-Maka diba poogoloso see Yelusalem mapoo wedi diso.

<sup>14</sup> Osoloso Polo dio Banabas dio Pelega mi maga see mili Pisidiya mi Antiyoka mapoo dileso peledabaso. Diba omapoo dileso dobolone, Yu odoowo hasali biame omapoo, diba howo gisilame, Yu odoowo howo gisili moso ma kulodu peleso bulumaso.

<sup>15</sup> Esememe howo gisili moso wiligi odoo tebisa oso Moseseeye eligi goo hogugu sabolo, osoloso Godee maga to toloso kokodo takomo silesibili odoo oso hogugu goo sabolo, odoo susuga mapoo hesigaso. Osoloso see Polo dio Banabas dio mapoo egeesee takaso, “Emegei, niyo imapoo pidi to takalai mologa, takee,” diso.

<sup>16</sup> Osoloso Polo toboloso diayo to kesamelee ee koodobilame o deeso wabisulone egeesee takaso, “Emegei, Isalael odoo sabolo, Yu odoonee Godee mapoo mesili odoo sabolo, niba mo to hagee dui!

<sup>17</sup> Isalael odoo ibada Godeeye ibada amawe dio hesiaso. Osoloso diba Isipi mi mapoo doboome, Godeeye diba medee gibadebeiso. Esememe Isalael odoo oso bei moodooso. Esememe Godeeye kitulugu sabolo Isipi mi maga diba gilimadoloso peegoo diso.

<sup>18</sup> Osoloso diba dugo 40 ma kulodu miwe poogoo mapoo silesibulone, Godee mapoo diayo gowooloso yimaga miligi pialoso silesibiso, esino Godeeye diba pegele.

<sup>19</sup> Esememe Godeeye Keinen mi ma kulodu to opusomo opusomo di kesali 7 mosobia odoo susuga peegoo hasiso buguloso, dibada mi peedee buguloso, see o odoo Isalael odoo imapoo teneeso.

<sup>20-21</sup> Esememe ibada amawe dio oso Isipi mi mapoo dobosoo see mi hagee talame sibadee, dugo 450 poogooso. Osoloso

ibada amawe dio oso omapoo osee do-boome, Godeeye goo midili odoo hesiaso, diba gibadalame. Esino hamamee Godee maga to toloso kokodo takomo sili odoo Semuweleeye badebei biame omapoo Isalael odoo see goomogaso, diba gibadalai wiligi odoo taba talame. Esememe Godeeye Benyamin eyo bala ma kulodu odoo hee Kiseeyo owolo Solo wiligi odoo tabalame hesiaso. Esememe Soloye dugo 40 ma kulodu Isalael odoowo wiligi odoo toboloso badebeiso.

<sup>22</sup> Esememe Godeeye Solo gowoolone peegoo poogooso. Osoloso see Yesiyo owolo Deibidiye dibada wiligi odoo tabalame hesiaso. Esememe Godeeye Deibidiyo goo maga egeesee takaso, ‘Ayo Yesiyo owolo Deibidi mapoo ogoloso goomogoso. Bei, yayo ayo goomoga goo susuga ee talaiso.’

<sup>23</sup> Esiga Godeeye daga hoogoo to takoloso magolone egeesee takaso, ‘Deibidiyo amawe dima kuloduga Isalael odoo dibada gie badeli pidili odoo sibileiso.’ Esiga odoo ee olo simiso. Yo Yesu.

<sup>24</sup> Esino Yesu sibilega molome, daga Yoneeye sibilesa Isalael odoo susuga mapoo Godeeyo to takomo silone egeesee takaso, ‘Niba goo su wuduloso nibada goo tokenee maga miligi pialoso howo ogusige,’ diso.

<sup>25</sup> Osoloso Yoneeye o tou hoo pagalame dulone egeesee takomo sileeso, ‘Niyo a odoo ogu deliyo? Godeeye hesia Keliso asonee. Esino yo ama hamamee sibileiso. Yayo kitulugu toowa ayo kitulugu yayo dagadi. Esiga a tekeponee, o homo bei mapoo gauwuloso o homo bi tigamagalai,’ diso.”

<sup>26</sup> Poloye see egeesee takaso, “Emegei, Eibalaham eyo amawe dio (Yu odoo) nibolo, osoloso Yu odoonee Godee mapoo mesili odoo, niba mo to dui! Gie badeli pidili goo hamaga to ee imapoo teneeso.

<sup>27-28</sup> Esino Yelusalem mi mapoo debeli Yu odoo sabolo, dia wiligi odoo tebisa sabolo oso Yesu yo kibiya hoodo egele. Esiga diayo Yesu yo wooloomalame goomo-

gaso. Osoloso diayo goo mauwe dileso Paillet mapoo Yesu wooloomeye doloso tiasooso. Diayo goo hagee tomo silee ee Godee maga to toloso kokodo takomo silesibili odooso daga hogugu sabolo teibaso. O, esiga goolee, Yu odoowo hasali biame susuga mapoo wiligi odooso tebisa oso, Yu odoowo howo gisili moso kulodu to hogugu ee hesigeliso. Esino diayo goo eyo bei kibiya gooleedele.

<sup>29</sup> Esiga Godee maga to toloso kokodo takomo silesibili odooso oso Yesuwo goo mapoo taka goo susuga oso dileso hosudoloso, diayo Yesu yo homo bulubo magoo dokodooga tomeilesu wulu ma kulodu magooso.

<sup>30</sup> Esino Godeeye yo ta maga see hogadiso.

<sup>31</sup> Osoloso hamamee biame bei ee ma kulodu Yesu yo telega Gelili mi maga Yelusalem mi mapoo yibolo sibadee odooso dimapoo o su eligimo sileeso. Osoloso odooso egee bia oso diayo Yesu ta maga hogabuloso silee ogoloso goo ee, ibada odooso Yu bia odooso mapoo takomo ka siloso.

<sup>32-33</sup> Esiga iyo to tekepo nimapoo tosimiso. Osoloso daga Godeeye ibada amawe dio sabolo to magoo goo oso yayo owolo Yesu ta maga see hogadi eyo goo maga epedee dibada amawe dio imapoo peledabaso. Esiga Sam booka ma kulodu, Sam bakadio mapoo Godeeye Yesuwo goo maga egeesee takooso,

‘No mo holo deeso.

Epei ayo no moma deeso.’

<sup>34</sup> Osoloso Godeeye Yesu ta maga hogadiso. Esiga Godeeyo owolo Yesu see talaime. Goo hamaga Godeeye egeesee takaso,

‘Ayo daga Deibidi mapoo to magoo sabolo tei pidili goo ee nimapoo tenelaiso,’ diso.

<sup>35</sup> Osoloso Godeeye Sam hee mapoo egeesee takaso,

‘Nayo hesia odooso eyo su midoo ma kulodu hunuleime,’ diso.

<sup>36</sup> Esino Godeeyo to hagee Deibidiyo goo takele. Bei, Deibidiye Godeeyo tou susuga tomo siloso hosudoloso taso. Esem o su

ee amawe dio midoosoo pee mapoo midoosoo. Osoloso o su omapoo huneso.

<sup>37</sup> Esino Yesu o su ee midoo ma kulodu molone hunule. Bei, Godeeye yo ta maga hogadiso.

<sup>38-39</sup> Esiga emegei, niba iyo to hagee taka medee dui! Bei, Yesuye ta maga nibada goo tokenee hapoloso boobado bigileiso. Esino Moseseeye eligi goo oso nibada goo tokenee susuga hapalaimo. Esino edebeeyo Yesu mapoo tei toga, yo o goo tokenee susuga hapoloso, Godeeyo howo woola yo tekepo palaiso.

<sup>40</sup> Esiga niba mo to medee kibiya toloso tei too ma kulodu debee. Niyo mo to medee tele poogooga, Godee maga to toloso kokodo takomo silesibili odooso taka goo hagoso nimapoo sibileiso. Bei, diayo Godeeyo booka mapoo hageesee hoguguso,

<sup>41</sup> Godeeye egeesee takooso,

‘Niyo debei domo omapoo ayo goo toowa moodoolaiso.

Esino niyo goo hagee ogoloso tei talaime.

Osoloso odooso heeso goo hageeyo bei nimapoo takooga,  
niyo medee tei talaime.

Esiga mo to mapoo manali odooso niba goo hagee ogoloso howoogadalaiso.

Esino niba wedileiso,’ diso.”

<sup>42</sup> Osoloso Poloye to takoloso koodobume, Polo dio Banabas dio howo gisili moso maga meiyadaga molome, odooso aboso sibileiso dimapoo egeesee takaso, “Niba see hasali biame heeso niyo to taka goo hagee see medee takalame sibadee!” diso.

<sup>43</sup> Gooloogoo oso dileso koodobume, odooso susuga oso dia moso mapoo diyadeeso. Esem Yu odooso abo sabolo, osoloso Yu odoonee oso, Yu odoowo Godee mapoo tei teli odooso abo sabolo, Polo dio Banabas dio diyadaga molome hamamee diyadeeso. Esem Polo dio Banabas dio dimapoo egeesee takaso, “Niba Godeeye sooloo dolone pidili ee ma kulodu debee,” diso.

<sup>44</sup> Osoloso hasali biame heeso mosobia odoo susuga oso Godeeyo to Yesuwo goo maga taka ee dulame sibadeeso.

<sup>45</sup> Esemme Yu bia oso odoo gooloo-goo toowa ogoloso Polo dio Banabas dio mapoo diya kooso. Osoloso Poloye Godeeyo to takomolome, diayo tebisaloso, Polowo to su maga gamenee goo takoo doloso, diayo Polowo goo maga to tokenee takaso.

<sup>46</sup> Esino Polo dio Banabas dio ebilega to nei dimapoo egeese takaso, "Godeeye to kitulugu sabolo imapoo taka, malalo nimapoo Godeeyo to Yesuwo goo ee takalaiso. Esino niyo gie badeli talai gowooso. Esiga iyo niba poogoloso see Yu odoonee mapoo Godeeyo to takomo silesibileiso.

<sup>47</sup> Bei, Godeeye o odoo yimaga to toloso kokodo takomo sili odoo hee maga Isalael odoo imapoo to kitulugu sabolo hageese takaso,

'Ayo niba Yu odoonee dima kulodu gadeebugu masi badalame hesiaso.

Esiga niyo gie badeli goo ee mipoo toowa hamapoo debeli odoo susuga mapoo takomo dilame.'

<sup>48</sup> Esemme Yu odoonee oso Poloye to taka duloso goomogolone, Lodeeyo goo taka ee tekepo diso. Osoloso dima kulodu Godeeye gie badalame hesia odoo susuga oso tei tooso.

<sup>49</sup> Esemme mi omapoo odoo susuga oso Godeeyo to ee dulugamo diso.

<sup>50</sup> Esino Yu odoo oso Polo dio Banabas dio dimapoo heiga toowa molone, diayo dilesos Godee mapoo mesili Yu sobonee hu toowa too sabolo, osoloso mosobia eyo wiligi odoo tebisa sabolo, oso kamanalame Polo dia goo maga dimapoo gamenee takaso. Esemme diayo Polo dimapoo dala teneloso mi omaga peegoo hasiso buguso.

<sup>51</sup> Egeeseeme Polo dio Banabas dio see Ikoniyum mi mapoo dilame dobolone, diayo wudu taka eligilone, Godeeye diba poogolone dimapoo dala tenelaiso dolone, dia homo mapoo basago tidadoo Yu odoowo howo woola mapoo taso.

<sup>52</sup> Esino tei telaga odoo diba Dio Tei oso kitulugu toloso dobolone, diya goomogaso.

## 14

### *Polo dio Banabas dio Ikoniyum mi mapoo debei*

<sup>1</sup> Ikoniyum mi mapoo Polo dio Banabas dio Yu odoowo howo gisili moso mapoo Godeeyo to takalame palaso. Omapoo diayo to kitulugu sabolo Yesuwo goo taka duloso, Yu odoo susuga sabolo, osoloso Guliki odoo susuga oso, Lodee mapoo tei tooso.

<sup>2</sup> Esino Yu odoo abo oso Poloye Yesuwo goo taka talai gowoolone, Yu odoonee dimapoo Polowo goo ee gamenee takomo silesibiso, Yu odoonee oso tei telaga odoo mapoo kamanalame.

<sup>3</sup> Esino ee ma kulodu, Polo dio Banabas dio Ikoniyum mi mapoo biame kolopo sage debeiso. Diba omapoo dobolone ebilega, Godeeye sooloo dolone pidili eyo goo ee odoo mapoo takolone debeiso. Esemme edebeeyo dibada to mapoo tei talame, Lodeeye Polo dio Banabas dio mapoo goo toowa opusomo opusomo di talame kitulugu teneeso.

<sup>4</sup> Egeeseeme mosobia ma kulodu odoo abo oso domo pee toowa meleeso. Odo abo oso diye di odoo Polo dibolo too-boo, osoloso odoo abo oso Yu odoo sabolo too-boo diso.

<sup>5</sup> Osoloso ee ma kulodu Yu odoo sabolo tebisa, Yu odoonee sabolo, osoloso Yu odoo sabolo, osoloso dibada wiligi odoo tebisa sabolo, Polo dimapoo yoso enigaloso wooloomalame to tekepo moodooso.

<sup>6-7</sup> Esemme Polo dio Banabas dio to hagee duloso Likaoniya mi toowa mapoo kukulo diso. Osoloso omapoo kukulo dilesos dobolone, Listala mi sabolo, osoloso Delebe mi sabolo, osoloso mi pepuso abo sabolo omapoo Yesuwo goo maga to tekepo takomo silesibiso.

### *Polo dio Banabas dio see Listala mapoo dilesos debei*

<sup>8</sup> Osoloso Listala mi ee ma kulodu odoo hee oweeye soomagolone homo bidiga

magoo sabolo soomagooso. Esiga yo koo sili.

<sup>9</sup> Esino yo badolone Poloye Godeeyo to takomolome medee dulone badebeiso. Poloye odo homo bidiga magoo mapoo bolone gooleeso, yayo tei toso, Godeeye yo tekepo palame, diso.

<sup>10</sup> Osoloso Poloye yimapoo to neligidi egeese takaso, “No tebee!” diso. Esem yo toboloso sileeso.

<sup>11</sup> Esino odo mooloogoodoo oso Poloye odo tekepo moodoo ogoloso to neligidi takolone Likaoniya toso egeese takemeleeso, “Ibada godeeye odo masi poloso kei ma dokodooga imapoo ka simidoo,” diso.

<sup>12</sup> Egeeseelone diayo Banabas yo dibada gamenee godee toowa Sus hu hediso. Osoloso Polo yo gamenee godee hee Sus o to tosili odo Helemes hu hediso. Bei, Poloye biame susuga to takomo sileeso.

<sup>13</sup> Esino mosobia odo dia godee Sus eyo tei moso ee mosobia beele peegoo eyo tegei meleeso. Esiga Sus godeeyo tei moso wiligi odo taba oso bulumakau be hu sabolo, palapalawa sabolo, toloso sibiles beele osulu mapoo maso. Bei, yibolo osoloso mosobia odo sabolo goomogaso, Polo dio Banabas dio mapoo goomogolone, be hu woolame. Bei, diayo goolee Polo diba godee bele dolone.

<sup>14</sup> Esino Polo dio Banabas dio goo hagee duloso diayo gowe goo ee odo mapoo eligilone dibada dugo tologo buguso. Osoloso odo ma kulodu hoguo silesibulone to neligidi egeese takomo silesibiso,

<sup>15</sup> “Emegei, niyo kasi maga goo hageesi imapoo ka moodala? Bei, iba mi odo, niba egeesi masiso. Esiga iyo nimapoo to tekepo teneeso, niyo gamenee godee ee poogoloso see gie badeli Godee mapoo tei talame. Bei, yayo kei sabolo, osoloso mipoo sabolo, osoloso abei sabolo, osoloso bi susuga ee ma kulodu egee molo sabolo moodoso.

<sup>16</sup> Osoloso Godeeye daga edebeeyo diso goomoga goo tomo silesibume, ogoloso hamaga takele.

<sup>17</sup> Esino niyo ee ma kulodu doboome, Godeeye yayo sooloo dala goo ee eligilone, kei ma dokodooga howo teneliso, osoloso nei nali bi segei oso tekepo palame pidiliso. Osoloso nimapoo nei nali bi toowa teneloso, see nimapoo goomoga teneliso. Esiga Godeeye eyo nediliyo o goo yilige bugulone goo susuga hagee nimapoo teneliso,” diso.

<sup>18</sup> Polo dio Banabas dio to hagee takeme, mosobia odo oso bulumakau be hu wooloso goomoga dimapoo tenelame seme, Polo diayo hamaga takeme, diba hegi moodoso. Esino dimapoo tenele.

<sup>19</sup> Esino Yu bia odo abo Pisidiya mi Antiyoka maga, osoloso Ikoniyum maga sibadeeso. Diayo sibiles mosobia odo oso kamanalame, Polowo goo maga gameene takaso. Esem odo aboso kamanaloso, Polo yo yoso enigaloso, mosobia peegoo gisibado dileso magooso. Esem diayo Polo yo olo woolooma gooleeso.

<sup>20</sup> Esino tei telaga odo oso Poloye tiamelee mapoo dileso mooloogoo doloso doboome, Polo yo hogabuloso tabaso. Esem hodobo mosobia ma kulodu wedi sibadeeso. Osoloso biame hee mapoo Polo dio Banabas dio Delebe mi mapoo diyadeeso.

*Polo dio Banabas dio see Siliya mi Antiyoka mapoo wedi di*

<sup>21-22</sup> Polo dio Banabas dio see Delebe mi mapoo to tekepo takomo silesibume, odo susuga oso tei tooso. Osoloso diba see Delebe mi maga see mi abo Listala sabolo, osoloso Ikoniyum sabolo, osoloso Pisidiya mi Antiyoka mapoo tei telaga odo see tobu Godeeyo to sabolo pidimo silesibilame diso, diayo tei too ma kulodu dobolone kibiya dabalame. Egeeseelone diayo egeese takomo silesibiso, “Tei toloso badalai goo ee diya kodia. Esiga tei telaga odo oso dala ma kuloduga Godeeye wiligi doloso badeli mapoo gasibileiso,” diso.

<sup>23</sup> Osoloso Polo dio Banabas dio oso sosee susuga mapoo wiligi odo tebisalame hesigamo diyadeeso. Osoloso nei teyuloso dobolone, diba Lodeeyo dee



mapoo magalame Godee mapoo takeliso. Bei, diba Lodee mapoo tei tooso.

<sup>24-25</sup> Osoloso diba Pisidiya mi maga see Pampiliya mi Pelega mapoo sibadeeso. Omapoo Godeeyo to takoloso koodobuloso see Ataliya mi mapoo mouso.

<sup>26</sup> Osoloso Ataliya mi maga du toloso see Siliya mi Antiyoka mapoo soowaso. Osoloso mi hamapoo daga tei telaga odoo oso Polo dio Banabas dio diba toloso, mi abo mapoo Godeeyo to takomo diye dolone egeese takaso, “Godeeye niba sooloo dolone pidiye dee,” diso. Esem diayo Godeeyo to olo toloso mi abo mapoo dileso siloso tou hosudoome, see wedi sibilesi dibada mi Antiyoka mapoo peledabaso.

<sup>27</sup> Osoloso Polo dio Banabas dio sibilesi Antiyoka mapoo peledoboloso tei telaga odoo susuga gilimadoloso hodobo gooloo-goodooso. Osoloso diayo Godeeyo to toloso mi susuga mapoo takomo silone, diayo goo tomo sileeme, Godeeye diba pidi goo ee odoo mapoo oposususo. Osoloso Godeeye Yu odoonee oso tei talai osulu yamagoo goo sabolo oposususo.

<sup>28</sup> Osoloso koodobuloso Polo dio Banabas dio tei telaga odoo sabolo mi omapoo biame kolopo sage debeiso.

## 15

### *Yelusalem mapoo Yu odoonee dia goo maga to mou*

<sup>1</sup> Osoloso egeesi ma kulodu, odoo abo oso Yudiya mi maga Antiyoka mi mapoo sibilesi, Yu odoonee tei telaga odoo mapoo eligilone egeese takaso, “Niba Moseseeye imapoo kolo koolai goo eligi, ee dedelega poogooga, niba gie badeli talaime,” diso.

<sup>2</sup> Esem Polo dio Banabas dio eligi hagee duloso gowoolone dibolo toso diya agadigaso. Egeeseeme sosee odoo oso Polo dio Banabas dio, osoloso tei telaga odoo abo sabolo, toloso Yelusalem mapoo diye diso, diayo dileso diye di odoo sabolo, osoloso Yelusalem sosee eyo wiligi odoo tebisa sabolo, goo hamaga to medee meilame.

<sup>3</sup> Diba sosee odoo oso diye deme diyadulone, Ponesiya mi maga osoloso Samaliya mi maga diyadeeso. Omapoo diyadulone, sosee odoo susuga mapoo Yu odoonee oso dibada gamenee godee poogoloso, see Yesu mapoo tei too goo ee oposususo. Esem tei telaga odoo susuga oso goo hagee duloso diya goomogaso.

<sup>4</sup> Esiga diayo sibilesi Yelusalem mapoo peledoboome, soseeeyo wiligi odoo tebisa sabolo, osoloso tei telaga odoo susuga oso diba ogoloso diya goomogaso. Esem Polo dio Banabas dio Godeeye dimaga tou too goo ee oposususo.

<sup>5</sup> Esino tei telaga odoo abo Pelisi odoo gooloo goo ma kuloduga tebisaloso egeese takaso, “Niyo Yu odoonee tei telaga odoo mapoo to kitulugu sabolo takee, ‘Diba odoo heeso dibada kolo kooloso Moseseeye eligi goo ee deede,’ dee takee,” diso.

<sup>6</sup> Egeeseeme diye di odoo sabolo, sosee wiligi odoo tebisa sabolo, to hagee eyo bei medee to meilame hodobo mooloo-goodooso.

<sup>7</sup> Biame sage ma kulodu goo hagee to moumeleso Pitaye toboloso egeese takaso, “Emegei niba goolee! Daga Godeeye nima kuloduga, ayo Yu odoonee mapoo to tekepo takomo dilame, a hesiaso. Esem diayo amaga Godeeyo to duloso tei tooso.

<sup>8</sup> Esem Godee, odoo sooloo ma kulodu egeli oso Yu odoonee oso tei too goo hagee ogoloso, tekepo diso. Bei, yayo goo hagee tei dolone, Dio Tei ee imapoo tenee egeesi masi dimapoo teneeso.

<sup>9</sup> Esiga Godeeyo howo woola mapoo iba Yu odoo sabolo, osoloso Yu odoonee sabolo opusomonee. Esiga diayo tei teme, Godeeye dibada goo tokenee hapoloso boobado buguso.

<sup>10</sup> Niyo Yu odoonee oso Moseseeye eligi goo ee dadalame pupu maga niyo Godeeye kamanalai goomogolo? Niyo egeeseega, niyo dimapoo hegi bi masi kadalame teneeso. Osoloso ibolo ibada amawe dio sabolo hegi bi masi ee kadalai tebilena.

11 Esino iba tei toso, ibada Lodee Yesuye imapoo sooloo dolone pidi maga gie badeli tenee ee. Egeesi maga Yu odoonee sabolo eli hedebe omaga gie badeli ka toso,” diso.

12 Esemee gooloogoo toowa oso Pitayo to duloso to mauwe bulumaso. Osoloso diayo to mauwe bulumume, Polo dio Banabas dio Yu odoonee ma kulodu silone, Godeeye dimaga goo toowa opusomo opusomo di moodoo goo ee dimapoo opususo.

13 Diayo oposusu koodobume, see Yemeseeye toboloso egeese takaso, “Emegei, mo to dui!

14 Saimon-Pitaye imapoo olo takaso, Godeeye daga malalo yayo sooloo dala goo Yu odoonee mapoo eligiso. Esiga Godeeye Yu odoonee dima kuloduga odo abo yayo owolo dalame hesiaso.

15 Esiga goo hagoso Godee maga to toloso kokodo takomo silesibili odo oso taka to sabolo tobuoso. Bei, Godeeyo to booka mapoo Godeeye to taka hogugu egeesee moloso,

16 ‘Goo hagee koodobuoga, a see wedi sibileiso.

Bei, wiligi odo Deibidiye gibadebei mi goo ee moso egeesi masi guodobuloso moloso.

Esino ayo sibileso moodooloso see tobu tegelaiso.

17 Egeeseega odo susuga sabolo, osoloso Yu odoonee ayo hesia sabolo, oso Godee amapoo sibileiso.

18 Esiga odo abo oso goo hagee gooleedalame Godeeye daga hoo-goo takaso.’

19 Esiga Yu odoonee Godee mapoo gie tei too odo oso, Moseseeye eligi goo ee dadalame pupu maga iyo hegi goo dimapoo tenelai, a koo goomogoso.

20 Esino iyo wulo to hogugu ono Yu odoonee dimapoo tenelone egeese takalaiso, ‘Niba gamenee godee mapoo nali bi tenee toloso na ne. Bei, nali bi egee Godeeyo howo woola olo tokenee paso. Osoloso odo hee mapoo goo heli na te. Osoloso sawo na ne, osoloso hwei sawo sabolo mologa na ne,’ diso.

21 Esiga Yu odoonee diba kibiya goo hagee dodolone dabalai tekepo. Bei, daga hoogoo Yu odo oso mi susuga ma kulodu diayo howo gisili moso mapoo goo egeesi na teye dolone woola olo takaso. Bei, diayo Moseseeye tei hogugu ee hasali biame susuga mapoo odo mapoo olo hesigaloso eligiliso,” diso.

*Yu odoonee tei telaga odo mapoo to hogugu tenee*

22 Osoloso diye di odo sabolo, osoloso sosee wiligi odo tebisa sabolo, osoloso tei telaga odo susuga oso goomoga magoloso odo abo toloso, Polo dio Banabas dio see Antiyoka mapoo diye diso. Egeeseelone diayo wiligi odo mooloogoodoo ma kuloduga odo bakadio Yudas-Balabas dio osoloso Sailesi dio hagee hesigaso.

23 Esemee diayo hodobo Antiyoka mapoo diyadulone to hogugu hagee toloso diyadeeso:

Esiga emegei, iba diye di odo sabolo, osoloso sosee wiligi odo tebisa sabolo, to hagee ka hoguga. Esiga iyo to hagee Yu odoonee tei telaga odo susuga Antiyoka mapoo, osoloso Siliya mapoo, osoloso Kilikiya mapoo debeli odo nimapoo ka hoguga.

24 Esiga ibada mooloogoodoo ma kuloduga odo abo oso dileso nimapoo to abo takeme, niyo goo tiadoo goo ee iba duso. Esino iyo dimapoo to takeme ka moodele.

25-27 Esiga iba see Polo dio Banabas dio see nimapoo wedi diye deeso. Bei, odo hagee bia Lodee Yesu Kelisowo goo mapoo dibada su tenelai koo goweli. Egeesi ma kulodu iyo goomoga maga ibada mooloogoodoo ma kulodu Yudas sabolo, Sailesi sabolo, Polo dio Banabas dio dibolo diye dalame, iyo diba hesiaso. Esiga diayo nimapoo sibileso to hedebe iyo hogugu hagee takalaiso.

28 Bei, iba Dio Tei sabolo goo goolee olo hedebe doloso magooso. Esiga iyo nimapoo hegi hee tenelaime. Esino niba wulo goo hedebe hagono deede.

29 Niba gamenee godee mapoo nali bi tenee toloso na ne. Osoloso sawo na ne,

osoloso hwei sawo sabolo mologa na ne. Osoloso odo hee mapoo goo heli na te.

Niba goo hagee telega dogo, niba tekepo dabalaiso. Epe-ee emegei, ibada to oso.

<sup>30</sup> Esiga odo hagee bia oso to hogugu hagee toloso, Yelusalem maga see Antiyoka mi mapoo diyadeeso. Osoloso diba Antiyoka mapoo dileso peledoboloso, tei telaga odo susuga gilimadoloso, to hogugu ee dimapoo teneeso.

<sup>31</sup> Esem Antiyoka tei telaga odo oso pidi to hogugu hagee hesigaloso diya goomogaso.

<sup>32</sup> Osoloso Godee maga to toloso kokodo takomo silesibili odo Yudas dio Sailesi dio oso, tei telaga odo mapoo diayo tei too kibilame pidi to takaso.

<sup>33</sup> Osoloso biame abo Antiyoka mapoo dooso, tei telaga odo oso Yudas dio Sailesi dio see Yelusalem mapoo medee obeeyamo wedi diyadeeye diso.

<sup>34</sup> [Esino Sailesi yo Yudas bolo Yelusalem mapoo wedi dile, esino yo Antiyoka mapoo badebeiso.]\*

<sup>35</sup> Esem Polo dio Banabas dio Antiyoka mi mapoo osee dobolone odo abo sabolo, Godeeyo to Yesuwo goo maga takolone debeiso.

### *Polo dio Banabas dio domo pee*

<sup>36</sup> Hamamee biame heeso Poloye Banabas mapoo egeese takaso, "Iba see wedi dileso, iyo daga Lodeeyo to takomo di mi pepuso susuga ee ogogomo dimo. Bei, tei telaga odo mi omapoo egee do ee ayo diya gooleega, iyo dileso diba agalai, a goomogo," diso.

<sup>37</sup> Esino Banabaseeye Yonee-Maka dibolo ido dilame goomogaso.

<sup>38</sup> Esino Polo yo Yonee-Maka diayo ido dilei tekeponee diso. Bei, diayo daga di ma kulodu Yonee Maka hesiano, yayo o tou dibolo tele poogooso. Bei, Yonee Makaye diba poogoloso Pampiliya mi maga diso.

<sup>39</sup> Esem Polo dio Banabas dio toso diya agadigameleso, hodobo silesibi maga

domo puloso diyadeeso. Esem Banabaseeye Yonee-Maka idoloso du toowa maga Saiples mi te mapoo soowaso.

<sup>40</sup> Esem tei telaga odo oso Poloye Sailesi ido dilame hesime egeese takaso, "Diye, Lodeeye niba sooloo dolone pidiye dee," diso.

<sup>41</sup> Esem diayo dileso Siliya mi sabolo, osoloso Kilikiya mi sabolo, omapoo tei telaga odo mapoo Godeeyo to takomo silesibume, diayo to ee duloso, diayo tei too kibiyaso.

## 16

### *Timotiye Polo dio Sailesi dibolo di goo*

<sup>1</sup> Polo dio Sailesi dio Delebe mi mapoo dileso peledoboloso, see Listala mi mapoo dileso egeino, tei too odo hee badoboome egeiso, o hu Timoti. Timotiyo owee ee tei too Yu sobo. Esino ama ee Guliki odo.

<sup>2</sup> Osoloso tei telaga odo oso Listala mi mapoo debeli sabolo, Ikonyum mi mapoo debeli sabolo, oso takolone Timoti yo odo medee tekepo dee takeliso.

<sup>3</sup> Egeesi ma kulodu Poloye Timotibolo silame goomogaso. Esino Yu odo susuga omapoo debei oso, Timotiyo ama ee Guliki odo doloso gooleedooso. Esiga Poloye Yu odo goomogalame, Yu odoowo adaga dia goo ee dodolone Timoti idoloso kolo kooso.\*

<sup>4</sup> Esem Polo diayo diye di odo sabolo, osoloso sosee wiligi odo tebisa sabolo, oso Yelusalem mapoo to hogugu ee odo susuga oso dadalame mi susuga mapoo to hogugu hagee takomo silesibiso.

<sup>5</sup> Esem biame susuga ee ma kulodu odo aboso tei teme, tei telaga odo bei moodoolone, sosee susuga ma kulodu odo susuga oso tei too kitulugu sabolo debeiso.

### *Godeeye Polo Makedoniya mi mapoo diye di*

<sup>6</sup> Poloye o odo abo sabolo dileso Asiya mi toowa mapoo Godeeyo to takalai, Dio

\* **15:34:** To hagee odo abo oso taka, "Lukaye hogugu," dee takeliso. Esino odo abo oso taka, "Lukaye hogugule, odo heeso hamamee hogugu," dee takeliso. **15:37:** Diye 12:12, 25 **15:38:** Diye 13:13; Kol 4:10 **16:1:** Diye 14:6; 2Tim 1:5 **16:2:** Pil 2:19-22 \* **16:3:** Yu odoowo howo woola mapoo, Timoti yo Yu odo. Bei, owee Yu sobo. Esiga Yu odoowo adaga dia goo ee dodolone, Timoti o kolo koolai tekepo diso. **16:4:** Diye 15:23-29 **16:6:** Diye 18:23

Tei oso hamaga takaso. Esiga diayo dulone Piligiya mi ogo, osoloso Galesia mi ogo doloso domo omaga diyadaga meleeso.

<sup>7</sup> Osoloso diayo Misiya mi koola mapoo sibilesa peledoboloso, see Bituniya mi mapoo dilame seme, Yesuwo dio oso hamaga takaso.

<sup>8</sup> Esiga diba Misiya mi dagadilesa see Tolowasee mi mapoo mouso.

<sup>9</sup> Diba Tolowasee mi mapoo sibilesa, gesi domopoo Polowo howo opusomo doloso, Makedoniya mapoo badeli odoo egeeso. Odoo oso yimapoo howolone egeese takaso, “No abei daloso Makedoniya mi hamapoo sibilesa iba pidi,” diso.

<sup>10</sup> Polowo howo opusomo doloso melee koodobuloso hamamee, iba Makedoniya mi omapoo dilame mopoodoo dooso. Egeesi ma kulodu, Godeeye iba Makedoniya odoo dimapoo to tekepo takomo diye doloso taka goo ee iba gooleedooso.\*

### *Lidiyaye tei too goo*

<sup>11</sup> Iba du toowa toloso Tolowasee mi poogoloso, Samoteleisee mi te mapoo dalo soowaso. Osoloso omapoo tialoso, biame hee mapoo Neyapolisi mi mapoo soowaso.

<sup>12</sup> Osoloso iba see abaga mili Pilipai mi mapoo diso. Mi hagee Makedoniya mi eyo kulodu mi toowa hee hagoso. Loum odoo sabolo mi hamapoo debeliso. Osoloso iba biame abo mi hamapoo debeiso.

<sup>13</sup> Osoloso iba Yu odoowo hasali biame mapoo mosobia beele peegoo dileso howo palaga omapoo meiyadeeso. Bei, Yu odoo omapoo howo gisilei malaiso doloso, iba gooleedooso. Esem e iba omapoo meilesa sobo abo sabolo mooloogoodoloso omapoo dobolone dimapoo to takemeleeso.

<sup>14</sup> Diayo to ee dulone debei ma kulodu Tayatila mi mapoo badeli sobo hedebe badebeiso, o hu Lidiya. Sobo yo o dugo tia bige odoo abo mapoo nei sabolo teliso. Osoloso yayo Yu odoowo Godee mapoo tei toloso mesiliso. Osoloso Poloye to takomolome, Godeeye sobo hagoso Polowo to mapoo medee tei talame pidiso.

<sup>15</sup> Osoloso yibolo o moso kulodu mapoo debeli odoo sabolo howo ogusigaso. Osoloso yayo iba o moso ma kulodu gili-madolone egeese takaso, “Niyo a Lodee mapoo tei too sobo daga, niba dileso mo moso ma kulodu debee,” diso. Esem e yayo egeese takeme, iba o moso ma kulodu peleso debeiso.

### *Polo dio Sailesi dio neliga moso mapoo toosoo goo*

<sup>16</sup> Biame heeso iba howo gisilame howo palaga maga diyadaga meeleeno, odoo heeyo tou teli sobo oso iba eli domo tugodooso. Osoloso sobo hagoso sa holo oso yimapoo polome, goo peledabalai odoo mapoo olo malalo takomo siliso. Yayo egeeseemo silone, o gibadeli odoo tebisa eyo molee toowa teliso.

<sup>17</sup> Osoloso sobo hagoso ima hamamee sibulone, to neligidi egeese takomo sileeso, “Odoo hagee bia dokodoo badeli Godeeyo tou teli odoo oso, esiga diayo epei gie badeli talame ka takomo siloso,” diso.

<sup>18</sup> Yayo biame susuga ma kulodu osee takomo siliso. Osoloso yayo osee takomo sileeme, Poloye diya gowoolone, bidi ogolone sa holo o kulodu pala omapoo egeese takaso, “Ayo Yesu Kelisowo hu maga namapoo ka taka, no yimaga peegoo gadi!” diso. Esem epedee omapoo sa holo oso yimaga peegoo gadiso.

<sup>19-20</sup> Esem e sobo ee gibadeli oso diayo molee teli eli pee ogoloso, sibilesa, Polo dio Sailesi dio toloso gamalee odoo mapoo iyado diso. Diayo Polo dio Sailesi dio iyado dileso mosobia domo woola mapoo holoogoloso Loum gamalee odoo dimapoo egeese takaso, “Odoo hagee bia Yu odoo. Esiga diayo ibada mi hamapoo goo tiadili goo eligimo silesibo.

<sup>21</sup> Esiga diayo eligi goo oso Loum odoo ibada adaga dia tei goo sabolo koo tobuo. Esiga Loum odoo iyo diayo eligi goo ee talai tekeponee,” diso.

<sup>22</sup> Egeeseelone mosobia odoo susuga oso Polo dio Sailesi dio diya goweso. Esem e gamalee odoo oso dibada odoo mapoo

\* **16:10:** Polobolo Makedoniya mi mapoo diyadee odoo hagoso: Sailesi, Timoti, osoloso Luka (Lukaye Diye Di Odoo booka hagee hoguguso). **16:17:** Maka 1:24 **16:19-20:** Maka 13:9 **16:22:** 2Kol 11:25; 1Tes 2:2



Polo dio Sailesi dio dia dugo ee tologo buguloso, tigamagoloso homoso weeye, diso.

<sup>23</sup> Osoloso gamaleeyo odo oso diba neligidi wooloogaloso, neliga moso ma kulodu huyasooso. Osoloso diayo neliga moso gibadeli odo mapoo egeesee takaso, “Medee gibadebee,” diso.

<sup>24</sup> Esemе yayo egeesee taka duloso, neliga moso gibadeli odo oso moso kulo hodu osulu kisi ee yamagoloso, Polo dio Sailesi dio moso kulodu iyado dilesos, dibada homo homo ou soduga ma kulodu galaga dilesos kiso kisiso.

<sup>25</sup> Esemе gesi domo mapoo Polo dio Sailesi dio oso Godee mapoo takolone dobolone, yimapoo goomogolone kosaiya poulone debeiso. Esemе mesiya neliga moso tegei ma kulodu debeli odo abo oso duso.

<sup>26</sup> Esemе epedee omapoo mibia toowa saga simi oso neliga moso halabuso. Egeeseeme neliga moso osulu susuga yiliga magooso. Osoloso ki ti oso neliga moso ma kulodu debeli odo tiegisa ee eyo pidiga poogoloso mouso.

<sup>27</sup> Egeesi ma kulodu neliga moso gibadeli odo oso toboloso egeino, neliga moso osulu susuga yiliga magoloso molome egeiso. Egeesi ogoloso yayo goolee, neliga moso ma kulodu debeli odo susuga kukulo didoo doloso, kaiya tolosos eyo nediliyo wooloomalame siso.

<sup>28</sup> Esino Poloye neligidi takolone egeesee takaso, “No nediliyo na wooloome! Iba susuga hagee doso!” diso.

<sup>29</sup> Esemе neliga moso gibadeli odo oso o odo yimapoo keme tosibe, diso. Esemе yayo keme tolosos neliga moso kulodu hoguo dilesos, obulone kikiliga sabolo Polo dio Sailesi dio dibada homo beiyomoo ebisomiyomoo tugusalosos balaboo tiasos.

<sup>30</sup> Osoloso yayo Polo dio Sailesi dio peegoo iyado dilesos dimapoo egeesee takaso, “Wiligi odo, ayo ogoos toga, gie badeli ka talaiyo?” diso.

<sup>31</sup> Esemе Polo dio Sailesi dio yimapoo egeesee takaso, “No Lodee Yesu mapoo tei te! Egeeseega no gie badeli talaisos. Esiga

nobolo osolosos nee mosos kulodu debeli odo oso Lodee Yesu mapoo tei toga, niba gie badeli talaisos,” diso.

<sup>32</sup> Esemе yayo Polo dio Sailesi dio o mosopoo ido diso. Esemе diayo yibolo osolosos o mosos kulodu debeli odo sabolo mapoo to tekepo Lodeeyos goos maga takasos.

<sup>33</sup> Esemе gesi omapoo neliga mosos gibadeli odo oso Polo dio edebeeyos wei oso kolo koogoo ee howo hapoosos. Osolosos omapoo Polo diayo neliga mosos gibadeli odo sabolo, osolosos o mosos kulodu debeli odo sabolo, howo ogusigasos.

<sup>34</sup> Diba howo ogusime, neliga mosos gibadeli odo oso Polo dio Sailesi dio o mosopoo iyado dilesos nei teneesos. Osolosos yibolos, osolosos o mosos kulodu debeli odo sabolo, diayo Godee mapoo tei too goos maga diya goomogasos.

<sup>35</sup> Osolosos gesikolos gamalee odo oso dibada odo ee neliga mosos gibadeli odo mapoo diye dolone egeesee takasos, “Polo dio see peegoo tamagee,” diso. Esemе diayo dilesos neliga mosos gibadeli odo mapoo Polo dio peegoo tamagalame, gamalee odo oso taka to ee yimapoo takasos.

<sup>36</sup> Esemе neliga mosos gibadeli odo oso to hagee dulosos dilesos, Polo mapoo egeesee takasos, “Gamalee odo oso takolone niba diyenas, esiga niba medee diyadee,” diso.

<sup>37</sup> Esino Poloye gamalee odo oso diye di odo mapoo dilesos egeesee takasos, “Nibada wiligi odo tebisa oso ibada goos ee medee midile. Egeeseelone diayo nimapoo kitulugos tenemes, niyo iba odo howo woola mapoo wooloogasos. Esiga diba Loum mi toowa mapoo debeli odo mapoo goos egeesi moodoolai tekeponee. Bei, Sailesi asalos iba Loum mi toowa mapoo debeli odo. Esino niyo iba wooloogasos. Osolosos nibada wiligi odo tebisa oso iba neliga mosos ma kulodu toososos. Osolosos see diayo iba neliga mosos maga mada peegoo iyado dilame ka sala? Egeesee selai tekeponee. Esiga diesos sibilesos iba neliga mosos hamaga iyadolosos peegoo dilei tekepo,” diso.

<sup>38</sup> Esemee gamalee odoo oso diye di odoo ee see wedi dilesa, Poloye to taka ee gamalee odoo dimapoo takaso. Esemee gamalee odoo oso Polo dio ee tei Loum mi toowa odoo, dee taka duloso, diya dio dulone ebigaso.

<sup>39</sup> Esemee gamalee odoo oso dieso sibilesa Polo dimapoo emegei di to takaso. Osoloso diba neliga moso ma kuloduga peegoo iyado dilesa howolone egeesee takaso, “Niba epei mi hamaga peegoo diyadee,” diso.

<sup>40</sup> Esemee Polo diba neliga moso ma kuloduga peegoo dilesa, Lidiyayo mosopoo diyadeeso. Omapoo dilesa tei telaga odoo mapoo pidi to takoloso diyadeeso.

## 17

### *Polo dio Sailesi dio Tesalonika mi mapoo di*

<sup>1</sup> Polo diba Tesalonika mi mapoo diyadulone, Ampipolis mi sabolo, osoloso Apoloniya mi sabolo, ma kuloduga diyadeeso. Egeesi ma kuloduga Yu odoowo howo gisili moso ee Tesalonika mi mapoo meleeso.

<sup>2</sup> Polo see mi omapoo eyo goo moodeli egeesi moodoolone, Yu odoowo howo gisili moso mapoo palaso. Osoloso Yu odoowo hasali biame bakadio hedebe di ma kulodu, Poloye Godeeyo to booka ma kuloduga, Kelisowo goo ee Yu odoo mapoo medee eligi meleeso.

<sup>3</sup> Yayo odoo mapoo Godeeyo to eligilone goo eyo bei woola egeesee takaso, “Godeeye to takoloso magooso, yayo hesia Kelisoye dala toloso, toloso ta maga see hogabileiso. Esiga ayo nimapoo Yesuwo goo hagee takoo odoo ee Godeeye hudi magoo Keliso oso,” diso.

<sup>4</sup> Esemee Yu odoo abo oso Polo dio Sailesi dio dibada to duloso tei toloso dibada mooloogoodoo sabolo hedebe diso. Osoloso Godee mapoo mesili Guliki odoo susuga sabolo, osoloso sobo hu toowa too abo sabolo, tei toloso dibada mooloogoodoo sabolo hedebe diso.

<sup>5</sup> Esino Yu odoo Polowo to mapoo tei tele poogoo odoo oso Polo dimapoo diya kooso. Egeeseelone diayo tokenee

teli odoo mi domo silesibili, diba gilimadoloso mooloogoodoloso diba diya kamanalame toso diya pupuso. Esemee odoo susuga oso diya komonolone, Yasoneeyo mosopoo toso agadigamo hoguga dilesa, Polo dio Sailesi dio toloso, odoo howo woola mapoo dibada goo midilame esiamo diso.

<sup>6</sup> Esino diayo Polo dio koo egeme, Yason sabolo tei telaga odoo abo sabolo toloso, mi wiligi odoo tebisa mapoo iyado diso. Esemee kamanalame bei mooloogoo odoo oso wiligi odoo tebisa dimapoo to neligidi takolone, Polo dibada goo maga egeesee takaso, “Odoo hagee bia oso mi susuga mapoo goo tokenee talame pupugamo silesibo. Esiga epedee hamapoo diba ibada mi hamapoo simiso.

<sup>7</sup> Esemee Yason hagoso diba toloso o moso mapoo gilimado peleso doso. Esiga odoo hagee bia oso ibada wiligi odoo taba Sisaye tei goo ma ee gabagamo silesibo. Bei, diayo takolone, Sisa ee ibada wiligi odoo toowa taba osonee, esino odoo hee Yesu ono ibada wiligi odoo deliso,” diso.

<sup>8</sup> Esemee mosobia odoo sabolo, wiligi odoo tebisa sabolo, to hagee duloso, kamana sabolo diya to boowoogaso.

<sup>9</sup> Osoloso wiligi odoo tebisa oso molee nei meye deme, Yason diayo wiligi odoo tebisa dimapoo molee malosoo peegoo diyadeeso.

### *Polo dio Sailesi dio Beleya mi mapoo di*

<sup>10</sup> Osoloso gesi domo omapoo tei telaga odoo oso Polo dio Sailesi dio Beleya mi mapoo diye diso. Esemee diayo Beleya mi mapoo peledoboloso, Yu odoowo howo gisili moso mapoo palaso.

<sup>11</sup> Osoloso egeesi ma kulodu, Poloye Tesalonika mapoo badebei domo omapoo Yu odoo omapoo debeli oso o to dulei goweso. Esino Beleya mi hamapoo Yu odoo oso Poloye Godeeyo to takeme goomoga sabolo o to duloso, to eyo goo bei esieliso. Osoloso diayo Poloye eligi tei beleso, biame susuga Godeeyo to booka mapoo hogugu medee hesigeliso.

<sup>12</sup> Esiga Yu odoo bei sabolo, osoloso Guliki sobo hu toowa too abo sabolo, osoloso giso abo sabolo oso tei tooso.

<sup>13</sup> Esino Tesalonika mapoo debeli Yu odoo oso Polo diayo Beleya mapoo Godeeyo to takomolosogo di duloso, diba see Beleya mapoo sibadeeso. Diba Beleya mapoo sibilesi, diayo mosobia odoo oso Polo dibada goo maga kamanalame toso diya pupuso.

<sup>14-15</sup> Esem Sailesi dio Timoti dio Beleya mi omapoo osee doboome, tei telaga odoo oso Polo ono du dali mapoo saga ido mouso, yayo omaga du toloso Atene mi mapoo dilame. Osoloso diba Atene mi mapoo dilesi peledoboome, Polo yo ido di odoo dimapoo egeesee takaso, “Niba wedi dilesi Timoti dio Sailesi dio dimapoo takee, diba see ayo bado mapoo saga sibeye,” diso.

### *Poloye Atene mi mapoo Godeeyo to taka*

<sup>16</sup> Polo Atene mapoo Sailesi dio Timoti dio bameleeso. Yo omapoo diba bolone badolone egeino, mosobia ma kulodu edebeeyo deeso dadabayo moodoo gamenee godee bei molo egeiso. Egeesi ogoloso yo sooloo ma kulodu hegi toowa molone diya gooleeso.

<sup>17</sup> Osoloso Yu odoowo howo gisili moso mapoo Yu odoo abo sabolo, osoloso Godee mapoo mesili Guliki odoo sabolo to meliso. Osoloso biame susuga ma kulodu mi domopoo gamenee silesibili odoo sabolo to takomo silesibiliso.

<sup>18</sup> Esem goo goolee toowa odoo, Epikuliya mooloogoodoo mapoo debeli odoo sabolo, osoloso Sitoiki mooloogoodoo mapoo debeli odoo sabolo, oso sibilesi Polobolo to moulone toso agadigaso. Osoloso Poloye Yesuwo goo sabolo, osoloso odoo wedia see ta maga hogabilei goo ee takeme, goo goolee toowa odoo abo oso egeesee takemeleeso, “Odo hagee yayo taka goo eyo bei yo gooleede. Yo ogo goo eligilame ka silabele?” diso. Osoloso odoo abo oso egeesee takemeleeso, “Yayo imapoo mi

abo dibada godeeyo goo ee eligilame ka sulo,” deliso.

<sup>19</sup> Osoloso diayo Polo yayo eligimo silee goo ee medee takalame, Aleopagi esia dokodoo wiligi odoo tebisa oso to moumelee mapoo ido diso. Omapoo ido dilesi diayo Polo mapoo egeesee takaso, “Nayo eligi goo dia egee takomo sulo imapoo medee takee.

<sup>20</sup> Bei, nayo eligimo silee iba gooleede. Esiga iba nayo eligi goo eyo bei gooleedalai goomogoso,” diso.

<sup>21</sup> (Osoloso goo ee ma kulodu Atene mapoo debeli odoo sabolo, osoloso mi abo maga sibadee odoo sabolo, biame susuga diayo goomoga goo talai biame ee poogoloso, see gamenee eligi goo maga to dia meliso.)

<sup>22</sup> Osoloso Poloye mooloogoodoo ma kuloduga toboloso egeesee takaso,

“Atene bia odoo, niba mo to dui! Niba eli bei maga godee susuga mapoo goomoga tenelai gooleedoona.

<sup>23</sup> Bei, ayo nibada mi ma kulodu ogogomo silone egeino, niyo goomegeli godee opusomo opusomo di egegeiso. Osoloso ee ma kulodu, godee heeyo goo maga to egeesee hogugu yo mapoo molo egeiso, ‘Mi hamapoo edebeeyo gooleede poogoo godee o hu dokodoo poudiliso,’ ee egeiso. Esiga niyo gooleede poogoo godee mapoo goomoga goo teneliso. Esino ayo nimapoo Godeeyo goo hagee takalaiso.

<sup>24</sup> Esiga niba goolee, Godee hagoso mipoo toowa sabolo, kei dokodoo sabolo eyo wiligi doloso badoso. Bei, mipoo toowa sabolo, osoloso kei dokodoo sabolo, osoloso ee ma kulodu bi susuga egee molo sabolo, yayo moodoso. Esiga yo moso edebeeyo tegei mapoo koo badeli.

<sup>25</sup> Esiga Godee hagoso gie badeli sabolo, bi susuga sabolo, odoo mapoo teneliso. Esiga iyo yo pidilei eli mauwe. Bei, yimapoo bi susuga yibolo tobuloso badoso.

<sup>26</sup> Esiga Godeeye daga hoogoo odoo hedebe moodoso. Osoloso odoo hedebe yimaga odoo opusomo opusomo di susuga oso mipoo susuga mapoo diayo dabalame moodoso. Osoloso Godeeye mi diayo

dabalai sabolo biame diayo dabalai oso hoo pagalai magooso.

<sup>27</sup> Bei, Godeeye odoo howo si masi oso esiamleso yo agalame goomogaso. Esino yo imaga hoogoo koo badoso.

<sup>28</sup> Bei, yayo imapoo gie badeli teneeso. Osoloso iba yayo kitulugu maga silone ka doso. Esiga to hagee nibada odoo oso taka to sabolo teiba. Bei, daga nima kulodu badebei odoo heeso egeesee takaso, 'Iba nose Godeeyo owolo dio,' diso."

<sup>29</sup> "Iba Godeeyo owolo dio doloso dobolone egeesee na goolee, 'Godee yo edebeeyo dadabayo yoso, osoloso bi abo sabolo oso deeso moodoona,' dee na goolee.

<sup>30</sup> Godeeye daga hoogoo odoo ee egeesee goo ma kulodu osee doboome dimapoo takele. Bei kasi magayo, diba Godee gooleedelega debeiso. Esino epedee hamapoo Godeeye egeesee takooso, 'Odo susuga mi susuga ma kulodu nibada goo tokenee maga miligi pie!' diso.

<sup>31</sup> Bei, yayo mi odoo susuga dibada goo ee midilei biame olo magooso. Esiga yayo medee midileiso. Egee yayo daga hesia odoo oso ka selai. Esiga Godeeye to hamapoo tei dolone, yayo hesia odoo ee ta maga hogadiso," diso.

<sup>32</sup> Poloye eligi goo maga odoo oso Yesuye ta maga hogabia dulosu odoo abo oso maneso. Esino odoo abo oso Polo mapoo egeesee takaso, "Iba goo hagee biame hee mapoo see tobu dulei goomogo," diso.

<sup>33</sup> Osoloso Polo to takoloso koodobuloso diba poogoo diso.

<sup>34</sup> Esino ee ma kulodu, odoo abo oso Polowo to dulosu Yesu mapoo tei tolone, yibolo hedebe diso. Polowo to mapoo tei telaga odoo eyo kulodu odoo hee Dionisias, Aleopagi mooloogoodoo ma kulodu badeli odoo. Osoloso sobo hee Damalis, osoloso odoo abo sabolo tei tooso.

## 18

### *Poloye Kolin mi mapoo badebei*

<sup>1</sup> Hamamee Polo Atene mi mapoo bado-boso see Kolin mi mapoo diso.

<sup>2</sup> Yo mi omapoo dilesu Yu odoo hee tugodooso, o hu Akwila, o middee Pontus. Odo hageeyo osobo Plisila dio, epedee Itali mi toowa ee ma kulodu Loum mi maga Kolin mi mapoo sibadeeso. Bei, Sisa-Kolodiyaseeye Yu odoo susuga ee Loum mi maga peegoo hasiso buguso.

<sup>3</sup> Esino Poloye dilesu Akwila dio osobo Plisila dio dibada moso mapoo hodobo debeiso. Bei, diba hodobo dugoso moso tegegeli tou temeliso.

<sup>4</sup> Yu odoowo hasali biame susuga mapoo Poloye Yu odoo sabolo, Guliki odoo sabolo, Yesu mapoo tei talame, Yu odoowo howo gisili moso mapoo Yesuwo goo ee to meliso.

<sup>5</sup> Esem Sailesi dio Timoti dio Makedoniya maga Poloye badebei mapoo sibume, Poloye o tou poogoloso biame susuga mapoo hedebe Godeeyo to takalai bei mooloogoloso sileeso. Egeesee lone yayo Yu odoo dimapoo, Yesuwo goo woola mapoo eligimo silone, Yesu yo Godeeye hudi magoo Kelisoso deliso.

<sup>6</sup> Esino diayo Poloye eligi to talai gowoolone, see Polo mapoo duwa takemeleeso. Esem Poloye Godeeye kamanali goo ee dimapoo eligilone, o dugo megegu pilidibuguloso dimapoo egeesee takaso, "Ayo niba goolone tou toowa tooso. Esino niyo gie badeli tele poogooga, ee nibada goo. Esiga a epedee domo hamaga see Yu odoonee mapoo Godeeyo to takomo dileiso," diso.

<sup>7</sup> Osoloso Polo Yu odoowo howo gisili moso poogoloso, see koola mapoo Yu odoonee Titiyus-Yustus eyo moso mapoo badalame diso. Odo hagee Yu odoowo Godee mapoo mesili odooso.

<sup>8</sup> Osoloso howo gisili moso wiligi odoo taba Klispas sabolo, osoloso o moso kulodu debeli odoo sabolo, Lodee Yesu mapoo tei tooso. Osoloso Kolin mi mapoo debeli odoo abo sabolo Polowo to dulosu tei teme, diba howo ogusigaso.

<sup>9</sup> Osoloso gesi heeso Lodeeye Polo howo opusomo doloso yimapoo egeesee takaso, "No haga na ebi! Osoloso nayo to takomo sili ee na koodobie!



<sup>10</sup> Bei, a nobolo badalaiso. Esiga odoo heeso namapoo dala tenelaime. Bei, Kolin mi toowa hama kulodu ayo hesiga odoo susuga doso,” diso.

<sup>11</sup> Esem Poloye Kolin mi mapoo Godeeyo to eligilone, dugo hedebe poogoloso, osoloso see dugo hee bei mooloogoloso dulone a 6 badebeiso.

*Yu odoo oso Polo yo gamalee odoo Galiyo mapoo ido di*

<sup>12</sup> Loum odoo Galiyoye Kolin mi mapoo badolone, Akaya mi toowa gibadebeiso. Esino Poloye Kolin mi ee ma kulodu Godeeyo to eligimo silime, Yu odoo susuga oso gowoolone goo goolee hedebe doloso, Polowo goo midilame, yo Galiyo mapoo ido simiso.

<sup>13</sup> Egeeseelone, diayo Polo ido sibilesa Galiyo mapoo egeese takaso, “Odo hagoso eli hee maga Godee mapoo goomagalai eligimo silone, ibada tei magoo goo sabolo koo tobuo,” diso.

<sup>14</sup> Osoloso Poloye epedee to hee takalame molome, Galiyoye Yu odoo dimapoo egeese takaso, “Yu odoo, edebeeyo goo tokenee toowa too diepi o, Loum gamaleeyo tei gababia diepi, ayo o goo medee midiliyo.

<sup>15</sup> Esino nibada tei goo maga goo pe-pooko tosimiga, niso midilei tekepo! Esiga a goo egesi midilei gowoo,” diso.

<sup>16</sup> Esem yo to hagee dimapoo takoloso goo midili moso maga diye diso.

<sup>17</sup> Esem goo midili moso ma kulodu odoo susuga oso howo gisili moso wiligi odoo Sostenes toloso weiso. Esino Galiyoye goo hagee ogoloso yimapoo goonee diso.

*Poloye Antiyoka mapoo see wedi di*

<sup>18</sup> Polo Kolin mi mapoo tei telaga odoo sabolo biame bei badebeiso. Osoloso yo Siliya mi mapoo wedi dilame badolone, Akwila sabolo Plisila sabolo hodobo Kenekeleye mi mapoo sibadeeso. Omapoo Polo yayo Godee sabolo to magoo dodolone, o wudu waso.\*

<sup>19</sup> Osoloso diba du toloso see Epeses mi mapoo soowaso. Epeses mapoo dileso peledoboloso, Plisila dio Akwila dio omapoo holoogooso. Polo Epeses mapoo osee badolone, Yu odoowo howo gisili moso mapoo peleso, Yesuwo goo maga Yu odoo sabolo to moumeleeso.

<sup>20</sup> Esem tei telaga odoo oso Polo mapoo egeese takaso, “No biame sage ibolo badalai tekepo,” diso. Esino Polo yo mi omapoo badalai goomegele goo takoloso see egeese takaso,

<sup>21</sup> “Godeeye goomogoga, a see nimapoo wedi sibileiso,” diso. Osoloso yo du toowa toloso Epeses mi maga Kasaliya mi mapoo diso.

<sup>22</sup> Polo Kasaliya mapoo sibilesa du oluguloso see Yelusalem mapoo palaso, tei telaga odoo mapoo emegei di to takalame. Poloye Yelusalem tei telaga odoo dimapoo emegei di to takoloso, see Antiyoka mapoo wedi diso.

<sup>23</sup> Osoloso Antiyoka mapoo biame deiyepo badoboso, see Galesia mi sabolo osoloso Piligiya mi sabolo mapoo silone, tei telaga odoo diayo tei too kibilame pidimo sileeso.

*Apoloseeye Epeses mi mapoo to taka*

<sup>24</sup> Domo omapoo Yu odoo Apolos, Alesandiliya mapoo badeli odoo ee Epeses mapoo simiso. Yo Godeeyo to booka mapoo hogugu diya gooleedoo. Esiga yayo Godeeyo to taka domo mapoo medee tekepo takeli.

<sup>25</sup> Odo hagee Lodee Yesuwo goo ee odoo heeso eligiso. Esiga yayo Yesuwo goo ee kitulugu sabolo tekepo eligiliso. Esino yo odoo Yesuwo hu maga howo oluguli goo ee gooleedelega badolone, wulo Yoneye odoo susuga howo ogusiga goo ono gooleedoloso badebeiso.

<sup>26</sup> Osoloso Apoloseeye Yu odoowo howo gisili moso mapoo peleso, ebi-lega, Godeeyo to ee kitulugu sabolo takemeleeso. Esem Plisila dio Akwila dio o to dulone dobolone, yo dibada moso mapoo ido dileso, Godeeye odoo mapoo

**18:18:** Num 6:18; Diye 21:24 \* **18:18:** Yu odoo oso wudu wali eyo goo bei hagoso. Yu odooso Godee sabolo to magolone biame hesieliso, yayo biame hesia ee ma kulodu Godeeyo tou tolone o wudu woolega badalame. Osoloso hamamee o tou oso dileso koodobuuga o wudu waliso.

gie badeli teneli eyo goo maga yimapoo medee eligiso.

<sup>27</sup> Osoloso hamamee Apolosee Akaya mapoo dilei goomogaso. Esemetei telaga odoo oso tekepo dolone, to hogugu ee Akaya tei telaga odoo mapoo teneeso, yo sibilesa dibolo badolone diba pidilame siboga, diayo yimapoo goomoga to tenelame. Esemetei yayo omapoo dileso tei telaga odoo medee pidimeleeso. Osoloso odoo hagee diayo Yesu mapoo Godeeye mesilone wulayo pidi goo maga olo tei tooso.

<sup>28</sup> Bei, yayo Yu odoo sabolo Yesuwo goo ee odoo howo woola mapoo o toso kitulugulone Yu odoo oso to kookeliso. Egeeseelone yayo Godeeyo to booka maga eligilone, Yesu tei Godeeye hudi magoo Keliso doloso bado goo ee dimapoo woola eligiliso.

## 19

### *Poloye Epeses mi mapoo di*

<sup>1-2</sup> Apolos Kolin mi mapoo badoboome, Polo mili dileso Epeses mi mapoo peledabaso. Polo omapoo dileso tei telaga odoo abo tugodoloso dimapoo egeesee takaso, “Niba tei teme, Dio Tei oso nimapoo meledabasomo?” diso.

Esemetei diayo nei egeesee takaso, “Nayo ogoo goo imapoo ka takala? Iba Dio Tei eyo goo ee gooleedele,” diso.

<sup>3</sup> Esemetei Poloye dimapoo egeesee takaso, “Niba odoo agayo eligi maga howo ka ogusigayo?”

Esino odoo abo oso Polo mapoo egeesee takaso, “Iba Yonee odoo howo oluguli oso eligi dodolone howo ogusigaso.”

<sup>4</sup> Esemetei Poloye dimapoo egeesee takaso, “Yonee odoo howo oluguli oso eligi goo ee egeesee moloso. Edebeeyo Kelisoye sibilei goo mapoo moodoolone, diayo dibada goo tokenee maga miligi pume, howo ogusigaso. Esino yayo egeeseelone egeesee takeliso, ‘Ama hamamee egee sibo odoo omapoo tei te,’ dee takeliso. Odo ee Yesu,” diso.

<sup>5</sup> Esemetei diayo goo ee duloso Yesuwo hu maga howo ogusigaso.

<sup>6</sup> Osoloso Poloye dimapoo o deeso sigolone Godee mapoo takeme, Dio Tei oso dimapoo meledabaso. Esemetei diayo to opusomo opusomo di kesameleeso. Osoloso diayo Godeeye taka duloso odoo mapoo takemeleeso.

<sup>7</sup> Esino mooloogoodoo hagee ma kulodu odoo 12 oso goo hagee ka moodoo.

<sup>8</sup> Egeesi ma kulodu Yu odoo oso tei talame, Poloye dibada howo gisili moso mapoo peleso, a bakadio hedebe di ma kulodu ebilega, Godeeye wiligi doloso badeli eyo goo maga takemeleeso.

<sup>9</sup> Esino Yu odoo abo oso tei talai goo mapoo mesilega dobolone, odoo howo woola mapoo Yesuwo goo maga to tokenee takaso. Esemetei Poloye diba poogoloso tei telaga odoo gilimadoloso, Tilano sukulu moso mapoo diso.

<sup>10</sup> Osoloso omapoo Poloye dugo bakadio ma kulodu biame susuga Lodeeyo goo ee takeliso. Egeesi ma kulodu Asiya mi toowa mapoo debeli Yu odoo susuga sabolo, osoloso Guliki odoo susuga sabolo, Godeeyo to Yesuwo goo maga taka dulugaso.

<sup>11</sup> Godeeye Polo maga goo toowa opusomo opusomo di moodoogaso.

<sup>12</sup> Esemetei edebeeyo Poloye debia tali dugo sabolo, osoloso tou tolone kali dugo abo sabolo, toloso dileso odoo paigiga ma dokodoo mome, odoo paigiga susuga wegigadooso. Egeeseelone bo holo odoo ma kulodu paladee sabolo peegoo hasiso buguso.

<sup>13</sup> Esino Yu odoo abo wulo domo silesibili odoo oso bo holo odoo ma kuloduga peegoo hasiso bigiliso. Diayo Poloye Yesuwo goo taka duloso, see Lodee Yesuwo hu sabolo bo holo peegoo hasiso bugulone silesibilame bei mooloogooso. Egeeseelone diayo bo holo mapoo egeesee takeliso, “Iba Poloye egee eligimo silo Yesuwo hu maga nimapoo ka taka, niba peegoo gasibe!” deliso.

<sup>14</sup> Goo egeesee tomo silee ee Yu odoowo tei moso wiligi odoo taba Sikibayo owolo dio 7 oso egeesee ka moodoomo silesibiso.

<sup>15</sup> Egeesee moodoogamo silesibi ma kulodu, biame hee mapoo diayo bo holo

peegoo hasisa molome, bo holo oso nei dimapoo egeesee takaso, "A Yesu gooleedooso, osoloso a Polo gooleedooso. Esino niba odoogumo?" diso.

<sup>16</sup> Esemé odo bo holo pala oso diba toloso neligidi kitulugu sabolo diba wooloogaso. Esemé diayo o moso maga sawo sabolo bododidiwe kukulo diyadeeso.

<sup>17</sup> Esemé Epeses mapoo debeli Guliki odo sabolo, Yu odo sabolo goo hagee dulo diya obulone hedebe Lodee Yesuwo hu dokodoo poudooso.

<sup>18</sup> Osoloso tei telaga odo susuga oso dibada goo tokenee ee woola yilige buguso.

<sup>19</sup> Esemé dima kulodu googoo gooleedo odo oso goo moodoomo silee odo egeesi masi oso dibada googoo hogugu booka ee howo woola mapoo hodobo mooloogoo magoloso dou gigoogooso. Diayo googoo booka susuga hagee odo mapoo tenee diepi, eyo nei molee ko toowa 50,000\* egeesi teliyo.

<sup>20</sup> Egeesi ma kulodu Godeeyo to Lodeeyo goo maga mi toowa mapoo diayo kitulugu sabolo takomo diyadeeso.

<sup>21</sup> Goo hagoso dileso hoo poogoome, Polo yo Makedoniya mi sabolo Akaya mi sabolo mapoo dileso see omaga Yelusalem mapoo dilame goomogaso. Egeeseelone yayo see egeesee takaso, "A Yelusalem mapoo dileso see Loum mapoo dileiso," diso.

<sup>22</sup> Osoloso Polo yo pidili odo bakadio Timoti dio Elastus dio Makedoniya mi mapoo diba malalo diye doloso, yo Asiya mi mapoo epedee badebeiso.

*Epeses mi mapoo odo susuga oso kamanali goo toowa poudoo*

<sup>23</sup> Polo Epeses mi mapoo epedee bado-boome, odo susuga oso Yesuwo goo maga kamanali goo toowa poudooso.

<sup>24</sup> Bei, Epeses mi mapoo gamenee godee Artemis mapoo goomegeli moso tegei meleeso. Esemé odo hee Demetiliyuseeye o odo gilimadoloso, yoso gamenee

godee masi moodoo egeesi masi dia dee oso pepuso moodoogaloso, odo mapoo tenelone nei diayo molee toowa teliso.

<sup>25</sup> Osoloso Demetiliyuseeye o odo sabolo, osoloso odo abo dibolo tou hodobo teli odo egeesi sabolo, gilimadoloso to mouso. Osoloso Demetiliyuseeye to moulone dimapoo egeesee takaso, "Mo odo, niba dui! Iyo tou hagee tolone badolone molee toowa teliso.

<sup>26</sup> Esino niba odo Poloye goo tomo egee silo, niba gooleedooso. Yayo takolone ede-beeyo deeso moodoo godee ee tei godeenee, dee takomo silime, odo susuga Asiya mi mapoo debeli sabolo, osoloso Epeses mapoo debeli sabolo, oso yima hamamee dadagamo silesibiso.

<sup>27</sup> Esiga iba obeeyamo! Odo susuga oso Poloye eligi goo omapoo hamamee dodolone, iba gowooga, iyo tou too maga molee toowa hagee tomolo pagalai malaiso. Osoloso goo hee hagoso, odo susuga Asiya mi hamapoo debeli odo sabolo, oso ibada godee hedebe Artemis mapoo tei tolone goomegeliso. Esino odo susuga oso Poloye eligi mapoo tei toga, see diayo ibada godee Atames ee gamenee godee dalaiso. Osoloso yimapoo goomegeli moso ee gowoolaiso," diso.

<sup>28</sup> Demetiliyuseeye goo hagee takomolome, o to dulone debei odo oso kamanaloso toso diya agadilone egeesee takaso, "Epeses odo ibada godee Artemis hedebe yayo toowa ka badoso!" diso.

<sup>29</sup> Goo hagoso Epeses mi toowa ma kulodu debeli odo susuga oso diya kamanaso. Egeeseelone odo susuga oso mi ee ma kulodu to neligidi agadilone, ede-beeyo gooloogoo doloso debeli mi omapoo hoguga diyadeeso. Diayo hoguga dulone, Polowo odo Makedoniya mi mapoo debeli Gaiyus dio Alistakus dio iyadoloso diyadeeso.

<sup>30</sup> Esemé Polo yayo odo gooloogoodoo mapoo dileso to takalame goomogaso.

**19:17:** Diye 5:11 \* **19:19: molee ko toowa 50,000** - Molee ko toowa hageeyo hu dalakamas. Edebeeyo biame hedebe mapoo tou toga, yo nei molee ko toowa hagee hedebe nei teliso. **19:21:** Diye 23:11; Loum 1:13 **19:23:** 2Kol 1:8 **19:29:** Diye 20:4; 27:2; Kol 4:10; Pal 1:24

Esino tei telaga odoo oso yo hamaga takaso.

<sup>31</sup> Osoloso Polowo odoo abo Asiya mi mapoo wiligi odoo tebisa oso yo dilame goomegele. Egeeseelone Poloye mi omapoo dilega pagalame, yo diyaga to teneeso.

<sup>32</sup> Egeeseeme gooloogoodoo ee ma kulodu odoo aboso toso agadilone, goo opusomo takoo, osoloso odoo aboso goo opusomo takoo, diso. Egeeseelone odoo susuga oso diayo gooloogoodoo goo eyo bei kibiya gooleedele.

<sup>33</sup> Esiga Yu odoo oso odoo hee, Alesanda yo malalo mapoo pupumo dileso holoo-gooso, yayo odoo gooloogoodoo mapoo to takolone, goo hagee Yu odoo dibada goo tokenee nee, dee takalame. Esemeyayo odoo susuga oso to kesamelee omapoo koodobilame, o dee wabisaso.

<sup>34</sup> Esino gooloogoodoo oso Alesanda yo Yu odoo doloso gooleedoloso, gowoolone to agadi sabolo see tobu egeese takaso, "Epeses odoo ibada godee Atemis hedebe yayo toowa ka badoso!" diso. Diayo toso agadigamelee ososee, osoko howo bakadio poogooso.

<sup>35</sup> Esemeyayo mi omapoo gamaleeyo tou teli odoo heeso keese tabano, gooloogoodoo toowa oso to kesamelee omapoo koodobiaso. Egeeseeme yayo egeese takaso, "Epeses odoo, niba dui! Odoosusuga ibada godee toowa Atemis mapoo goomegeli moso ee iyo gibadeli, diba gooleedooso. Osoloso kei ma dokodooga Atemis egeesi masi imapoo homodobia, diba gooleedooso.

<sup>36</sup> Esiga edebeeyo goo hamaga gameene takalai tebile. Esiga niba kamanaga epedee hamapoo koodobie, osoloso goo tokenee hee na te.

<sup>37</sup> Osoloso niyo odoo hagee bia ee goo mauwe hamapoo iyado sibadeeso. Esino diayo ibada godee mapoo to tokenee takele. Osoloso diayo ibada godee mapoo goomegeli moso ma kulodu bi hee helitele.

<sup>38</sup> Esiga Demetiliyus nobolo, osolosonayo gowe odoo sabolo, goo midili moso mapoo dileso nibada goo midilei tekepo. Bei, goo midili odoo osee doso.

<sup>39</sup> Esino nimapoo goo hee maga to kalai mologa, mosobia oso to keli biame omapoo tosibilei tekepo.

<sup>40</sup> Esiga iba susuga obeeyamo. Epei iyo goo moodoo hamapoo Loum odoo oso imapoo tokenee nei teneeyaga. Esiga Loum odoo oso imapoo goo egeesimoodooga, iba iso nediliyo pidilei eli agalaime. Bei, epei iyo kamana goo eyo bei mauwe," diso.

<sup>41</sup> Osoloso mosobia gamaleeyo tou teli odoo oso to hagee takoloso koodobuloso mosobia odoo diba diyadee diso.

## 20

### *Poloye Makedoniya mi sabolo Akaya mi sabolo mapoo di*

<sup>1</sup> Epeses mi mapoo kamanali goo toowa poudoo oso koodobume, Poloye tei telaga odoo susuga gilimadooso. Poloye diba gilimadoloso dimapoo pidi to takoloso see Makedoniya mi mapoo dulone emegei di to takaso.

<sup>2-3</sup> Yayo Makedoniya mi toowa ma kulodu silone, mi omapoo tei telaga odoo oso debei mapoo dibada tei too kibilame dimapoo pidi to takaso. Osoloso see Akaya mi mapoo dileso badolone a bakadio hedebe di poogooso. Osoloso Polo a bakadio hedebe di Akaya mi mapoo poogoloso, see Siliya mi mapoo dalo soowoolame badoboome, Yu odoo oso yo wooloomalame to mou duso. Esino yo goo egeeduloso Akaya mi maga du toloso dilega, see Makedoniya mi mapoo wedi dileso du toloso Siliya mi mapoo dilei diso.

<sup>4</sup> Esiga odoo hagee bia oso Polobolo diyadeeso, Pilusuwo owolo Sopata, yo Belya mi mapoo badeli. Osoloso Tesalonika odoo, Alistakus dio Sekundus, osoloso Delebe odoo Gaiyus, osoloso Timoti. Osoloso Asiya mi toowa odoo Tikikus dio Tolopimus dio.

<sup>5</sup> Esiga odoo hagee bia oso malalo dileso Tolowasee mi mapoo iba balaga meleeso.

<sup>6</sup> Esemeyayo mi mapoo dobolone, Isipi mi maga peegoo peledaba biame gooleebugu wo nali omapoo debeiso. Osoloso wo ne biame ee poogoloso, Pilipai mi maga du



toowa toloso Tolowasee mi mapoo dalo soowoolone, abei domo mapoo biame dee tiadoo poogooso. Osoloso Tolowasee mi mapoo dileso odoo hagee bia tugodoloso mi omapoo dobolone biame 7 poogooso.

*Poloye Tolowasee mosobia odoo mapoo Godeeyo to hamameedee taka*

<sup>7</sup> Iba Tolowasee mi mapoo dobolone, Sadee toowa biame mapoo Yesu gooleebugu wo nalame tei telaga odoo susuga sabolo hodobo mooloogoodooso. Esem Poloye mooloogoodoo mapoo Godeeyo to takaso. Esino Polo yo mi beeamoga mi hee mapoo dilame badolone, gesi omapoo Godeeyo to sage taka gesi domo mapoo koodobiaso.

<sup>8</sup> Esem iba moso egi doko tegei debi pooba gooboogoo ma kulodu keme bei pegiga magoloso dobolone, Polowo to dulonga meleeso.

<sup>9</sup> Moso ee ma kulodu giso kadiga hee Yutikus, poo osulu mapoo dokodoo badebeiso. Yo Poloye Godeeyo to sage takeme ee dulone badolone, tilasapoo meleeso. Yo egeesee tilasapoolone moso dokodooga miyomoo homodobiaso. Yo miyomoo homodobume, edebeeyo meilesos yo toloso egeino, yo olo tana. Bei, moso egee diya egi doko tegei.

<sup>10</sup> Osoloso Polo yo miyomoo meilesos ebiso miyomoo tugusaloso, yo toloso badolone egeesee takaso, “Goo haga na koude. Yo see gie badeli toso,” diso.

<sup>11</sup> Osoloso Polo see moso dokodoo peleso nei naloso,\* see tobu Godeeyo to takemelee ososee mi biameso. Osoloso see gesikolodee mapoo mi egee poogoloso diso.

<sup>12</sup> Esem odoo susuga oso giso kadiga Yutikus ee gie badeli teme, goomoga sabolo o mosopoo ido diso.

*Polo diayo Tolowasee mi maga Miletus mi mapoo di*

<sup>13</sup> Osoloso iba Tolowasee mi maga Asos mi mapoo dilame doboome, Poloye egeesee takaso, “Niba malalo du toowa toloso Asos mi mapoo dalo soowee. A mili

dilesos Asos mi mapoo nibada du mapoo ka dabagalaiya,” diso.

<sup>14</sup> Esem iba du maga soowoolesos Asos mi mapoo yo tugodoloso, yo see du ma kulodu dabagaso. Osoloso see omaga Mitilene mi mapoo dalo soowaso.

<sup>15</sup> Osoloso see mi beeamome, Mitilene mi maga see Kiyos mi te mapoo dalo soowaso. Osoloso omapoo tialoso, see mi beeamome, du toowa toloso Samos mi te mapoo dalo soowaso. Osoloso omapoo tialoso, mi beeamome, see du toloso Miletus mi mapoo dalo soowaso.

<sup>16</sup> Esino Polo yo see Epeses mi mapoo dilei goomegele. Bei, yo Asiya mi ee saga poogoo dileso, Yelusalem mapoo Pentikos wo ne biame mapoo badalame goomogaso.

*Poloye Epeses sosee wiligi odoo tebisa sabolo to kei*

<sup>17</sup> Esiga Polo Miletus mi mapoo badolone, Epeses sosee wiligi odoo tebisa oso yo agalame sibilame to teneeso.

<sup>18</sup> Osoloso Epeses sosee wiligi odoo tebisa oso yayo badebei mapoo sibateme, yayo dimapoo egeesee takaso, “Niba ayo biame susuga nibolos Asiya mi mapoo badolone goo tomo silee gooleedooso.

<sup>19</sup> A biame susuga ma kulodu Godeeyo tou talai mapoo koo goweli. Egeesee lone mawo nediliyo dokodoo koo poudoomo sili. Osoloso Yu odoo oso a woolumalame dala teneme, ee ma kulodu didawo sabolo Godeeyo tou tomo sileeso.

<sup>20</sup> Esiga ayo niba pidilame ebilega Godeeyo goo susuga nimapoo woola taka, niba gooleedooso. Egeesee lone ayo goo hee mada koo mageli. Esino odoo susuga gooloogoodoo toowa ma kulodu, osoloso nibada moso ma kulodu, Godeeyo goo susuga ee nimapoo takeliso.

<sup>21</sup> Esiga a Guliki odoo sabolo, Yu odoo sabolo, oso goo goolee su wudulosos Godee mapoo bidiga dobolosos ibada Lodee Yesu mapoo tei talame to takaso.

<sup>22</sup> Esiga a Dio Tei eyo to mapoo mesilosos Yelusalem mapoo dileiso. Esino omapoo

\* **20:11:** Odoos abosos egeesee takeliso, “Biame omapoo Polo diayo Yesu gooleebugu wo neso,” diso. **20:17:** Diye 18:21 **20:18:** Diye 18:19–19:10 **20:23:** Diye 9:16; 21:11

dilesa badoga, amapoo goo peledabalai, a gooleedele.

<sup>23</sup> Esino goo hedebe hagono a gooleedooso. Ayo mi susuga mapoo siloga, Dio Tei oso ayo dala talai goo sabolo, neliga moso ma kulodu husalai goo sabolo, amapoo eligiliso.

<sup>24</sup> Esiga mo gie badeli haga koo gooleeso. Esino a hedebe Lodee Yesuye amapoo tou tenee susuga ee temeleso hosudalai diya gooleeso. Tou hagee to tekepo Godeeye mesilone wulayo pidi goo odoo mapoo takalai oso.

<sup>25</sup> Esiga a nima kulodu Godeeye wiligi doloso badeli goo ee takomo sileeso. Esino nima kulodu odoo heeso a see agalaime.

<sup>26</sup> Esiga epedee ayo nimapoo taka, nima kulodu odoo heeso gie badeli telega, dou mi mapoo duga, mo goo tokenee nee.

<sup>27</sup> Bei, ayo goo susuga Godeeye taka goo ee niyo gooleedalame olo takaso.

<sup>28</sup> Esiga niba niso nediliyo medee bamelee. Egeeseelone Dio Tei oso nimapoo tenee sipi be hu masi medee bamelee. Esiga niba sipi be hu bali odoo masi dobolone, Godeeyo sosee ma kulodu debeli odoo medee bamelee. Bei, Godeeyo owolo Yesuye ta maga o sosee ma kulodu debeli odoo ee tooso.

<sup>29</sup> A gooleedooso, a di mapoo hamamee, gamenee eligili odoo oso nimapoo sibilesa tei telaga odoo mapoo dala tenelaiso. Gamenee eligili odoo hagosu dobu so masi sibilesa sipi be hu masi wooloomaloso nalaiso.

<sup>30</sup> Osoloso nima kulodu nibada odoo abo oso tebisaloso tei goo ee see bidigaloso gamenee goo ee takomo silesibileiso. Egeeseelone diayo niba domo puloso tei telaga odoo abo ee peegoo gilimado dileiso.

<sup>31</sup> Esiga niba to hagee goolee sabolo dobolone, medee bolone debee. Bei, ayo dugo bakadio hedebe di ma kulodu biame susuga, osoloso gesi susuga mapoo goo hamapoo nimapoo pisa sabolo eligimo sileeso. Esiga ayo eligi goo hagee na boobado bigi!

<sup>32</sup> Esiga epedee ayo niba Godeeyo dee

mapoo ibedileiso. Osoloso Godee yayo sooloo dolone pidili to tekepo maga nibada tei too kibilame kitulugu tenelaiso. Osoloso to oso nibolo, osoloso Godeeye hesiga odoo susuga mapoo gie badeli tenelaiso.

<sup>33</sup> Esiga niba goolee, ayo nibolo silee mapoo, a odoo abo dia bi sabolo, molee sabolo, osoloso dugo tekepo kali bi sabolo ogoloso bi ee talame koo gweli.

<sup>34</sup> Esino niba olo gooleedooso, ayo goomoga goo sabolo, osoloso abolo silesibi odoo oso goomoga goo sabolo tebilame tou kitulugu sabolo teliso.

<sup>35</sup> Esiga a biame susuga ma kulodu egeesi goo maga niba see eligimo sileeso. Egeesi maga niyo tou tolone dobolone, odoo kitulugu mauwe pidimo silesibilame. Bei, Lodee Yesuye to egeese takaso, "Teneli biame omapoo goomoga toowa oso moloso, esino teli biame omapoo goomoga pepooko oso moloso," diso.

<sup>36</sup> Poloye to hagee takoloso koodobuloso dibolo ebiso miyomoo tugusaloso dobolone Godee mapoo takaso.

<sup>37-38</sup> Osoloso diba susuga pupisigaso. Bei, Poloye dimapoo taka, "Niba see a agalaime," deme. Osoloso hamamee Polo bolomaloso adameleso, diba yibolo du dali mapoo mousu.

## 21

### *Poloye Yelusalem mapoo di*

<sup>1</sup> Iba Miletus mi maga dilame du dali mapoo meilesa, du toowa mapoo tebisaloso, dila poogolone, Epeses sosee wiligi odoo dimapoo emegei di to takaso. Osoloso Kos mi te mapoo dalo soowaso. Omapoo tialoso biame hee mapoo see Lodes mi te mapoo dilesa peledoboloso, see abaga Patala mi mapoo diso.

<sup>2</sup> Iba Patala mapoo dilesa egeino, du toowa Ponesiya mapoo dilame molo egeiso. Esem eiba du omapoo daboogoloso diso.

<sup>3</sup> Osoloso iba Saiples mi te dobusu dokolo poogoloso, see Siliya mi Taya

mapoo diso. Bei, du toowa eyo kulodu bi ma mubiyodoo malame.

<sup>4</sup> Iba omapoo dilesos tei telaga odo abo ogoloso, dibolo biame 7 debeiso. Iba dibolo omapoo doboome, Dio Tei oso eligi maga diayo Polo mapoo Yelusalem mapoo na diye, dee takemeleeso.

<sup>5</sup> Esino iba Taya mi mapoo dobosos see dilame bei mooloogooso. Esemes tei telaga odoos susuga sobo sabolo, holaiso sabolo, iba du dali mapoo gilimado mousos. Osolosos omapoo iba hodobo ebisos miyomoo tugusalosos dobolone Godees mapoo takasos.

<sup>6</sup> Iba takolosos du ma kulodu tebisalosos dulone emegei di to takeme, diba sees dia mosos wedi diyadeesos.

<sup>7</sup> Iba Taya mi omagas sees Tolemais mi mapoo disos. Mi omapoo tei telaga odoos abo tugodolosos, dibolo biame hedebe badebeisos.

<sup>8</sup> Osolosos biames hees mapoo iba Tolemais mi poogolosos sees Kasaliya mapoo disos. Iba omapoo odoos to tekepo takeli Pilipiyo mosos mapoo dabalames disos. Pilipi yo daga odoos pidili dikonos odoos 7 hesia eyo kulodu hees yosos.

<sup>9</sup> Egeesos ma kulodu Pilipiyo owolos sobos obuos bakadio bakadio di, diba Godees magas to tolosos kokodos takomos silesibilis odoos debeisos.

<sup>10</sup> Biames abos omapoo doboomes, Godees magas to tolosos kokodos takomos silis odoos Agabus Yudiya magas simisos.

<sup>11</sup> Yayos sibilesos Polowos gudu tamagolosos sees eyo nediliyo o dees sabolos o homos sabolos tialogolosos egeesees takasos, “Dio Tei oso egeesees takosos, ‘Yelusalem mapoo debelis Yu odoos oso gudu sodu ti oso amas hageesos tialogolosos magolosos Yu odoonees mapoo tenelaisos,’ disos.”

<sup>12</sup> Ibolos osolosos omapoo debelis odoos abos sabolos goos hagees dulosos, Polos mapoo howolones egeesees takasos, “No Yelusalem mapoo na diyes,” dees takemeleesos.

<sup>13</sup> Esinos Poloyes imapoo egeesees takasos, “Bei kasi magas niyo pupusigas sabolos amapoo goohelis ka tonowalas? A Yelusalem mapoo tisos tialogolosos magalais

goos hedebe mapoo mopoodos deles. Esinos Yesuwos goos magas talais sabolos mopoodos doosos,” disos.

<sup>14</sup> Osolosos ees ma kulodu iba yayos Yelusalem mapoo dileis hamagas taka elis egeles. Esigas hagas na goolees dolosos egeesees takasos, “Hagees Lodeeyes goomogas goos dagas, goos hagosos peledabalais tekepos,” disos.

<sup>15</sup> Iba goos hagees koodobulosos, ibadais bis tolosos Yelusalem mapoo disos.

<sup>16</sup> Iba Yelusalem mapoo sibilesos peledobomes, tei telaga odoos abos osos ibolos iba Kasaliya magas sibadees odoos osos iba Nasoneeyos mosopos iyados disos. Yo Saiples mi te mapoo badelis. Osolosos yo dagas hoogos tei tolosos badebeisos.

<sup>17</sup> Iba Yelusalem mapoo dilesos peledobomes, tei telaga odoos osos iba ogolosos diya goomogasos.

<sup>18</sup> Osolosos omapoo tialosos biames hees mapoo Polobolos hodobo Yemes agalames disos. Esemes iba omapoo dilesos egeinos, sosees wiligis odoos susugas osos yibolos badobomes egeisos.

<sup>19</sup> Osolosos Poloyes diba ogolosos, dimapoo emegei di to takolosos, Godeeyes yimagas Yu odoonees mapoo goos toowa moodos susugas ees medees oposusos.

<sup>20</sup> Osolosos diayos goos hagees dulosos Godees mapoo diya goomogasos. Esemes diayos Polos mapoo egeesees takasos, “Emegeis, nayos mi hagees eges. Yu odoos susugas osos olo tei telagasos. Esinos diba sees Moseseeyes eligis goos ees dadalais onos goos toowas delisos.

<sup>21</sup> Osolosos odoos abosos dimapoo nees goos magas gamenees takolones egeesees takasos, ‘Poloyes Yu odoos mi abos mapoo debelis dimapoo takolones: Moseseeyes eligis goos sabolos, osolosos holaisos kolos koolais goos sabolos, osolosos Yu odoos ibadais adagas diayas goos abos sabolos na deedes, dees takomos silos,’ disos.

<sup>22</sup> Esigas goos diayos du hagees tei goonees dagas, iyos kasees moodoolaisomos? Bei, diayos no hamapoo peledabas dugas, namapoo kamanalaisos.

<sup>23</sup> Esiga no iyo goo takooga, no goo hagee medee te. Goo ee ma kulodu sosee eyo kulodu odoo bakadio bakadio di oso tou hee talame Godee mapoo to magooso.

<sup>24</sup> Esino diayo Godeeyo tou tomo silee biame oso koodobilei koola toobooso. Esiga no diayo tei moso mapoo wudu walame mopoodoo dalame duga, no dibolo diye. Osoloso diayo mopoodoo doo oso koodobuoga, niba susuga Mosese-eye eligi goo ee dodolone, Godee mapoo emegei di bi tenee. Esino nayo diayo emegei di bi tenee ee eyo nei molee tenee. Osoloso goo susuga hagee koodobuoga, diayo wudu walai tekepo. Esiga nayo goo hagee medee deedeega, Yu odoo susuga oso ogoloso, diayo no Moseseeye eligi goo ee dodomo silo dee gooleedalaiso. Osoloso diayo nee goo maga taka du ee tei goonee dee gooleedalaiso.

<sup>25</sup> Esino goo hagee Yu odoonee tei too odoo dibada goonee. Bei, iyo dimapoo to hogugu olo teneeso. Osoloso iyo to hogugu ee ma kulodu egeesee hoguguso, 'Niba gamenee godee mapoo nali bi tenee toloso na ne. Osoloso sawo na ne, osoloso hwei sawo sabolo mologa na ne, osoloso odoo hee mapoo goo heli na te,' diso."

<sup>26</sup> Osoloso biame hee mapoo Poloye odoo bakadio bakadio di gilimadoloso wudu walame mopoodoo dalai biame bei mooloogooso. Esem Poloye tei moso mapoo peleso wiligi odoo taba mapoo egeesee takaso, "Iba biame 7 ee ma kulodu mopoodoo koodobuloso, hamamee Godee mapoo emegei di bi tenelaiso," diso.

*Polo neliga moso mapoo todilame too*

<sup>27</sup> Osoloso biame 7 hagee koodobilei koola tooboome, Yu odoo abo Asiya mi maga sibadee odoo oso Polo tei moso kulodu badoboome egeiso. Osoloso diayo mosobia ee ma kulodu kamanali goo toowa poudoloso Polo tooso.

<sup>28</sup> Osoloso diayo toso agadigilone egeesee takaso, "Isalael odoo, niyo iba pidi! Odo hagoso mi susuga mapoo silone, Moseseeye eligi goo sabolo, Isalael odoowo goo sabolo, osoloso ibada tei moso

sabolo maga gamenee takeliso. Osoloso epei Guliki odoo ee ibada tei moso mapoo ido pala oso ibada tei moso Godeeyo howo woola tokenee paso," diso.

<sup>29</sup> (Yu odoo hagee bia oso Yu odoonee Epeses mapoo badeli, Tolopimus, Polo dio Yelusalem mapoo silee ogoloso, diayo goolee, Poloye yo dibada tei moso mapoo ido palabele dolone egeesee taka.)

<sup>30</sup> Osoloso Yelusalem odoo susuga oso diya komonolone, hodobo hoguo sibilesa Polo tei moso maga peegoo pupumo dilesa, tei moso osulu saga kisiso.

<sup>31-32</sup> Osoloso diayo Polo wooloomalame debeiso. Esino Loum ha teli wiligi odoo taba Yelusalem mapoo kamana goo ee duloso, ha teli odoo sabolo, osoloso dia gibadeli odoo sabolo gilimadoloso, odoo mooloogoodoo mapoo saga hoguga sibadeeso. Esem odoo Polo woomelee ha teli odoo oso sibadee ogoloso, omapoo koodobiaso.

<sup>33</sup> Osoloso ha teli wiligi odoo taba oso Polo toloso, o odoo oso ki ti bakadio oso tialeegee doloso, yayo Yu odoo mapoo egeesee takaso, "Odo hagee ogumo? Osoloso yo goo tokenee kasee toga ka woolaiyo?" diso.

<sup>34</sup> Osoloso odoo susuga oso goo opusomo opusomo di takolone to neligidi takaso. Egeeseelone ha teli wiligi odoo taba oso dia to medee tele. Esiga o odoo mapoo Polo toloso, Polo yo ha teli odoowo mosopoo ido di, diso.

<sup>35-36</sup> Ha teli odoo oso Polo dia moso mapoo todime, odoo abo oso hamamee sibulone, to neligidi egeesee takomo sibadeeso, "Yo wooloome! Yo wooloome!" diso. Osoloso Polo yo bo maga palame tobudume, ha teli odoo oso yo imado palaso. Bei, edebeeyo Polo wooloomalame diya alabume.

<sup>37-38</sup> Esino ha teli odoo oso Polo dia moso kulodu ido dilame doboome, Poloye ha teli wiligi odoo taba mapoo egeesee takaso, "Ayo namapoo to takalai tekepowa?" diso.

Ha teli wiligi odoo taba oso Poloye yimapoo Guliki toso taka duloso egeesee takaso, "No Guliki to kasee gooleedoowo? Ayo goolee, no Isipi odoo biame hee



hamamee hagoo ibada gamalee odoo sabolo ha tomo silone odoo wooloomali odoo 4,000 gilimadoloso miwe poogoo mapoo gilimadodi odoo oso beledee.”

<sup>39</sup> Esino Poloye egeesee takaso, “Odo egee anee. A Yu odoo Kilikiya mi toowa ee ma kulodu Talesas mi mapoo badeli. Mo mi hu toowa moloso. Esiga ayo odoo susuga hagee bia mapoo to takalai tekepowo?”

<sup>40</sup> Esem ha teli wiligi odoo taba oso Poloye to takalai soowa, dee takeme, yo toboloso bo mapoo tobudulone, odoo to koodobilame odoo mapoo dee wabisaso. Osoloso odoo susuga oso to koodobuloso doboome, yayo Hibulu toso dimapoo to takalai bei mooloogooso.

## 22

### *Poloye Yu odoo mapoo o goo taka*

<sup>1</sup> Poloye to takalai bei mooloogolone egeesee takaso, “Ma dio, ei dio, osoloso molo dio, niba ayo mawo pidi to takooga, medee dui!” diso.

<sup>2</sup> Osoloso Yu odoo Poloye dia Hibulu toso taka duloso, to koodobuloso medee dobolone dumeleeso.

<sup>3-4</sup> Poloye egeesee takaso, “A Yu odoo Kilikiya mi toowa ee ma kulodu Talesas mi mapoo soomagoo. Esino Yelusalem mi hamapoo badolone kauwudooso. Osoloso Gamaliyoye a eligime, ayo ibada amawe diayo tei magoo medee gooleedooso. Esino epei niyo goolee Godeeyo tou bele dolone, komonolone a wooloomalame ka seeso. Osoloso daga a see goo ee Godeeyo tou bele dolone, ayo kitulugu toowa magolone, Yesu mapoo tei telaga odoo wooloomalame dimapoo dala toowa teneliso. Osoloso ayo giso sabolo, sobo sabolo, toloso neliga moso ma kulodu huyaseliso.

<sup>5</sup> Osoloso tei moso wiligi odoo taba sabolo, Yu odoowo wiligi odoo tebisa sabolo, oso mo goo hagee diba gooleedooso. Bei, diayo tei telaga odoo Damasko mapoo debeli toloso neliga moso mapoo toosoolame, amapoo to hogugu tenelone egeesee takaso, ‘Niba dileso Damasko wiligi odoo tebisa mapoo to hogugu tenelone,

tei telaga odoo toloso Yelusalem mapoo iyado sibadee, diba dala toowa talame,’ diso.

<sup>6</sup> Ayo egeeseemo silone, biame heeso Damasko mi mapoo tei telaga odoo talame diso. Domo mapoo osoko oo domo mapoo Damasko mi koola mapoo dimeleeno, kei ma dokodooga gadeebugu sibilesa a tooso.

<sup>7</sup> Esem a mi mapoo homodobuloso tiamolome, toso egeesee takeme duso, ‘Solo, Solo, nayo kasi maga amapoo dala ka tonowala?’ diso.

<sup>8</sup> Esem ayo nei yimapoo egeesee takaso, ‘Wiligi odoo, no ogumo?’ Yayo nei egeesee takaso, ‘A Nasalet odoo, Yesu. Nayo tei telaga odoo dimapoo dala egee tenemolo ee nayo amapoo tenemoloso,’ diso.

<sup>9</sup> Ee ma kulodu odoo abolo diyadee diba gadeebugu egeiso, esino to yayo taka medee dule.

<sup>10</sup> Esem ayo egeesee takaso, ‘Lodee, ayo ogoo goo talaisomo?’ diso.

Esem Lodeeye amapoo nei egeesee taka, ‘No toboloso Damasko mi mapoo di. Mi omapoo ayo goomoga goo nayo talai ee takalaiso,’ diso.

<sup>11</sup> Esino gadeebugu oso mo howo sime, odoo abolo diyadee oso Damasko mi mapoo dulone, mo dee mapoo toloso ido diso.

<sup>12</sup> A Damasko mapoo dileso peledo-boome, odoo hee Ananayaseeye a agala simiso. Yo Moseseeye eligi goo ee medee dodomo sili odoo. Osoloso Yu odoo Damasko mi omapoo debeli oso yo tekepo odoo, dee takeliso.

<sup>13</sup> Osoloso yayo sibilesa ama koola hapoosee tobudulone egeesee takaso, ‘Solo, emegei, no see tobu ege!’ diso. Esem epedee omapoo mo howo see tekepo poome, ayo yo egeiso.

<sup>14</sup> Esem yayo amapoo egeesee takaso, ‘Ibada amawe dia Godeeye goomoga goo ee gooleedalame, yayo no olo hesiaso. Osoloso nayo odoo tekepo Keliso ogoloso o to medee dulame.

<sup>15</sup> Esiga nayo o goo ee odoo susuga mapoo nayo du sabolo, osoloso nayo egei sabolo, yiligamo sileiso.

<sup>16</sup> Esiga no ogo bamalala? No saga toboloso howo olugi. Osoloso Yesu mapoo takee, yayo nee tokenee hapoloso boobado bigilame,' diso.

<sup>17</sup> Hamamee a Yelusalem mapoo wedi dileso tei moso mapoo Godee mapoo takomolome, Lodeeye mo howo opusomo diso.

<sup>18</sup> Mo howo opusomo deme, Lodeeye amapoo to takomolome egeiso. Egeeseelone yayo amapoo egeese takaso, 'No saga toboloso Yelusalem poogoo di! Bei, odo hamapoo egee do oso, nayo mo goo takemelee duloso, tei talai megona,' diso.

<sup>19</sup> Esino ayo Lodee mapoo nei egeese takaso, 'Odo susuga, diba gooleedooso, ayo howo gisili moso susuga mapoo silone, tei telaga odo toloso neliga moso kulodu tooseli, osoloso diba wooloogali goo ee.

<sup>20</sup> Osoloso diba gooleedooso, nee tou teli odo, Sitiben, woolooma biame mapoo a badebeiso. A dibolo goo goolee hedebe diso. Osoloso dibada kekeisu dugo tigadoo ayo bameleeso.'

<sup>21</sup> Esino Lodeeye amapoo egeese taka, 'No epedee di. Bei, no ayo mi hamaga eli sage Yu odoonee oso debeli mi mapoo diye dalaiso,' diso."

<sup>22</sup> Osoloso Polo daga o to bei mooloogoloso takomo silee domo mapoo odo mooloogoodoo oso o to medee dulone debeiso. Esino see yayo Yu odoonee eyo goo takomolome, diayo duloso komonolone to neligidi egeese takaso, "Wooloome! Wooloome! Yo mipoo hamapoo badalai tekeponee!"

<sup>23</sup> Egeeseelone diayo to neligidi takolone, kamana goo eligilone, dia kekeisu dugo tigadoloso mogoukee deeso keese doloso dokodoo togobuguso.

<sup>24</sup> Esem ha teli wiligi odo taba oso Polo dibada mosopoo ido dileso woosolone, yo ka woolame o odo mapoo takaso. Bei, odo mooloogoodoo oso Polo mapoo komonolone, to neligidi taka goo eyo bei Poloye yimapoo takalame yo goomogaso.

<sup>25</sup> Osoloso ha teli odo oso Polo woolame, ki tiso o dee homo mapoo tialogo molome, Poloye ha teli odo ee

gibadeli hee koola mapoo tobudume, yimapoo egeese takaso, "Esiga nibada tei magoo oso takolone, niyo tei Loum odo goo mauwe mosoowe weeye, dee taka molosomo? Haye! Mauwe. Bei, niyo mo goo medee midile," diso.

<sup>26</sup> Esem ha teli odo ee gibadeli oso to hagee duloso, dileso o wiligi odo mapoo egeese takaso, "Nayo goo tomo silee gooleedooso? Bei, odo hagee tei Loum mi mapoo badeli. Esiga ibada teiso egeese takooso, 'Loum mi mapoo badeli odo ee mosoowe goo mauwe woolai tei,' deliso, diso."

<sup>27</sup> Esem dibada wiligi odo taba yo dio dulone, yayo Polo mapoo dileso egeese takaso, "Nayo amapoo takee, no tei Loum odoowo?"

Poloye nei egeese takaso, "O, a tei Loum odo," diso.

<sup>28</sup> Egeeseeme ha teli wiligi odo taba oso nei yimapoo egeese takaso, "A tei Loum odo dalame, nei molee toowa magooso."

Esino Poloye yimapoo egeese takaso, "A tei Loum odo dalame nei molee toowa ka magele. Bei, a soomagoo biame mapoo a tei Loum odo paso," diso.

<sup>29</sup> Esem ha teli odo oso Polo woolame dobolone, to hagee duloso peegoo diyadeeso. Osoloso dibada wiligi odo sabolo diya ebigaso. Bei, diayo tei Loum odo ki tiso tialogoloso woolame seme.

### *Polo o goo midilame Yu odo oso to mou mapoo ido pala*

<sup>30</sup> Osoloso biame hee mapoo ha teli wiligi odo taba oso Polowo goo medee gooleedalame, tei moso wiligi odo tebisa sabolo, osoloso Yu odoowo wiligi odo tebisa sabolo, to meilame gilimaso. Osoloso diayo Polo ki tiso tialogoo puobuguloso, odo mooloogoodoo dia mudugiyopoo tebidiso.

## 23

<sup>1</sup> Osoloso Poloye wiligi odo tebisa oso mooloogoodoo mapoo bolone egeese takaso, "Emegei, ayo badebei biame susuga mapoo, a Godeeyo howo woola silone, mo sooloo ma kuloduga goo goolee

oso goolee ayo tomo sili goo ee tekepo gooleeso,” diso.

<sup>2</sup> Esemе tei moso wiligi odoо taba Ananayaseeye to hagee dulosо, odoо abo Polo koola ogolone debei dimapoo egeesee takaso, “Polo maga mapoo wee!” diso. Esemе odoо heeso Polo maga mapoo weiso.

<sup>3</sup> Esino Poloye Ananayas mapoo egeesee takaso, “Nayo a wei eyo nei Godeeye no woolaiso. Esiga no goo goolee bakadio gweli odoо. Bei, nayo Moseseeye tei magoo sabolo mo goo midiliso. Esino epedee nayo a wei oso no tei magoo gababiaso,” diso.

<sup>4</sup> Esemе Poloye tei moso wiligi odoо taba mapoo egeesee takeme, odoо Polo koola ogolone tebisa melee oso nei egeesee takaso, “Nayo Godeeyo tei moso wiligi odoо taba mapoo to egeesee na takee!” diso.

<sup>5</sup> Poloye nei egeesee takaso, “Emegei, odoо hagee tei moso wiligi odoо tobagodi, a gooleedele. Godeeyo to booka mapoo hogugu hagoso, ‘Nibada odoowo wiligi odoо taba mapoo to tokenee na takee,’ diso.”

<sup>6</sup> Osoloso mooloogoodoo ee ma kulodu Poloye Sedisi odoо abo sabolo, osoloso Pelisi odoо abo sabolo egeiso. Esemе yayo to neligidi egeesee takaso, “Emegei, a Pelisi odoо, osoloso mo ma nosee Pelisi odoо. Esino ayo odoо wedia maga hogogabilei goo mapoo tei teme, goo midili mapoo todilesо hagee badoso,” diso.

<sup>7</sup> Esemе Poloye egeesee takeme, mooloogoodoo abo puloso toso agadigasо.

<sup>8</sup> Bei, Sedisi odoо diba tolosо hogabilei goo mapoo tei koo teli. Osoloso diayo tei tolone, Godeeyo momaiye sabolo dio sabolo mauwe, dee takeliso. Esino Pelisi odoо susuga goo hamapoo tei teliso.

<sup>9</sup> Esemе ee ma kulodu wiligi odoо oso mooloogoodoo abo puloso toso diya agadigasо. Osoloso Godeeye tei magoo ee eligili odoо abo Pelisi odoо dia mooloogoodoo ee ma kulodu badeli oso toboloso kitulugu sabolo egeesee takaso, “Iba odoо hamapoo goo tokenee koo ogo. Iba

gooleedele, dioso o, Godeeyo momaiye oso yimapoo to taka molodoo,” diso.

<sup>10</sup> Esemе toso agadiga toowa deme, Pelisi odoо sabolo Sedisi odoо sabolo abo puloso, biliga toowa bei mooloogooso. Osoloso ha teli wiligi odoо taba oso o odoо mapoo Polo wooloomeyaga, dibada mosopoo ido diye diso.

<sup>11</sup> Osoloso gesi mapoo Lodee sibilesо, Polo koola ogolone tobudulone egeesee takaso, “No haga na ebi! Nayo Yelusalem mapoo mo goo taka egeesi masi Loum mapoo mo goo takalaiso,” diso.

### *Yu odooso Polo wooloomalame to magoo*

<sup>12</sup> Osoloso gesikolo Yu odoо aboso Polo wooloomalame to kitulugu magolone egeesee takaso, “Iyo Polo woolomelega dogа, nei sabolo howo sabolo nalaimе. Esino iyo yo wooloomaloso, nei sabolo howo sabolo ka nalai,” diso.

<sup>13</sup> Mooloogoodoo ee ma kulodu, Yu odoо 40 egeesi masi oso to egee ka magoo.

<sup>14</sup> Osoloso diayo dilesо tei moso wiligi odoо tebisa sabolo, Yu odoowo wiligi odoо tebisa sabolo, dimapoo egeesee takaso, “Iyo Polo wooloomalame to kitulugu olo magooso. Esiga iba nei sabolo howo sabolo nelega dosо. Osoloso Polo wooloomaloso hamamee nei sabolo howo sabolo ka nalai.

<sup>15</sup> Esiga niyo ha teli wiligi odoо taba mapoo to hagee todilei, iba goomogoso. Niyo yimapoo egeesee takee, ‘Nayo Polo tolosо hamapoo ido sibe, iyo yimapoo woosalaiya,’ diso. Esino iba eli domopoo bamelesо Polo siboga, yo wooloomalaiso,” diso.

<sup>16</sup> Esino Polo o besiga oso to hagee dulosо, ha teli odoowo mosо mapoo dilesо, Polo ogoloso yo wooloomalame to magoo yimapoo takaso.

<sup>17</sup> Osoloso Poloye ha teli odoо gibadeli gilimadoloso yimapoo egeesee takaso, “Mo besiga hagoso nibada wiligi odoо taba mapoo to toodagalame simina, esiga yimapoo ido di,” diso.

<sup>18</sup> Esemе ha teli gibadeli odoо oso Polowo besiga ido dilesо, o wiligi odoо

mapoo egeesee takaso, “Neliga moso ma kulodu badeli Poloye a idoloso o besiga hagee namapoo ido sibena. Bei, yayo namapoo to toodagala simigona,” diso.

<sup>19</sup> Osoloso wiligi odoo taba oso Polowo besiga dee mapoo toloso, obusomo peegoo ido dileso dobolone, yimapoo egeesee takaso, “Nayo amapoo ogo goo takalame ka simiyo?” diso.

<sup>20</sup> Esem Polo besigaye nei egeesee takaso, “Yu odoo abo diba goomogogona, godigi dibada wiligi odoo tebisa oso to mou mapoo nayo Polo ido dilame. Osoloso omapoo diayo Polo mapoo see woosalai doloso gamenee takalaiso.

<sup>21</sup> Esino no dia to mapoo tei dee na see! Egeeseelone, no Polo omapoo na ido di. Bei, odoo bei, 40 egeesi eli domopoo yo wooloomalame dabalaiso. Esiga odoo hagee bia to kitulugu magoloso Polo wooloomalame nei sabolo howo sabolo nalai teyuloso doso. Esiga diba olo mopoodoo doloso nayo to nei taka dulame doso,” diso.

<sup>22</sup> Osoloso wiligi odoo taba oso Polowo besiga diye dolone, yimapoo egeesee takaso, “Nayo dileso odoo mapoo takolone, nayo amapoo taka goo ee ayo takago, dee na takee,” diso.

### *Polo Kasaliya mapoo todi*

<sup>23-24</sup> Osoloso ha teli wiligi odoo taba oso ha teli odoo gibadeli bakadio gilimadoloso dimapoo egeesee takaso, “Niba epedee Polo Kasaliya mapoo ido di. Omapoo dulone, odoo 200 kaiya talaga sabolo, osoloso odoo 200 tio talaga sabolo, osoloso odoo 70 be hosee maga dilei toloso, Kasaliya mapoo dilame mopoodee. Niba egeesee mopoodoo doloso, epei gesi odoo susuga tiesaga, Kasaliya mapoo ka dilei. Niyo egeeseelone, Polo mapoo be hosee hee yimapoo tenee, yo gamalee odoo Peliks mapoo medee ido dileso peledabalame,” diso.

<sup>25</sup> Egeeseelone yayo gamalee odoo Peliks mapoo to hageesee hoguguso:

<sup>26</sup> Emegi, gamalee odoo Peliks hu toowa too, a Kolodiyas-Lusiyas,

<sup>27</sup> Yu odoo oso odoo hagee toloso wooloomalame seeso. Esino yo tei Loum odoogo di duloso, ayo mo odoo sabolo yo toloso mada peegoo ido diso.

<sup>28</sup> Osoloso ayo o goo dulame, Yu odoowo wiligi odoo tebisa diayo to mou mapoo ido diso.

<sup>29</sup> Yu odoo oso taka Poloye dibada tei magoo gababiaso, diso. Esino yayo Loum odoowo tei toowa magoo gababile. Esiga yo wooloomalai o, neliga moso ma kulodu husilei yimapoo goo hee mauwe.

<sup>30</sup> Esino Yu odoo abo oso Polo wooloomalame mopoodoo doo duloso, yo namapoo ido diye, diso. Osoloso ayo Yu odoo abo sabolo namapoo diye diso, diayo yo gowe goo ee takalame. Mo to oso.

<sup>31</sup> Osoloso gesi ha teli odoo oso dia wiligi odoowo to duloso, Polo Kasaliya mi mapoo ido dulone, eli domopoo Antipatilis mi mapoo sibilesi peledabaso.

<sup>32</sup> Biame hee mapoo be hosee maga dili odoo oso Polo Kasaliya mi mapoo ido dumolome, ha teli odoo abo Yelusalem mapoo wedi diyadeeso.

<sup>33</sup> Odo be hosee maga dili oso Kasaliya mapoo sibilesi peledoboloso, gamalee odoo Peliks mapoo dia wiligi odoo taba oso to hogugu teneeso. Osoloso Polo yimapoo teneeso.

<sup>34-35</sup> Esem gamalee odoo oso to hogugu hagee hesigaloso, Polo mapoo egeesee takaso, “No mi kamapoo badeliyo?” Esino Poloye yimapoo egeesee takaso, “A Kiliya mi toowa mapoo badeli,” dee takeme, yayo nei egeesee takaso, “Odo namapoo kamanali hamapoo peledobooga, ayo nee goo midileiso,” diso. Esem yayo o odoo mapoo Polo Helodeeye moso toowa tegei mapoo ido dileso, medee bamelee, diso.

## 24

### *Yu odooso Polowo goo ee Peliksiyo howo woola taka*

<sup>1</sup> Biame dee tiadoo poogoloso hamamee, tei moso wiligi odoo taba Ananayas sabolo, osoloso Yu odoowo wiligi odoo



tebisa abo sabolo, Kasaliya mapoo gamalee odoo Peliksiyo howo woola Polowo goo midilame sibadeeso. Diayo sibulone, goo midilei mapoo Polowo goo takalame, odoo hee Loumowo tei magoo gooleedoo odoo Teletulus ido simiso.

<sup>2</sup> Osoloso diayo goo midili moso mapoo polomologa, Peliksiye Polo hamapoo sibeye, diso. Esemé Poloye goo midili moso mapoo sibilesó badoboome, Teletuluseeye Polowo goo takalame bei mooloogolone egeesee takaso, “Peliks, no ibada wiligi odoo hu toowa too. Bei, nayo ibada mi toowa bamologa, mesie ka doso. Osoloso goo tokenee susuga ee nayo pidi maga medee tekepo moodeliso.

<sup>3</sup> Esiga iyo goo susuga ogoloso, namapoo emegei di sabolo goomoga to sabolo ka takooso.

<sup>4</sup> Esiga iyo namapoo hegi goo teneeyaga biame sage nobolo to kalai koo goomogo. Esino ayo namapoo howolone ka taka, no wulo biame deiyepo mapoo to hagee dui,” diso.

<sup>5</sup> Osoloso Teletuluseeye egeesee takaso, “Odoó hagee tokenee goo eligimo sili. Bei, yayo mi toowa susuga mapoo goo eligimo sili maga Yu odoo oso kamanaliso. Osoloso yinosee Nasalet odoo Yesu dedeli dia wiligi odoo taba.

<sup>6</sup> Osoloso yayo goo hee moodooso. Esino yayo ibada tei moso Godeeyo howo woola tokenee palame seme, iyo yo tooso. [Osoloso iyo ibada teiso o goo midilame goomogaso.

<sup>7</sup> Esino ha teli wiligi odoo taba, Lusiyaseeye kitulugu sabolo sibilesó Polo imaga ido diso.

<sup>8</sup> Osoloso Lusiyaseeye Peliks namapoo sibilesó Polowo goo midiye doloso imapoo egeesee takaso.]\* Esiga no nosee Polo mapoo woosalo ogoga, to nei yayo taka duloso, nayo tei goo iyo Polowo goo taka duloso gooleedalaiso,” diso.

<sup>9</sup> Osoloso Yu odoo abo Teletulusbolo sibadee oso Peliks mapoo takolone egeesee takaso, “O, Teletuluseeye egee takoo tei takoo,” diso.

### *Goo midi mapoo Poloye o goo eyo nediliyo taka*

<sup>10</sup> Osoloso gamalee odoo oso Polo no to takee neme, nei Poloye egeesee takaso, “Peliks, a gooleedooso, no dugo susuga ee ma kulodu ibada mi hamapoo badolone goo midiliso. Esiga ayo to nei namapoo takalai, a goomogo.

<sup>11</sup> Nayo medee dui. Nayo goo hagee odoo abo mapoo takooga, diayo namapoo goo hedebe hagonosee takalaiso. Goo ee ayo Godeeyo hu poudalame, Yelusalem mapoo di biame 12 poogoloso ka badoso.

<sup>12</sup> Esiga a Yelusalem mapoo badolone, Yu odoowo tei moso mapoo odoo hee sabolo koo agadigeli. Osoloso howo gisili moso ma kulodu, osoloso Yelusalem mi mapoo silone, odoo kamanalame koo moodeli.

<sup>13</sup> Esiga Yu odoo hamapoo egee do oso mo goo namapoo to opusomo opusomo di taka goo susuga ee tei goonee.

<sup>14</sup> Esino diayo taka eyo kulodu, goo heeno tei goo. Ee, ibada amawe dia Godeeyo hu poudalame, ayo Yesu mapoo tei teliso. Esino Yu odooso takeliso, Yesuwo goo eligi sabolo diayo eligi sabolo hedebeenee. Esino a Moseseeye eligi goo sabolo, osoloso Godee maga to toloso kokodo takomo silesibili odoo oso to hogugu mapoo tei teliso.

<sup>15</sup> Esiga Godeeye tekepo odoo sabolo tokenee odoo sabolo ta maga see hogabidilei goo mapoo Yu odooso tei toloso egee do, goo hedebe mapoo anosee tei teliso.

<sup>16</sup> Esiga goo hageesi maga, a Godeeyo howo woola osoloso odoo howo woola goo tekepo talai goomegeliso.

<sup>17</sup> A Yelusalem poogoo dileso mi abo mapoo silone dugo abo poogooso. Omapoo siloso, see Yelusalem mapoo wedi simiso, bi mauwe odoo mapoo emegei di bi molee tenelame, osoloso Godee mapoo emegei di bi tenelame.

<sup>18-19</sup> Esino a tei moso mapoo badolone, Godee mapoo emegei di bi tenelai ee mopoodoo dolone badebeiso. Omapoo badolone, odoo susuga badele, osoloso

**24:5:** Diye 17:6    **24:6:** Diye 21:28-30    \* **24:8:** To hagee odoo aboso taka, Lukaye hogugu, deliso. Esino odoo aboso taka, Lukaye hogugule, odoo heeso hamamee hoguguna, dee takeli.    **24:15:** Yon 5:28-29    **24:18-19:** Diye 21:17-28

kemenele. Osoloso ee ma kulodu Yu odoo oso sibilesa a egeiso. Esino dima kulodu, Asiya mi maga sibadee Yu odoo oso mo goo maga diya kamaso. Esiga bei kasi maga odoo hagee bia hamapoo mauwe ka dosomo? Odo hagee bia oso sibilesa mo goo namapoo takalai tekepo.

<sup>20</sup> Esino odoo egee bia hamapoo mauwe. Esiga Peliks, nayo Yu odoo hagee do mapoo woosalai tekepo, diayo a Yelusalem mapoo dibada wiligi odoo tebisa oso to mou mapoo ido peleso dogo, mo goo tokenee edebeeyo egei ee takalai tekepo.

<sup>21</sup> Esino ayo goo hedebe hagee diayo to mou ma kulodu to kitulugu sabolo egeese taka, 'Esino niyo wedia maga see hogogabilei mapoo tei teme goo ka midiso,' diso."

<sup>22</sup> Esino Peliks yo Lodeeyo goo ee olo duloso badebeiso. Osoloso odoo mooloogoodoo mapoo egeese takaso, "Iba Polowo goo midilei epedee hamapoo koodobileiso. Esiga see ha teli wiligi odoo taba Lusiyas siboga, Polowo goo see midileiso," diso.

<sup>23</sup> Osoloso Peliksiye ha teli gibadeli odoo hee mapoo egeese takaso, "Niba Polo medee bolone, yimapoo hegi goo hee na tenee. Osoloso emegei odoo heeso yo pidilei na hamaga takee," diso.

<sup>24</sup> Osoloso biame abo poogoloso, Peliksiye osobo Dulusila dio Polo agalame sibadeeso. Peliksiyo osobo Dulusila ee Yu sobo. Osoloso diayo sibilesa egeese takaso, "Polo yo hamapoo ido sibe," diso. Esem Poloye sibilesa Yesu Keliso mapoo tei talai goo ee takomolome, Peliksiye medee dumeleeso.

<sup>25</sup> Yayo dulone badolone, Poloye yimapoo tekepo badalai goo sabolo, osoloso tokenee goo teyaga su kookoodalai goo sabolo, osoloso Godeeye biame hamameede mapoo goo midilei goo sabolo takaso. Esem Peliksiye to hagee duloso obulone, yimapoo egeese takaso, "Oso, omapoo koodobie! Amapoo biame hee mologa, no see sibe dalaiso," diso.

<sup>26</sup> Egeesi ma kulodu Peliksiye mada egeese gweliso, "Poloye amapoo molee teneega, molee oso ayo nei Polo ee neliga

moso ma kuloduga peegoo ido dileiso," diso. Yayo egeese goolone badolone, biame abo mapoo Polo sabolo to kalame yo iliso.

<sup>27</sup> Esino dugo bakadio poogoloso hamamee Peliksiye o gamalee tou teli maga peegoo dime, see odoo heeso badebeiso, o hu Posiyus-Pestus. Esino Yu odoo oso goomogalame, Peliks o tou teli maga peegoo dilega badolone, yayo Polo neliga moso mapoo osee badebee, diso.

## 25

### *Polo o goo Sisaye midilame taka*

<sup>1</sup> Pestuseeye gamalee hu toloso biame bakadio hedebe di poogoloso, see Kasaliya mi maga Yelusalem mapoo simiso.

<sup>2-3</sup> Yayo omapoo simi biame mapoo, tei moso wiligi odoo tebisa sabolo, osoloso Yu odoowo wiligi odoo tebisa abo sibilesa yimapoo Polowo goo egeese takaso, "Polo yo goo tokenee tooso. Esiga no iyo goomoga goo ee moodee. Egeeseelone Polo see Yelusalem mapoo ido sibeye, dee takee," diso. Bei, diba Polo Yelusalem mapoo sibumologa, mada eli domopoo wooloomalame goomogaso.

<sup>4</sup> Esino Pestuseeye egeese takaso, "Haye, Polo yo Kasaliya omapoo osee badalaiso. Yelusalem mapoo ido sibileime. Esino a biame abo poogoloso hamamee see Kasaliya mapoo wedi dileiso.

<sup>5</sup> Esiga nibada wiligi odoo tebisa see abolo dilei tekepo, diayo tei Poloye goo tokenee too egei omapoo takalame," diso.

<sup>6</sup> Pestus biame 10 egeesi Yelusalem mapoo poogoloso, see Kasaliya mapoo wedi diso. Yo Kasaliya mapoo dileso, tialoso biame hee mapoo goo midili moso mapoo peleso, yayo badeli debi mapoo badolone, Polo yo sibeye doloso odoo abo mapoo to teneeso.

<sup>7</sup> Esem edebeeyo Polo yo goo midili moso mapoo ido polome, Yelusalem maga sibadee Yu odoowo wiligi odoo tebisa oso Polo tobudume, pee maga tebisaloso silodoboloso, Polowo goo mapoo to opusomo opusomo di takolone, Polo yo diya

tokenee odoo dee takaga meleeso. Esino diayo to opusomo opusomo di taka ma kulodu, Pestuseeye tei goo egele.

<sup>8</sup> Esem Poloye eyo nediliyo pidilei to takolone egeesee takaso, “A Yu odoowo tei hee gababile. Osoloso ayo ibada tei moso eyo hu mapoo tokenee goo takele. Osoloso Loum mi toowa wiligi odoo taba Sisayo goo mapoo tokenee goo takele,” diso.

<sup>9</sup> Esino Yu odoo oso goomogalame, Pestuseeye Polo mapoo egeesee takaso, “Iba susuga oso Yelusalem mapoo dileso nee goo omapoo midilei tekepowa?” diso.

<sup>10</sup> Esem Poloye nei egeesee takaso, “A Yelusalem mapoo dileime. Bei, a Loum odoowo goo midili moso mapoo olo badoso. Esiga hamapoo mo goo midilei tekepo. Esino Pestus, no olo gooleedooso, ayo Yu odoo mapoo tokenee goo hee moodele.

<sup>11</sup> Egeesi ma kulodu ayo goo tokenee too diepi, tei ee dodolone, a talai tekepo. Esino Yu odoo oso mo goo wulo gamenee taka maga, odoo heeso a Yu odoowo dee mapoo tenelai tekeponee. Esiga a Loum mi wiligi odoo taba Sisaye mo goo midilei goomogo!” diso.

<sup>12</sup> Esem Pestuseeye yimapoo kokodo takeli odoo sabolo goo hamapoo to mouloso, Polo mapoo egeesee takaso, “No Sisaye nee goo midilei goomoga magooga, no Sisa mapoo ido dileiso,” diso.

### *Pestuseeye Agilipa mapoo Polowo goo taka*

<sup>13</sup> Biame abo poogoloso hamamee Yu odoowo wiligi odoo taba Agilipaye omolo sobo holo, Benis sabolo Pestus mapoo emegei di to takalame Kasaliya mapoo sibadeeso.

<sup>14</sup> Osoloso biame bei diba Pestus sabolo omapoo debeiso. Osoloso omapoo osee doboome, Pestuseeye Polowo goo ee Agilipa mapoo oposususo. Yayo oposusulone egeesee takaso, “Odo hee, Polo ee Peliksiye neliga moso mapoo tooso osee badoso.

<sup>15</sup> Esino a Yelusalem mapoo dileso pele-doboome, Yu odoowo tei moso wiligi odoo tebisa sabolo, osoloso wiligi odoo tebisa

abo sabolo, sibilesa amapoo Polowo goo egeesee taka, ‘Polo ee tokenee odoo, esiga yo wooloome,’ diso.

<sup>16</sup> Esino ayo dimapoo egeesee takaso, ‘Loum odoo iyo odoo hee goo mauwe koo wooloomali. Esino iba Loum odoo oso goo midili ee egeesi. Odo hee ee goo midi mapoo yimapoo goweli odoo oso o goo takoloso koodobuoga, nei odoo o goo eyo nediliyo takeliso. Osoloso hamamee goo midili odoo oso yimapoo goo tokenee melee ogoga, yo wooloome, dee takeliso,’ diso.

<sup>17</sup> Esiga Yelusalem wiligi odoo tebisa abo abolo hodobo hamapoo ka simi. Biame omapoo mo goo midilei booloogele. Esino a sibilesa, tialoso biame hee mapoo goo midili moso mapoo peleso badolone, Polo yo hamapoo ido sibeye, diso.

<sup>18-19</sup> Ee ma kulodu ayo goolee, Polo yo tokenee goo toowa toobele, diso. Esino Yu odoo oso gamenee dibada howo gisili tei goo sabolo, osoloso odoo hee Yesu, diayo olo taso deli, see Poloye odoo ee see gie badoso, dee taka goo omapoo toso agadigaloso o goo midilame ido pala egeiso.

<sup>20</sup> Esino a goo hagee medee gooleedel-ega badolone, Polo mapoo egeesee woosaso, ‘No Yelusalem mapoo dileso nee goo midilei soowayo?’ diso.

<sup>21</sup> Esino yo Yelusalem mapoo dilei goomegele. Esem yo Sisaye o goo midilame goomogaso. Esiga yo wulo epedee hamapoo badaliso. Osoloso ayo biame tekepo ogoga, yo Sisa mapoo o goo midilame ido diye dalaiso,” diso.

<sup>22</sup> Esem Agilipaye Pestus mapoo egeesee takaso, “A odoo hagoso taka goo mawo duleiyasa,” diso.

Esem Pestuseeye yimapoo egeesee takaso, “No godigi yayo takooga duleiso,” diso.

### *Polo yo Agilipa dio Benis dio mapoo ido simi*

<sup>23</sup> Osoloso biame hee mapoo Agilipa dio, Benis dio, hu toowa too odoo masi, dugo medee tekepo kalagaloso, goo midili moso mapoo paladeeso. Diba goo midili moso

mapoo galaga dulone, ha teli odoowo wiligi odo tebisa sabolo, osoloso Kasaliya mi wiligi odo tebisa sabolo galaga diso. Osoloso diba susuga goo midili moso mapoo mooloogoodoloso doboome, Pestuseeye Polo ido sibe, diso.

<sup>24</sup> Esem Poloye goo midili moso mapoo sibilesa tobudume, Pestuseeye egeesee takaso, “Wiligi odo taba Agilipa nobolo, osoloso odo susuga sabolo, odo hagee ege! Yu odo hamapoo ege do sabolo, osoloso Yu odo Yelusalem mapoo debeli sabolo, oso odo hamapoo diya gowoolone, amapoo to neligidi takolone, yo wooloomalai tekepo, dee takeliso.

<sup>25</sup> Esino ayo yo teli mapoo magalai o goo tokenee hee mauwena. Esino yo eyo goomoga oso Sisaye o goo midi diga, ayo yo Sisa mapoo ido di, diso.

<sup>26</sup> Esino goo hamapoo ayo ibada wiligi odo taba Sisa mapoo Polowo goo maga to hoguguloso tenelai to mauwe. Esiga ayo yo nibada howo woola mapoo ka ido simi. Esiga Agilipa nayo yimapoo woose. Egeeseega to yayo nei taka ee ayo hoguguloso Sisa mapoo ka tenelaiya.

<sup>27</sup> Bei, neliga ma kulodu badeli odo oso moodoo goo ee hogugule mosoowe sabolo Loum wiligi odo taba Sisa mapoo diye dalai tekeponee,” diso.

## 26

*Poloye wiligi odo taba Agilipayo howo woola mapoo o goo taka*

<sup>1</sup> Agilipaye Polo mapoo egeesee takaso, “Ayo epedee no nediliyo pidi to takalame namapoo biame teneeso.”

Esem Poloye dee dokodoo poudoloso, to takalai bei mooloogoolone egeesee takaso,

<sup>2</sup> “Wiligi taba Agilipa, a epei Yu odooso mo goo mapoo goo opusomo opusomo di taka mapoo nei ayo mawo a pidi to namapoo takalai goomogo.

<sup>3</sup> Bei, no Yu odo ibada adaga dia goo susuga sabolo, osoloso ima kulodu to agadigeli goo sabolo no gooleedooso. Esiga ayo namapoo howaso, mo to hagee takoo medee dui.

<sup>4</sup> Egeesi ma kulodu, Yu odo susuga oso ayo daga Yu odo sabolo Yelusalem mapoo badebei goo ee, diba olo gooleedooso.

<sup>5</sup> Esiga Yelusalem odo susuga oso mo goo diba gooleedooso. Esiga diayo namapoo mo goo takalai dee takooga, diayo ayo Pelisi odo toboloso badebei goo ee takalaise. Egeesee mapoo Yu odo ma kulodu Pelisi odo oso Moseseeye eligi goo hogugu medee dedeliso.

<sup>6</sup> Esino Godeeye mawe dimapoo to takoloso magoo mapoo ayo tei teme, a epedee goo midi mapoo ka badoso.

<sup>7</sup> Osoloso ibada Yu odo bala 12 susuga oso biame susuga Godeeyo hu poudoolone dobolone, diba to magoo hedebe ee bamoloso. Esiga mo wiligi odo taba Agilipa, abolo epedee to magoo hedebe omapoo tei teme, Yu odo oso a wooloomalame goomogoso.

<sup>8</sup> Egeesi ma kulodu, Yu odo niba bei kasi maga Godeeye wedia odo ee see hogogabileiso dee taka goo mapoo tei telaga ka pegeliyo?

<sup>9</sup> Esiga a niyo egee gooloomolo egeesi masi goolone, ayo Yesu Nasalet odo mapoo tei telaga odo mapoo heiga toowa molone, ayo dimapoo dala tenelame goomogo meleeso.

<sup>10</sup> Egeeseelone tei moso wiligi odo tebisa oso amapoo kitulugu teneme, ayo Godee o odo esialoso toloso neliga moso ma kulodu tooseliso. Osoloso tei telaga odo abo ee olo piligume, ayo goo omapoo tekepo doloso, goomegeliso.

<sup>11</sup> Osoloso a Yu odoowo howo gisili moso susuga mapoo silone, tei telaga odo mapoo dala tenelone, ayo dimapoo toso pupulone, to tokenee takoloso Yesuwo goo mapoo miligi pie, dee takeliso. Osoloso ayo dimapoo diya komonolone, mi abo mapoo dilesa, tei telaga odo toloso dala teneliso.

<sup>12</sup> Ayo egeeseemo silone, biame heeso tei moso wiligi odo tebisa oso amapoo kitulugu teneme, Damasko mi mapoo tei telaga odo talame diso.

<sup>13</sup> Esino osoko oo domo taba mapoo a eli domopoo dimeleeno, kei ma dokodooga



gadeebugu oso pouneme egeiso. Gadeebugu ee diya toowa, osokoso gadeebugu egeesinee. Esiga odoo abolo hodobo di gadeebugu oso tooso.

<sup>14</sup> Osoloso iba susuga miyomoo misigedubuloso tiesamolome, kei ma dokodooga ibada Hibulu toso amapoo egeesee takeme duso, ‘Solo, Solo, nayo bei kasi maga amapoo dala ka tenemalala? Esiga no medee goolee. Nayo egeeseemo siloga, no Godee sabolo ha taso. Esiga eyo nei no dala talaiso,’ diso.

<sup>15</sup> Esemee ayo egeesee takaso, ‘Wiligi odoo, no ogumo?’ diso.

Esemee Lodeeye amapoo nei egeesee taka, ‘A Yesuso. Nayo tei telaga odoo mapoo dala egee tenemolo, amapoo tenemoloso.

<sup>16</sup> Esiga no tebee! Ayo namapoo sibilesa peledobooso. Bei, ayo no olo hesiaso, nayo mo tou teli odoo doloso badolone, ayo namapoo eligi sabolo, osoloso eligilei goo sabolo, odoo mapoo eligilame.

<sup>17-18</sup> Esiga nayo Yu odoo sabolo, osoloso Yu odoonee sabolo ma kulodu mo to takomo siloga, ayo no medee balaiso. Egeesi ma kulodu diayo no dala teneega, ayo no pidileiso. Esiga diayo tei goo ee gooleedoga, diayo neliga maga miligi pialoso, gadeebugu mapoo bidiga dabalame, osoloso Saiten oso gibadolone debei poogoloso, see Godee mapoo bidiga dabalame, ayo no dimapoo diye deeso. Egeeseega ayo dibada goo tokenee hapoloso boobado bigileiso. Egeeseega diayo amapoo tei too goo maga, Godeeye hesia odoo oso egee do sabolo hodobo dabalaiso,’ diso.

<sup>19</sup> Esemee wiligi odoo taba Agilipa, mo howo opusomo doloso, kei ma dokodooga to taka duloso, to omapoo mesieso.

<sup>20</sup> Osoloso ayo Damasko mapoo, osoloso Yelusalem mapoo, osoloso Yudiya mi toowa ma kulodu, osoloso Yu odoonee dia mi susuga mapoo, Godeeyo to egeesee takomo sileeso, ‘Nibada goo goolee su wuduloso, nibada goo tokenee maga miligi pialoso Godee mapoo sibadee! Osoloso niyo Godee mapoo sibadee goo

ee eligilone, odoo susuga eyo howo woola tekepo goo ee tomo silesibe,’ dee takeliso.

<sup>21</sup> Esiga ayo goo hagee tomo silime, Yu odoo oso ayo dibada tei moso ma kulodu badoboome, diayo a wooloomalame keliso.

<sup>22</sup> Esino Godeeye pidi toowa maga, a see epedee nibada howo woola mapoo to budulone, wiligi odoo tebisa nimapoo, osoloso odoo abo susuga nimapoo, Godeeyo to takolone ka badoso. Esino ayo taka to susuga ee Moses sabolo Godee maga to toloso takomo silesibili odoo sabolo oso Godeeye hudi magoo Keliso mapoo peledabalai goo taka sabolo hedebe.

<sup>23</sup> Esiga to hagee eyo bei hagoso, Keliso dala toloso talaiso. Osoloso yayo daga malalo ta maga hogabuloso, gadeebugu ee Yu odoo sabolo, osoloso Yu odoonee sabolo mapoo tosibileiso,” diso.

<sup>24</sup> Esino Polo to osee takomolome, Pestuseeye to neligidi yimapoo egeesee takaso, “Polo, no boobadolone wulo halaboo! Nayo diya goolee oso no ka boobadoo,” diso.

<sup>25</sup> Esemee Poloye to nei Pestus mapoo egeesee takaso, “Wiligi odoo taba Pestus, a wulo koo halabooso. Bei, ayo to taka susuga hagee tei goo. Esiga goo eyo bei moloso.

<sup>26</sup> Esiga wiligi odoo taba Agilipaye goo susuga hagee yo gooleedooso. Ayo goo susuga hagee yimapoo takooga, ayo to takalai koo obuso. Bei, goo susuga hagee mada moodele. Haye! Odoo susuga eyo howo woola ka moodoo,” diso.

<sup>27</sup> Esemee Poloye wiligi odoo taba Agilipa mapoo egeesee takaso, “Agilipa, no Godee maga to toloso kokodo takomo silesibili odoo susuga oso to hogugu mapoo tei telisomo? O. A gooleedoso, no tei teliso,” diso.

<sup>28</sup> Esino wiligi odoo taba Agilipaye egeesee takaso, “No biame deiyepo hamapoo ayo Keliso mapoo tei talame amapoo to egeesi masi ka takamalala?” diso.

<sup>29</sup> Poloye to nei egeesee takaso, “A nayo tei talai biame deiyepo o, biame sage koo magooso. Esiga ayo nobolo osoloso

epedee hamapoo mo to dulone hagee do odo susuga oso Godeeyo to mapoo tei toloso ayo hagee bado egeesi masi badalame dokodoo ka takooso. Esino nibada dee mapoo ki ti oso tialagalaime,” diso.

<sup>30</sup> Esem e wiligi odo taba Agilipa sabolo, osoloso Pestus sabolo, osoloso Benis sabolo, osoloso odo susuga Polowo to dulone debee ee tebisaloso diyadeeso.

<sup>31</sup> Diayo diyadulone dieso dimapoo egeese takaso, “Odo hagee goo tokenee hee tele. Esiga iyo yo neliga moso mapoo toosooloso wooloomalai tekeponee,” diso.

<sup>32</sup> Esem e Agilipaye Pestus mapoo egeese takaso, “Iyo odo hagee goo midili maga diye dalai tekepo. Esino yo Sisaye o goo midilei goomogaga, yo Sisa mapoo ido diye, dee takee,” diso.

## 27

### *Poloye du maga Itali mi mapoo dilame bei mooloogoo*

<sup>1</sup> Pestuseeye Polo Sisaye badebei mapoo ido dilame goomoga magoloso, yayo Loum ha teli gibadeli odo hee Yuliyes iso. Osoloso yimapoo egeese takaso, “Polo sabolo, osoloso neliga moso ma kulodu debeli odo abo sabolo, du maga Itali mi mapoo Sisaye badebei mapoo iyado di,” diso. Yuliyes hagee ha teli odo mooloogoodoo hee, o hu Sisayo mooloogoodoo dee takeli eyo kulodu badeli.

<sup>2</sup> Esem e iba Adalamatiya odo dia du toowa ee Kasaliya mi maga see Asiya mi ma kulodu mi opusomo opusomo di mapoo dilame molome egeiso. Esem e Yuliyeseeye iba du omapoo dalaga peegeena. Osoloso Makedoniya mi ma kulodu Tesalonika mapoo badeli odo hee, Alistakus du omapoo ibolo hodobo bulumaloso, see Saidon mi mapoo dulone domopoo tiesaso.

<sup>3</sup> Osoloso biame hee mapoo Saidon mi mapoo sibilesos peledabaso. Esino iba Saidon mi mapoo sibilesos peledoboome, Yuliyeseeye Polo yo diya goolone yimapoo egeese takaso, “Nee odo oso biso pidilame, no peegoo di,” diso.

<sup>4-5</sup> Osoloso iba see Mila mi mapoo dalo soowoolone, Saiples mi te koola mapoo poo toowa meneme abaga daso. Bei, abei toowa woola mapoo poo toowa oso sibulone, howo ki toowa siba. Esem e iba osee Saiples mi te maga gulugumo sibilesos, Kilikiya sabolo Pampiliya sabolo daga dileso, Lisiya mi Mila mapoo sibilesos peledabaso.

<sup>6</sup> Iba omapoo dileso doboome, ha teli gibadeli odo Yuliyeseeye Alesandiliya odo dia du toowa Itali mapoo dilame molome egeiso. Esem e yayo iba du omapoo dalaga peegeena.

<sup>7-8</sup> Esem e iba du omapoo dalaga poogoloso, Nidus mi mapoo obeeyamo dulone, biame bei abei domopoo poogooso. Iba Nidus mi ee daga dime, poo toowa simi oso, howo ki toowa sibume, see Kiliti mi te mapoo dalo soowaso. Bei, omapoo poo toowa meneme. Osoloso iba Kiliti mi te su Salomone koola abaga obeeyamo gulugumo dulone, Lasiya mi koola mapoo du dali omapoo oluguso. Du dali eyo hu Du Oluguli Medee Tekepo deli.

<sup>9</sup> Iba du oluguli omapoo dobolone, egeese goolone debeiso, “Iba biame toowa olo hosudooso. Osoloso Yu odo oso nei teyuloso badeli biame olo dagadilesos badoso. Esino dugo biame olo bei mooloogoo. Egeesi ma kulodu iyo dugo biame mapoo abei toowa maga dilei tekeponee. Bei, howo ki toowa oso sibulone, iba tokenee peya,” diso. Esem e Poloye odo susuga mapoo egeese taka,

<sup>10</sup> “Emegei, dugo biame mapoo abei toowa maga duga, ibolo osoloso ibada bi sabolo, osoloso ibada du sabolo tokenee palai, a gooleedooso. Esiga iba hamapoo osee dabalai tekepo,” diso.

<sup>11</sup> Esino du wiligi taba sabolo osoloso duwo ama sabolo diba egeese selai goomegele. Esem e ha teli gibadeli odo oso Polowo to mapoo tei telega poogoloso, odo bakadio hageeyo to mapoo dedeeso.

<sup>12</sup> Esem e odo susuga oso egeese takaso, “Iba dugo biame mapoo hamapoo dobolone du olugulosos dabalai du oluguli tokenee,” diso. Egeeseelone diba saga

Poiniks mi mapoo dilesos doga, dugo biame ee koodobilame goomogaso. Kiliti mi te mapoo Poiniks hagee du oluguli tekepo hee oso. Bei, du oluguli omapoo poo toowa haga koo sibili.

*Poo toowa sabolo howo ki toowa sabolo ma kulodu di*

<sup>13</sup> Osoloso biame heeso poo toowa koodobume, see poo pepooko oso abei toowa domo abaga pee maga sibilame bei mooloogooso. Esem du toowa tosilesibili odoo oso egee ogoloso tekepo dolone, hegi biso du gidoloso howo kulomoo melee giligidoloso du ma kulodu maso. Osoloso iba Kiliti mi te mapoo soowooleso widi pee maga gulugumo diso.

<sup>14</sup> Iba mi te widi pee maga obeeyamo gulugumo dumolome, haga booloogelega mi te abaga poo toowa simi oso ibada du ee see abei toowa domopoo todiso.

<sup>15</sup> Egeeseeme iba du balamelega, ibada du pooso todime, wulo balaga meleeso.

<sup>16-17</sup> Esino pooso ibada du ee Kauda mi te mapoo poo toowa meneme hodiokooga todi molome, du tosilesibili odoo oso du toowa tokenee poga pidili du pepooko, du toowa eyo osio mapoo bagagoloso melee ee diya kitulugu sabolo toloso du toowa ma kulodu magooso. Osoloso howo ki oso sibilaso ibada du mapoo woolone du toowa gadilega pagalame, diayo du ee tiso tialogooso. Osoloso du tosilesibili odoo ee Libiya mi hodio abaga dulone, howo soo mapoo du doguyaga diya ebigaso. Egeeseelone, diba pooso sibilaso weli dugo du ma dokohodoo bagagoo ee du medee dilame miyomoo bagagooso. Esem pooso ibada du ee abei domopoo wulo todimeleeso.

<sup>18</sup> Osoloso biame hee mapoo poo toowa oso see diya sibume, du tosilesibili odoo oso du poopeeya dalame, bi abo du toowa ma kulodu melee toloso howomoo sooso.

<sup>19</sup> Osoloso see biame hee mapoo, bi abo egeesi masi du ma kulodu melee howomoo sooso. Pooso sibilaso weli dugo sabolo, osoloso homo tialogoo sabolo, osoloso dugo bagagili ti sabolo, osoloso bi abo egeesi masi sabolo howomoo sooso.

<sup>20</sup> Iba poo toowa oso simi ma kulodu, osoloso howo ki toowa simi ee ma kulodu biame bei poogoomo dulone, osoko sabolo giwo sabolo egele. Egeesi ma kulodu dulone, iba dabalai goole. Esino wulo wedilei gooleeso.

<sup>21</sup> Esino iba biame bei ma kulodu nei nelega sibulone, Poloye toboloso imapoo egeese takaso, "Emegei, niba kasi maga mo to dulega Kiliti mi te poogoloso ka simiyo? Iba omapoo debei diepi, goo hageese imapoo sibile pegeliyo.

<sup>22</sup> Esino niba goo hamapoo haga na ebi. Bei, odoo susuga nima kulodu odoo hee talaime. Esino hedebe ibada du ee tokenee palaiso.

<sup>23</sup> Bei, mo Godee ayo o hu dokodoo poudili o momaiye oso amapoo sibeye dee takeme, eiyo gesi amapoo sibilaso egeesee taka,

<sup>24</sup> 'Polo, no haga na ebi, bei no wulo gamenee dile, wiligi odoo taba Sisayo mudugiyopoo nee goo midilame duso. Esiga Godeeye nimapoo mesie maga nobolo hodobo egee du odoo sabolo, abei domo hamapoo wedileime,' diso.

<sup>25</sup> Esiga odoo susuga, niba to hagee duloso na ebi. Bei, Godeeye o momaiye oso goo taka goo ee tei moodolai doloso, a tei toso.

<sup>26</sup> Esino iba omapoo dulone, mi te hee koola mapoo dilesos, yo mapoo godee bigileiso," diso.

<sup>27</sup> Iba Adiliyati abei domopoo silesibulone, biame 14 poogoloso see gesi hee mapoo gesi domopoo du tosilesibili odoo oso goolee widi pee koolabelee, diso.

<sup>28</sup> Egeeseelone diayo howo kasee boubelaso howo bou tebili ti toloso teibaso. Osoloso egeino, howo bou ee teiba ibada bagi sabolo teiba 40 egeesi masi mala. Osoloso hoogoo pepooko dilesos, see tobu teibaso. Osoloso egeino, howo bou ee teiba ibada bagi sabolo teiba 30 egeesi masi mala. Esem diayo goolee widi pee olo koola tooboo, diso.

<sup>29</sup> Esem diba gesi dulone, du howo soo maga duga, yo mapoo godee bigiyaga diya ebigaso. Egeeseelone du dilega omapoo malame, diayo hegi bi bakadio bakadio

di du osio mapoo bagagoloso howomoo toosooso. Osoloso gesi omapoo dobolone, du tosilesibili odo oso saga mi beema beleso ee bolone debeiso.

<sup>30</sup> Egeeseelone dobolone, diayo du toowa maga mada kukolo dilame, du toowa tokenee poga pidili du pepooko ee howomoo ti sabolo gisibasoloso olugu molone imapoo egeesee taka, "Iba du wiligi maga hegi bi abo howomoo toosoowagona," diso.

<sup>31</sup> Esino Poloye ha teli gibadeli odo sabolo, o odo sabolo mapoo egeesee takaso, "Du tosilesibili odo oso kukulo duga, iba susuga wedileiso," diso.

<sup>32</sup> Esem ha teli odo oso du toowa tokenee poga pidili du pepooko ee ti koo poogoomo, pooso todiso.

<sup>33</sup> Osoloso olo mi beeamalai koola too-boome, Poloye diba nei nalame howolone odo susuga mapoo egeesee takaso, "Niba biame 14 ma kulodu ebia sabolo sibulone nei medee nele.

<sup>34</sup> Esiga niba wedilega pagalame, epedee hamapoo nei medee ne. Osoloso niba goolee, nima kulodu odo hee dala talaime," diso.

<sup>35</sup> Osoloso Poloye to hagee takoloso, wo toloso goomoga to Godee mapoo takoloso, odo susuga eyo howo woola mapoo wo po doloso neso.

<sup>36</sup> Esem Poloye nei namelee ogoloso, odo susuga oso yibolo nei nalame goomogaso.

<sup>37-38</sup> Diba nei ne koodobuloso, du poopeeya dalame, nei abo susuga howomoo togobisaso. Esiga iba 276 odo oso du ee ma kulodu debeiso.

### *Duso dileso yo mapoo godee buguloso gagabugu goo*

<sup>39</sup> Osoloso gesi mi beeamome egeino, du tosilesibili odo oso widi pee egeiso. Osoloso diayo widi pee ee medee ogoloso gooleede. Esino omapoo dileso du olugumo, diso. Bei, diayo widi pee ee du olugulei tekepo goolee.

<sup>40</sup> Egeeseelone, diba widi pee mapoo dilame hegi bi du ma bagagisaloso melee, ee howomoo kookoo sooso. Osoloso du osio mali suda masi howomoo wusuloso,

pooso du todilame, du wiligi mapoo dugo bagagoloso meli hee poudoloso bagagooso. Osoloso iyo widi pee egei mapoo diso.

<sup>41</sup> Esino iba widi pee mapoo dulone, du wiligi oso dileso howo soo mapoo dougaso. Esem howo ki oso sibilesi, du osio mapoo woome, du gagabuguso.

<sup>42</sup> Egeesi ma kulodu ha teli odo oso neliga ma kulodu debeli odo ee howo tabuloso kukulo diyaga, diya gooleeso. Egeeseeyaga neliga ma kulodu debeli odo ee diayo du ma kulodu wooloomalame goomogaso.

<sup>43</sup> Esino ha teli gibadeli odo Yuliyes yo Polo wooloomalai goomegele. Esiga yayo ha teli odo dimapoo egeesee takaso, "Niyo neliga ma kulodu debeli odo ee na wooloomo," diso. Esem yayo egeesee takaso, "Niba howo tabili gooleedoo daga, niba widi pee mapoo howo tigebie!

<sup>44</sup> Osoloso odo howo koo tabili daga, niba du gagabugu mapoo toloso deeso widi pee mapoo sumo di," diso. Egeesee see maga odo susuga medee tigebuloso widi pee mapoo daboogoloso gie badeli tooso.

## 28

### *Poloye Malata mi te mapoo sibilesi peledaba*

<sup>1</sup> Osoloso iba howo tigamo dileso, mi te mapoo dalaga poogoloso dobolone duno, mi te eyo hu Malatagona.

<sup>2</sup> Iba omapoo sibilesi peledoboome, mi te mapoo debeli odo oso iba medee pida. Esiga biame omapoo howo toowa simi oso kekebie meleega, mi te mapoo debeli odo oso iyo dou halame, dou toowa toloso ka daba.

<sup>3</sup> Osoloso Polo nose dou kaka tosibilesi, dou toomeleeno, hebise sa masi dou ma mapoo kulodu tiamelee ee diya dei moodoome, dou kaka ma ma kuloduga gasibilesi Polo dee mapoo paso. <sup>4</sup> Esem mi te mapoo debeli odo oso Polo hebisesi dee mapoo poloso sooloogoosoo melee ogoloso diba diesono egeesee takaso, "Odo hagee odo wooloomali odo osobe. Bei, yo abei domopooga simi



oso yo tele. Esiga epedee nei dala teneli godee oso Polowo goo tokenee maga nei ka teneeso. Esiga hebiseso yo dee mapoo ka pana”, diso.

<sup>5</sup> Esino Polo hebiseso o dee mapoo pome, o dee keesee heyadige buguno hebise dou mapoo toodooso. Ee ma kulodu goo hee yimapoo peledebele.

<sup>6</sup> Esino mi te mapoo debeli odoos oso egeesee goolone debeiso, “Polowo dee papoloso, miyomoo homodobuloso talaiso,” dee gooleeso. Esino biame sage ma kulodu goo heeso Polo mapoo peledebele. Esem mi te mapoo debeli odoos oso goo hagee ogoloso, Polo yo godee hee molodoo, dee takaso.

<sup>7</sup> Osoloso ee ma kulodu iyo dou halaga melee mi maga Malata mi te mapoo debeli odoowo wiligi odoos taba, Pubiliyeseeyo mi haga hoogoonee. Esiga yayo iba ogoloso, o moso mapoo ido dileso, biame bakadio hedebe di omapoo doboome, yayo iba medee pidiso.

<sup>8</sup> Moso ee ma kulodu Pubiliyeseeyo ama kolo dei sabolo osoloso su paiye sabolo tiameleeso. Esem Poloye yayo tiamelee mapoo gadileso, Godee mapoo takoloso, o deeso yimapoo sigime, paiye weidooso.

<sup>9</sup> Hamamee odoos paigiga mi te mapoo debeli odoos oso goo hagee duloso sibademe, Poloye diba tekepo moodoo demeleso.

<sup>10-11</sup> Egeesi ma kulodu iyo mi omapoo doboome, mi te mapoo debeli odoos oso imapoo hu toowa tenelone emegei di bi tenemeleso. Osoloso a bakadio hedebe di omapoo dobosoo, see dilame doboome, mi te mapoo debeli odoos oso iyo eli domo dulone nalai, nei sabolo osoloso bi abo sabolo imapoo tosi badeeso.

### *Poloye Loum mi mapoo dileso peledaba*

Osoloso iba Alesandiliya odoos dia du toowa dugo biame mapoo Malata mi te mapoo melee mapoo dabagaso. Du ee tosilesibili odoos oso dadabayo gamenee godee masi bakadio moodooloso du wiligi mapoo tugusa molome egeiso.

<sup>12</sup> Iba du omaga dileso Silakusa mi mapoo du oluguloso, biame bakadio hedebe di omapoo debeiso.

<sup>13</sup> Osoloso see abaga Legiyum mi mapoo dalo soowaso. Omapoo tialoso biame hee mapoo poo iyo simi hamamee abaga sibilame bei mooloogooso. Esem pooso ibada du saga todilame pupu buguso. Osoloso biame heeso Putiyoli mi mapoo dileso peledabaso.

<sup>14</sup> Iba dileso Putiyoli mapoo du oluguloso, tei telaga odoos abo egeiso. Esem diayo iba biame 7 dibolo debeeyena. Osoloso omapoo dobosoo see mili Loum mapoo diso.

<sup>15</sup> Osoloso tei telaga odoos Loum mapoo debeli oso iba sibogo di duloso, eli domopoo iba tugodalame simina. Ee ma kulodu odoos abo sibiloso, iba Apiyus Polum mi mapoo tugodooso. Osoloso aboso mi hee, o hu Odoos Soowo Moso Bakadio Hedebe deli mapoo sibiloso tugodooso. Esem Poloye diba ogoloso diya goomogolone, Godee mapoo goomoga toowa poudooso.

<sup>16</sup> Esem iba Loum mi mapoo sibiloso peledoboome, ha teli gibadeli odoos oso Polo mapoo egeesee takaso, “No neliga moso mapoo dileime. Esino no wulo moso hee mapoo badoga, ha teli odoos hedebe oso no ka gibadalaigona,” diso.

<sup>17</sup> Osoloso biame bakadio hedebe di poogoloso hamamee, Poloye Yu odoowo wiligi odoos tebisa Loum mi ee ma kulodu debeli susuga yimapoo sibilame to teneeso. Diba olo sibiloso doboome, Poloye dimapoo egeesee takaso, “Emegei, ayo goo tokenee hee Yu odoos mapoo moodele. Osoloso ibada adaga dia tei hee gababile. Esino Yelusalem mapoo Yu odooso a goo mauwe tolosoo Loum odoos mapoo teneeso.

<sup>18</sup> Osoloso nei diayo amapoo woosali to bei woosano, amapoo goo tokenee hee egele. Esiga diayo a teli mapoo magalai goomegele. Esino diayo a neliga moso maga peegoo tamagalame goomogaso.

<sup>19</sup> Esino Yu odoos oso a neliga moso maga peegoo tamagalai tekeponee, dee takeme, ayo mo goo Sisaye midilei a goomogo,

dee takaso. Esino ayo mo odo, Yu odo mapoo gigidilei goo mauwe.

<sup>20</sup> Esiga ayo goo hagee nibolo medee to meilame ka gilimadoo. Osoloso a epedee ki tiso tialogoloso moloso. Bei, ayo Isalael odo oso dulone egee bamolo, odo yimapoo tei too goo maga,” diso.

<sup>21</sup> Esem wiligi odo tebisa oso Polo mapoo nei egeese takaso, “Iyo Yudiya maga nee goo maga to hogugu teneme tele. Osoloso Yu odo abo omaga sibadee oso nee goo maga tokenee goo taka, iba dule.

<sup>22</sup> Esino goo nayo egee eligimo silo imapoo takalai goomogo. Bei, mi susuga eyo kulodu, edebeeyo Yesuwo goo eligili goweli,” diso.

<sup>23</sup> Osoloso Polo sabolo Yu odo sabolo biame hedebe magooso, diayo see tobu Polobolo Yesuwo goo maga to kalame. Osoloso diayo biame hedebe magoo mapoo Yu odo susuga Yesuwo goo maga to kalame Polo mapoo sibadeeso. Esem Poloye gesikolo bei moologoloso abaga dino habe mapoo Godeeye wiligi doloso badeli eyo goo ee eligilone, Moseseeye eligi goo sabolo, osoloso Godee maga to toloso kokodo takomo silesibili odo oso to hogugu maga Yesuwo goo eligiso, diayo Yesu mapoo tei talame.

<sup>24</sup> Esem odo abo oso Polowo to duloso tei tooso. Esino odo abo tei tele.

<sup>25</sup> Egeesi ma kulodu diesono abo puloso toso agadigaso. Osoloso diba dilame do-boome, Poloye tei tele poogoo odo mapoo to hedebe hagee takaso, “Dio Tei oso tei goo Godee maga to toloso kokodo takomo sili odo Aisaya maga nibada amawe dio mapoo egeese takaso,

<sup>26</sup> ‘Nayo dileso odo hagee bia dimapoo egeese takee,

“Niyo medee hodu dileso to taka duleiso.

Esino goo eyo bei niyo medee gooleedalaime.

Osoloso niyo medee hodu dileso agalaiso, esino goo eyo bei niyo ogoloso gooleedalaime.”

<sup>27</sup> Bei, diba goo eyo bei gooleedalai koo goomogo.

Osoloso diba dulu tabagado, osoloso howo gisiga diga.

Esino diayo ogoloso, osoloso duloso goo goolee tekepo toloso, amapoo wedi simi diepi,

ayo dibada tokenee hapoloso boobado bigiliyo,’ diso.

<sup>28</sup> Esiga niba medee goolee, Godeeye gie badeli hedebe Yu odo mapoo tenele. Haye, yayo Yu odoonee sabolo mapoo teneeso. Esiga diayo goomoga sabolo Godeeyo to medee duleiso,” diso.

<sup>29</sup> [Osoloso Yu odooso Polowo to duloso, dibada moologoodoo ma kulodu diesono toso diya agadigamo diso.]\*

<sup>30</sup> Osoloso Polo dugo bakadio ee ma kulodu moso nei molee magoloso tieli mapoo badoboome, odo abo yo agalame simi, yayo o mosopoo goomoga sabolo ido palaso.

<sup>31</sup> Osoloso yayo dimapoo Godeeye wiligi doloso badeli goo ee eligilone, Lodee Yesu Kelisowo goo takalai ebile. Osoloso ee ma kulodu odo heeso yimapoo hamaga takele.

**28:20:** Diye 26:6-7    **28:22:** Diye 24:14    **28:26:** Isa 6:9-10; Diye 25:13; 26:2, 6; 27:24; Loum 1:5    \* **28:29:** To hagee odo aboso taka, Lukaye hogugu, deliso. Esino odo aboso taka, Lukaye hogugule, odo heeso hamamee hoguguna, dee takeli.

## Loum Poloye Loum sosee mapoo to hogugu tenee

### *Loum booka goo eyo bei*

Poloye Loum mi mapoo dilega badolone to hagee hoguguloso Loum odoo mapoo teneeso. Hogugu hagee ma kulodu tei talai goo eyo bei hoguguso. Egeeseelone yayo Keliso ye tou too goo sabolo, osoloso Godeeye sooloo deli goo sabolo, osoloso tei talai goo sabolo, osoloso gie badeli talai goo sabolo hoguguso. Osoloso goo tokenee maga hoguguso. Osoloso tei Yu odoo sabolo osoloso Yu odoonee sabolo oso tei too goo maga hedebe doloso egee do eyo goo onosee hoguguso.

<sup>1</sup> A Polo, Yesu Kelisowo tou teli odoo. Godeeye a hesialoso amapoo diye di odoo hu teneeso, Godeeyo to tekepo ee takomo silame.

<sup>2</sup> Daga hoogoo Godeeye to tekepo hagee odoo susuga mapoo tenelame to edidi magooso. Esem Godee maga to toloso kokodo takomo silesibili odoo oso to edidi magoo hagee Godeeyo booka mapoo hoguguso.

<sup>3-4</sup> To tekepo hagee Owolo Yesu Kelisowo goo ee takooso. Yesu Keliso ibada wiligi odoo. Yo mipoo hamapoo soomagooso, osoloso yo wiligi odoo taba Deibidiyo amawe. Esino Godeeye Dio Tei oso kitulugu maga yo ta maga hogadi goo oso yo tei Godeeyo Owolo doloso woola yilige buguso.

<sup>5</sup> Esiga Godeeye a sooloo dolone Keliso maga diye di tou tekepo amapoo teneeso, mipoo hamapoo debeli odoo susuga oso amaga Keliso mapoo tei toloso o to mapoo mesimo silesibilame. Goo egeesi maga ayo Keliso halo o tou hagee ka toso.

<sup>6</sup> Osoloso Godeeye Loum odoo niba nosee Yesu Kelisowo dalame olo hesigaso.

<sup>7</sup> Esiga ayo to hogugu hagee Godeeye sooloo deli odoo Loum mi mapoo debeli nimapoo ka tonowa. Godeeye niba o

odoo doloso dabalame olo hesigaso. Esiga ayo Godee mapoo takooso, ibada Ama Godeeye, osoloso ibada Lodee Yesu Keliso ye niba sooloo dolone pidilame, osoloso mesie goo nimapoo tenelame.

### *Poloye Loum odoo ee agala dilame goomoga*

<sup>8</sup> Malalo ayo nimapoo ka takooso. Mi susuga ma kulodu odoo susuga oso niyo tei too goo ee olo dudobuguso. Esiga ayo Yesu Keliso maga niba halo Godee mapoo goomoga to takeliso.

<sup>9</sup> Ayo mo sooloo ma kuloduga goomoga sabolo Godeeyo tou tolone badolone, to tekepo Owolowo goo ee ka takomo siloso. Esiga Godee yo gooleedooso, ayo niba halo yimapoo egee takomolo goo ee tei goo.

<sup>10</sup> Esiga ayo niba agalame sibilei goo maga Godee mapoo takolone ka badoso. Esino goo egee Godeeye goomogoga, ayo niba agalame sibileiso.

<sup>11</sup> Bei, niyo tei too ma kulodu kibilame, Dio Tei maga goo tekepo oso niba pidilame, ayo niba agalame sibilei, a diya goomogo.

<sup>12</sup> Esiga to ayo taka eyo bei ee egeese moloso. Ayo tei too goo oso niba pidilei, a goomogoso. Osoloso nei niyo tei too goo oso a pidilei onosee goomogoso.

<sup>13</sup> Esiga emegei, niba goolee, a diya goomegeliso, niba agala sibilame. Esino ayo niba agalame sibilei ee goo heeso eli peliso. Egeesi ma kulodu ayo Yu odoonee abo pidi egeesi masi pidilame, a diya goomegeliso, niyo tei too goo ee kauwulame.

<sup>14</sup> Esiga Godeeye amapoo odoo susuga ee pidilame tou teneega, amapoo goomoga goo toowa moloso, mi toowa ma kulodu debeli odoo mapoo osoloso dobudu debeli odoo mapoo to tekepo takalame. Osoloso goo gooleedoo odoo mapoo osoloso goo gooleedele poogoo odoo mapoo to tekepo takalai onosee a goomegeliso.

<sup>15</sup> Goo egeesi maga ayo Loum mi mapoo sibilesito tekepo nimapoo takalai a diya goomegeliso.

<sup>16</sup> Esiga to tekepo hagee ayo dokodoo ka poudoso. Bei, to hamapoo Godeeyo kitulugu mologa. Esiga to hagosu yimapoo tei too odo dia gie badeli ee ka pidimoloso. Egeeseelone yayo daga Yu odo pidiloso see Yu odoonee sabolo ka pidimoloso.

<sup>17</sup> Esiga to tekepo hagosu Godeeyo howu woola tekepo badalai goo ee ka yilige bugu moloso. Egeesi ma kulodu tekepo badalai goo hagee hedebe tei tolosu badalai goo omaga ka moloso. Bei, Godeeyo to booka mapoo hogugu oso egeesee takooso, “Godeeye tekepo odo deli odo diba ee dieso tei too goo maga gie badeli tolone ka doso.”

### *Godeeyo kamana goo*

<sup>18</sup> Esiga Godeeye kamana goo ee Kei mi ma dokodooga yimapoo miligi pieli odo susuga mapoo, osoloso goo tokenee teli odo susuga mapoo ka eligimoloso. Bei, odo hagee biaso goo tokenee tolone tei goo ee mada mageliso.

<sup>19</sup> Esino odo susuga oso Godeeyo goo ee medee gooledalai tebiliso. Bei, Godeeye o goo dimapoo eligiso.

<sup>20</sup> Edebeeyo Godee koo egeli. Esino mipoo hagee bei mooloogoloso abaga simino epedee hamapoo, bi susuga Godeeye moodoo ee ogolone, yayo kitulugu kookaiyo osee meli sabolo, osoloso o goo ee ka gooleedoso. Esiga edebeeyo dieso nediliyo diba Godee gooleedelee dee takalai koo tebili.

<sup>21</sup> Esiga diba Godeeyo goo gooleedoono, diayo o hu dokodoo koo poudili. Osoloso diayo yimapoo goomoga to koo takeli. Esino dibada goo goolee ee diya tokenee, osoloso dibada sooloo ma kulodu tokenee poloso diya neliga moloso.

<sup>22</sup> Osoloso diba dieso nediliyo takolone diba goo medee gweli odo deliso. Esino diba goo medee koo gweli odo.

<sup>23</sup> Esiga diayo kookaiyo gie badeli Godeeyo hu dokodoo poudoolone yimapoo goomoga tenelai goo ee poogoloso, see gamenee godee dadabayo moodoo mapoo goomogolone debeliso.

Gamenee godee dadabayo moodoo ee odo mudu too, osoloso sówo mudu too, osoloso galayo mudu too, osoloso hebiseyo mudu too.

<sup>24</sup> Esiga dieso dima kulodu goo hageesi tolone doboome, Godeeye diba goo tokenee mapoo hologooso. Osoloso ee ma kulodu odo susuga oso dieso goomoga goo ee dodolone, dibada suso goo tokenee tolone debeliso.

<sup>25</sup> Osoloso diayo tei Godeeyo goodee mapoo tei talai ee poogoloso, see gameenee goo mapoo tei tolosu ee dodolone debeiso. Egeeseelone diayo bi susuga moodeli Godee mapoo tei telega poogooso. Esino bi yayo moodoo mapoo tei tolosu ee dodolone, dia hu dokodoo poudoolone debeiso. Esino hedebe Godeeyo hu dokodoo kookaiyo osee poudoolone dabalai tekepo. Goo hagee tei goo.

<sup>26</sup> Esiga odo hagee biaso goo hageesi tolone debee ee ogoloso, Godeeye diba dia goo tokenee ma kulodu dabalame hologooso. Goo egeesi maga soboso omo dio poogoloso see emegei sobo sabolo goo heli tolone debeliso.

<sup>27</sup> Egeeseelone giso nose obo dio poogoloso see emegei giso sabolo goo heli tolone debeliso. Esiga diba goo tokenee hageesi tolone debeiga, goo tokenee eyo nei dia suso teliso.

<sup>28</sup> Esem odo hagee biaso Godeeyo goo ee diya boobado bugume, nei Godeeye diba goo tokenee talame gweli goo ma kulodu dabalame hologooso. Goo egeesi maga Godeeye takolone, goo egeesi na moodeeye dino, diayo goo egee moodoolone debeliso.

<sup>29</sup> Esiga dima kulodu goo tokenee hageesi oso bei ka moloso. Goo ee goo tokenee, osoloso bi diya goomegeli goo, osoloso kweli goo, osoloso emegei wooloomali goo, osoloso emegei sabolo toso agadigeli goo, osoloso gamenee takeli goo, osoloso emegei dimapoo tokenee gweli goo, osoloso emegei dia goo takeli goo,

<sup>30</sup> osoloso emegei miligi galo takeli goo, osoloso Godee mapoo hegili goo, osoloso



manali goo, osoloso eyo nediliyo yo tekepo dolone si howeli goo, osoloso goo tokenee dia talame moodeli goo, osoloso ama dio owee dio eyo to mapoo mesilega pegeli goo oso.

<sup>31</sup> Osoloso diba goo medee koo gweli odo. Osoloso diba dieso to edidi magoo koo dedeli odo. Osoloso diba dia soosoo koo gweli odo. Osoloso diba emegei koo sooloo deli odo.

<sup>32</sup> Esiga Godeeye goo hageesi tolone debeli odo ee dia tokenee eyo nei toloso wedileiso dee takeli goo ee, diba gooleedooso. Esino diba goo tokenee egeesi tolone dobolone, see o odo oso goo egeesi moodoo ee ogoloso dimapoo takolone, niba goo medee tekepo tolone do, dee takeliso.

## 2

### *Godee yo goo medee midili odo*

<sup>1</sup> Nee odooso goo tokenee too ee ogoloso nayo wulo goo gooleeso o goo midiliso. Esino nayo takolone, Godeeye amapoo mo goo tokenee eyo nei tenalai eyo bei me, dee takalai tebile. Bei, nayo takolone, Godeeye nee odoowo goo tokenee eyo nei tenelai tekepo, dee takeliso. Esino goo egeesi taka maga, Godeeye nee goo tokenee eyo nei tenelai tekepo deliso. Bei, nonosee goo tokenee hedebe egeese teliga.

<sup>2</sup> Esino Godeeye tokenee teli odo eyo goo medee midili goo ee, iba gooleedooso.

<sup>3</sup> Esiga nayo emegei dia goo midilone badolone, see nayo goo tokenee hedebe egeesi masi tomo siloga, no Godeeye kamana maga kasee pia dabalaisomo?

<sup>4</sup> Esino Godeeye nee goo goolee su wudulame no sooloo dolone mesie sabolo bamoloso. Esino no yayo sooloo deli goo ee goo mauwe deliso. Bei, Godeeye sooloo deli goo oso nayo goo tokenee teli ee pagalame egee ido du goo ee, no gooleedeleyo?

<sup>5</sup> Esino nee sooloo ma kulodu koo mesili goo sabolo, osoloso goo goolee su wudulega pegeli goo oso Godee kamanalame

ka moodooso. Esiga Godeeye kamana goo oso sibilei biame mapoo, yayo namapoo nei dala toowa tenelaiso. Goo egeesi maga biame omapoo yayo goo medee teiba midili goo ee woola yilige bigileiso.

<sup>6</sup> Esiga Godeeye edebeeyo goo moodoo eyo nei ee medee tobuloso pileiso.

<sup>7</sup> Esiga edebeeyo mesie sabolo goo tekepo tolone dobolone, Godeeye diba o howo woola odo tekepo dalai goo sabolo, osoloso yayo gie badeli teneli goo ee esilone doga, nei Godeeye dimapoo kookaiyo badoboso gie badeli tenelaiso.

<sup>8-9</sup> Esino edebeeyo dieso goomoga goo ee tolone tei goodee ee gowooloso see goo tokenee tolone doga, nei Godeeye komonolone dimapoo dala tenelaiso. Egeeseelone yayo daga Yu odo mapoo dala teneloso, see hamamee Yu odoonee mapoo dala tenelaiso.

<sup>10</sup> Esino Godeeye odo goo tekepo teli ee dokodoo poudoolone dimapoo mesie goo tenelaiso. Egeeseelone yayo daga Yu odo mapoo egeese moodooloso, osoloso see hamamee Yu odoonee mapoo egeese moodoolaiso.

<sup>11</sup> Bei, Godeeye odo susuga dia goo ee medee midileiso. Yayo wulo goo hediliwe midileime.

<sup>12</sup> Esiga Yu odoonee odo agayo Moseseeye tei magoo goo ee gooleedelega dobolone goo tokenee tolone doga, diba nosee dia goo tokenee eyo nei talaiso.\* Osoloso Yu odo onosee, odo agayo Moseseeye tei magoo goo ee gooleedoloso dobolone see goo tokenee tolone doga, Godeeye tei magoo goo sabolo tobulone dia goo tokenee eyo nei dimapoo tenelaiso.

<sup>13</sup> Bei, wulo tei magoo goo ee duloso debeli odo diba Godeeyo howo woola tekepo koo doso. Esino odo agayo tei magoo goo ee duloso mesimo silesibili odo ee Godeeyo howo woola tekepo doso.

<sup>14</sup> Esiga Yu odoonee ee Moseseeye tei magoo goo ee diba gooleede. Esino diayo goo tolone dobolone Moseseeye tei magoo goo oso taka sabolo tobuloso tolone doga,

**2:1:** Mat 7:1-2; Yon 8:7    **2:4:** Epe 1:7; 2Pita 3:15    **2:6:** Psa 62:12; Prov 24:12; Mat 16:27; 2Kol 5:10    **2:8-9:** 2Tes 1:8    \* **2:12:** Godeeye Yu odoonee dia goo midiga, yayo Moseseeye tei magoo oso midileime. Esino diayo goo tekepo talame gooleedoo goo oso dia goo yayo midileiso.    **2:14:** Diye 10:35

goo oso dia goo tokenee sabolo osoloso goo tekepo gooleedoloso egee do goo ee eligiliso.

<sup>15</sup> Goo egeesi maga iba ogoso, tei magoo goo ee dibada sooloo ma kulodu olo hoguguloso ka doso. Bei, diayo goo tokenee toga, dia goo goolee oso dimapoo ebili goo teneliso. Osoloso nei diayo goo tekepo toga, dimapoo goomoga goo teneliso.

<sup>16</sup> Goo hagee goo midilei biame mapoo woola yilige bigileiso. Bei, biame omapoo Godeeye Yesu Keliso maga odoo susuga dia goo ee midilone, dia mada goo ee woola yilige bigileiso. To tekepo ayo hagee takoo oso goo hagee ka takooso.

*Yu odoo sabolo osoloso  
tei magoo goo sabolo*

<sup>17</sup> Esiga ayo Yu odoo nimapoo taka. Niba niso nediliyo tei Yu odoo dolone, Moseseye tei magoo mapoo kibiloso debeli odoo deliso. Osoloso niba niso nediliyo Godee koola ogolone debeli odoo dolone si howeliso.

<sup>18</sup> Osoloso Godeeye goomoga goo ee, niba olo gooleedooso. Bei, niba tei magoo ee hesigaloso goo tekepo sabolo, osoloso goo tokenee ogoloso gooleedalai ee niba olo gooleedooso.

<sup>19</sup> Osoloso niso nediliyo takolone niba odoo howo neliga ee eli eligili odoo, dee gweliso. Osoloso neliga ma kulodu debeli odoo dia gadeebugu masi, dee gweliso.

<sup>20</sup> Osoloso niba nosee goo medee koo gweli odoo sabolo, osoloso Godeeyo goo gooleedele poogoo odoo ee eligilei teiba, dee gweliso. Bei, niyo takolone, “tei magoo ee nimapoo teneeso doloso see tei goodee susuga ee niba olo gooleedooso,” deliso.

<sup>21</sup> Esino niba kasi maga odoo abono eligilone see nisono eligilega ka pegeliyo? Bei, niso takolone, “Emegei dia bi heli na te,” dee takeliso. Esino niba see adaba bi heli tolone ka doso.

<sup>22</sup> Osoloso niyo takolone, “Adaba sobo sabolo osoloso giso sabolo goo heli na te,” dee takeliso. Esino niso goo egeesi tolone ka doso. Osoloso see gamenee godee

dadabayo moodoo mapoo diya gowoolone debeliso. Esino niba see gamenee godeeyo moso mapoo dileso bi heli tolone ka doso.

<sup>23</sup> Esiga niba niso nediliyo si hoowolone tei magoo goo ee gooleedoo, dee takeliso. Esino niyo tei magoo goo ee gababia maga Godeeyo hu tokenee peliso.

<sup>24</sup> Godeeyo to booka mapoo hogugu oso egeesee takooso,

“Yu odoo niyo goo tokenee tolone debei ee ogoloso nei Yu odoonee oso Godee maga to tokenee takeliso,” dee takaso.

<sup>25</sup> Tei takoo, no tei magoo goo ee dodolone badoga, kolo kweli goo\* oso no pidileiso. Esino nayo tei magoo ee gababuoga, no Godeeyo howo woola kolo koole poogoo odoo masi badalaiso.

<sup>26</sup> Esiga kolo koole poogoo odoo oso tei magoo ee medee dodolone badoga, yo Godeeyo howo woola kolo koo odoo masi badalaiso.

<sup>27</sup> Esiga Yu odoo nimapoo tei magoo goo sabolo osoloso kolo kookeli goo sabolo osee moloso. Esino niba tei magoo gababiliso. Goo egeesi maga edebeeyo kolo koolega poogoloso tei magoo ee dodolone badoga, odoo egee biaso niba odoo tokenee dalaiso.

<sup>28</sup> Nayo kolo kooloso egee bado goo oso no tei Yu odoo dee koo seeso. Bei, tei Yu odoo doloso badalai goo ee wulo kolo ma dokodoo koo moloso. Osoloso tei kolo koolai goo sabolo wulo kolo ma dokodoo koo moloso.

<sup>29</sup> Esino tei Yu odoo dalai goo ee egeesi moloso. Edebeeyo Godeeyo howo woola tekepo badoga, goo oso yo tei Yu odoo doloso ka badoso. Osoloso tei kolo kweli goo ee wulo kolo ma dokodoo koo moloso, esino Dio Tei oso odoo sooloo ma kulodu opusomo dee ka seli. Esiga odoo egeesee seli ee odoo maga goomoga tolone koo doso, esino Godee maga goomoga tolone ka doso.

### 3

<sup>1</sup> Esiga Yu odoo doloso badalai goo mapoo, goo tekepo kasi molosomo? Os-

**2:20:** 2Tim 3:5    **2:21:** Mat 23:3-4    **2:24:** Isa 52:5  
doloso debeli goo ee eligilame dia kolo ka kweli.    **2:26:** Gal 5:6

\* **2:25:** *kolo kweli goo* - Yu odooso diba Godeeyo odoo  
**2:29:** Deut 30:6; Kol 2:11

oloso kolo kooloso badalai goo mapoo, goo tekepo kasi molosomo?

<sup>2</sup> O. Goo tekepo bei moloso. Goo daga malalo hagoso. Godeeye o to ee Yu odoo mapoo teneeso, diayo medee balame.

<sup>3</sup> Esino Yu odoo aboso Godeeyo to mapoo dedele poogooso. Esino Godeeye nei yayo to edidi magoo goo ee poogoloso, see dimaga miligi pileisomo?

<sup>4</sup> Haye, egeesee selaima. Bei, hedebe Godee yino tei goodee takeli. Esino mi odoo susuga iba wulo gamenee takeli odoo. Bei, Godeeyo to booka mapoo hogugu oso egeesee takooso,

“Godee, nayo to takooga, edebeeyo duloso nayo tei goodee takeli deliso.

Osoloso edebeeyo nee goo midiga, nayo dagadileiso,” deliso.

<sup>5</sup> Esiga iyo goo tokenee egee tomolo oso Godeeye tei goo egee tomolo goo ee woola yebuguga, iyo kasee takalaisomo? Godeeye ibada goo tokenee eyo nei tenelai tekeponee, dee takalaisomo? (Goo tokenee gweli egee mi odooso gweliso.)

<sup>6</sup> Haye, Godeeye ibada goo tokenee eyo nei tenelai tekepo. Bei, Godeeye Yu odoo ibada goo tokenee eyo nei tenele poogooga, yayo odoo susuga dia goo midilei tebileime.

<sup>7</sup> Esiga edebeeyo egeesee takalai malaiso, “Ayo gamenee takeli goo oso Godeeye tei goodee egee takomolo goo ee woola yilige bigiliso. Esiga goo tokenee ayo teli oso Godeeyo goo tekepo sabolo, osoloso Godee yo toowa doloso egee bado goo ee eligiga, nei mo goo tokenee eyo nei amapoo tenelai tekeponee,” dee takalai malaiso. Esino goo hageesi goolai tekeponee.

<sup>8</sup> Osoloso see edebeeyo egeesee takalai malaiso, “Iba goo tokenee tolone dobomo. Egeesee seega, goo tekepo peledabalaiso,” dee takalai malaiso. Esino goo egeesee goolai ee diya tokenee. Esino odoo aboso takolone, goo hagee ayo eligi dolone, mo hu sabolo gamenee takeliso. Esiga odoo hagee bia dimapoo Godeeye dia goo tokenee eyo nei tenelai tekepo.

*Odoo heeso Godeeyo howo woola tekepo koo badoso*

<sup>9</sup> Esiga Yu odoo ibano tekepo odoo doloso dobolone, Yu odoonee ee tokenee odoo dolone ka dosomo? Haye, egeesinee. Egeesi ma kulodu ayo nimapoo olo takaso, Yu odoo sabolo osoloso Yu odoonee iba susuga hodobo goo tokenee ma kulodu osee doso.

<sup>10</sup> Bei, Godeeyo to booka mapoo hogugu oso egeesee takooso,

“Odoo heeso Godeeyo howo woola tekepo koo badoso.

Tei takoo, odoo hee mauwe.

<sup>11</sup> Osoloso tei takoo, Godeeyo goo gooleedoo odoo hee mauwe.

Osoloso tei takoo, Godee esieli odoo hee mauwe.

<sup>12</sup> Bei, odoo susuga oso Godee maga miligi pialoso diya tokenee poloso ka doso. Egeesi ma kulodu tei, tekepo badeli odoo hee mauwe.

<sup>13</sup> Osoloso diayo to keli goo ee odoo bi ma kuloduga hune kokeli egeesi masi moloso.

Osoloso diayo to kei omapoo wulo gamenee goo takolone debeliso.

Osoloso dia to ee saso odoo peli masi moloso, esiga to oso odoo mapoo dala teneliso.

<sup>14</sup> Osoloso diba biame susuga emegei dimapoo heiga sabolo dobolone to tokenee takolone debeliso.

<sup>15</sup> Osoloso diba emegei wooloomalame mopoodoo doloso silesibiliso.

<sup>16</sup> Egeesi ma kulodu diayo dulone, dala goo sabolo hegi goo sabolo emegei dimapoo teneliso.

<sup>17</sup> Esiga emegei sabolo mesie dabalai goo ee diba gooleedele.

<sup>18</sup> Esiga tei Godeebolo ebili goo ee dimapoo mauwe.”

<sup>19</sup> Iba gooleedooso, Moseseeye Godeeyo tei magoo ee Yu odooso tei magoo goo omapoo mesimo silame dimapoo teneeso. Bei, tei magoo hagoso odoo susuga mipoo hamapoo debeli dia goo tokenee ee ogoloso gooleedoloso, see Godeeye kamana ma hemidu dabalame ka tenee. Esiga goo midilei biame mapoo iba iso

nediliyo pidilame, Godee mapoo to nei takalai tebileime.

<sup>20</sup> Bei, iyo wulo tei magoo goo ee deedeega, goo oso iba Godeeyo howo woola odoo tekepo dalaime. Esino tei magoo oso ibada goo tokenee ee imapoo woola yilige bigiliso.

*Godeeyo howo woola tekepo badalai  
goo ee tei too goo maga siboso*

<sup>21</sup> Esiga iyo tei magoo ee dodolone debei maga Godeeyo howo woola odoo tekepo doloso koo doso. Esino Godeeye eli hee maga imapoo yebuguso, iyo o howo woola tekepo doloso badalai goo ee. Eli hee egeeyo goo maga Godeeye To Magoo Booka Nape mapoo hogugu moloso.

<sup>22</sup> Esiga iyo Lodee Yesu Keliso mapoo tei teli goo maga, nei Godeeye iba o howo woola odoo tekepo deliso. Esiga Yu odoo sabolo osoloso Yu odoonee sabolo iba susuga eli hedebe hamaga gie badeli talaiso.

<sup>23</sup> Bei, odoo susuga iba goo tokenee olo tooso. Esiga Godeeye toowa doloso egee bado goo sabolo koo tobuoso.

<sup>24</sup> Esino Godeeye iba sooloo dolone wulayo pidili goo maga, Owolo Yesu Kelisoye iba gilimadoloso ibada goo tokenee eyo nei yayo tooso. Goo egeesi maga nei Godeeye iba o howo woola odoo tekepo deliso.

<sup>25</sup> Esiga Godeeye Owolo Yesu Kelisoye ibada goo tokenee eyo nei mapoo talame meiye diso, iba Godeeye kamana maga peegoo peledabalame. Egeesi ma kulodu Yesu Kelisoye ibada goo tokenee eyo nei talame, yayo taso. Esiga iyo goo omapoo tei toga, nei Godeeye iba o howo woola odoo tekepo dalaiso. Esiga goo hagoso Godeeye goo medee teiba midili goo ee ka eligiso. Bei, daga hoogoo edebeeyo goo tokenee tolone doboome, Godeeye diba diya sooloo dolone dia goo tokenee eyo nei dimapoo tenele.

<sup>26</sup> Esino epedee hamapoo Godee eyo goo medee teiba midili goo ee ka eligiso. Osoloso yayo takolone, odoo Yesu mapoo tei teli ee o howo woola tekepo deliso.

<sup>27-28</sup> Esiga iso nediliyo si howalai eyo bei molosomo? Haye, mauwe. Bei, hedebe tei too maga iba Godeeyo howo woola tekepo ka doso. Esino iyo tei magoo ee dodolone debei maga koo seeso.

<sup>29</sup> Egeesi ma kulodu iba tei toso, Godee yo hedebe Yu odoo dia Godeenee. Esino Godee yo Yu odoonee sabolosee dia Godee doloso ka badoso.

<sup>30</sup> Egeesi ma kulodu Godee hedebe. Osoloso iba o howo woola tekepo dabalai eli hedebe hagoso. Yu odoo sabolo, osoloso Yu odoonee oso hedebe Yesu mapoo tei too maga Godeeye diba o howo woola odoo tekepo dalaiso.

<sup>31</sup> Esiga tei too goo maga Godeeyo howo woola tekepo dabalame eligi goo oso tei magoo ee goonee deesomo? Haye, egeesee koo seeso. Esino goo ayo eligi oso tei magoo ee goo toowa doloso eligiliso.

## 4

*Eibalahameeye tei too goo ogoloso  
Godeeye yo odoo tekepo diso*

<sup>1</sup> Esiga ibada amawe Eibalahameeyo goo maga kasee takalaisomo? Yo mi odoo iba egeesi masi. Esino kasee maga yo Godeeyo howo woola odoo tekepo dee ka siyo?

<sup>2</sup> Goo yayo moodoomo silee oso yo Godeeyo howo woola tekepo badebei diepi, goo oso eyo nediliyo si howalai bei meliyo. Esino yo Godeeyo howo woola eyo nediliyo si koo howeli. Bei, yo eyo goo moodoo maga tekepo doloso ka badele.

<sup>3</sup> Esino bei, Godeeyo to booka mapoo hogugu oso egeesee takooso,

“Eibalahameeye Godee mapoo tei teme, Godeeye yayo tei too ee ogoloso o howo woola yo odoo tekepo diso.”

<sup>4</sup> Egeesi ma kulodu edebeeyo o tou too eyo nei egee to ee emegei di binee. Esino yayo o tou too eyo nei oso.

<sup>5</sup> Esino edebeeyo goo tekepo tomo sili maga Godeeyo howo woola yo odoo tekepo dalaime. Esino hedebe tei too goo maga Godeeye odoo egee o howo woola odoo tekepo dee ka somoloso.



<sup>6</sup> Esiga Godeeye edebeeyo goo tekepo tomo sili ee hesigelega poogoloso yimapoo goomogolone yo odoo tekepo deli goo ee, Deibidiye Godeeyo to booka mapoo hogugu oso egeesee takooso,

<sup>7</sup> “Edebeeyo o goo tokenee ee Lodeeye hapoloso boobado buguga, yo goomoga sabolo badalaiso.

<sup>8</sup> Osoloso edebeeyo o goo tokenee ee Lodeeye hesigelega poogooga, yo goomoga sabolo badalaiso.”

<sup>9</sup> Egeesi ma kulodu goomoga goo hagee hedebe Yu odoo mapoo ka molosomo? Haye. Yu odoonee sabolosee mapoo ka moloso. Bei, iyo daga olo takaso, Godeeye Eibalahameeye tei too ee ogoloso o howo woola yo odoo tekepo diso.

<sup>10</sup> Esino kopolone Godeeye Eibalaham yo o howo woola odoo tekepo dee ka takayo? Yo kolo kooloso badoboome ka takayo? O kolo koolega badoboome ka takayo? Esino ee ma kulodu yo kolo koolega badoboome, Godeeye daga yo o howo woola olo odoo tekepo diso.

<sup>11</sup> Esiga Eibalaham yo kolo koolega badolone Godee mapoo tei teme, yo olo odoo tekepo diso. Osoloso hamamee o kolo kooso, yayo Godeeyo howo woola odoo tekepo doloso badebei goo ee eligilame. Goo egeesi maga edebeeyo kolo koolega dobolone, diayo tei too goo omaga odoo tekepo doloso doga, odoo egee bia dia ama ee Eibalahamso.

<sup>12</sup> Osoloso edebeeyo kolo kookooloso dobolone, Eibalaham masi Godee mapoo tei toloso doga, odoo egee bia nose Eibalahameeyo owolo dio doloso ka doso. Egeesi ma kulodu Eibalaham yo kolo koolega badolone, Godee mapoo tei tooso. Goo egeesi maga yo dibada amawe doloso ka badoso.

*Godeeye to edidi magoo goo ee Eibalahameeye tei too maga tooso*

<sup>13</sup> Esiga Godeeye Eibalaham mapoo osoloso amawe dio mapoo to edidi magolone, mipoo hagee dimapoo tenelaiso, dee takaso. Egeesi ma kulodu goo hagee Eibalahameeye tei magoo

deedee ee ogoloso ka takele. Esino Eibalahameeye Godee mapoo tei too goo ee ogoloso, yo odoo tekepo diso. Esiga Godeeye to edidi magoo hagee yimapoo ka taka.

<sup>14</sup> Esiga edebeeyo Godeeye to magoo hagee wulo tei magoo goo ee deedee maga ka too diepi, nei tei teli goo ee goo mauwe meliyo. Osoloso Godeeye Eibalaham mapoo to edidi magoo goo onosee goo mauwe meliyo.

<sup>15</sup> Bei, tei magoo oso tei magoo gababili odoo mapoo Godeeye komonolone nei teneliso. Esino tei magoo mauwe daga, edebeeyo tei magoo ee gababileime.

<sup>16</sup> Goo egeesi maga tei teli goo oso goo toowa ka moloso. Bei, Godeeye iyo tei too goo ee ogoloso yayo to edidi magoo goo ee imapoo wulo wulayo tenelaiso. Egeeseega Moseseeye tei magoo dedeli Yu odoo sabolo, osoloso Yu odoonee dima kulodu edebeeyo Eibalahameeye tei toloso badebei egeesi masi doga, to edidi magoo hagee dia. Bei, Eibalaham yo tei telaga odoo susuga ibada ama yoso.

<sup>17</sup> Bei, Godeeyo to booka mapoo hogugu oso Eibalahameeyo goo maga egeesee takooso,

“Ayo no mi odoo susuga dia ama doloso badalame olo hesiaso,” diso.

Esiga Eibalahameeye Godee mapoo tei too maga goo hagee olo peledabaso. Esiga Godee hagee odoo wedia hogaduloso gie badeli teneli yoso. Osoloso bi dia peledabalame moodeli Godee hedebe yoso.

<sup>18</sup> Egeesi ma kulodu Godeeye Eibalaham mapoo to edidi magolone egeesee takaso, “Nayo mi odoo susuga dia ama doloso badalaiso,” dee takeme, nei Eibalahameeye goo omapoo goo goolee bakadio delega, wulo tei toloso bameleeso. Bei, Godeeye see yimapoo egeesee takaso,

“Namawe dio oso diya baloga ee hesigilei tebileime,” dee takaso.

Eseme Eibalaham yo holo soomagelega adaga poloso badolone, to Godeeye taka mapoo tei tooso.

<sup>19</sup> Egeesi ma kulodu Eibalaham yo adaga poloso badebei ee dugo 100 tugodalai koola tabaso. Yo ki me poogoloso ta masi badebeiso. Osoloso osobo Sela yo holo soomagelega deme toboloso olo adaga poloso badebeiso. Esino Eibalahameeye to Godeeye taka mapoo tei too goo ee pegelega medee kibiya osee meleeso.

<sup>20</sup> Osoloso Godeeye yimapoo to edidi magoo goo mapoo tei toloso badolone, yo goo goolee bakadio delega badebeiso. Osoloso yayo tei too oso yimapoo kitulugu teneme, yayo Godee mapoo goomoga poudooso.

<sup>21</sup> Osoloso yayo egeesee gooleeso, "Godee eyo amapoo to edidi magoo goo ee moodolai yo teiba," deliso.

<sup>22</sup> Esiga Godeeye Eibalahameeye tei too goo ee ogoloso yo o howo woola odo tekepo deliso.

<sup>23</sup> Esiga to hagee hedebe Eibalaham mapoo takele.

<sup>24</sup> Esino goo hagonosee imapoo takaso. Bei, ibolosee Godeeyo howo woola odo tekepo diso, iyo ibada Lodee Yesu Keliso ta maga hogadi Godee yimapoo tei teme.

<sup>25</sup> Esiga Godeeye Yesu ibada goo tokenee maga talame teneeso, yayo toloso see hogadi goo omaga iba Godeeyo howo woola odo tekepo dalame.

## 5

### *Godeeyo howo woola odo tekepo doloso badalai*

<sup>1</sup> Esiga iyo Godee mapoo tei too goo maga iba Godeeyo howo woola odo tekepo doloso ka doso. Esiga ibada Lodee Yesu Kelisoye goo moodoo maga iba Godeebolo mesie sabolo ka doso.

<sup>2</sup> Bei, iyo tei too goo maga Kelisoye iba Godeeye sooloo dolone pidili goo mapoo gilimado simiso. Esiga iba Godeeye sooloo dolone pidi goo ee ma kulodu dobolone, Godeeye toowa doloso badeli mapoo yibolo hodobo medee tekepo dabalai goo omapoo, iba goomoga sabolo dulone bolone ka doso.

<sup>3</sup> Iba goo hedebe omapoo goomogolone koo doso. Esino dala goo imapoo siboga,

goo omapoo onosee iba goomegeliso. Bei, dala goo hagoso iba kibiloso dabalaiso.

<sup>4</sup> Osoloso medee kibiya badeli goo oso Godeeye iba teiba dolone imapoo goomegeliso. Osoloso Godeeye iba teiba dolone imapoo goomogoga, goo oso gie badeli pidilei oso sibilei goo mapoo dulone goomoga sabolo bolone dabalame seliso.

<sup>5</sup> Osoloso dulone bolone dabalai goo hagoso goo mauwe malaime. Esiga goo omaga iba goohele sabolo dabalaima. Bei, Godeeye o Dio Tei imapoo tenee maga, yayo diya sooloo deli goo ee ibada sooloo ma kulodu teneega.

<sup>6</sup> Egeesi ma kulodu iba iso nediliyo pidilei tebile neme, Kelisoye iba pidilame Godeeye biame magoo mapoo simiso, yayo goo tokenee temelee odo iba halo talame.

<sup>7</sup> Odo heeso odo medee teedee badeli eyo gie badeli pidilame talai ee kalawa toowa. Esino a gooleedele, odo heeso odo tekepowa gie badeli ee pidilame talai malaiso.

<sup>8</sup> Esino Godeeye yayo sooloo deli goo toowa ee eligilone, Owolo Yesu Keliso meiyee diso, iba goo tokenee ma kulodu osee doboome iba halo talame.

<sup>9</sup> Esiga Kelisowo ta maga iba Godeeyo howo woola odo tekepo diga, Kelisoye iba Godeeye kamana maga gilimadoloso peegoo dilei goo ee iba diya gooleedooso.

<sup>10</sup> Esiga iba Godee mapoo ha tolone osee doboome, Owolo Yesu Kelisoye ta maga yayo iba see o odo diso. Esiga iba tei o odo dolone Kelisoye ta maga hogaduloso gie badeli too omaga see ibada gie badeli pidilei goo ee, iba diya gooleedooso.

<sup>11</sup> Osoloso goo hedebe ogoso koo moloso. Esino iba nose epedee Godee mapoo diya goomogoso. Bei, Godeeye ibada Lodee Yesu Keliso maga iba tei olo o odo diso.

### *Adameeye teli goo tosibume, Kelisoye gie badeli tosimi*

<sup>12</sup> Esiga odo hedebe Adameeye goo tokenee too maga goo tokenee susuga mipoo hamapoo simiso. Osoloso goo tokenee oso teli goo tosिमiso. Goo egeesi maga odo

susuga oso dia goo tokenee eyo nei ee tolone wediliso. Bei, odoo susuga oso goo tokenee olo tooga.

<sup>13</sup> Esiga Moseeeye tei magoo goo ee peledebelega molome, odoo susuga oso goo tokenee tolone debeiso. Esino egeesi ma kulodu Godeeye dibada goo tokenee ee hesigele. Bei, biame omapoo tei magoo goo ee mauwega.

<sup>14</sup> Esino Adam maga bei mooloogoloso abaga sibulone, Moseeeye badebei biame omapoo odoo susuga oso Adameeye goo moodoo maga wediaso. Egeesi ma kulodu Adameeye Godeeye tei magoo gababia egeesi masi hee diayo gababile. Esino diba susuga wedimo simiso.

Adameeye eli abo maga Kelisoye hamamee simi egeesi masi badebeiso.

<sup>15</sup> Esino Godeeye wulayo emegei dolone tenee sabolo, osoloso Adameeye goo tokenee too sabolo hedebeene. Bei, odoo hedebe Adameeye goo tokenee maga teli goo oso odoo susuga mapoo simiso. Esime nei Godeeye wulayo emegei dolone tenee sabolo, osoloso o howo woola tekepo badeli goo ee odoo hee maga odoo susuga mapoo simiso. Odoo egee Yesu Kelisoso.

<sup>16</sup> Esiga Godeeye wulayo emegei dolone tenee goo sabolo, osoloso Adameeye goo tokenee sabolo hedebeene. Bei, Adameeye goo tokenee hedebe too maga, odoo susuga oso Dou mi mapoo dili eli omapoo debeiso. Esino Godeeye wulayo emegei dolone tenee maga, iba susuga goo tokenee ma kulodu debei biame mapoo, yayo iba o howo woola odoo tekepo diso.

<sup>17</sup> Esiga odoo hedebeeso goo tokenee too maga, teli goo oso odoo susuga wiligi doloso badebeiso. Esino Godeeye wulayo emegei dolone tenee maga odoo tekepo deli oso kookaiyo badoboso gie badeli talaiso. Osoloso odoo hedebe Yesu Kelisoye goo moodoo maga, yayo wiligi doloso badeli mapoo dobolone, diayo wiligi odoo doloso yibolo hodobo bamalaiso.

<sup>18</sup> Egeesi ma kulodu odoo hedebeeso goo tokenee too maga tokenee eyo nei teli gooso odoo susuga mapoo simiso. Esino Kelisoye goo tekepo moodoo maga

odoo susuga ee Godeeye howo woola odoo tekepo doloso dimapoo badoboso kookaiyo gie badeli teneliso.

<sup>19</sup> Esiga odoo hedebeeso Godeeye to mapoo mesilega poogoo maga, odoo susuga ee goo tokenee teli odoo diso. Esino odoo hedebeeso Godeeye to mapoo mesie goo maga, odoo susuga ee Godeeye howo woola odoo tekepo dalaiso.

<sup>20</sup> Esiga Godeeye odoo mapoo o tei magoo goo ee teneeso, diayo goo tokenee bei egee tomolo ee hoodo agalame. Egeesi ma kulodu goo tokenee oso diya kauwume, nei Godeeye sooloo dolone pidi goo onosee abaga hoogoo diya kawuso.

<sup>21</sup> Esiga goo tokenee oso odoo susuga ee wiligi doloso molone, odoo susuga mapoo teli goo oso meleeso. Esino epedee hamapoo Godeeye sooloo dolone pidi goo oso wiligi doloso badolone, iba badoboso kookaiyo gie badeli talame ka ido duso. Bei, ibada Lodee Yesu Kelisoye goo moodoo maga iyo Godeeye howo woola tekepo dabalai goo ee olo tooso.

## 6

### *Goo tokeneeso kitulugu ee woolooma*

<sup>1</sup> Esiga iba goo tokenee osee tamalaiso, Godeeye sooloo dolone pidili oso kauwulame?

<sup>2</sup> Haye, iba egeesee selaime. Bei, iba Keliso sabolo taso. Esiga goo tokenee oso iba wiligi doloso koo doso. Esiga iba see kasalame goo tokenee ma kulodu osee ka dabalaiyo?

<sup>3</sup> Egeesi ma kulodu niba gooleedeleyo, iyo Yesu Keliso sabolo hedebe dalame howo olugu goo oso iba yibolo hodobo wedia goo ee ka eligiso?

<sup>4</sup> Esiga iba howo olugu biame omapoo iba Keliso sabolo wediloso yibolo hodobo midoosooso. Osoloso Ma Godeeye o kitulugu toowa oso Keliso ta maga see hogadiso. Esiga iba nosee gie badeli dia ee ma kulodu ka silesibe.

<sup>5</sup> Esiga iba howo olugu goo maga Keliso sabolo wediaga, yo ta maga hogadi egeesi masi iba nosee gie badeli dia mapoo hogadileiso.

<sup>6</sup> Osoloso iba olo gooleedooso, ibada goo nape ee Kelisobolo homo bulubo magoo mapoo olo enigaso, goo tokenee oso kitulugu ima kulodu egee molo ee me pagalame. Osoloso tokenee oso iba wiligi delega pagalame.

<sup>7</sup> Bei, iyo Keliso sabolo wedia biame omapoo goo tokenee oso kitulugu maga iba gilimadoloso peegoo peledabaso.

<sup>8</sup> Esiga iba tei toso, iyo Keliso sabolo wedia goo maga iba see gie badeli dia toloso yibolo hodobo dabalaiso.

<sup>9</sup> Bei, Kelisoye toloso see hogadi goo ee, iba olo gooleedooso. Esiga yo see talaime. Bei, teli goo oso see yo dagadilei ee kitulugu mauwe.

<sup>10</sup> Esiga Kelisoye hedebe ta goo omaga goo tokenee oso kitulugu ee wooloomaloso peegoo togobuguso. Osoloso yo epedee hamapoo gie badolone, Godeeyo goo ee dodolone ka badoso.

<sup>11</sup> Esiga niba nose egeesee goolee. Niba wediloso goo tokenee oso niba wiligi doloso koo debeli. Osoloso Yesu Kelisoye nimapoo gie badeli teneeso, niyo Godeeyo goo ee dodolone dabalame.

<sup>12</sup> Esiga niba suso goomoga goo ee deedeeyaga, nibada su teli hagee tokenee oso wiligi doloso na debeeye dee.

<sup>13</sup> Osoloso goo tokenee oso niba wiligi diyaga, nibada su ee goo tokenee mapoo na tenee. Esino nibada su oso goo tekepo talame Godee mapoo tenee. Bei, Godeeye niba wedia maga see gie badeli talai mapoo ido simiso.

<sup>14</sup> Esiga goo tokenee oso niba wiligi doloso na debeeye dee. Bei, tei magoo Godeeye Moses mapoo tenee oso niba wiligi doloso koo doso. Esino Godeeye sooloo dolone pidi goo oso epedee niba wiligi doloso ka doso.

*Goo tokenee poogoloso see  
goo tekepo mapoo mesimo silei*

<sup>15</sup> Egeesi ma kulodu tei magoo goo oso iba wiligi doloso koo doso. Esino epedee hamapoo Godeeye sooloo dolone pidili goo oso iba wiligi doloso ka doso. Esiga

iyo goo tokenee osee tamalai tekepowo? Haye, iba egeesee selaime.

<sup>16</sup> Bei, niyo mesiloso egee deedee du goo oso niba wiligi doloso egee do goo ee, niba gooleedeleyo? Egeesi ma kulodu niba goo tokenee mapoo mesiloso omapoo hamamee deedeega, niba wedileiso. Esino niyo Godeeyo to mapoo mesiloso omapoo hamamee deedeega, niba Godeeyo howo woola odoo tekepo dabalaiso.

<sup>17</sup> Esiga niba daga goo tokenee mapoo mesiloso deedee siliso. Esino ayo Godee mapoo goomoga to taka. Bei, to tekepo oso nimapoo sibume, niyo medee kookoodoloso dobolone to omapoo mesilone debeliso.

<sup>18</sup> Esiga niba epedee goo tokenee oso kitulugu maga peegoo peledoboloso see Godeeye niba wiligi doloso dobolone, yayo goomoga goo ee tolonge ka doso.

<sup>19</sup> Esiga to ayo nimapoo taka ee niba medee gooleedelega, ayo goo iyo gooleedoo maga ka wudu takooso. Esiga niba daga nei mauwe tou teli odoo masi dobolone, nibada su ee goo tokenee opusomo opusomo di ee talame teneliso. Esino niba nei mauwe tou teli odoo masi dobolone, epedee nibada su ee goo tekepo talame Godee mapoo tenee, niba tei o odoo doloso egee do goo ee woola yilige bigilame.

<sup>20</sup> Esiga niyo daga goo tokenee oso niba wiligi doloso gilimado di biame omapoo goo tekepo oso niba wiligi doloso gilimado dile.

<sup>21</sup> Osoloso niyo goo tokenee too oso nei ogoo goo tekepo nimapoo ka tosi boba? Mauwe. Esino wulo nimapoo teli goo ono tosi biliso. Esiga goo daga niyo temelee oso epedee hamapoo nimapoo ebili goo ka teneeso.

<sup>22</sup> Esino epedee hamapoo Godeeye niba tokenee oso kitulugu maga gilimadoloso peegoo peledabaso. Egeesi maga niba Godeeyo nei mauwe tou teli odoo doloso dobolone, o to mapoo mesimo silesiboso. Goo hagoso niba tei Godeeyo odoo doloso dobolone, badoboso kookaiyo gie badeli goo mapoo egee gilimado du goo ee woola



yilige bigiliso.

<sup>23</sup> Esiga goo tokenee eyo nei ee teli.\* Esino Godeeye emegei di bi ee kookaiyo badoboso gie badeli ibada Lodee Yesu Keliso maga imapoo wulayo ka tenemoloso.

## 7

### *Tei magoo goo oso iba wiligi doloso koo bamoloso*

<sup>1</sup> Esiga tei magoo goo gooleedoo odo emegei, niba olo gooleedooso, bei, odo epedee gie hagee do ee tei magoo goo oso wiligi doloso bamoloso. Esino diba wedioga, tei magoo goo oso diba wiligi doloso balaime.

<sup>2</sup> Egeesi ma kulodu dio masi hagoso. Soboso giso obuloso badoga, yo tei magoo ee dodolone hedebe omo dio badalaiso. Esino omo toga, giso huli eyo tei oso yo wiligi doloso koo badoso.

<sup>3</sup> Esino egeesi ma kulodu omo gie badolone see yayo giso hee mapoo obuoga, yo giso egee goo heli tooso. Esino yo omo toga, tei ogooso yo koo wiligi deeso. Esiga yo see giso hee mapoo obuoga, yo giso egee goo heli koo toso.

<sup>4</sup> Esiga tei telaga odo emegei, niba nose egeesi masi doso. Bei, Kelisoye ta maga niba nose odo wedia masi doso. Goo egeesi maga tei magoo oso niba wiligi doloso koo doso. Bei, tei magoo oso egee takoo goo ee odo wedia mapoo koo takooso. Esino ta maga hogadi Kelisoye niba olo o odo doloso ka badoso, niyo Godeeyo tou tolone dobolone homokoko masi ko palame.

<sup>5</sup> Egeesi ma kulodu iyo daga suso goomoga goo ee dodolone silesibume, tei magoo oso iyo goo tokenee talame see abaga hoogoo goomoga toowa meleeso. Esiga tokenee goomegeli goo oso iba teli mapoo gilimado diliso.

<sup>6</sup> Esino iyo Keliso sabolo wedia goo maga iba epedee tei magoo ma kuloduga peegoo peledoboloso ka doso. Esiga tei magoo kitulugu oso iba wiligi doloso koo doso. Osoloso iyo daga tei magoo goo ee dodomo

sili maga Godee mapoo mesiloso silesibiso. Esino iba epedee Dio Tei oso kitulugu maga Godee mapoo mesimo ka silesiboso.

### *Godeeye tei magoo goo oso ibada goo tokenee ee woola eligiliso*

<sup>7</sup> Esiga iyo tei magoo goo omapoo kasee takalaisomo? Tei magoo goo ee tokenee goowo? Haye, tokenee goonee. Esino tei magoo hogugu hagoso mo goo tokenee ee amapoo woola eligiliso. Egeesi ma kulodu tei magoo hee oso egeesee takooso, “Nayo emegei dia bi ee haga na goomege,” dee takooso. Esiga to hagee ayo hesigaloso gooleedooso, emegei dia bi goomegeli goo ee goo tokenee.

<sup>8</sup> Esino goo tokenee oso tei magoo ma kulodu eli ogoloso goo tokenee talame sooloo hapsageli goo ee amapoo teneeso. Esino tei magoo goo ee mauwe diepi, goo tokenee onosee kitulugu mauwe meliyo.

<sup>9</sup> Esiga ayo daga tei magoo goo ee gooleedelega badebei biame omapoo a goomoga sabolo badebeiso. Esino ayo tei magoo goo ee gooleedoloso badebei biame omapoo, ayo goo tokenee talame gilee goo ee bei mooloogooso.

<sup>10</sup> Esiga ayo goolee tei magoo goo oso amapoo gie badeli tenelai gooleeso, esino oso amapoo wulo teli goo tosimiso.

<sup>11</sup> Egeesi ma kulodu tokenee oso tei magoo ee ma kulodu eli ogoloso amapoo gamenee takoloso a teli mapoo ido diso.

<sup>12</sup> Esino tei magoo goo hagee medee tekepo, osoloso ee ma kulodu tokenee mauwe. Bei, tei magoo goo hagee Godee maga simi.

<sup>13</sup> Esiga tei magoo ee ayo takolone tekepo deli ososee amapoo teli goo tosimisomo? Haye, tei magoo hagoso amapoo teli goo tosibile. Esino goo tokenee oso amapoo teli goo tosimiso. Bei, goo tokenee oso tei magoo ee ma kulodu tou tolone a tokenee mapoo gido diso. Esiga a epedee ogooso, goo tokenee ee diya tokenee.

### *Ibada sooloo ma kulodu ha egee tomolo eyo goo*

**6:23:** Loum 5:12, 15 \* **6:23:** *teli* eyo bei ee suso talai ee koo takooso. Esino dioso Godee maga puloso Dou mi mapoo toodalai goo ee takooso. **7:4:** Loum 6:2, 11 **7:6:** Loum 8:2; 6:4 **7:7:** Exo 20:17; Deut 5:21 **7:11:** Gen 3:13 **7:12:** 1Tim 1:8

<sup>14</sup> Esiga iba gooleedooso, tei magoo goo ee Dio Tei maga siboso. Esino a mi odo. Esiga goo tokenee talame goomegeli oso a wiligi doloso ka ido siloso.

<sup>15</sup> Goo ayo teli eyo bei ee, a koo gooleedeli. Bei, ayo goo tekepo talame goomegeli goo ee koo teli. Esino goo tokenee ayo talame koo goomegeli ee teliso.

<sup>16</sup> Osoloso goo ayo koo goomegeli ee moodeli oso, ayo tei magoo goo ee goo tekepo deeso.

<sup>17</sup> Egeesi ma kulodu ayo goo tokenee tolone koo badoso. Esino tokenee ama kulodu egee molo oso goo tokenee ka tomoloso.

<sup>18</sup> Esiga a gooleedooso, ama kulodu goo tekepo hee mauwe. Ayo suso goomegeli goo ee takooso. A goo tekepo talai ee goomegeliso, esino goo hagee talai a koo tebili.

<sup>19</sup> Bei, ayo goo tekepo talai doloso goomegeli goo ee telega, see goo tokenee ayo goweli ee teliso.

<sup>20</sup> Esiga ayo koo goomegeli goo ee toga, egee tei ayo koo toso. Esino tokenee ama kulodu egee molo oso ka toso.

<sup>21</sup> Esiga a ogoso, ama kulodu goo hageesi moloso. Ayo goo tekepo tomo silei ee a goomogoga, goo tokenee oso a hamaga takeliso.

<sup>22</sup> Esino egeesi ma kulodu a goomogolone, mo sooloo ma kuloduga Godeeye tei magoo goo ee tekepo deliso.

<sup>23</sup> Esino mo sooloo ma kulodu ha teli goo osee moloso. Bei, suso goomoga goo oso ayo goo tekepo talai doloso goomegeli goo mapoo ha ka tomoloso. Goo egeesi maga goo tokenee oso a neliga moso ma kulodu toosooloso badebei masi ka badoso.

<sup>24</sup> Esiga ye-ee, a diya gooholoso, a su hegi sabolo badoga. Mo suso a teli mapoo egee ido du, ee ma kuloduga odo agayo a peegoo ka tamagalaisomo?

<sup>25</sup> Esino ayo Godee mapoo goomoga to taka. Bei, ibada Lodee Yesu Kelisoye a pidiliso.

Egeesi ma kulodu mo gooso Godeeye tei magoo goo ee dodomo silame goomegeliso. Esino suso goomoga goo amapoo egee

molo oso a tokenee mapoo gido diliso.

## 8

### *Dio Tei oso wiligi doloso badalai goo*

<sup>1</sup> Esiga edebeeyo Yesu Keliso sabolo hedebe doloso doga, Godeeye dimapoo dibada goo tokenee eyo nei tenelaime.

<sup>2</sup> Bei, tokeneeso kitulugu oso iba teli mapoo gilimado diso. Esino epedee Yesu Kelisoye kitulugu maga gie badeli teneli Dio Tei oso iba peegoo gilimado diso.

<sup>3</sup> Egeesi ma kulodu tei magoo goo oso iba goo tokenee maga peegoo gilimado dilei tebile. Bei, suso goomoga goo oso tei magoo goo omapoo ki mauwe pegeli goo teneliso. Esino hedebe Godee yo teiba. Esiga yayo Owolo mipoo hamapoo meiyee diso. Esemee yo goo tokenee teli mi odo iba egeesi paso. Osoloso yayo ibada goo tokenee eyo nei ee toloso taso. Esiga Godeeye goo tokenee oso kitulugu ee guobuguso.

<sup>4</sup> Esiga Godeeye goo hagee moodooso, iso goomoga goo ee telega dobolone, Dio Tei mapoo mesilone iyo tei magoo oso takolone tekepo dee takeli goo ee talame.

<sup>5</sup> Esiga suso goomoga goo mapoo dodomo sili odo ee hedebe suso goomoga goo ee talai ono goolee sabolo silesibiliso. Esino Dio Tei mapoo dodomo silesibili odo ee hedebe Dio Tei oso goomoga goo ee talame goolee sabolo silesibiliso.

<sup>6</sup> Egeesi ma kulodu edebeeyo suso goomoga goo ee talame goolomo siloga, yo talaiso. Esino Dio Tei oso goomoga goo ee talame goolomo siloga, yo gie badeli sabolo osoloso mesiee goo talaiso.

<sup>7</sup> Esiga suso goomoga goo tomo silesibili odo oso Godee mapoo ha tomoloso. Bei, odo egeesi oso Godeeye tei magoo mapoo dodomo silesibilei diya gowoolone, tei magoo ee dadalai koo tobuoso.

<sup>8</sup> Goo egeesi maga suso goomoga goo mapoo dodomo silesibili odo maga Godeeye goomoga goo talai koo tobuoso.

<sup>9</sup> Esino egeesi ma kulodu suso goomoga goo oso niba wiligi doloso koo gilimado silesiboso. Esino Godeeyo Dio Tei nima

kulodu egee bado oso niba wiligi doloso ka gilimado silesiboso. Esiga edebeeyo Kelisowo Dio Tei me badoga, yo tei Kelisowo odoonee.

<sup>10</sup> Goo tokenee eyo nei oso nibada su mapoo teli goo tosibileiso. Esino Kelisoye nima kulodu tei badoso. Esiga nibada dio ee gie badoso. Bei, Godeeye niba o howo woola odoo tekepo diso.

<sup>11</sup> Esino nibada su ee wedioga, Godeeye o Dio Tei maga nibada su wedia mapoo see gie badeli tenelaiso. Bei, Yesu Keliso ta maga see hogadi Godee o Dio Tei ee nima kulodu badoga.

<sup>12</sup> Esiga tei telaga odoo emegei, goo tokenee ibada suso goomegeli goo oso iba wiligi doloso koo bamoloso. Esiga iyo goo tokenee talai goo eyo bei mauwe.

<sup>13</sup> Bei, niyo goo hageesi tomo silesiboga, niba talaiso.\* Esino niba Dio Tei oso kitulugu maga goo tokenee niyo goomegeli goo nima kulodu egee molo ee wooloomaga, niba badoboso kookaiyo gie badalaiso.

<sup>14</sup> Bei, odoo Godeeyo Dio Tei oso wiligi doloso ido duga, odoo egee bia ee tei Godeeyo owolo dio doloso ka doso.

<sup>15</sup> Esiga Godeeye imapoo Dio Tei tenee oso iba nei mauwe tou teli odoo dolone Godeebolo obulone dabalame ka tenele. Esino yayo imapoo Dio Tei tenee ogoso pidi maga iba owolo dio dolone yimapoo "Ma, mo Ma," dolone ka doso.

<sup>16</sup> Osoloso Godeeyo Dio Tei oso iba Godeeyo owolo dio doloso egee do goo ee ibada sooloo ma kulodu takoomoloso.

<sup>17</sup> Esiga iba Godeeyo owolo dio doloso hagee do goo maga, goo susuga Godeeye imapoo tenelame to edidi magoo ee iyo hamamee talaiso, Kelisoye too egeesi masi iyo talaiso. Bei, iba Kelisoye dala too eyo su ee iyo toga, iba nosee yibolo hodobo toowa doloso Kei mi mapoo dabalaiso.

### *Hamamee toowa doloso dabalai goo*

<sup>18</sup> Esiga a tei toso, iyo epedee biame hamapoo dala hagee tomolo ee haga goo toowanee. Esino Godeeye toowa doloso

badeli mapoo iyo yibolo hodobo dabalai goo ono diya toowa.

<sup>19</sup> Esiga bi susuga Godeeye moodoo oso Godeeyo owolo dio ee gilimadoloso woola peledabalai goo ee dulone goomoga sabolo bolone ka doso.

<sup>20-21</sup> Egeesi ma kulodu Godeeye goomoga goo maga bi susuga yayo moodoo ee teliso kitulugu sabolo, osoloso hunili gooso kitulugu ee ma kulodu meleeso. Esino Godeeye tei owolo dio ee gilimadoloso woola peledabalai biame omapoo, bi susuga Godeeye moodoo ee goo hagee ma kuloduga gilimadoloso peegoo peledabalaiso. Esiga biame omapoo bi susuga yayo moodoo oso Godeeyo owolo dio ibolo hodobo toowa doloso dabalaiso. Esino epedee hamapoo goo susuga oso peledabalai biame ee bolone, bi susuga Godeeye moodoo oso goomoga sabolo ka bamoloso.

<sup>22</sup> Esiga iba gooleedooso, soboso holo soomagalame dala teli egeesi masi, bi susuga Godeeye moodoo oso toowa doloso dabalai biame ee bolone, googa sabolo abaga simino epedee hamapoo dala ma kulodu ka doso.

<sup>23</sup> Esino hedebe bi yayo moodoo oso peledabalai biame ee koo baso. Esino Dio Tei telaga odoo iba nosee dala ma kulodu googa sabolo dobolone, biame oso peledabalai ee bolone ka doso. Bei, goo susuga Godeeye imapoo tenelame to edidi magoo ee daga malalo Dio Tei teneeso. Esiga biame omapoo Godeeye iba owolo dio doloso hagee do goo ee woola yiligebuguloso, see yayo imapoo su dia tenelaiso.

<sup>24</sup> Esiga Godeeye ibada gie badeli olo pidiga, iba epedee goo susuga imapoo tenelame yayo to edidi magoo ee talame dulone bolone ka doso. Esino goo egee iyo olo too daga, iyo goo egee balai eyo bei me.

<sup>25</sup> Esino iyo duloso bolone hagee do goo ee iyo koo ogoso. Esiga iba mesie sabolo bolone ka doso.

### *Dio Tei oso iba pidilone Godee mapoo takeli*

**8:10:** Gal 2:20    **8:13:** Gal 6:8; Kol 3:5    \* **8:13: talaiso** eyo bei ee suso talai ee koo takooso. Esino dioso Godee maga puloso Dou mi mapoo toodalai goo ee takooso.    **8:15:** 2Tim 1:7; Maka 14:36; Gal 4:5-7; Yili 21:7    **8:16:** 2Kol 1:22    **8:20-21:** Gen 3:17-19; Isa 11:6-9    **8:23:** 2Kol 5:2-4

<sup>26</sup> Osoloso iyo ki me poogoo ee ogoloso Dio Tei oso iba pidiliso. Bei, Godee mapoo medee tekepo takeli ee, iba gooleede. Esiga Dio Tei oso ibada sooloo ma kuloduga iba halo Godee mapoo takeliso. Esino yayo iba halo Godee mapoo takeli to eyo bei ee iyo takalai koo tebili.

<sup>27</sup> Esino odoo sooloo ma kulodu gooleedoo Godeeye Dio Tei oso takeli goo ee yo gooleedooso. Bei, Dio Tei oso Godeeyo odoo halo yimapoo takolone, Godeeye goomoga goo sabolo tobuloso takeliso.

### *Godeeye o odoo hesigeli goo*

<sup>28</sup> Esiga iba gooleedooso, goo susuga ma kulodu Godeeye yo diya gweli sabolo debeli odoo mapoo goo tekepo moodoolone ka badoso. Bei, Godee eyo to edidi magoo ee dodolone, yayo iba hesigaloso olo owolo dio diso.

<sup>29</sup> Esiga Godee eyo hesiga odoo ee daga hoogoo yo olo gooleedoloso badebeiso. Osoloso yayo diba olo hesigaso, diayo see Owolo Yesu masi dabalame. Egeesi ma kulodu iba ogoso, Yesuye Godeeyo odoo susuga ee ma kulodu yayo daga holo masi ka badoso.

<sup>30</sup> Esiga Godeeye hesiga odoo ee eyo olo gilimadooso. Osoloso yayo gilimadoo odoo ee olo odoo tekepo diso. Esiga o howo woola odoo tekepo deli mapoo yibolo toowa doloso badeli goo ee yayo dimapoo teneeso.

### *Goo heeso iba Godeeye sooloo deli maga domo pileime*

<sup>31</sup> Esiga iyo goo hamaga kasee takalaisomo? Godeeye iba dokolo badoso. Esiga odoo heeso imapoo ha toga, yayo iba daga dileisomo? Haye.

<sup>32</sup> Esino Godeeye tei Owolodee ee goodegele. Bei, yayo Owolo ee ibada goo tokenee eyo nei talame imapoo wulo wulayo teneeso. Godeeye goo egeesi moodooga, see yayo bi susuga imapoo wulayo tei tenelaiso.

<sup>33</sup> Esiga Godeeye hesiga odoo ee see odoo agayo takolone odoo tokenee dee ka takalaiyo? Odoo mauwe. Bei, Godeeye diba olo odoo tekepo diso.

<sup>34</sup> Osoloso Godeeye hesiga odoo ee see odoo agayo takolone Dou Mi mapoo dileiso, dee ka takalaiyo? Odoo mauwe. Bei, Yesu Kelisoye toloso see hogadiloso Amayo dee deede dokolo mapoo badolone iba halo Godee mapoo ka takomoloso.

<sup>35</sup> Esiga ogoo gooso iba Kelisoye sooloo deli goo maga domo ka pileiyo? Hegi goo sabolo osoloso dala goo sabolo oso iba Kelisoye sooloo deli goo maga domo pileisomo? Haye. Osoloso hodia goo sabolo osoloso bi mauwe dabalai goo sabolo oso iba Kelisoye sooloo deli goo maga domo pileisomo? Haye. Osoloso dala teneli goo sabolo, osoloso odoo heeso iba wooloomaga, goo oso iba Kelisoye sooloo deli goo maga domo pileisomo? Haye, egeese selaime.

<sup>36</sup> Esiga Godeeyo to booka mapoo hogugu oso egeese takooso,

“Godee, nee goo maga edebeeyo biame susuga iba piligilame seliso.

Osoloso nee goo maga iba sipi be masi gilimadoloso piligilame ka duso.”

<sup>37</sup> Esino hegi goo toowa susuga hagee ma kulodu iba sooloo deli Godeeye kitulugu maga iyo olo dagadileso ka doso.

<sup>38</sup> Bei, a gooleedooso, goo heeso iba Godeeye sooloo deli goo maga domo pileime. Egeesi ma kulodu teli goo sabolo, osoloso gie badeli goo oso iba Godeeye sooloo deli goo maga domo pileime. Osoloso Godeeyo momaiye sabolo, osoloso bo holo oso iba Godeeye sooloo deli goo maga domo pileime. Osoloso biame epedee hamapoo goo egee peledoboomo du sabolo, osoloso hamamee peledabalai goo oso iba Godeeye sooloo deli goo maga domo pileime. Osoloso goo opusomo opusomo di oso kitulugu oso iba Godeeye sooloo deli goo maga domo pileime.

<sup>39</sup> Osoloso bi susuga kei ma dokodoo egee molo sabolo, osoloso bi susuga mipoo hamapoo egee molo oso iba Godeeye sooloo deli goo maga domo pileime. Osoloso bi susuga Godeeye moodoo ee ma kulodu bi heeso iba Godeeye sooloo deli goo maga domo pileime. Esiga Godeeye



sooloo deli goo hagee ibada Lodee Yesu Keliso maga imapoo ka yilige bugu moloso.

## 9

### *Godeeye Isalael odoo ee tei o odoo doloso hesiga*

<sup>1-3</sup> Esiga a Keliso sabolo hedebe doloso badolone, tei goodee hagee nimapoo ka taka. Osoloso ayo wulo gamenee koo takooso. Dio Tei oso mo sooloo ma kuloduga gweli goo ee ka bamoloso. Esiga mo sooloo ma kuloduga gweli goo ee epedee nimapoo tei goo taka goo ee, a gooleedooso. To ee hagoso, ayo nimapoo takolone mo odoo Isalael bia ee halo diya gooholone, a su hegi sabolo ka badoso. Bei, diayo Godeeye goomoga goo ee koo dedeliga. Esiga a teiba daga, a goomogoso, mo odoo oso mo debi ee toloso Keliso sabolo hedebe doloso dabalai. Osoloso ayo dia debi ee toloso Godeeye kamana ee toloso a Keliso maga puloso badalai. Esino ayo egeesee selai, a tebile.

<sup>4</sup> Egeesi ma kulodu Isalael odoo hagee bia Godeeye tei owolo dio diso. Osoloso dimapoo yayo toowa doloso badeli goo ee eligiso. Osoloso yayo Isalael odoo sabolo to magooso. Osoloso yayo tei magoo ee dimapoo teneeso. Osoloso o hu dokodoo poudoolone yimapoo goomoga teneli goo ee dimapoo olo eligiso. Osoloso yayo dimapoo to abo edidi magooso.

<sup>5</sup> Egeesi ma kulodu dibada amawe dio ee Eibalaham, Aisek osoloso Yekob. Osoloso Keliso onosee mipoo hamapoo sibilesa odoo hagee bia dia soosoo ma kuloduga odoo su paso. Esiga Keliso ee Godeeso. Esiga odoo susuga oso yimapoo goomoga poudoolone kookaiyo osee dabalai tekepo. Bei, bi susuga Godeeye wiligi doloso ka badoso. Goo hagee tei goo.

<sup>6</sup> Esiga Godeeye Isalael odoo mapoo to edidi magoo ee gababiasomo? Haye, gababile. Bei, Isalael odoo susuga ma kulodu odoo abo ee tei Isalael odoonee.

<sup>7</sup> Osoloso Eibalahameeyo amawe dima kulodu odoo abo ee tei Eibalahameeyo amawe dionee. Bei, Godeeye Eibalaham

mapoo egeesee takaso, “Tei namawe dio ee hedebe nowolo Aisek maga balaiso,” diso.

<sup>8</sup> Goo hagoso egeesee eligiso, Eibalahameeyo amawe dima kulodu, odoo abo ee tei Godeeyo owolo dionee. Esino Godeeye to edidi magoo goo mapoo tei too goo maga soolooga magoo ee, tei Godeeyo owolo dio oso.

<sup>9</sup> Bei, Godeeye Eibalaham mapoo to edidi magolone egeesee takaso,

“Ayo dugo hedebe poogoloso see wedi siboga, nosobo Sela giso holo soomago molo agalaiso,” dee takaso.

<sup>10</sup> Esiga holope hagee ibada amawe Aisek. Yo kauwuloso Lebeka huso. Osoloso osobo Lebeka koowasi moodooloso, giso holo bakadio biame hedebe mapoo soomagooso.

<sup>11-12</sup> Egeesi ma kulodu giso holo bakadio hagee soomagelega badoboome, Godeeye Lebeka mapoo egeesee takaso, “Nowolo daga holo oso omolowo to mapoo mesimo sileiso,” diso. Esiga o bakadio oso goo moodolai ee gooleedelega doboome, Godeeye to hagee malalo olo takaso. Esiga Godeeye o odoo egee hesigamolo ee yayo goo moodoo ogoloso koo hesieli. Esino yo wulo eyo goomoga goo ee dodolone ka hesieli.

<sup>13</sup> Esiga Godeeyo to booka mapoo hogugu oso egeesee takooso,

“Ayo Yekob ono diya goomegeliso. Esino Iso haga koo goomegeli,” dee takooso.

<sup>14</sup> Egeesi ma kulodu iyo kasee takalaiyo? Godee yo hedebe hediliwe pidili Godeeyo? Haye, yo egeesee koo seli.

<sup>15</sup> Bei, Godeeye Moses mapoo egeesee takaso,

“Ayo sooloo deli goo ee odoo hee mapoo eligilei goomogoga, ayo yimapoo eligileiso. Osoloso ayo odoo hee pidilame goomogoga, ayo yo pidileiso,” diso.

<sup>16</sup> Esiga Godeeye hesiga goo ee edebeeyo goomoga goo maga, osoloso diayo goo moodeli ee ogoloso koo hesigeli. Esino

Godeeye wulo eyo sooloo dala maga odo ka hesigamoloso.

17 Esiga o booka mapoo Godeeye Isipi odo dia wiligi odo taba mapoo egeese takaso,

“Ayo namapoo wiligi odo tabalame hu teneeso,

wulo namaga ayo kitulugu odo susuga mapoo yilige bigilame.

Osoloso mo goo dudobuguloso mipoo hamapoo debeli odo susuga oso dulame,” dee takaso.

18 Esiga iba gooleedooso, Godeeye odo hee pidilame goomogoga, yayo yo pidileiso. Osoloso yayo koo mesili goo ee odo hee mapoo tenelame goomogoga, yayo tenelaiso.

*Godeeye kamana goo sabolo osoloso sooloo deli goo sabolo*

19 Esiga odo heeso amapoo egeese woosalai malaiso, “Godee eyo odo abo mapoo koo mesili goo ee ka tenemolo daga, yayo see kasi maga odo egee bia odo tokenee dee ka takalaiyo? Bei, odo agayo Godeeye goomoga goo ee hamaga takalai ka teibayo?”

20 Esino emegei, nayo Godee mapoo hageese woosalai tekeponee. Bei, no wulo mi odo. Esiga wudu taka to hagoso. Katolo bogoso moodoo oso yo moodeli odo mapoo takolone, “Nayo kasalame a egeese ka moodoowo?” dee takalai tekeponee.

21 Bei, katolo moodeli odo yayo bogo hedebe egee toloso, katolo hee mapoo wulo biame susuga nei magalai sabolo, osoloso goo toowa biame mapoo katolo hee mapoo nei magalai ee moodoolai, yimapoo kitulugu moloso.\*

22 Egeesi ma kulodu Godee yo egeeseelone badoso. Yimapoo kitulugu moloso, yayo kamana sabolo osoloso yayo kitulugu ee odo mapoo eligilei. Esino odo yayo kamanali oso teli mapoo diyadeega, yayo ogoloso dia goo tokenee

eyo nei saga tenelega mesie sabolo ka bamoloso.

23 Osoloso yimapoo kitulugu moloso, yayo sooloo deli odo mapoo yayo toowa doloso egee bado goo ee eligilei. Bei, odo egee bia eyo olo hesigaso, yayo toowa doloso egee bado mapoo gasibe dalame.

24 Esiga odo Godee yayo toowa doloso egee bado mapoo gasibe dalame, hedebe Yu odo ee hesile. Esino yayo Yu odoonee sabolosee hesiaso. Esiga odo yayo hesia ee ibaso.

25 Godeeye Yu odoonee dia goo maga Hoseya booka mapoo hogugu oso egeese takooso,

“Odo daga ayo mo odo dele poogoo egee bia ee see epedee mo odo dalaiso. Osoloso ayo sooloo delega debei odo egee bia ee, see epedee ayo sooloo dalaiso,” diso.

26 Daga Godeeye dimapoo takolone,

“Niba tei mo odoonee,” diso.

Esino see yayo dimapoo takolone,

“Niba gie badeli Godeeyo owolo dio dalaiso.”

27 Osoloso Aisayaye Isalael odo dia goo maga takolone egeese takaso,

“Isalael odo oso diya balone booboos masi malaiso.

Esino dima kulodu wulo aboso gie badeli talaiso.

28 Bei, Lodeeye mipoo hamapoo debeli odo dia goo tokenee eyo nei saga teneloso hosudalaiso.”

29 Osoloso Aisayaye see tobu Isalael odo dia goo maga egeese takaso,

“Kitulugu Godeeye ima kulodu odo abo pidilega poogoo diepi,

Sodom mi sabolo osoloso Gomola mi sabolo\* douso nadolone odo susuga piligu egeesi masi iba nose piligiliyo,” dee takaso.

*Isalael odooso to tekepo mapoo tei tele poogoo goo*

30 Esiga to ayo taka goo eyo bei ee egeesi moloso. Yu odoonee oso Godeeyo howo

9:17: Exo 9:16 9:20: Isa 29:16; 45:9 9:21: Jer 18:6 \* 9:21: To hageeyo bei ee egeesi moloso. Godee eyo goomoga goo ee dodolone, odo heeso goo toowa talame, osoloso odo heeso goo pepooko talame hesilei, yimapoo kitulugu moloso. Bei, Godeeye odo susuga ka moodooga. 9:25: Hos 2:23 9:26: Hos 1:10 9:27: Isa 10:22-23

9:29: Isa 1:9 \* 9:29: **Sodom mi sabolo osoloso Gomola mi sabolo** - Eibalahameeye badebei biame mapoo, Godeeye mi bakadio hagee dou gigoogooso. Bei, odo egee biaso goo tokenee tolone doboome.

woola tekepo doloso badalai goo ee esile. Esino dieso tei too goo maga Godeeye o howo woola diba odoo tekepo diso.

<sup>31</sup> Esino Isalael odoo oso Godeeyo howo woola tekepo doloso dabalai goo ee esilone, dibada tei magoo ono medee dodolone debeiso. Esino goo oso diba odoo tekepo dele.

<sup>32</sup> Bei, diayo tei tele poogoloso, wulo dieso kitulugu maga Godeeyo howo woola odoo tekepo dalame seeso. Goo egeesi maga diba yo odoo tagodibigili mapoo tagodibuguloso ka misigedibuo demeleso.

<sup>33</sup> Bei, Godeeyo to booka mapoo hogugu oso egeesee takooso,

“Ayo Sayon mi mapoo yo magalaiso.\*

Yo omapoo odoo tagodibuguloso ka misigedibuo demalaiso.

Esino edebeeyo yimapoo tei toga, goo omaga goohele sabolo badalaime. Bei, goo hagoso goo mauwe malaime.”

## 10

<sup>1</sup> Esiga tei telaga odoo emegei, ayo mo sooloo ma kuloduga Isalael odoo halo Godee mapoo takolone badeliso, dia gie badeli pidilame.

<sup>2</sup> A gooleedooso, Isalael odoo diba Godeeye goomoga goo ee dadalame diya goomegeliso. Esino Godeeye goomoga goo ee, diba medee kibiya gooleedele.

<sup>3</sup> Osoloso Godeeye o howo woola odoo tekepo dolone egee do goo onosee, diba gooleedele. Esino dieso nediliyo kitulugu maga Godeeyo howo woola odoo tekepo dalame, dibada tei magoo ee dodolone egee do oso diba koo pidili. Goo egeesi maga diayo Godeeyo goo maga o howo woola tekepo dabalai goo ee talai, diba gowooso.

<sup>4</sup> Esino Kelisoye goo moodoo maga, edebeeyo Godeeyo howo woola tekepo doloso badalame, tei magoo Godeeye Moses mapoo tenee diayo ee dadalai ee bei

mauwe. Bei, edebeeyo Keliso mapoo tei toga, nei Godeeye o howo woola yo odoo tekepo dalaiso.

*To tekepo oso gie badeli pidili  
goo ee tosimiso*

<sup>5</sup> Tei magoo ee deede mago edebeeyo Godeeyo howo woola tekepo badeli goo maga Moseseeye egeesee hoguguso, “Edebeeyo gie badeli talai goomogoga, yo tei magoo susuga ee dodolone ka badebee,” diso.

<sup>6</sup> Esino tei too goo maga Godeeyo howo woola tekepo badeli odoo oso egeesee takalaime, “Odoo agayo Keliso ido meilame Kei mi mapoo ka palaisomo?” diso.

<sup>7</sup> Osoloso odoo ogoso see egeesee takalaime, “Odoo agayo Keliso ta maga hogadilame, odoo wediayo dioso debeli mi mapoo ka meileisomo?” dee takalaime.\*

<sup>8</sup> Esino hedebe Keliso mapoo tei teli goo oso gie badeli pidili goo ee ka tosibili. Bei, Keliso mapoo tei telaga odoo oso Moseseeye taka egeesee takalai teiba, “Godee o to ee nama koolapoo moloso.

Osoloso to egee nee maga mapoo, osoloso nee sooloo ma kulodu moloso.”

To hagoso Keliso mapoo tei toloso badeli goo ee eligiliso. Egeesi ma kulodu to hebebe hagonosee iyo odoo abo mapoo ka takomo silesiboso.

<sup>9</sup> Esiga nayo takolone, Yesu yo Wiligi Odoo doloso yiligebuguloso, see yo Godeeye ta maga hogadi goo mapoo nee sooloo ma kulodu tei toga, nee gie badeli pidileiso.

<sup>10</sup> Bei, nee sooloo ma kuloduga tei too goo maga, Godeeye o howo woola no odoo tekepo dolone ka badoso. Osoloso nee magaso takolone Yesu yo Wiligi Odoo doloso yilige bugu goo maga nee gie badeli pidileiso.

<sup>11</sup> Bei, Godeeyo to booka mapoo hogugu oso egeesee takooso,

“Edebeeyo Keliso mapoo tei toga, goo omaga goohele sabolo badalaime.

**9:32:** Isa 8:14    **9:33:** Isa 28:16; 1Pita 2:6    \* **9:33:** To hageeyo bei ee Godeeye odoo eyo hudi magoo Keliso ee Isalael odoo mapoo diye dalaiso.    **10:5:** Lev 18:5    **10:6:** Deut 30:12-14    \* **10:7:** To hageeyo bei ee egeesi moloso. Godeeyo howo woola tekepo badeli odoo oso egeesee takalaime. Bei, diayo tei too goo maga, Keliso yo dibolo hodobo olo badoga. Osoloso Keliso yo ta maga hogadi goo ee, diayo tei too goo maga diba gooleedooso.    **10:11:** Isa 28:16

Bei, goo hagoso goo mauwe malaime,” deeso.

<sup>12</sup> Goo egeesi ma kulodu iyo ogoso, Yu odo sabolo osoloso Yu odoonee sabolo hedebe. Bei, Lodee hedebe yo odo susuga dia wiligi odo. Goo egeesi maga odo susuga oso diba pidilame yimapoo woosolone egee do mapoo, yayo goo tekepo susuga ka tenemoloso.

<sup>13</sup> Bei, Godeeyo to booka mapoo hogugu oso egeesee takooso,

“Edebeeyo yo Lodeeye pidilame yimapoo takooga,  
o gie badeli pidileiso.”

<sup>14</sup> Esiga edebeeyo Lodee mapoo tei tel-ega doga, diba pidilame yimapoo kasee woosalaisomo? Osoloso o goo ee dulega doga, diayo yimapoo kasee tei talaisomo? Osoloso odo heeso to tekepo dimapoo takelega poogooga, diba kasee duleisomo?

<sup>15</sup> Osoloso to tekepo hagee takalame diye dilega poogooga, diba to hagee kasee takalaisomo? Godeeyo to booka mapoo hogugu oso egeesee takooso,

“To tekepo takomo silesibili odo oso to tosiboga ogoloso odo susuga diya goomegeliso.”

<sup>16</sup> Esino ee ma kulodu haga odo susuga oso tei tele. To hamaga Aisayaye Godeeyo to booka mapoo egeesee hoguguso,

“Lodee, ibada to mapoo odo agayo ka tei toowo?”

<sup>17</sup> Esiga edebeeyo Kelisowo goo ee takomo silesibi goo maga, odo aboso o goo duliso. Osoloso diayo o goo du maga, yimapoo tei teliso.

<sup>18</sup> Egeesi ma kulodu ayo Isalael odo dia goo maga ka woosowa. Diba to tekepo olo dusomo? O. Diba olo dulugaso. Bei, Godeeyo to booka mapoo hogugu oso egeesee takooso,

“Dia to\* mi susuga mapoo dudobuguso.  
Esiga odo susuga oso to hagee duso.”

<sup>19</sup> Esino Isalael odo oso to tekepo hagee duloso gooleedoosomo? O. Diba gooleedooso, esino medee kibiya tei tele. Osoloso Moseseeye egeesee hoguguso,

“Godeeye egeesee takaso,  
‘Ayo mo tei magoo gooleedele poogoo Yu odoonee ee pidiga,  
nei Isalael odo niyo dimapoo koolone kamana sabolo dabalaiso.’”

<sup>20</sup> Osoloso Aisayaye Godeeye taka to hagee ebilega egeesee takaso,

“Odo a esilega poogoo oso a egeiso.  
Osoloso odo amaga woosele poogoo mapoo ayo mo goo ee dimapoo yilige buguso.”

<sup>21</sup> Esino Godeeye Isalael odo dia goo maga egeesee takaso,

“Ayo biame susuga diba gilimalame mopoodoo doloso badebeiso.  
Esino diba gowoolone mo to duloso mesile poogooso.”

## 11

### *Isalael odo ee Godeeye pegele*

<sup>1</sup> Esiga goo ayo hagee takoo ee, Godeeye Isalael odo gowoolone tei peegoo poogoosomo? Haye, pegele. Bei, anosee Isalael odo. Osoloso anosee Eibalahameeyo amawe, Benyamineeyo bala ma kulodu badeli.

<sup>2</sup> Osoloso Godeeye daga hesia odo ee gowoolone peegoo pegele. Egeesi ma kulodu Godeeyo to booka mapoo hogugu oso Ilayaye taka ee medee goolee. Bei, Isalael odo ee gowoolone Godee mapoo egeesee takaso,

<sup>3</sup> “Wiligi odo Godee, Isalael odo hagee biaso to namaga toloso kokodo takomo silesibili odo ee piliguloso, see namapoo emegei di bi tenelame sili dousulu susuga sabolo guobuguso. Osoloso namaga to toloso kokodo takomo sili odo hedebe ano badoso. Esino diayo anosee wooloomalame ka seeso,” dee takaso.

**10:12:** Diye 15:9    **10:13:** Joel 2:32    **10:15:** Isa 52:7    **10:16:** Isa 53:1    **10:18:** Psa 19:4    \* **10:18:** *Dia to* ee odo agamo towo? Osoko, giwo, osoloso a oso Godeeye kitulugu ee woola yilige bigiliso. Esiga dia to masi oso mi susuga mapoo dudobuguso.    **10:19:** Deut 32:21    **10:20:** Isa 65:1    **10:21:** Isa 65:2    **11:1:** 1Sam 12:22; Psa 94:14; Pil 3:5    **11:3:** 1Ki 19:10, 14    **11:4:** 1Ki 19:18



<sup>4</sup> Esino Godeeye Ilayayo to su mapoo kasee takasomo? Yayo Ilaya mapoo egeesee takaso, “Amapoo tei teli odo hedebe nayo koo badoso. Bei, mo odo 7,000 doso, diba gamenee godee Bal deli eyo hu dokodoo koo poudili,” diso.

<sup>5</sup> Esiga epedee hamapoo osee moloso, Isalael odo haga susuga oso Godee maga peegoo kukulo dile. Esino Isalael odo abo yayo sooloo dolone pidi maga yimapoo tei talame diba olo hesiaso.

<sup>6</sup> Esiga Godeeye sooloo dolone pidili maga o odo hesieliso. Egeesi ma kulodu diayo goo tekepo tolone doga koo seli. Bei, Godeeye odo hesieli goo ee wulo ede-beeyo goo tekepo tolone doga ka hesieli diepi, nei yayo sooloo dolone pidili goo ee goo mauwe meliyo.

<sup>7</sup> Esiga Isalael odo oso dieso nediliyo Godeeyo howo woola tekepo dabalame diya kitulugiliso. Esino diba goo hagee tele. Esino hedebe Godeeye hesia ono yayo o howo woola olo odo tekepo diso. Esino odo aboso Godeeyo to dulei gowoolone mesile poogooso.

<sup>8</sup> Bei, Godeeyo to booka mapoo hogugu oso Isalael odo dia goo maga egeesee takaso,

“Godeeye dimapoo goo tiadili goo teneeso, diayo gooleedele pagalame.

Osoloso Godeeye dia howo gagaso, diayo egele pagalame.

Osoloso yayo dibada dulu tabagaso, diayo see dule pagalame.

Esiga goo hageesi oso osee molone epedee hamapoo osee ka moloso.”

<sup>9</sup> Egeesi ma kulodu Deibidiye dia goo maga egeesee takaso,

“Wo toowa nalame mooloogoodoloso egee do goo oso

dieso nediliyo bagagalame ti gama masi meleye dee.

Osoloso diayo omapoo ti gama oso bagag-  
isaloso misige duboloso dobolone,

dibada goo tokenee eyo nei tolone debeeye dee.

<sup>10</sup> Osoloso diayo egele pagalame, dia howo neliga peye dee.

Osoloso diayo gauwuloso kookaiyo osee silesibilame, dimapoo hegi goo kadadiye dee.”\*

*Yu odoonee oso gie badeli talai*

<sup>11</sup> Esiga ayo see tobu hageesee ka takooso, Isalael odooso Keliso gowe goo maga diba olo tokenee pasomo? Haye, egeesee sele. Esino dia goo tokenee maga Yu odoonee dia gie badeli pidiliso, Yu odooso goo egee ogoloso see Yu odoonee mapoo koolone doga, see diayo Yesu mapoo tei ka talame.

<sup>12</sup> Esiga Yu odooso eli dooboo dagadi goo maga Yu odoonee pidiso. Esino Yu odooso dieso eli dooboo dagadi maga see Godee mapoo siboga, biame omapoo nei Yu odoonee dia gie badeli diya pidileiso.

<sup>13</sup> Esiga ayo see tobu epedee hamapoo Yu odoonee nimapoo taka, Yu odoonee niba halo diye di odo ee aso. Esiga tou Godeeye amapoo tenee hagee ayo goomoga sabolo ka tomo siloso.

<sup>14</sup> Esiga a gooleedele, ayo Yu odoonee halo tou too ee ogoloso, tei mo odo Yu odooso koolone Godee mapoo sibadalai malaiso. Egeeseega, yayo dia gie badeli pidileiso.

<sup>15</sup> Esiga niba olo gooleedooso, Godeeye Yu odo dimapoo miligi piaso. Goo egeesi maga Godeeye Yu odoonee ee see o odo doloso dabalame yimapoo gilimado simiso. Esiga hamamee Godeeye Yu odo ee yimapoo gilimado siboga, diayo kookaiyo gie badeli talaiso. Goo egee odo wediaso see gie badeli too egeesi masi moloso.

<sup>16</sup> Esiga niba ege, niyo wo wogai mapoo soo ee pepooko podoloso Godeeyo dalame peegoo magooga, wo wogai mapoo soo toowa onosee Godeeyo dalaiso. Osoloso

**11:6:** Gal 3:18    **11:8:** Deut 29:4; Isa 29:10    **11:9:** Psa 69:22-23    \* **11:10:** To hageeyo bei ee egeesi moloso. Odo hagee biaso Keliso mapoo tei tele poogoo maga, diba Godeeyo howo woola tekepo doloso koo doso. Goo egeesi maga dia howo neliga poga, diba Kelisowo to tekepo ee ogoloso gooleedalaime. Osoloso diba hegi goo ma kulodu dabalaiso.    **11:11:** Diye 13:46    \* **11:16:** To hageeyo bei ee egeesi moloso. Daga hoogoo Eibalaham, Aisek, osoloso Yekob hagee biaso Yu odo dia wiligi odo tebisaloso Godeeyo odo doloso debeiso. Esiga dibada amawe dio onosee hamamee Godeeyo odo doloso dabalaiso.

homo onosee egeesi moloso, homo too ee Godeeyo dalame yimapoo teneega, o dee onosee Godeeyo dalaiso.\*

*Olipi homo maga wudu taka*

<sup>17</sup> Esiga Yu odoo ee olipi homo dadabaya segei dee egeesi masi doso. Osoloso Yu odoonee ee olipi homo dobudu meli dee egeesi masi doso. Esino olipi homo dadabaya segei dee abo Godeeye kookoobuguloso, see dobudu meli olipi homo eyo dee koodo sibilesa ogusaso. Esiga Yu odoonee niba egeesi masi badoso. Godeeye niba homo dadabaya segei mapoo olo ogusugaso. Esiga olipi homo dadabaya segei oso nimapoo gie ka tenemoloso.

<sup>18</sup> Esino olipi homo dadabaya segei masi dee peegoo kookoobugume, see Yu odoonee niyo o debi mapoo ogusugaloso egee molo goo omaga, niso nediliyo si haga na howee. Bei, niyo homo too mapoo gie badeli koo teneli. Esino tooso dee nimapoo gie badeli ka teneli.

<sup>19</sup> Esiga niyo hageesee takalai malaiso, “Iyo o debi talame homo dee egee olo peegoo kookoobuguso.”

<sup>20</sup> Egeesi ma kulodu niyo tei takoo. Bei, Yu odooso tei telega poogoloso doboome ogoloso homo dee masi peegoo kookoobuguso. Esem niyo tei too maga homo dee kobugu su omapoo olo ogusugaso. Esiga niba goo omapoo niso nediliyo si haga na howee. Esino niba ebia sabolo debee.

<sup>21</sup> Bei, Godeeye homo tei o deede peegoo kookoobugu egeesi masi solone niyo tei telega dogo, niba nose peegoo egeesee kookoobigileiso.

<sup>22</sup> Esiga niba medee goolee, Godee diya mesie, osoloso Godee yo goo tokenee mapoo diya goweli. Esiga yayo Yu odoo abo yimaga peegoo diyadee eyo nei dimapoo dala teneliso. Esino niyo yayo mesili goo mapoo tei toloso osee dogo, Godeeye nei nimapoo mesileiso. Esino niyo yimapoo tei telega dogo, Godeeye niba homo dee masi peegoo kobigileiso.

<sup>23</sup> Egeesi ma kulodu Yu odooso see Godee mapoo tei toga, Godeeye diba see tobu homo dee masi todilesa, dieso

ogusuga melee omapoo ogusugileiso. Bei, goo hagee moodolai Godee mapoo kitulugu moloso.

<sup>24</sup> Esiga niba medee goolee, Yu odoonee niba olipi homo dobudu meli dee koodoloso see olipi homo dadabaya segei mapoo ogusuga masi ka moloso. Esino homo eyo goolee egeesee koo oluguli. Yu odoo ee tei olipi homo dadabaya segei o dee egeesi masi doso. Esiga Godeeye olipi homo dadabaya segei o dee peegoo kookoobugu ee see dieso olugulee mapoo ogusugilei yimapoo haga kodianee.

*Isalael odoo see Godee mapoo gilimado sibilei*

<sup>25</sup> Esiga tei telaga odoo emegei, goo mada magoo melee ayo nimapoo woola taka, egeeseega niba niso nediliyo si howelega dabalame. Egeesi ma kulodu goo mada melee ee hagoso, Godeeye koo mesili goo ee Isalael odoo abo mapoo teneeso. Esino goo ogoso kookaiyo osee malaime. Esino Yu odoonee Godeeye daga hoogoo hesia sabolo tobuloso, diayo Yesu mapoo tei toloso dogo, hamamee koo mesili goo dimapoo egee molo ee pagalaiso.

<sup>26</sup> Osoloso diayo tei too ee ogoloso, nei Isalael odoo susuga dia gie badeli pidileiso. Bei, Godeeyo to booka mapoo hogugu oso egeesee takooso,

“Gie badeli pidili odoo ee Sayon mi maga sibileiso.

Isalael odoo susuga oso goo tokenee tolone egee do goo ee yayo peegoo magalaiso.

<sup>27</sup> Osoloso ayo dibolo to magoo ee dodolone,

dia goo tokenee hapoloso boobado bigileiso,” deeso.

<sup>28</sup> Esiga epedee hamapoo Yu odoo aboso to tekepo mapoo gowoolone Godee mapoo ha tolone ka doso. Goo egeesi maga to tekepo ee Yu odoonee nimapoo simiso. Esino Yu odoo ee Godee tei eyo hesia odoo oso. Bei, Yu odooso tei Godee o odoo doloso dabalai goo ee Godeeye dia amawe

dio daga debei mapoo to olo edidi magooso. Goo egeesi maga Yu odoosoo dimapoo Godeeye gooma ka moloso.

<sup>29</sup> Bei, Godeeye tei o odoosoo hesialoso, yayo emegei di bi dimapoo wulayo teneega, yo o goo goolee see su koo widili.

<sup>30</sup> Esiga Yu odoonee niyo daga Godee gowoolone debeiso. Esino see Yu odoosoo Godee gowoome, nei Godeeye see Yu odoonee niba sooloo dalaso.

<sup>31</sup> Esiga niyo daga Godeeyo to gowoolone debei egeesee solone, epei see Yu odoosoo Godeeyo to gowoolone ka doso. Esino Godeeye niba sooloo dala egeesee solone, hamamee see Yu odoosoo nosee egeesee sooloo dalaiso.

<sup>32</sup> Esiga Godeeye odoosoo susuga ee goo tokenee ma kulodu olo holoogooso, see hamamee dimapoo yayo sooloo deli goo ee eligilame.

### *Godeeyo hu dokodoo poude*

<sup>33</sup> O, tei takoo. Godeeyo goo goolee sabolo osoloso yayo gooleedoo ee diya toowa osoloso diya goodomou. Esiga edebee yo yayo to magoo eyo bei sabolo, osoloso o goo ee gooleedalai koo tebili.

<sup>34</sup> Bei, Godeeyo to booka mapoo hogugu oso egeesee takooso,

“Odoosoo agayo Godeeyo goo goolee eyo bei ka gooleedoowo?”

Osoloso odoosoo agayo yo ka kokodo takasomo?”

<sup>35</sup> Osoloso Godeeye yimapoo nei tenelame, daga malalo odoosoo agayo Godee mapoo bi ka teneeba? Haye, odoosoo mauwe.”

<sup>36</sup> Bei, bi susuga ee Godeeye moodoo. Osoloso bi susuga yayo medee ka bamoloso. Osoloso bi susuga ee o. Esiga odoosoo susuga oso hedebe o hu dokodoo poudoolone kookaiyo osee dabalai tekepo. To hagee tei goo.

## 12

### *Nibada su Godee mapoo tenee*

<sup>1</sup> Esiga tei telaga odoosoo emegei, Godeeye imapoo sooloo deli goo toowa ee olo eligiso. Esiga niyo nibada su ee emegei

di bi gie meli masi Godee mapoo tenelai, a goomogo. Bei, goo ogoso Godee mapoo goomoga tenelaiso, osoloso niba Godeeyo odoosoo doloso peegoo pi magoo goo ee eligileiso. Goo ogoso tei Godeeyo tou talai sabolo ka tobuoso.

<sup>2</sup> Esiga niba mi goo oso nibada goo goolee ee opusomo dee na seeye dee. Esino Godeeye nibada goo goolee ee opusomo dee ka seeye dee. Niyo egeesee seega, niba Godeeye goomoga goo ee medee gooleedalaiso. Goo ee, tekepo gweli goo, osoloso yimapoo goomoga teneli goo, osoloso teedee badeli goo.

<sup>3</sup> Godeeye sooloo dolone pidi maga ayo o diye di odoosoo dalame, yayo a olo hesiaso. Esiga to hagee ayo nimapoo ka taka. Niso nediliyo si howolone na debee. Esino tei too goo Godeeye nimapoo tenee oso niba niso nediliyo medee egege.

<sup>4</sup> Esiga ibada su hedebe mapoo ogusuga opusomo opusomo di moloso, osoloso dia tou onosee opusomo opusomo di moloso.

<sup>5</sup> Egeesi ma kulodu iba nosee Keliso sabolo hedebe doloso egeesee ka doso. Iba ogusuga opusomo opusomo di oso su hedebe mapoo ogusugaloso ka doso.

<sup>6</sup> Esiga Godeeye iba sooloo dolone pidi maga Dio Tei oso imapoo wulo emegei di goo opusomo opusomo di imapoo tenee ee moloso. Egeesi ma kulodu Godee maga to toloso kokodo takomo silame tou namapoo tenee daga, nayo tei too namapoo egee molo goo sabolo to osee takomo sile.

<sup>7</sup> Osoloso namapoo odoosoo pidili tou tenee daga, no sosee ma kulodu badolone tou egee osee temelee. Osoloso namapoo Godeeyo to eligilame tou tenee daga, no Godeeyo to osee eligimelee.

<sup>8</sup> Osoloso emegei kitulugu sabolo badalame pidili to takeli tou ee namapoo tenee daga, nayo badolone pidili to osee takemelee. Osoloso emegei di bi teneli tou ee namapoo tenee daga, no tou egee tolone badolone toowa osee tenemelee. Osoloso wiligi odoosoo doloso badeli tou ee namapoo tenee daga, no badolone tou

egee medee temelee. Osoloso odoo pidili tou ee namapoo tenee daga, no goomoga sabolo diba osee pidimelee.

### *Tei telaga odoo oso dabalai goo*

<sup>9</sup> Esiga tei telaga odoo emegei, sooloo ma kuloduga niyo emegei nei sooloo dolo, nei sooloo dolo dolone ka debbee. Osoloso goo tokenee ee hegilone goo tekepo ono medee kibiya kookoode.

<sup>10</sup> Esino niyo nee soosoo gweli egeesi masi nee odoo diya goolone, goomoga sabolo dimapoo mesie.

<sup>11</sup> Esiga niba Lodeeyo tou talai na wabede. Esino nibada sooloo ma kuloduga goomoga sabolo, osoloso Dio Tei oso kitulugu sabolo o tou ka te.

<sup>12</sup> Esiga Godeeye gie badeli nimapoo tenelai goo mapoo dulone bolone goomoga sabolo ka debbee. Osoloso dala goo sabolo hegi goo sabolo ee ma kulodu medee kibiya debbee. Osoloso biame susuga Godee mapoo takolone ka debbee.

<sup>13</sup> Egeesi ma kulodu tei telaga odoo bi tebile poogoo doga, niyo diba pidi. Osoloso tei telaga odoo soo siboga, diba nee mosopoo ido pele.

<sup>14</sup> Osoloso odoo aboso nimapoo dala teneega, nei Godeeye dimapoo dala tenelame na takee. Esino wulo diba pidilame Godee mapoo ka takee.

<sup>15</sup> Esiga goomoga ma kulodu debeli odoo sabolo hedebe doloso goomogolone debbee. Osoloso goohale goo ma kulodu debeli odoo sabolo hedebe doloso gooholone debbee.

<sup>16</sup> Egeesi ma kulodu nee odoo sabolo hedebe doloso ka debbee. Osoloso niba goo goolee toowa too doloso niso nediliyo si na howee. Esino niso nediliyo pepooko doloso odoo wuluge sabolo hedebe dalai na gowee.

<sup>17</sup> Esiga odoo aboso nimapoo goo tokenee moodooga, nei niyo dimapoo goo tokenee moodoolone na debbee. Esino odoo susuga oso goo tekepo deli goo ee tolone ka debbee.

<sup>18</sup> Egeesi ma kulodu niyo odoo susuga sabolo medee mesie sabolo dabalai goo ono diya kitulugi.

<sup>19</sup> Esiga tei telaga odoo emegei, odoo aboso nimapoo goo tokenee moodooga, nei niyo goo tokenee egeesi masi dimapoo na moodee. Esino Godeeye nei dimapoo tenelame, wulo yimapoo deede peegee. Bei, Godeeyo to booka mapoo hogugu oso egeesee takooso,

“Godeeye egeesee takooso,  
‘Ayo odoo susuga dibada goo tokenee eyo nei teneliso.’”

<sup>20</sup> Esino niba goo hageesi moodee,  
“Namapoo ha teli odoo ee hodia badoga,  
nayo yimapoo nei tenee.

Osoloso yayo howo nalapaga sabolo badoga,  
nayo yimapoo howo keenee.

Esino nayo egeesee seega,  
nei yayo eyo nediliyo o goo tokenee ee ogoloso ebileiso.”

<sup>21</sup> Esiga goo tokenee oso niba na dagadiye dee. Esino niyo goo tekepo tolone debei maga goo tokenee ee dagadi.

## 13

### *Gamalee odoo dia to mapoo mesilone debbee*

<sup>1</sup> Esiga odoo susuga oso gamalee odoo dibada to mapoo mesilone dabalai tekepo. Bei, gamalee odoo susuga oso dieso goomoga maga mi omapoo wiligi doloso koo doso. Esino Godeeye kitulugu dimapoo teneme, diba mi omapoo wiligi doloso ka doso.

<sup>2</sup> Esiga odoo agayo gamalee odoo dia to mapoo mesilega doga, diba Godee mapoo koo mosioso. Goo egeesi maga diayo goo moodoo eyo nei dala talaiso.

<sup>3</sup> Egeesi ma kulodu goo tekepo tomo silesibili odoo oso gamalee odoobolo koo ebili. Esino goo tokenee tomo silesibili odoo oso gamalee odoobolo obulone ka doso. Esiga niyo gamalee odoobolo ebilega dabalai goomogoga, niba wulo goo tekepo tolone dabalai tekepo. Egeesee seega, gamalee



odoo oso niba ogoloso nimapoo goomogalaiso.

<sup>4</sup> Esiga gamalee odoo diba Godeeyo tou teli odoo doloso doso, diayo niba pidilame. Esino niyo goo tokenee toga, niyo diba bolo ebilei tekepo. Bei, Godeeye dimapoo kitulugu olo teneeso, diayo nimapoo nibada goo tokenee eyo nei tenelone dabalame. Egeesi ma kulodu kitulugu diayo too egee goo mauwe koo moloso.

<sup>5</sup> Esiga nibada goo tokenee eyo nei teya doloso gamalee odoo dia to mapoo mesiloso silesibe. Bei, niba olo gooleedooso, goo hagee goo tekepo.

<sup>6</sup> Esiga gamalee odoo oso Godeeye dimapoo tou tenee ee medee tekepo tolone dabalame, tei telaga odoo niyo tekisi molee soolone debee.

<sup>7</sup> Esiga gamalee odoo oso takolone, “Niba amapoo tekisi molee tenelame tobuloso magoo ee amapoo tenee,” dee takooga, niyo tobuloso yimapoo tenee. Osoloso dia to mapoo mesiloso silesibe. Osoloso dia hu dokodoo poudoolone ka debee.

### *Niba nee odoo diya sooloo dolone debee*

<sup>8</sup> Esiga niyo bi wulo wulayo toga, eyo nei saga magee. Niyo egeesee seega, goo egee omapoo koodobileiso. Esino nee odoo sooloo deli goo ee hoo poogoo me. Esiga nee odoo nei sooloo dolo, nei sooloo dolo dolone debeli goo ee na koodobie. Niyo egeesee lone dogo, goo oso niba Godeeyo tei magoo goo susuga sabolo tobuloso dabalaiso.

<sup>9</sup> Bei, Godeeyo tei magoo goo abo egeesi moloso, emegei dia kooka sobo sabolo osoloso emegei dia kooka giso sabolo goo heli teli tei, osoloso emegei wooloomali tei, osoloso emegei dia bi heli teli tei, osoloso emegei dia bi talame gilee tei. Osoloso tei magoo abo moloso. Esino tei magoo susuga eyo bei ee hagoso.

“No nediliyo diya sooloo deli,

egeesee solone nee odoo diya sooloo dele.”

<sup>10</sup> Esiga sooloo deli goo ee ma kulodu emegei mapoo hegi goo sabolo, osoloso dala goo sabolo teneli koo moloso. Bei, sooloo deli goo oso tei magoo goo susuga ma kulodu taka goo sabolo teiba moloso.

<sup>11</sup> Esiga ayo epedee hagee takoo goo ee tolone debee. Bei, iba olo biame hamameedee mapoo doso. Esiga tiesa maga see hogoogabie. Bei, iyo daga tei too biame mapoo gie badeli pidili goo ee eli sage meleeso. Esino epedee hamapoo olo hegi simiso.

<sup>12</sup> Egeesi ma kulodu neliga olo duga, mi hadobilei olo koola toobooso.\* Esiga neliga ma kulodu dobolone goo tokenee teli goo ee poogoloso, see gadeebugu mapoo dobolone, mopoodoo doloso goo tekepo tolone dabalai tekepo.

<sup>13</sup> Esiga iba gadeebugu mapoo debeli odoo masi medee tekepo doloso dobomo. Esino iyo yugune naloso halabili, osoloso emegei dia sobo goo heli teli, osoloso toso agadigeli, osoloso biligeli goo, osoloso emegei kweli goo ee ma kulodu dabalai tekeponee.

<sup>14</sup> Esino ee ma kulodu Lodee Yesu Kelisowo goo ee niyo dugo masi kaloso ka debee. Osoloso nibada suso goomoga oso goo tokenee teli goo mapoo dadalai na goolee.

## 14

### *Nemegei tei too odoo mapoo to tokenee na takee*

<sup>1</sup> Esiga nima kulodu odoo tei too medee kibilega egee do ee emegei dolone ide. Osoloso dibada goo goolee opusomo opusomo di ee ogoloso dibolo toso na agadige.

<sup>2</sup> Bei, tei too odoo heeso eyo goo goolee oso nei susuga ee nalai tekepo deliso. Esino tei too kibile poogoo odoo heeso eyo goo goolee oso gala hwei nalai tei deliso.

<sup>3</sup> Esiga nei susuga nalai tekepo deli odoo oso see gala hwei nalai tei deli

**13:6:** Mat 22:21    **13:8:** Mat 22:39-40; Yem 2:8    **13:9:** Exo 20:13-15, 17; Deut 5:17-19, 21    **13:10:** 1Kol 13:4-7  
**13:11:** Epe 5:14; 1Tes 5:6-7    **13:12:** 1Yon 2:8    \* **13:12:** *neliga sabolo mi hadobilei* - goo eyo bei ee egeesi moloso. Neliga eyo bei ee Yesuye sibilega iyo epedee hagee do biame ee takooso. Osoloso mi hadobilei ee Yesuye see wedi sibilei biame ee takooso.    **13:13:** Luka 21:34; Epe 5:18    **13:14:** Epe 5:11    **14:1:** Loum 15:7    **14:2:** Gen 9:3-4    **14:3:** Kol 2:16

odoo mapoo gowoolai tekeponee. Osoloso see gala hwei nalai tei deli odoo oso nei susuga nalai tekepo deli odoo ee tokenee dalai tekeponee. Bei, Godeeye odoo nei susuga nali ee odoo tokenee dee koo takeli.

<sup>4</sup> Esiga nimapoo kitulugu mauwe, niyo odoo heeyo tou teli odoo ee tokenee sisilei. Bei, hedebe o wiligi odoo oso o tou teli odoo eyo goo ee midileiso. Esiga o tou teli odoo oso Lodeeye pidi kitulugu maga o tou ee medee tekepo talaiso.

<sup>5</sup> Osoloso see biame eyo goo maga odoo heeso egeesee takalai malaiso, “Biame hee ono diya tei dolone, nei biame abo ee tei mauwe,” dee takalai malaiso. Osoloso nei odoo heeso takolone, biame susuga ee hedebe, dee takalai malaiso. Egeesi ma kulodu goo hamaga odoo susuga oso dieso goolee maga dabalai tekepo.

<sup>6</sup> Bei, biame hedebe mapoo tei deli odoo oso yo Lodee goolone ka seli. Osoloso nei susuga nali odoo oso yo Lodee goolone nei susuga naliso. Bei, yayo goomoga to Godee mapoo takoloso nei naliso. Osoloso gala hwei nalai tei deli odoo oso yo Lodee goolone, goomoga to Godee mapoo takoloso nei segei ono naliso.

<sup>7</sup> Esiga mipoo hamapoo wulo iso goomoga goo ee tolone koo doso. Osoloso iyo wedilei onosee wulo iso goomoga goo maga koo wodumoloso.

<sup>8</sup> Esino iyo mipoo hamapoo dobolone osoloso wedilone, Lodee mapoo goomoga goo tenelai tekepo. Esiga iyo mipoo toowa hamapoo egee do ee ma kulodu, osoloso iyo wedilei mapoo iba wulo Lodeeyo odoo doloso dabalaiso.

<sup>9</sup> Goo egeesi maga Keliso toloso see gie badeli mapoo hogadiso, yayo odoo gie egee do sabolo osoloso odoo wedia dia wiligi odoo doloso badalame.

<sup>10</sup> Esiga niyo bei kasalame nee tei too odoo ee tokenee ka sisiliyo? Osoloso see niyo bei kasalame nee tei too odoo ee ka goweliyo? Bei, iba susuga Godeeyo howo woola tebisileiso, yayo ibada goo midilame.

<sup>11</sup> Bei, Godeeyo to booka mapoo hogugu oso egeesee takooso,

“A wiligi odoo, Lodee, kookaiyo gie badeli ee aso. Osoloso ayo tei goo egeesee takooso,

Odoo susuga oso mo homo beiyopoo gauwuloso takolone,  
a tei Godeeso dolone dabalaiso,” dee takaso.

<sup>12</sup> Esiga odoo hedebe hedebe di oso goo iso moodoo eyo bei ee Godee mapoo takalaiso.

*Nayo nei nali goo maga nee odoo ee tokenee mapoo na gido di*

<sup>13</sup> Esiga iyo ibada tei too odoo eyo goo ee ogoloso wulo goo gooleeso nei midi nei midi dee na soomo. Osoloso nee tei too odoo oso goo tokenee teyaga, niyo yo tagodibigilame goo hee na moodee.

<sup>14</sup> Esiga Lodee Yesuye amapoo olo eligiso, nei susuga nalai ee tei mauwe. Esino odoo heeso takolone, nei abo nalai tei daga, yo nei egee nelega tei doloso osee badalai tekepo.

<sup>15</sup> Egeesi ma kulodu nayo nei nolone dabalai goo oso nee tei too odoo mapoo hegi goo tonomologa, nayo odoo egee sooloo dolone koo seeso. Esino nayo nei susuga nolone egee bado goo oso nee odoo ee tokenee na peye dee. Bei, Kelisoye yo halo olo taso.

<sup>16</sup> Niyo goolone goo hee ee tekepo dee gooleega, niba obeeyamo, nibada goo ee ogoloso, odoo aboso maneyaga.

<sup>17</sup> Bei, Godeeye wiligi doloso badeli goo mapoo nei nalai sabolo, osoloso howo nalai sabolo oso goo toowa koo moloso. Esino Dio Tei oso kitulugu maga Godeeyo howo woola tekepo badalai goo sabolo, osoloso nee odoo sabolo mesie badalai goo sabolo, osoloso goomoga sabolo badalai goo oso goo toowa ka moloso.

<sup>18</sup> Esiga edebeeyo goo egeesi ma kulodu badolone Keliso mapoo mesilone badoga, Godeeye odoo egee bia mapoo goomogalaiso. Osoloso odoo aboso yo odoo tekepo dalaiso.

<sup>19</sup> Esiga iba mesie goo tosibilei goo ee tolone dabalame esilone ka dobomo. Osoloso ibada odoo oso tei too ma kulodu kitulugu sabolo badalame, nei pidi nei pidi dolone dobomo.

<sup>20</sup> Esiga nei nayo nali oso Godeeye odoo hee ma kulodu tou too ee tokenee na peye dee. Nei susuga nalai tei mauwe. Esino nei susuga ee ma kulodu nayo nei hee ne oso nee tei too odoo ee goo tokenee mapoo gido duga, no goo tokenee toso. Esiga nayo yo halo nei egee na ne.

<sup>21</sup> Egeesi ma kulodu nayo o howo woola gala hwei nelega pagalai tekepo, osoloso wain i nelega pagalai tekepo, osoloso goo abo moodelega pagalai, goo oso nee tei too odoo hee goo tokenee talame gido diyaga.

<sup>22</sup> Egeesi ma kulodu nayo goolee oso nei susuga nalai tekepo daga, nei egee osee namalai tekepo. Esino nayo goolee oso nei abo nalai ono haga tekeponee dee gooleega, no wulo nei abo ee namalai tekepo. Nayo goo bakadio hamaga kasee gooleesimo, goo hagee hedebe nee goo, osoloso Godeeyo goo oso. Osoloso edebeeyo goo eyo tomo sili ee goo tekepo doloso gooleedoloso, o goo goolee oso goolee, yo goo tokenee tele, dee gooleega, yo goomogalai tekepo.

<sup>23</sup> Esino edebeeyo goo goolee bakadio doloso badolone, nei susuga ee ma kulodu nei hee nalai ee tekeponee. Egeeseega Godeeye yimapoo goo tokenee to, dee takalaiso. Bei, yo tei telega goo egee ka toso. Esiga goo yayo tedeli goo mapoo tei telega poogoloso see toga, yo goo tokenee toso.

## 15

### *Nee odoowo goo ee diya goolone ka debee*

<sup>1</sup> Esiga tei too ma kulodu kibiloso debeli odoo iyo, tei too kibile poogoo odoo ee pidilei tekepo. Osoloso iso nediliyo ibano goolone hedebe iso goomoga goo ee tolone na debee.

<sup>2</sup> Esino ibada odoo diya goolone, iyo diba medee pidilone dabalai tekepo, diba

goomoga sabolo dobolone, diayo tei too ma kulodu kibiloso dabalame.

<sup>3</sup> Bei, Kelisoye eyo goomoga goo ee tomo sile. Kelisoye Godee mapoo taka goo maga, Godeeyo to booka mapoo hogugu oso egeesee takooso,

“Edebeeyo no tokenee sisiga, yayo a tokenee sisiso,” diso.

<sup>4</sup> Esiga goo susuga ee Godeeyo to booka mapoo daga hoogoo olo hoguguso, imapoo eligilone iba pidilame. Goo egeesi maga iyo mesie sabolo dobolone, Godeeye imapoo gie badeli tenelai mapoo dulone dobolone ka balaga moloso.

<sup>5-6</sup> Esiga tei too ma kulodu medee kibiloso dabalai goo sabolo, osoloso emegei pidilei goo sabolo Godee maga imapoo ka siboso. Esiga ayo Godee mapoo taka, niyo Yesu Kelisowo goo ogoloso ee dodolone, nima kulodu goo goolee medee hedebe oso ka malame. Osoloso niba nisono susuga hodobo ibada Lodee Yesu Kelisowo Ama Godeeyo hu dokodoo poudoolone dabalame.

### *To tekepo ee Yu odoo sabolo osoloso Yu odoonee diba pidilame ka moloso*

<sup>7</sup> Esiga Kelisoye niba idoo, egeesee solone niba nose nee odoo ide. Niyo egeesee solone daga, edebeeyo goo hagee ogoloso Godeeyo hu dokodoo poudileiso.

<sup>8</sup> Esiga ayo nimapoo taka, Kelisoye Yu odoo ee halo mesilone tou teli odoo doloso badalame simiso, Godeeye dia amawe dio mapoo to edidi magoo goo ee tobuloso moodeli goo ee eligilame.

<sup>9</sup> Osoloso Yu odoonee oso Godeeye dimapoo sooloo deli goo eligi maga o hu dokodoo poudulame. Bei, Deibidiye Godee mapoo taka goo ee Godeeyo to booka mapoo hogugu oso egeesee takooso, “Esiga ayo Yu odoonee dima kulodu badolone nee hu dokodoo poudileiso.

Osoloso goomoga kosaiya poulone badolone nee hu dokodoo poudileiso.”

<sup>10</sup> Osoloso Godeeyo to booka mapoo hogugu hee hagosoo egeesee takooso,

“Yu odoonee niba, Yu odoo sabolo hedebe doloso goomoga dokodoo poude.”

11 Osoloso Godeeyo to booka mapoo hogugu hee hagoso egeesee takooso,

“Yu odoonee niba, Godeeyo hu dokodoo poude.

Osoloso odoo susuga goomoga kosaia poulone o hu dokodoo poud-eye dee.”

12 Osoloso Aisayaye egeesee hoguguso,

“Wiligi odoo hagoso Yesi\* o bala ma kulduga sibileiso,

yayo Yu odoonee ee wiligi doloso badalame.

Osoloso Yu odoonee oso yimaga gie badeli talame dulone dobolone balaga malaiso.”

13 Niyo gie badeli teneli Godee mapoo tei too goo maga, yayo nimapoo mesie sabolo, osoloso goomoga sabolo oso nimapoo toowa doloso meleye dee, Dio Tei oso kitulugu maga nimapoo Godeeye gie badeli tenelai mapoo dulone dobolone balagamologa, nimapoo goomoga egee molo oso toowa doloso malame.

### *Poloye o tou maga taka*

14 Esiga tei telaga odoo emegei, a tei toso, goo tekepo oso nima kulodu toowa doloso moloso. Osoloso a see tei toso, niyo Kelisowo goo ee medee gooleedoloso, see nee odoo pidili to oso nei pidi nei pidi dolone debeli goo ee, niba olo gooleedooso.

15 Esino goo susuga hagee niyo boobado bigiyaga, ayo to hogugu hagee ma kulodu nimapoo weliga ka yiligebiga.

16 Bei, Godeeye sooloo dolone pidi goo maga a Yesu Keliso o tou teli odoo diso, ayo Yu odoonee dima kulodu tou talame. Osoloso a Godee ogo odoo ogo doloso domo badeli odoo masi tou mesie tolone, Godeeyo to tekepo ee takomo silame. Esiga Dio Tei oso kitulugu maga, Yu odoonee diba Godeeyo dalame peegoo pi malaiso. Goo egeesi maga diba Godee mapoo goomoga teneli emegei di bi masi malaiso.

17 Esiga ayo Yesu Keliso sabolo hedebe doloso badolone, Godeeyo tou too maga a goomoga sabolo ka badoso.

18 Egeesi ma kulodu ayo goo abo maga takalaime. Esino hedebe Kelisoye amaga tou tolone ayo taka maga, osoloso ayo goo moodoo maga, Yu odoonee oso Godee mapoo tei too ee ayo ebilega woola takalaiso.

19 Osoloso ayo Dio Tei oso kitulugu maga goo toowa opusomo di moodoo ee ogoloso, diayo Godee mapoo tei tooso. Esiga ayo Kelisowo goo maga to tekepo susuga takomo silone, Yelusalem maga bei mooloogooloso abaga dino Ilulikumi mapoo dilesi koodobiaso.

20 Esiga a diya goomogoso, Kelisowo goo dule poogoo mosobia omapoo dilesi to tekepo takomo silame. Egeeseelone a koo goomegeli, odoo heeso omou segei mapoo ayo moso tegelai.\*

21 Bei, Godeeyo to booka mapoo hogugu oso egeesee takooso,

“O goo gooleedele poogoo odoo oso o goo ee gooleedalaiso.

Osoloso o goo dule poogoo odoo oso o goo duloso medee gooleedalaiso.”

### *Poloye tei telaga odoo Loum mi mapoo debeli ee agala dilame goomoga*

22 Goo egeesi maga ayo to tekepo takomo silone, niba agalame sibilei biame egele.

23 Esino ayo mi hamapoo tou too ee olo hosudooso. Esiga ayo sibileso niba agalai goomogoso. Bei, ayo dugo abo ee ma kulodu niba agala sibilame goomegeliso.

24 Esiga a Spein mi mapoo dulone Loum mi omapoo sibileso niba agalai goomogoso. Egeesi ma kulodu ayo goomoga sabolo biame deiyepo nibolo hodobo badoboso, see Spein mi mapoo dilame seega, niyo a pidi.

25 Esino ayo nimapoo sibilei ee epedee mologa, Yelusalem mapoo tei telaga odoo mapoo emegei di bi todileiso.

15:11: Psa 117:1    15:12: Isa 11:10; Yili 5:5    \* 15:12: Yesi hagee, wiligi odoo Deibidiyo ama. Yesi dio Deibidiyo dooboso wediaso. Osoloso dugo bei poogooloso hamamee Yesu soomagooso. Yesu yo Yesi bolo bala hedebe.    15:16: Loum 1:5; 11:13    15:20: 2Kol 10:15-16    \* 15:20: goo eyo bei ee, mi omapoo odoo heeso Godeeyo tou olo bei mooloogoo mapoo see Poloye dilesi domo abaga bei mooloogalai, yo koo goomegeli.    15:21: Isa 52:15    15:22: Loum 1:13    15:25: 1Kol 16:1-4    15:26: 1Kol 16:1; 2Kol 8:1; 9:2, 12; Diye 24:17



<sup>26</sup> Bei, tei telaga odoo Makedoniya mapoo debeli odoo sabolo, osoloso Akaya mapoo debeli odoo oso Yelusalem mapoo tei telaga bi mauwe odoo ee pidilame molee mooloogoloso amapoo teneeso, ayo dimapoo todilame.

<sup>27</sup> Esiga Makedoniya odoo sabolo, osoloso Akaya odoo oso goomoga sabolo molee hagee mooloogooso. Bei, Yu odoo dimaga gie badeli pidilei goo ee Yu odoonee dimapoo simiso. Esiga see diayo nei biso Yelusalem mapoo debeli tei telaga odoo ee pidilei tekepo diso.

<sup>28</sup> Esiga emegei di bi diayo mooloogoo ee ayo todileso Yelusalem odoo mapoo teneloso, see Spein mi mapoo dulone domopoo niba agalaiso.

<sup>29</sup> Esiga a gooleedooso, ayo nimapoo siboga, Kelisoye kitulugu maga ayo goo tekepo toowa nimapoo moodoolaiso.

<sup>30</sup> Esiga tei telaga odoo emegei, ibada Lodee Yesu Kelisowo hu maga, osoloso Dio Tei oso sooloo dala maga ayo nimapoo ka howaso, niyo mo tou su ee tolone, niyo tei medee a halo Godee mapoo takolone ka dabalame.

<sup>31</sup> Egeeseelone niyo Godee mapoo takeeye, Yesu mapoo tei tele poogoo odoo Yudiya mi mapoo debeli oso amapoo dala teneeyaga. Osoloso see takeeye, ayo molee Yelusalem mapoo toduga, tei telaga odoo Yelusalem mapoo debeli oso ogoloso goomogalame.

<sup>32</sup> Esiga Godeeye goomogoga, a goomoga sabolo nimapoo sibileiso. Osoloso ayo nibolo hodobo badolone, hasaloso see kitulugu talaiso.

<sup>33</sup> Esiga ayo Godee mapoo taka, mesie teneli Godeeye nibolo hodobo badalame. Goo hagee tei goo.

## 16

### *Poloye tei telaga odoo mapoo emegei di to taka*

<sup>1</sup> Esiga ibada omoo Poibe yo Kenekeleya mi mapoo debeli tei telaga odoo dima kulodu dikon tou medee tekepo tolone badoso.

<sup>2</sup> Esiga sobo hagoso nimapoo siboga, Godeeyo odoo oso moodeli egeesee solone, niyo Lodeeyo hu maga yo idoloso yo medee pidi. Bei, goo abo maga yayo a medee pidilone, odoo abo onosee yayo medee diya pidimeleeso.

<sup>3</sup> Osoloso ayo emegei di to Pilisila mapoo osoloso omo Akwila mapoo takee. Bei, diba abolo hodobo Yesu Kelisowo tou teli.

<sup>4</sup> Osoloso diayo mo gie badeli ee medee pidilame, nei diba dala toloso wedilame mopoodoo doloso debeiso. Goo egeesi maga ayo dimapoo diya goomogoso. Osoloso Yu odoonee dia sosee susuga ososee dimapoo diya goomogoso.

<sup>5</sup> Osoloso dia moso ma kulodu howo gisilame mooloogoodoloso debeli odoo dimapoo ayo emegei di to takee.

Osoloso ayo gooma odoo Epainetus mapoo ayo emegei di to takee. Bei, Asiya mi toowa ee ma kulodu yayo daga malalo Keliso mapoo tei tooso.

<sup>6</sup> Osoloso Meli mapoo ayo emegei di to takee. Bei, yayo niba halo tou toowa tooso.

<sup>7</sup> Osoloso mo soosoo Anadolonikus sabolo osoloso Yuniyas mapoo ayo emegei di to takee. Bei, diayo abolo hodobo neliga moso ma kulodu debeiso. Egeesi ma kulodu diye di odoo dima kulodu odoo bakadio hagee hu toowa too odoo. A Keliso mapoo tei telega badoboome, daga diba olo tei toloso debeiso.

<sup>8</sup> Osoloso ayo gooma odoo Lodee sabolo hedebe doloso badeli Amipiliyatus mapoo ayo emegei di to takee.

<sup>9</sup> Osoloso ibada odoo ibolo hodobo Kelisowo tou teli odoo hee Ulubanus mapoo ayo emegei di to takee. Osoloso ayo gooma odoo Stakus mapoo ayo emegei di to takee.

<sup>10</sup> Osoloso Apeles mapoo ayo emegei di to takee. Yayo dala ma kulodu badolone Keliso mapoo tei toloso badebeiso. Osoloso Alistobuluseeyo moso kulodu debeli odoo mapoo ayo emegei di to takee.

<sup>11</sup> Osoloso mo soosoo ma kulodu badeli odoo hee Helodiyon mapoo ayo emegei di to takee. Osoloso Nalikisus eyo moso mapoo debeli tei telaga odoo mapoo ayo emegei di to takee.

12 Osoloso sobo Tulupaina sabolo, osoloso omolo Tuluposa mapoo ayo emegei di to takee. Bei, sobo hagee bia oso Lodeeyo tou toowa teliso. Osoloso sobo ayo gooma Pelisis mapoo ayo emegei di to takee. Bei, yinosee Lodeeyo tou toowa teliso.

13 Osoloso Lodeeyo tou medee tekepo teli odoos Lupus mapoo ayo emegei di to takee. Osoloso owee mapoo ayo emegei di to takee. Bei, yayo mo wee masi badolone a medee pidimeleeso.

14 Osoloso ayo emegei di to Asunkilitus, osoloso Pelegon, osoloso Helemes, osoloso Patolobas, osoloso Helemas, osoloso tei telaga odoos dibolo hodobo hedebe deli odoos mapoo takee.

15 Osoloso Pilologus, osoloso Yuliya, osoloso Neleyus, osoloso obooba, osoloso Olumpas, osoloso tei telaga odoos susuga dibolo hodobo hedebe deli mapoo ayo emegei di to takee.

16 Esiga niba emegei dolone dee nei hai nei hai dolone ka debee. Osoloso tei telaga odoos Kelisowo sosee susuga hamapoo debeli oso emegei di to nimapoo ka taka.

#### *Poloye hamameedee kokodo taka*

17 Esiga tei telaga odoos emegei, nima kulodu domo pili odoos sabolo, osoloso tei telaga odoos peegoo gido dili odoos ee medee ege. Bei, diayo eligimo silesibulone, tei goo niyo duloso tei too goo sabolo tobuloso koo eligili. Esiga niba dimaga peegoo dooboobigi.

18 Bei, odoos egee biaso ibada Lodee Kelisoye goomoga goo ee koo dedeli. Esino dieso goomoga goo ee dodomo silone, toso hodolone goo tokenee gooleedele poogoo odoos ee goo tokenee mapoo gido diliso.

19 Osoloso niyo Lodee mapoo tei toloso yimapoo mesie sabolo sili goo ee, tei telaga odoos susuga oso duloso olo gooleedooso. Esiga goo egeesi maga a diya goomogo. Esino a diya goomogo, niyo goo tekepo talai goo ono gooleedoloso, tokenee goo talai ee gooleedelega poogoloso dabalame.

20 Osoloso mesie tosibili Godeeye Saitenso kitulugu ee guobigilei koola toobooso, niyo yo dagadilame. Esiga ayo Godee mapoo takooso, ibada Lodee Yesuye niba sooloo dolone pidilame.

#### *Polowo odoos oso Loum odoos mapoo emegei di to taka*

21 Abolo tou teli odoos Timoti yinosee emegei di to nimapoo ka taka. Osoloso mo soosoo Lukiyas sabolo, osoloso Yason sabolo, osoloso Sosipate oso diayo emegei di to nimapoo ka taka.

22 Esiga Telitiyus ayo Polowo to hagee ka hogugu. Ayo Lodeeyo hu maga nimapoo emegei di to ka taka.

23 Osoloso moso ayo hagee bado eyo ama Gaiyuseeye emegei di to nimapoo ka taka. Moso hageeyo kulodu tei telaga odoos susuga oso howo gisilone debeliso. Osoloso Kolin mi toowa ee ma kulodu molee gibadeli odoos Elastuseeye emegei di to nimapoo ka taka. Osoloso ibada omolo Kuwalituseeye emegei di to nimapoo ka taka.\*

#### *Poloye to hamameedee taka*

25 Esiga iba Godeeyo hu dokodoo poudoomo. Bei, yayo to tekepo ayo hagee takomo silo to omaga niyo tei too goo omapoo kitulugu tenelai teiba. To tekepo Yesu Kelisowo goo hagee daga hoogoo mada meleeso.

26 Esino kookaiyo badeli Godeeye to teneeso, to tekepo hagee Godee maga to toloso kokodo takomo silesibili odoos oso booka mapoo hogugulame. Goo egeesi maga to tekepo ee epei olo woola yilige buguso, odoos susuga oso Keliso mapoo tei toloso o to mapoo mesimo silesibilame.

27 Esiga goo medee gweli Godee hedebe o hu ee Yesu Keliso maga kookaiyo dokodoo osee poudumelee. Goo hagee tei goo.

16:13: Maka 15:21    16:16: 1Kol 16:20; 1Pita 5:14    16:17: Mat 7:15; Tait 3:10    16:18: Pil 3:19; 2Pita 2:3

16:19: Loum 1:8; 1Kol 14:20    16:20: Gen 3:15    16:21: Diye 16:1-2; 19:22; 20:4    16:23: Diye 19:22; 1Kol 1:14

\* 16:23: To hogugu hagee peipa abo mapoo besee 24 hogugu moloso: Esiga ayo Godee mapoo takooso, ibada Lodee Yesu Kelisoye niba susuga sooloo dolone pidilame. Goo hagee tei goo.    16:25: Epe 1:9; 3:5, 9; Kol 1:26; Loum 1:5

# 1 Tesalonika

## Poloye Tesalonika odo dimapoo to hogugu tenee

### *1 Tesalonika booka goo eyo bei*

Polo Kolin mi mapoo badolone, Tesalonika odo dimapoo to hagee hoguguso. Polo daga Tesalonika mapoo di biame mapoo edebeeyo o to duloso tei tooso. Esino Yu odooso goo hagee ogoloso Polo habuguso (Diye di odo 17:1-10 omaga egeesee ka takooso). Esiga Poloye tei telaga odo hagee bia diya gooleebugulone, kokodo takeli to hagee hoguguloso dimapoo teneeso, diayo dala ma kulodu dobolone, Godee mapoo tei toloso medee kibiya dabalame. Osoloso tei telaga odo susuga oso Yesu siboga biame mapoo yayo badalai mi mapoo palai goo ee gooleedoloso dabalame diayo hoguguloso teneeso.

<sup>1</sup> To hogugu hagee Polo, Sailesi, osoloso Timoti iyo Tesalonika mi ma kulodu debeli tei telaga odoo nimapoo ka teneeso. Niba Ma Godee sabolo, osoloso Lodee Yesu Keliso sabolo hedebe doloso doso. Esiga iyo Godee mapoo takooso, yayo niba sooloo dolone pidilame osoloso mesie sabolo dabalame.

### *Tesalonika odooso tei too*

<sup>2</sup> Iyo biame susuga niba halo Godee mapoo takolone, nibada goo maga yimapoo goomegeliso.

<sup>3</sup> Egeesi maga iyo niba Godee mapoo takolone goo hagee gooleebigiliso. Niyo tei too maga tou too sabolo, osoloso odo abo sooloo dologa pidili sabolo, osoloso edebeeyo nimapoo dala tenee ee ma kulodu dobolone, Lodee Yesu Kelisoye see sibileiso doloso, bolone tei toloso doso.

<sup>4</sup> Tei telaga odo, emegei, iba gooleedooso, Godeeye niba sooloo dolone, niba o odo dalame hesigaso.

<sup>5</sup> Bei, iyo to tekepo nimapoo tosimi ee wulo todee mosoowe tosbileiso ka takele. Esino iyo Dio Tei oso kitulugu maga ka

taka. Osoloso iba to tekepo hagee kibiya tei toloso nimapoo eligiso. Osoloso iyo niba pidilame nibolo debei ee niba gooleedooso.

<sup>6</sup> Osoloso niyo ibada goo sabolo, osoloso Lodeeyo goo ee peedeeso. Egeesi maga niyo to hagee duloso toloso, dala ee ma kulodu doboome, Dio Tei oso goomoga sabolo to hagee tooso.

<sup>7</sup> Esiga tei telaga odo susuga Makedoniya mapoo debeli sabolo, osoloso Akaya mapoo debeli oso nibada goo duloso padalai tekepo.

<sup>8</sup> Esiga Godeeye nimaga eligi goo ee hedebe Makedoniya sabolo Akaya sabolo mapoo dudobigile. Haye, niyo tei too goo ee mi susuga mapoo olo dudobuguso. Esiga nibada goo ee iyo mi abo mapoo see tobu takomo dilei ee goo haga toowanee.

<sup>9</sup> Bei, mi susuga ee ma kulodu edebeeyo iyo nibada mosopoo siboga, niyo to tekepo too ee takeliso. Egeeseelone, diayo niyo gamenee godee poogoloso see tei gie badeli Godee mapoo sibileiso, o to mapoo mesimo sili goo ee takeliso.

<sup>10</sup> Osoloso diayo Godeeyo owoloye ta maga Godeeye hogadi oso Kei mi ma dokodooga sibileiso doloso niyo egee bamolo goo ee takeliso. Odo ee Yesu. Godeeye midilei biame mapoo, yayo komonolone tokenee eyo nei dala tenelai biame mapoo, Yesuye tei telaga odo iba susuga peegoo gilimado dileiso.

## 2

### *Poloye Tesalonika mi mapoo tou too*

<sup>1</sup> Tei telaga odo, emegei, iyo nibolo hodobo dobolone, biame wulo mosoowe hosule.

<sup>2</sup> Esiga niba gooleedooso, iyo daga nimapoo sibilame, Pilipai mi mapoo doboome, edebeeyo imapoo to tokenee takolone, dala tenee goo ee. Esino ee ma kulodu ibada Godeeye iba pidime, edebeeyo iba gowe ee ma kulodu iba ebilega, Godeeyo to tekepo nimapoo takaso.

<sup>3</sup> Bei, iyo eligi goo ee gamenee goonee, osoloso tokenee gweli goo maga koo

eligiso. Esiga iyo nimapoo gamenee takalaime.

<sup>4</sup> Esino iyo Godeeyo to tekepo ee eligimo silesiboso. Bei, Godeeye iba teiba doloso hesigaloso o to tekepo takomo silesibe, diso. Esiga iyo tou hagee tomo silo odo goomogalame sile. Haye! Godee ibada sooloo ma kulodu egeli yo goomogalame ka siloso.

<sup>5</sup> Osoloso niba nose gooleedooso, niyo imapoo sibilame wulo gamenee toso hedele. Osoloso iba nei molee talame to tekepo ka takele. Godeeye goo hagee tei diso.

<sup>6</sup> Egeesi maga nibolo osoloso odo susuga oso imapoo goomogalame koo seli. Esino Kelisoye diye di odo iyo toowa doloso niba balame, imapoo kitulugu meleeso.

<sup>7</sup> Esino iyo egeesee sele. Bei, iyo niba holope masi oweeye owolo dio bali egeesi masi bameleeso.

<sup>8</sup> Esiga iyo niba diya sooloo dolone goomoga sabolo hedebe Godeeyo to tekepo nimapoo ka tosibile. Haye. Ibada gie badeli sabolo nimapoo tenelame ka simi. Bei, niba iyo gooma odo.

<sup>9</sup> Tei telaga odo, emegei, nibolo dobolone iyo nali bi sabolo, osoloso iyo goomoga bi abo sabolo tebilame, iyo ibada suso gesi sabolo biame sabolo tou toowa tomo silee, niba gooleedooso. Goo egeesi maga, iyo Godeeyo to takomo silesibulone, nimapoo hegi goo teneeyaga, bi koo howali.

<sup>10</sup> O, iyo tei telaga nibolo dobolone, iyo tokenee goo hee tele. Esino iyo nibolo hodobo medee teedee dobolone, Godeeye o howo woola goo tekepo deli goo ee iyo tomo silesibiliso. Esiga goo hagee niba olo gooleedooso. Osoloso Godee nose goo hamapoo tei diso.

<sup>11</sup> Esiga niba gooleedooso, maye owolo bameli egeesi masi, niba iyo egeesi bameleeso.

<sup>12</sup> Iyo niba Godeeyo howo woola kibiya dabalame, eli opusomo opusomo di maga nimapoo pidili to takaso. Bei, Godeeye niba imoloso, niyo Godeeye wiligi doloso

badeli mapoo gadilesi dobolone, yo toowa doloso yibolo hodobo dabalame.

<sup>13</sup> Osoloso iba see Godee mapoo goomoga to takooso. Bei, niyo iyo Godeeyo to taka duloso dobolone, to hagee edebeeyo eyo gooleeso takooso, dee takele. Esino niyo to hagee tei Godee maga siboso doloso medee tooso. Esiga Godeeye o to hagee sabolo tei telaga odo nima kulodu tou tomoloso.

<sup>14</sup> Esiga niba gooleedooso, Yu odooso Yudiya mi mapoo Yesu Keliso mapoo tei telaga odo dimapoo dala tenemelee goo ee. Egeesi maga, goo egeesi oso nimapoo peledabaso. Goo ee nibada odo oso nimapoo dala teneliso.

<sup>15</sup> Yu odooso daga hoogoo Godee maga to toloso kokodo takomo sili odo piliguso, osoloso diayo Yesu Keliso wooloomaso. Osoloso iyo Godeeyo to mi abo mapoo takomo silesibume, diayo iba peegoo hasisobigiliso. Esiga Godeeye Yu odo dimapoo koo goomegeli. Osoloso diayo odo susuga mapoo gowe toowa moloso.

<sup>16</sup> Egeeseelone, diayo Yu dele poogoo odo dimapoo iyo to tekepo todilesi takeme, Yu dele poogoo odo oso gie badeli teyaga, diayo imapoo hamaga takalame seeso. Goo hageesi maga, dia tokenee susuga oso dieso dimapoo kadadigamo pologa, Godeeye komonolone dala toowa hoo poogoo mauwe dimapoo tenelaiso.

*Poloye see Tesalonika mi mapoo dilame goomoga*

<sup>17</sup> Esiga tei telaga odo emegei, edebeeyo iba nibada mi maga hasiso bugume, iyo biame deiyepo mapoo niba poogoo dilesi dobolone, niba boobado bigile. Esino iyo niba see agalame diya goomogolone, nimapoo sibilame wegeegeeso.

<sup>18</sup> Esiga iyo niba agala sibilame goomegeliso. O, tei taka, Polo ayo niba agalame sibilame wegeegeliso. Esino Saitenso iba hamaga takeliso.

<sup>19</sup> Iyo niba agala sibilame goomegeliso. Bei, ibada Lodee Yesu see wedi



siboga, ogoo goo oso imapoo goomoga ka tenelaiyo? Osoloso ogoo goo oso iyo o howo woola ebilega kibiya ka dabalaiyo? Ee nibaso. Niyo tei too oso iyo tou tekepo too ee woola yilige bigileiso.

<sup>20</sup> Bei, Godeeye nibada goo maga imapoo goomoga tenelaiso.

### 3

<sup>1-2</sup> Esiga iyo niba agalame sibilei biame dagadime, see gowoolone, wulo Timoti nimapoo diye dolone, iba Atene mi mapoo debeiso. Ibada omolo Timoti hagee ibolo tou tomo silone, Godeeyo to tekepo Kelisowo goo ee takomo sili odoosoo. Esiga iyo yo nimapoo diye diso, yayo niyo tei too ma kulodu kibiya dabalame kokodo takalame.

<sup>3</sup> Bei, dala hagee ma kulodu odoosoo heeso tei too peegeeyaga. Osoloso niba gooleedoosoo, tei teli goo ee ma kulodu dala sabolo moloso.

<sup>4</sup> Esiga iba nibolo hodobo dobolone, dala goo oso sibilei nimapoo olo takaso. Esiga dala goo oso epedee imapoo peledaba, niba gooleedoosoo.

<sup>5</sup> Goo egeesi maga, ayo niyo tei too goo ee dulega badalai, a goweso. Egeeseelone, ayo Timoti nimapoo diye diso. Bei, ayo niba halo goo diya kodumeleeso, niba Saitenso gamenee taka mapoo homodobuoga, oso iyo niba halo tou too goo ee wulo mosoowe hosudeeyaga.

<sup>6</sup> Esino Timotiye epedee nibolo badoboso, see wedi sibileso, yayo nibada goo imapoo takeme du medee tekepo. Bei, yayo niyo tei too goo sabolo, emegei sooloo deli goo sabolo tolone egee do goo ee yayo sibileso imapoo takaso. Osoloso yayo imapoo niyo iba goolone dobolone, iba agala sibilame goomoga goo ee takaso. Egeesi ma kulodu nei iyo niba agala sibilame diya gooleeso.

<sup>7</sup> Esiga tei telaga odoosoo emegei, iyo dala goo sabolo hegi goo sabolo ma kulodu dobolone, niyo tei too goo ee Timotiye imapoo sibileso takeme du oso iba pidiso.

<sup>8</sup> Bei, iyo niyo Lodee mapoo tei tolososoo kibiya debei goo ee duloso diya goomogolone ka doso.

<sup>9</sup> Goo egeesi maga, iyo niba gooleebugulone, goomoga to Godee mapoo taka hoo poogoo mauwe moloso. Bei, iba Godeeyo mudugiyopoo dobolone, nibada goo oso imapoo goomoga toowa teneeso.

<sup>10</sup> Osoloso gesi sabolo biame sabolo, niba see agalai ee gooleebugulone, Godee mapoo takolone ka doso. Egeesi ma kulodu, niyo tei too goo ma kulodu, goo heeso tebilega mologa, iyo sibileso goo ee tebilame pidileiso.

<sup>11</sup> Esiga iyo Godee mapoo takoosoo, ibada Ama Godee sabolo osoloso ibada Lodee Yesu sabolo oso iyo nimapoo sibilei eli medee hoodo magalame.

<sup>12</sup> Osoloso iyo see Godee mapoo takoosoo, Lodeeye nima kulodu sooloo dala goo egee molo kibilame. Osoloso iyo niba diya sooloo egee dolomolo egeesi masi, see niyo nima kulodu osoloso odoosoo susuga ma kulodu emegei sooloo dala goo sabolo dabalame.

<sup>13</sup> Osoloso iba see Godee mapoo takoosoo, ibada Lodee Yesuye yayo hesiga odoosoo sabolo sibilei biame mapoo, niyo tei too ma kulodu kibiya dobolone, ibada Ama Godeeyo mudugiyopaga, tekepo doloso tokenee goo mauwe odoosoo doloso dabalame.

### 4

#### *Godeeyo mudugiyopaga tekepo doloso badalai goo*

<sup>1</sup> Tei telaga odoosoo emegei, tekepo doloso badalai goo maga Godee mapoo goomoga tenelai goo ee iyo nimapoo olo eligiso. Esiga a gooleedoosoo, niba egeesee goo ma kulodu ka doso. Esino tekepo goo nima kulodu egee molo oso toowa dalame, epedee ayo Lodee Yesuwo hu maga nimapoo ka taka.

<sup>2</sup> Iyo Yesu Kelisoye kitulugu maga nimapoo eligi goo ee, niba olo gooleedoosoo.

<sup>3</sup> Bei, Godee yo goomogoso, niyo o howo woola tokenee mauwe teedee dabalame.

Esiga niba giso sabolo sobo sabolo heli telega tei doloso teedee debee.

<sup>4</sup> Esiga niba odoosusuga eyo howo woola tekepo doloso, osoloso goo tokeene mauwe doloso dabalame, nibada su kookoode.

<sup>5</sup> Osoloso nibada su oso goo heli talame goomoga goo ee dodolone na debee. Bei, Godee gooleedele poogoo odoososo goo hageesi teliso.

<sup>6</sup> Goo egeesi maga, nemegei tei too odoosoyo heli tolosoyimapoo hegi goo na tenee. Bei, Lodeeye goo tokenee hageesiteli odoomapoo tokenee eyonei dala tenelaiso. Iyo daga hoogoonimapoo kitulugu takolone goo egeesi na te diso.

<sup>7</sup> Bei, Godeeye ibolo osoloso nibolohesiga ee iyo goo tokenee ma kulodu dabalame ka sele. Esino iyo Godeeyo howo woola mapoo goo tokenee mauwe dolosokibiya dabalame, yayo iba hesigaso.

<sup>8</sup> Esiga edebeeyo to hagee dadalai gowooga, yo odooto mapoo gowoolone koo seeso. Esino yayo Godeeye nimapoo Dio Tei egee tenemolo o to mapoo gowooso.

<sup>9</sup> Esiga niba sooloo dala ma kulodudobolone, tei telaga odoososo emegei nei pidi, nei pidi dalai goo ee, niba gooleedooso. Bei, Godeeye sooloo dala goo ee nimapoo olo eligiso. Esiga iyo goo hamapoo see nimapoo hogugulei ee goo haga toowanee.

<sup>10</sup> Emegei, niyo Makedoniya mi mapoo debeli tei telaga odoomapoo sooloo dolone dobolone egee pidimolo, iba gooleedooso. Esiga iyo niba goo egeesi ma kulodu dobolone, goo oso diya toowadalam kitulugu sabolo ka taka.

<sup>11</sup> Esiga niba nemegei sabolo medee mesie debee. Osoloso niba nibada su ee pidilei maga tou tolone dobolone, emegei dia goo na takee. Bei, iyo goo hagee daganimapoo olo eligiso.

<sup>12</sup> Niyo goo egeesi tomo siloga, peegoo debeli odoosonibada goo ogoloso tekepo dalaiso. Osoloso niso nediliyo pidilame nee odoomapoo na be.

### *Yesuye sibilei eyo goo*

<sup>13</sup> Emegei tei telaga odoosoyiyo odoowedia eyo goo gooleedelega badalai, iba koo goomogo. Peegoo debeli odoosowedia halo gooholone diya pupusigeliso. Bei, diba odoowedia oso see hogogadilei goo ee diba gooleedele. Esino peegoo debeli odoodiayo odoowedia halo diya goohele sabolo debeli egeesi masina debee.

<sup>14</sup> Bei, iba Yesuye ta maga see hogadi goomapoo tei teliso. Esiga iba see tei toso, Yesuye see wedi siboga, Godeeye tei telaga odoowedia ee Yesubolo sibe dalaiso.

<sup>15</sup> Osoloso Lodee eyo taka to ee iyonimapoo ka taka, goo ee Lodeeye sibilei biame omapoo, odoowedia osee mologa, iba wedilega gie hagee do odoososaga malalo Yesu mapoo palaime.

<sup>16</sup> Esino Lodee eyo Kei mi ma dokodooga sibulone, to kitulugu sabolo, osoloso Godeeyo momaiye dia wiligi odoosoyoto sabolo, osoloso Godeeyo kibu i sabolo sibileiso. Egeeseega Keliso mapoo tei tolosoo odoowedia oso daga malalohogogadileiso.

<sup>17</sup> Diba olo pologa, iba wedilega epedee hagee do odoosabolo, osoloso odoowedia hogogadi sabolo, hodobo mooloogoodoloso, kei ma dokodoo Lodee tugodalame palaiso. Osoloso iba Lodee sabolobadoboso kookaiyo osee badalaiso.

<sup>18</sup> Esiga niba nemegei nima kuloduegee do odoosowedia maga diya goolee sabolo debeeyaga, kibilame to hagee dimapoo takee.

## 5

### *Yesuye sibilei goo mapoo mopoodoo de*

<sup>1</sup> Tei telaga odoosoyiyo odoohageesi oso peledabalai biame ee nimapoo see tobu hogugulei goo haga toowanee.

<sup>2</sup> Bei, niba olo gooleedooso, Lodeeye see wedi siboga, heli teli odoosogesi sibilei egeesi masi sibileiso.

<sup>3</sup> Biame omapoo odoosoyiyo odoosogesi takalaiso, "Epee! Biame diya tekepo. Imapoo goo hee mauwe, goomoga goo

oso moloso,” dalaiso. Egeese takaga mologa, haga booloogelega dala goo oso dimapoo siboga tokenee palaiso. Esiga niba goolee, sobo koowasi oso yayo holope soomagalame, dala oso yimapoo sibili yo gooleedoloso badoga koo pelededelee. Esiga goo hagee egeesi masi. Esiga odo abo oso biame ee gooleedoloso badoga ka sibileime. Esiga biame omapoo odo heeso peegoo pulo dilei tebileime.

<sup>4</sup> Esino tei telaga odo emegei, niba neliga ma kulodu koo debeli. Osoloso niba heli teli odo oso nibada mosopoo siboga, niba dio diliso. Esino Lodeeyo biame oso siboga, niba dio dileime. Bei, niba biame oso sibilei mapoo mopoodoo doloso bolone doso.

<sup>5</sup> Esiga niba biame gadeebugu mapoo kulodu silesibili odo oso. Esiga iba tei telaga odo gesi neliga ma kulodu koo debeli.

<sup>6</sup> Esiga iba tieseli odo oso debei masi na dobomo. Esino iba mopoodoo doloso ibada su oso tokenee teyaga kookoodoloso bolone ka dobomo.

<sup>7</sup> Bei, tieseli odo oso gesi tieseliso. Osoloso yugune nalagaloso halabagali odo oso gesi yugune nalagaliso.

<sup>8</sup> Esino iba biame gadeebugu ma kulodu debeli odo oso. Esiga iba tekepo, mopoodoo doloso dobolone, ibada su oso tokenee teyaga kookoodoloso bolone dobomo. Esiga ha teli odo oso o su tioso woodeyaga gooloogalame, ki bi o su mapoo kaliso. Esiga iba egeesi masi Saiten oso gamenee taka mapoo homodobiya, iba Yesu mapoo tei tolone dobolone, emegei sooloo dolone dobomo. Osoloso ha teli odo oso o wiligi mapoo tioso wood-eyaga gooloogalame, ki bi wiligi mapoo meliso. Esiga iba egeesi masi Saiten oso gamenee taka mapoo homodobiya, iba gie badeli talame tei tolone dobomo.

<sup>9</sup> Bei, Godeeye iba hesiga hagee, yayo komonolone dala tenelame ka hesigele. Esino ibada Lodee Yesu Keliso maga gie badeli talame ka hesiga.

<sup>10</sup> Esiga Kelisoye iba halo olo taso, iyo yi-

bolo hodobo dabalame. Esiga iyo doboso wedioga, goo oso iyo Keliso sabolo dabalai goo ee opusomo dalaime.

<sup>11</sup> Esiga niba nee odo oso tei too ma kulodu kibiya dabalame, pidili toso nei takoo, nei takoo dolone ka debee. Esino a gooleedooso, niba egeeseelone doso.

#### *To hamameedee kokodo taka*

<sup>12</sup> Tei telaga odo emegei, iyo nimapoo taka, nibada sosee wiligi odo tebisa sabolo, osoloso Godeeyo to eligili odo sabolo mapoo mesiloso dimapoo goomoga tenee. Bei, diayo nima kulodu tou toowa diya tolone doso.

<sup>13</sup> Esiga diayo tou too maga niyo diba sooloo dolone, dimapoo mesie. Egeeseelone nemegei odo sabolo medee mesiloso debee.

<sup>14</sup> Osoloso nima kulodu tou talai mapoo wabedeli odo oso tou talame toso diya takee. Osoloso odo howo woola tou talai simili odo mapoo pidi to oso pidilone debee. Osoloso koo kibili odo pidilone debee. Osoloso niba nemegei odo sabolo mesiloso dobolone, saga kamanabugu dolone na debee.

<sup>15</sup> Egeeseelone dobolone, edebeeyo nimapoo tokenee goo hee toga, nei na tenee. Esino niba nima kulodu osoloso odo susuga ma kulodu mesie sabolo tekepo goo ono tolone ka debee.

<sup>16</sup> Biame susuga ma kulodu goomogolone debee.

<sup>17</sup> Egeeseelone dobolone biame susuga Godee mapoo takolone debee.

<sup>18</sup> Osoloso goo susuga ma kulodu Godee mapoo goomoga to takolone debee. Bei, Godeeye Kelisowo odo oso goo hageesi talai ee goomogoso.

<sup>19</sup> Esiga niba Dio Tei oso nimapoo tou talai na hamaga takee.

<sup>20</sup> Egeeseelone, Godee maga to toloso kokodo takomo sili odo oso Godeeye taka duloso to takooga omapoo na gowee.

<sup>21</sup> Esino to mapoo medee dui, osoloso medee goolee, goo egee tei Godee maga simi beleso agalame. Goo egee tei goo daga, to mapoo tei te.

<sup>22</sup> Osoloso tokenee goo telega debee.

<sup>23</sup> Esiga iyo Godee mapoo takooso, mesie goo teneli Godee yayo medee todoloso badalai goo ee nimapoo tenelame. Osoloso iba see Godee mapoo takooso, ibada Lodee Yesu Keliso oso sibilei biame mapoo bamo dulone, nibada dio maga, osoloso nibada su maga, osoloso niyo goolee maga tokenee mauwe poogoloso dabalame.

<sup>24</sup> Esiga Godeeye nimapoo goo hagee moodoolaiso. Bei, niba hesiga Godee yayo to taka ee dadalai koo pegeli.

<sup>25</sup> Tei telaga odoo emegei, niyo iba halo Godee mapoo takolone debee.

<sup>26</sup> Osoloso nemegei tei telaga odoo mapoo emegei di to takolone ka debee.

<sup>27</sup> Ayo Lodeeyo hu maga niyo to hogugu hagee tei telaga odoo susuga mapoo hesigalame ka taka.

<sup>28</sup> Esiga ayo Godee mapoo takooso, ibada Lodee Yesu Kelisoye niba sooloo dolone pidilame.



## 2 Tesalonika

### Poloye see tobu Tesalonika odoo dimapoo to hogugu tenee

#### *2 Tesalonika booka goo eyo bei*

Polo dio Timoti dio diayo to daga malalo hogugu ee (1 Tesalonika) Tesalonika sosee mapoo teneeso. Osoloso see hamamee a 6 poogoloso to hagee hoguguso. Bei, Tesalonika sosee ma kulodu debeli tei telaga odoo abo oso dibada tou susuga ee poogoloso see wulo dobolone Yesuye sibilei goo ee bolone debeiso. Esem Poloye goo egee ogoloso see tobu dimapoo kokodo taka to hagee hoguguloso teneeso. Osoloso odoo abo oso Yesuye sibilei goo mapoo dooboo goolone bolone doboome, Poloye Yesuye sibilei goo ee see medee dimapoo eligiso.

<sup>1</sup> To hogugu hagee Polo, Sailesi, osoloso Timoti, iyo Tesalonika mi ma kulodu debeli tei telaga odoo nimapoo ka teneeso. Niba Ma Godee sabolo, osoloso Lodee Yesu Keliso sabolo hedebe doloso doso.

<sup>2</sup> Esiga iyo Godee mapoo takooso, Ma Godee sabolo osoloso Lodee Yesu Kelisoye niba sooloo dolone pidilame osoloso mesie sabolo dabalame.

#### *Kelisoye see sibilei goo*

<sup>3</sup> Tei telaga odoo emegei, niyo tei too goo sabolo nemegei sooloo deli goo sabolo oso nima kulodu egee kauwu maga, iyo Godee mapoo goomoga to takalai tekepo.

<sup>4</sup> Esiga niba dala goo sabolo hegi goo sabolo ee ma kulodu tei tolone dobolone kibiloso osee egee do maga, iyo goomoga sabolo Godeeyo sosee abo mapoo debeli tei telaga odoo mapoo nibada goo takomo silesibiliso.

<sup>5</sup> Niyo tei too maga dala egee to goo oso, Godeeye odoo susuga dia goo medee tekepo midilei goo ee woola ka eligiso. Goo egeesi maga Godeeye niba yayo wiligi doloso badeli mapoo gasibilei teiba

dalaiso. Egeesi maga Godeeye wiligi doloso badeli goo maga niyo dala ka toso.

<sup>6-7</sup> Esiga Godeeye hedebe hooda tei goo moodeliso. Esiga Yesuye see wedi siboga, odoo nimapoo dala egee tenemolo dimapoo Godeeye nei dala tenelaiso. Osoloso odoo dala ma kulodu egee do nimapoo hasali tekepo tenelaiso. Osoloso ibolosee hasali tekepo tenelaiso. Lodee Yesuye see wedi siboga, o momaiye kitulugu susuga sabolo Kei mi ma dokodooga dou paiya sabolo sibileiso.

<sup>8</sup> Osoloso yayo sibileso, Godeeyo goo mapoo goweli odoo sabolo, osoloso to tekepo Kelisowo goo mapoo koo mesili odoo dimapoo nei dala tenelaiso.

<sup>9</sup> Omapoo Lodeeye diba tokenee poloso togobigileiso, osoloso o mudugiyopaga yayo diba toloso o kitulugu toowa maga peegoo togobisaga, diayo dala omapoo dobolone dala hoo poogoo me poogoloso osee dabalaiso.

<sup>10</sup> Osoloso yayo sibilei biame omapoo, o odoo oso yimapoo goomoga tenelone Yesuwo hu dokodoo poudileiso. Bei, Yesu yayo daga diba pidi maga. Osoloso tei telaga odoo susuga oso Yesu mapoo howoodalaiso. Esiga ee ma kulodu nibolo hodobo dabalaiso. Bei, niyo to tekepo iyo nimapoo takeme, niyo tei too maga.

<sup>11</sup> Iba goo hamapoo niba halo, Godee mapoo biame susuga takolone doso, niyo yayo goomoga goo ee tolone dabalame. Bei, niyo goo egeesi ee tolone dabalame, Godeeye niba hesigaso. Osoloso iyo see Godee mapoo takooso, nimapoo goo goolee tekepo egee molo toloso, Godeeye kitulugu maga nibada suso tou talame. Osoloso see niyo tei too ma kuloduga egee kauwu tou ee medee talame.

<sup>12</sup> Esiga iyo dokodoo hagee takoo goo ee, edebeeyo nibada goo tekepo ogoloso ibada Lodee Yesuwo hu dokodoo poudilame ka seeso. Osoloso Lodee Yesuye nei nibada hu dokodoo poudoolone goomoga tenelame. Esiga ibada Godee osoloso Lodee Yesu Kelisoye sooloo dolone pidi maga goo hagee ka siboso.

## 2

### *Tei magoo mapoo koo mesili odo*

<sup>1</sup> Tei telaga odo emegei, ibada Lodee Yesu Kelisoye sibilei goo sabolo osoloso yayo iba gilimadoloso hodobo yo tugodalai goo sabolo nimapoo takalai iba goomogo.

<sup>2</sup> Esiga odo aboso sibilesa takolone, “Lodeeyo biame olo simiso,” dee takooga duloso, dio dulone sooloo habasagolone, dia to mapoo tei na te. Osoloso diayo takolone, “Dio Tei oso imapoo goo hagee ka eligiso,” dee takooga dia to mapoo tei na te. Osoloso see diayo takolone, “Polo diayo imapoo to hogugu tenelone egeesee taka,” dee takooga goo onosee omapoo tei na te.

<sup>3</sup> Esiga goo hageesee susuga ee ma kulodu odo heeso niba gamenee na takee dee. Bei, Lodeeyo biame oso sibilei mologa, daga goo bakadio oso peledabalaiso. Esiga odo aboso Lodee gowoolone yimapoo miligi pileiso. Osoloso tei magoo mapoo koo mesili odo oso peledabalaiso. Esino hamamee yo dou ma toodalaiso.

<sup>4</sup> Yayo o su eyo nediliyo si howolone, edebeeyo goomegeli godee susuga ee tokenee dolone, hedebe yo tekepo doloso si howolaiso. Egeeseelone, yayo dileso Godeeyo tei moso mapoo badolone anosee tei Godee dalaiso.

<sup>5</sup> Esino ayo nibolo silone, goo susuga hagee nimapoo takomo silee goo ee, niyo boobado bugusomo?

<sup>6</sup> Esiga epedee hamapoo tei magoo mapoo koo mesili odo oso sibilesa goo tokenee teyaga hamaga taka goo ee niba olo gooleedooso. Yo tei o biame Godeeye magoo mapoo woola ka peledabalame yo hamaga takaso.

<sup>7-8</sup> Esino tei magoo mapoo koo mesili goo oso mada odo ma kulodu olo goo moodoo moloso. Esino goo egeesi oso toowa peyaga, goo tokenee teyaga hamaga takeli odo oso hamaga takoloso badoso. Osoloso hamamee goo tokenee teyaga hamaga takeli odo ee peegoo duga, tei magoo mapoo koo mesili odo ee biame omapoo peledabalaiso. Esino

Lodee Yesuye sibilesa, o maga maga poodi sabolo osoloso yayo toowa doloso kitulugu sabolo oso tei magoo mapoo koo mesili odo ee wooloomaloso pagalaiso.

<sup>9</sup> Esiga tei magoo mapoo koo mesili odo oso siboga, yo Saitenso kitulugu sabolo sibileiso. Osoloso yayo Saitenso kitulugu maga goo toowa opusomo di moodoomo sileiso.

<sup>10</sup> Yayo egeeseemo silone, goo tokenee opusomo opusomo di maga peegoo debeli odo ee gamenee goo maga diba talaiso. Osoloso diba ee ma kulodu dobolone wedileiso. Bei, diba gie badeli to mapoo gowoolone tei tele.

<sup>11</sup> Goo egeesi maga Godeeye goo tiadili goo toowa dimapoo tenelaiso, diayo tei magoo mapoo koo mesili odo oso gameenee goo taka mapoo tei talame.

<sup>12</sup> Esiga edebeeyo tei goo mapoo tei telaga poogoloso, see tokenee goo goomegeli odo ee Godeeye dibada goo midiloso dimapoo tokenee eyo nei dala tenelaiso.

### *Kibiya debee*

<sup>13</sup> Tei telaga odo emegei, Lodeeye sooloo dala oso nibolo hodobo moloso. Osoloso iyo niba halo Godee mapoo goomoga to takalai tekepo. Bei, Godeeye daga hoo-goo niyo gie badeli talame niba olo hesigaso. Esiga niyo Dio Tei oso kitulugu maga goo tokenee mauwe dobolone, niyo tei goo mapoo tei too maga Godeeye nimapoo gie badeli olo teneeso.

<sup>14</sup> Godeeye iyo to tekepo hagee takomo silo maga niyo gie badeli talame niba iso, osoloso Yesu Keliso yo toowa dolone niba yibolo hodobo dabalame.

<sup>15</sup> Esiga tei telaga odo emegei, iyo nimapoo eligi goo sabolo osoloso to hoguguloso tenee sabolo medee kibiya toloso tei too ma kulodu kibiya debee.

<sup>16-17</sup> Esiga iyo Godee mapoo takooso, ibada Lodee Yesu Keliso sabolo osoloso Ma Godee sabolo oso niba pidilone nimapoo kitulugu tenelaiso, niyo goo tekepo tomo silone to tekepo komo silame. Bei, ibada Ama Godeeye iba sooloo dolone imapoo kookaiyo moloso osee malai pidili goo ee

teneeso, iyo goomoga sabolo gie badeli yayo tenelai ee bolone dabalame.

### 3

#### *Niyo iba halo Godee mapoo takee*

<sup>1</sup> Tei telaga odoo emegei, Lodeeyo goo oso mi susuga mapoo saga dudobigilame, niyo iba halo Godee mapoo takee. Bei, iba goomogoso, Godeeyo to mapoo niyo tei toloso mesie egee do egeesi masi odoo mi susuga mapoo egee do diba nosee egeesee dabalame.

<sup>2</sup> Egeesi ma kulodu tokenee odoo oso imapoo dala teneeyaga, Godeeye iba pidilame yimapoo takee. Bei, odoo susuga oso Godee mapoo haga tei tele.

<sup>3</sup> Esino Godee eyo to kitulugu magoo ee dadalai koo pegeli. Esiga yayo niba kitulugu teneloso niba medee balaiso, tokenee odoo Saiten yayo nimapoo dala teneeyaga.

<sup>4</sup> Esiga iba Lodee mapoo tei toso, niyo iyo taka goo ee tomoloso, osoloso hamamee osee tomalaiso.

<sup>5</sup> Esiga iyo niba halo Godee mapoo takooso, Lodeeye pidi maga Godeeye sooloo dala goo ee medee gooleedoloso dabalame. Osoloso dala ma kulodu kibiya dobolone Yesuye dala ma kuloduga kibiya badebei egeesi masi dabalame.

#### *Kitulugu sabolo tou ka te*

<sup>6</sup> Tei telaga odoo emegei, iyo Yesu Kelisowo hu maga nimapoo diya ka taka. Tei telaga odoo aboso iyo eligi to ee dedelega pegeli sabolo osoloso tou talai wabedeli odoo dimaga peegoo dooboobigi.

<sup>7</sup> Bei, iyo debei goo ee niba olo gooleedooso. Esiga niba nosee egeesee dabalai tekepo. Bei, iyo nibolo hodobo debei ee ma kulodu iba wabodo buguloso debele.

<sup>8</sup> Osoloso iba odoo heeyo nei nali bi iyo wulayo koo nali. Haye, iba nei molee teneloso nei ka nali. Osoloso biame sabolo gesi sabolo ibada su oso tou toowa teliso, iyo nei nali bi talai eyo nei magalai ee talame. Iyo egeesee seega nimapoo hegi goo tenelega pagalame.

<sup>9</sup> Iyo egeeseemo silone, niyo iba pidi doloso takalai kitulugu meleeno goo ee

woola yilige bigile. Esino iyo nibolo hodobo dobolone, iba tou toowa teliso, niyo ibada goo ee padalame.

<sup>10</sup> Osoloso iyo nibolo hodobo silee biame mapoo, iyo nimapoo eligi goo ee hagoso. Odoo hee tou talai wabada daga, yimapoo nei nali bi na tenee.

<sup>11</sup> Osoloso iyo nima kulodu odoo aboso tou talai goweli goo ee taka iba duso. Egeeseelone diba tou telega wulo mosoowe domo silesibulone odoo heeyo goo ee takomo silesiboso.

<sup>12</sup> Iyo odoo egeesi mapoo Yesu Kelisowo hu maga ka taka, diayo goo egee poogoloso nei nali bi talai eyo nei magalai ee talame tou tolone dabalame.

<sup>13</sup> Esino tei telaga odoo emegei, niyo goo tekepo talai mapoo na wabede.

<sup>14</sup> Goo egeesi ma kulodu odoo heeso iyo to hoguguloso tenee hamapoo mesilega poogooga, niyo o goo odoo woola yilige bigi. Osoloso yibolo hedebe dee na see. Egeeseega yayo goo hagee ogoloso similone wabedelega badalame.

<sup>15</sup> Esino ee ma kulodu yo ha teli odoo dee na see. Wulo yimapoo toso kokodo takee. Bei, yayo nibolo hodobo tei too ma kulodu badoso.

#### *Poloye emegei di to hamameedee taka*

<sup>16</sup> Esiga ayo Godee mapoo takooso, goo susuga ee ma kulodu mesili teneli Lodeeye biame susuga nimapoo mesili goo tenelame, osoloso Lodeeye nibolo hodobo badalame.

<sup>17</sup> A Polo, ayo hamapoo mo deeso emegei di to hagee ka hoguga. To ayo hogugu goo ee hagoso. Niyo hamapoo medee hoodo ogoloso to hogugu susuga ee ayo hogugudoo dalame. Esiga ayo egeesee hoguguliso.

<sup>18</sup> Esiga ayo Godee mapoo takooso, ibada Lodee Yesu Kelisoye niba sooloo dolone pidilame.

## 1 Timoti Poloye Timoti mapoo to hogugu tenee

### *1 Timoti booka goo eyo bei*

Poloye Godeeyo to takomo silee biame mapoo Timotiye yayo eligi goo ee duloso tei tooso. Osoloso Poloye mi susuga mapoo Godeeyo to takomo sileeme, yayo yibolo sileeso. Osoloso hamamee Timotiye tei telaga odoo Epeses mi mapoo debeli ee bolone badoboome, Poloye to hogugu hagee yimapoo teneeso. To hogugu hagee ma kulodu sosee medee balai goo omaga kokodo takaso.

<sup>1</sup> A Polo. Ibada gie badeli pidili Godeeye, osoloso Yesu Kelisoye a hesialoso diye di tou ee amapoo teneeso. Osoloso iba Yesu Kelisoye see wedi sibilei ee dulone bolone ka doso.

<sup>2</sup> Ayo to hogugu hagee Timoti namapoo ka tonowa. Tei too ma kulodu no tei mo holo masi badoso.

Ayo Godee mapoo taka, Ma Godeeye, osoloso ibada Lodee Yesu Kelisoye, no sooloo dolone pidilame, osoloso mesie goo namapoo tenelame.

### *Gamenee eligi eyo goo maga kokodo taka*

<sup>3</sup> A Makedoniya mi mapoo dulone ayo namapoo to kitulugu sabolo olo takaso, nayo Epeses mi mapoo badalame. Esiga a goomogo, nayo mi omapoo osee badalai. Bei, nayo omapoo badolone, odoo aboso gamenee goo egee eligimo silesibo ee hamaga takalame.

<sup>4</sup> Odoo hagee biaso adaga dia gesaboo ee tei telaga odoo mapoo diya oposusumo silesiboso. Osoloso diayo dia adagaso balomo simi goo ee diya oposusumo silesiboso. Esino oposusu goo hagoso wulo odoo susuga mapoo toso agadili goo ee tosiboso. Esiga diayo eligi goo oso edebeeyo tei too goo maga Godeeyo tou talai ee koo pidili.

<sup>5</sup> Esiga nayo gamenee goo eligili odoo ee hamaga takalai tekepo, tei telaga odoo

oso emegei medee diya sooloo dolone dalame. Sooloo deli goo ee sooloo ma kulodu goo tokenee mauwe maga, osoloso Godeeyo howo woola tokenee mauwe doloso gooleedeli goo maga, osoloso Yesu Keliso mapoo medee kibiya tei too maga sibiliso.

<sup>6</sup> Esino gamenee goo eligimo silesibili odoo aboso goo tekepo omaga miligi piaso. Goo egeesi maga diayo goo bei mauwe takomo silesibiliso.

<sup>7</sup> Esiga tei magoo Godeeye Moses mapoo tenee ee diayo eligimo silesibilei, diba goomogoso. Esino tei magoo goo eyo bei ee, diba gooleedele. Osoloso to dieso taka eyo bei ee medee gooleedele. Diba wulo boobadolone Godeeye tei magoo ee hageesi molodoo dolone, dooboo eligimo silesibiliso.

<sup>8</sup> Esino iba gooleedoo, edebeeyo tei magoo ee medee eligiga, tei magoo ee medee tekepo malaiso.

<sup>9</sup> Bei, tei magoo hagee odoo goo tekepo teli ee goolone hoguguloso ka tenele. Esino odoo tei magoo gababili mapoo, osoloso odoo tei magoo dadalai goweli mapoo, osoloso odoo Godee mapoo miligi pieli mapoo, osoloso odoo goo tokenee teli mapoo, osoloso tedele poogoloso wulo mi goo mapoo dodomo silesibili odoo mapoo, osoloso dibada owee wooloomali odoo mapoo, osoloso ama wooloomali odoo mapoo, osoloso odoo abo piligili odoo mapoo,

<sup>10</sup> osoloso gisoso sobo goo heli teli mapoo, osoloso gisoso emegei giso goo heli teli mapoo, osoloso soboso emegei sobo goo heli teli mapoo, osoloso odoo idoloso nei mauwe tou talame odoo abo mapoo neiso teli odoo mapoo, osoloso gamenee takeli odoo mapoo, osoloso goo midili mapoo tei yilone gamenee takeli odoo mapoo, osoloso Godeeye tei goodee eligi goo sabolo tebile poogoloso goo abo teli odoo mapoo ka tenee.

<sup>11</sup> Eligi goo susuga egee to tekepo ma kulodu ka moloso. To tekepo ee Godeeye amapoo olo teneeso, ayo odoo mapoo takomo silame. To tekepo hagoso Godeeye toowa doloso badeli goo sabolo, osoloso



yayo medee tekepo badeli goo ee yilige bigiliso.

*Godeeye sooloo deli goo maga  
Poloye goomoga to taka*

<sup>12</sup> Amapoo kitulugu teneli ibada Lodee Yesu Keliso mapoo, ayo goomoga to taka. Bei, yayo amapoo tei dolone, ayo o tou talame, yayo a hesiaso.

<sup>13</sup> Ayo daga tei telega badolone, Kelisowo hu maga to tokenee takeliso. Osoloso Yesu Keliso mapoo tei telaga odo mapoo, ayo dala goo sabolo hegi goo sabolo teneliso. Esino Godeeye a sooloo dolone mo goo tokenee eyo nei tenele. Bei, biame omapoo a tei telega badolone, goo mawo tomo silee susuga ee, a medee kibiya gooleedele.

<sup>14</sup> Osoloso ibada Lodeeye a diya sooloo dolone medee pidiso. Goo egeesi maga ayo Yesu Keliso mapoo tei tolone, odo abo sooloo deliso. Bei, ayo yibolo hedebe doloso ka badoga.

<sup>15</sup> Yesu Kelisoye goo tokenee teli odo ibada gie badeli pidilame mipoo hamapoo simiso. Esiga to egee tei dolone, iyo duloso omapoo tei talai tekepo. Esino goo tokenee teli odo susuga ee ma kulodu, hedebe ayo diya tokenee badebeiso.

<sup>16</sup> Esino ayo egeese badoboome, Yesu Kelisoye sooloo dolone a see idooso, edebeeyo goo hagee ogoloso Yesuye goo tokenee teli odo susuga mapoo saga kemenelega pegeli goo sabolo, osoloso mesie sabolo egee bado goo ee gooleedalame. Osoloso edebeeyo yimapoo tei toloso badolone badoboso kookaiyo gie badeli ee talame.

<sup>17</sup> Godee yo wiligi odo toboloso kookaiyo osee badoso. Yo koo teli, osoloso odo susuga oso yo koo egeli. Osoloso Godee hedebe yayo badoso. Esiga tekepo, iyo o hu dokodoo poudoolone, yimapoo goomogolone badalai goo oso kookaiyo moloso osee malaiso. To hagee tei goo.

*Poloye Timoti mapoo tei too ma kulodu  
medee kibiya badalame kokodo taka*

**1:12:** Diye 9:15; Gal 1:15-16; 1Kol 15:9-10  
5:5 **2:6:** Loum 3:29-30; Gal 1:4

<sup>18</sup> Mo holo Timoti, Godee maga to toloso kokodo takomo silesibili odo oso daga namaga taka to ee medee goolee. Osoloso to diayo taka ee anosee goolee molone, ayo namapoo to hogugu hagee ka tonowa. Esiga nayo Godeeyo to eligimo silone, to egee medee kookoodoloso kibiya badebee, ha teli odo oso ha tolone medee kibiya tebeli egeesi masi, nayo Godeeyo tou kibiya talame.

<sup>19</sup> Osoloso nayo Yesu Keliso mapoo tei too goo ee medee kibiloso badolone, nee sooloo ma kulodu goo goolee tekepo egee molo ee tobuloso tolone badebee. Bei, odo aboso dia sooloo ma kulodu goo goolee tekepo egee molo ee gooleedoloso medee koo dedeli. Goo egeesi maga, diayo Keliso mapoo tei too goo ee poogooso.

<sup>20</sup> Esiga odo hagee bia dima kulodu Humenayos dio osoloso Alesanda dio oso doso. O bakadio ee ayo Saiteneeyo dee mapoo magooso. Bei, o bakadio oso Godeeyo goo dooboo eligimo silesibili goo omaga Godeeyo hu tokenee peli goo ee dieso hoodo ogoloso omapoo pagalame.

## 2

*Godee mapoo takeli goo ee eligi*

<sup>1</sup> Esiga goo toowa ayo kitulugu sabolo namapoo hagee takoo ee egeesi moloso. Tei telaga odo iyo Godee mapoo goomoga to sabolo yimapoo takolone, odo susuga pidilame yimapoo takalai tekepo.

<sup>2</sup> Osoloso wiligi odo tebisa sabolo, osoloso gamalee odo susuga ee Godeeye pidilame iyo yimapoo takalai tekepo. Bei, iyo hodobo mesie goo ma kulodu dobolone, Godeeye goomoga goo sabolo, osoloso odo susuga mapoo goo tekepo tolone dabalame.

<sup>3</sup> Bei, iyo odo abo halo Godee mapoo takooga, iba goo tekepo toso. Egeeseega ibada gie badeli pidili Godee yo goomogalaiso.

<sup>4</sup> Godee yo goomogoso, odo susuga oso gie badeli pidili talame, osoloso Godeeyo goo maga tei goodee sabolo gooleedalame.

**1:13:** Diye 8:3; 9:1-5 **1:15:** Luka 19:10 **1:20:** 2Tim 4:14-15; 1Kol 5:5

<sup>5</sup> Bei, Godee hedebe yayo ka badoso, osoloso Godee ogo odo ogo doloso domo badeli odo hedebe Yesu Kelisoye badoso.

<sup>6</sup> Biame Godeeye magoo mapoo Yesuye o su teli mapoo magooso, odo susuga ee see eyo neiso idilame. Goo egeesi maga, iba ogoloso gooleedooso, Godeeye odo susuga dia gie badeli pidilei, yo goomogoso.

<sup>7</sup> Esiga to ayo hagee takoo ee tei goo. Ayo gamenee koo takooso. Esiga ayo Godee mapoo takooso, ibada Lodee Yesu Kelisoye niba susuga sooloo dolone pidilame. Goo hagee tei goo.

<sup>8</sup> Esiga mi susuga mapoo tei telaga odo oso howo gisilame mooloogoodoloso doga, mooloogoodoo ee ma kulodu giso teedee debeli oso dibada dee dokodoo peligadoloso Godee mapoo takolone dabalai, a goomogo. Esino dima kulodu toso agadigilone kamana sabolo dabalai, a koo goomogo.

<sup>9</sup> Osoloso tei too sobo oso dugo di-ayo kalakalai ee medee ogoloso kalai, a goomogo. Esino edebeeyo dimapoo balagalame, diba dugo nei toowaso teli kalakalai sabolo, osoloso wudu tiegisilei, a koo goomogo. Osoloso yo gold deli oso moodeli bi sabolo gie masi daloso kalai, a koo goomogo.\*

<sup>10</sup> Esino Godee mapoo mesili sobo oso emegei pidilone, goo tekepo tolone dabalai tekepo.

<sup>11</sup> Godeeyo to takeli odo oso Godeeyo to takomologa, soboso medee dulone dobolone goo goolee toloso to omapoo mesimo silesibe.

<sup>12</sup> Egeesi ma kulodu soboso giso wiligi doloso dobolone Godeeyo to dimapoo eligilame, ayo koo takooso. Esino soboso to mauwe dobolone Godeeyo to ono medee dulei tekepo.

<sup>13</sup> Bei, Godeeye daga Adam moodooloso see hamamee Ipi moodooso.

<sup>14</sup> Egeesi ma kulodu Adameeye Saitenso gamenee taka mapoo tei tele. Esino so-

boso gamenee taka goo mapoo tei toloso Godeeye tei magoo ee gababiaso.

<sup>15</sup> Esiga soboso holo sooloogolone dabalai tekepo. Egeeseelone diayo tei too ma kulodu kibiloso, Godeeye goomegeli goo ee tolone sabolo, osoloso su kookoodoloso dobolone, odo susuga ee sooloo dolone doga, Godeeye dia gie badeli pidileiso.

### 3

#### *Sosee bali odo*

<sup>1</sup> Esiga to ayo hagee takoo ee tei dolone, iyo duloso omapoo tei talai tekepo. Edebeeyo sosee balai gooleega, yo tou tekepo talame goomogoso.

<sup>2</sup> Esiga odo aboso diba maneyaga, sosee bali odo oso odo susuga eyo howo woola tekepo badolone, sobo hedebe huloso badalai tekepo. Osoloso yo goo goolee tekepo ee dodolone badebee. Osoloso yo eyo nediliyo o su medee kookoodoloso badebee. Osoloso yo mesiloso badebee. Osoloso odo soo simi mapoo emegei dolone badebee. Osoloso to tekepo medee eligili odo doloso badebee.

<sup>3</sup> Osoloso yo yugune naloso boobadolone na badebee. Osoloso saga kamana buguloso emegei woolone na badebee, esino mesiloso badebee. Osoloso toso agadigilone na badebee. Osoloso yo molee haga na gie.

<sup>4</sup> Osoloso yo osobo sabolo osoloso owolo dio medee bolone badebee. Osoloso owolo dio oso o to duloso mesilone dabalame dimapoo eligi.

<sup>5</sup> Esino yayo osobo sabolo osoloso owolo dio sabolo medee balai tebile daga, yayo tei telaga odo kasee balaisomo? Yayo diba medee balai tebileime.

<sup>6</sup> Osoloso odo epedee gie tei too oso sosee balame hudi magalai tekeponee. Bei, yayo eyo nediliyo si hoowa goo omaga homodobuloso nei Godeeye yimapoo dala teneeyaga. Bei, goo hedebe egeesi masi, Saiten yo daga eyo nediliyo si hoowa goo omaga homodobuloso nei dala tooso.

**2:7:** Diye 9:15; Gal 2:7-8; 2Tim 1:11    **2:9:** 1Pita 3:3-5    \* **2:9:** Poloye badebei biame omapoo, sobo aboso dugo nei toowaso teli kalakaloso, wudu tiegisaloso, bi abo medee tekepo dia su mapoo kalakaliso, gisoso ogoloso diba gilame, osoloso odo howo woola dieso mopoodoo doo ee eligilame. Esino tei telaga sobo oso howo gisilame mooloogoodoloso dobolone goo egeesi moodolai, Polo yo goomegele.    **2:10:** 1Tim 5:10    **2:12:** 1Kol 14:34  
**2:13:** Gen 2:7, 21-22; 1Kol 11:8-9    **2:14:** 2Kol 11:3; Gal 3:1-6    **3:1:** Diye 20:28    **3:2:** Tait 1:6-9

<sup>7</sup> Esiga peegoo debeli odoo oso sosee bali odoo hageeyo goo ee ogoloso tekepo dalai soowa. Egeeseega odoo susuga oso yimaga to tokenee hee takalaime. Osoloso Saitenso yo goo tokenee talame gido duga, yo o ti gama mapoo gadileime.

### *Dikon odoo*

<sup>8</sup> Dikon odoo diba nosee medee todolone debee. Osoloso diba biame susuga ma kulodu medee tei goo takolone i bakadio dolone na debee. Osoloso diba yugune naloso boobadolone na debee. Osoloso molee talame gamenee takolone na debee.

<sup>9</sup> Osoloso Godeeyo howo woola tokenee mauwe egee do goo ee gooleedoloso dobolone, Godeeye eligi goo mapoo tei too goo ee medee kookoode.

<sup>10</sup> Esiga odoo agayo dikon tebisilei daga, tei telaga odoo oso daga odoo egee bia dia goo ee medee egege. Egeesi ma kulodu dibada goo susuga tekepo daga, odoo egee bia oso dikon odoo ka tebiseye dee.

<sup>11</sup> Esiga dikon sobo\* hesieli goo onosee egeesi moloso. Diba nosee medee todolone debee. Osoloso emegei dia goo na takee. Osoloso dibada su dieso nediliyo medee kookoode. Osoloso diayo tou too ma kulodu medee goosa tolone ka debee.

<sup>12</sup> Egeesi ma kulodu dikon odoo oso sobo hedebe huloso badebee. Osoloso diayo dibada holo sabolo, osoloso dia moso kulodu debeli odoo ee medee balai tekepo.

<sup>13</sup> Esiga dikon odoo oso tou medee toga, tei telaga odoo oso ogoloso odoo egee bia tekepo dalaiso. Egeesee taka duloso dikon odoo oso Yesu Keliso mapoo tei too goo ee odoo mapoo takalai ebilega kibiya dabalaiso.

### *Iyo Godee gooleedalai goo eyo bei*

<sup>14</sup> A goomogoso, nayo egee bado mapoo saga sibilame. Esino ayo wulo to hogugu hagee namapoo ka tonowa.

<sup>15</sup> Bei, ayo saga sibilega poogooga, to hogugu hagosoo Godeeyo soosoo oso goo talai ee namapoo eligileiso. Bei, Godeeyo soosoo hagee bia ee gie badeli Godeeyo sosee oso. Esiga Godee o sosee hagee

omou masi oso Godeeyo goo maga tei goodee ee pupodou ka moloso.

<sup>16</sup> O. Tei takoo. Tei goodee Godeeye yilige bugu oso diya toowa ka moloso. Goo ee,

Keliso ye tei odoo poloso sileeme, odoo aboso yo egeiso.

Osoloso Dio Tei oso yo odoo tekepo doloso woola eligiso.

Osoloso Godeeyo momaiye oso yo egeiso.

Osoloso o odoo oso mi opusomo opusomo di mapoo debeli odoo mapoo o goo takomo silesibume, odoo bei oso yimapoo tei tooso.

Osoloso Godeeye yo Kei mi mapoo ido palaso.

## 4

### *Gamenee eligili odoo oso eligi goo mapoo na deede*

<sup>1</sup> Dio Tei oso woola egeesee takooso, "Biame hoo poogoo hamapoo odoo aboso tei too goo ee pagalaiso. Osoloso gamenee takeli dio sabolo, osoloso bo holo oso eligi goo ee, gamenee eligili odoo oso eligiga, odoo aboso goo omapoo dadalaiso," diso.

<sup>2</sup> Esino goo hageesi eligimo silesibili odoo ee wulo gamenee takeli odoo oso. Osoloso diba dieso nediliyo si howoolone silesibilei ono goolone, goo tekepo sabolo, osoloso goo tokenee ee ogoloso dia sooloo ma kuloduga gooleedalai koo tebili. Bei, dia goo goolee ee tokenee paga, tekepo sabolo tokenee sabolo diayo gooleedalai tebile.

<sup>3</sup> Osoloso diayo sobo hulei goo sabolo, osoloso nei abo nalai sabolo tei deliso. Esino Godeeye iyo nalame nei susuga moodooso. Esiga tei too odoo oso nei ee nalame, daga Godee mapoo goomoga to takalai tekepo.

<sup>4</sup> Bei, bi susuga Godeeye moodoo ee medee tekepo. Egeesi ma kulodu iyo nei abo ee tokenee dee takalai tekeponee. Esino iyo Godee mapoo goomoga sabolo nei egee nalai tekepo.

**3:7:** 2Kol 8:21    **3:11:** Tait 2:3    \* **3:11: dikon sobo** - goo hagee dikon odoowo osobo, o, dikon sobo ee takoo malaiso.    **3:16:** Yon 1:14; Kol 1:23; Maka 16:19    **4:3:** Gen 9:3; Loum 14:6; 1Kol 10:30-31

<sup>5</sup> Bei, Godeeyo to sabolo, osoloso Godee mapoo taka goo oso nei hagee tekepo deliso.

*Kelisowo tou teli odoos tekepo doloso badalai goo*

<sup>6</sup> Nayo to hagee tei telaga odoos mapoo medee eligilone badoga, no Yesu Kelisowo tou teli odoos tekepo dalaiso. Osoloso nayo nei naga kitulugu egee to egeesi masi, nayo to tekepo mapoo tei teli goo sabolo, osoloso goo tekepo eligi mapoo nayo dodolone badoga, goo oso namapoo kitulugu tenelaiso.

<sup>7</sup> Egeesi ma kulodu, no gesaboo oposusu duga, goo omapoo na deedee. Bei, oposusu egee tei goonee, osoloso ogoos odoos koo pidili. Esino no Godeeye goomoga goo ee talai goo ono nee suso edidilone badebee.

<sup>8</sup> Bei, nee su oso kitulugu sabolo badalame edidili goo ee goo haga toowanee. Esino nayo Godeeye goomoga goo ee tolone badalai goo ono diya toowa ka moloso. Bei, goo hagoso epedee iyo mipoo hamapoo hagee do eyo gie badeli sabolo, osoloso badoboso kookaiyo gie badeli see hamamee talai goo ee pidileiso.

<sup>9</sup> To hagee tei goo taka. Esiga odoos susuga oso to hagee duloso tei talai tekepo.

<sup>10</sup> Osoloso goo egeesi maga tei telaga odoos iyo to tekepo ee odoos mapoo eligimo silesibulone, tou toowa ka toso, odoos susuga oso to hagee duloso dadalame. Bei, iba gooleedoos, Godee yo gie badeli. Osoloso iba gooleedoos, yayo odoos susuga eyo gie badeli pidilame goomogoso. Osoloso to tekepo mapoo tei tolosos dedeli odoos mapoo, yayo dibada gie badeli pidili odoos doloso badoso.

<sup>11</sup> Esiga to susuga ayo hagee hogugu ee tei telaga odoos oso mesilame, nayo dimapoo eligilone to kitulugu sabolos takee.

<sup>12</sup> Esiga nayo epedee hamapoo holaiso gie kauwa doloso egee bado goo omaga, odoos heeso no pepooko dee na seeye dee. Esino odoos susuga oso nee goo ogolosos dadalame, goo tekepo tolone badebee, nayo to keli maga, osoloso nayo badeli

goo maga, osoloso nayo emegei sooloo deli goo maga, osoloso nayo tei too goo maga, osoloso nayo todolone badeli goo maga.

<sup>13</sup> Osoloso no ayo sibilei ee bolone, Godeeyo to odoos susuga mapoo hesigaloso diba eligilone, kokodos takolone ka badebee.

<sup>14</sup> No goolee, daga sosee wiligi odoos tebisa oso nee wiligi mapoo tolosos Godee mapoo takolone, Godeeye namaga yilige bugu goo ee takaso. Esemee Dio Tei oso namapoo tou hee talame kitulugu teneeso. Esiga nayo kitulugu sabolos tou egee tolone ka badebee.

<sup>15</sup> No ayo taka goo susuga hagee medee dodolone, kitulugu sabolos tolone ka badebee, odoos susuga oso nayo goo gooleeso kauwa ee agalame.

<sup>16</sup> No badalai goo sabolos, osoloso goo nayo eligilei ee medee ogolosos, goo tekepo osee tomos sile. Nayo egeeseega Godeeye nee gie badeli sabolos, osoloso odoos nayo eligime du, egee bia dia gie badeli sabolos pidileiso.

## 5

*Tei telaga odoos mapoo mesie sabolos takee*

<sup>1</sup> Giso daga kauwa oso tei tolosos badolone, goo tokenee tomolos ogoga, nayo yimapoo toso kitulugu sabolos na takee. Esino nayo nama mapoo to medee mesie sabolos takeli egeesi masi, nayo yimapoo medee mesie sabolos kokodos takee. Osoloso nayo nomolodee mapoo to medee mesie sabolos takeli egeesi masi, nayo giso holaiso gie kakauwa mapoo medee mesie sabolos kokodos takee.

<sup>2</sup> Osoloso nayo noowee mapoo to medee mesie sabolos takeli egeesi masi, nayo sobo daga kakauwa mapoo medee mesie sabolos kokodos takee. Osoloso nayo nomolodee mapoo to medee mesie sabolos takeli egeesi masi, nayo sobo obuos mapoo medee mesie sabolos, osoloso medee goo goolee tekepo goolone ka kokodos takee.

*Sobo bauwe medee pidi*



<sup>3</sup> Sobo bau holo mauwe ee pidili odoo me daga, tei telaga odoo oso goo ee ogoloso diba pidilei tekepo.

<sup>4</sup> Esino sobo bau yo owolo sabolo, osoloso o eiye dio doga, diayo tei toloso egee du goo ee dodolone, yo pidilei tekepo. Diayo egeeseelone doga, goo oso diba pepuso doboome, owee dio osoloso dibada eiye dio diba pidilone debei, eyo nei pidilone ka seeso. Bei, diayo goo egeesi moodoolai, Godee yo goomogoso.

<sup>5</sup> Egeesi ma kulodu sobo bau yo pidilei odoo me poogoloso badolone, a Godeeye pidileiso doloso, gesi sabolo biame sabolo Godee mapoo takolone badeliso.

<sup>6</sup> Esino sobo bau oso eyo goomoga goo ono dodomo siloga, yo Godee maga domo puloso ka badoso.

<sup>7</sup> Esiga tei telaga odoo oso sobo bauwe holo mauwe medee pidilame, nayo dimapoo takee. Diayo egeeseega, odoo susuga oso diba ogoloso dia tou maga to tokenee hee takalaime.

<sup>8</sup> Esino edebeeyo takolone, yo tei too ma kulodu Keliso dedeli odoo doloso, see o soosoo sabolo osoloso o moso kulodu debeli odoo sabolo medee pidilega badoga, yo tei too ma kulodu koo badoso. Osoloso o goo tokenee oso tei tele poogoo odoo eyo goo tokenee ee dagadiso.

<sup>9</sup> Esiga sosee ma kulodu tei telaga odoo oso sobo bauwe medee pidilame, edebeeyo dia hu toga, wulo sobo bauwe dugo 60 dagadileso, giso hedebe obuloso badebei egee do eyo hu ono ka teye dee.

<sup>10</sup> Osoloso diba edebeeyo goo tekepo tomo silesibili sobo deli. Osoloso dibada owolo dio medee tekepo bali sobo. Osoloso diba odoo soo pidili sobo. Osoloso diba tei telaga odoo abo mapoo mesilone tou teli sobo. Osoloso diba dala ma kulodu debeli odoo ee pidili sobo. Osoloso diba goo tekepo susuga tomo silesibili sobo. Esiga sobo bauwe egeesi masi eyo hu ono talai tekepo.

<sup>11-12</sup> Esino edebeeyo sobo bauwe dia hu toga, sobo gie kakauwa oso bau moodoo egee do dia hu na teye dee. Bei, diayo bau dobolone soseeso diba pidilame,

to magolone, iba Kelisowo tou teli sobo dolone, see giso obileime deliso. Esino see hamamee giso obilei diya goomogoga, diba see Keliso mapoo miligi pialoso giso obiliso. Diayo egeesee moodeli goo maga, dieso to edidi magoo ee gababuoga, diba goo tokenee teliso.

<sup>13</sup> Osoloso goo hee egeesi moloso. Nayo sobo gie kakauwa oso bau moodoo ee soseeso pidilame hu toga, diayo tou talai wabodolone, wulo goo mauwe mosopoo silesibulone, emegei dia goo takolone dabalaiso.

<sup>14</sup> Esiga sobo gie kakauwa oso bau moodooga egee do oso see giso obuloso, holo sooloogaloso dia soosoo medee balai, a goomogo. Diayo egeeseega iba goweli odoo oso dia goo maga to tokenee takalai tebileime.

<sup>15</sup> Esino sobo gie kakauwa oso bau moodooga egee do abo oso Keliso mapoo miligi pialoso Saiteneeyo to duloso ee dodolone ka doso.

<sup>16</sup> Egeesi ma kulodu tei too sobo oso o soosoo ma kulodu sobo bauwe doga, yayo egee bia medee bamelee, tei telaga odoo sosee ma kulodu debeli oso diba diya musumiyaga. Egeeseega sosee ma kulodu tei telaga odoo egee do oso sobo bauwe pidili odoo mauwe egee do ono pidilei eli tekepo agalaiso.

### *Sosee bali odoo medee pidilei goo*

<sup>17-18</sup> Esiga Godeeyo to booka mapoo hogugu oso egeesee takooso, “Bulumakau be yo tou tomo siloga, yo nei nalame o maga tiso na tialeegee.” Osoloso Godeeyo to booka mapoo hogugu oso see egeesee takooso, “Tou teli odoo o tou too eyo nei talai tekepo.” Esiga sosee bali odoo oso odoo mapoo Godeeyo to eligilone dobolone tou toowa teliso. Esiga tei telaga odoo sosee ma kulodu debeli oso bali odoo dia to mapoo duloso mesiloso diba medee bamelee. Egeeseelone diayo dia tou medee goosa tolone, Godeeyo to kitulugu sabolo eligiga, dia too eyo nei teenee. <sup>19</sup> Esiga odoo heeso sibilesi namapoo takolone, “A sosee bali odoo oso goo tokenee tomo silee egeiso,” dee takooga, nayo

o to mapoo duloso saga tei na te. Esino odoos bakadio, o, bakadio hedebe di oso sibilesa namapoo takooga, dia to mapoo tei ka te.

<sup>20</sup> Egeesi ma kulodu sosee bali odoos oso goo tokenee tomo silee ee nayo tei ogoga, nayo tei telaga odoos susuga eyo howo woola yimapoo diya takee. Nayo egeeseega, sosee wiligi odoos tebisa abo oso goo hagee ogoloso goo tokenee talai ebileiso.

<sup>21</sup> Godee sabolo, Yesu Keliso sabolo, osoloso diayo hesia momaiye dia howo woola kitulugu sabolo ayo ka taka, nayo mo to duloso omapoo dadalame. Egeeseelone hedebe hediliwe pidilone na badebee.

<sup>22</sup> Osoloso nayo sosee bali odoos hudi magolone, yayo badebei goo ee medee egegelega, nee deeso o wiligi mapoo tolosa Godee mapoo na takee. Esino nayo egeesee moodooga, o goo tokenee maga nobolo hodobo hegi talaiso. Esino no goo tokenee teyaga, nee su no medee teedee.

<sup>23</sup> Timoti, no howodee namologa, no nee gemedei dalaiso. Esino biame abo mapoo wain i pepooko ne. Egeeseega nee gemedei ma kulodu dala meli ee mauwe pagalaiso.

<sup>24</sup> Sosee balai hudi magalame mooloo-goodoo ee ma kulodu, odoos aboso odoos howo woola goo tokenee teliso. Esiga dia goo midilega ogoloso gooleedeliso. Esino odoos abo dia goo tokenee mada meli ee hamamee see weliga yilige bigileiso.

<sup>25</sup> Egeesi maga goo tekepo odoos aboso teli ee woola moloso. Esino goo tekepo odoos aboso teli ee saga yilige bigileime. Esino goo ee hamamee see woola yilige buguga agalaiso.

## 6

*Nei mauwe tou teli odoos sabolo osoloso dia wiligi odoos tebisa sabolo*

<sup>1</sup> Tei telaga nei mauwe tou teli odoos diayo dibada wiligi odoos tebisa dia to mapoo mesilone dabalai tekepo, edebeeyo goo ee ogoloso iyo eligi goo maga osoloso

Godeeyo goo maga to tokenee takelega pagalame.

<sup>2</sup> Nei mauwe tou teli odoos dia wiligi odoos tebisa abo ee tei telaga odoos oso. Esino diayo dia wiligi odoos tebisa dia to mapoo mesilega pagalai tekeponee. Esino diayo goomoga sabolo dia wiligi odoos tebisa dia to mapoo medee mesiloso sile-sibilei tekepo. Bei, dia wiligi odoos tebisa onosee tei telaga odoos oso. Osoloso nei mauwe tou teli odoos oso dia wiligi odoos tebisa ee sooloo dolone debeliso.

*Molee diya gweli goo ee goo tokenee*

Esiga Timoti, ayo taka goo ee, nayo odoos mapoo eligilone kokodo takolone badebee.

<sup>3</sup> Osoloso edebeeyo eligi goo hee tolosa odoos mapoo eligimo siloga, yo ibada Lodee Yesu Kelisoeye Godeeyo goo maga tei goodee eligi goo sabolo koo tobuoso.

<sup>4</sup> Odoos hageesi masi yo goo goolee tekepo gweli yimapoo mauwe. Esino wulo eyo nediliyo yo tekepo dolone si howeli odoos oso. Osoloso odoos hageesi oso eligi opusomo opusomo di maga toso agadilei, yo diya goomegeliso. Osoloso toso agadili hagoso goo hageesi tosibiliso. Goo ee, emegei kweli goo sabolo, osoloso biligeli goo sabolo, osoloso emegei dia goo maga to tokenee takeli goo sabolo, osoloso emegei dia goo maga tokenee gweli goo sabolo,

<sup>5</sup> osoloso odoos abo domo pili goo sabolo tosibiliso. Osoloso o goo goolee ee olo tokenee pa. Esiga yimapoo tei goo mauwe moloso. Osoloso yayo goolee, Godeeye goomoga goo ee dodomo sili goo oso yo bi bei doloso badalai, dee gweliso.

<sup>6</sup> Esino odoos agayo Godeeye goomoga goo ee dodolone, bi yimapoo egee molo maga goomoga sabolo badoga, yo mipoo hamapoo badolone, yo bi bei doloso badeli masi badalaiso.

<sup>7</sup> Bei, mipoo hamapoo ibada owee diayo iba bi sabolo soolooga magele. Esiga iba wedioga, ibada bi sabolo dileime.

<sup>8</sup> Esiga nei sabolo, osoloso kali bi sabolo imapoo egee molo ee olo ibolo teiba dalai tekepo.

<sup>9</sup> Esino bi bei doloso badalame gweli odoo ee goo tokenee mapoo saga gido duga, yo goo tokenee teliso. Odoo hageesi masi diba ti gama ma kulodu beso gadili egeesi masi doso. Bei, diayo bi bei doloso dabalame goolee oso goo tokenee susuga talame, diba gido duga tokenee palaiso.

<sup>10</sup> Bei, edebeeyo molee diya goomogoga, yayo molee talame, goo tokenee bei opusomo opusomo di teliso. Esiga odoo aboso molee diya goomoga goo maga dia tei too goo ee poogoloso peegoo diyadeeso. Dieso egeesee goolee oso dimapoo goohele goo tosibiliso.

*Timoti, no goo tokenee susuga maga peegoo di*

<sup>11</sup> Esino Timoti, no Godeeyo odoo. Esiga no goo tokenee susuga ogamaga peegoo di. Osoloso no Godeeyo howo woola tekepo badolone, yayo goomoga goo ee tolone badebee. Osoloso tei too ma kulodu osee badolone, emegei diya sooloo dolone ka badebee. Osoloso dala goo susuga ee ma kulodu medee kibiya badebee. Osoloso mesie sabolo badebee.

<sup>12</sup> Badoboso kookaiyo gie badeli nayo ee talame, no tei too ma kulodu medee diya kitulugi. Bei, nayo odoo susuga eyo howo woola badolone, nayo Godee mapoo tei toloso egee bado goo ee takeme, Godeeye gie badeli egee namapoo tenelame no ka idoo.

<sup>13</sup> No goolee, Godeeye bi susuga mapoo gie badeli teneliso. Osoloso Yesu Kelisoye o goo maga Pontiyus-Paillet eyo howo woola tei goo takaso. Esiga Godeeyo howo woola, osoloso Yesuwo howo woola ayo toso kitulugu sabolo namapoo taka,

<sup>14</sup> nayo ibada Lodee Yesu Kelisoye sibilei biame ee bamo dulone, goo tokenee mauwe badolone, ayo namapoo kokodo taka to ee dodolone badebee.

<sup>15</sup> Esiga Yesu yo biame Godeeye magoo omapoo sibileiso. Osoloso Godee yo wiligi odoo susuga eyo wiligi odoo. Osoloso yo

gidebeli odoo susuga dia tei gibadeli odoo oso. Esiga hedebe yimapoo goomogolone badalai tekepo.

<sup>16</sup> Godee hedebe yayo kookaiyo gie ka badoso. Osoloso yayo egee bado koola mapoo dilei iyo koo tebili. Bei, yo diya gadeebugu ma kulodu badeliga. Esiga odoo heeso yo egele. Tei takoo, odoo heeso yo agalai koo tebili. Yimapoo kookaiyo moloso osee meli kitulugu ee moloso. Esiga iyo biame susuga hedebe o hu dokodoo poudoolone badalai tekepo. To hagee tei goo.

*Bi bei odoo oso o odoo pidi*

<sup>17</sup> Nayo bi bei odoo mapoo to hagee kitulugu sabolo takee, diayo dieso nediliyo si howoolone, dia molee oso dia gie badeli tekepo dabalaiso doloso gooleeyaga. Bei, molee saga hosudalai malaiso. Esino diba hedebe Godee mapoo tei tolone dabalai tekepo. Bei, Godee hedebe yayo iba pidiliso. Osoloso hedebe yayo iba goomogalame goo tekepo ee imapoo tenelone badoso.

<sup>18</sup> Osoloso see diayo odoo susuga mapoo goo tekepo tolone dobolone, diba pidilone dabalame dimapoo to kitulugu sabolo takee. Egeeseelone diayo dia molee oso odoo bi tebile poogoo ee pidilone dabalame.

<sup>19</sup> Diayo goo egeesi tolone dogo, goo oso hamamee diba pidilei bi ee Kei mi mapoo mooloogoo magoo molo agalaiso. Osoloso diayo badoboso kookaiyo gie badeli talaiso.

<sup>20</sup> Timoti emegei, Godeeye tou namapoo tenee ee medee be. Osoloso goo Godeeye goweli ee duloso omapoo hamamee na deede. Osoloso to tekepo mapoo goweli odoo dia to mapoo na mesie. Bei, diayo dieso diba goo gooleedoo odoo deliso, esino diba goo dooboo eligimo silesiboso.

<sup>21</sup> Esiga odoo aboso goo hageesi goolee sabolo dobolone, tei too ma kuloduga peegoo diyadeeso.

Ayo Godee mapoo taka, yayo niba sooloo dolone pidilame.

## 2 Timoti

### Poloye Timoti mapoo to hee hoguguloso tenee

*2 Timoti booka goo eyo bei*

To hogugu hagee Poloye neliga moso tegei ma kulodu badolone, Timoti mapoo see hoguguloso teneeso. Bei, edebeeyo yo wooloomalai biame olo koola toobooso doloso gooleeso. Esiga Timotiye tei too ma kulodu kibiloso badalame, Poloye kokodo taka to hagee hoguguloso yimapoo teneeso. Bei, Timotiye Polowo goo tekepo ee padalai, yo goomogaso.

<sup>1</sup> A Polo, Yesu Kelisoye diye di odoo. Osoloso Godeeye goomoga maga a hesialoso diye di tou ee amapoo teneeso, ayo o to odoo mapoo eligimo siloga, edebeeyo to ee duloso tei talame. Osoloso Yesu Keliso mapoo tei too goo maga diayo badoboso kookaiyo gie badeli talame.

<sup>2</sup> To hogugu hagee mawo diya gooma holo Timoti namapoo ka tonowa.

Ayo Godee mapoo taka, Ma Godeeye, osoloso ibada Lodee Yesu Kelisoye, no sooloo dolone pidilame, osoloso mesie goo namapoo tenelame.

*Poloye Timoti mapoo kokodo taka*

<sup>3</sup> Timoti, ayo no goolone Godee mapoo goomoga to takeliso. Osoloso biame susuga sabolo, osoloso gesi susuga ayo no halo Godee mapoo takeliso. Osoloso mo awe diayo Godee mapoo tei toloso sibadee egeesi masi anosee Godee hedebe omapoo tei tooso. Egeeseelone Godeeyo howo woola tokenee mauwe egee bado goo ee a gooleedoloso, ayo o tou ka tomoloso.

<sup>4</sup> Osoloso iyo hodobo dooboso ayo no poo-goo dime, nayo a goolone pisa ee ayo koo boobado buguso. Esiga amapoo goomoga toowa malame, no ayo see agalai, a diya goomogo.

<sup>5</sup> Nayo Yesu Keliso mapoo tei toloso kibiya egee bado, a gooleedoo. Esiga nayo tei too goo egeesi masi ee daga nee eiye

Lois mapoo meleeso. Osoloso see noowee Yunike mapoo meleeso. Esiga a tei toso, tei too goo egeesi oso epedee hamapoo namapoo moloso.

<sup>6</sup> Goo egeesi maga ayo namapoo ka taka. Bei, ayo daga nee wiligi mapoo deeso toloso Godee mapoo takeme, Dio Tei oso namapoo tou talame kitulugu teneeso. Esiga tou egee pailame dou masi tooee.

<sup>7</sup> Bei, Godeeye imapoo Dio Tei tenee egee iba ebilame ka tenele. Esino yayo imapoo Dio Tei tenee oso imapoo kitulugu sabolo, sooloo deli goo sabolo, osoloso goo tokenee teyaga ibada su kookodeli goo ee tenee.

<sup>8</sup> Esiga ibada Lodee Yesu Kelisowo goo ee, nayo odoo mapoo takalai na simiye. Osoloso Kelisowo goo takomo silee maga, ayo neliga moso ma kulodu hagee bado goo omaga no na simiye. Esino nayo mo tou su tolone, Godeeye namapoo tou tenee ee dala ma kuloduga kitulugu sabolo osee tomo di. Bei, Godeeye namapoo kitulugu ka tenemologa.

<sup>9</sup> Godeeye ibada gie badeli pidiso, osoloso yayo iba o odoo doloso gilimadooso. Iyo goo tekepo tolone doboome ka sele. Haye, Godeeye bi susuga moodelega badolone, eyo goomoga goo ee dodolone iba ka gilimadoo. Osoloso Yesu Kelisoye iba halo goo moodolai goo maga, Godeeye iba sooloo dolone pidilame goomoga magooso.

<sup>10</sup> Osoloso ibada gie badeli pidili Yesu Kelisoye egee sibo goo oso Godeeye sooloo dolone pidili goo ee see woola yilige buguso. Osoloso teli oso kitulugu ee me pagalame, yayo olo dabaso. Osoloso bado-boso kookaiyo gie badeli goo ee to tekepo maga, yayo woola yilige buguso.

<sup>11</sup> Godeeye a hudi magooso, ayo diye di tou talame, osoloso ayo odoo mapoo to tekepo hagee takalame, osoloso Kelisowo goo ee o odoo mapoo eligilame.

<sup>12</sup> Esiga ayo tou hagee tolone, dala goo ma kuloduga similega badolone tou ka tomoloso. Bei, ayo tei toloso hagee dodomo du odoo ee, a gooleedooso. Odoo ee Yesu. Esiga a gooleedooso, to tekepo yayo



amapoo taka ee, eyo medee osee bamo dimeleso, yo see wedi sibileiso.

<sup>13</sup> Esiga tei goo ayo namapoo eligime nayo du ee odoo mapoo eligi. Osoloso no Yesu Keliso sabolo hedebe doloso badeliga, tei too ma kulodu osee badebee, osoloso emegei sooloo dolone ka badebee.

<sup>14</sup> Osoloso ima kulodu badeli Dio Tei oso pidili maga, Godeeye namapoo Yesuwo goo maga to tekepo tenee ee medee be, edebeeyo to egee see opusomo diyaga.

<sup>15</sup> Osoloso no see gooleedooso, tei telaga odoo Asiya mi mapoo debeli susuga oso a poogoloso diyadeeme, Pigelos dio osoloso Helemogenes dio onosee a poogoloso diyadeeso.

<sup>16-17</sup> Osoloso Onesipoloseeye Loum mi mapoo sibileso a agalame diya esiamo sileeso. Osoloso a neliga moso ma kulodu ki tiso tialogoloso badebei ogoloso, yayo similega a pidimeleeso. Esiga ayo Godee mapoo ka taka, Lodeeye Onesipolos sabolo osoloso o moso kulodu debeli odoo ee sooloo dalame.

<sup>18</sup> Osoloso Godeeye goo midilei biame mapoo o goo medee sooloo dala sabolo midilame. Esiga ayo Epeses mi mapoo badoboome, yayo a medee pidimelee goo ee Timoti, no olo gooleedooso.

## 2

### *Keliso halo ha teli odoo masi kitulugu sabolo badebee*

<sup>1</sup> Mo holo emegei, Yesu Kelisoye sooloo dolone pidili goo oso namapoo kitulugu teneeye dee.

<sup>2</sup> Osoloso ayo odoo howo woola namapoo eligi goo ee, odoo no medee tei deli mapoo nayo eligi, diayo see odoo abo mapoo eligilame.

<sup>3</sup> Esiga Yesu Keliso halo ha teli odoo tekepo masi dala ma kulodu tou tomo silei na gowee.

<sup>4</sup> Bei, no ege, ha teli odoo tekepo oso o wiligi odoo ee goomogalame, hedebe yayo o to mapoo mesimo siliso. Egeeseelone yayo tou hee peegoo koo teli.

<sup>5</sup> Osoloso no ege, hoguli odoo oso hogua ma kulodu, odoo abo dagadilame, yayo tei magoo susuga medee dedelega poogooga, yo hogua eyo nei talaime.

<sup>6</sup> Osoloso no see ege, nei howo segeli odoo tou toowa too oso, o nei howo segei oso bi moodoogaloso melee ogoloso daga malalo eyo talai tekepo.

<sup>7</sup> Esiga to ayo hagee hogugu ee nayo medee gooleede. Bei, to ayo hogugu hageeyo bei ee nayo medee gooleedalame, Lodeeye namapoo goo goolee tekepo tenelaiso.

<sup>8</sup> Deibidiyo amawe Yesu Keliso ta maga hogadi goo ee, nayo osee goolomo sile. To tekepo hagee ayo takomo siloso.

<sup>9</sup> Esiga ayo to tekepo hagee takomo sileeme, odoo aboso a mesiya masi toloso ki tiso tialogoloso neliga moso ma kulodu husooso. Esino Godeeyo to tekepo hagee tiso tialogoloso koo moloso.

<sup>10</sup> Goo egeesi maga ayo Godeeye hesia odoo ee halo dala ma kulodu tou osee ka tomoloso, diayo Yesu Keliso mapoo tei toloso dia gie badeli pidilame, osoloso yibolo kookaiyo badoboso medee tekepo badalame.

<sup>11</sup> Esiga tei goodee ee hagoso.

Iba Keliso sabolo taga,

iba see yibolo hodobo gie dabalaiso.

<sup>12</sup> Osoloso iyo dala ma kulodu medee kibiya doga,

goo ogoso iba wiligi odoo doloso hamamee yibolo hodobo mipoo hagee gidabalaiso.

Osoloso odoo howo woola iyo o goo gagadiga,

nei odoo howo woola yinosee ibada goo gagadileiso.

<sup>13</sup> Esino iyo tei too ma kulodu badolone yo boobado buguga,

nei yayo iba boobado bigileime.

Bei, yo eyo to edidi magoo ee gababuloso see opusomo dalai koo tebili.

### *Yesuwo tou teli odoo tekepo*

<sup>14</sup> Esiga to ayo namapoo hoguguloso hagee tenee ee nayo tei telaga odoo mapoo medee eligimelee. Osoloso diayo goo

pepooko maga toso egee agadigamolo, Godeeyo howo woola dimapoo takee. Bei, goo egeesi oso odoo hee koo pidili. Esino to ee dulone egee do ono wulo tokenee peliso.

<sup>15</sup> Timoti, tou nayo too ee Godeeye ogoloso goomogalame, osoloso nee tou too oso namapoo simili goo tenelega pagalame, nee tou medee kitulugu sabolo te. Osoloso nayo Godeeyo to odoo mapoo eligilone, dooboo dagadilega medee tei goo ono ka eligimelee.

<sup>16</sup> Esino goo Godeeye goweli sabolo, osoloso goo mauwe oposusumo silesibili odoo omaga, no peegoo di. Bei, goo egeesi oso odoo Godee maga peegoo gilimado diliso.

<sup>17</sup> Egeesi oposusu goo oso agagisa masi toowa polosoo odoo su naliso. Humenayos dio Piletus dio oso goo egeesi oposusumo silesibiliso.

<sup>18</sup> Odoo hagee biaso tei eligi goo maga peegoo diyadeeso. Osoloso diayo takolone, odoo wedia maga see hogogabili goo ee olo peledabaso, doloso takomo silesibume, odoo aboso goo ee duloso dibada tei too olo tokenee paso.

<sup>19</sup> Esino Godee mapoo tei telaga odoo ee kibiya osee doso. Diba omou mi neligi doloso segei egeesi masi moloso. Omou omapoo Godeeye to hogugu hagoso ka moloso, "Godeeye o odoo dee ee gooleedeliso," diso. Osoloso to hee hogugu ee egeesi moloso, "Edebeeyo takolone, 'A Godee dedeliso,' dee takooga, yo goo tokenee maga peegoo di," diso.

<sup>20</sup> Esiga bi bei odoowo moso kulodu peleta opusomo opusomo di moloso. Peleta abo yo gold deli oso moodoo. Osoloso abo yo siliba deli oso moodoo. Wo toowa nali biame mapoo peleta omapoo wo magoloso naliso. Osoloso peleta abo ee bogoso moodoo. Osoloso abo homosoo moodoo. Biame susuga peleta omapoo wo magoloso naliso.

<sup>21</sup> Esiga to hageeyo bei ee egeesi moloso: tei telaga odoo dia goo tokenee susuga ayo hogugu mapoo miligi pialoso dogo, Godeeye diba tolosoo goo toowa mapoo ma-

ligileiso. Bei, Godeeye odoo egeesi masi ee o dalame peegoo pi magalaiso. Esiga yayo o wiligi odoo eyo tou ee medee tekepo talame mopoodoo doloso badalaiso.

<sup>22</sup> Esiga holaiso gie kakauwa oso goo tokenee talai diya goomegeli goo maga no peegoo dilesos badebee. Osoloso Godeeyo howo woola tekepo badolone, tei too goo sabolo, osoloso emegei sooloo deli goo sabolo, osoloso odoo abo sabolo mesie badalame kitulugi. Egeesi ma kulodu Godeeyo howo woola goo tokenee mauwe dobolone, Godeeyo hu dokodoo poudili odoo diba nose egeesee dabalai tekepo.

<sup>23</sup> Osoloso goo bei mauwe sabolo, osoloso to dooboo takeli goo maga toso agadigeli odoo omaga, no peegoo dooboo bigi. Bei, no gooleedooso, goo egeesi oso biligeli goo ee tosibiliso.

<sup>24</sup> Esiga Lodeeyo tou teli odoo oso toso agadigilone na badebee. Esino yayo odoo susuga sabolo medee mesiloso badolone, saga kamanabugu dolone na badebee. Osoloso yo eligili odoo tekepo doloso badebee.

<sup>25-26</sup> Osoloso yayo eligiga goweli odoo mapoo, nei yayo dimapoo mesie sabolo kokodo takolone badebee. Bei, Saitenso yayo goomoga goo tomo silesibilame diba gilimadooso. Esino eligili odoo tekepo oso dimapoo mesie sabolo tei goo medee eligiga, goo oso Godeeye pidi maga dibada goo goolee su wuduloso, tei goo eligi ee tolosoo Saiteneeyo goo ee pagalai malaiso.

### 3

#### *Biame hamameedee eyo goo*

<sup>1</sup> Goo hagono medee gooleede. Bei, biame hamameedee mapoo dala goo sabolo, osoloso hegi sabolo oso sibileiso.

<sup>2</sup> Bei, biame omapoo edebeeyo o odoo goolega, wulo dia su ono diya goolone dabalaiso. Osoloso diayo molee diya goomogalaiso. Osoloso diayo odoo abo pepooko dolone, diba dieso nediliyo si howalaiso. Osoloso diayo odoo abo dia goo maga to tokenee takalaiso. Osoloso diayo dibada ama dio sabolo, osoloso owee dio dia

to mapoo mesilone dabalaimo. Osoloso diayo emegei dimaga bi toloso eyo nei dimapoo goomoga to takalaimo. Osoloso diayo Godee mapoo mesilega dabalaiso.

<sup>3</sup> Osoloso diayo emegei sooloo delega dabalaiso. Osoloso diayo odoo heeyo goo tokenee boobado bigili goo ee malaimo. Osoloso diayo emegei dia goo maga gamenee takolone dabalaiso. Osoloso diayo goo tokenee talai mapoo dia su kookoodalaimo. Osoloso diayo emegei goolega dobolone, dala tenemalaimo. Osoloso diayo goo tekepo ee diya gowoolone dabalaiso.

<sup>4</sup> Osoloso diayo emegei dala talame tiasalaimo. Osoloso diayo gooso hamamee peledabalai omapoo kibiya goolega, dieso goolee goo ono tomo sileiso. Osoloso dieso nediliyo goolee diba odoo toowa, dee goolaiso. Osoloso diayo dia su oso goomoga goo ono tomo silesibulone, diayo nei Godee goolega dabalaiso.

<sup>5</sup> Odoo egeesi oso gamenee tei too odoo masi badolone, diayo nei Godeeyo kitulugu mapoo tei telega dabalaiso. Esiga goo tokenee ayo hogugu ee tomo sili odoo omaga peegoo dooboobigi.

<sup>6-7</sup> Bei, odoo hageesi oso silesibulone, emegei dia moso tagaga ma kulodu galaga peleso, sobo goo medee koo gweli ee kukulo egeliso, sobo ogoso goo diayo eligi ee dadalame. Sobo hageesi masi oso biame susuga goo dia eligi dulame goomegeliso. Esino diayo tei goodee gooleedalai ee koo tebili. Bei, dia goo tokenee sabolo, osoloso dia suso goomoga goo oso dimapoo kadadigamo palaga.

<sup>8</sup> Esiga daga hoogoo, Yanes dio Yambelles\* dio Moses mapoo wegigaso. Esiga goo hedebe egeesi maga gamenee goo eligili odoo epedee hamapoo egee do oso Kelisowo goo maga tei goo eligi mapoo wegigamoloso. Bei, dia goo goolee olo tokenee poloso, tei too goo ee me poogoomo.

<sup>9</sup> Esino diayo goo tomo sili oso biame sagelaimo. Bei, dia goo tokenee ee odoo

susuga eyo howo woola yilige bigileiso. Goo hedebe egeesi onosee Yanes dio Yambelles dio mapoo peledabaso.

### *No mo goo peedee*

<sup>10-11</sup> Esiga Timoti, no ayo eligi goo sabolo, osoloso ayo badeli goo sabolo, osoloso ayo talame goomegeli goo sabolo, osoloso ayo tei too goo sabolo, osoloso ayo mesie sabolo sooloo deli sabolo badebei goo ee, no olo gooleedooso. Osoloso Antiyoka mi mapoo, osoloso Ikonyum mi mapoo, osoloso Listala mi mapoo edebeyo amapoo hegi goo sabolo, osoloso dala teneme, ee ma kulodu ayo kibiloso badebei goo ee, no olo duso. A dala susuga ee ma kulodu osee badebeiso. Esino dala susuga ee ma kuloduga, Lodeeye a idoloso peegoo diso.

<sup>12</sup> O. Tei takoo, odoo agayo Yesu Keliso sabolo hedebe doloso, Godeeye goomoga goo ee dodolone badalai goomogoga, edebeyo dimapoo dala tenemalaimo.

<sup>13</sup> Osoloso ee ma kulodu goo tokenee teli odoo sabolo, osoloso gamenee goo eligili odoo dia goo tokenee oso toowa dalaiso. Osoloso diayo odoo abo mapoo gamenee goo eligi maga tei goodee maga peegoo gilimado dileiso. Osoloso diba nosee dieso nediliyo peegoo gilimado dileiso.

<sup>14</sup> Esino Timoti, daga Godeeyo to tekepo namapoo eligime, nayo to omapoo medee tei tooso. Esiga eligi goo omapoo medee kibiya kookoodoloso badebee. Bei, namapoo eligi odoo ee, no olo gooleedooso.

<sup>15</sup> Esiga no pepooko maga bei mooloogoloso sibulone, Godeeyo to booka mapoo hogugu goo ee, no olo gooleedooso. Osoloso Godeeyo to mapoo kitulugu moloso, namapoo goo goolee tekepo tenelai, nayo Yesu Keliso mapoo tei toga gie badeli talame.

<sup>16-17</sup> Godeeyo to booka mapoo hogugu susuga ee Godee maga simi. Esiga Godeeyo to booka mapoo hogugu goo oso

**3:5:** Mat 7:15, 21; Tait 1:16    **3:8:** Exo 7:11    \* **3:8:** *Yanes dio Yambelles dio* - Odoo hagee bia googoo moodeli odoo, diba Isipi mi mapoo debeli. Moses dio Isipi odoo dia wiligi odoo taba dia howo woola diayo goo toowa opusomo di gamenee moodooso. Egeesi ma kulodu diayo kitulugu oso Moseseeye kitulugu Godee maga too sabolo teiba, ee Isipi wiligi odoo mapoo eligilame, diba goomogaso. (Oposusu hagee Exodus 7:11-22 mapoo moloso.)  
**3:10-11:** Diye 13:14-52; 14:5, 8-20    **3:12:** Mat 16:24; Yon 15:20; Diye 14:22    **3:16-17:** Loum 15:4

odoo mapoo tei goo eligilone, edebeeyo dooboo dagaduga, tei goo eligi mapoo ka ido sibo domoloso. Osoloso Godeeyo to booka mapoo hogugu goo oso edebeeyo tekepo badeli goo ee eligiliso, Godeeyo odoo oso mopoodoo doloso goo tekepo susuga tomo silesibilei ee tebilame.

## 4

### *Poloye Timoti mapoo to hamameedee kokodo taka*

1-2 Yesu Kelisoye mipoo hamapoo wiligi odoo doloso badalame see wedi siboga, yayo odoo susuga epedee gie hagee do sabolo, osoloso odoo wedia sabolo dia goo midileiso. Esiga ayo Yesu Kelisowo howo woola, osoloso Godeeyo howo woola, namapoo ka taka, nayo to tekepo ee odoo mapoo eligilame. Osoloso Godeeyo to dulei goomegeli odoo mapoo, osoloso Godeeyo to dulei goweli odoo mapoo nayo Godeeyo to medee takee. Egeeseelone edebeeyo gamenee eligi goo mapoo tei toga, nayo diba to tekepo sabolo tei eligi goo mapoo see ido sibo dolone ka badebee. Osoloso diayo see goo tokenee teyaga, Godeeyo toso diba medee pidilone ka badebee. Osoloso nayo dimapoo Godeeyo to eligilone, medee mesie sabolo dimapoo kitulugu tenelone badebee.

3 Bei, odoo aboso to tekepo eligi goo mapoo gowoolai biame ee sibileiso. Egeeseelone dieso goomoga goo ee dodolone, eligili odoo abo ee gilimado sibileiso, to diayo dulei goomoga goo ee dimapoo eligilame.

4 Egeeseelone, diayo tei eligi goo ee poogoloso see gesaboo oposusu mapoo medee dulone dabalaiso.

5 Esino goo susuga ee ma kulodu, no tei goo ono kibiya kookoodoloso, no nediliyo nee su kookoodoloso badolone, dala ma kulodu kibiya badebee. Osoloso to tekepo eligilone badolone, tou susuga Godeeye namapoo tenee ee medee temelee.

6 Esiga Timoti, ayo namapoo kokodo taka. Bei, edebeeyo a wooloomaloso

mipoo hagee poogoo dilei biame olo koola tooboo.

7 Esino tou Godeeye amapoo tenee ee medee kibiya tomo sibileso hosudooso. Egeesi ma kulodu ayo tei too ee medee kibiloso badoso.

8 Esiga ayo Godeeyo howo woola tekepo badeli goo maga, yayo Kei mi ma dokodoo mopoodoo doloso magoo nei oso a bamoloso. Esiga goo medee teiba midili odoo Lodeeye siboga, nei ee amapoo tenelaiso. Osoloso yayo nei hedebe amapoo tenelai mauwe. Haye, odoo agayo yayo sibilei mapoo bolone goomoga sabolo dogo, diba onosee nei talaiso.

9 Timoti, ayo hagee bado mapoo saga sibilame, no weegeegee.

10 Bei, odoo abolo badeli Dimaseeye mi toowa eyo goo goomoga maga, a poogoloso see Tesalonika mi mapoo diso. Esino Kelesekeseeeye Galesia mi mapoo Godeeyo tou talame diso. Osoloso Taites onosee Dalamatiya mi mapoo Godeeyo tou talame diso.

11 Egeesi ma kulodu hedebe Luka ono abolo hamapoo badoso. Esiga nayo amapoo sibulone Maka ido sibeye. Bei, yayo mo tou pidiliga.

12 Esino ayo Tikikus Epeses mi mapoo diye diso.

13 Esiga Timoti, nayo siboga, mo kekeisu dugo kali Tolowasee mi mapoo, Kalopuseeyo moso mapoo deedee poogoo ee tosibeye. Osoloso mo booka onosee tosi-beye. Osoloso nayo mo booka gala koloso moodoo ee tosibilei, a diya goomogo.

14 Egeesi ma kulodu ki biso bi moodoogali odoo hee Alesandaye amapoo dala toowa tenemeleeso. Esino Lodeeye yimapoo nei dala tenelaiso.

15 No obeeyamo, nayo odoo ogono medee ege. Bei, iyo eligi goo ee yayo diya wegigeliso.

16 Esiga ayo daga malalo goo midili mapoo pala biame omapoo, odoo heeso a pidilame abolo pele. Esino odoo susuga oso a poogoo diso. Esino ayo Godee mapoo



taka, yayo dibada goo tokenee ee hapoloso boobado bigilame.

<sup>17</sup> Esino Lodeeye a pidilone abolo badebei maga, goo midili odoosoo a teli mapoo tenele. Esino ayo to tekepo ee Yu odoonee goo midili mi koola mapoo tebisamelee mapoo takalame, yayo a pidiso.

<sup>18</sup> Esiga edebeeyo amapoo dala tenelame seega, dala ee ma kulodu Lodeeye a pidileiso. Osoloso yayo a Kei mi ma dokodoo ido palaiso. Esiga odoosoo susuga oso biame susuga hedebe Godee mapoo mesilone yimapoo goomoga poudilei tekepo. To hagee tei goo.

<sup>19</sup> Esiga ayo emegei di to ee Plisila sabolo, osoloso Akwila mapoo takoloso, see Onesipolos sabolo, osoloso o moso kulodu debeli odoosoo mapoo takee.

<sup>20</sup> Elastuseeye Kolin mi mapoo osee badebeiso. Osoloso Tolopimus yo paiye neme, ayo yo Miletus mi mapoo holo-gooso.

<sup>21</sup> Esiga dugo telega mologa, no sibilei eli esialoso ayo hagee bado mapoo sibilame weegeegee.

Yubulus sabolo, osoloso Pudes sabolo, osoloso Linos sabolo, osoloso Kalaudiya sabolo, osoloso tei telaga odoosoo susuga sabolo, oso diayo emegei di to ee namapoo takooso.

<sup>22</sup> Ayo Godee mapoo taka, Lodeeye nobolo badalame, osoloso yayo niba sooloo dolone pidilame.

## Taites Poloye Taites mapoo to hogugu tenee

### *Taites booka goo eyo bei*

Poloye mi abo mapoo Godeeyo to takomo sileeme, Taites yibolo hodobo sileeso. Osoloso hamamee Poloye Taites yo Kiliti mi te mapoo sosee bamalame omapoo hologooso. Esiga to hogugu hagee ma kulodu Poloye Taites mapoo sosee bali odoo oso badalai goo ee hoguguloso teneeso.

<sup>1</sup> A Polo, Godeeyo tou teli odoo. Osoloso Yesu Kelisoye a diye diso, ayo Godeeye hesia odoo mapoo Yesuwo goo maga tei goo eligiga, diayo tei too ee kauwulame. Bei, tei goo ogoso diayo Godeeye goomoga goo ee tomo silesibulone dabalai goo ee eligileiso.

<sup>2</sup> Osoloso diayo Godee maga kookaiyo badoboso gie badeli talai ee balame, ayo diba pidilone ka badoso. Bei, gamenee koo takeli Godeeye daga bi susuga moodelega badolone, yayo kookaiyo badoboso gie badeli hagee imapoo tenelame to olo edidi magooso.

<sup>3</sup> Esiga biame yayo magoo mapoo ibada gie badeli pidili Godee yayo o to tekepo amapoo yilige buguloso a diye diso, ayo odoo mapoo to tekepo ee takalame.

<sup>4</sup> Esiga ayo to hogugu hagee Taites namapoo ka tonowa. Bei, tei too ma kulodu no tei mo holo masiga.

Esiga ayo Godee mapoo taka, Ma Godeeye, osoloso ibada gie badeli pidili Yesu Kelisoye no sooloo dolone pidilame, osoloso mesie goo ee namapoo tenelame.

### *Sosee bali odoo*

<sup>5</sup> Ayo no Kiliti mi te mapoo hologoloso poogoo diso, nayo mi pepooko susuga mapoo sosee bali odoo hudi magalame, osoloso soseeyo tou hosudele poogoo ee hosudalame.

<sup>6</sup> Nayo egeeseemo silone, ayo namapoo sosee bali odoo eyo goo taka ee no goolee sabolo sile. Bei, sosee bali odoo yo odoo susuga eyo howo woola goo tokenee mauwe badebee. Osoloso yo sobo hedebe huloso badebee.\* Osoloso owolo dio oso tei tolosa dobolone, ama dio oween dio eyo to mapoo mesilone ka debee. Osoloso diba wiligi me poogoloso suso goomoga goo tokenee ee tolone na debee.

<sup>7</sup> Edebeeyo sosee balai goomogoga, yo odoo susuga eyo howo woola goo tokenee mauwe badebee. Bei, Godeeye o odoo medee bali tou ee yimapoo teneega. Osoloso eyo nediliyo na si hoowee. Osoloso saga na kamana bigi. Osoloso yugune naloso na halabee. Osoloso na bilige. Osoloso molee talame gamenee na takee.

<sup>8</sup> Esino yayo odoo soo simi pidilone ka badebee. Osoloso yo goo tekepo goolone badebee. Osoloso yo o su eyo nediliyo medee kookode. Osoloso yo Godeeye tekepo deli goo ee tolone badebee. Osoloso Godeeyo howo woola medee teedee badebee.

<sup>9</sup> To tekepo ee tei goodee, osoloso to hagee opusomo dee koo seli. Yayo to tekepo iyo eligimo silee mapoo kibiya kookoodoloso badebee, tei goodee eligilone odoo abo pidilame. Osoloso to tekepo mapoo goweli odoo oso eli dooboo dagadi goo ee ogoga, yayo dimapoo goo eligilame.

### *Kiliti odoo aboso gamenee goo eligi*

<sup>10</sup> Ayo namapoo egeesee ka taka. Bei, sosee ma kulodu Godeeyo to mapoo koo mesili odoo abo doso. Diba goo eyo bei mauwe wulo to booweliso. Osoloso diayo gamenee goo odoo mapoo eligilone, tei goo maga diba peegoo gilimado diliso. Goo hageesi egee tomo silesibo ee tei telaga Yu odoo\* aboso ka seeso.

<sup>11</sup> Esiga diayo egee eligimo silesibo goo ee hamaga takee. Bei, soosooso tei too goo ee diayo tokenee pomo silesiboso. Osoloso

**1:2:** Kol 1:27    **1:4:** 2Kol 8:23; Gal 2:3; Loum 1:7    **1:6:** 1Tim 3:2-7; 2Tim 2:24-26    \* **1:6: sobo hedebe huloso badebee** - goo hagee, yo sobo hedebe huloso badalai, o, yo sobo hedebe mapoo goo maloso badalai ee takoo malaiso.

**1:10:** 1Tim 4:7    \* **1:10:** Yu odoo hagee biaso egeesee eligiliso, tei telaga odoo susuga oso Yu odoo dia tei magoo ee dodolone kolo koolai tekepo deliso.    **1:11:** 1Pita 5:2; 2Tim 3:5-6

diayo molee talame gamenee goo hagee eligimo silesibiliso.

<sup>12</sup> Egeesi ma kulodu daga hoogoo Kiliti mi te mapoo badeli eligili odoo heeso, o odoo dia goo maga takolone egeese takaso, “Kiliti odoo susuga diba gameene takeli odoo. Osoloso diayo dibada suso goomoga goo tokenee ee dodolone ka doso. Osoloso diayo tou talai gowoolone, wulo nei diya toowa nolone ka doso,” diso.

<sup>13</sup> Yayo goo taka hagee ee tei goo taka. Esiga Taites, nayo gamenee goo eligi mapoo tei teli odoo hagee bia ogoloso dimapoo diya takemelee, diayo gamenee goo eligi ee poogoloso, see goo tekepo eligi mapoo medee kibiya tei ka talame.

<sup>14</sup> Osoloso diayo Yu odoo dia adaga dia goo egee oposusumo silesibo ee peegeeye dee. Osoloso diayo Godeeyo goodee mapoo goweli odoo dia tei magoo mapoo egee mesimo silesibo onosee peegeeye dee.

<sup>15</sup> Esiga Godeeyo howo woola subugo mauwe badeli odoo mapoo, bi susuga medee tekepo subugo mauwe moloso. Esino goo tokenee tolone Yesu mapoo tei tele pegeli odoo dimapoo bi susuga subugo mauwe koo moloso. Bei, goo goolee tekepo dimapoo melee ee olo tokenee paga. Esiga goo tekepo sabolo, osoloso goo tokenee dieso teli ee ogoloso koo gooleedeli.

<sup>16</sup> Esiga diayo takolone, “Godee iba gooleedooso,” dee takeliso. Esino diayo goo tokenee teli oso Godee mapoo tei telega pegeli goo ee eligiliso. Diba diya tokenee odoo. Osoloso diba Godee mapoo koo mesili. Osoloso diba goo tekepo talai koo tebili.

## 2

### *Tei goodee eligi mapoo deede*

<sup>1</sup> Esino Taites, nayo tei telaga odoo mapoo Yesu Kelisowo goo maga tei goodee eligili sabolo teiba eligi.

<sup>2</sup> Egeeseelone nayo giso adaga medee eligi, diayo mesie sabolo dobolone, dieso nediliyo dibada su medee kookoodoloso

dabalame. Osoloso odoo susuga eyo howo woola medee tekepo dabalame. Osoloso diayo tei too medee kibiloso dobolone, odoo susuga diya sooloo dolone ka dabalame. Osoloso diayo dala goo ma kulodu kibiya dabalame.

<sup>3</sup> Osoloso nayo sobo adaga medee eligi, diayo dia suso Godeeye goomoga goo ee tolone ka dabalame. Osoloso dimapoo takee, diayo emegei dia goo maga to tokenee takelega dabalame. Osoloso diayo yugune naloso halabagamo silesibiyaga, medee takee. Osoloso goo tekepo tolone dabalai goo ee diayo odoo mapoo eligilone dabalame, nayo dimapoo eligi.

<sup>4</sup> Esiga diayo goo egeesi moodooga, sobo gie kakauwa diayo dibada giso sabolo, osoloso owolo dio sooloo deli goo ee eligilei tebileiso.

<sup>5</sup> Osoloso diayo sobo gie kakauwa oso goo tekepo tolone, Godeeyo howo woola subugo mauwe dobolone, dia su medee kookoodeli goo ee eligilei tekepo. Osoloso omo dio sabolo, osoloso owolo dio sabolo medee balai goo onosee eligi. Osoloso omo dio eyo to mapoo mesili goo ee eligi, tei tele poogoo odoo oso goo ee ogoloso, Godeeyo to maga to tokenee takelega pagalame.

<sup>6</sup> Osoloso giso gie kakauwa dibada su medee kookoodeli goo ee dimapoo eligi.

<sup>7</sup> Osoloso edebeeyo nee goo susuga ogoloso padalame, nayo hedebe goo tekepo tolone ka badebee. Osoloso nayo Godeeyo to eligiga, goo tekepo goolone medee ka eligi.

<sup>8</sup> Nayo Godeeyo to dooboo dagadilega medee eligi, namapoo goweli odoo oso imaga to tokenee takalai similame.

<sup>9</sup> Osoloso nayo see tei telaga odoo nei mauwe tou teli mapoo takee, diayo dia wiligi odoo eyo to mapoo mesiloso, diayo goomoga goo ee tolone, dibolo toso agadi-gelega pagalame.

<sup>10</sup> Osoloso diayo dia wiligi odoo eyo bi heli talai tekeponee. Esino diayo medee tei dolone, tou medee goosa tolone dabalai tekepo, dia wiligi odoo oso dia goo tekepo ogoloso, yayo dia goo ee tekepo dalame.

Osoloso ibada gie badeli pidili Godeeyo goo maga eligi goo ee tekepo dalame.

<sup>11</sup> Tei telaga odoosoo oso goo egeesi tolone dabalame, nayo dimapoo eligi. Bei, Godeeye iba sooloo dolone pidili goo maga Yesu Keliso mipoo hamapoo meiye diso, yayo odoosoo susuga ibada gie badeli ee pidilame.

<sup>12</sup> Godeeye sooloo dolone pidili goo oso imapoo ka eligi moloso, mi goo Godeeye goweli iyo ee dedelega pagalame. Osoloso iba epedee hamapoo dobolone, ibada su iso nediliyo kookoodoloso, Godeeye goomoga goo ee tolone, o howo woola teedee dabalame.

<sup>13</sup> Esiga iyo goo egeesi tolone dobolone, Yesu Kelisoye mipoo hamapoo sibilei goo ee dulone ka bamoloso. Yo tei Godee, osoloso yo ibada gie badeli pidili odoosoo. Yayo see wedi siboga, eyo toowa doloso badeli goo sabolo sibileiso. Goo susuga egee iba gooleedoosoo. Esiga yayo see wedi sibilei ee bolone iba goomoga sabolo ka doso.

<sup>14</sup> Yayo iba halo olo taso, iyo goo tokenee ma kulodu doboome, yayo iba neiso tolosoo peegoo gilimado dilame. Egeeseelone yayo olo taso, iyo o odoosoo doloso dobolone, o howo woola medee teedee dabalame. Osoloso iyo goo tekepo talai ee diya goolone dabalame.

<sup>15</sup> Esiga nayo goo susuga hagee kitulugu sabolo medee kokodo takee, tei telaga odoosoo oso goo ee tolone dabalame. Esino diayo goo omapoo mesilega poogooga, nayo dimapoo diya takee. Nayo egeesi eligi goo ee ogoloso edebeeyo hedebe nayo eligi mapoo mesilei tekepo. Egeeseelone odoosoo heeso nayo eligi goo ee goo mauwe, dee na takeeye dee.

### 3

#### *Tei telaga odoosoo oso dabalai goo*

<sup>1</sup> Esiga Taites, nayo tei telaga odoosoo mapoo goo hageesi see tobu eligimelee, diayo diba gibadeli gamalee odoosoo dia to mapoo, osoloso mosobia eyo wiligi odoosoo tebisa dia to mapoo mesilone dabalame.

Egeeseelone diayo goo tekepo susuga ee talai olo mopoodoo doloso dabalame.

<sup>2</sup> Osoloso diayo emegei dia goo maga to tokenee takolone na debee. Esino diba toso agadigelega mesie sabolo dobolone, emegei sooloo dolone dabalai tekepo.

<sup>3</sup> Esiga no iyo daga tei telega debei goo ee goolee. Iba tei telega dobolone, goo medee koo gweli odoosoo doloso debeiso. Iyo Godeeyo to mapoo mesilega doboome, odoosoo aboso iba tei goodee maga peegoo gido diliso. Osoloso goo tokenee iyo gilee goo ee osee tomo silone pagalai tebile. Iyo odoosoo abo mapoo goo tokenee moodeliso, osoloso emegei dia bi ogoloso talame diya gweliso. Osoloso edebeeyo iba hegiliso, eseega nei iyo diba hegiliso.

<sup>4-5</sup> Esino ibada gie badeli pidili Godeeye o mesie goo ee imapoo eligilone iba sooloo dolone, yayo ibada gie badeli pidiso. Esiga iyo goo tekepo teme, yayo iba ka pidile. Esino yayo ibada goo tokenee hapoloso Dio Tei imapoo tenee maga, yayo sooloo dolone iba pidiso, iyo see gie badeli dia tolosoo dabalame.

<sup>6</sup> Ibada gie badeli pidili Yesu Kelisoye ibada goo tokenee hapalame ta goo omaga, Godeeye o Dio Tei ima kulodu badalame su goodegelega wulayo teneeso.

<sup>7</sup> Esiga Godeeye iba sooloo dolone pidi maga, o howo woola iba olo odoosoo tekepo doloso doso. Esiga iba kookaiyo badoboso gie badeli ee talame ka bamoloso.

<sup>8</sup> To hagee tei goo, osoloso to hagoso odoosoo susuga pidilei kitulugu moloso. Esiga a goomogo, nayo goo hagee tei telaga odoosoo mapoo medee eligilame. Nayo egeesee seega, diba goo tekepo tolone odoosoo susuga pidilone medee dabalaiso.

<sup>9</sup> Esino goo wulo bei mauwe maga toso agadigeli odoosoo omaga peegoo dooboobigi. Osoloso edebeeyo o adagaso balomo simi goo ee oposusulone, Moseseeye tei magoo goo ee dadalame toso agadigaga goo ee, nayo ogoloso na deedee. Bei, goo susuga hagoso odoosoo koo pidili.

<sup>10</sup> Osoloso odoosoo agayo gamenee eligi goo ee tolosoo sosee ma kulodu eligimo silone

**2:12:** 1Yon 2:16    **2:14:** Gal 1:4; Exo 19:5; Deut 7:6; Ezek 37:23; 1Pita 2:9    **2:15:** 1Tim 4:12    **3:1:** Loum 13:1-7; 1Pita 2:13-14    **3:3:** 1Kol 6:9-11; Epe 2:1-2; 5:8    **3:4-5:** 2Tim 1:9; Epe 5:26; Hib 10:22    **3:6:** Diye 2:17-18    **3:9:** 2Tim 2:14, 16    **3:10:** Mat 18:15-17



odoo domo piga, nayo yo hamaga takee. Osoloso yayo nee to dulega poogooga, see tobu hamaga takee. Esino yayo nee to dulega poogoloso see osee eligimo siloga, yo peegoo wulo peegee.

<sup>11</sup> Odoo ogoso tei goodee eligili maga miligi pia goo ee, no gooleedooso. Osoloso goo yayo tomo sili oso Godeeyo howo woola yo odoo tokenee doloso egee bado goo ee woola eligiliso.

*Emegei di to hamameedee taka*

<sup>12</sup> Ayo Atemas, o, Tikikus namapoo diye dalaiso. Osoloso yo nayo egee bado mapoo peledobooga, nei nayo Nikopolis mi mapoo sibilesa a tugodalame weegegee. Bei, dugo biame mapoo a mi omapoo badalai, a goomogo.

<sup>13</sup> Osoloso Apolos sabolo, osoloso gamaleeyo tei magoo diya gooleedoo odoo Sinasi pidilone, diba mi hee mapoo dilame dogo, bi diayo dulone todilei tobuloso dimapoo tenee.

<sup>14</sup> Osoloso tei telaga odoo oso goo tekepo tolone dobolone, bi tebile poogoo odoo ee pidilei tekepo. Bei, ibada odoo oso tei too ma kulodu dobolone, wulo goo mauwe mosoowe dabalai tekeponee.

<sup>15</sup> Esiga odoo susuga abolo debeli oso namapoo emegei di to ka taka. Esiga Taites, see nayo iyo emegei di to taka hagee, nobolo hodobo debeli tei telaga odoo dimapoo takee.

Ayo Godee mapoo taka, yayo niba susuga sooloo dolone pidilame.

## Palimon Poloye Palimon mapoo to hogugu tenee

### *Palimon booka goo eyo bei*

Palimon hagee bi bei odo, osoloso yo Kolosi mi mapoo badeli. Esino yo tei toloso badolone, Polo dio emegei doloso badebeiso. Egeesi ma kulodu Onisimas yo Palimoneeyo tou teli odo doloso badolone, nei mauwe tou temeleso. Egeesi ma kulodu Onisimaseeye o wiligi odo Palimon maga pulo dilesa Polo tugodoloso yibolo badebeiso. Osoloso Poloye eligi goo maga yo Yesu mapoo tei tooso. Egeesi ogoloso Poloye Palimon mapoo to hogugu hagee teneeso, Palimon o tou teli odo Onisimaseeye see wedi dilesa, Palimoneeye badebei mapoo peledobooga, yayo yimapoo nei dala tenelega, yo goomoga sabolo see ka idalame.

<sup>1</sup> A Polo, Yesu Kelisowo goo ee takomo silee maga, neliga moso ma kulodu badeli odo ee aso. Ibada omolo Timoti asalo hamapoo dobolone, iyo ibada odo ibolo tou hedebe teli Palimon namapoo to hogugu hagee ka tonowa.

<sup>2</sup> Osoloso tei telaga odo nee moso kulodu howo gisili odo mapoo to hogugu hagee ka tonowa. Osoloso to hogugu hedebe hagonosee ibada obooba Apiya, osoloso ha teli odo masi Godeeyo tou mapoo kibiloso ibolo badeli Alakipus nimapoo ka tonowa.

<sup>3</sup> Ayo Godee mapoo taka, Ma Godeeye, osoloso ibada Lodee Yesu Kelisoye niba sooloo dolone pidilame, osoloso mesie goo ee nimapoo tenelame.

### *Palimoneeye sooloo deli goo sabolo osoloso tei too goo*

<sup>4</sup> Palimon, ayo biame susuga Godee mapoo takolone no halo goomoga to take-liso.

<sup>5</sup> Bei, nayo Lodee Yesu mapoo tei too goo ee, a duliso. Osoloso nayo Godeeyo

odoo susuga ee sooloo dolone egee bado goo sabolo, a duliso.

<sup>6</sup> Nayo Yesu mapoo olo tei tooso. Goo egeesi maga, nayo tei telaga odo sabolo hedebe doloso ka badoso. Esiga ayo Godee mapoo taka, hedebe deli goo hagoso no pidilone, iba Keliso sabolo hedebe doloso hagee do goo maga, goo tekepo susuga iyo teli goo ee medee gooleedalame.

<sup>7</sup> Molo emegei, nayo Godeeyo odo ee sooloo dolone dimapoo goomoga tenelone egee bado goo oso, amapoo kitulugu sabolo, osoloso goomoga toowa sabolo ka tenemoloso.

### *Onisimas yo tei nomolo masi hesie*

<sup>8</sup> A Kelisowo diye di odo doloso badoga, amapoo kitulugu moloso, nayo goo tekepo talame, ayo namapoo to kitulugu sabolo takalai.

<sup>9</sup> Esino ayo no diya sooloo doloso. Esiga ayo namapoo wulo ka woosowa. Bei, a Polo, Yesu Kelisowo tou teli goo maga neliga moso ma kulodu badolone olo adaga poloso ka badoso.

<sup>10</sup> Ayo Onisimas yo halo namapoo ka taka, nayo yo pidilame. Bei, a neliga moso ma kulodu badolone, yayo tei talame ayo yo pidiso. Esiga epedee hamapoo ayo ama masi ka badoso.

<sup>11</sup> Daga Onisimaseeye nee tou teli odo doloso badebei omapoo yayo no medee pidile. Esino epedee yayo tei toloso badolone, asalo pidilei teiba.

<sup>12-13</sup> Onisimas yo ayo diya gooma odo. Esiga yo abolo hodobo hamapoo badalai, a goomogo. Bei, ayo to tekepo takomo silee eyo goo maga neliga moso ma kulodu ka badoso. Esiga no halo yayo a pidilone badalai, a goomogo. Esino ayo yo namapoo see wedi diye deeso.

<sup>14</sup> Bei, ayo namapoo wooselega yo hamapoo gidoloso badalai tekeponee. Egeesi ma kulodu nayo a pidilame, ayo no seselai, a koo goomogo. Esino no goomoga oso, nayo a pidilei, a goomogo.

<sup>15</sup> Onisimaseeye biame deiyepo mapoo no poogoo dilesa badebeiso. Esino ayo goolee, goo ogoso peledabaso, yo see

hamamee namapoo wedi sibilesi biame susuga nobolo hodobo badalame.

<sup>16</sup> Esiga nayo yo see idoga, yo wulo nama hemi badolone nei mauwe tou teli odoo, dee na goolee. Bei, yinosee epedee Keliso mapoo tei too odoo. Esiga yo ayo diya gooma. Esiga nei nayo yo nei mauwe tou teli odoo dolone, Lodee mapoo tei too ee ma kulodu nomolo masi diya goolone badebee.

<sup>17</sup> Esiga asalo Kelisowo tou hodobo teliga, ayo no agalame siboga, nayo a idili, Onisimaseeye namapoo siboga yinosee egeesee ide.

<sup>18</sup> Egeesi ma kulodu Onisimaseeye namapoo goo tokenee hee olo too daga, osoloso yayo nee bi hee nei tenelega toloso badoga, goo onosee amapoo takee, ayo nei magalaiya.

<sup>19</sup> A Polo, ayo mo deeso to hagee ka hoguga: bi yayo too eyo nei ee ayo namapoo tenelaiso.\* Esino no gooleedooso, nayo Keliso maga gie badeli talame, ayo no pidiso. Esiga a goomogoga, ayo no halo pidi goo eyo nei, ayo namapoo takalai, a teiba. Esino ayo namapoo takalaime.

<sup>20</sup> Esiga molo emegei. Iyo Keliso mapoo tei too ee ma kulodu doga, nayo Lodee halo Onisimas ee see ide. Eseega a goomoga sabolo badalaiso.

<sup>21</sup> Ayo namapoo egee takoo goo hagee nayo toloso, Onisimas halo goo tekepo abo talai goo ee, a gooleedoso. Goo egeesi gooleedoloso, ayo to hogugu hagee namapoo ka tonowa.

<sup>22</sup> Osoloso goo hee hagoso. Ayo neliga moso ma kuloduga peegoo peledabalame, niyo Godee mapoo takolone debeliso. Esiga Godeeye goomogoga, a peegoo peledoboloso see niyo egee do mapoo sibileiso. Esiga ayo omapoo sibilesi badalai debi mopoodoo de.\*

### *Emegei di to hamameedee taka*

<sup>23</sup> Kelisowo goo ee takomo silee goo maga neliga moso ma kulodu abolo badeli

odoo hee Epapalas onosee yayo emegei di to ee namapoo taka.

<sup>24</sup> Osoloso abolo hodobo tou teli odoo Makaye, osoloso Alistakuseeye, osoloso Dimaseeye, osoloso Lukaye, emegei di to onosee namapoo ka taka.

<sup>25</sup> Ayo Godee mapoo taka, ibada Lodee Yesu Kelisoye niba sooloo dolone pidilame.

\* **1:19:** Poloye o deeso to deiyepo hagee nei tenelai goo maga hoguguso. Esino to abo Poloye odoo hee mapoo takeme, yayo hogugu malaiso. **1:22:** Pil 1:25; 2:24 \* **1:22:** Poloye to hogugu susuga hagee Palimon mapoo hoguguloso teneeso. Esino to besee 22 ee ma kulodu egee molo, ee yayo Kolosi mi mapoo debeli tei telaga odoo dimapoo to hoguguloso teneeso. **1:23:** Kol 1:7 **1:24:** Kol 4:10-14

## Yemes To Yemeseeye hogugu

### *Yemes booka goo eyo bei*

Yemes booka hogugu hagee Yesuwo omolo. Yayo Yelusalem sosee wiligi doloso badolone, mi abo mapoo debeli tei telaga odoo mapoo to hogugu hagee teneeso, diayo Keliso mapoo tei too maga dala egee tomolo ee ma kulodu medee kibiya dabalame.

<sup>1</sup> Emegei! A Yemes, Godee sabolo osoloso Yesu Kelisowo tou teli odoo. Ayo Yu odoo bala 12\* mi opusomo opusomo di mapoo egee dobomo du nimapoo to hagee ka hoguguso.

### *Dala goo sabolo goo tokenee mapoo gido dili goo sabolo*

<sup>2</sup> Tei telaga odoo emegei, dala goo susuga oso nimapoo siboga, goomoga sabolo ee ma kulodu ka debee.

<sup>3</sup> Bei, niba gooleedooso, dala goo hageesee oso sibiliso, iyo tei too kibiya beleso agalame. Egeesi ma kulodu iyo dala goo ee ma kulodu kibiya dogo, goo oso iyo tei too ee ma kulodu mesie sabolo debeli goo ee eligiso.

<sup>4</sup> Esiga niyo tei too goo ee kibilame, mesie goo nima kulodu egee molo oso osee mele dee. Niyo egeesee seega, goo susuga ee ma kulodu niba kibiya dabalaiso.

<sup>5</sup> Esiga odoo hee niyo goo goolee tekepo tebile daga, yayo Godee mapoo takalai tekepo. Bei, Godeeye yimapoo simili goo tenelaime. Esino Godeeye o odoo pidilei goomoga toowa mologa, yayo yo pidileiso.

<sup>6</sup> Esino yayo Godee mapoo tei toloso yimapoo takooga, goo bakadio na goolee. Bei, goo bakadio gweli odoo ee poo siboga, howo ki simi oso egee holodu odoo yo egeesi masi badoso.

<sup>7-8</sup> Odoo egeesi yimapoo goo goolee hedebe koo moloso. Esino goo susuga ee ma kulodu goo goolee bakadio doloso

badoso. Esiga yayo Godee mapoo taka goo ee nei talaiso doloso goolai tekeponee.

<sup>9</sup> Esiga tei telaga bi mauwe debeli odoo niba goomege. Bei, Godeeye o howo woola niba toowa diso.

<sup>10</sup> Osoloso tei telaga bi bei odoo niba Godeeye pepooko daga, niba goomege. Bei, osoko biame mapoo osokoso pukusi mapoo pounoga, siligaloso egee wodio, niba nose egeesee selaiso.

<sup>11</sup> Osoloso osokoso sibulone palapalawa tekepo mapoo pounoga, palapalawa tekepo oso wodoloso miyomoo dologa dibiliso, niba nose egeesee selaiso. Esiga bi bei odoo niyo nibada tou tolone dogo, niba wedileiso.

<sup>12</sup> Odoo heeso dala ma kulodu kibiya badolone tei too goo pegelega badoga, Godeeye yo pidileiso. Bei, yo dala ma kulodu tei too kibiya badoga, Godeeye yimapoo nei kookaiyo badoboso gie badeli tenelaiso. Esiga kookaiyo badoboso gie badeli hagee Godeeye yimapoo diya goolee sabolo debeli odoo mapoo tenelame to magooso.

<sup>13</sup> No goo tokenee talame gido duga, “a goo tokenee talame Godeeye gido du,” dee na goolee. Bei, tokenee goo oso Godee gido dilei tebile. Osoloso Godeeye o odoo ee tokenee goo mapoo koo gido dili.

<sup>14</sup> Esino odoo eyo tokenee goo talame diya gweli goo oso yo kukuga ka gido dili.

<sup>15</sup> Osoloso tokenee goo talame gweli goo hagoso suso goo talame gido dileiso. Osoloso suso tokenee goo too hagoso kauwuloso see odoo mapoo teli goo tosibileiso.

<sup>16</sup> Esiga tei telaga odoo ayo gooma niba goolee, Godeeye odoo koo gido dili.

<sup>17</sup> Bei, tokenee mauwe tekepo goo susuga ee Ma Godeeye egee bado dokodooga sibiliso. Egeesi ma kulodu bi yayo moodoo a, giwo, osoloso osoko diayo melee mi hedebe omapoo koo meli, esino diba biame heeso mi hee ma molo osoloso mi hee ma molo deliso. Esino diba moodeli Godee yo opusomo dee koo seli.

<sup>18</sup> Esiga eyo goomoga goo ee dodolone, Godeeye o to tekepo maga imapoo gie

**1:1:** Mat 13:55; Gal 1:19; Diye 15:13; 1Pita 1:1  
**1:2:** Loum 5:3-5 **1:3:** 1Pita 1:7

\* **1:1:** *Yu odoo bala 12* egee eyo bei Yu odoo tei telaga odoo ee  
**1:5:** Prov 2:3-6 **1:10:** Isa 40:6-7 **1:18:** Yon 1:13



badeli goo ee olo teneeso, yayo moodoo bi susuga ma kulodu iyo malalo dabalame.

*Godeeyo to duloso suso tou tolone debee*

<sup>19</sup> Esiga tei telaga odoo ayo gooma, niba dui, odoo susuga oso saga duli odoo doloso dabalai tekepo. Egeeseelone niba saga to takeli goo sabolo osoloso saga kamana bigili goo sabolo ee ma kulodu na debee.

<sup>20</sup> Bei, edebeeyo komonolone goo peledabeli oso Godeeyo howo woola mapoo tekepo doloso badeli goo sabolo koo tobuoso.

<sup>21</sup> Esiga nima kulodu Godeeyo howo woola goo tokenee susuga sabolo osoloso suso goo tokenee teli sabolo peegee. Osoloso niyo Godeeyo to duloso too goo ee mesie sabolo kibiya toloso debee. Bei, to omapoo kitulugu moloso, niyo gie badeli talai.

<sup>22</sup> Esiga niba Godeeyo to duloso yayo egee takoo goo ee tolone debee. Bei, niba Godeeyo to duloso yayo egee takoo goo ee telega dogo, niba niso nediliyo dooboo gooleeso.

<sup>23-24</sup> Bei, edebeeyo Godeeyo to duloso suso tou telega badoga, yo edebeeyo dio egeli mapoo eyo nediliyo ogoloso poogoloso o mudu saga boobado bigili egeesi masi badoso.

<sup>25</sup> Esino edebeeyo Godeeye kokodo taka to tekepo ee medee ogoloso boobado bigilega medee dodomologa, yayo goo susuga tomo sili ma kulodu Godeeye pidileiso. Godeeye kokodo taka to medee tekepo oso odoo susuga tokenee goo maga gilimolone ka badoso.

<sup>26</sup> Egeesi ma kulodu edebeeyo eyo nediliyo yo Godeeyo goo diya gooleedooso doloso, tokenee goo takalame o maga kookodelega poogooga, yayo Godeeyo goo gooleedoo ee goo mauwe moloso. Osoloso yo eyo nediliyo dooboo gooleeso.

<sup>27</sup> Esino edebeeyo gilibo holo sabolo osoloso bauwe sabolo dala ma kulodu debei ee pidilone badolone, mi toowayo tokenee goo maga o su eyo gibadoga, Godeeye yayo tei too goo ee medee teedee dalaiso.

## 2

*Odoo abo pilega tokenee odoo sabolo tekepo odoo sabolo hodobo dabalai goo*

<sup>1</sup> Tei telaga odoo emegei, niba ee ibada toowa Lodee Yesu Keliso mapoo tei telaga odoo oso. Esiga niba odoo abo ogoloso, diba ee tekepo dolone dimapoo goomogolone, odoo abo ee tokenee dolone diba na gowee.

<sup>2</sup> Goo hageesee ee takooso, odoo heeso niyo mooloogoodoloso howo gisilone dogo, dugo medee tekepo sabolo bi abo medee tekepo kaloso gasibileiso. Egeeseega epedee omapoo bi mauwe odoo onosee dugo tokenee kaloso gasibileiso.

<sup>3</sup> Egeeseega niyo dugo tekepo kaloso gasimi odoo mapoo, “No malalo hamapoo sibilesi bie,” dee takoloso, see hamamee dugo tokenee kaloso gasimi odoo mapoo, “No hamamee hoogoo dilesi tebide o, miyomoo bie,” dalaiso.

<sup>4</sup> Esino niyo goo egeesee egee moodoo, niba ogoo goo moodoosomo? Niba wulo odoo abo ono tekepo dolone, odoo abo ee tokenee, deeso. Esiga goo goolee tokenee nima kulodu egee molo oso odoo abo dooboo midiliso.

<sup>5</sup> Esiga tei telaga odoo ayo gooma, niba goo hagee medee dui! Godeeye mi toowa ma kulodu bi mauwe odoo ee hesigaso, diayo dibada sooloo ma kulodu tei too goo oso toowa doloso dabalame. Osoloso diayo Godeeye wiligi doloso badeli mapoo gadilame. Bei, Godeeye yo goolee sabolo sili odoo mapoo to kitulugu magooso, yayo wiligi doloso badeli mapoo gadilame.

<sup>6</sup> Esino goo ee ma kulodu niyo bi mauwe odoo ee goo mauwe odoo deliso. Esino niba kasi maga bi bei odoo mapoo hamamee ka dadaga malala? Egee bia oso nimapoo dala teneloso goo midili mapoo ido diliso.

<sup>7</sup> Osoloso diayo nibada Lodee Yesu Kelisowo hu tekepo maga to tokenee takeliso.

<sup>8</sup> Godeeyo to booka ma kulodu kokodo taka to toowa egeesee moloso,

“No nediliyo diya sooloo deli egeeseelone no nemegei odoo mapoo diya sooloo dele,” diso.

Esiga niyo kokodo taka to hagee medee deedeega, niba eli mapoo doso.

<sup>9</sup> Esino niyo goolee ma kulodu odoo abo ee tekepo dolone, odoo abo tokenee daga, niba tokenee toso. Egeesi maga Godeeyo to oso takooso, niba tei magoo gababili odoo diso.

<sup>10</sup> Bei, edebeeyo Godeeye tei magoo susuga medee dodolone, tei magoo hedebe gababuoga, yo tei magoo susuga ee gababuoso.

<sup>11</sup> Esiga Godeeye egeesee takaso, “Niyo odoo heeyo sobo sabolo giso sabolo goo heli na te,” diso. Osoloso Godee hedebe oso see egeesee takaso, “Odo na wooloome,” diso. Osoloso no odoo heeyo sobo sabolo giso sabolo heli koo teli, esino odoo wooloomolone badoga, no tei magoo gababili odoo oso.

<sup>12</sup> Esiga niyo to kei susuga sabolo osoloso suso goo too susuga sabolo obeeyamo. Bei, niba tokenee goo maga peegoo gilimadoo dili tei omaga nibada goo midileiso.

<sup>13</sup> Esiga goo midilei biame mapoo, Godeeye emegei koo sooloo deli odoo ee sooloo dala goo sabolo midileime. Esino Godeeye goo midilei biame mapoo emegei sooloo deli odoo ee sooloo dala goo sabolo midiga, diba ebilega goomoga sabolo dabalaiso.

### *Tei too ma kulodu su sabolo tou talai*

<sup>14</sup> Esiga tei telaga odoo emegei, edebeeyo eyo nediliyo yo tei too odoo doloso, yayo suso tou too me daga, yayo tei too ee goo mauwe. Odo egeesee seli ee yayo tei too oso yimapoo gie badeli tenelaime.

<sup>15</sup> Egeesi ma kulodu emegei tei too odoo oso nei egeesi sabolo osoloso dugo egeesi sabolo me badeliso.

<sup>16</sup> Egeeseega nayo yimapoo takolone, “Emegei, medee dileso, dugo kaloso badolone wo ne,” dee takooga, nayo yimapoo bi tebile poogoo tenelega wulo

egeesee takoloso poogooga, no tekepo goo koo toso.

<sup>17</sup> Esino bei, tei too oso obusomo molone suso goo too mauwe mologa, tei too ee goo mauwe.

<sup>18</sup> Egeesi ma kulodu odoo heeso egeesee takalai malaiso, “No tei too teiba. Esino a wulo suso goo teli odoo,” dalaiso. Egeeseega nei ayo odoo omapoo egeesee takalaiso, “Bei kasolone nayo suso goo too mauwe badolone, nayo tei too goo ee woola ka eligileiyo? Esino suso tekepo goo teli odoo ayo mo suso goo too maga ayo tei too goo ee eligileiso,” diso.

<sup>19</sup> Esiga nayo Godee hedebe egee bado mapoo tei teliso. Goo ee tekepo. Esino bo holo sabolo Godee hedebe egee bado mapoo tei tolone ebiliso.

<sup>20</sup> Esiga no goo goolee mauwe odoo, tei too ee suso tou too me daga, tei too egee goo mauwe. Esiga no goo hagee ayo namapoo eligilame ka sala?

<sup>21</sup> Ibada amawe Eibalaham yo Godeeyo howo woola mapoo tekepo odoo diso. Bei, yayo tei toloso suso tou too maga. Goo ee yayo egeesee siso, yayo owolo Aisek ee Godee mapoo gala wooloso teneli dousulu mapoo wooloomalame dokodoo magooso.

<sup>22</sup> Esiga no goolee. Eibalahameeye tei too sabolo osoloso suso tou too sabolo oso medee teibaso. Osoloso yayo suso tou too oso yayo tei too ee kauwudooso.

<sup>23</sup> Goo hagoso Godeeyo to booka ma kulodu taka goo sabolo tobulone egeesee takaso, “Eibalahameeye Godee mapoo tei teme, Godeeye yayo tei too ogoloso o howo woola yo tekepo odoo diso.” Goo egeesi maga Godeeye Eibalaham yo tei mo odoo diso.

<sup>24</sup> Esiga niba goolee. Odo susuga oso hedebe tei too maga Godeeyo howo woola tekepo odoo dee koo seeso. Haye. Suso tou too sabolo osoloso tei too maga Godeeyo howo woola odoo susuga ee tekepo deliso.

<sup>25</sup> Osoloso iba see domo sili sobo Leihabeeye goo too ee ogoso. Yibolosee yayo goo too oso Godeeyo howo woola yo tekepo diso. Bei, yayo Yeliko odoo dia

mosobia mada agalame di Isalael odo e pidilone, yayo o mosopoo iyadoloso palaso. Osoloso see yayo diba eli hee maga diye dulone dibada gie badeli pidiso.

<sup>26</sup> Esiga odo o su mapoo dio mauwe odo ee ta. Esiga tei too goo onosee egeesi moloso, edebeeyo yayo tei too ee suso tou telega badoga, yayo tei too ee goo mauwe moloso.

### 3

#### *Nibada i medee kookoode*

<sup>1</sup> Tei telaga odo emegei, niyo susuga eligili odo doloso dabalai, a koo goomogo. Bei, niba olo gooleedooso, Godeeye goo midilei biame mapoo eligili odo susuga ibada goo ee Godeeye diya kitulugu sabolo midileiso.

<sup>2</sup> Egeesi ma kulodu iba susuga eli dooboo dagadiliso. Esino edebeeyo yayo to taka ma kulodu eli dooboo dagadilega badoga, odo yayo tei too ee kauwa moloso. Esiga odo hageesi oso eyo nediliyo o su susuga kookodalai teiba moloso.

<sup>3</sup> Esiga iba dio masi hagee ogoso. Edebeeyo hosee be ma dokodoo buloso dilame gooleega, yo bi pepooko hosee be eyo maga mapoo magoloso tiso su mapoo bagagoo, su mapoo bagagoo dalaiso. Osoloso ti omapoo toloso dulone hosee be oso edebeeyo goolee mi mapoo dilame ti ee gimo dileiso. <sup>4</sup> Osoloso dio masi hee hagoso. Abei toowa mapoo silesibili du onosee egeesi moloso. Du oso poo toowa simi ma kulodu osee dumologa, du egee dooboo dileime. Bei, du egee toowa, esino du mali suda pepooko hee osio mapoo moloso. Oso du tosili odo oso goomoga mi mapoo mamoo diliso.

<sup>5</sup> Esiga ibada maga ma kulodu i pepooko egee egeesi moloso. Ibada su mapoo bi susuga egee molo ma kulodu i ee diya pepooko moloso. Esino yayo toso hodolone diya doko topeliso. Wulo goolee, dobu ee dou pepookoso gigoogooga, dobu susuga douso nadiliso.

<sup>6</sup> Esiga i ibada maga ma kulodu egee molo onosee egeesi masi moloso. Bei, i oso ibada su mapoo tokenee teneliso. Esiga

iso tokenee bei mooloogooloso odo su susuga dou masi nadiliso. Dou hagee Dou mi maga bei mooloogooloso ibada i mapoo gigoogiliso. Egeeseega dou hagoso edebeeyo gie badeli nadoloso tokenee peliso.

<sup>7</sup> Egeesi ma kulodu odo susuga oso gala seebee opusomo opusomo di só, osoloso beliyeso kolo dili, osoloso howo kulomoo debeli ee see badalame poopeliso.

<sup>8</sup> Esino edebeeyo i ee be masi poopooloso badilei tebile. Bei, i diya tokenee. Esiga yayo sa masi odo wooloomalame mopoodoo doloso moloso.

<sup>9</sup> Esino i hedebe hagoso ibada wiligi taba Ma Godee mapoo goomoga poudiliso. Osoloso i hedebe hagoso see Godeeye yo egeesi masi moodoo odo susuga mapoo dala tenelame to takeliso.

<sup>10</sup> Esiga maga hedebe hamaga Godee mapoo goomoga poudilei sabolo, osoloso odo dala tenelai goo takeliso. Esiga tei telaga odo emegei, ima kulodu goo hageesi oso malai tekeponee.

<sup>11</sup> Esiga howo ou hedebe maga howo sokousoo sabolo howo kakada sabolo dilei tebile.

<sup>12</sup> Osoloso sibolo homo oso wewee koo peli. Osoloso kobolomee homo oso sibolo koo peli. Haye. Osoloso howo ou sokousoo maga howo kakada koo sibili.

#### *Odo agayo tekepo gweli ka badosomo?*

<sup>13</sup> Esiga nima kulodu odo agayo tekepo badalai goolee sabolo ka badosomo? Yo tekepo badalame goo goolee omaga o suso tou too ee eligilei tekepo. Egeeseelone yo eyo nediliyo doko topalai goo goolee sabolo na badebee.

<sup>14</sup> Esino niba mada nibada sooloo ma kulodu emegei hegili goo sabolo osoloso hedebe niso nediliyo gweli goo sabolo mologa, niba tekepo goo gweli odo dee na takee. Bei, niyo egeesee egee takoo niba tei goo koo takooso.

<sup>15</sup> Niba mada goo tokenee hageesi goolee sabolo badolone, niso nediliyo niba tekepo dee takooga, goo goolee egee Godee maga koo sibili. Esino goo goolee egee mi goo oso goo goolee sabolo osoloso Saitenso goo goolee maga ka siboso.

<sup>16</sup> Osoloso mi kamapoo emegei hegili goo sabolo osoloso hedebe eyo nediliyo gweli goo sabolo mologa, mi omapoo abo puloso molone tokenee goo susuga oso kauwuleiso.

<sup>17</sup> Esino tekepo badalai goo Godee maga egee sibo goo oso imapoo eligiso. Malalo goo toowa ee tokenee mauwe goo oso, osoloso mesie goo, osoloso emegei gweli goo, osoloso emegei dimapoo mesili goo, osoloso sooloo deli goo, osoloso emegei pidili goo, osoloso odo abo pilega tokenee odo sabolo tekepo odo sabolo hodobo dabalai goo, osoloso tei takeli goo.

<sup>18</sup> Esiga edebeeyo odo abo sabolo mesie badolone emegei odo sabolo mesie badalai goo eligiga, odo egee bia dima kulodu tekepo goo oso malaiso.

## 4

### *Godee mapoo hegi sibadee*

<sup>1</sup> Esiga ogo goo oso biligeli goo sabolo toso agadigeli goo sabolo nimapoo ka tosi-biliyo? Nibada goo goolee ma kulodu tokenee goo talame goomoga goo egee molo oso tosibiliso. Bei, nibada goo goolee ma kulodu tokenee goo talame goomoga goo oso tekepo gweli goo sabolo biligamoloso.

<sup>2</sup> Niba bi goomegeliso, esino niba bi ee koo teli. Esiga nimapoo emegei hegili goo oso molone, emegei wooloomaliso. Esino goo hagoso niyo goomoga goo sabolo koo tebili. Esiga niba toso agadigilone biliso. Esino goo hagoso niyo goomoga goo sabolo koo tebili. Bei niso Godee mapoo koo woosali.

<sup>3</sup> Osoloso niyo Godee mapoo woosaga, nei tenelega pegeli goo ee bei hagoso. Niyo tokenee gweli goo sabolo woosaloso see bi ogo niso goomoga goo talai daga ka seli.

<sup>4</sup> Goo goolee bakadio gweli odo niba medee Godee sabolo hedebe doloso koo debeli! Esiga niba goolee, mi goo mapoo goomegeli oso Godee mapoo ha toso. Esiga edebeeyo mi goo sabolo hedebe doloso siloga, yo Godee sabolo ha tomoloso.

<sup>5</sup> Esiga niba Godeeyo to booka mapoo hogugu hagee goo mauwe gooleesomo?

Bei, Godeeyo toso egeesee takooso, “Godeeye imapoo Dio Tei tenee oso iyo hedebe Godee goolee sabolo silesibilame diya goomogoso,” diso.

<sup>6</sup> Esino Godeeye iba sooloo dolone medee pidiliso, iyo silesibulone hedebe yo goolee sabolo silesibilame. Esiga Godeeyo to booka mapoo hogugu oso egeesee takooso,

“Godeeye odo eyo nediliyo dokodoo topeli odo susuga goweliso.

Esino odo eyo nediliyo pepooko deli odo ee sooloo dolone medee pidiliso,” diso.

<sup>7</sup> Esiga niba Godeeyo mudugiyopoo niso nediliyo pepooko dee osoloso o to mapoo mesimo silesibe. Osoloso Saitenso tokenee mapoo gido dilame gamenee taka ee ma kulodu kibiloso dobolone o to mapoo gowee. Bei, niyo egeeseega Saiten yo nimaga peegoo pulo dileiso.

<sup>8</sup> Esiga niba Godee mapoo hegi sibadee. Egeeseega Godee yinosee nima hegi sibileiso. Esiga tokenee odo niba edebeeyo o dee subugo hapili egeesi masi nibada tokenee maga Godee mapoo bidiga debee. Osoloso goo goolee bakadio gweli odo nibada goo goolee tokenee peegoo poogoloso, hedebe Godeeyo goo ee goolee.

<sup>9</sup> Esiga niba goomoga goo poogoloso see nibada goo tokenee mapoo goohele sabolo pupusugulone debee.

<sup>10</sup> Osoloso Godeeyo mudugiyopoo niso nediliyo pepooko dee. Egeeseega Godeeye niba dokodoo poudileiso.

### *Nemegei tei too odoowo goo maga to tokenee na takee*

<sup>11</sup> Esiga tei telaga odo emegei, nima kulodu nee odoowo goo maga to tokenee na takee. Niyo nee odoowo goo maga to tokenee takolone yo tokenee to daga, Godeeye tei magolone emegei sooloo dele dee taka goo ee tokenee deeso. Egeeseega Godeeye tei magoo mapoo medee kibiya koo dedeeso. Osoloso niso nediliyo tei magoo maga goo midili wiligi tebisa deeso.

<sup>12</sup> Esino iyo goo omapoo ogo. Hedebe Godeeye tei mageli odo doloso badolone



goo midili odoo doloso ka badoso. Godee hedebe yayo gie badeli pidili doloso badolone odoo susuga mapoo dibada tokenee eyo nei teneli doloso ka badoso. Esiga nayo nee odoowo goo ogoloso, no tokenee odoo dee takalai tekeponee.

*Godigi gooso peledabalai, iba gooleedele*

<sup>13</sup> Esiga odoo aboso egeesee takeliso, “Iba godigi mi abo mapoo dilesa sitowa moso togoloso dobolone dugo hedebe ma kulodu molee toowa talaiso,” deliso. Esiga to egeesee takeli odoo niba to hagee medee dui.

<sup>14</sup> Bei, niba godigi gooso peledabalai gooleedele. Nibada gie badeli ee dei i masi moloso. Bei, dei i moloso see saga guododili egeesee masi moloso.

<sup>15</sup> Esino niba wulo to hageesee takalai tekepo, “Godeeye goomogoga, iba dobolone goo hagee tolone dabalaiso,” dalaiso.

<sup>16</sup> Esino niba niso nediliyo dokodoo topolone niso talai goo ee takolone doso. Esiga eyo nediliyo dokodoo topeli ee goo tokenee.

<sup>17</sup> Esiga edebeeyo tekepo goo talai ee o goo goolee mapoo meleeno, goo ee telega poogooga, yo goo tokenee toso.

## 5

*Bi bei odoo oso bi mauwe odoo mapoo dala egee tenemolo eyo nei Godeeye tenelaiso*

<sup>1</sup> Bi bei odoo niba mo to dui! Niba goohele sabolo pupusugulone debee. Bei, nimapoo dala goo siboso.

<sup>2</sup> Esiga nibada bi susuga ee tokenee palaiso. Osoloso nibada kali bi babooso nalaiso.

<sup>3</sup> Nibada molee mosopoo mooloogoo magoo egee eyo mosoowe tokenee palaiso. Nibada molee tokenee pa oso, nibada tokenee goo ee ka eligiso. Esiga goo midilei biame omapoo nibada molee tokenee pa oso, niba dou masi nadalaiso. Esiga niba boobadaga odoo. Bei, niba

kasalame biame hamameedee ee bolone, bi bei mooloogoo maloso ka debeiyo?

<sup>4</sup> Esiga niba ege, niyo nibada tou teli odoo oso, nibada nei howo segei mapoo tou telagamo silesibume nei tenele. Esiga diayo nimapoo gowoolone, Godee mapoo pidilei goo maga pupusugulone doso. Esiga ibada Godee kitulugu toowa yayo diayo pupusiga melee goo ee olo duso.

<sup>5</sup> Egeesi ma kulodu niyo mi toowa hamapoo dobolone, bi bei doloso, niso goomoga goo ee tolone debeiso. Esiga niba be hu poopooloso kauwuga wooloomaloso nali niba be egeesi masi doso. Bei, niba niso goomoga goo sabolo niso nediliyo poopooloso kauwuga, goo midilei biame omapoo, be masi piligilame doso.

<sup>6</sup> Osoloso niyo tekepo odoo susuga ee goo midili mapoo iyado peleso dibada goo midiloso diba piligi deliso. Esino odoo hagee bia oso nimapoo goo koo moodeli.

*Dala ma kulodu dulone bolone medee kibiya debee*

<sup>7</sup> Esiga tei telaga odoo emegei, niba Lodeeye sibilei mapoo dulone bolone ka debee. Goo ee egeesi masi moloso, edebeeyo nei howo sogoloso howo sibabeleso baliso. Howo simi oso o nei howo segei pologa kakauwuloso ko pa oso telegabeleso baliso.

<sup>8</sup> Esiga nei howo segeli odoo oso o nei howo oso kakauwulame bali egeesi masi niba dulone bolone medee kibiya ka debee. Bei, Lodeeye sibilei olo koola too-booso.

<sup>9</sup> Esiga tei telaga odoo emegei, nee odoo mapoo takolone, “nibada tokenee oso ka see,” dee na goolee. Bei, niyo egeeseelone dogo, Godeeye nibada goo midiloso tokenee eyo nei tenelaiso. Esiga niba ege, goo midili odoo ee osulu miyopoo olo tobudoso.

<sup>10</sup> Esiga tei telaga odoo emegei, niba Godee maga to tolosa kokodo takomo sili odoo oso debei ogoloso, niba nose egeesi masi debee. Bei, diayo Godeeyo hu maga

to takomo silesibulone dala ma kulodu mesie sabolo debeliso.

<sup>11</sup> Esiga edebeeyo dala ma kulodu kibiya badoga, Godeeye yimapoo goomogolone badoso. Esiga niba Yobowo goo olo gooleedooso. Yo dala ma kulodu mesie goo sabolo medee kibiya badebeiso. Esem Godeeye yimapoo goomogolone, yimapoo goo moodoo olo duso. Bei, Godeeye odoo susuga sooloo dolone ka badoso.

<sup>12</sup> Tei telaga odoo emegei, goo toowa hagono medee dui! Niba tei goo takalame, Kei mi sabolo, osoloso mipoo toowa sabolo, osoloso bi abo sabolo hesigaloso tei na magee. Esiga odoo heeso nimapoo sibilesou hagee teye dee takooga, niyo goo egee talai goomogoga, yimapoo hedebe niyo goomoga goo ee takee. Osoloso niba goo egee talai gowooga, niyo hedebe gowe goo ee takee. Bei, niyo egeesee selega tei magooga, Godeeye nibada goo midiloso niba tokenee odoo dalaiso.

*Godee mapoo takeli goo ee kitulugu moloso*

<sup>13</sup> Esiga niyo debei ma kulodu, edebeeyo hegi goo mologa, yayo Godee mapoo takalai tekepo. Osoloso edebeeyo goomoga goo sabolo badoga, yayo goomoga kosaiya sabolo Godeeyo hu dokodoo poudoolone badalai tekepo.

<sup>14</sup> Osoloso nima kulodu edebeeyo paiye sabolo badoga, yayo sosee wiligi tebisa gilimadalai tekepo, diayo yimapoo sibilesou, Lodeeyo hu sabolo olipi iso sooloso, yo halo Godee mapoo takalame.

<sup>15</sup> Osoloso diayo tei toloso Godee mapoo takooga, paiye weidileiso. Bei, Lodeeye diayo Godee mapoo taka to ee duga, paiye ka weidoso. Egeesi ma kulodu, odoo yimapoo goo tokenee hee too mologa, omapoo Lodeeye hapoloso boobado bigileiso.

<sup>16</sup> Esiga niso nima kulodu, nibada goo tokenee ee yiligebuguloso howo gise goo oso nei takoo, nei takoo dolone ka debbe, Godeeye nima kulodu paigiga odoo egee do tekepo moodoolame. Bei, Godeeyo howo woola mapoo tekepo badeli odoo

oso Godee mapoo takeli goo ee diya kitulugu moloso.

<sup>17</sup> Esiga ibada amawe Ilaya yo iba egeesi masi badebeiso. Yayo howo sibilega pagalame dokodoo kibiya takeme, howo sibilega dugo bakadio hedebe di poogoloso a 6 poogooso.

<sup>18</sup> Osoloso yayo see howo sibilame, dokodoo kibiya takeme, howo see simiso. Esem nali bi segei see paladeeso.

<sup>19-20</sup> Esiga tei telaga odoo emegei, nima kulodu odoo hee oso tei goodee maga peegoo duga, odoo heeso yo see ido sibilei tekepo. Bei, niba goolee, edebeeyo emegei tokenee goo maga goo tekepo mapoo ido siboga, yo odoo egee kookaiyo moloso osee meli teli mapoo duga, o gie badeli pidilone ka seeso. Egeesega biame omapoo Godeeye o goo tokenee hapoloso boobado bigileiso.

# 1 Yonee To Yoneeye hogugu

## *1 Yonee booka goo eyo bei*

Gamenee goo eligili odoo oso sosee susuga mapoo eligimo silesibulone, Yesuye odoo su toloso mi hamapoo sile dee takomo silesibiliso. Osoloso diayo eligi eyo kulodu goo tokenee talai goo ee haga goo toowanee, dee takomo silesibiliso. Osoloso emegei pidilei sabolo haga goo toowanee deliso. Diayo eligi goo hageesi eligimo silesibume, Yesu o hamamee dili odoo hee, Yonee olo adaga poloso badolone, goo hagee ogoloso to hogugu hagee sosee susuga mapoo teneeso. Bei, Yonee goomegele tei telaga odoo sosee susuga mapoo egee do oso see gamenee goo eligili odoo oso eligi mapoo hamamee deedeeyaga. Esino diayo daga Kelisowo goo du ee medee kibiya toloso dabalame, yo goomogaso.

## *Yesu yo gie badeli teneli to oso*

<sup>1</sup> Iyo nimapoo gie badeli teneli to eyo goo hoguga. Goo ee daga bei mooloogoo mapoo yo badebeiso. Iyo o goo duloso ibada howoso yo tei egeiso. Osoloso ibada deeso yo sigeso.

<sup>2</sup> Gie badeli oso woola yiligebugume egeiso. Esiga iyo yo tei egeiso. Kookaiyo gie badeli yimapoo moloso, esiga iyo nimapoo woola ka taka. Yo daga Ma Godeebolo badebeiso. Osoloso yo imapoo yilige buguso.

<sup>3</sup> Esiga iyo duloso egei goo ee nimapoo ka taka, niyo ibolo hedebe dalame. Osoloso iba Ma Godee sabolo owolo Yesu Keliso sabolo hedebe doloso doso.

<sup>4</sup> Esiga iyo goo hamaga nimapoo osoloso imapoo goomoga goo oso kauwuloso malame, to hagee hoguguloso ka teneeso.

## *Godee yo gadeebugu*

<sup>5</sup> Esiga iyo Keliso maga du goo ee see nimapoo hagee yilige buguso. Goo ee,

Godee yo gadeebugu. Yimapoo neliga hee mauwe.

<sup>6</sup> Egeesi ma kulodu odoo susuga iyo takolone, iba Godee sabolo hedebe deliso doloso, see neliga ma kulodu silesiboga, iba wulo gamenee takooso. Esiga iba tei goo koo deedeeso.

<sup>7</sup> Esino Godeeye gadeebugu ma kulodu egee bado egeese badolone, iba see gadeebugu ma kulodu daga, oso tei telaga odoo iba susuga hedebe doloso dobolone ka salai. Egeeseega owolo Yesuwo sawo oso ibada tokenee susuga hapoloso tabigileiso.

<sup>8</sup> Egeesi ma kulodu iyo takolone, “Iba tokenee mauwe odoo,” dee takooga, iba iso nediliyo gamenee takooso. Esiga imapoo tei goo mauwe.

<sup>9</sup> Esino iyo ibada tokenee goo ee Godee mapoo yilige buguga, yayo ibada tokenee goo ee hapoloso boobado bigileiso, osoloso goo tokenee susuga hapoloso iba Godeeyo howo woola see medee teedee moodoolaiso. Bei, yayo o to kitulugu magoo ee dodolone, hooda hedebe tei goo moodoolaiso.

<sup>10</sup> Osoloso iyo takolone, “Iba tokenee goo koo teli,” dee takooga, iyo Godee yo gamenee takeli odoo dolone ka salai. Egeesi maga Godeeyo to oso ibada sooloo ma kulodu koo moloso.

## 2

### *Keliso ee iba pidili*

<sup>1</sup> Mawe dio ayo gooma, niyo goo tokenee teyaga, hogugu hagee nimapoo ka tonowa. Esino nima kulodu odoo heeso tokenee toga, niba goolee. Odoo heeso ima hodiokooga toboloso iba halo Godee mapoo takoomoloso, odoo ee medee teedee odoo Yesu Kelisoso.

<sup>2</sup> Esiga Kelisoye ibada goo tokenee maga taso. Egeesi maga goo tokenee susuga peegoo togobuguso, Godeeye imapoo nei tenelega pagalame. Esino hedebe ibada goo tokenee peegoo tabigilame tele. Haye, odoo susuga mipoo toowa mapoo debeli sabolo dibada tokenee peegoo tabigilame ka ta.

<sup>3</sup> Osoloso odoo susuga iyo Godeeye kokodo taka to mapoo mesimo silesiboga, iba yo gooleedooso doloso gooleedalaiso.

<sup>4</sup> Esino edebeeyo takolone, “Godee a gooleedooso,” dee takoloso, see yayo Godeeye kokodo taka to mapoo koo mesimo siloga, yayo wulo gamenee goo goolone ka seeso. Esiga odoo egeesi mapoo tei goo mauwe.

<sup>5</sup> Esino edebeeyo Godeeye kokodo taka to mapoo mesimo siloga, odoo egeesi masi oso o sooloo ma kulodu Godee gweli goo ee kauwuloso moloso. Osoloso iba goo egeesi maga iyo tei Godee sabolo hedebe di goo ee gooleedeliso.

<sup>6</sup> Goo ee edebeeyo takolone, “A Godee sabolo hedebe doloso badoso,” dee takooga, odoo yo Yesuye badebei egeesi masi badebee.

<sup>7</sup> Ayo gooma odoo, ayo nimapoo kokodo takeli to hoguguloso hagee tenee goo ee dianee. Esino niyo daga tei toloso kokodo taka to ee hagoso. Bei, kokodo takeli to nape hagee niso daga hoogoo olo duso.

<sup>8</sup> Esino kokodo takeli to nape hamapoo goo dia onosee moloso. Bei, goo dia tei ee Keliso ma kulodu osoloso nima kulodu eligiso. Goo egeesi maga neliga mauwe poogoomo dime, gadeebugu moloso.

<sup>9</sup> Odoo agayo takolone, a gadeebugu mapoo badoso doloso, tei too odoo hee gowooga, odoo ee neliga ma kulodu osee badoso.

<sup>10</sup> Esino odoo agayo emegei tei telaga odoo sooloo dologa, yo gadeebugu ma kulodu badoso. Esiga gadeebugu ee ma kulodu badolone, tei too odoo hee tokenee mapoo homodobilame moodoolaimo.

<sup>11</sup> Esiga ee ma kulodu odoo agayo tei too odoo gowoolone badoga, yo neliga ma kulodu badolone, eyo egee du eli koo ogoso. Bei, neliga goo oso o howo gooloogooga.

<sup>12</sup> Esiga mawe dio ayo gooma, ayo to hogugu hagee nimapoo ka tonowa.

Bei, nibada goo tokenee Yesu maga hapoloso boobado buguso.

<sup>13</sup> Osoloso adaga nimapoo to hogugu hagee ka tonowa.

Bei, niyo daga bei mooloogoo maga badebei odoo Yesu ee niba gooleedooso.

Osoloso see gie kakauwuga nimapoo to hogugu hagee ka tonowa.

Bei, niyo tokenee odoo Saiten sabolo ha too ee ma kulodu niyo olo dagadiso.

Osoloso mawe dio ayo see to hogugu hagee ka tonowa.

Bei, ibada ama Godee niba olo gooleedooso.

<sup>14</sup> Osoloso adaga nimapoo to hogugu hagee see ka tonowa.

Bei, niyo daga bei mooloogoo maga badebei odoo Yesu ee niba gooleedooso.

Osoloso gie kakauwuga nimapoo to hogugu hagee ka tonowa.

Bei, niba kitulugu odoo oso.

Osoloso Godeeyo to oso nima kulodu mologa, niyo tokenee odoo Saiten ee olo dagadilesodo.

### *Mi toowa hageeyo goo mapoo goomegeli goo*

<sup>15</sup> Esiga niba mi toowa hageeyo goo sabolo osoloso ee ma kulodu bi susuga egee molo mapoo haga na goomege. Edebeeyo mi toowa hageeyo goo mapoo diya goomogoga, o sooloo ma kulodu Ma Godee goolee goo ee mauwe.

<sup>16</sup> Esiga mi toowa hageeyo goo diya goomoga maga goo hagee peledabalaiso. Suso goomoga goo sabolo, osoloso mi toowa hageeyo kulodu bi egee molo ogoloso goomegeli goo sabolo, osoloso bi bei doloso badolone, si howeli goo sabolo. Esino goo susuga hagee Ma Godee maga koo sibili, esino mi toowa hagee eyo goo oso.

<sup>17</sup> Mi toowa hagee sabolo osoloso edebeeyo goomegeli goo susuga sabolo mauwe pagalaiso. Esino Godeeye goomoga goo tomo sili odoo ee badoboso kookaiyo osee badalaiso.

### *Keliso mapoo ha teli odoo*



<sup>18</sup> Mawe dio, biame hoo pagalai koola toobooso. Esiga Keliso mapoo ha teli odoos o sibilei goo ee nimapoo olo takaso. Esino Keliso mapoo ha teli odoos abo epedee olo peledabaso. Egeesi maga biame hoo pagalai koola tooboo doloso iba ka gooleedoso.

<sup>19</sup> Esino odoos hagee bia daga ibolo hodobo siloso see iba poogoloso diso. Bei, diba tei ibolo hedebe doloso debele. Diba tei ibolo hodobo debei diepi, iba poogoo dile pegeliyo. Esino diayo iba poogoloso di oso tei diayo ibolo hedebe delega poogoo goo ee ka yilige buguso.

<sup>20</sup> Esino nimapoo Kelisoye Dio Tei olo teneeso. Egeesi maga niba susuga tei goo ee olo gooleedooso.

<sup>21</sup> Esiga ayo nimapoo hoguguloso epedee hagee tenee goo ee niyo tei goo gooleedelega doga koo seeso. Esino tei goo ee niba olo gooleedooso. Bei, tei goo ee ma kulodu gamenee takeli goo mauwe.

<sup>22</sup> Osoloso gamenee takeli odoos ogumo? Edebeeyo Yesu yo Kelisonee dee takooga, odoos ee gamenee takeli odoos oso. Esiga yo Keliso mapoo ha teli odoos oso. Bei, odoos hagoso Yesu yo Kelisonee dee takooga, yo Ma Godee sabolo osoloso owolo Yesu mapoo gowoolone miligi piaso.

<sup>23</sup> Esiga odoos agayo Godeeyo owolo Yesu mapoo gowoolone miligi piaga, yo Ma Godee sabolo hedebe doloso koo badoso. Esino edebeeyo Godeeyo owolo Yesuwo goo woola yilige buguga, yo Ma Godee sabolo hedebe doloso badoso.

<sup>24</sup> Esiga to tekepo daga niyo du mapoo tei tolos ka debee. To oso nibada sooloo ma kulodu mologa, Ma Godee sabolo osoloso owolo Yesu sabolo hedebe doloso dabalaiso.

<sup>25</sup> Esiga Kelisoye imapoo kookaiyo badoboso gie badeli tenelame to kitulugu ma gooso.

<sup>26</sup> Osoloso odoos aboso gamenee eligi goo eligimo silesiboga, ayo epedee o goo ee hoguguloso nimapoo ka tonowa.

<sup>27</sup> Esino nimapoo Kelisoye Dio Tei olo teneeso. Osoloso Dio Tei oso nibada kulodu badolone, niba ka eligimoloso. Es-

iga odoos heeso tei goo eligilei niba koo goomogoso. Bei, Dio Tei oso niba tei goo susuga olo eligimoloso. Esiga yayo eligi ee ma kulodu, tei goo ee eligilone, gamenee goo koo eligiso. Esiga niba Dio Tei oso eligi goo mapoo dodolone, Yesu sabolo hedebe doloso osee debee.

### *Godeeyo owolo dio*

<sup>28</sup> Esiga mawe dio ayo gooma, niba Keliso sabolo hedebe doloso osee debee. Egeesee seega yayo simi mapoo o mudugiyopaga kitulugu sabolo ebilega tebisileiso.

<sup>29</sup> Godee yo goo tekepo moodeli niba gooleedooso. Osoloso niba gooleedooso, goo tekepo tomo sili odoos ee Godeeyo owolo dio doloso doso.

## 3

<sup>1</sup> Esiga ibada Ama Godeeye iba susuga diya sooloo dala goo toowa goo ee medee goolee! Yayo sooloo dala maga iba yayo owolo dio deliso. Esiga iba tei owolo dio doloso doso. Esino mi toowa goomegeli odoos oso Godeeyo goo diba gooleedele. Goo egeesi maga diba ibada goo gooleedele.

<sup>2</sup> Esiga emegei, iba Godeeyo owolo dio doloso doso. Esino iba medee gooleedele, iyo hamamee dabalai goo ee. Esino iba gooleedooso, Keliso siboga, iba see yo masi palaiso. Bei, iyo tei yo agalaiso.

<sup>3</sup> Esiga edebeeyo goo hamapoo bolone dulone badoga, odoos oso tokenee mauwe Keliso masi badalai tekepo.

<sup>4</sup> Esiga edebeeyo goo tokenee tomo siloga, yayo Godeeyo tei magoo gabagamo siloso. Bei, tokenee goo ee tei magoo gababili.

<sup>5</sup> Niba olo gooleedooso, Kelisoye simi ee odoos susuga ibada tokenee hapoloso boobado bigilame ka simi. Bei, yimapoo tokenee hee mauwe.

<sup>6</sup> Edebeeyo Keliso sabolo hedebe doloso badoga, yo tokenee goo osee tomo sileime. Esino edebeeyo tokenee goo osee tomo siloga, Kelisowo goo yo gooleedele, osoloso yimapoo tei tele.

<sup>7</sup> Mawe dio ayo gooma, niba obeeyamo, odo aboso eligi maga niba peegoo na gilimado di dee. Goo tekepo teli odo ee Godeeyo howo woola tekepo badoso. Esiga yo Kelisoye Godeeyo howo woola tekepo egee bado yinosee egeesi badoso.

<sup>8</sup> Esino edebeeyo goo tokenee tomo siloga, yo Saiteneeyo odo. Bei, Saiten yayo daga bei mooloogoolone tokenee odo doloso badebei osee osee badoso. Esiga Godeeyo owoloye Saitenso tou teli ee guobigilame ka simi.

<sup>9</sup> Osoloso edebeeyo Godeeyo owolo doloso badoga, yo goo tokenee osee tomo sileime. Bei, Godeeyo tei gie badeli yima kulodu moloso. Esiga yayo see goo tokenee tomo silei tebile. Bei, yo Godeeyo owolo.

<sup>10</sup> Esiga goo hageesi maga iyo Godeeyo owolo dio sabolo osoloso Saiteneeyo owolo dio sabolo medee kibiya ka gooleedoso. Odo agayo tekepo goo telega poogooga, yo Godeeyo owolonee. Osoloso tei too odo sooloo delega poogooga, yo Godeeyo owolonee.

### *Nei sooloo dolo, nei sooloo dolo dalai*

<sup>11</sup> Daga eligi goo niyo du hagoso. Esiga iyo nei sooloo dolo, nei sooloo dolo dolone dabalai tekepo.

<sup>12</sup> Esiga niba Keineeyo goo na peedee. Bei, yo Saiteneeyo odo doloso badolone, omolo wooloomaso. Bei kasalame Keineeye omolo ka wooloomayo? Bei, Kein yo goo tokenee tomo sili, esino omoloye Godeeyo howo woola goo tekepo tomo sili.

<sup>13</sup> Esiga tei telaga odo emegei, tei tele poogoo mi toowa mapoo debeli odo oso niba hegioga, haga na goolee.

<sup>14</sup> Osoloso iba gooleedooso, iyo tei telaga odo sooloo dologa, iba teli maga see gie badeli mapoo dabagaso. Esino odo agayo yimapoo sooloo dala goo mauwe daga, yo ta masi osee badoso.

<sup>15</sup> Osoloso odo agayo tei telaga odo hegioga, yo odo wooloomali odo oso. Esiga niba olo gooleedooso, odo wooloomali odo ee dibada kulodu kookaiyo badoboso gie badeli mauwe.

<sup>16</sup> Goo hamaga tei sooloo deli goo ee ka gooleedoso. Yesu Kelisoye iba halo o su teli mapoo magooso. Esiga iba nose tei too odo ee halo, ibada gie badeli peegoo magalai tekepo.

<sup>17</sup> Odo yimapoo bi teiba oso tei too odo bi mauwe badoga ogoloso, yo pidi-lega poogooga, o sooloo ma kulodu Godee goolee goo mauwe.

<sup>18</sup> Mawe dio emegei, iyo emegei sooloo dolo doloso wulo toso takalai tekeponee. Esino suso pidilone tei sooloo dalai tekepo.

### *Godeeyo howo woola ebilega kitulugu sabolo dabalai*

<sup>19-20</sup> Esiga iyo emegei sooloo dologa, egeesi maga iyo tei Godeeyo owolo doloso do goo ee gooleedalaiso. Esino ibada sooloo maga goolee oso takolone iba tokenee odo, dee takooga, iba ebileime. Esino iba Godeeyo howo woola ebilega kitulugu sabolo dabalaiso. Bei, Godee yo toowa osoloso yayo ibada sooloo oso goolee dagadiso, osoloso goo susuga iyo moodeli yo gooleedoo.

<sup>21</sup> Esiga tei telaga odo emegei, ibada sooloo maga goolee goo oso takolone, iba tokenee odo, dee koo takooga, iba ebilega poogoloso Godeeyo howo woola dabalaiso.

<sup>22</sup> Egeesi ma kulodu iyo yimapoo woosaga, yayo goo ee imapoo tenelaiso. Bei, iyo yayo kokodo taka to mapoo mesiliso, osoloso yayo goomoga goo ee tomoloso.

<sup>23</sup> Esiga yayo kokodo takolone egeesee takaso, “Niba Godeeyo owolo Yesu Keliso mapoo tei te. Osoloso yayo eligi ee dodolone, emegei nei sooloo dolo, nei sooloo dolo dolone debee,” diso.

<sup>24</sup> Edebeeyo Godeeye kokodo taka to mapoo mesilone dodomo siloga, diba yibolo hedebe doloso badoso. Osoloso nei Godee dibolo hedebe doloso ka badoso. Osoloso iba gooleedooso, Godee ibolo hedebe doloso badoso. Bei, yayo o Dio Tei imapoo teneloso badoso.

## 4

*Eligi goo susuga medee ege*

<sup>1</sup> Tei telaga odoo emegei, niba obeeyamo. Bei, gamenee goo eligili odoo bei mipoo toowa hamapoo olo silesiboso. Esiga odoo heeso sibilesa takolone, “Ayo eligi goo hagee eligimo silo Dio Tei maga siboso,” dee takooga, o to duloso yimapoo saga tei na te. Esino niyo yayo egee eligimo silo tei Godee maga sibabeleso, medee hoodo ege.

<sup>2</sup> Esino niba diayo eligi eyo kulodu Godeeyo Dio Tei hageesee gooleedalaiso. Diayo eligi oso takolone Yesu Godee maga sibilesa odoo poloso mi hamapoo badebeiso daga, oso diayo eligi goo ee tei Godee maga siboso.

<sup>3</sup> Esino odoo agayo takolone Yesu Godee maga sibilesa odoo ka pele, dee takooga, yayo eligi goo ee Godee maga sibile. Odoo ee ma kulodu Keliso mapoo ha teli dio tokenee badoso. Esiga Keliso mapoo ha teli dio tokenee mipoo toowa hamapoo sibileisogo dee takeme dumelee ee olo sibilesa badoso.

<sup>4</sup> Mawe dio emegei, niba Godeeyo owolo dio doloso doso. Esiga niyo gamenee goo eligili odoo oso eligi duloso o to mapoo tei tele poogoo oso, niyo diba dagadiso. Bei, odoo susuga ibada kulodu Dio Tei egee bado oso kitulugu oso tei tele poogoo mi toowa mapoo debeli odoo dima kulodu dio egee bado oso kitulugu ee dagadiso.

<sup>5</sup> Gamenee goo eligili odoo hagee bia Godee gooleede. Esiga biame susuga silesibulone mi goo ee eligimo silesibili. Osoloso mi odoo Godee gooleedele poogoo oso dibada to mapoo medee duliso.

<sup>6</sup> Esino iba Godeeyo odoo doloso doso. Esiga tei Godeeyo odoo oso ibada to medee duliso. Esino Godeeyo owolonee oso ibada to ee medee koo duli. Goo egeesi maga Dio Tei sabolo gamenee takeli dio sabolo medee hoodo agalaiso.

<sup>7</sup> Tei telaga odoo emegei, iyo emegei nei sooloo dolo, nei sooloo dolo dolone dabalai tekepo. Bei, sooloo deli goo ee Godee maga sibili. Esiga odoo agayo emegei sooloo dologa, yo Godeeyo owoloso, osoloso yo Godee gooleedooso.

<sup>8</sup> Esino odoo agayo emegei sooloo del-ega poogooga, yo Godee gooleede. Bei, Godee yo sooloo deli.

<sup>9</sup> Esiga Godeeye iba sooloo dala goo ee yebugulone owolo hedebe mipoo toowa hamapoo meiyee diso, iyo yimaga kookaiyo badoboso gie badeli talame.

<sup>10</sup> Esiga tei sooloo deli goo hagoso. Iyo Godee sooloo deli goo osonee. Esino Godeeye iba sooloo dolone owolo meiyee diso, ibada goo tokenee maga talame, osoloso goo tokenee susuga peegoo togobigilame.

<sup>11</sup> Tei telaga odoo emegei, Godeeye iba diya egeesee sooloo dalaso. Esiga iyo emegei nei sooloo dolo, nei sooloo dolo dolone dabalai tekepo.

<sup>12</sup> Edebeeyo Godee egele. Esino iyo emegei nei sooloo dolo, nei sooloo dolo dolone daga, Godee ibolo hedebe doloso badoso. Osoloso yayo sooloo dala oso ibada kulodu kauwuloso malaiso.

<sup>13</sup> Esiga Godeeye o Dio Tei imapoo teeneso. Egeesi maga iba gooleedooso, iba Godee sabolo hedebe doloso badoso, osoloso Godee ibolo hedebe doloso ka badoso.

<sup>14</sup> Osoloso Ma Godeeye owolo mipoo toowa hamapoo meiyee diso, yayo mi odoo oso gie badeli ee pidilone badalame. Osoloso iyo goo hagee ogoloso ka takomo silesiboso.

<sup>15</sup> Esiga odoo agayo takolone, Yesu Godeeyo owolo dee takooga, Godee yibolo hedebe doloso badoso, osoloso yinosee Godee sabolo hedebe doloso badoso.

<sup>16</sup> Godeeye iba diya toowa sooloo dala goo ee olo gooleedooso. Esiga iyo Godeeye iba sooloo dala goo mapoo tei toloso kibiya ka doso.

Godee yo sooloo deli. Esiga odoo agayo sooloo dolone badoga, yo Godee sabolo hedebe doloso badoso, osoloso nei Godee yibolo hedebe doloso badoso.

*Godeeye sooloo deli*

<sup>17</sup> Iba goo midilei biame mapoo ebi-lega kitulugu sabolo dabalame, Godeeye sooloo deli goo ee toowa poloso imapoo teneeso. Bei, iba Keliso masi mi hamapoo ka doso.

<sup>18</sup> Edebeeyo Godeeye yo sooloo deli goo ee gooleedoo daga, yo ebileime. Esiga sooloo deli goo toowa poloso egee molo oso ebili goo habigileiso. Esino iba Godeeye ibada tokenee eyo nei tenelai mapoo obuga, yayo sooloo dala goo ee imapoo kauwule.

<sup>19</sup> Iba susuga dobolone sooloo deliso. Bei, Godeeye daga malalo iba sooloo dalaga.

<sup>20</sup> Osoloso odoo heeso takolone, “A Godee diya gweliso,” doloso see tei too odoo heiga sabolo badoga, yo gamenee takeli odoo oso. Bei, odoo egeesi masi oso tei too odoo yayo egeli sooloo del-ega badoga, yo Godee koo egeli kasee goolaiyo?

<sup>21</sup> Kokodo takeli to hagee Godeeye imapoo olo teneeso. Odoo agayo Godee diya gooleega, emegei tei too odoo sabolo diya sooloo dalai tekepo.

## 5

### *Godeeyo owolo mapoo tei talai goo*

<sup>1</sup> Esiga edebeeyo tei tolone Yesu Godeeye hesia Keliso daga, yo Godeeyo owolo oso. Osoloso odoo agayo Ma Godee gooleega, yo Godeeyo owolo dio sooloo doloso.

<sup>2</sup> Iyo Godee diya goolone, yayo kokodo taka to mapoo mesiloso silesiboga, oso iyo Godeeyo owolo dio sooloo dala goo ee gooleedoso.

<sup>3</sup> Bei, iyo Godee gweli goo eyo bei hagoso. Iyo yayo kokodo taka to mapoo mesiloso silesibileiso. Osoloso yayo kokodo taka to ee imapoo haga kodianee.

<sup>4</sup> Esiga Godeeyo owolo dio oso diayo tei too maga mi goo oso kitulugu ee dagadilesos doso.

<sup>5</sup> Esiga odoo agayo mi goo sabolo ha too kitulugu ee ka dagadiyo? Edebeeyo Yesu Godeeyo owolo dolone tei toga odoo

oso, mi goo sabolo ha too kitulugu ee dagadilesos badoso.

### *Kookaiyo gie badeli Yesu mapoo moloso*

<sup>6</sup> Osoloso Yesu mi hamapoo sibilesos, Godeeyo owologo dalame howo oluguso. Osoloso homo bulubo magoo mapoo tolone o sawo sologo buguso. Esiga Yesuye mi hamapoo simi ee hedebe howo olugulame sibile. Esino howo olugulosos sawo sologobigilame ka simi. Osoloso Dio Tei oso tei goo hagee imapoo takooso. Bei, Dio Tei oso hedebe tei goo ee takemeliso.

<sup>7</sup> Esiga goo bakadio hedebe di hagoso Kelisowo goo ka eligiso.

<sup>8</sup> Goo ee Dio Tei, osoloso howo olugu, osoloso sawo sologo bugu goo oso imapoo Kelisowo goo ka yilige buguso. Ee ma kulodu goo bakadio hedebe di oso goo hedebe eligiso.

<sup>9</sup> Esiga edebeeyo egei goo ee imapoo yilige buguga duloso, iba tei teliso. Esino ee ma kulodu Godeeye imapoo egee takoo goo diya toowa. Esiga iyo duloso medee kibiya kookoodalai tekepo. Bei, yayo imapoo owolowo goo ee tei goo takaso.

<sup>10</sup> Esiga odoo agayo Godeeyo owolo mapoo tei toga, Godeeye owolowo goo maga tei goo taka to mapoo o sooloo ma kulodu tei too osee moloso. Esino odoo agayo Godeeye owolowo goo mapoo tei goo taka to mapoo tei telega poogoo odoo oso Godee gamenee takeli odoo, deliso.

<sup>11</sup> Esiga Godeeye imapoo owolowo goo mapoo tei taka to hagoso. Godeeye imapoo badoboso kookaiyo gie badeli teneeso. Gie badeli egee owolo Yesu maga imapoo ka teneli.

<sup>12</sup> Osoloso edebeeyo owolo Yesu mapoo tei toga, yimapoo gie badeli egee olo moloso. Esino odoo agayo Godeeyo owolo mapoo tei telega poogooga, yimapoo gie badeli egee mauwe.

### *Yoneeye to hamameedee taka*

<sup>13</sup> Esiga ayo Godeeyo owolo mapoo tei telaga odoo nimapoo to hogugu susuga hagee ka tonowa, niyo badoboso kookaiyo gie badeli too goo ee gooleedalame.



<sup>14</sup> Esiga iba gooleedooso, iyo Godee yimapoo takolone iyo goomoga goo ee yayo goomoga goo sabolo tobuloso woosaga, yayo ibada to duleiso.

<sup>15</sup> Egeesi ma kulodu yayo iyo yimapoo taka duso doloso, ogoo goo yimapoo woosaga, yayo goo ee imapoo teneliso.

<sup>16</sup> Esiga edebeeyo emegei tei too odooso telega pagalai tokenee tomolo ogoga, yayo Godee mapoo takalai tekepo, Godeeye o gie badeli pidilame. Esiga ayo hagee takoo goo ee, odoo teli mapoo koo ido dili goo ee taka. Esino teli mapoo ido dili goo tokenee moloso. Esiga ayo hagee takoo goo ee, teli mapoo ido dili goo tokenee teli odoo ee halo Godee mapoo takalame ayo koo takooso.

<sup>17</sup> Tekepo goonee susuga egee, tokenee goo oso. Esino tokenee susuga oso teli mapoo koo ido dili.

<sup>18</sup> Esiga iba gooleedooso, edebeeyo Godeeyo owolo doloso badoga, yo goo tokenee osee tomo sileime. Bei, Godeeyo owolo Yesu yayo yo medee bamoloso. Osoloso tokenee odoo Saitenso yo tokenee palaime.

<sup>19</sup> Esiga iba gooleedooso, iba Godeeyo owolo dio. Esino imaga mi toowa ma peegoo egee do Saitenso bamoloso.

<sup>20</sup> Osoloso see iba gooleedooso, Godeeyo owolo olo simiso. Osoloso yayo imapoo goo gweli medee tekepo olo teneeso, iyo tei Godee gooleedalame. Esiga iyo tei Godee sabolo, osoloso owolo Keliso sabolo hedebe doloso doso. Esiga Yesu tei Godeeso. Osoloso kookaiyo badoboso gie badeli yimaga imapoo ka teneli.

<sup>21</sup> Esiga mawe dio emegei, niba medee badolone gamenee godee maga peegoo dooboobigi.

## 2 Yonee Yoneeye to see tobu hogugu

### *2 Yonee booka goo eyo bei*

Daga Godeeyo to eligimo silone, odo eligimo silesibili oso mi hee maga hee mapoo du. Osoloso mi hee maga hee mapoo du domo silesibulone, Godeeyo to takomo silesibiso. Osoloso mi ee ma kulodu tei telaga odo oso diba medee pidiso. Esino Godeeyo to takomo silesibili odo mooloogoodoo ee ma kulodu gamenee goo eligili dibada mooloogoodoo onosee silesibiso. Esem diye di odo Yoneeye goo hagee ogoloso tei telaga odo oso gamenee goo eligili odo pidiyaga to hagee ka hogugu.

<sup>1-2</sup> Esiga tei telaga odo nibada amawe ayo Godeeye hesia wee osoloso owolo dio mapoo to hogugu hagee ka teneeso. Ayo niba diya gooleeso. Hebebe ayo niba diya koo gooleeso. Esino tei goo gooleedo odo susuga sabolo niba diya goolone doso. Bei, tei goo ee ibada sooloo ma kulodu egee molo oso imapoo kookaiyo moloso osee malaiso.

<sup>3</sup> Ayo Godee mapoo takooso, Ma Godeeye owolo Yesu Keliso sabolo oso odo susuga iba sooloo dolone pidilame, osoloso imapoo mesie goo tenelame. Bei, iyo tei goo mapoo tei toloso emegei sooloo dala sabolo doso.

<sup>4</sup> Esiga nee holaiso aboso Ma Godeeye kokodo taka to mapoo tei toloso dodomo di duloso a diya goomogaso.

<sup>5</sup> Osoloso wee emegei, to hogugu hagee namapoo dianee. Esino iyo daga du sooloo deli goo ee see ka hoguga. Esiga iyo dobolone emegei nei sooloo dolo, nei sooloo dolo dolone dabalai tekepo.

<sup>6</sup> Esiga sooloo deli goo eyo bei hagoso. Iyo Godeeye kokodo taka to ee medee dadalai tekepo. Bei, niyo Godee diya goolee sabolo dobolone emegei nei sooloo dolo, nei sooloo dolo dolone dabalai tekepo. Esiga niba daga hoogoo goo hagee olo duso.

<sup>7</sup> Esiga gamenee goo eligili odo bei oso mipoo toowa hamapoo silesiboso. Odo egee bia oso silesibulone, Yesu Kelisoye tei odo poloso mi hamapoo silee goo ee koo eligili. Osoloso odo agayo goo hageese eligimo siloga, yo gamenee goo eligili odo oso, osoloso yo Keliso mapoo ha teli odo oso.

<sup>8</sup> Esiga niba medee debee, gamenee goo eligili eyo to mapoo tei tolone, Godee maga nei telega peegeeyaga. Esiga niyo tou toowa too eyo nei talame, medee kibiloso ka debee.

<sup>9</sup> Osoloso edebeeyo Kelisoye eligi kibiya kookodelega poogoloso, see eligi hee mapoo yayo diya kookoodoga, yo Godee sabolo hedebe doloso koo badoso. Esino odo agayo Kelisoye eligi kibiya kookoodoga, yo Ma Godee sabolo osoloso owolo Keliso sabolo hedebe doloso badoso.

<sup>10</sup> Esiga odo agayo Kelisoye eligi goo ee eligimo sibilega, see eligi hee eligimo siboga, emegei doloso nibada mosopoo na ido di.

<sup>11</sup> Bei, odo agayo odo hageesi masi sabolo emegei daga, yayo o tou tokenee too sabolo hedebe deeso.

<sup>12</sup> Ayo nimapoo takalai goo abo moloso. Esino wulo to hogugu oso nimapoo takalai a koo goomogo. A mawo nimapoo sibilesi nibolo hodobo to kalai ee a goomogoso. Osoloso ayo omapoo siboga, iyo hodobo goomoga poudileiso.

<sup>13</sup> Esiga Godeeye hesia noomoo eyo holaiso diayo emegei di to namapoo ka taka.

## 3 Yonee Yoneeye to see bakadio hedebe di hogugu

### *3 Yonee booka goo eyo bei*

Yoneeye to hogugu hagee tei too odo Gaiyus mapoo teneeso. Bei, Gaiyuseeye Godeeyo to eligimo silesibili odo oso o mi mapoo sibume, yayo pidi goo ee dume. Osoloso sosee wiligi odo taba Dioteles mapoo yayo gowe to hamapoo hoguguso. Bei, odo hagoso Godeeyo to eligimo silesibili odo pidilei gowoolone odo aboso diba pidiyaga hamaga takeliso.

<sup>1</sup> Ayo gooma odo Gaiyus, tei telaga odoowo namawe ayo no diya gweli namapoo to hogugu hagee ka tonowa.

<sup>2</sup> Ayo gooma odo, a tei toso, no pai-lega medee tekepo bado malaiso. Esino ayo no halo Godee mapoo takooso, nayo goo susuga ee ma kulodu medee tekepo badalame. Esino a gooleedooso, no tei too ee ma kulodu tekepo badoso.

<sup>3</sup> Osoloso tei telaga odo emegei aboso sibilesi, nayo tei goo mapoo kibiya kookoodoloso osee dodomolo goo ee takeme duloso, a diya goomogaso.

<sup>4</sup> Esiga goo abo toowa oso amapoo goomoga toowa koo teneli. Esino mo awe diayo tei goo ee deedeega ogoloso, a diya goomegeliso.

<sup>5</sup> Ayo gooma odo, nayo to tekepo eligimo silesibili odo oso eligimo silone, nee mi mapoo odo soo masi siboga, nayo egee pidi goo ee tekepo.

<sup>6</sup> Osoloso diayo sibilesi nayo sooloo dala goo sabolo bado goo ee ibada sosee hamapoo sibilesi takaso. Godeeyo to eligimo silesibili oso nee mi mapoo sibilesi see dilame doboome, diayo eli domopoo nalai nei dimapoo tenelone, Godeeye goomoga goo sabolo tobuloso tenee.

<sup>7</sup> Bei, diba Keliso halo, tou tomo silesi-bulone, tei tele poogoo odo maga bi koo teli.

<sup>8</sup> Esiga Gaiyus no asalo diba medee pidilei tekepo. Iyo odo hagee bia pidiga, diayo to tekepo eligimo silesibili sabolo hedebe doloso dabalaiso.

<sup>9</sup> Osoloso ayo goo hamaga sosee omapoo to hoguguloso olo teneeso. Esino Dioteleseseeye to ee duloso mesile. Bei, nima kulodu sosee mapoo yayo wiligi doloso badalame diya goomogaso.

<sup>10</sup> Esiga ayo siboga, yayo goo tokenee teli sabolo osoloso ibada goo maga gamenee taka goo ee woola yilige bigileiso. Osoloso yo goo hedebe egee moodele. Esino yayo Godeeyo to eligimo silesibili o mi mapoo siboga, hamaga takeliso. Osoloso see sosee odo oso Godeeyo to eligimo silesibili odo ee pidiyaga, yayo hamaga takeliso. Esino ee ma kulodu yayo taka tei telega poogoloso, sosee odo abo oso Godeeyo to eligimo silesibili odo pidiga, yayo diba sosee maga peegoo mageliso.

<sup>11</sup> Esiga ayo gooma odo, tokenee odo eyo goo ogoloso o goo ma malo na peedee. Esino goo tekepo hedebe ee temelee. Odo agayo goo tekepo ee tomologa, yo Godee sabolo hedebe doloso badoso. Esino odo agayo tokenee goo tomologa, yo Godee gooleedele.

<sup>12</sup> Esiga odo susuga oso Demetiliyus odo eyo goo tekepo deliso. Osoloso o suso tou too oso tei goo sabolo tebiliso. Osoloso iba nosee yo tekepo odo dee takeliso. Esiga no olo gooleedooso, iba tei goo hedebe ee takeli.

<sup>13</sup> Ayo namapoo goo abo takalai moloso. Esino wulo to hogugu oso namapoo takalai a koo goomogo.

<sup>14</sup> A mawo namapoo sibilesi nobolo hodobo to kalai a goomogo.

<sup>15</sup> Esiga ayo Godee mapoo takooso, Godeeye namapoo mesie goo tenelame. Osoloso nee odo diayo namapoo dibada emegei di to takaso. Esiga nei nayo ibada odo omapoo egee do mapoo, ibada emegei di to dimapoo takee.

## Yuda Yudaye to hogugu

### *Yuda booka goo eyo bei*

Yuda booka hoguguli odo hagee Yesuwo omolo Yuda oso malaiso. Esiga yayo tei telaga odo susuga mapoo pidi to hagee hoguguloso teneeso, diayo gamenee goo eligi mapoo tei teyaga. Bei, gamenee eligili odo oso tei telaga odo ee peegoo gilimado di ogoloso.

<sup>1</sup> A Yuda, Yesu Kelisowo tou teli odo, osoloso Yemeseeyo omolo. Ayo Ma Godeeye hesia odo nimapoo to hogugu hagee ka tonowa. Bei, Ma Godeeye niba sooloo deliso, osoloso Yesu Kelisoye niba medee ka bamoloso.

<sup>2</sup> Ayo Godee mapoo taka, yayo sooloo deli goo sabolo, osoloso mesie goo sabolo, osoloso Godeeye niba gweli goo oso nimapoo toowa doloso ka malame.

### *Gamenee goo eligili odo dia goo maga kokodo taka*

<sup>3</sup> Tei telaga odo emegei, iyo Godee maga gie badeli pidili too goo ee ayo olo daga nimapoo hoguguloso tenelame diya goomogaso. Esino ayo goo hee maga to hogugu hagee ka tonowa. Godeeye opusomo dee koo seli tei goodee eligi ee o odo imapoo teneeso. Esiga tei goodee eligi egee odo aboso see opusomo diyaga, niyo medee bamelee.

<sup>4</sup> Bei, gamenee eligili odo oso tei telaga odo masi nibada mooloogoodoo ma kulodu galaga sibilesi nibolo hodobo ka doso. Esiga odo hagee biaso eligilone, Godeeye iba sooloo dolone pidilone, iyo goo tokenee talai koo hamaga takeli doloso eligiliso. Osoloso adaba sobo sabolo giso sabolo goo heli talai ee tei mauwe deliso. Osoloso see diayo ibada

wiligi odo Lodee Yesu Keliso mapoo goweliso. Osoloso odo hagee biaso Godee mapoo mesilega silesibiliso. Esino Godeeye odo hagee bia dia goo maga goo midilame daga hoogoo to olo edidi magooso.

<sup>5</sup> Egeesi ma kulodu ayo goo niso gooleedo ee see nimapoo medee eligilei, a goomogo. Esiga niba goolee, Godeeye Isalael odo pidilone, Isipi mi maga peegoo gilimado diso. Esino see hamamee Isalael odo abo yimapoo tei tele poogoo odo ee yayo piliguso.

<sup>6</sup> Osoloso niba goo hee hagee goolee. Godeeyo momaiye aboso kitulugu Godeeye dimapoo tenee sabolo tou talai goomegelega, wulo see abaga kitulugu toowa talai ee goolone, mi Godeeye dimapoo tenee ee poogoloso diyadeeso. Esem Godeeye diba ki ti moloso kookaiyo osee meli oso tiegisaloso wulu neliga poogoo mapoo huyasoloso doso, biame hamameede mapoo dia goo ee ka midilame.

<sup>7</sup> Osoloso Sodom mi sabolo, osoloso Gomola mi sabolo, osoloso mi pepuso abo koola omapoo bumodi dibada goo ee, niba goolee. Momaiyeso goo tokenee too egeesi masi diayo tooso. Bei, mi omapoo adaba sobo sabolo giso sabolo heli teli goo tokenee oso molone, gisoso emegei giso sabolo goo heli teliso. Esiga Godeeye dibada mi ee douso nadalame dou toosooso. Odo egee bia dimapoo, osoloso momaiye egee bia dimapoo peledaba goo oso, Godeeye goo tokenee teli odo dia goo tokenee eyo nei dala dimapoo tenelai goo ee eligiso. Dala goo hagee kookaiyo moloso osee meli Dou mi ee takooso.

<sup>8</sup> Egeesi maga gamenee eligili odo hagee bia onosee egeese seliso. Diayo dia sapootieli ee Godee maga sibili dolone, ee dodolone, dia suso goo tokenee teliso. Osoloso diayo Godee mapoo mesilega dobolone, Godeeyo momaiye susuga eyo goo maga to tokenee takeliso.

**1:1:** Mat 13:55    **1:4:** Gal 2:4; 2Pita 2:1    **1:5:** Exo 12:51; Num 14:29-30    **1:6:** 2Pita 2:4    **1:7:** Gen 19:1-25; 2Pita 2:6, 10    **1:9:** Dan 10:13, 21; 12:1; 2Pita 2:11; Yili 12:7; Zec 3:2    \* **1:9:** *Maikol dio Saiten dio toso agadiga* - Moses teme, Godeeye Maikol mapoo takolone, Moses tayo kou todilesi midoose, diso. Esino Saitenso Maikol dio toso agadilone egeese takaso, "Amapoo kitulugu moloso, Moses tayo kou todilei. Bei, Moseseeye Isipi odo hee woolooma maga," diso. Esino Maikoleeye Moses tayo kou ee Saiten mapoo tenelai goodoogaso.



<sup>9</sup> Esino momaiye susuga dia wiligi odoo Maikoleeye Saiten sabolo Moses ta eyo kou maga toso agadiga\* omapoo, yayo Saiten mapoo to tokenee hee takele. Esino yayo wulo Saiten mapoo egeesee takaso, "Godeeye namapoo nei dala tenelaiso," diso.

<sup>10</sup> Esino gamenee goo eligili odoo hagee biaso goo diayo gooleedele poogoo maga to tokenee takeliso. Osoloso diba gala seebeeso dieso goomoga goo teli egeesi masi doso. Esiga dieso goomoga goo ee tolone egee do ogoso diba tokenee peliso.

<sup>11</sup> Esiga diba dala talaiso! Bei, diayo Keineeyo goo deede magaa. Bei, Keineeye omolo woolomaso. Osoloso diayo Balameeyo goo\* ee dodolone, molee talame goolee maga tokenee tolone ka doso. Osoloso diayo Kolayo goo\* ee dodolone, Godeeyo to mapoo mesilega doso. Esiga Godeeye diba tokenee palaiso.

<sup>12</sup> Esiga niyo emegei sooloo deli wo ne\* ee ma kulodu odoo hagee biaso dieso nediliyo diba ono diya goolone, similega wo nalagaliso. Goo egeesi maga diba bi subugobolo masi dobolone, niyo debei ee tokenee polone ka doso. Osoloso osoko biame mapoo howo hemiye mologa, howo sibilega pooso guobigili diba egeesi masi doso. Osoloso diba homo su oso ko peli biame mapoo ko pelega pegeli egeesi masi doso. Osoloso diba homo siliga peegoo alaga bigili egeesi masi doso.

<sup>13</sup> Esiga abei mapoo howo ki toowa sibulone makawo sabolo sibili egeesi masi, diayo dia simili goo woola egeesee eligiliso. Osoloso diba kei ma dokodoo giwo boobadomo sili egeesi masi doso. Esiga Godeeye wulu goodomou olo mopoodoo dooso, diayo neliga omapoo kookaiyo do-boso osee dabalame.

<sup>14-15</sup> Esiga Adameeye balomo simi ee

**1:10:** 2Pita 2:12    **1:11:** Gen 4:7-8; 1Yon 3:12; 2Pita 2:15; Num 22:1-41; 16:1-35    \* **1:11: Balameeyo goo** - Balam yo Godee maga to toloso kokodo takomo sili odoo. Daga hoogoo Moseseeye badebei biame omapoo yo badebeiso. Esino yo Isalael odoonee. Yo molee talame goolee maga, yayo Godee mapoo wegigaso.    \* **1:11: Kolayo goo** - Daga hoogoo Kolaye Godee mapoo wegigime, mi goodaso. Esem o odoo sabolo mi ma kulodu misigedubuloso miso togoo doloso wediaso. Esiga oposusu hagee Numbers 16:1-35 mapoo moloso.    **1:12:** 2Pita 2:13, 17    \* **1:12: emegei sooloo deli wo ne** - Daga hoogoo tei telaga odoo oso mooloogoodoloso, diayo hedebe doloso emegei sooloo dolone debeli goo ee kauwulame nei naliso. Osoloso diayo wo ne hoo poogolone Yesu gooleebugu wo naliso.    **1:14-15:** Gen 5:18, 21-24    **1:18:** 2Pita 3:3    **1:20:** Kol 2:7

ma kulodu amawe dio 7 omapoo badeli Inokeeye malalo gooso peledabalai omaga takolone, odoo hagee bia dia goo maga egeesee takaso, "Niso ege, Lodeeye o momaiye diya bei sabolo siboso, mi odoo susuga dia goo ee midilame. Osoloso Godee mapoo koo mesili odoo oso goo tokenee too sabolo, osoloso Godee maga duwa taka eyo nei yayo dimapoo dala tenelame siboso," diso.

<sup>16</sup> Esiga diayo goweli goo ee yilige bugulone emegei dia goo takomo silesibiliso. Egeeseelone diayo suso goomoga goo mapoo dodomo silesibilone, dieso nediliyo diba teiba dolone si howeliso. Osoloso see diayo odoo abo maga bi diayo goomegeli ee talame to hadaliso.

### *Tei too mapoo kibiloso debee*

<sup>17</sup> Esiga emegei, niba ibada Lodee Yesu Kelisoye Diye di odoo oso malalo gooso peledabalai taka ee goolee.

<sup>18</sup> Bei, diayo nimapoo egeesee takaso, "Lodee mapoo osoloso o odoo mapoo manolone duwa takeli odoo oso biame hamameedee mapoo sibileiso. Osoloso diayo sibileso dia suso goomoga goo susuga ee tolone dabalaiso," diso.

<sup>19</sup> Esiga odoo hagee biaso tei too ma kulodu debeli odoo ee domo piliso. Osoloso diba nosee mipoo hageeyo goo goomegeli odoo oso. Osoloso dibada kulodu Dio Tei mauwe.

<sup>20</sup> Esino tei telaga odoo emegei, Godeeyo goo maga tei eligi goo mapoo niyo olo tei tooso. Esiga tei eligi goo ee ma dokodoo nibada gie badeli ee moso masi tege. Osoloso Dio Teiso kitulugu maga Godee mapoo takolone debee.

<sup>21</sup> Osoloso Godeeye niba sooloo dolone badoso doloso goolone, Godee mapoo hegi

sibileso debee. Osoloso Lodee Yesu Kelisoye sooloo dala maga kookaiyo bado-boso gie badeli ee talame dulone bolone ka debee.

<sup>22</sup> Osoloso tei too kibile poogoo odoo ee sooloo dolone pidilone debee.

<sup>23</sup> Osoloso odoo aboso Dou mi mapoo diyadeega, niyo ogoloso see saga gilimado sibe. Osoloso nee odoo oso goo toke-nee toga, diba medee sooloo dala sabolo pidilone dobolone, niso nediliyo medee bamelee, niba nose dibada goo tokenee hedebe omapoo dedeyaga.

*Godeeyo hu dokodoo poude*

<sup>24</sup> Godee yo kitulugu. Esiga yayo nibada tei too homodobiyaga niba pidilei, yo teiba. Osoloso yayo niba goo tokenee mauwe odoo doloso, niba o mudugiyopoo dabalame gilimado sibilei, yo teiba. Esiga niba omapoo goomoga sabolo dabalaiso.

<sup>25</sup> Esiga iyo Godeeyo hu dokodoo poudoomo. Bei, Godee hedebe hagoso ka badoso. Osoloso ibada Lodee Yesu Kelisoye iba halo tou too maga Godeeye ibada gie badeli pidiso. Esiga hedebe yayo toowa doloso ka badoso. Osoloso yayo bi susuga eyo wiligi odoo doloso ka badoso. Osoloso kitulugu susuga ee yimapoo moloso. Bi susuga moodelega badolone, yo egeesee badebeiso. Osoloso yo epedee hamapoo egeesee badoso. Osoloso yo see hamamee kookaiyo osee egeesee badalaiso. Goo hagee tei goo.

## Pidi to abo

**Diye di odo** Hu hagee Yesuye o hamamee dili odo 12 mapoo hu dia hagee hediso. Osoloso hamamee Polo nose mooloogoodoo hageeyo kulodu dileso diye di odo hu tooso.

**Godee maga to toloso kokodo takomo silesibili odo** Odo hagee bia oso Godeeye taka duloso odo mapoo takeliso. Osoloso ee ma kulodu daga hoogoo odo egeesi masi oso Godee maga to toloso o booka mapoo hoguguliso. Esiga to hogugu hagee Godeeye To Magoo Booka Nape ee ma kulodu hogugu moloso. Odo hageesi masi oso hamamee peledabalai goo sabolo, osoloso Godeeye pidili to ee odo mapoo takeliso.

**Pelisi odo** Hu hagee Yu odoowo mooloogoodoo hu heeso. Odo mooloogoodoo hagoso Moseseeye tei magoo sabolo, Godeeyo to tosili odo oso to hogugu susuga sabolo, medee dodomo siliso. Esino egeesi ma kulodu odo hagee bia oso diayo goolee maga tei abo magoloso, see Godeeyo tei magoo sabolo hodobo magooso. Osoloso diayo Godeeyo tei magoo sabolo, osoloso dia tei sabolo ee dodolone, diesono diba tekepo dolone, odo abo tokenee deliso. Goo egeesi maga Yesuye odo hagee bia dimapoo takolone, dieso nediliyo toowa deli odo diso.

**Sedisi odo** Hu hagee Yu odo mooloogoodoo heeyo hu. Esiga odo opusomo opusomo di hagee bia oso mooloogoodoo hagee ma kulodu debeiso: tei moso wiligi tebisa, osoloso dia soosoo dio, osoloso Godee ogo odo ogo doloso debeli odo abo, osoloso bi bei odo, osoloso Yu wiligi odo tebisa abo. Mooloogoodoo hagoso Loum odo sabolo emegei dolone, hee Pelisi odo goweliso. Osoloso diayo Godeeye To Magoo Booka Nape ee ma kulodu Moseseeye tei magoo mapoo tei tolone, hee Godee maga to toloso kokodo takomo silesibili odo oso to hogugu mapoo tei koo teli. Osoloso diayo odo wedia oso ta maga see hogabilei goo mapoo tei koo teli.

**Tei eligili odo** Yu odoowo mooloogoodoo abo diba Godeeye tei magoo ee

eligili odo deliso. Daga hoogoo odo hagee bia oso Moseseeye tei magoo sabolo, osoloso Godee maga to toloso kokodo takomo silesibili odo oso Godeeye To Magoo Booka Nape eyo kulodu hogugu ee gooleedalame sukulu talame diliso. Osoloso diayo tei goo ee sukulu toloso medee gooleedoloso sibilesi Godeeye tei magoo eligili odo hu teliso. Esiga odo hagee bia oso Yu odoowo howo gisili moso mapoo Godeeye tei magoo eligimo siliso. Esino egeesi ma kulodu odo abo hagee bia oso Pelisi odo dia mooloogoodoo ee ma kulodu debeliso. Esiga edebeeyo takolone, Yesu yo eligili odo, deliso. Esino yo odo eligilei goo ee gooleedalame sukulu talame dile.

**Deibidi** Deibidi hagee daga hoogoo Yesu soomagelega molome, Isalael odoowo wiligi odo toboloso badebeiso. Yayo wiligi odo toboloso badolone, Godeeye goomoga goo temelee. Esiga Deibidiyo goo ee hesigilei gooleega, goo ogo Godeeye To Magoo Booka Nape ee ma kulodu Samuel booka mapoo moloso.

**Moses** Esiga Moses hagee daga hoogoo Deibidi sabolo Yesu sabolo soomagelega molome, daga yo badebeiso. Osoloso Isalael odo Isipi mi mapoo dala ma kulodu doboome, yayo diba gilimadoloso peegoo gilimado diso. Osoloso Godeeye yimapoo tei magoo teneeso, Isalael odo oso tei magoo ee medee dadalame.

**Godeeyo to booka** Epedee hamapoo Godeeyo to hogugu booka egee tomolo Godeeye To Magoo Booka Nape sabolo Dia sabolo hodobo gooloogo doloso hogugu booka ee tomoloso. Esino Yu odo sabolo, osoloso tei telaga odo daga debei sabolo, oso Godeeyo to booka mapoo hogugu temelee ee wulo booka hedebe, ee Booka Nape oso. Esiga Diye di odo booka mapoo, Godeeyo to hogugu booka ee Booka Nape ee takooso.

**Yu odoowo hasali biame** Godeeye mipoo sabolo, osoloso kei sabolo, osoloso bi susuga ee ma kulodu egee molo sabolo, biame 6 ee ma kulodu moodooso. Osoloso biame 7 mapoo yo hasaso. Esiga biame egee Sadee pepooko oso. Esiga Yu odo oso Sadee pepooko biame mapoo tou

telega dobolone, Godee mapoo takolone debeliso. Osoloso daga Yesu mapoo tei telaga odo sabolo Sadee pepooko biame mapoo Godee mapoo takolone debeliso. Esino Yesu ta maga hogabuloso Kei mi ma dokodoo pala ogoloso hamamee, di-ayo Sadee pepooko biame poogoloso see Sadee toowa biame mapoo Godee mapoo takolone dobolone Yesu gooleebugu wo naliso.

**Yu odoowo howo gisili moso** Yu odoowo oso bia mi susuga ee ma kulodu di-ayo howo gisili moso opusomo opusomo di meleeso. Moso hageeyo kulodu di-ayo Godee mapoo takeliso. Osoloso di-ayo Moseseeye tei magoo sabolo, osoloso Godee maga to toloso kokodo takomo silesibili odoowo oso to hogugu ee hesigaloso, goo eyo bei ee medee hoodo egeliso. Egeesi ma kulodu Polo obakadio Yesu dio Yu odoowo howo gisili moso mapoo peleso Godeeyo to takomo siliso.

**Yu odoowo tei moso** Moso hagee Yu odoowo howo gisili moso sabolo hedebe-nee. Esino moso hagee wulo hedebe Yelusalem mi mapoo tegei melee. Yu odoowo tei moso hamapoo goo toowa ee hagoso. Yu odoowo oso Godee mapoo goomogalame, osoloso dibada goo toke-nee hapalame, gala hu opusomo opusomo di hado peleso moso kulodu weliso. Esino odoowo wuluge oso moso hageeyo kulodu peleso gala hu koo weli, hedebe Godee ogo odoowo ogo doloso debeli odoowo oso odoowo susuga ee halo moso omapoo peleso gala hu ka weli. Egeesi ma kulodu goo tokenee hapalame gala hu weli odoowo ee, Moses osoloso emei Elon osoloso amawe dio oso moso kulodu debeliso.

**Godeeye gababia wo nali** Godeeye gababia wo nali hagee Yu odoowo dimapoo goo diya toowa. Bei, wo ne hamapoo dobolone, Godeeye teli tosibili momaiye mapoo Isipi bia odoowo dia holope malalo soomagoo piligimo diye neme piligu goo ee gweliso. Esiga Yesuye o hamamee dili odoowo gilimadoloso, Godeeye gababia wo hagee nolone dobolone, see Yesu gooleebugu wo nali goo hagee bei mooloogooso.

**Isipi mi maga peegoo di ee gooleebugu wo nali** Wo nali hagee Yu odoowo

dimapoo goo diya toowa. Wo nali hagee bei mooloogolone, Godeeye gababia ee malalo gesi hedebe mapoo naliso. Osoloso omaga bei mooloogoloso sadee hedebe ma kulodu, Isipi mi maga peegoo di ee gooleebugulone wo ne ee ma kulodu de-beiso. Wo nali hageeyo kulodu nei abo naliso, osoloso palawa wo masi yist sabolo hemele poogoo sabolo siloso naliso.

**Pentikos biame** Esiga Pentikos biame hagee Godeeye gababia wo naloso hamamee biame 50 poogoloso omapoo bei mooloogooso. Biame hamapoo Yu odoowo oso dibada homolee mapoo nei segei gooloogaloso nala pogolone Godee mapoo goomoga poudiliso. Goo hagee Yu odoowo goo. Esino Yesu Keliso mapoo tei telaga odoowo iyo takolone, biame egee sosee oso bei mooloogoo biame, dee takeliso. Osoloso Dio Tei oso meledaba biame deliso.

**Loum** Hu hagee mi edebeeyo bia eyo hu, osoloso mi omapoo debeli odoowo hu. Loum mi hagee, Yu odoowo mi maga koolanee, Itali mi toowa eyo kulodu melee. Mi abo mapoo debeli odoowo diba Loum odoowo bolo diya ebigeli. Bei, Loum odoowo diba diya kitulugu odooga. Osoloso diayo du medee tekepo moodoogaliso. Osoloso ha teli bi sabolo medee tekepo moodoogaliso. Egeesi maga diayo kitulugu oso mi abo diayo gibadebeiso. Esiga Yesuye badebei biame mapoo diayo Loum odoowo hee Paileteeye Yu odoowo dia mi mapoo dileso gibadebeiso. Osoloso hamamee diye di odoowo oso silesibi biame mapoo see Peliks mapoo Yu odoowo dia mi gibadalame diye diso. Osoloso Peliks dileso hamamee odoowo hee Pestus yo diye diso, Yu odoowo gibadalame.

**Sisa** Esiga Sisa hu hagee odoowo hunee. Esino wulo Loum mi ee gibadeli wiligi odoowo hu oso. Esiga daga hoogoo Yesu soomagoo biame mapoo Sisa-Ogastaseeye Loum mi gibadebeiso. Osoloso see tobu Yesuye ta biame domo mapoo Sisa-Taibilyeseeye Loum mi gibadebeiso. Osoloso diye di odoowo oso silesibi biame mapoo Sisa-Kolodiyaseeye Loum mi gibadebeiso. Osoloso Diye di odoowo booka hoo poogoo hamameedee mapoo Poloye



Loum mi mapoo di biame oso Sisa-Neloye  
gibadebeiso.

## Pidi to abo

### *D* **Deibidi**

Deibidi hagee daga hoogoo Yesu soomagelega molome, Isalael odoowo wiligi odoo toboloso badebeiso. Yayo wiligi odoo toboloso badolone, Godeeye goomoga goo temeleso. Esiga Deibidiyo goo mapoo to kalai gooleega, booka nape Semiyolo mapoo moloso.

### **Diye di odo**

Hu hagee Yesuye o hamamee dili odo 12 mapoo hu dia hagee hediso. Osoloso hamamee Polo nose mooloo-goodoo hageeyo kulodu dileso diye di odo hu tooso.

### *G* **Godee maga to toloso kokodo takomo silesibili odo**

Odo hagee bia oso Godeeye taka dulo odo mapoo takeliso. Osoloso ee ma kulodu daga hoogoo odo egeesi masi oso Godee maga to toloso o booka mapoo hoguguliso. Esiga to hogugu hagee Godeeye To Magoo Booka Nape ee ma kulodu hogugu moloso. Odo hageesi masi oso hamamee peledabalai goo sabolo, osoloso Godeeye pidili to ee odo mapoo takeliso.

### **Godeeye gababia wo nali**

Godeeye gababia wo nali hagee Yu odo dimapoo goo diya toowa. Bei, wo ne hamapoo dobolone, Godeeye teli tosibili momaiye mapoo Isipi bia odo dia holope malalo soomagoo piligimo diye neme piligu goo ee gweliso. Esiga Yesuye o hamamee dili odo gili-madoloso, Godeeye gababia wo hagee nolone dobolone, see Yesu gooleebugu wo nali goo hagee bei moolooogooso.

### **Godeeyo to booka**

Epedee hamapoo Godeeyo to hogugu booka egee tomolo ee Godeeye To Magoo Booka Nape sabolo Dia sabolo hodobo goologoo doloso hogugu booka ee tomoloso. Esino Yu odo sabolo, osoloso tei telaga odo daga debei oso Godeeyo to booka mapoo hogugu

temelee ee wulo booka hedebe, ee Booka Nape oso.

### *I* **Isipi mi maga peegoo di ee gooleebugu wo nali**

Wo nali hagee Yu odo dimapoo goo diya toowa. Wo nali hagee bei moolooogolone, Godeeye gababia ee malalo gesi hedebe mapoo naliso. Osoloso omaga bei moolooogoloso sadee hedebe ma kulodu, Isipi mi maga peegoo di ee gooleebugulone wo ne ee ma kulodu debeiso. Wo nali hageeyo kulodu nei abo naliso, osoloso palawa wo masi yist sabolo hemele pogoos sabolo siloso naliso.

### *K* **Keliso**

Keliso dee egee takoo hu eyo bei ee Godeeye hesia dolone ka takooso.

### *L* **Lam be**

Lam be dee egee takoo sipi be hu gie kauwa ee takooso. Bei, Isalael odo odo tokenee goo hapalame sipi be gie kauwa wooloomaloso Godee mapoo teneliso.

### **Lodee**

Lodee dee egee takoo hu eyo bei ee wiligi odo taba dolone ka takooso.

### **Loum**

Hu hagee mi edebeeyo bia eyo hu, osoloso mi omapoo debeli odoowo hu. Loum mi hagee, Yu odoowo mi maga koolanee, Itali mi toowa eyo kulodu melee. Mi abo mapoo debeli odo diba Loum odo bolo diya ebigeli. Bei, Loum odo diba diya kitulugu odooga. Osoloso diayo du medee tekepo moodoogaliso. Osoloso ha teli bi sabolo medee tekepo moodoogaliso. Egeesi maga diayo kitulugu oso mi abo diayo gibadebeiso. Esiga Yesuye badebei biame mapoo diayo Loum odo hee Paileteeye Yu odo dia mi mapoo dileso gibadebeiso. Osoloso hamamee diye di odo oso silesibi biame mapoo see Peliks mapoo Yu odo dia mi gibadalame diye diso. Osoloso Peliks dileso hamamee odo hee Pestus yo diye diso, Yu odo gibadalame.

**M****Mesaya**

Hibulu dia toso Mesaya dee egee takoo sabolo, osoloso Guliki toso Keliso dee egee takoo goo eyo bei ee, hedebe Godeeye hesia dolone ka takooso.

**Moses**

Moses hagee daga hoogoo Deibidi sabolo Yesu sabolo soomagelega molome, daga yo badebeiso. Osoloso Isalael odo Isipi mi mapoo dala ma kulodu doboome, yayo diba gilimadoloso peegoo gilimado diso. Osoloso Godeeye yimapoo tei magoo teneeso, Isalael odo oso tei magoo ee medee dadalame.

**O****Odo Holo**

Yesuye eyo nediliyo takolone, a Odo Holo, dee taka hagee, yo tei odo dolone ka takomo silee.

**P****Pelisi odo**

Hu hagee Yu odoowo mooloogoodoo hu heeso. Odo mooloogoodoo hagos Moseseeye tei magoo sabolo, Godeeyo to tosili odo oso to hogugu susuga sabolo, medee dodomo siliso. Esino egeesi ma kulodu odo hagee bia oso diayo goolee maga tei abo magoloso, see Godeeyo tei magoo sabolo hodobo magooso. Osoloso diayo Godeeyo tei magoo sabolo, osoloso dia tei sabolo ee dodolone, diesono diba tekepo dolone, odo abo tokenee deliso. Goo egeesi maga Yesuye odo hagee bia dimapoo takolone, dieso nediliyo toowa deli odo diso.

**Pentikos biame**

Pentikos biame hagee Godeeye gababia wo naloso hamamee biame 50 poogoloso omapoo bei mooloogooso. Biame hamapoo Yu odo oso dibada homolee mapoo nei segei gooloogaloso nala pogolone Godee mapoo goomoga poudiliso. Goo hagee Yu odoowo goo. Esino Yesu Keliso mapoo tei telaga odo iyo takolone, biame egee sosee oso bei mooloogoo biame, dee takeliso. Osoloso Dio Tei oso meledaba biame deliso.

**S****Sedisi odo**

Hu hagee Yu odo mooloogoodoo heeyo hu. Esiga odo opusomo opusomo di hagee bia oso mooloogoodoo hagee ma kulodu debeiso: tei moso wiligi tebisa, osoloso dia sooso dio, osoloso Godee ogo odo ogo doloso debeli odo abo, osoloso bi bei odo, osoloso Yu wiligi odo tebisa abo. Mooloogoodoo hagos Loum odo sabolo emegei dolone, hee Pelisi odo goweliso. Osoloso diayo Godeeye To Magoo Booka Nape ee ma kulodu Moseseeye tei magoo mapoo tei tolone, hee Godee maga to toloso kokodo takomo silesibili odo oso to hogugu mapoo tei koo teli. Osoloso diayo odo wedia oso ta maga see hogabilei goo mapoo tei koo teli.

**Sisa**

Sisa hu hagee odo hunee. Esino wulo Loum mi ee gibadeli wiligi odoowo hu oso. Esiga daga hoogoo Yesu soomagoo biame mapoo Sisa-Ogastaseeye Loum mi gibadebeiso. Osoloso see tobu Yesuye ta biame domo mapoo Sisa-Taibiliyeseeye Loum mi gibadebeiso. Osoloso diye di odo oso silesibi biame mapoo Sisa-Kolodiyaseeye Loum mi gibadebeiso. Osoloso Diye di odo booka hoo poogoo hamameedee mapoo Poloye Loum mi mapoo di biame oso Sisa-Neloye gibadebeiso.

**T****Tei eligili odo**

Yu odoowo mooloogoodoo abo diba Godeeye tei magoo ee eligili odo deliso. Daga hoogoo odo hagee bia oso Moseseeye tei magoo sabolo, osoloso Godee maga to toloso kokodo takomo silesibili odo oso Godeeye To Magoo Booka Nape eyo kulodu hogugu ee gooleedalame sukulu talame diliso. Osoloso diayo tei goo ee sukulu toloso medee gooleedoloso sibilesi Godeeye tei magoo eligili odo hu teliso. Esiga odo hagee bia oso Yu odoowo howo gisili moso mapoo Godeeye tei magoo eligimo siliso. Esino egeesi ma kulodu odo abo hagee bia oso Pelisi odo dia mooloogoodoo ee ma kulodu debeliso. Esiga edebeeyo takolone, Yesu yo eligili

odoo, deliso. Esino yo odoo eligilei goo ee gooleedalame sukulu talame dile.

**W**

### **Wo mana deli**

Daga hoogoo Yu odooso dugo 40 ee ma kulodu miwe poogoo mi mapoo silesibume, Godeeye wo mana deli hagee diayo nalame teneliso. Mana deli hagee, wo masi heliye pepooko dooboo hadali.

**Y**

### **Yu odoowo hasali biame**

Godeeye mipoo sabolo, osoloso kei sabolo, osoloso bi susuga ee ma kulodu egee molo sabolo, biame 6 ee ma kulodu moodooso. Osoloso biame 7 mapoo yo hasaso. Esiga biame egee Sadee pepooko oso. Esiga Yu odoo oso Sadee pepooko biame mapoo tou telaga dobolone, Godee mapoo takolone debeliso. Osoloso daga Yesu mapoo tei telaga odoo sabolo Sadee pepooko biame mapoo Godee mapoo takolone debeliso. Esino Yesu ta maga hogabuloso Kei mi ma dokodoo pala ogoloso hamamee, diayo Sadee pepooko biame poogoloso see Sadee toowa biame mapoo Godee mapoo takolone dobolone Yesu gooleebugu wo naliso.

### **Yu odoowo howo gisili moso**

Yu odoo oso bia mi susuga ee ma kulodu diayo howo gisili moso opusomo opusomo di meleeso. Moso hageeyo kulodu diayo Godee mapoo takeliso. Osoloso diayo Moseseeye tei magoo sabolo, osoloso Godee maga to toloso kokodo takomo silesibili odoo oso to hogugu ee hesigaloso, goo eyo bei ee medee hoodo egeliso. Egeesi ma kulodu Polo obakadio Yesu dio Yu odoowo howo gisili moso mapoo peleso Godeeyo to takomo siliso.

### **Yu odoowo tei moso**

Moso hagee Yu odoowo howo gisili moso sabolo hedebeenee. Esino moso hagee wulo hedebe Yelusalem mi mapoo tegei melee. Yu odoowo tei moso hamapoo goo toowa ee hagosoo. Yu odoo oso Godee mapoo goomogalame, osoloso dibada goo tokenee hapalame, gala hu opusomo opusomo di hado peleso moso kulodu weliso. Esino odoo wuluge oso moso hageeyo kulodu peleso gala hu koo weli, hedebe Godee ogo odoo ogo doloso debeli odoo oso odoo susuga ee halo moso omapoo peleso gala hu ka weli. Egeesi ma kulodu goo tokenee hapalame gala hu weli odoo ee, Moses osoloso emei Elon osoloso amawe dio oso moso kulodu debeliso.